

काँगड़ी बाइबल

The Open Kangri Bible

This Bible is copyrighted by Free Bibles India and made available under a Creative Commons Attribution-ShareAlike 4.0 International License. Original work available at <http://www.free-biblesindia.com>.)

This Bible is provided at the cost of printing by the Digital Bible Society (dbs.org). This Bible, and many others, are available for free download in a variety of digital formats at dbs.org/bibles.

मत्ती.....	4
मरकुस	26
लूका	40
यूहन्ना	63
चेलयां दे कम्म	80
रोमियो.....	100
1 कुरिन्थियों	109
2 कुरिन्थियों	117
गलातियों.....	123
इफिसियों	127
फिलिप्पियों.....	131
कुलुस्सियों	134
1 थिस्सलुनीकियों	137
2 थिस्सलुनीकियों	140
1 तीमुथियुस.....	142
2 तीमुथियुस.....	145
तीतुस	147
फिलेमोन.....	149
इब्रानियों	150
याकूब.....	157
1 पतरस	160
2 पतरस	163
1 यूहन्ना.....	165
2 यूहन्ना.....	168
3 यूहन्ना.....	169
यहूदा	170
प्रकाशित वाक्य.....	171

मत्ती

भूमिका

मत्ती सुसमाचार एह शुभ संदेश दिंदा ऐ कि यीशु मसीह ई उद्धारकर्ता ऐ जिसदे ओणे दी भविष्यवाणी किन्ती गई थी परमात्मं पराणे - नियमे च हजारों साल पैहलें अपने लोकां नें किन्ते गै वादे जो तिसी उद्धारकर्ता यीशु मसीह दे दुआरा किता । एह शुभ संदेश सिर्फ यहूदी लोकां ताई नी ऐ, जिन्हां च यीशु पैदा होया कने पाळैया पोसेया गैआ, अपर सारे संसारे ताई ऐ ।

मत्ती दा सुसमाचार एह दस्सदा ऐ इसदी शुरुआत मसीह दे जन्म दे विवरण ते होंदा ऐ, कि प्रभु यीशु मसीह जेहड़ा संदेशा दिता तिस दी जड़ तां पराणे नियमे दियां शिक्षा थिआं । जिआं कि सौने प्हाड़े पर परमात्मं मूसे जो सैह नियम दिता कि जिस दे सहारे इस्राएलियां जो अपनी जिन्दगी जीणी थीं । भिरी यीशु मसीह दे बपतिस्मा कने परख दा वखान ऐ, कने ताहू गलीली प्रदेशे च प्रचार, शिक्षा कने ठीक करणे दी सेवा दा वखान ऐ । इसदे बाद इस सुसमाचारे च यीशु दी गलीले ते यरूशलेम तिकर यात्रा यीशु मसीह दी जिन्दगिया दे आखरी हफते दिया घटनां दा वखान ऐ, तिसदा सूलिया पर चढ़ाया जाणां कने दुवारा जिंदा होणां ऐ ।

इस सुसमाचारे च यीशु जो म्हान गुरु दे रूपे च पेश किता गैआ ऐ । तिसियो परमात्मं दी व्यवस्था दी व्याख्या करणे दा हक्क ऐ कने सैह परमात्मं दे राजे दी शिक्षा दिंदा ऐ । कने उपदेशा दी जानकारी पंजा हिस्सेयां च दिंदा ऐ (1) तिआं ई मत्ती दे सुसमाचारे च यीशु मसीह प्हाड़ी उपदेश च लोकां जो दस्सदा कि किआं परमात्मं सौगी जिन्दगी जीणी ऐ । तिआं ई मूसा दी व्यवस्था पराणे नियमे च पंजा कताबा- उत्पति, निरगमन, लैव्यव्यवस्था, गिन्ती कने व्यवस्थाविवरण च मिलदा ऐ । मत्ती अपने लिखियो सुसमाचारे च एह बी दसणां चाहंदा ऐ कि जेहड़ा यीशुयें ग्लाय्या कने कमाया तिस दे बारे चा जयादातर इस्राएलियां दे नबिया केई सौ साल पैहलें ई दस्सी दितेया था । पाठ 5-7 (2) बारां चेलयां जो सेवा दे कम्मां ताई शिक्षा दैणां (पाठ 10); (3) सुअर्ग दे राजे ते सम्बन्धित उदारण (पाठ 13); 4 शिष्यता ते सम्बन्धित शिक्षायें (पाठ 18); कने (5) सुअर्ग राजे दे ओणे वर्तमान जुग दे अन्त ते सम्बन्धित शिक्षायें (पाठ 24, 25) यीशु मसीह दा संदेश नौआं था कने संसारे दे सारे लोकां ताई था, जेहड़े मूसा दिया व्यवस्था पर चलदे थे । यीशु मसीह पर वसुआस रखणां कने तिसदी सेवा करणां कने अपने प्दिसियां सौगी प्यार रखणां ।

रूप रेखा

खानदान कने यीशु मसीह दा जन्म 1: 1 --- 2: 23
 यहूना बपतिस्मा दैणे आळे दा सेवा दे कम्म 3: 1- 12
 यीशु मसीह दा बपतिस्मा कने परख 3: 13 --- 4- 11
 गलीले च यीशु मसीह दी सेवा दे कम्म 4: 12 --- 18- 25
 गलीले ते यरूशलेम तिकर यात्रा 19: 1 --- 20- 34
 यरूशलेम च आखरी हफता 21: 1 --- 27: 66
 प्रभु यीशु मसीह दा दुआरा जिंदा होणां कने तिसदा दुस्सणां 28: 1- 20

यीशु मसीह दा खानदान (लूका 3 : 23-38)

1 अब्राहमें दा वंश कने दाऊदे दा वंश कने यीशु मसीह दा खानदान ।
 2 अब्राहमें ते इसहाक कने इसहाके ते याकूब पैदा होया, याकूबे ते यहूदा कने तिसदे भाऊ पैदा होये, 3 यहूदा कने तामार ते फिरिस व जोरह पैदा होये, फिरिसे ते हिस्त्रोने पैदा होया, कने हिस्त्रोने ते एराम पैदा होया, 4 एरामे ते अम्मीनादाब पैदा होया, अम्मीनादाबे ते नहशोन, कने नहशोने ते सलमोन पैदा होया, 5 सलमोने कने राहबे ते बोअज पैदा होया, बोअजे कने रूते ते ओबेद पैदा होया, कने ओबेदे ते यिशै पैदा होया, 6 कने यिशै ते दाऊद राजा पैदा होया, कने दाऊदे ते सुलैमान तिसा जणांसा ते पैदा होया जेहड़ी पैहले उरिय्याह दी लाड़ी थी । 7 सुलैमाने ते रहबाम पैदा होया, रहबामे ते अबिय्याह पैदा होया, कने अबिय्याह ते आसा पैदा होया, 8 आसा ते यहोशाफात पैदा होया, यहोशाफाते ते योराम पैदा होया, कने योरामे ते उज़ियाह पैदा होया, 9 उज़ियाह ते योताम पैदा होया, योतामे ते आहाज पैदा होया, कने आहाजे ते हिजकिय्याह पैदा होया, 10 हिजकिय्याह ते मनशिशह पैदा होया, मनशिशह ते आमोन पैदा होया, कने आमोने ते योशिय्याह पैदा होया; 11 कने कैदी होई नें बेबीलोन जाणे दे बगत च योशिय्याह ते यकुन्याह कने तिसदे भाऊ पैदा होये ।

12 कैदी बणाई नें बेबीलोने च पज़ाणे दे बाद यकुन्याह ते शालतिएल पैदा होया, कने शालतिएल ते जरूबाबिल पैदा होया, 13 जरूबाबिल ते अबीहूद पैदा होया, अबीहूद ते इल्याकीम पैदा होया, कने इल्याकीम ते अजोर पैदा

होया, 14 अजोरे ते सदोक पैदा होया, सदोके ते अखीम पैदा होया, कने अखीम ते इलीहूद पैदा होया, 15 इलीहूदे ते इलियाजार पैदा होया, इलियाजारे ते मत्तान पैदा होया, कने मत्ताने ते याकूब पैदा होया, 16 याकूबे ते यूसुफ पैदा होया, जेहड़ा मरियमा दा मंगेतर था कने मरियमा ते यीशु जिसियो मसीह भी ग्लां दे हन पैदा होया । 17 इस तरीके नें अब्राहमे ते दाऊदे तिकर चौदा पीढ़ियां होईयां, कने दाऊदे ते बेबीलोन तिकर कैदी बणी नें पुज़णे तिकर चौदा पीढ़ी, कने कैदी बणाई नें बेबीलोन जो पज़ाणे दे बगते ते मसीह तिकर चौदा पीढ़ियां होईयां ।

यीशु मसीह दा जन्म

(लूका 1 : 26-38; 2 : 1-7)

18 यीशु मसीह दा जन्म इआं होया, कि जाहू तिसदी मां मरियमा दी मंगणी यूसुफे कने होई गई, तां तिन्हां दे इक्क होणे ते पैहले ई सैह पवित्र आत्मां मिलणे दिया तरफा ते गर्भवती होई । 19 यूसुफ जेहड़ा मरियमा दा होणे आळा लाड़ा था, इक्क धर्मी माणु था कने तिसा जो बदनाम नी करणां चाहंदा था एह सोची करी तिन्हीं तिसा जो चुपचाप छड्डी दैणे दा वचार किता । 20 जाहू सैह इन्हां ग्लां जो सोचा ई करदा था, तां परमात्मं दा सुअर्गदूत तिसियो सुपणे च दुस्सी नें ग्लाणां लग्गा, "हे यूसुफ ! दाऊद दी औलाद, हुण तू अपणियां लाडिया मरियमा जो अप्पु अल्ल रखणे ते मत डर, कजोकि जेहड़ा तिसा दे पेटे च ऐ, सैह पवित्र आत्मां दिया तरफा ते ऐ । 21 सैह जागत जम्मी कने तू तिसदा नां यीशु रखेयां कजोकि सैह अपने लोकां दा तिन्हां दे पापां ते उद्धार करगा ।"

22 एह सब कुच्छ इसताई होया कि जेहड़ा वचन प्रभुयें भविष्यवक्ता दुआरा ग्लाय़ा था, सैह पूरा होयें, 23 दिखा, इक्की कुआरिया कुड़िया लैरथिया होणां कने इक्क जागत जम्मणां, कने तिसदा नां इम्मानुएल रखेया जांगा, "जिसदा मतलब ऐ, परमात्मां अहां सौगी। 24 ताहू यूसुफ निंदरा ते जागी करी प्रभु दे दूते दे हुकमे मताबक अपणिया लाड़िया जो अपणे अल्ल लैई आया। 25 कने जाहू तिकर मरियमा जागते जो जन्म नी दित्ता ताहू तिकर युसुफ तिसा सौगी लाड़ा - लाड़ी आळा रिश्ता नी रखया, कने जाहू जागत पैदा होया तां तिन्हीं तिसदा नां यीशु रखेया।

ज्योतिषियां दा ओणां

2 हेरोदेस राजे दे बगते च जाहू यहुदिया प्रदेशे दे बैतलहम ग्रांऐ च यीशु पैदा होया, तां पूरव दिशा ते कई ज्योत्वी यरुशलम च आई नैं पूछणां लगे। 2 यहुदियां दा राजा जिसदा जन्म होया, सैह कतांह ऐ, कजोकि अहां पूरव दिशा च तिसदा तारा दिख्या ऐ कने तिसदी भक्ति करणां आयो हन। 3 एह सुणी नैं हेरोदेस राजा कने तिस सौगी सारा यरुशलम डरी गैआ। 4 ताहू तिन्हीं लोकां दे सारे प्रधान याजकां कने शास्त्रियां जो कड़ेरी नैं पूछ्या, "मसीह दा जन्म कतांह होणां चाइदा?" 5 तिन्हां तिस नैं ग्लाय़ा, "यहुदिया दे बैतलहम ग्रांऐ च, कजोकि भविष्यवक्तें इआं लिख्या ऐ कि; 6 हे बैतलहम, तू जेहड़ा यहुदा दे प्रदेशे च ऐ, तू कुस भी तरीके नैं यहुदा दे अधिकारियां च सबते लोकां नी, कजोकि तिजो ते इक्क अधिपति निकलगा, जेहड़ा मेरी प्रजा इस्राएल दी रखवाली करगा। 7 ताहू हेरोदेसें ज्योतिषियां जो डोल किचे सददी नैं तिन्हां ते पूछ्या कि तारा ठीक कुस बगते दुस्सया था, 8 कने राजे एह ग्लाइं नैं तिन्हां जो बैतलहमे जो घल्लया, जा, तिस जागते दे बारे च ठीक ठीक पता करा, कने जाहू सैह मिली जांगा तां मिन्जो आई नैं खबर दैआ तांकि मैं भी आई नैं तिसदी भक्ति करेँ।" 9 सैह राजे दी गल्ल सुणी नैं चली गै, कने जेहड़ा तारा तिन्हां पूरव दिशा च दिख्या था सैह तिन्हां दे गांह गांह चलिया; कने जित्थु जागत था, तिसा जगाह उपर पुज्जी नैं रुकी गैआ। 10 तिस तारे जो दिखी नैं सैह बडे खुश होये। 11 तिन्हां तिन्थु पुज्जी नैं तिस जागते जो तिसदिया माऊ मरियमा सौगी दिख्या कने मुँड झुकाई नैं जागते दी भक्ति किन्ती, कने अपणां अपणां झोळू खोली नैं तिसियो सोना कने लोबान कने गंधरस भेंट चढाई। 12 ताहू सुपणे च एह चेतावनी पाई नैं कि हेरोदेसे अल्ल भिरी नी जाणां, सैह दूये रस्ते ते अपणे देशे जो चलिये।

मिस्र देशे जो जाणां

13 तिन्हां दे चली जाणे दे बाद प्रभुये दे इक्की सुअर्गदूते सुपणे च यूसुफे जो दुस्सी नैं ग्लाय़ा, "उठ, जागते जो कने तिसदिया माऊ जो लैई नैं मिस्र देशे जो नठी जा; कने जाहू तिकर मैं तिजो नी ग्लांगा, ताहू तिकर औत्थु ई रहूआं; कजोकि हेरोदेस इस जागते जो तोपा दा ऐ कि तिसियो मरवाई दें।" 14 ताहू ई सैह राती उठी नैं जागते कने तिसदिया माऊ जो लैई नैं मिस्र देशे जो चली गैआ, 15 कने हेरोदेसे दे मरणे तिकर तिन्थु रहूआ। इसताई कि एह वचन जेहड़ा प्रभुयें भविष्यवक्तां ग्लाय़ा था पूरा होयें; "मैं अपणे जागते जो मिस्रे ते सदेया।" 16 जाहू हेरोदेस राजे जो पता लगा, कि ज्योतिषियां तिस नैं धोखा किता, ताहू ई सैह गुस्से च भरौई गैआ, कने लोकां जो घल्ली नैं ज्योतिषियां दे ठीक ठीक दसयो बगते मताबक बैतलहम ग्रांऐ च कने तिसदे अकखे बकखे दियां जहणां च जेहड़े दू सालां ते लोके सब बच्चे थे मरवाई दित्ते। 17 ताहू जेहड़ा वचन यिर्मयाह भविष्यवक्ता दे दुआरा ग्लाय़ा गैआ था, सैह पूरा होईया; 18 "रामाह च इक्क बड़ा भरी दुख कने रोणे दा हल्ला सुम्मेयां, राहेल अपणे जागतां ताई रौआ दी थी, कने चुप नी होणां चाहंदी थी, कजोकि सैह हुण नी रह्यो थे।"

मिस्र देशे ते वापस ओणां

19 जाहू हेरोदेस मरी गैआ, तां प्रभु दे दूते मिस्रे च यूसुफे जो सुपणे च दुस्सी नैं ग्लाय़ा, 20 उठ, जागते कने तिसदिया माऊ जो लैई नैं इस्राएल देशे जो चली जा, कजोकि जेहड़े जागते दिया जान्नी लैणां चाहंदे थे, सैह मरी गैयो हन। 21 सैह उठया, कने जागते कने तिसदिया माऊ जो सौगी लैई नैं इस्राएल देशे च आई गैआ। 22 अपर एह सुणी नैं कि अरखिलाउस अपणे बुडे

हेरोदेस राजे दी जगाह यहुदिया पर राज करा दा ऐ, तिन्थु जाणे ते डरया। भिरी सुपणे च परमात्मे ते चेतावनी सुणी नैं गलील प्रदेशे जो चली गैआ। 23 कने नासरत नांये दे सैहरे च जाई बसेया, तांकि सैह वचन पूरा होयें, जेहड़ा भविष्यवक्तें ग्लाय़ा था; "सैह नासरी नांये ते जाणेयां जांगा।

यूहन्ना बपतिस्मा दैणे आळा

(मरकुस 1 : 1-8; लूका 3 : 1-18; यूहन्ना 1 : 6-8, 15-34)

3 तिन्हां दिनां च यूहन्ना बपतिस्मा दैणे आळा आई नैं यहुदिया दे सुनसाण जगाह च एह प्रचार करणां लग्गा; 2 "मने बदला, कजोकि सुअर्गे दा राज नैहडें आई गैआ ऐ।" 3 एह सैई ऐ जिसदे बारे च यशायाह भविष्यवक्तें ग्लाय़ा था, सुनसाण जगाह च कोई हक्कां पा करदा, कि प्रभु दा रस्ता त्यार करा, तिसदियां सडकां सीधियां करा। 4 यूहन्ना ऊटां दे बाळां दे कपडे बणाई नैं लगांदा था, कने अपणे लक्के च चमड़े दा पटका बनी रखदा था। सैह टिड्डीयां कने जंगली मखीर खांदा था। 5 ताहू यरुशलम कने सारे यहुदिया, कने यरदन दरैयाऐ दे अकखे बकखे दे सारी जगांह दे माणु तिस अल्ल आइये। 6 तिन्हां अपणे अपणे पापां जो मनी नैं यरदन दरैयाऐ च तिसते बपतिस्मा लैआ। 7 जाहू तिन्हीं मते फरीसियां कने सदूकियां जो बपतिस्मे ताई अप्पु अल्ल ओंदे दिख्या, तां तिन्हां नैं ग्लाय़ा, "हे सरप दे बच्चेयो, तुहां जो कुणी दुस्सी दित्ता कि परमात्मे दे ओणेआळे गुस्से ते नठा?" 8 इसताई मन बदलणे जोग्गा फळ लैयोआ; 9 कने अपणे अपणे मने च एह मत सोचा कि अहां दा पिता अब्राहमे ऐ; कजोकि मैं तुहां नैं ग्लांदा ऐ कि परमात्मां इन्हां पत्थरां ते अब्राहमे ताई औलाद पैदा करी सकदा ऐ। 10 हुण कुआड़ी रुखे दिया जडा पर रखियो ऐ, इसताई जेहड़ा जेहड़ा रुख खरा फळ नी दिंदा, तिसियो बड्डी नैं अग्गी च फूकी दिंदे हन। 11 "मैं तां पाणिये ते तुहां जो मने बदलणे दा बपतिस्मा दिंदा ऐ, अपर जेहड़ा मेरे बादे च आणे आळा ऐ, सैह मिन्जो ते बड़ा शक्तिशाली ऐ; मैं तिसदी जूतियां चुकणे जोग्गा भी नी ऐ। सैह तुहां जो पवित्र आत्मां कने अग्गी ते बपतिस्मा दिंगा। 12 तिन्हीं अपणे हत्थे च त्रोगला पकड़ेया, कने सैह अपणेयां खेतां जो खरा किता साफ करगा, कने अपणियां कणकां जो पेडूये च किड्दा करगा, अपर भूहे जो तिसा अग्गी च फूकगा, जेहड़ी कदी भी नी बुझदी।"

यूहन्ने यीशु जो बपतिस्मा दित्ता

(मरकुस 1 : 9-11; लूका 3 : 21,22; यूहन्ना 1 : 31-34)

13 तिस बगते यीशु गलील ते यरदन दरैयाऐ कंडे यूहन्ने अल्ल बपतिस्मा लैणां आया। 14 अपर यूहन्ना एह ग्लाइं नैं तिसियो रोकणां लग्गा, "मिन्जो तां तेरे हत्थे ते बपतिस्मा लैणे दी जरूरत ऐ, कने तू मिन्जो अल्ल आया?" 15 यीशुयें तिसियो एह जबाब दित्ता, "हुण तां इआं ई होणां दे, कजोकि अहां जो इआं ई इस नियमे जो पूरा करणां ठीक ऐ, ताहू तिन्हीं तिसदी गल्ल मनी लैई। 16 कने यीशु बपतिस्मा लैई नैं झट पाणिये ते बाहर आया, कने दिख्या तिस ताई अम्बर खुली गैआ, कने तिन्हीं परमात्मे दी आत्मां जो कबूतरे साइआं लौदें कने अपणे पराले ओंदे दिख्या। 17 कने दिखा, एह आकाशवाणी होई: "एह मेरा प्यारा पुतर ऐ, जिसते मैं बड़ा भरी खुश ऐ।"

यीशु मसीह दी परख

(मरकुस 1 : 12-13; लूका 4 : 1-13)

4 भिरी आत्मां यीशुये जो उजाड़ जगाह च लैई गैआ, तांकि सैतान अपणे दूत इबलीस ते तिसदी परीक्षा करी सकें। 2 तिन्हीं चाली दिन, कने चाली रात, व्रत रखेया, ताहू तिसियो भूख लग्गी। 3 ताहू परखणे आळे बकखे आई नैं तिस नैं ग्लाय़ा, "जे तू परमात्मे दा पुतर ऐ, तां ग्लाइं दे, कि एह पत्थर रोटियां बणी जांन।" 4 यीशुयें जबाब दित्ता: लिख्या ऐ, "माणु सिर्फ रोटिया ई ते नी अपर हर इक्क वचने ते जेहड़ा परमात्मे दे मुंमं ते निकळदा ऐ, जिदा रहंगा।"

5 ताहू इबलीस सैतान तिसियो पवित्र सैहर यरुशलमे दे बडे मंदरे जो लैई गैआ कने तिसियो मंदरे दिया चुंडियां पर खरेडी दित्ता, 6 कने तिस नैं ग्लाय़ा, "जे तू परमात्मे दा पुतर ऐ, तां अप्पु जो थलें सट्टी दे; कजोकि लिख्या ऐ:

सैह तेरे बारे च अपने सुअर्गदूतां जो हुक्म दिंगा, कने सैह तिजो हथों हथ चुकी लैगे; कुत्थी इआं ना होयें कि तेरेयां पैरां च पत्थरे नैं चोट लगें ।”

7 यीशुयें तिस नैं ग्लाय, “एह भी लिख्या ऐ: ‘तू प्रभु अपने परमात्में जो मत परख ।’ 8 भिरी इबलीस तिसियो इक्क बडे ऊचे प्हाड़े पर लैईया कने सारे संसारे दे राजे कने तिसदा नजारा दरस्सी नैं 9 तिस नैं ग्लाय, “जे तू पैई नैं मिन्जो प्रणाम करे, तां मैं एह सब कुच्छ तिजो देई दिंगा ।” 10 ताहू यीशुयें तिस नैं ग्लाय, “हे सैतान दूर होई जा, कजोकि लिख्या ऐ: ‘तू प्रभु अपने परमात्में जो प्रणाम कर, कने सिर्फ तिस दी भक्ति कर ।’ 11 ताहू सैतान तिस वल्ला ते चली गैआ, कने दिखा, सुअर्गदूत आई नैं तिसदी सेवा करणां लगे ।

यीशु मसीह दा सेवा दे कम्म शुरू
(मरकुस 1 : 14,15; लूका 4 : 14-31)

12 जाहू तिन्हीं एह सुणेया कि यूहन्ना बंदी बणाई लैआ, तां सैह गलीला जो चली गैआ । 13 कने सैह नासरते जो छड्डी नैं कफरनहूम सैहरे च, जेहड़ा झीला दे कंडे जबूलन कने नमाली दे देशे च ऐ, जाई नैं रैहणां लग्गा; 14 तांकि जेहड़ा यशायाह भविष्यवक्ता दे दुआरा ग्लाय गैआ था, सैह पूरा होयें:

15 “जबूलन कने नमाली दे देशे झीला दे रस्ते ते यरदन दरयाऐ दे पार गैर - यहूदियां दा गलील प्रदेश --- 16 जेहड़े माणु नैहरे च बैठयो थे, तिन्हां बड़ी जोती दिखी; कने जेहड़े मौता दे देशे च कने छाउआं च बैठयो थे, तिन्हां पर जोती चमकी ।” 17 तिस बगत ते यीशुयें प्रचार करणां कने एह ग्लानां शुरू कित्ता, “मने बदला कजोकि सुअर्गे दा राज नैहडें आया ऐ ।”

पैहलें चेलयां जो चुणना

(मरकुस 1 : 16-20; लूका 5 : 1-11; यूहन्ना 1 : 35-42)

18 यीशु गलीले दिया झीला दे कंडे हंडदे हंडदे तिन्हीं दूँ मरुआरे भाऊआं जो झीला च जाळ पां दे दिख्या, जिन्हां च इक्क शमौन जिसियो पतरस ग्लां दे थे, कने तिसदा ई भाऊ अन्द्रियास । 19 यीशुयें तिन्हां नैं ग्लाय, “मिन्जो पचांह चली ओआ, तां मैं तुहां जो माणुआं जो पकड़णे आळा बणांगा ।” 20 सैह ताहू ई जाळां जो छड्डी नैं तिसदे पचांह चली पै ।

21 तित्थु ते गांह जाई नैं, यीशुयें होर दूँ भाऊआं जो मतलब जबदिये दे पुत्तर याकूबे कने तिसदे भाऊये यूहन्ने जो दिख्या । सैह अपने बुडे जबदिये सौगी किस्तिया पर अपने जाळां जो ठीक करा दे थे । तिन्हीं तिन्हां जो भी सदेया । 22 सैह ताहू ई किस्तिया कने अपने बुडे जो छड्डी नैं तिस दे पचांह चली पै ।

यीशु मसीह दा बमारां जो ठीक करणां
(लूका 6 : 17-19)

23 यीशु सारे गलीले च घूमदा होया यहूदियां दे अराधनालयां च शिक्षा दिंदा, कने परमात्में दे राजे दा सुसमाचार प्रचार करदा, कने लोकां दी हर तरांह दियां बमारियां कने कमजोरियां जो दूर करदा रैहआ । 24 कने सारे सीरिया देशे च तिसदा नां फैलदा गैआ; कने माणु सारे बमारां जो, जेहड़े कई किस्मां दियां बमारियां कने दुखां च जकड़यो थे, कने जिन्हां च दुष्टआत्मां थियां, कने मिर्गी आळेयां कने अधरंगे दे रोगियां जो तिस अल्ल लैई आये कने तिन्हीं तिन्हां जो ठीक कित्ता । 25 गलील कने दिकापुलिस, यरुशलैम, यहूदिया कने यरदन दरैयाऐ दे पारे ते भीड़ा दी भीड़ तिसदे पचांह चली पैई ।

यीशु मसीह दी प्हाड़ी शिक्षा

5 सैह भीड़ा जो दिखी नैं प्हाड़े पर गोईया, कने जाहू बैइया तां तिसदे चले तिस अल्ल आईये । 2 कने सैह तिन्हां जो एह प्रवचन दैणां लग्गा;

धन्य वचन

(लूका 6 : 20-23)

3 धन हन सैह, जेहड़े मने दे दीन हन, कजोकि सुअर्गे दा राज तिन्हां दा ई ऐ ।

4 धन हन सैह, जेहड़े अफसोस करदे हन, कजोकि सैह शांति पांगे ।

5 धन हन सैह, जेहड़े नम्र हन, कजोकि सैह धरतिया दे अधिकारी हांगे ।

6 धन हन सैह, जेहड़े धर्मिकता दे भूखे कने प्यासे हन, कजोकि सैह तृप्त कित्ते जांगे ।

7 धन हन सैह, जेहड़े दया करणे आळे हन, कजोकि तिन्हां पर दया कित्ती जांगी ।

8 धन हन सैह, जेहड़े जिन्हां दे मन साफ हन, कजोकि सैह परमात्में जो दिखगे ।

9 धन हन सैह, जेहड़े इक्की दूये सौगी मेल करणे आळे हन, कजोकि सैह परमात्में दे जागते दे नांये ते जाणये जांगे ।

10 धन हन सैह, जेहड़ा धर्मिकता दिया बजाह ते सताये जांदे हन, कजोकि सुअर्ग दा राज तिन्हां दा ऐ ।

11 धन हन तुहां, जाहू माणु मेरिया बजाह ते तुहां दी बुराई करगे, कने सतांगे कने झूठियां गलां ग्लाय नैं तुहां दे बरखलाफ हर तरांह दी बुरिआं गलां ग्लाने ।

12 ताहू खुश कने मगन होनेयां कजोकि तुहां ताई सुअर्गे च इक्क बडा फळ ऐ । इसताई कि तिन्हां लोकां भविष्यवक्तां जो जेहड़े तुहां ते पैहले थे, इआं ई सताया था ।

लूण कने जोती

(मरकुस 9 : 50; लूका 14 : 34-35)

13 “तुहां धरतिया दे लूण हन; अपर जे नुणै दा सुआद बिगड़ी जां, तां सैह भिरी कुसा चीजा नैं लूणका हुंगा, भिरी सैह कुसी कम्मे दा नी ऐ, सिर्फ इसियो बाहर सटेया जांदा? कने माणुआं दे पैरां हैठ लतुदां ऐ । 14 तुहां संसारे दी जोती हन । जेहड़ा शैहर प्हाड़े पर बसेया ऐ सैह कदी छूपी नी सकदा । 15 कने माणु दीया बाळी नैं डल्ला थलै नी अपर कलम्पे पर रखदे हन, कने तिस नैं घरे दे सारे लोकां जो लौ पुज्जदी ऐ । 16 तिआं ई तुहां दी लौ माणुआं दे सामणे चमकी नैं सैह तुहां दे खरे कम्मां जो दिखी नैं तुहां दे पिता दी, जेहड़ा सुअर्गे च ऐ, तरीफ करगा ।

कानून दी शिक्षा

17 एह मत समझा, कि मैं व्यवस्था या भविष्यवक्ता दी कताबा जो नाश करणां आया, नाश करणां नी आया, अपर पूरा करणां आया । कि जाहू तिकर अम्बर कने धरती टली नी जां । 18 कजोकि मैं तुहां जो सच सच ग्लांदा, कि जाहू तिकर अम्बर कने धरती टली ना जां, ताहू व्यवस्था ते इक्क मात्रा या इक्क बिंदु भी बगैर पूरा होये नी टलगा । 19 इसताई जेहड़ा कोई इन्हां छोटे ते छोटे हुक्मां च कुस्सी इक्की जो भी तोडगा, कने तिआं ई लोकां जो सखांगा, सैह सुअर्गे दे राज च सबना ते लोकां समझेया जांगा; अपर जेहड़ा कोई तिन्हां हुक्मां दा पालण करगा कने तिन्हां जो सखांगा, सैई सुअर्गे दे राजे च म्हान हुंगा । 20 कजोकि मैं तुहां नैं ग्लांदा, कि जे तुहां दी धार्मिकता कने शास्त्रियां कने फरीसियां दी धार्मिकता ते बधीकरी ना होंन, तां तुहां सुअर्गे दे राजे च कदी नी पुज्जी सकदे ।

गुस्सा कने खून

21 तुहां इसा गला जाणदे हन, कि पराणे जमाने दे लोकां जो ग्लाय था खून मत करदे, कने जेहड़ा कोई खून करगा सैह कचेहरी च सज्जा दा हक्कदार हुंगा । 22 अपर मैं तुहां नैं एह ग्लांदा ऐ, कि जेहड़ा कोई अपने भाऊये पर गुस्सा करगा, सैह कचेहरी च सज्जा दा हक्कदार हुंगा, कने जेहड़ा कोई अपने भाऊये जो नकम्मा ग्लांदा, सैह महासभा च सज्जा दा हक्कदार हुंगा; कने जेहड़ा कोई ग्लां ‘अरे मूर्ख सैह नरके दी अग्नी दी सज्जा दा हक्कदार हुंगा । 23 इसताई जे तू अपणियां भेटा परमात्में सामणे वेदी पर चढाणे ताई लैयांगा, कने तित्थु तिजो याद ओंये, कि मेरे भाऊये दे मने च मेरिया बजाह ते कुच्छ बेर ऐ, 24 तां अपणी भेटा तित्थु वेदी सामणे छड्डी दै, कने जाई नैं पैहले अपने भाऊये नैं मेल मिलाप कर कने भिरी आई नैं अपणी भेटा परमात्में जो चढा । 25 जाहू तिकर तू अपने दुश्मणे सौगी रस्ते च चलेया ऐ, तिस सौगी झट पट मेल मिलाप करी ले कुत्थी इआं ना होयें कि दुश्मण तिजो जजे दे हुआले करी दै, कने जज तिजो सपाईयां हुआले करी दै, कने तू जेला च पाई दिता जां । 26 मैं तिजो नैं सच ग्लांदा कि जाहू तिकर तू इक्क - इक्क पैसा भरी नी दै ताहू तिकर तित्थु ते नी छुटी सकदा ।

व्यभिचार

27 तुहां सुणी बैठयो हन कि ग्लाय़ा था, 'व्यभिचार ना करणां । 28 अपर मैं तुहां नै एह ग्लांदा, कि जेहड़ा कोई कुसी भी जणांसा जो बुरिया नजरां नै दिखगा सैह अपणे मने च तिसा नै व्यभिचार करी चुकेया । 29 जे तेरी सज़ी अंख तिजो ठोकर खुआं, तां तिसायो कड्डी नै सट्टी दै; कजोकि तिजो ताई ऐही खरा ऐ कि तेरे अंगा च इक्क नाश होई जाये अपर तेरा सारा शरीर नरके च नी पाया जाये । 30 जे तेरा सज़ा हत्थ तिजो ठोकर खुआं, तां तिस जो बड्डी नै सट्टी दै; कजोकि तिजो ताई ऐही खरा ऐ कि तेरे अंगा च इक्क नाश होई जांदा तां तेरा सारा शरीर नरक च नी पाया जां ।

तलाक

(मत्ती 19 : 9 मरकुस 10 : 11,12 ; लूका 16 : 18)

31 एह भी ग्लाय़ा था, "जेहड़ा कोई अपणियां लाडिया जो तलाक दैणां चाहंदा, तां तिसायो त्यागपतर दें ।" 32 अपर मैं तुहां नै एह ग्लांदा ऐ कि जेहड़ा कोई अपणियां लाडिया जो व्यभिचारे जो छड्डी नै कुसी होर बजाह ते तलाक दें, तां सैह तिसा ते व्यभिचार करवांदा ऐ; कने जेहड़ा कोई तिसा छड्डिया जो व्वाही लें, सैह व्यभिचार करदा ऐ ।

कसम

33 भिरी तुहां सुणया ऐ कि पराणे जमाने दे लोकां जो ग्लाय़ा था, "झूठी कसम मत खांदे अपर प्रभु ताई अपणियां कसमा जो पूरिया करणां ।" 34 अपर मैं तुहां नै एह ग्लांदा ऐ कि कदी कसम मत खांदे; ना तां सुअर्गे दी, कजोकि सैह परमात्मं दा सिंहासन ऐ; 35 ना तां धरतिया दी, कजोकि सैह तिसदेयां पैरां दी चौकी ऐ; ना तां यरुशलम दी कजोकि सैह महाराजे दा शहर ऐ । 36 अपणे मुँडे दी भी कसम मत खांदा कजोकि तू इक्की बाले जो भी चिटटा, कने काला नी करी सकदा । 37 अपर तुहां दी गल्ल हां दी हां या ना दी ना होयें; कजोकि जेहड़ा कुच्छ इसते जादा हुंदा ऐ सैह बुराईया ते हुंदा ऐ ।

बदला

(लूका 6 : 29 - 30)

38 तुहां सुणेया ऐ कि ग्लाय़ा था, अंखी दे बदले अंख, कने दंदे दे बदले दंद । 39 अपर मैं तुहां नै एह ग्लांदा कि बुरे दा मुकाबला मत करणां; अपर जेहड़ा कोई तेरिया सज़िया खाखा पर थप्पड़ मारे, तिसदे गांह दूरिया खाखा भी करी दैआ । 40 जे कोई तिजो पर जबरदस्ती करी नै तेरा कुरता लैणां चाहंदा, तां तिसियो धोती भी लैणां दैआ । 41 कने जे कोई तिजो जबरदस्ती इक्क कोस भर लैई जाणे ताई मजबूर करें, तां तिस सौगी दो कोस होर चली जा । 42 जेहड़ा कोई तिजो ते मंगे, तिसियो दे; कने जेहड़ा तिजो ते उधार लैणां चाहंदा, तिसते मुँमें मत फेर ।

दुशमणां नै प्यार

(लूका 6 : 27, 28, 32-36)

43 तुहां सुणेया ऐ कि ग्लाय़ा था, अपणे प्जोसिये सौगी प्यार रखणां, कने अपणे बैरिये सौगी बैर । 44 अपर मैं तुहां नै एह ग्लांदा कि अपणे बैरियां सौगी प्यार रखा कने अपणे सताणे आळ्यां ताई प्रार्थना करा, 45 तांकि तुहां अपणे सुअर्गिय पिता दी औलाद बणगें जेहड़ा कि सुअर्गे च ऐ कजोकि तिसदा सूरज खरे कने बुरे दूनी माणुआं पर सीरदा ऐ, कने इआं ई बरखा भी पवित्र कने अपवित्र दूनी माणुआं पर बरदी ऐ, 46 कजोकि जे तुहां अपणे प्यार रखणे आळ्यां सौगी प्यार रखगे, तां तुहां ताई क्या फळ हुंगा, कजोकि चुंगी लैणेआळे भी इआं नी करदे हन ।"

47 जे तुहां सिर्फ अपणे भाऊआं जो ई नमस्कार करन, तां तुहां कुण दैआ बडा कम्म करदे हन, कजोकि दूरियां जातिआं भी तां ऐदेया नी करदियां हन । 48 इसताई चाइदा कि तुहां म्हांन बणां, जिआं तुहां दा सुअर्गिय पिता सिख ऐ ।

दान

6 चुकनै रहैआ! तुहां माणुआं जो दसणे ताई अपणे धर्मं दे कम्मा जो मत करा, नी तां अपणे सुअर्गिय पिता ते कुच्छ भी फळ नी पाई सकदे हन । 2 इसताई जाहू तू दान करे, तां अपणे गांह बाजा मत बुजवा, जिआं बेइमान, महासभा कने गलियां च करदे हन, तांकि माणु तिन्हां दी तरीफ करन । मैं तुहां नै सच ग्लांदा कि सैह अपणां फळ पाई बैठयो हन । 3 अपर जाहू तू दान करे, तां जेहड़ा तेरा सज़ा हत्थ करदा ऐ, सैह तेरे खब्बे हत्थेयो पता नी लग्गें । 4 तांकि तेरा दान गुप्त रहै, कने ताहू तेरा पिता जेहड़ा गुप्त च दिखदा ऐ तिजो सैह फळ दिंगा ।

प्रार्थना

(लूका 11 : 2-4)

5 "जाहू तू प्रार्थना करे, तां बेइमाना साइआं मत कर, कजोकि लोकां जो दसणे ताई आराधानालयां च कने सडकां दे मोडां पर खड्डी नै प्रार्थना करणां तिन्हां जो खरा लगदा ऐ । मैं तुहां नै सच ग्लांदा कि सैह अपणां फळ पाई बैठयो हन । 6 अपर जाहू तू प्रार्थना करे, तां अपणे कमरे च जा; कने दूरआजे बंद करी नै अपणे पिता ते जेहड़ा गुप्त च ऐ प्रार्थना कर । ताहू तेरा पिता जेहड़ा गुप्त च दिखदा ऐ, तिजो फळ दिंगा । 7 प्रार्थना करदे बग्त गैर - यहूदियां साइआं बक बक मत करा, कजोकि सैह समझदे हन कि तिन्हां दे बडा ग्लाणे ते तिन्हां दी सुणी जांगी । 8 इसताई तुहां तिन्हां साइआं मत बणां, कजोकि तुहां दा पिता तुहा दे मंगणे ते पैहले ही जाणदा ऐ कि तुहां दी क्या क्या जरूरतां हन ।

9 तुहां इस तरीके नै प्रार्थना करा करा, हे अहां दे पिता, तू जेहड़ा सुअर्गे च ऐ; तेरा नां पवित्र मनेया जां ।

10 तेरा राज्ज ओंये । तेरी इच्छा जिआं सुअर्गे च पूरी होंदी ऐ, तिआं ई धरतिया पर भी होयें ।

11 अहां दी दिने दी रोटी अज्ज अहां जो दे ।

12 कने जिआं अहां अपणे अपराधियां जो माफ कित्या ऐ, तिआं ई तूमी अहां दे अपराधां जो माफ कर ।

13 कने अहां जो परीक्षा च मत पा, अपर बुराईया ते बचा; (कजोकि राज्ज, शक्ति कने महिमा सदा तेरे ई हन ।' आमीन ।)

14 इसताई जे माणु दे अपराध माफ करगे, तां तुहां दा सुअर्गिय पिता भी तुहां जो माफ करगा ।

15 कने तुहां माणुआं दे अपराधां जो माफ नी करगे, तां तुहां दा पिता भी तुहां दे गुनाहां जो माफ नी करगा ।

व्रत

16 "जाहू तुहां व्रत करा, तां बेइमाना साइआं तुहां दे मुँमें पर उदासी ना होयें, कजोकि सैह अपणे मुँमे जो बुरा बणाई रखदे हन, तांकि माणु तिन्हां जो व्रत करणे आळा जाणन । मैं तुहां नै सच ग्लांदा कि सैह अपणां फळ पाई चुकेयो । 17 अपर जाहू तू व्रत करे अपणे मुँडे पर तेल मळ कने मुँमें धोई लै, 18 तांकि माणु नी पर तेरा पिता जेहड़ा गुप्त च ऐ, तिजो व्रत करणेआळे जाणे । इसा हालता च तेरा पिता जेहड़ा गुप्त च दिखदा ऐ, तिजो फळ दिंगा ।

सुअर्गिय धन दौलत

(लूका 12 : 33,34)

19 अपणे ताई धरतिया पर धन दौलत मत कठेरा, जित्थू कीडा कने भुत्थी खराब करदी ऐ, कने जित्थू चोर टक लगाई नै चोरी लेंदे हन । 20 अपर अपणे ताई सुअर्गे च धन दौलत कठेरा, जित्थू ना तां कीडा कने ना भुत्थी खराब करदे हन, कने जित्थू ना चोर टक लगाई नै चोरी सकदे हन । 21 कजोकि जित्थू तेरा धन दौलत ऐ तित्थू तेरा मन भी लगया रहैगा ।

शरीरे दी जोती

(लूका 11 : 34-36)

22 "शरीरे दा दीय्या अंख ऐ इसताई जे तेरी अंख साफ होयें, तां तेरा सारा शरीर भी परगडा हुंगा । 23 अपर तेरी अंख बुरी होये । तेरा सारा शरीर भी

नैहरा हुंगा; इसा बजाह ते सैह लौ तां तिजो च ऐ, जे नैहरा होयें तां सैह नैहरा किआं बडा हुंगा ।

परमत्मां कने धन दौलत (लूका 16 : 13; 12 : 22-31)

24 "कोई माणु दूँ मालकां दी सेवा नी करी सकदा, होई नी सकदा कि सैह इक्की नैं बैर कने दूये नैं प्यार रखगा, इक्की नैं मिलेया रँहगा कने दूये जो घटिया समझगा । तुहां परमत्मां कने धन दौलत दूनी दी सेवा नी करी सकदे ।

25 इसताई मैं तुहां नैं ग्लांदा कि अपणे प्राणां तांई एह फिकर मत करा कि अहां क्या खांगे कने क्या पींगे; कने ना अपणे शरीरे तांई कि क्या लगांगे । क्या प्राण खाणे ते, कने शरीर कपड़ेयां ते कीमती नी ऐ ।" 26 अम्बरे दे पंछियां जो दिखा सैह ना बादें हन, ना बडदे हन, कने ना तां पेडुयां च कठेरदे हन; भिरी भी तुहां दा सुअर्गीय पिता तिन्हां जो खुआंदा ऐ । क्या तुहां तिन्हां ते जादा कीमती नी हन? 27 तुहां च कुण ऐ, जेहड़ा फिकर करी नैं अपणियां उम्रा च इक्क मिनट भी बधाई सकदा ऐ ।"

28 कने कपड़ेयां तांई कजो फिकर करदे हन, बणे दे फूलां पर ध्यान करा कि सैह किआं बढदें हन; सैह ना मेहणत करदे हन, ना बडदे हन । 29 तमी मैं तुहां नैं ग्लांदा कि सुलैमाने भी, अपणियां सारी महिमा च तिन्हां कुसी साइआं कपड़े नी पैहनेयो थे। 30 इसताई जाहू परमत्मां दरबडे दे घाहे जो, जेहड़ा अज्र ऐ कने कल तिसियो अमी च फूकेया जांगा, इतने छैल कपड़े पैहनदा ऐ, तां हे वेवसुआसियो, तुहां जो सैह इन्हां ते बधी करी कजो नी पैहनांगा ।

31 इसताई तुहां फिकर करी नैं एह मत ग्लांदा कि अहां क्या खांगे, या क्या पींगे, या क्या लगांगे । 32 कजोकि गैर - यहूदियां दे माणु इन्हां सारियां चीज्रां दी तोपा च रँहदे हन, अपर तुहां दा सुअर्गीय पिता जाणदा ऐ कि तुहां इन्हां सारियां चिज्रां दी जरूरत ऐ । 33 इसताई पैहले तुहां परमत्मां दे राज कने तिसदे धर्म जो तोपा तां एह सारियां चिज्रां भी तुहां जो मिली जांगियां ।

34 कने कले दी चिंता मत करा, कजोकि कले दा दिन अपणी चिंता अप्पु करी लैगा; अज्रे तांई अज्रे दा ई दुख बडा ऐ ।"

दूयेयां पर दोष मत लग्गा (लूका 6 : 37,38, 41,42)

7 दोष मत लग्गा कि तां तुहां पर भी दोष नी लगणां । 2 कजोकि जिआं तुहां दोष लगांदे हन, तिआं ई तुहां पर भी दोष लगाया जांगा; कने जिस नापे नैं तुहां नापदे हन, तिसी नापे नैं तुहां तांई भी नपोणां ।

3 तू कजो अपणे भाऊये दी अंखी दे कखे जो दिखदा ऐ, कने तिजो अपणियां अंखी दा कख नी दुस्सदा । 4 जाहू तेरिया ई अंखी च कख ऐ, तां तू अपणे भाऊये जो किआं ग्लाई सकदा कि ऊरिया मैं तेरिया अंखी ते कखे जो कड्डी दिंदा ।" 5 बेइमान पैहले अपणियां अंखी ते कखे कड्डी लै, तां भिरी तू अपणे भाऊये दी अंखी दा कख खरा करी दिखी नैं कड्डी सकगा ।

6 पवित्र चीज्र कुतयां जो मत दैआ, कने अपणे मोती सूरुं दे गांह मत पा, इआं ना होयें कि सैह तिन्हां जो पैरां हैठ दैई दैन कने मुडी नैं तुहां जो चिरी - फाडी दैन ।

मंगे तां मिलगा (लूका 11 : 9-13)

7 मंगे, तां तुहां जो दितेया जाणां; तोपगे तां तुहां जो मिलणां; दुरआजे ठोरगे, तां तुहां तांई खोलेया जाणां । 8 कजोकि जेहड़ा कोई मंगदा ऐ, तिसियो मिलदा ऐ, कने जेहड़ा तोपदा ऐ, सैह पांदा ऐ, कने जेहड़ा दुरआजे ठोरदा ऐ, तिस तांई खोलेया जांदा ऐ ।

9 तुहां च ऐदेया कुण माणु ऐ, की जे तिसदे पुत्तर तिसते रोटी मंगन तां सैह पत्थर दै? 10 या मच्छी मंगे तां सर्प दै? 11 जे तुहां बुरे होई नैं अपणे बच्चेयां जो खरियां चीज्रां दैणां जाणदे हन, तां तुहां दा सुअर्गीय पिता अपणे मंगणे आळेयां जो खरियां चीज्रां कजो नी दिंगा? 12 इसा बजाह ते जेहड़ा कुच्छ तुहां चाहंदे हन कि माणु तुहां सौगी करे, तुहां भी तिन्हां सौगी तिआं ई करा; कजोकि व्यवस्था कने भविष्यवक्ता दी शिक्षा ऐही ऐ ।

संगडा कने चौडा रस्ता (लूका 13 : 24)

13 संगडे दुरआजे ते प्रवेश करा, कजोकि चौडा ऐ सैह दुरआजा कने सोखा ऐ सैह रस्ता जेहड़ा बरबादिया जो पुज्रांदा ऐ कने मते भरी हन जेहडे तिस च प्रवेश करदे हन । 14 कजोकि संगडा ऐ सैह दुरआजा कने ओखा ऐ सैह रस्ता जेहड़ा जिन्दगिया च पज्रांदा ऐ ; कने थोडे हन जेहडे इसियो पांदे हन ।

सिदेया रुख तिदेया फळ (लूका 6 : 43,44,46; 13 : 25-27)

15 झूठे भविष्यवक्ता ते चुकने रँहआ, जेहडे भेडां दे भेसे च ओंदे हन अपर असल च सैह अंदरे ते चीरणे आळे भेडिये हन । 16 तिन्हां दियां करतूता ते तुहां तिन्हां जो पणछैणी सकदे हन । क्या माणु झूडेयां ते अंगूर कने कडे आळे झूडेयां ते धूडे तोडी सकदे हन? 17 इआ ई हर इक्क खरा रुख खरा फळ दिंदा ऐ कने नकम्मा रुख बुरा फळ दिंदा ऐ । 18 खरा रुख बुरा फळ नी दैई सकदा, कने ना नकम्मा रुख खरा फळ दैई सकदा ऐ । 19 जेहड़ा रुख खरा फळ नी दिंदा, सैह बडेया कने अमी च पाया जांदा ऐ । 20 इआं ई तिन्हां दे फळां ते तुहां तिन्हां जो पणछैणी सकदे हन ।

21 "जेहडे मिन्जो नैं, हे प्रभु, हे प्रभु! ग्लांदा हन, तिन्हां च सारे ई सुअर्गे दे राजे च प्रवेश नी होणे हन, अपर सैई जेहड़ा मेरे सुअर्गीय पिता दी इच्छा पर चलदा ऐ । 22 तिस दिन मत्ते माणु मिन्जो नैं ग्लांगे, 'हे प्रभु हे प्रभु, क्या अहां तेरे नांये ते भविष्यवाणी नी किती, कने तेरे नांये ते दुष्टआत्मां जो नी कडेया, कने तेरे नांये ते मते हैरानी भरे कम्म नी किन्ते?' 23 ताहू मैं तिन्हां नैं खुली नैं ग्लाई दैणां, "मैं तुहां जो कदी नी जाणया । हे बुरे कम्म करणे आळेयो, मिन्जो वला ते चली जा ।"

घर बणाणे आळे दो माणु : अक्कमंद कने मूर्ख माणु (लूका 6 : 47-49)

24 इसताई जेहड़ा कोई मेरियां एह गलां सुणी नैं तिन्हां जो मनदा ऐ सैह तिस अक्कमंद माणुये साइआं हुंगा जिन्हीं अपणां घर सपडे पर बणांया । 25 कने अम्बर बरैया, कने पाणी आया, कने तूफान चलेया, कने तिस घरे नैं टकराया भिरी भी सैह नी टैत्था, कजोकि तिसदियां नीआं सपडे पर पाइआं थियां । 26 अपर जेहड़ा कोई मेरियां एह गलां सुणदा ऐ कने तिन्हां पर नी चलदा, सैह तिस बेअक्के माणुये साइआं हुंगा जिन्हीं अपणां घर रेता पर बणांया । 27 कने अम्बर बरैया, कने पाणी आया कने तूफान चलेया, कने तिस घरे नैं टकराये कने सैह टैई नैं सत्यानाश होईया ।" 28 जाहू यीशु एह गलां ग्लाई बैठा, तां इआं होया कि भीड तिसदिया शिक्षा ते हैरण होई । 29 कजोकि सैह तिन्हां दे शास्त्रियां साइआं नी अपर अधिकारिये साइआं तिन्हां जो शिक्षा दिंदा था ।

कोडी माणुये जो ठीक करणां (मरकुस 1 : 40-45; लूका 5 : 12-16)

8 जाहू सैह पहाडे ते लुत्थेया, तां इक्क बडी भीड तिसदे पचांह चली पैई । 2 कने दिखा इक्की कोदिये आई नैं तिसियो प्रणांम किता कने गलाया, हे प्रभु, जे तू चां तां मिन्जो ठीक करी सकदा ऐ । 3 यीशुयें हत्थ गांह करी नैं तिसियो पकडेया, कने गलाया, मैं चाहंदा, तू खरा होई जां ।" कने सैह ताहू ई कोद्रे ते खरा होई गैआ । 4 यीशुयें तिस नैं गलाया, दिख इसा गला कुसी नैं मत ग्लांदा, अपर जाई नैं अप्पु जो याजके जो दुस्स कने जेहड़ा चढावा मूसं ठेहराया तिसियो चढा तांकि लोकां तांई गवाही होयें ।"

सूबेदारे दा वसुआस (लूका 7 : 1-10)

5 जाहू सैह कफरनहूम च आया तां इक्की सूबेदारें तिस अल्ल आई नैं तिस नैं विणती किती, 6 "हे प्रभु, मेरा दास घरें अधरगे दिया बमारिया नैं बडा दुखी पैआ ऐ । 7 तिन्हीं तिस नैं गलाया, "मैं आई नैं तिसियो ठीक करगा ।" 8 सूबेदारें जबाब दिता ऐ, "हे प्रभु, मैं इस जोग्गा नी कि तू मेरे घरें औयें, अपर सिर्फ मुंमे ते ग्लाई दे तां मेरा सेवक ठीक होई जाणां । 9 कजोकि मैं भी दूयेयां

दे हुकमा मनणे आळा माणु ऐ, कने मिन्जो अल्ल भी सपाई हन, जेहडे मेरे हुकमा जो मनदे हन । जाहूँ मैं इक्की जो ग्लांदा, जा! तां सैह चली जांदा ऐ; कने दूये नैं, 'आ!' तां सैह ओंदा ऐ; कने जाहूँ अपने दासे जो ग्लांदा, एह कम्म कर! तां सैह तिस कम्मे करदा ऐ ।"

10 एह सुणी नैं यीशु जो हैराणी होई, कने जेहड़ा तिसदे पचांह ओआ दे थे तिन्हां नैं ग्लाय, "मैं तुहां नैं सच ग्लांदा कि मैं इस्राएले च भी ऐदया वसुआस नी पाया । 11 कने मैं तुहां नैं ग्लांदा कि पूरव कने पशिचम ते मते माणु आई नैं अब्राहमे कने इसहाके कने याकूबे सौगी सुअरें दे राज्ज च बैगें । 12 अपर परमात्मं दे राज्जे दी ओलाद बाहर नैहरे च पाई दिन्ती जांगी तित्थु रोणां कने दंदा दा पीणां होणां ।" 13 ताहूँ यीशुयें सूबेदारें नैं ग्लाय, "जा, जिआं तेरा वसुआस ऐ तिआं तिजो ताई होयें ।" कने तिसदा दास तिसी बग्त ठीक होईया ।

मते बमारां जो ठीक करणां

(मरकुस 1 : 29-34; लूका 4 : 38-41)

14 यीशु जाहूँ पतरसे दे घरे आया, तां तिन्हीं तिसदिया ससु जो बुखार नैं बमार पैईयो दिख्या । 15 तिन्हीं तिसा दा हत्थ छूत्ता कने तिसा दा बुखार उतरी गैआ, कने सैह उठी नैं तिसदी सेवा करणा लग्गी । 16 जाहूँ संज होई ताहूँ सैह तिस अल्ल मतेआं लोकां जो लैई नैं आये जिन्हां च दुष्टआत्मां थियां कने तिन्हीं तिन्हां आत्मां जो अपने वचने नैं कड्डी दिन्ता; कने सारे बमारां जो ठीक किन्ता । 17 तांकि जेहड़ा वचन यशायाह भविष्यवक्ते ग्लाय था सैह पूरा होयें; तिन्हीं अप्पु पर अहां दियां कमजोरियां जो लैई लैआ कने म्हारी बमारियां जो चुकी लैआ ।

यीशु मसीह दा चेला बणने दी कीमत

(लूका 9 : 57-62)

18 यीशुयें जाहूँ अपने चों पास्सें ते माणुआं दी इक्क बड़ी भरी भीड़ दिखी तां झीला दे पारले पास्सें जो जाणे दा हुक्म दिन्ता । 19 ताहूँ इक्क शास्त्रियें तिस अल्ल आई नैं तिस नैं ग्लाय, "हे गुरु, जिन्थु कुत्थी तू जागा, मैं तिजो पचांह चली पोंगा ।" 20 यीशुयें तिस नैं ग्लाय, "गीदडां दियां झोरी कने अम्बरे दे पंछियां दे अल्ले होंदे हन; अपर माणुये दे जागते तांई मुँड लकाणे दी भी जगाह नी ऐ; 21 इक्क होर चेलें तिस नैं ग्लाय, हे प्रभु मिन्जो पैहले जाणे दे कि अपने बुड़े जो दबी ओयें ।" 22 यीशुयें तिस नैं ग्लाय, "तू मिन्जो पचांह चली पौ, कने मुडदेयां जो अपने मुडदे दबणां दैआ ।"

तफाने जो शांत करणां

(मरकुस 4 : 35-41; लूका 8 : 22-25)

23 जाहूँ सैह किस्तिया पर चढ्या, तां तिसदे चेले तिसदे पचांह चली पै । 24 कने दिखा, झीला च इक्क देह्या बड़ा तूफान आया कि किस्ती लेहरां नैं डूबणां लग्गी, कने यीशु सुतेया था । 25 ताहूँ चेलयां तिसदे बकखे आई नैं तिसियो जगाया कने ग्लाय, "हे प्रभु अहां जो बचा, अहां मरी चलेयो हन ।" 26 तिन्हीं तिन्हां नैं ग्लाय, "हे वेसुआसियो, कजो डरा दे हन?" ताहूँ तिन्हीं उठी नैं तूफाने कने पाणिये जो झिडकेया, कने सब किच्छ शांत होई गैआ । 27 कने सैह हैरान होई नैं ग्लाय, "एह केदेया माणु ऐ कि तूफान कने पाणी भी इसदा हुक्म मनदे हन ।"

बुरिया आत्मां दे सतायेयो माणुआं जो ठीक करणां

(मरकुस 5 : 1-20; लूका 8 : 26-39)

28 जाहूँ सैह तिस पार गदरनियां दे देशे च पुज्जा, तां दो माणु जिन्हां च दुष्टआत्मा थियां कब्रां च रँहदे थे सैह तिसियो मिले । सैह इतणे खतरनाक थे कि तिस रस्ते च कोई नी जाई सकदा था । 29 तिन्हां उडी नैं ग्लाय, "हे परमात्मं दे पुत्तर अहां दा तिजो नैं क्या कम्म? क्या तू बगते ते पैहले अहां जो दुख दैणे ऐत्थु आईआ ऐ ? 30 तिन्हां ते थोड़िया दूरिया पर मते भरी सूअर चुगा दे थे । 31 दुष्टआत्मां तिस नैं एह ग्लाई नैं विणती किन्ती, जे तू अहां जो कडगा, तां इन्हा सूअरां च घल्ली दै । 32 तिन्हीं तिन्हां नैं ग्लाय, "जा!" कने सैह निकळी नैं सुअरां च बडियां कने दिखा सारे सूअर खडिया भेठी ते रिडकी नैं पाणिये च जाई पैआ, कने डूबी मरया । 33 तिन्हां दे चरवाहे नटे, कने सैहरे च जाई नैं एह सारियां गल्लां कने जिन्हां च दुष्टआत्मां थियां तिन्हां

दा सारा हाल सणाई दिन्ता । 34 ताहूँ सारे सैहरे दे माणु यीशुयें नैं मिलणां चली आये, कने तिसियो दिखी नैं विणती किन्ती कि अहां दे लाक्के ते बाहर चली जा ।

अधरगे दे बमार माणुये जो ठीक करणां

(मरकुस 2 : 1-12; लूका 5 : 17-26)

9 भिरी सैह किस्तिया पर चढी नैं पारले पास्सेयो चली गैआ, कने अपने शैहरे च आया । 2 कने दिखा, मते माणु अधरगें दे इक्की बमारे जो मंजोलूये पर रखी नैं तिस अल्ल लैई आये । यीशुयें तिन्हां दा वसुआस दिखी नैं तिस अधरगें दे बमारे नैं ग्लाय, जागत, हौंसला रख; तेरे पाप माफ होये ।" 3 इसा गल्ला पर केइआं शास्त्रियां सोचया, "एह तां परमात्मं दी निंदा करा दा ।" 4 यीशुयें तिन्हां दे मने दियां गल्लां जाणी नैं ग्लाय, "तुहां माणु अपने अपने मने च बुरा वचार कजो करा दे हन? 5 सोखा क्या ऐ, एह ग्लाय, तेरे पाप माफ होयें या एह ग्लाय 'उठ कने चल फिर ।' 6 अपर इसताई कि तुहां जाणी लैआ कि माणु दे पुत्तरे जो धरतिया पर पाप माफ करणे दा हक्क ऐ । ताहूँ तिन्हीं अधरगें दे बमारे नैं ग्लाय, 'उठ अपने मंजोलूये चुक, कने अपने घरेयो चली जा ।' 7 सैह उठी नैं अपने घरेयो चली गैआ । 8 माणु एह दिखी नैं डरी गै कने परमात्मं दी महिमा करणां लग्गे जिन्हीं माणुआं जो ऐदया हक्क दिन्ता ऐ ।

मत्ती नांये दे माणुये जो सदणां

(मरकुस 2 : 13-17; लूका 5 : 27-32)

9 तित्थु ते गांह जाई नैं यीशुयें मत्ती नांये दे इक्की माणुये जो चुंगी लैणे दिया चौकिया पर बैठेयो दिख्या, यीशुयें तिस नैं ग्लाय, "मिन्जो पचांह चली पौ । सैह उठी नैं तिसदे पचांह चली पैआ । 10 जाहूँ सैह घरे च खाणां खाणां बैठया तां मते चुंगी लैणे आळे कने पापी आई नैं यीशु कने तिसदे चेलयां सौगी खाणां बैठे । 11 एह दिखी नैं फरीसियां तिसदे चेलयां नैं ग्लाय, 'तुहां दा गुरु चुंगी लैणे आळ्यां कने पापियां सौगी कजो खांदा ऐ ?' 12 एह सुणी नैं यीशुयें तिन्हां नैं ग्लाय, वैध भले चगेया तांई नी अपर बमारां तांई जरूरी ऐ । 13 इसताई तुहां जाई नैं इसदा मतलब सीखी लैआ; मैं बलिदान नी अपर दया चाहंदा । कजोकि मैं धर्मियां जो नी, अपर पापियां जो सदणां आया ।"

व्रते दा सबाल

(मरकुस 2 : 18-22; लूका 5 : 33-39)

14 ताहूँ युहन्ने दे चेलयां तिस अल्ल आई नैं ग्लाय, "क्या बजाह ऐ कि अहां कने फरीसी इतणां व्रत करदे हन, अपर तेरे चेले व्रत नी करदे?" 15 यीशुयें तिन्हां नैं ग्लाय, क्या बराती जाहूँ तिकर लाड़ा तिन्हां सौगी ऐ, दुखी होई सकदे हन? अपर सैह दिन ओगे जाहूँ लाड़ा तिन्हां ते लग्न किन्ता जांगा, तिस बग्त सैह व्रत करगे । 16 नौये कपड़े दी किन्न छैकी करी कोई भी पराणे कपड़े च टल्ल नी लगांदा, कजोकि सैह टल्ल तिस कपड़े ते सब कुच्छ खीर्जी लेंदा ऐ, कने सैह होर जादा छकूई जांदा ऐ । 17 कने माणु नौआं अंगूरा दा रस पराणियां सराईयां च नी पांदे हन, कजोकि देहया करणे ते सराईयां फटी जांदिंयां हन, कने अंगूरा दा रस निकळी जांदा ऐ कने सराईयां बर्बाद होई जांदिंयां हन, अपर नौआं अंगूरा दा रस नौईयां सराईयां च पांदे हन, कने सैह दूनी च बची रँहदा ऐ ।"

मरियो कुडी कने बमार जणांस

(मरकुस 5 : 21-43; लूका 8 : 40-56)

18 सैह तिन्हां नैं एह गल्लां ग्ला ई दा था, कि दिखा, इक्की अधिकारियें आई नैं तिसियो प्रणांम किन्ता कने ग्लाय, मेरी कुडी हुण ई मरी ऐ, अपर चली नैं अपनां हत्थ तिसा पर रख, तां सैह जिंदी होई जागी ।" 19 यीशु उठी नैं अपने चेलयां सौगी तिस पचांह चली पैआ । 20 कने दिखा, इक्की जणांसा जो बाराह सालां ते खून बँहणे दी बमारी थी तिन्ने पचांह ते आई नैं तिस दे कपड़े दे पल्ले जो छूई लैआ । 21 कजोकि सैह अपने मने च सोचदी थी "जे मैं तिसदे कपड़े जो छूई लैंगी तां ठीक होई जांगी ।" 22 यीशुयें मुडी नैं तिसायो दिख्या कने ग्लाय, "कुडीये हौंसला रख; तेरे वसुआसे तिजो खरा किन्ता ऐ । सैह जणांस तिसी बग्त खरी होई गैई । 23 जाहूँ यीशु तिस अधिकारियें दे घरें पुज्जा, कने बंसरी बजाणे आळ्यां कने भीड़ा जो रोळा मचांदे दिख्या, 24 ताहूँ ग्लाय,

“हटी जाआ कुड़ी मरियो नी, अपर सुतियो ऐ।” इसा गल्ला सुणी नैं सैह तिस पर हंसणा लम्गे। 25 अपर जाहू भीड़ कड्डी दित्ती, तां तिन्हीं अंदर जाई नैं कुड़िया दा हत्थ पकड़ेया, कने सैह जिदी होई गई। 26 कने इसा गल्ला दी खबर तिस सारे देशे च फैली गई।

दो अन्ने माणुआं दियां अंखी ठीक करणां

27 जाहू यीशु तित्थु ते गांह गैआ, तां दो अन्ने तिसदे पचांह जोरे नैं एह ग्लां दे चले, “हे दाऊद देया पुत्तरा अहां पर दया कर।” 28 जाहू सैह घरे पुज्या, तां सैह अन्ने तिस अन्न आये, कने यीशुयें तिन्हां ते पूछ्या, “क्या तुहां जो वसुआस ऐ कि मैं एह करी सकदा ऐ?” तिन्हां तिस नैं ग्ल्या, “हां प्रभु!” 29 ताहू तिन्हीं तिन्हां दियां अंखी छुई नैं ग्ल्या, तुहां दे वसुआसे मताबक तुहां ताई होयें। 30 कने तिन्हां दियां अंखी खुली गईयां। यीशुयें तिन्हां जो चेतावनी देई नैं ग्ल्या, चुकनै रैह्यो कि कुसियो इसा गल्ला दा पता नी लमों। 31 अपर तिन्हां तित्थु ते निकळी नैं सारे देशे च तिसदा नां फैलाई दिता।

इक्क जफे माणुये जो ठीक करणां

32 जाहू सैह बाहर जा दे थे, तां दिखा, माणु इक्की जफे जो जिस च दुष्टआत्मां थी, तिस अन्न लैई आये; 33 कने जाहू दुष्टआत्मां कड्डी दित्ती, तां जफा ग्लाणां लम्गा। इसा गल्ला पर भीड़ा हैरान होई नैं ग्ल्या, “इस्त्राएले च इआं कदी भी नी दिख्या। 34 अपर फरीसियां ग्ल्या, “एह तां दुष्टआत्मां दे सरदार देया मददा ते दुष्टआत्मां जो कडदा ऐ।”

मजदूर थोड़े हन

35 यीशु सारे सैहरां कने ग्रां च घूमदा रैह्या कने तिन्हां देयां आराधनालयां च शिक्षा दिंदा, कने परमात्में दे राज्ञ दा सुसमाचार प्रचार करदा, कने हर तरांह दियां बमारियां कने कमजोरियां जो दूर करदा रैह्या। 36 जाहू तिन्हीं भीड़ा जो दिख्या तां तिसियो लोकां पर तरस आया, कजोकि सैह तिन्हां भेडा साइआं थे जिन्हां दा कोई रखवाळा नी होयें, सैह बैचेन कने भटकेयो थे। 37 ताहू तिन्हीं अपणे चेलयां नैं ग्ल्या, “पके खेत तां मते हन अपर मजदूर थोड़े हन। 38 इसताई खेत दे मालके नैं विणती करा कि सैह अपणे खेत बडणे ताई मजदूर घल्ली दे।

यीशु मसीह दे बारा चले

(मरकुस 3 : 13-19; लूका 6 : 12-16)

10 भिरी तिन्हीं बाराह चेलयां जो अप्पु अन्न सददी नैं, तिन्हां जो दुष्टआत्मां पर हक्क दिता कि तिन्हां जो कड्डी सकन कने हर तरांह दियां बमारियां कने हर तरांह दी कमजोरियां जो दूर करन। 2 इन्हां बाराह चेलयां दे नां एह हन पैहला शमौन, जेहड़ा पतरस नांये ते जाणेयां जांदा ऐ, कने तिसदा भाऊ अन्दियास कने जबदिये दा पुत्तर याकूब, कने तिसदा भाऊ यूहन्ना कने 3 फिलिप्पुस, कने बरतुल्मै, थोमा कने चुंगी लैणे आळा मत्ती, हलफईये दा पुत्तर याकूब, कने तद्दे, 4 शमौन कनानी, कने यहूदा इस्करियोती जिन्हीं यीशु जो पकडुआई भी दिता।

बारां चेलयां दे सेवा दे कम्म

(मरकुस 6 : 7-13; लूका 9 : 1-6; 10 : 4-12)

5 इन्हां बाराहां जो यीशुयें एह हुक्म देई नैं घल्ल्या, “गैर यहूदियां दे पाससे मत जांदे, कने सामरियां दे कुसी सैहरे दे अंदर मत जांदे। 6 अपर इस्त्राएल दे परवारे दियां गुआचिआं भेडा अन्न जानेयां। 7 कने चलदे चलदे एह प्रचार करा; सुअर्ग दा राज्य नैडे आई गैआ ऐ।” 8 बमारां जो ठीक करा; मरेयां जो जिंदेया कने कोदियां जो ठीक करा, दुष्टआत्मां कड्डी। तुहां मुपते च पाया कने मुपते च दैआ। 9 अपणेयां झोलूयां च ना तां सोना, कने ना तां धन दौलत, कने ना तां तांबा रखा; 10 रस्ते ताई ना झोला रखा, ना दो कुरते, ना जूटे कने ना सोठी लैआ, कजोकि मजदूर जो तिसदा खाणां मिलणां चाइदा।

11 जिस कुसी सैहरे या ग्रांए च जाआ, तित्थु पता करा कि तित्थु कृण कम्म आळा माणु ऐ। कने जाहू तिकर औत्थू ते तुहां नी निकळण, तिस अन्न ई रैह्या। 12 घरें अंदर जांदे बत्त तिसियो आशीर्वाद दिनेयां। 13 जे तिस घरे दे माणु खरे होंगे तां तुहां दा आशीर्वाद तिन्हां पर पुजगा, अपर जे सैह खरे नी

होन तां तुहां दा आशीर्वाद तुहां अन्न वापस ओंगा। 14 जेहड़ा कोई तुहां जो स्वकार नी करे कने तुहां दियां गल्लां नी सुणे, तिस घरे या तिस सैहरे ते निकळदे ई अपणे पैरां दी धूड़ी झाड़ी दैआ। 15 मैं तुहां नैं सच ग्लांदा कि न्याय दे दिन तिस सैहरे दी हालता ते सदोम कने अमोरा दे देशे दी हालता जादा सेहणे जोग्गी होणी ऐ।

ओणे आळा संकट

(मरकुस 13 : 9-13; लूका 21 : 12-17)

16 दिखा, मैं तुहां जो भेडां साइआं भेडियां दे बीच घल्लदा इसताई सर्पा साइआं अक्कमंद कने कबूतरां साइआं भोळे बणां। 17 अपर लोकां ते चुकनै रैह्या, कजोकि सैह तुहां जो महासभां दे हुआले करणे, कने अपणी पचायतां च तुहां जो कोड़े मारणे। 18 तुहां मिन्जो ताई हाकमां कने राजेयां साइआं तिन्हां पर, कने गैर - यहूदियां पर गवाह होणे ताई पुज्याये जाणे। 19 जाहू सैह तुहां जो पकडुआणे तां एह चिंता मत करदे कि अहां किआं क्या ग्लांगे कजोकि जेहड़ा कुच्छ तुहां जो ग्लाणां हुंगा, सैह तिसी बग्त तुहां जो दरस्सी दिता जांगा। 20 कजोकि ग्लाणे आळे तुहां नी हन, अपर तुहां दे पिता दा आत्मां तुहां च ग्लांदा ऐ।

21 भाऊ भाऊये जो कने पिता जागते जो मारणे ताई हुआले करणे, कने बच्चे माऊ बुड़े दे वरखलाफ च उठी नैं तिन्हां जो मरवाई देणां। 22 मेरे नांये दिया बजाह ते सारेयां लोकां तुहां नैं बैर रखणां, अपर जेहड़ा आखरी तिकर सबर करणा तिसदा उद्धार होणां ऐ। 23 जाहू सैह तुहां जो इक्की सैहरे च सतांगे, तां दूये जो नठी जानेयां। मैं तुहां नैं सच ग्लांदा, जाहू तिकर तुहां इस्त्राएले दे सारेयां सैहरां च नी घूमी लैगे तां माणुये दा पुत्तर आई जांगा।

24 चेला अपणे गुरु ते बडा नी हुंदा कने ना दास अपणे मालके ते। 25 चले दा गुरु दे, कने दासे दा मालके बराबर होणां ई काफी ऐ। जाहू तिन्हां घरे दे मालके जो सैतान ग्ल्या तां तिसदे घरे आळ्यो जां क्या कुच्छ नी ग्लांगे।

परमात्में ते डरा

(लूका 12 : 2-7)

26 इसताई माणुआं ते मत डरदे; कजोकि कुच्छ ढक्या नी जेहड़ा खोलया नी जांगा, कने ना कुच्छ छूपेया ऐ जेहड़ा जाणेयां नी जांगा। 27 जेहड़ा मैं तुहां नैं नैहरे च ग्लांदा, तिसियो तुहां लौई च ग्ला; कने जेहड़ा कनां कनं सुणदे हन, तिसियो छती पर चढी नैं प्रचार करा। 28 जेहड़े शरीरे जो मारदे हन, अपर आत्मां जो मारी नी सकदे, तिन्हां ते मत डरदे; अपर तिस ते डरा, जेहड़ा आत्मां कने शरीर दूनी जो नरके च नाश करी सकदा ऐ। 29 क्या पैसयां च दो चिडियां नी बिकदियां? तमी तुहां दे पिता दी मरजिया बगैर तिन्हां च इक्क भी जमीना पर नी पैई सकदी। 30 तुहां दे मुँडे दे बाल सारे गिणेयां हन। 31 इसताई डरा मत; तुहां मत्तियां चिडियां ते बधी नैं हन।

यीशु मसीह जो मना चाऐ मत मना

(लूका 12 : 8,9)

32 जेहड़ा कोई माणुआं सामणे मिन्जो मनी लेंगा, तिसियो मैं भी अपणे सुअर्गीय पिता दे समाणे मनी लैणां ऐ। 33 अपर जेहड़ा कोई माणुआं दे सामणे मिन्जो नी मनगा, तिसियो मैं भी अपणे सुअर्गीय पिता दे सामणे नी मनगां।

यीशु मसीह दे ओणे दा सबूत

(लूका 12 : 51-53; 14 : 26,27)

34 एह मत समझा कि मैं धरतिया पर मेल मिलाप करणां आया ऐ; मैं मेल मिलाप करणे नी आया; अपर तलवार चलुआणे आया। 35 मैं तां आया ऐ कि माणु जो तिसदे बुड़े ते, कने कुड़िया जो तिसा दिया माऊ ते, कने नुआ जो तिसा दिया सस्सु ते लग करी दयां, 36 माणुये दे बैरी तिसदे घरे ई दे माणु होणे।

37 जेहड़ा माऊ या बुड़े जो मिन्जो ते जादा प्यारा जाणदा ऐ, सैह मिन्जो जोग्गा नी, कने जेहड़ा जागते या कुड़िया जो मिन्जो ते जादा प्यारा जाणदा ऐ, सैह मिन्जो जोग्गा नी; 38 कने जेहड़ा अपणिया सूलिया लैई नैं मिन्जो पचांह नी चले सैह भी मिन्जो जोग्गा नी। 39 जेहड़ा अपणियां जान्नी बचांदा

ऐ, सैह तिसायो गुआंगा; कने जेहड़ा मेरिया बजाह ते अपणियां जान्नी गुआंदा ऐ सैह तिसायो पांदा ऐ ।

ईनाम
(मरकुस 9 : 41)

40 जेहड़ा तुहां जो ग्रहण करदा ऐ, सैह मिन्जो ग्रहण करदा ऐ; कने जेहड़ा मिन्जो ग्रहण करदा ऐ, सैह मेरे घल्लणे आळे जो ग्रहण करदा ऐ । 41 जेहड़ा भविष्यवक्ता जो भविष्यवक्ता जाणी नैं ग्रहण करें, सैह भविष्यवक्ता दा बदला पांगा; कने जेहड़ा धर्मी जो धर्मी जाणी नैं ग्रहण करें, सैह धर्मी दा बदला पांगा । 42 जेहड़ा कोई इन्हां छोटेयां च इक्की जो मेरा चेला जाणी नैं सिर्फ इक्क ग्लास ठंडा पाणी पिलां, तां में तुहां नैं सच ग्लांदा, सैह कुसा तरीके नैं अपणे इनामे नी गुआई सकदे ।"

यीशु मसीह कने यूहन्ना बपतिस्मा दैणे आळा
(लूका 7 : 18-35)

11 जाहू यीशु अपणे बाराह चेलयां जो हुकम देई बैठा, तां सैह तिन्हां दे सैहरे च शिक्षा कने प्रचार करणे जो तित्थु ते चली गैआ । 2 यूहन्ने जेला च मसीह दे कम्मा दी खबर सुणी कने अपणे चेलयां जो तिस अल्ल एह पूछणां घल्लया ऐ, 3 क्या ओणे आळा तू ई ऐ, या अहां कुसी दूये दा इन्तजार करन । 4 यीशुयें जबाब दिता, "जेहड़ा कुच्छ तुहां सुणा दे हन कने दिखा दे हन, सैह सब जाई नैं यूहन्ने जो दस्सी देआ, 5 कि अन्ने दिखदे हन कने लंगडे हंडदे फिरदे हन, कोढ़ी ठीक होंदे हन कने टोणें सुणदे हन, मुडदे जिंदे होंदे हन, कने गरीबां जो सुसमाचार सणांदे हन । 6 कने धन हन सैह, जेहड़े मेरिया बजाह ते ठोकर नी खांदे ।"

7 जाहू सैह तित्थु ते चली पै, तां यीशु यूहन्ना दे बारे च लोकां नैं ग्लांणा लग्गा, "तुहां बणे च क्या दिखणां गैयो थे? क्या हौआ नैं हिलदियां कंडे आळियां झाड़ियां जो? 8 भिरी तुहां क्या दिखणां गैयो थे?" क्या नरम कपड़े लायो माणुये जो, सुणां जेहड़े नरम कपड़े लांदे हन, सैह मेहलां च रँहंदे हन । 9 तां भिरी क्जो गैयो थे? क्या कुसी भविष्यवक्ता जो दिखणे जो, हां में तुहां नैं ग्लांदा कि भविष्यवक्ता ते भी बडे जो । 10 एह सैई ऐ जिसदे बारे च लिख्या ऐ :

'दिख मैं अपणे दूते जो तिज्जो गांह घल्लदा जेहड़ा तिज्जो गांह तेरा रस्ता त्यार करगा ।'
11 मैं तुहां नैं सच ग्लांदा कि जेहड़े जणांसा ते जम्मेयो हन, तिन्हां च यूहन्ना बपतिस्मा दैणे आळे ते कोई बडा नी होया; अपर जेहड़ा सुअर्ग दे राजे च लोक्के ते लोक्का ऐ सैह तिसते भी बडा ऐ । 12 यूहन्ना बपतिस्मा दैणे आळे दे दिना च अल्ली तिकर सुअर्ग दे राजे च पूरिया शक्तिया नैं प्रवेश हुंदा रँहआ ऐ, कने जेहड़े ताकतवर हन तिसियो खोई लेंदे हन । 13 यूहन्ने तिकर सारे भविष्यवक्ता कने नियम भविष्यवाणी करदे रँह । 14 कने चाहंदे हन तां इसा गल्ला जो मना कि एलिय्याह जेहड़ा ओणे आळा था, सैह ऐही ऐ । 15 जिन्हां अल्ल कनं होन सैह कनां खोली सुणी लैन ।

16 मैं इस बगते दे लोकां दी तुलना कुस नैं करे? सैह तिन्हां बच्चेयां साइआं हन, जेहड़ा बाजारां च बैई नैं इक्की दूये जो डडी नैं ग्लांदे हन; 17 अहां तुहां ताई बंसरी बजाई अपर तुहां नी नच्चे; अहां रोण पीटण पाया, कने तुहां छाती नी पीटी । 18 क्जोकि ना यूहन्ना खांदा आया कने ना पींदा, कने सैह ग्लांदा ऐ, तिस च दुष्टआत्मां ऐ । 19 माणु दा पुत्तर खांदा पींदा आया, कने सैह ग्लांदा ऐ, दिखा, पेटू कने पियक्कड़ माणु चुंगी लैणे आळ्यां कने पापियां दा साथी! अपर ज्ञान अपणे कम्मा ते सच्चा ठेहराया गैआ ऐ ।

वेवसुआसे पर हाय
(लूका 10 : 13-15)

20 ताहू सैह तिन्हां सैहरां जो फटकार दैणां लग्गा जिन्हां च तिन्हीं मत्ते सामर्थी दे कम्म कित्तेयो थे, क्जोकि तिन्हां अपणां मन नी बदलेया था । 21 "हाय खुराजीन! हाय बैतसदा! जेहड़ा सामर्थी दे कम्म तुहां च कित्ते गैयो हन, जे सैह सूर कने सैदा च कित्ते जांदे, तां सैह टाटा उडी नैं, कने धूडी च बैई नैं, सैह काहू दे मनां बदली लेंदे । 22 अपर मैं तुहां नैं सच ग्लांदा कि न्याय दे दिन तुहां दी हालता ते सूर कने सैदा दी हालत जादा सहणे जोग्गी होणी ऐ । 23 हे कफरनहूम सैहर, क्या तू सुअर्गें तिकर ऊचा कित्ता जांगा? तू तां

अधोलोक तिकर थलै जांगा! जाहू सामर्थी दे कम्म तिज्जो च कित्ते गै, जे सदोमे च कित्ते जांदे, तां सैह अज्जे तिकर बणेयां रँहदा । 24 अपर मैं तुहां नैं ग्लांदा कि न्याय दे दिन तेरी हालता ते सदोमे दी हालत जादा सहणे जोग्गी होणी ऐ ।"

बोझे नैं दबूयो लोकां तांई अराम
(लूका 7 : 18-35)

25 तिस बगत यीशुयें ग्लया, "हे पिता, सुअर्ग कने धरती दे प्रभु, मैं तेरा धन्यावाद करदा कि तैं इन्हां गल्लां जो ज्ञानियां कने समझदारां ते छुपाई रखया, कने जागतां पर प्रकट कित्ता ऐ । 26 हां, हे पिता, क्जोकि तिज्जो ऐही अच्छा लगया । 27 मेरे पितें मिन्जो सारा कुच्छ सौंपेया ऐ; होर कोई पुत्तर जो नी जाणदा, सिर्फ पिता; होर कोई पिता जो नी जाणदा, सिर्फ पुतर; कने सैह जिस पर पुत्तर तिसियो प्रकट करणां चाहे ।

28 हे सारे मेहणत करणे आळ्यो कने बोझे नैं दबूयो लोको, मिन्जो अल्ल ओआ; मैं तुहां जो अराम दिंगा । 29 मेरा जुंगला अपणे उपर चुकी लैआ, कने मिन्जो ते सिखा; क्जोकि मैं नम्र कने मन च दीन कने तुहां अपणे मने च अराम पांगे । 30 क्जोकि मेरा जुंगला सेहणे आळा कने मेरा बोझ हल्का ऐ ।

सब्त दा प्रभु
(मरकुस 2 : 23-28; लूका 6 : 1-5)

12 तिस बगत यीशु सब्त दे दिन खेतां च होई नैं जा दा था, कने तिसदेयां चेलयां जो भूख लगी तां सैह सिलेयां तोड़ी तोड़ी नैं खाणां लगे । 2 फरीसियां एह दिखी नैं तिस नैं ग्लया, "दिख तेरे चले सैह कम्म करा दे हन, जेहड़ा सब्त दे दिन करणां ठीक नी ।" 3 तिन्हीं तिन्हां नैं ग्लया, "क्या तुहां नी पढ़या, कि दाऊदें, जाहू सैह कने तिसदे साथियां जो भूख लगी तां क्या कित्ता? 4 सैह किआं परमात्में दे घरे च गैआ, कने चढ़ाव दियां रोटियां खादियां, जिन्हां जो खाणां तां तिसियो कने तिसदे साथियां जो अपर सिर्फ याजकां जो ठीक था? 5 या क्या तुहां नियमे च नी पढ़या कि याजक सब्त दे दिन मंदरे च सब्त दे दिन दी बिधि जो तोड़णे पर भी बेकसूर रँहंदे हन? 6 अपर मैं तुहां नैं ग्लांदा कि ऐत्थू सैह ऐ जेहड़ा मंदरे ते भी बडा ऐ । 7 जे तुहां इसदा मतलब जाणदे, कि मैं दया ते खुश हुंदा बलिदान ते नी, तां तुहां भी बेकसूर जे दोषी नी ठेहरांदे । 8 माणु दा पुत्तर यीशु तां सब्त दे दिने दा भी प्रभु ऐ ।"

सूके हत्थ आळे माणु जो ठीक करणां
(मरकुस 3 : 1-6; लूका 6 : 6-11)

9 तित्थु ते चली नैं सैह तिन्हां दे आराधनालय च आया । 10 तित्थु इक्क माणु था, जिसदा हत्थ सूक्या था । तिन्हां यीशु पर दोष लगाणे तांई तिसते पूछया, "क्या सब्त दे दिने कुसी जो ठीक करणां ठीक ऐ ।" 11 तिन्हीं तिन्हां ते पूछया, "तुहां च एदेया कृण ऐ जिसदी इक्क ई भेड होयें, कने सैह सब्त दे दिन गड्डे च पैई जां, तां तिसियो पकड़ी नैं ना कड्डे? 12 खरे माणु दा मूल भेडा ते कितणां बधी नैं ऐ इसतांई सब्त दे दिन भलाई करणां ठीक ऐ । 13 ताहू तिन्हीं तिस माणुयें नैं ग्लया, "अपणे हत्थे गांह कर ।" तिन्हीं गांह कित्ता, कने तिसदा हत्थ दूये हत्थे साइआं खरा होई गैआ । 14 ताहू फरीसियां बाहर जाई नैं तिसदे वरखलाफ च स्कीम बणांई कि तिसियो किआ खत्म करन ।

परमात्में दा चुणेया दास

15 एह जाणी नैं यीशु तित्थु ते चली गैआ । कने मते सारे माणु तिसदे पचांह चली पै, कने तिन्हीं सबना जो ठीक कित्ता, 16 कने तिन्हां जो समझाया कि मेरे बारे च मत दस्सदे, 17 तांकि जेहड़ा वचन यशायाह भविष्यवक्ता ग्लया था, सैह पूरा होया,

18 दिखा, एह मेरा सेवक ऐ, जिसियो मैं चुणेया ऐ; मेरा प्यारा, जिसते मेरा मन खुश ऐ, मैं अपणी आत्मां तिस पर पाणी ऐ, कने इन्हां गैर यहूदियां जो न्याय दा समाचार दैणां ।

19 सैह ना झगडा करगा, कने ना धूम मचांगा. कने ना बाजारां च कोई तिसदी उआज सुणगा ।

20 जाहू तिकर सैह न्याय दी जीत ना करे सैह कुचलियां कंडे आळियां झाडियां जो नी तोडगा, ना धूआं दिंदी होई बत्ती जो बजांगा ।
21 कने गैर - यहूदियां तिसदे नांये पर आस रखणी ऐ ।”

यीशु मसीह कने बालजबूल सैतान
(मरकुस 3 : 20-30; लूका 11 : 14-23)

22 ताहू माणु इक्क अत्रे जफे जो जिस च दुष्टआत्मां थी, तिस अल्ल लैई आये; कने तिन्हीं तिसियो खरा किता, कने सैह ग्लाणां कने दिखणां लगी पैआ । 23 एह सब दिखी करी सारे माणु हैराण होई नै ग्लाणां लगे, “क्या एह दाऊदे दी ओलाद ऐ । 24 अपर फरीसी माणु एह सुणी नै ग्लाणां लगे, “एह दुष्टआत्मां दे अधिकारी बालजबूल सैताने दिया मददता दे बगैर दुष्टआत्मां जो नी कड्डी सकदा ।” 25 तिन्हीं तिन्हां दे मने दी गल्ल जाणी नै तिन्हां नै ग्लाय, जिस कुसी दा परमात्मं दे राजे च बैर होई जां तां सैह उजडी जांदा ऐ; कने कोई सैहर या परवार जिस च बैर हुंदा ऐ, टिकी नी सकदा । 26 कने जे सैतान ई सैतान जो कड्डे तां सैह अपणां ई दुश्मण होई जांदा ऐ; भिरी तिसदा राज किआं बणी रैह्या । 27 खरा, जे मैं सैताने दिया मददता ते दुष्टआत्मां जो कड्डा ऐ, तां तुहां दे वंश कुसदी मददता ते कड्डा हन? इसताई सैह ई तुहां दा न्याय करगे । 28 अपर जे मैं परमात्मं दी आत्मां दिया मददता ते दुष्टआत्मां जो कड्डा ऐ, तां परमात्मं दा राज तुहां अल्ल आई पुज्या ऐ । 29 किआं कोई माणु कुसी ताकतवरे दे घरे बडी नै तिसदा समान चोरी करी सकदा ऐ जाहू तिकर कि पैहले सैह तिस ताकतवरे जो ना बन्नी लें? कने ताहू सैह तिसदे घरे लूटी लैगा । 30 जेहडा भिन्जो सौगी नी सैह मेरे वरखलाफ ऐ, कने जेहडा भिन्जो सौगी नी विणदा सैह रंगाडदा ऐ । 31 इसताई मैं तुहां नै ग्लांदा कि माणु दा सब तरांह दा पाप कने निंदा माफ किती जांगी अपर पवित्र आत्मां दी निंदा माफ नी किती जाणी । 32 जेहडा कोई माणु दे पुतर दे वरखलाफ कोई गल्ल ग्लांगा, तिसदा एह अपराध माफ किता जांगा, अपर जेहडा कोई पवित्र आत्मां दे वरखलाफ कुच्छ ग्लांगा, तिसदा अपराध ना तां इस लोक च कने ना परलोक च माफ किता जाणां ऐ ।

रुख कने तिसदा फळ
(लूका 6 : 43-45)

33 जे रुखे जो खरा ग्लांदा हन, तां तिसदे फळे जो भी खरा ग्ला, या रुखे जो निकम्मा ग्लांदा हन, तां तिसदे फळे जो भी निकम्मा ग्ला; कजोकि रुखे दी पणछेण तिसदे फळे ते ई होदी ऐ । 34 हे सर्पां दे बच्चेयो, तुहां बुरे होई नै किआं खरियां ग्लां ग्लाई सकदे हन, कजोकि जेहडा मने च भरिया ऐ, सैई मुंमे पर ओंदा ऐ । 35 खरा माणु मने दे खरे भंडार ते खरियां ग्लां कडदा ऐ, कने बुरा माणु बुरे भंडारे ते बुरियां ग्लां कडदा ऐ । 36 कने मैं तुहां नै सच ग्लांदा कि जेहिडयां जेहिडयां निकम्मियां ग्लां माणु ग्लांगे, न्याय दे दिन सैह हर इक्क तिसा गला दा लेखा दिंगे । 37 कजोकि तू अपणियां ग्लां दिया बजाह ते बेकसूर, कने अपणियां ग्लां दिया बजाह ते अपराधी ठेहराया जाणां ऐ ।

सुअर्गीय नशाणे दी मांग
(मरकुस 8 : 11,12; लूका 11 : 29-32)

38 इसा गला पर कुच्छ शास्त्रियां कने फरीसियां तिस नै ग्लाय, “हे गुरु अहां तिजो ते इक्क नशाण दिखणां चाहंदे हन । 39 तिन्हीं तिन्हां जो जबाब दिता, “इस युग दे बुरे कने व्यभिचारी माणु नशाण तोपदे हन, अपर योना भविष्यवक्ता दे नशाण जो छडडी कोई होर नशाण तिन्हां जो नी दिता जाणां । 40 योना तीन रात दिन पाणियें दे जीवे दे पेट च रैह्या तिआं ई माणुये दा पुतर तीन रात दिन धरतिया दे अंदर रैह्या । 41 नीनवे दे माणु न्याय दे दिन इस युग दे लोकां दे सौगी उठी नै तिन्हां जो अपराधी ठेहरांगे, कजोकि तिन्हां योना दा प्रचार सुणी नै मन बदलेया; कने दिखा, ऐत्थू सैह ऐ जेहडा योने ते भी बडा ऐ । 42 दक्षिण देशे दी राणी न्याय आळे दिन इस युग दे लोकां सौगी उठी नै तिन्हां जो अपराधी ठेहरांगी, कजोकि सैह सुलैमाने दा ज्ञान सुणने ताई धरतिया दे दूये बन्ने ते आईयो थी; कने दिखा, तित्थु सैह ऐ जेहडा सुलैमाने ते भी बडा ऐ ।

अधूरा सुधार मुसीबता दा घर
(लूका 11 : 24-26)

43 जाहू दुष्टआत्मां माणुये ते निकळी जांदी ऐ, तां सुनसाण जगाह पर अराम तोपदी फिरदी ऐ, अपर जगाह नी मिलदी । 44 ताहू ग्लांदा ऐ, “कि मैं अपणे तिस ई घरे च जित्थु ते निकळियो थी, वापस चली जाणां कने वापस जाई नै तिसियो खाली कने साफ सुथरा कने सज्या सजाया पांदी ऐ । 45 ताहू सैह जाई नै अप्पु ते भी बुरी सत आत्मां जो अप्पु सौगी लैई ओंदी ऐ, कने सैह तिस च समाई नै तित्थु वास करदी ऐ, कने तिस माणुये दी पिछली हालत पैहले ते भी बुरी होई जांदी ऐ । इस युग दे बुरे लोकां दी हालत भी ऐदेई होणी ऐ ।”

यीशु मसीह दी माँ कने भाऊ
(मरकुस 3 : 31-35; लूका 8 : 19-21)

46 जाहू सैह भीडा नै गलां करा दा था, ताहू तिसदी मां कने भाऊ बाहर खड्डुयो थे कने तिस नै मिलणां चाहंदे थे । 47 कुणकी यीशु नै ग्लाय, “दिख तेरी मां कने तेरे भाऊ बाहर खड्डुयो हन, कने तिजो नै गलां करणां चाहंदे हन ।” 48 एह सुणी नै तिन्हीं ग्लाणे आळे जो जबाब दिता, “कुण ऐ मेरी मां? कने कुण हन मेरे भाऊ ।” 49 कने अपणे चेलयां दे पास्से अपणां हत्थ गांठ करी नै ग्लाणां लगा, “दिखा, मेरी मां कने मेरे भाऊ एह हन । 50 कजोकि जेहडा कोई मेरे सुअर्गीय पिता दी इच्छा पर चलगा, सैई मेरा भाऊ, कने बैहण, कने मेरी मा हन ।

बीई बाणे आळे दा उदारण
(मरकुस 4 : 1-9; लूका 8 : 4-8)

13 तिस दिन यीशु घरे ते निकळी नै झीला दे कंडे जाई बैठा । 2 कने तिस अल्ल ऐदेई बडी भीड कड्डुरोई कि सैह किस्तिया पर चडी गैआ, कने सारी भीड कंडे पर खड्डुतियो रैई । 3 कने तिन्हीं तिन्हां नै उदारणां च मतिआं गलां ग्लायां, “इक्क बाणे आळा बीई बाणां निकळेया । 4 बांदे बगत कुच्छ बीई बत्ता च पै कने पांछियां आई नै तिन्हां जो चुगी लैआ । 5 कुच्छ बीई पथरीलिया जमीना पर पै, जित्थु तिन्हां जो मती कने डूगी चिक्क नी मिलणे दिया बजाह ते बीई तौले लुंगी पै । 6 अपर सूरज निकळणे दिया बजाह ते सैह फकोई गै, कने जड नी पकडणे ते सूकी गै । 7 कुच्छ बीई झाडियां च पै कने झाडियां बधी नै तिन्हां जो दबी दिता । 8 अपर कुच्छ बीई खरिया जमीना पर पै, कने फळ लैई आये, कोई सौ गुणां, कोई सठ गुणां, कने कोई तीई गुणां । 9 जिन्हां अल्ल कनं हन सैह कनां खोली सुणी लैन ।”

उदारणां दा मकसद
(मरकुस 4 : 10-12; लूका 8 : 9-10)

10 चले तिस अल्ल आई करी ग्लाणां लगे, “तू लोकां नै उदारणां च कजो गला करदा ऐ ?” 11 तिन्हीं जबाब दिता, “तुहां जो सुअर्गे दे राजे दे भेदां दी समझ दित्तियो ऐ, अपर तिन्हां जो नी । 12 कजोकि जिस अल्ल ऐ, तिसियो होर दिता जाणां, कने तिस अल्ल मता होई जाणां; अपर जिस अल्ल कुच्छ नी ऐ, तिसते जेहडा कुच्छ तिस अल्ल ऐ, सैह भी लैई लैणां । 13 मैं तिन्हां नै उदारणां च इसताई गलां करदा ऐ कि सैह दिखी करी भी नी दिखदे कने सुणी करी भी नी सुणदे, कने नी समझदे । 14 तिन्हां दे बारे च यशायाह दी एह भविष्यवाणी पूरी होंदी ऐ :

तुहां कनां ते तां सुणना, अपर समझणां नी ऐ; कने अखी ते तां दिखगे, अपर तुहां जो नी दुस्सगा ।

15 कजोकि इन्हां लोकां दा मन मोटा होई गैआ ऐ, कने सैह कनां ते ऊचा सुणदे हन कने तिन्हां अपणियां अंखी बंद करी लियां हन; कुत्की इआं ना होये कि सैह अंखी नै दिखन, कने कनां नै सुणन कने मने नै समझन, कने मनां बदलन, कने मैं तिन्हां जो ठीक करे ।”

16 अपर धन हन तुहां दियां अंखी जेहिडियां दिखदियां हन; कने तुहां दे कनं कि सैह सुणदे हन । 17 कजोकि मैं तुहां नै सच ग्लांदा कि मते सारे भविष्यवक्तां कने धर्मियां चाया कि जेहिडियां गलां तुहां दिखा करदे सैह भी दिखन, अपर सैह नी दिखी सके; कने जेहिडियां गलां तुहां सुणदे सैह भी सुणन, अपर सैह नी सुणी सके ।

बीई बाणे आळे उदारणे दा मतलब (मरकुस 4 : 13-20; लूका 8 : 11-15)

18 हुण तुहां बाणे आळे दे उदारणे दा मतलब सुणेया; 19 जेहड़ा कोई परमात्मं दे राजे दा वचन सुणी नैं नी समझदा, तिसदे मने च जेहड़ा कुच्छ बाया गैआ था, तिसियो सैह दुष्ट आई नैं खोई लैई जांदा ऐ । एह सैई ऐ, जेहड़ा रस्ते कंडे बाया गैआ था । 20 कने जेहड़ा पथरीलिया जमीना पर बाया, सैह एह ऐ, जेहड़ा वचन सुणी नैं ताहू ई खुशिया नैं मनी लैंदा ऐ । 21 अपर अप्पु च जड़ ना रखणे दिया बजाह ते सैह थोड़े ई दिना दा ऐ, कने जाहू वचने दिया बजाह ते क्लेश या झगड़ा हुंदा ऐ, तां झट ठोकर खांदा ऐ । 22 जेहड़ा झाड़ियां च बाया, सैह एह ऐ, जेहड़ा वचने जो सुणदा ऐ, अपर इस संसारे दी चिंता कने धन दौलता दा धोखा वचने जो दबी दिंदा ऐ, कने सैह फळदा नी । 23 जेहड़ा खरिया जमीना च बाया, सैह एह ऐ, जेहड़ा वचने जो सुणी नैं समझदा ऐ, कने सैह फळदा ऐ; कोई सौ गुणां; कोई सठ गुणां, कने कोई ती गुणां ।”

जंगली बीये दा उदारण

24 यीशुयें तिन्हां जो इक्क होर उदारण दिता, “सुअर्गे दा राज तिस माणु साइआं ऐ जिन्हीं अपणे खेतां च खरा बीई बाया । 25 अपर जाहू लोक सुतेयो थे तां तिसदा दुश्मण आई नैं कणकां बीच जंगली बीई बाई नैं चली गैआ । 26 जाहू लूंग निकळी कने फसल निसरी, तां जंगली दाणे दे बूटे भी दुस्से । 27 इसा गल्ला पर घरे दे दासां आई नैं मालके नैं ग्लाय, हे मालक, क्या तैं अपणे खेतां च खरा बीई नी बाया था? भिरी जंगली दाणे दे बूटे तिस च कतांह ते आये?” 28 तिन्हीं तिन्हां नैं ग्लाय, “एह कुस दुश्मणे दा कम्म ऐ ।” दासां तिस नैं ग्लाय, “क्या तेरी इच्छा ऐ कि अहा जाई नैं तिन्हां जो बटीणी लैन?” 29 तिन्हीं ग्लाय, “नी, देहया ना होये कि जंगली दाणे दे बूटेयां बटीणदे होये तुहां तिन्हां सौगी कणकां भी पुटी लैन । 30 बडणे तिकर दूनी जो इक्क सौगी बढूणा दैआ, कने बडणे दे बग्त मँ बडणेआळेयां नैं ग्लाना कि पैहले जंगली दाणे दे बूटेयां बटीणी नैं फूकणे ताई तिन्हां दे पूल्ले बन्नी लैआ, कने कणकां जो मेरे पड़ूये च कड़ेरा ।

राईया दे बीये दा उदारण

(मरकुस 4 : 30-32; लूका 13 : 18-19)

31 तिन्हीं तिन्हां जो इक्क होर उदारण दिता, “सुअर्गे दा राज राई दे दाणे साइआं ऐ, जिन्हीं माणुयें लैई नैं अपणेयां खेतां च बाई दिता । 32 सैह सारे बीआं ते लोक्का तां हुंदा ऐ अपर जाहू बढोई जांदा ऐ ताहू सारे साग पात ते बडा हुंदा ऐ; कने देहया रुख बणी जादा कि अम्बरे दे पंछी आई नैं तिसदियां डालियां पर अपणां बसेरा करदे हन ।”

खमीरे दा उदारण

(लूका 13 : 20,21)

33 तिन्हीं इक्क होर उदारण तिन्हां जो सणांया, सुअर्गे दा राज खमीरे साइआं ऐ जिस जो कुणकी जणांसा लैई नैं त्रै सेर आटे च मलाई दिता कने होंदे होंदे सैह सारा खमीर बणी गैआ ।”

उदारणां दा मतलब

(मरकुस 4 : 33-34)

34 एह सारियां गल्लां यीशुयें उदारणां च लोकां नैं ग्लायें, कने बिना उदारण सैह तिन्हां नैं कुच्छ नी ग्लांदा था 35 कि जेहड़ा वचन भविष्यवक्तां ग्लाय था, सैह पूरा होया; मँ उदारण ग्लाने जो अपणां मुँ खोलगा मँ तिन्हां गल्लां जो जेहिडयां संसारे दी सृष्टिया ते छुपी रैईयां, प्रकट करगा ।”

जंगली बीये दे उदारणे दा मतलब

36 ताहू सैह भीडा जो छुडी नैं घरे च आया, कने तिसदे चले तिस अन्न आई नैं ग्लानां लगे, “खेतां दे जंगली बीये दा उदारण अहां जो समझाई दै ।” 37 तिन्हीं तिन्हां जो जबाब दिता, “खरे बीये जो बाणेआळा माणु दा पुतर ऐ । 38 खेत संसार ऐ, खरा बीई परमात्मं दे राजे दी औलाद, कने जंगली बीई दुष्ट

दी औलाद ऐ । 39 जिन्हीं बैरियें तिसियो बाया सैह सैतान ऐ; कटणी संसारे दा अन्त ऐ, कने कटणे आळे सुअर्गदूत हन । 40 जिआं जे जंगली दाणे बटीणे कने फूकेयो जांदे हन तिआं ई संसारे दे अंत च होणां । 41 माणु दा पुतर अपणे सुअर्गदूतां जो घल्लागा, कने सैह परमात्मं दे राजे च सारे ठोकरां दिया बजाहां जो कने कुकर्म करणे आळेयां जो किट्टा करगे, 42 कने तिन्हां जो अग्गी दे कुडे च पांगे, जित्थू रोणां कने दंद पिणां हुंगा । 43 तिस बग्त धर्मी अपणे पिता दे राजे च सूरजे साइआं चमकगे । जिन्हां दे कनं हन सैह कनां खोली सुणी लैन ।

छूपेयो खजाने दा उदारण

44 सुअर्गे दा राज जमीना च छुपाई खजाने साइआं ऐ, जेहड़ी कुसकि माणुयें जो मिला कने खेते च छुपाई दिता, कने खुशिया दे मारे जाई नैं अपणां सब कुच्छ बेची दिता कने तिसा जमीना जो खरीदी लैआ ।

अनमोल मोतिये दा उदारण

45 भिरी सुअर्गे दा राज इक्की व्यापारीये साइआं ऐ जेहड़ा सुचे मोतियां दी तोपा च था । 46 जाहू तिसियो इक्क कीमती मोती मिलेया तां तिन्हीं जाई नैं अपणां सब कुच्छ बेची दिता कने तिसियो खरीदी लैआ ।

जाळे दा उदारण

47 भिरी सुअर्गे दा राज तिस बडे जाळे साइआं ऐ जेहड़ा समंदर च पाया, कने हर किस्मां दियां मच्छियां जो कड़ेरी लैई आया । 48 कने जाहू जाळ भरौईया, तां मछुआरे तिसियो कंडे पर खीजीं लैई आये, कने बैई नैं खरियां खरियां तां टोकरुये च कड़ेरियां कने खराब खराब सट्टी दित्तियां । 49 संसारे दे अंत च इआं ई होणां । सुअर्गदूतां आई नैं दुष्टां जो धर्मियां ते लग्ग करणां, 50 कने तिन्हां जो अग्गी दे कुडे च पाणां । जित्थू रोणां कने दंद पिणां ई होणां ।

पराणी कने नौईआ शिक्षा दी कीमत

51 “क्या तुहां एह गल्लां समझियां, तिन्हां तिस नैं ग्लाय, हां ।” 52 तिन्हीं तिन्हां नैं ग्लाय, “इसताई हर इक्क शास्त्री जेहड़ा सुअर्गे दे राजे दा चेला बणया ऐ, तिस घरे दे मालके साइआं ऐ जेहड़ा अपणे भंडारे ते नौईआं कने पराणियां चीजां कडुदा ऐ ।”

नासरत सैहरे च यीशु मसीह दा अपमान

(मरकुस 6 : 1-6; लूका 4 : 16-30)

53 जाहू यीशु सारे उदारण ग्लाय बैठा, तां तित्थु ते चली गैआ । 54 कने अपणे सैहरे च आई नैं तिन्हां दे आराधनालय च तिन्हां जो शिक्षा देणां लग्गा कि सुणने आळे हैराण होई नैं ग्लाने लगे, “इसियो एह ज्ञान कने सामर्थी दे कम्म कतांह ते मिलेयो । 55 क्या एह तरखाण मिस्त्रिये दा जागत नी ऐ? कने क्या इसदिया माऊ दा नां मरियम कने इसदे भाऊआं दे नां याकूब, यूसुफ, शमौन कने यहूदा नी ऐ? 56 कने क्या इसदियां सारियां बैहणी अहां च नी रेंहदियां? भिरी इसियो एह सब कतांह ते मिलेयो?

57 इस तरीके नैं तिन्हां तिस दिया बजाह ते ठोकर खादी अपर यीशुयें तिन्हां नैं ग्लाय, “भविष्यवक्ता दा अपणे देस कने अपणे घरे जो छुडी नैं कुत्थी अपमान नी हुंदा । 58 ”कने तिन्हीं तित्थु तिन्हां दे वेवसुआसे दिया बजाह ते मते सामर्थी दे कम्म नी कित्ते ।

यूहन्ना बपतिस्मा दैणे आळे दी हत्या

(मरकुस 6 : 14-29; लूका 9 : 7-9)

14 तिस बग्त देशे दे चौथे हिस्से दे राजा हेरोदेशें यीशु दी चर्चा सुणी, 2 कने अपणे दासां नैं ग्लाय, “एह यूहन्ना बपतिस्मा दैणे आळा ऐ ! सैह मरेयां ते जिंदा होई गैआ ऐ, इसताई तिसते सामर्थी दे कम्म प्रकट होंदे हन ।

3 कजोकि हेरोदेशें अपणे भाऊये फिलिप्पुसे दिया लाडी हेरोदियास दिया बजाह ते, यूहन्ने जो पकडी नैं बन्नया कने जेला च पाई दित्था था । 4 कजोकि यूहन्ने तिस नैं ग्लाय था कि इसायो रखणां तिजो ताई ठीक नी ऐ । 5 इसताई

सैह तिसियो मारी दैणां चाहंदा था, अपर लोकां ते डरदा था कजोकि सैह तिसियो भविष्यवक्ता मनदे थे ।

6 अपर जाहू हेरोदेसे दा जन्मदिन आया, तां हेरोदियासा दिया कुडिया तौआरे च नाच दस्सी नैं हेरोदेस जो खुश कित्ता । 7 इसा गल्ला पर तिन्हीं कसम खाई नैं वचन दित्ता, "जेहड़ा कुच्छ तू मंगगी, मैं तिजो दिंगा ।" 8 सैह अपणियां माऊ दे भकाणे पर ग्लाणां लग्गी, "यूहन्ना बपतिस्मा दैणेआळे दा मुंड थालिया च ऐत्थू ई मिन्जो ताई मंगवाई दै ।" 9 राजा दुखी होया, अपर अपणी कसमा दिया कने सौगी बैठणे आळ्यां दिया बजाह ते, हुक्म दित्ता कि दैई दित्ता जाये । 10 कने तिन्हीं जेला च सपाईयां जो घल्ली नैं यूहन्ने दा मुंड बडाई दित्ता;

11 कने तिसदा मुंड थालिया च लंदा कने कुडिया जो दैई दित्ता, जिसियो सैह अपणियां माऊ अल्ल लैई गैई । 12 ताहू यूहन्ना दे चले आये कने तिसदिया लाशा जो लैई जाई नैं दबी दित्ता, कने जाई नैं यीशु जो खबर दित्ती ।

पंज हजार माणुआं जो खुआणां

(मरकुस 6 : 30-44; लूका 9 : 10-17; यूहन्ना 6 : 1-14)

13 जाहू यीशुयें एह सुणया, तां सैह किस्तिया पर बैई नैं तिन्थु ते लग्न होई नैं सुनसाण जगाह जो चली गैआ । माणु एह सुणी नैं सैहरे सैहरे ते पैदल ई तिसदे पचांह चली पै । 14 तिन्हीं निकळी नैं इक्क बडी भीड़ दिखी कने तिन्हां पर तरस खादा कने तिन्हां दे बमारां जो ठीक कित्ता ।

15 जाहू संज होई तां तिसदे चेलयां तिस अल्ल आई नैं ग्लया, "एह सुनसाण जगाह ऐ कने देर ओआ दी ऐ; लोकां जो घल्ली दैआ कि सैह बस्तियां च जाई नैं अपणे ताई खाणां खरीदी लैन ।" 16 अपर यीशुयें तिन्हां नैं ग्लया, "इन्हां दा जाणां जरूरी नी! तुहां ई इन्हां जो खाणे जो दैआ । 17 तिन्हां तिस नैं ग्लया, ऐत्थु अहां अल्ल पंज रोटियां कने दो मच्छियां जो छड्डी होर कुच्छ नी ऐ ।" 18 यीशुयें ग्लया, "तिन्हां जो मिन्जो अल्ल लैई ओआ । 19 ताहू तिन्हीं लोकां जो घाहे पर बैणे जो ग्लया, कने तिन्हां पंज रोटियां कने दू मच्छियां जो लैआ, कने सुअर्गे दे पाससे दिखी नैं धन्यावाद कित्ता कने रोटियां तोडी तोडी नैं चेलयां जो दित्तियां, कने चेलयां लोकां जो । 20 जाहू सारे खाई नैं रज्जी गै, तां चेलयां बचेयो टुकडेयां नैं भरेयो बाराह टोकरु चुके । 21 कने खाणे आळ्यां जणांसा कने जागतां जो छड्डी नैं पंज हजार मरदां दे करीब थे ।

यीशु मसीह दा पाणिये ऊपर चलणां

(मरकुस 6 : 45-52; यूहन्ना 6 : 15-21)

22 तिन्हीं ताहू ई अपणे चेलयां जो किस्तिया पर चढ़णे ताई मजबूर कित्ता कि सैह तिसते पैहले पारले पाससेयो चली जान, जाहू तिकर सैह लोकां जो घल्ली लैं । 23 सैह लोकां जो घल्ली नैं, प्रार्थना करणे जो लग्न प्हाडे पर चली गैआ; कने संजा सैह तिन्थु किल्ला था । 24 तिस बग्त किस्ती झीला दे बीच लैहरां नैं डगमगा दी थी, कजोकि होआ सामणे दी थी । 25 कने यीशु आधिया राती दे बाद झीला पर चलदे चलदे तिन्हां अल्ल आया । 26 चले तिसियो झीला पर चलदे होये दिखी नैं डरी गै । कने ग्लाणां लग्गे, "एह भूत ऐ ।" कने डरे दे मारे डडणा लग्गे । 27 यीशुयें ताहू ई तिन्हां नैं गल्लां कित्तियां कने ग्लया, "हौसला रक्खा । मैं ऐ डरा मत ।" 28 पतरसें तिस जो जबाब दित्ता, "हे प्रभु जे तू ई ऐ, तां मिन्जो अप्पु अल्ल पाणिये पर चली नैं ओणे दा हुक्म दे ।" 29 तिन्हीं ग्लया, "आ" ताहू पतरस किस्तिया ते लोई नैं यीशु अल्ल जाणे जो पाणिये पर चलणां लग्गा । 30 अपर होआ जो दिखी नैं डरी गैआ, कने जाहू डूबणां लग्गा तां डडी नैं ग्लया, "हे प्रभु मिन्जो बचा ।" 31 यीशुयें ताहू ई हत्थ बधाई नैं तिसियो थमी लैआ कने तिस नैं ग्लया, "हे वेवसुआसी, तै कजो शक कित्ता?" 32 जाहू सैह किस्तिया पर चढी गै, तां होआ रुकी गैई । 33 इसा गल्ला पर तिन्हां जेहडे किस्तिया पर थे, तिसियो प्रणांम करी नैं ग्लया, "सचमुच तू परमात्मं दा पुत्तर ऐ ।

गन्नेसरते सैहरे च बमारां जो ठीक करणां

(मरकुस 6 : 53-56)

34 सैह पारले पाससेयो लोई नैं गन्नेसरत सैहरे च पुज्जे । 35 तिन्थु दे लोकां तिसियो पणछेणी लैआ कने अक्खे बक्खे दे सारे देशां च खबर घल्ली, कने

सारे बमारां जो तिस अल्ल लैई आये । 36 कने तिस नैं विणती करणां लग्गे कि सैह तिन्हां जो अपणे कपडे दे पल्लूये ई जो छूणा दैआ; कने जितणेयां तिसियो छूता, सैह ठीक होई गै ।

रीति रुआजां जो मनणे दा सबाल

(मरकुस 7 : 1-13)

15 ताहू यरूशलेम ते कुच्छ फरीसी कने शास्त्री यीशु अल्ल आई नैं ग्लाणां लग्गे । 2 तेरे चले पितरां दे रीति रुआजां जो कजो टालदे हन, कि बगैर हत्थां धोतेयां रोटी खांदे हन?" 3 तिन्हीं तिन्हां जो जबाब दित्ता, "तुहां भी अपणे रीति रुआजां दिया बजाह ते कजो परमात्मं दे हुक्म टालदे हन? 4 कजोकि परमात्मं ग्लया ऐ, अपणे बुडे कने अपणियां माऊ दा आदर करणां, कने जेहड़ा कोई बुडे या माऊ जो बुरा ग्लया, सैह मारी दित्ता जाये ।" 5 अपर तुहां ग्लांदे हन कि जे कोई अपणे बुडे या माऊ नैं ग्लया, 'जेहड़ा कुच्छ तिजो मिन्जो ते फायदा पुज्जी सकदा था, सैह परमात्मं जो भेंट चढी चुकियो' 6 तां सैह अपणे बुडे दा आदर ना करें, इआं ई तुहां अपणे रुआजे दिया बजाह ते परमात्मं दा वचन टाली दित्ता । 7 हे बेईमानो, यशायार्हे तुहां दे बारे च एह भविष्यवाणी ठीक ई कित्तियो ऐ :

8 एह माणु लबडां नैं तां मेरा आदर करदे हन. अपर तिन्हां दा मन मिन्जो ते दूर रँहदा ऐ ।

9 कने एह बेकार च मेरी भक्ति करदे हन, कजोकि माणुआं दी विधियां जो धर्म दी शिक्षा करी नैं सखांदे हन ।

शुद्ध कने अशुद्ध करणे आळियां गल्लां

(मरकुस 7 : 14-23)

10 ताहू तिन्हीं लोकां जो अपणे अल्ल सददी नैं तिन्हां नैं ग्लया, सुणां, कने समझा: 11 जेहड़ा मुंमं च जांदा ऐ, सैह माणु जो बुरा नी करदा, अपर जेहड़ा मुंमं ते निकळदा ऐ, सैई माणु जो बुरा करदा ऐ ।" 12 ताहू चेलयां आई नैं तिस नैं ग्लया, "क्या तू जाणदा ऐ कि फरीसियां एह वचन सुणी नैं ठोकर खादी?" 13 तिन्हीं जबाब दित्ता, हर रुख जेहड़ा मेरे सुअर्गीय पिता नैं नी लगाया, पूटेया जाणां । 14 तिन्हां जो जाणां दैआ; सैह अन्ने जो रस्ता दसणे आळे हन कने अन्ना जे अन्ने जो रस्ता दस्से. तां दोयो खड्डे च पोंगे ।"

15 एह सुणी नैं पतरसें तिस नैं ग्लया, "एह उदारण अहां जो समझाई दैआ, 16 तिन्हीं ग्लया, "क्या तुहां भी अल्ली तिकर नासमझ हन? 17 क्या तुहां नी जाणदे कि जेहड़ा कुच्छ मुंमं च जांदा सैह पेटे च पोंदा ऐ, कने संडास ते निकळी जांदा ऐ? 18 अपर जेहड़ा कुच्छ मुंमं ते निकळदा ऐ, सैह मने ते निकळदा ऐ, कने सैई माणुये जो बुरा करदा ऐ । 19 कजोकि बुरे वचार, खून, परस्त्रीगमन, व्यभिचार, चोरी, झूठी गवाही कने निंदा मने ते निकळदी ऐ । 20 एह ई ऐ जेहड़ा माणुये जो बुरा करदी ऐ, अपर हत्थां बगैर धोतेयां खाणां खाणां माणुये जो बुरा नी करदा ।"

कनानी जाति दी जणांसा दा वसुआस

(मरकुस 7 : 24-30)

21 यीशु तिन्थु ते निकळी नैं, सूर कने सैदा दे प्रदेशे दे पाससे चली गैआ । 22 तिस प्रदेश ते इक्क कनानी जणांस निकळी, कने डडी नैं ग्लाणां लग्गी, "हे प्रभु! दाऊदे दी औलाद, मिन्जो पर दया कर! मेरी कुडिया जो दुष्टआत्मा बडी सता दी ऐ ।" 23 अपर तिन्हीं तिसायो कुच्छ जबाब नी दित्ता । ताहू तिसदे चेलयां आई नैं तिस नैं विणती कित्ती, "इसायो घल्ली दै, कजोकि सैह अहां दे पचांह डडदी डडदी ओआ दी ऐ ।" 24 तिन्हीं जबाब दित्ता, "इस्राएल दे परवारं दिया गुआचियां भेडां जो छड्डी नैं कुसी अल्ल नी घल्लया गैआ । 25 अपर सैह आई, कने यीशु जो प्रणांम करी नैं ग्लाणां लग्गी, हे प्रभु मेरी मदद कर ।" 26 तिन्हीं जबाब दित्ता, जागतां दी रोटी लैई नैं कुतेयां दे गांह पाणा ठीक नी ।" 27 तिन्ने ग्लया, "सच ऐ प्रभु पर कुत्ते भी सैह चूरचार खांदे हन जेहड़ा तिन्हां दे मालकां दे मेजे ते पोंदे हन ।" 28 इसा गल्ला पर यीशुयें तिस जो जबाब दित्ता, "हे कुडिये तेरा वसुआस बडा ऐ । जिआं तू चाहदी ऐ, तिजो तांई तिआं ई होयें ।" कने तिसा दी कुडी तिसी बग्त ठीक होई गैई ।

मते बमार माणुआं जो ठीक करणां

29 यीशु तित्थु ते गलीले दिया झीला अल्ल आया, कने प्हाडे पर चढी नैं बैई गैआ । 30 ताहू भीड़ा पर भीड़ा तिस अल्ल आई । सैह अपने सौगी लंगड़े, अन्ने, जफे, टुंडे कने होर मतेआं जो तिस अल्ल लैई आये, कने तिन्हां तिसदेयां पैरां अल्ल लंदे, कने तिन्हीं तिन्हां जो ठीक कित्ता । 31 जाहू लोकां दिख्या कि जफे ग्लांदे, कने टुंडे ठीक होंदे, कने लंगड़े चलदे, कने अन्ने दिखदे हन तां हैरान होई नैं इस्त्राएले दे परमात्में दी बड़ाई कित्ती ।

चार हजार माणुआं जो खुआणां (मरकुस 8 : 1-10)

32 यीशुयें अपने चेलयां जो सद्या कने ग्लाय्या, "मिन्जो इसा भीड़ा पर तरस ओंदा ऐ, कजोकि सैह त्रीं दिना ते मिन्जो सौगी हन कने तिन्हां अल्ल कुच्छ भी खाणे जो नी ऐ । मैं तिन्हां जो भूखे पेट नी घल्लणां चाहंदा, कुत्थी इआं ना होयें कि रस्ते च थकी नैं रैई जान ।" 33 चेलयां तिस नैं ग्लाय्या, "अहां जो इस बणे च कतांह ते इतणियां रोटियां मिलगियां कि अहां इतणियां बडिया भीड़ा जो रज्जान?" 34 यीशुयें तिन्हां ते पूछ्या, "तुहां अल्ल कितणियां रोटियां हन?" तिन्हां ग्लाय्या, सत, कने थोड़ी दियां लोक्कियां मच्छियां ।" 35 ताहू तिन्हीं लोकां जो जमीना पर बैणे दा हुक्म दिता । 36 कने तिन्हां सत रोटियां जो कने मच्छियां जो लैआ, धन्यावाद करी नैं तोड्या, कने अपने चेलयां जो दिंदा गैआ, कने चले लोकां जो । 37 इआं ई सारे खाई नैं रज्जी गै कने चेलयां बचेयो टुकडेयां नैं भरेयो सत टोकर चुके । 38 खाणे आळेयां च जणासां कने जागता जो छड्डी नैं चार हजार मरद थे । 39 ताहू सैह भीड़ा जो घल्ली नैं किस्तिया पर चढी गैआ, कने मगदन देशे दी सीमा च आया ।

सुअर्गियां नशाणे दी मांग

(मरकुस 8 : 11-13; लूका 12 : 54-56)

16 फरिसियां कने सदूकियां बक्खे आई नैं तिसियो परखणे ताई तिस नैं ग्लाय्या, अहां जो सुअर्गें दा कोई नशाण दरस ।" 2 तिन्हीं तिन्हां जो जबाब दिता, संजा जो तुहां ग्लांदे हन, मौसम छैल रैह्या, कजोकि अम्बर लाल ऐ, 3 कने भ्यागा जो ग्लांदे हन, अज्र तूफान ओणां, कजोकि अम्बर लाल कने धुंधला ऐ ।" तुहां अम्बरे दे लखणां दिखी नैं तिसदी जानकारी दैई सकदे हन, अपर बगतां दे नशाणां दी जानकारी कजो नी दरसी सकदे? 4 इस जुगे दे बुरे कने व्यभिचारी माणु नशाण तोपदे हन, अपर योना दे नशाणां जो छड्डी तिन्हां जो होर कोई नशाण नी दिता जाणां ।" कने सैह तिन्हां जो छड्डी नैं चली गैआ ।

फरीसियां कने सदूकियां दी शिक्षा दा खमीर

(मरकुस 8 : 14-21)

5 चले झीला दे उस पारलें पारसं पुजे, अपर सैह रोटियां लैणां भूली गैयो थे । 6 यीशुयें तिन्हां नैं ग्लाय्या, "दिखा, फरीसियां कने सदूकियां दे खमीरे ते चुकनै रैह्यो ।" 7 सैह अप्पु च वचार करणां लगे, "अहां रोटियां नी लंदियां, इसताई सैह इआं ग्ला दा ऐ ।" 8 एह जाणी नैं, यीशुयें तिन्हां नैं ग्लाय्या, "हे वेवसुआसियो, तुहां अप्पु च कजो वचार करा दे हन कि अहां अल्ल रोटियां नी हन । 9 क्या तुहां अल्ली तिकर नी समझे? क्या तुहां जो सैह पंज हजारां दियां पंज रोटियां याद नी हन, कने ना एह कि तुहां कितणे टोकर चुकेयो थे । 10 कने ना सैह जेहिड्यां चौं हजारां दियां सत रोटियां, कने ना एह कि तुहां कितणे टोकर चुकेयो थे ? 11 तुहां कजो नी समझे कि मैं तुहां नैं रोटियां दे बारे च नी ग्लाय्या, अपर एह कि तुहां फरीसियां कने सदूकियां दे खमीरे ते चुकनै रैह्यो ।" 12 ताहू तिन्हां जो समझा च आया कि तिन्हीं रोटी दे खमीर ते नी, अपर फरीसियां कने सदूकियां दिया शिक्षा ते चुकनै रैहणे जो ग्लाय्या था ।

पतरसे दा यीशु जो 'मसीह' स्वकार करणां

(मरकुस 8 : 27-30; लूका 9 : 18-21)

13 यीशु कैसरिया फलिप्पी दे प्रदेशे च आया कने अपने चेलयां ते पूछणां लग्गा, माणु माणुये दे पुतर जो क्या ग्लांदे हन? 14 तिन्हां ग्लाय्या, कुच्छ तां

यूहन्ना बपतिस्मा दैणे आळा ग्लांदे हन, कने कुच्छ एलिय्याह कने कुच्छ यिर्मयाह या भविष्यवक्ता च कोई इक्क ग्लांदे हन ।" 15 तिन्हीं तिन्हां नैं ग्लाय्या, "अपर तुहां मिन्जो क्या ग्लांदे हन?" 16 शमौन पतरसें जबाब दिता, तू जिंदे परमात्में दा पुतर ऐ ।" 17 यीशुयें तिन्हां जो जबाब दिता, "हे शमौन, योना दे जागता, तू धन ऐ; कजोकि मांस कने खून ते नी, अपर मेरे पितें जेहड़ा सुअर्गें च ऐ, एह गल्ल तिज्जो पर प्रकट कित्ती ऐ । 18 कने मैं भी तिज्जो नैं ग्लांदा कि तू पतरसे ऐ, कने मैं इस पत्थरे पर अपणी कलेसिया बणांगा कने अधोलोक दे दुरआजे तिस पर प्रबल नी होंगे । 19 मैं तिज्जो सुअर्गें दे राजे दी चाबियां दिंगा: कने जे कुच्छ तू धरतिया पर बन्नणां, सैह सुअर्गें च बन्नेया जाणां; कने जेहड़ा कुच्छ तू धरतिया पर खोलणां, सैह सुअर्गें च खुलणां ।" 20 ताहू तिन्हीं चेलयां जो चेतावणी दिती कि कुस नैं मत ग्लाय्या कि मैं मसीह ऐ ।

अपणियां मौती दी भविष्यवाणी

(मरकुस 8 : 31-33; लूका 9 : 22)

21 तिस बगते ते यीशु अपने चेलयां जो दस्सणां लग्गा, "जरूरी ऐ कि मैं यरूशलेम जो जां कने स्याणेयां दे प्रधान याजकां, कने शास्त्रियां दे हत्थ ते बड़े दुख उठां; कने मारी दिता जां; कने त्रीये दिने जिंदा होई जां ।" 22 इसा गल्ला पर पतरसे तिसियो लग्ग लैई जाई नैं झिडकणां लग्गा, "हे प्रभु, परमात्मां इआं मत कर! तिज्जो नैं देहया कदी ना हुंगा ।" 23 तिन्हीं मुडी नैं पतरसे नैं ग्लाय्या, "हे सैतान, मेरे सामणे ते दूर होई जा! तू मिन्जो ताईं टोकरा दी बजाह ऐ : कजोकि तू परमात्में दियां गल्ला पर नी, अपर माणुआं दी गल्लां पर मन लगांदा ऐ ।"

यीशु मसीह दे पचांह चलणे दा मतलब

(मरकुस 8 : 34 --- 9 : 1; लूका 9 : 23-27)

24 ताहू यीशुयें अपने चेलयां नैं ग्लाय्या, "जे कोई मिन्जो पचांह ओणां चाह, तां अप्पु ते इन्कार करे कने अपणियां सूलिया चुकी नैं मिन्जो पचांह चली पौ । 25 कजोकि जेहड़ा कोई अपणी जान्न बचाणां चाहंदा, तिन्हीं तिसायो गुआणां; कने जिन्हीं मिन्जो ताईं अपणी जान्न गुआणी ऐ, तिन्हीं तिसायो पाणां ऐ । 26 जे माणु सारे संसारे जो हासल करे, कने अपणियां जान्नी दा नकसान चुके, तां तिसियो क्या फायदा होणां? या माणु अपणी जान्नी दे बदले क्या दिंगा? 27 माणुये दा पुतर अपने सुअर्गदतां सौगी अपने पिता दी महिमा च ओंगा, कने तिस बगते सैह हर इक्की जो तिसदे कम्मां दे मताबक फळ दिंगा । 28 मैं तुहां नैं सच ग्लांदा कि जेहड़ा ऐत्थू खडूतेयो हन, तिन्हां च कुच्छ ऐदेय हन कि सैह जाहू तिकर माणुये दे पुत्रे जो परमात्में दे राजे च ओंदे होये नी दिखी लेंगे, ताहू तिकर मौती दा सुआद कदी नी चरखे ।"

यीशु मसीह दा रूप बदली जाणां

(मरकुस 9 : 2-13; लूका 9 : 28-36)

17 छिं दिना दे बाद यीशुयें पतरसे कने याकूब कने तिसदे ये यूहन्ने जो सौगी लैआ, कने तिन्हां जो सुनसाण च कुसी उचे प्हाडे पर लैई गैआ । 2 तित्थु तिन्हां दे सामणे तिस दा रूप बदल्लेया, कने तिसदा मुं सूरजे साइआं चमकेया कने तिसदे कपड़े जोतिया साइआं चिट्टे होई गै । 3 कने मूसा कने एलिय्याह तिस सौगी गल्लां करदे तिन्हां जो दुस्से ।

4 इसा गल्ला पर पतरसें यीशु नैं ग्लाय्या, "हे प्रभु अहां दा ऐत्थू रैहणां ठीक ऐ । जे तेरी इच्छा होयें तां मैं ऐत्थू तीन मंडप बणां; इक्क तिज्जो ताईं इक्क मूसे ताईं इक्क एलिय्याह ताईं ।" 5 सैह ग्ला दा था कि इक्क चिट्टे बदळें तिन्हां जो ढकी लैआ, कने तिस बदळे च एह उआज आई; एह मेरा प्यारा पुतर ऐ, जिसते मैं खुश ऐ इसदी सुणां ।" 6 चले एह सुणी नैं मुंभें भार पैई गै कने बड़े भरी डरी गै । 7 यीशुयें बक्खे आई नैं तिन्हां जो छूई नैं, ग्लाय्या, "उठा, डरा मत ।" 8 ताहू तिन्हां अपणियां अंखी चुकियां तां यीशु जो छड्डी नैं होर कुसी जो नी दिख्यां ।

9 जाहू सैह प्हाडे ते लौआ दे थे ताहू यीशुयें तिन्हां जो एह हुक्म दिता, "जाहू तिकर माणु दा पुतर मरेयां च जिंदा नी होई जां, ताहू तिकर जेहड़ा कुच्छ तुहां दिख्या ऐ कुसी नैं मत ग्लांदे ।" 10 इसा गल्ला पर तिसदे चेलयां तिसते पूछ्या, "भिरी शास्त्री कजो ग्लांदे हन कि एलिय्याह दा पैहले ओणां जरूरी ऐ । 11 तिन्हीं जबाब दिता, "एलिय्याह जरूर ओंगा, कने सब कुच्छ सुधारगा । 12 अपर मैं तुहां नैं ग्लांदा कि एलिय्याह आई चुकेया ऐ, कने लोकां

तिसियो नी पणछेणया; अपर जदेया चाया तिआं ई तिस सौगी किता । इस तरीके नें माणु दा पुत्तर भी तिन्हां दे हत्थ ते दुख झेलगा ।¹³ ताहू चले अप्पु च समझेणां लगे कि तिन्हीं अहां जो यूहन्ना बपतिस्मा दैणे आळे दे बारे च ग्लाय़ा ऐ ।

बुरिया आत्मां दे सतायेयो जागते जो ठीक करणां (मरकुस 9 : 14-29; लूका 9 : 37-43)

¹⁴ जाहू सैह भीड़ा अल्ल पुजे, तां इक्क माणु तिस अल्ल आया, कने गोडे दे भार बैई नें ग्लाणां लग्गा, ¹⁵ "हे प्रभु मेरे जागते पर दया कर! कजोकि तिसियो मिर्गी ओदी ऐ, कने सैह बड़ा दुख झेलगा ऐ; कने कैई बरी अग्गी च कैई बरी पाणिये च पैई जांदा ऐ । ¹⁶ मैं तिसियो तेरे चेलयां अल्ल लंदेया था, अपर सैह तिसियो ठीक नी करी सके, ¹⁷ यीशुयें जबाब दित्ता, "हे वेक्सुआसी कने हठी लोकों, मैं काहू तिकर तुहां सौगी रैहंगा? काहू तिकर तुहां दी सैहंगा? तिसियो ऐत्थियो मिन्जो अल्ल लैयोआ ।" ¹⁸ ताहू यीशुयें बुरिया आत्मां जो झिड़केया, कने सैह तिस ते निकळी गैई; कने जागत तिस बगत ठीक होई गैआ ।

¹⁹ ताहू चेलयां लग्गा होई नें यीशु अल्ल आई नें ग्लाय़ा, "अहां इसायो कजो ठीक नी करी सके?" ²⁰ तिन्हीं तिन्हां नें ग्लाय़ा, "अपणे वसुआसे दी कमिया दिया बजाह ते, कजोकि मैं तुहां नें सच ग्लांदा, जे तुहां दा वसुआस राई दे दाणे दे बराबर भी होयें, तां इस प्हाड़े नें ग्लाइ सकगे, 'ऐत्थू ते खिसकी नें औत्थू चली जा, तां तिन्हीं चली जाणां; कने कोई गल्ल तुहां तांई ओखी नी होगी ।" ²¹ [अपर एह जाति बिना प्रार्थना कने व्रत ते नी निकळदी ।]

अपणियां मौती दे बारे च दुवारी भिरी भविष्यवाणी (मरकुस 9 : 30-32; लूका 9 : 43-45)

²² जाहू सैह गलीले च थे, तां यीशुयें तिन्हां नें ग्लाय़ा, "माणु दा पुत्तर माणुआं दे हत्थे च पकडुआया जाणा; ²³ सैह तिसियो मारी दिगे, कने सैह त्रीयें दिनें जिंदा होई जाणां ।" इसा गल्ला पर चले बड़े उदास होये ।

मंदरे दा टैक्स

²⁴ जाहू सैह कफरनहूम सैहरे पुजे, तां मंदरे दा टैक्स लैणे आळेयां पतरसे अल्ल आई नें पूछया, "क्या तुहां दा गुरु मंदरे दा टैक्स नी दिंदा ऐ?" ²⁵ तिन्हीं ग्लाय़ा, "हां दिंदा ऐ ।" जाहू सैह घरे आया, तां यीशुयें तिसदे पूछणे ते पैहले ई तिसियो ग्लाय़ा, "हे शमोन, तू क्या सोचा दा ऐ? धरतिया दे राजे टैक्स कुणां ते लैंदे हन? अपणे पुत्तरां ते या परायां ते?" ²⁶ पतरसें तिस नें ग्लाय़ा, "परायां ते ।" यीशुयें तिस नें ग्लाय़ा, तां पुत्तर बची गै ²⁷ तमी इसताई कि अहां तिन्हां जो ठोकर नी खुआये, तू झीला कंडे जाई नें जाळ पा, कने जेहडी मच्छी पैहले निकळे, तिसायो लै; तां तिजो तिसा दे मुंमं खोलणे पर इक्क सिक्का मिलगा, तिस जो लैई नें मेरे कने अपणे बदले तिन्हां जो टैक्स दैई दैआ ।

सुअर्गे दे राजे च बड़ा कुण ऐ ? (मरकुस 9 : 35-37; लूका 9 : 46-48)

18 तिस बगत चले यीशु अल्ल आई नें पूछणां लगे, "सुअर्गे दे राजे च बड़ा कुण ऐ?" ² इसा गल्ला पर तिन्हीं इक्की जागते जो अपणे अल्ल सददी नें तिन्हां बिच खरेडी दित्ता, ³ कने ग्लाय़ा, "मैं तुहां नें सच ग्लांदा कि जाहू तिकर तुहां नी बदलन कने जागतां साइआं ना बणां, तुहां सुअर्गे दे राजे च नी पुज्जी सकगे । ⁴ जेहडा कोई अप्पु जो इस जागते साइआं लोक्का करगा, सैह सुअर्गे दे राजे च बड़ा हुंगा । ⁵ कने जेहडा कोई मेरे नांये ते इक्क ऐदेय जागते जो ग्रहण करदा ऐ सैह मिन्जो ग्रहण करदा ऐ ।

पाप करणे दी परख

(मरकुस 9 : 42-48; लूका 17 : 1,2)

⁶ अपर जेहडा कोई इन्हां लोक्केयां च जेहडा मिन्जो पर वसुआस करदे हन इक्की जो ठोकर खुआये, तिस तांई खरा हुंदा कि बड़े घराटे दा पुड़ तिसदे गळे च टुंगया जांदा, कने सैह डुगे समंदर च डुबाया जांदा । ⁷ ठोकरां दियां बजाह ते संसारे पर हाय! ठोकरां दा लगणा जरूरी ऐ; अपर हाय तिस माणुये पर जिसदिया बजाह ते ठोकर लगदी ऐ ।

⁸ जे तेरा हत्थ या तेरा पैर ठोकर खुआये, तां तिसियो बड्डी नें सट्टी दैआ, टुंदा या लंगड़ा होई नें सदा दी जिन्दगिया च प्रवेश करणां तिजो तांई इसते बधिया ऐ कि दू हत्थां या दू पैरां होंदेया तू नरके दी अग्गी च सट्टेया जाये । ⁹ जे तेरी अंख तिजो ठोकर खुआये, तां तिसायो कड्डी नें सट्टी दैआ; काणा होई नें सदा दी जिन्दगिया च प्रवेश करणां तिजो तांई इसते बधिया ऐ कि दू अंखी होंदेया तू नरके दिया अग्गी च सट्टेया जाये ।

गुआचिया भेडा दा उदारण (लूका 15 : 3-7)

¹⁰ दिखा, तुहां इन्हां लोक्केयां च कुसी जो घटिया मत जाणां; कजोकि मैं तुहां नें ग्लांदा कि सुअर्गे च तिन्हां दे दूत मेरे सुअर्गीय पिता दे मुंमं सदा दिखदे रैहंदे हन । ¹¹ [कजोकि माणु दा पुत्तर गुआचेयां जो बचाणां आया ऐ ।]

¹² तुहां क्या सोचा दे हन? मनी लैआ कुसी माणुये दियां सौ भेडां होन, कने तिन्हां च इक्क गुआची जां, तां क्या सैह नडीनूयें जो छड्डी नें प्हाडां पर जाई नें, तिसा गुआचिया जो नी तोपगा? ¹³ कने जे देहया होयें कि तिसियो मिलें, तां मैं तुहां नें सच ग्लांदा कि सैह तिन्हां च नडीनूयें भेडां तांई जेहडियां गुआचियां नी थियां, इतणां खुश नी होणां जितणां कि इसा भेडा तांई होणां ¹⁴ इआं ई तुहां दे पिता दी जेहडा सुअर्गे च ऐ एह इच्छा नी कि इन्हां लोक्केयां च इक्क भी मुक्की जां ।

अपराधियां दे प्रति वर्ताव

¹⁵ जे तेरा भाऊ तेरे वरखलाफ अपराध करें, तां जा कने किले च गल्लबात करी नें तिसियो समझा; कने जे सैह तेरी सुणे तां तैं अपणे भाऊये जो पाई लैआ । ¹⁶ कने सैह ना सुणे, तां इक्क या दो जणे होर अपणे सौगी लैई जा, कि हर इक्क गल्ल दू या त्रीं गवाहां दे मुंमं ते पक्की होई जां । ¹⁷ जे सैह तिन्हां दी भी नी मन्ने, तां कलेसिया नें ग्लाइ दै, अपर जे सैह कलेसिया दी ना मने, तां तू तिसियो दूईयां जातिआं कने चुंगी लैणे आळेयां साइआं समझ ।

रोकणां कने मौका दैणां

¹⁸ मैं तुहां नें सच ग्लांदा, जेहडा कुच्छ तुहां धरतिया पर बन्नगे, सैह सुअर्गे च बजणा कने जेहडा कुच्छ तुहां धरतिया पर खोलगे, सैह सुअर्गे च खुलणां । ¹⁹ भिरी मैं तुहां नें ग्लांदा, जे तुहां च दो जणे धरतिया पर कुसी गल्लां तांई इक्क मन होई नें तिसियो मंगगे, तां सैह मेरे पिता दे पाससे ते जेहडा सुअर्गे च ऐ, तिन्हां तांई होई जाणां । ²⁰ कजोकि जित्थू दो या तीन मेरे नांये ते कड्डे होंदे हन, तित्थू मैं तिन्हां बिच हुंदा ऐ ।"

कठोर दासे दा उदारण

²¹ ताहू पतरसें बक्खे आई नें तिस नें ग्लाय़ा, "हे प्रभु, जे मेरा भाऊ अपराध करदा रैह, तां मैं कितणी बरी तिसियो माफ करां? क्या सत बरी?" ²² यीशुयें तिस नें ग्लाय़ा, "मैं तुहां नें एह नी ग्लांदा कि सत बरी तिकर अपर सत बरी दे सतर गुणां तिकर । ²³ इसताई सुअर्गे दा राज तिस राजे साइआं ऐ, जिन्हीं अपणे दासां ते लेखा लैणां चाया । ²⁴ जाहू सैह लेखा लैणां लग्गा, तां इक्क जणा तिस सामणे लंदा जेहडा दस हजार तोड़े दा कर्जदार था । ²⁵ कने तिस अल्ल टाणे तांई कुच्छ नी था, तां तिसदे मालकें ग्लाय़ा, 'एह कने इसदी लाडी कने बाल बच्चे कने जेहडा कुच्छ इसदा ऐ, सब कुच्छ बेची दित्ता जां, कने कर्ज चुकाई दित्ता जां ।' ²⁶ इसा गल्ला पर तिस दासे गांह पैई नें तिसियो प्रणांम किता, कने ग्लाय़ा, 'मेरेया मालका सबर रख, मैं सारा कर्ज भरी दिंगा ।' ²⁷ ताहू तिस दासे दे मालकें तरस खाई नें तिसियो छड्डी दित्ता, कने तिसदा कर्ज भी माफ करी दित्ता ।

²⁸ अपर जाहू सैह दास बाहर निकळेया, तां तिसदे संगी दासां च इक्क देहया तिसियो मिला जेहडा तिसदे सौ दिनारां दा कर्जदार था; तिन्हीं तिसियो पकडी नें तिसदा गळा घुटेया कने ग्लाय़ा, 'जेहडा कुच्छ तिजो अल्ल मेरा कर्ज ऐ तिसियो भरी दै ।' ²⁹ इसा गल्ला पर तिसदा संगी दास तिस गांह पैई नें तिस नें विणती करणां लग्गा, 'सबर रख, मैं सारा कर्ज भरी दिंगा ।' ³⁰ सैह नी मनेया, अपर जाई नें तिसियो जेला च पाई दित्ता कि जाहू तिकर कर्ज नी भरी दै, ताहू तिकर तित्थू रैह । ³¹ तिसदे संगी दास एह जेहडा होया

था दिखी नैं बड़े दुखी होये, कने जाई नैं अपणे मालके जो पूरा हाल दस्सी दिता । 32 ताहू तिसदे मालके तिसियो सद्दी नैं तिस नैं ग्लाय, 'हे दुष्ट दास, तैं जेहड़ी मिन्जो नैं विणती किन्ती, तां मैं तेरा सैह पूरा कर्ज माफ करी दिता । 33 इसताई जिआं मैं तिजो पर दया किन्ती, तिआं ई क्या तिजो भी अपणे संगी दासे पर दया करणां नी चाईदी थी? 34 कने तिसदे मालके गुस्से च आई नैं तिसियो सज्जा दैणे आळ्यां दे हुआले करी दिता, कि जाहू तिकर सैह सारा कर्ज भरी ना दैं, ताहू तिकर तिन्हां दे हुआलें रैंह ।

35 इआं ई जे तुहां च हर इक्क अपणे भाऊये जो दिले ते माफ नी करगा, तां मेरा पिता जेहड़ा सुअर्गे च ऐ, तुहां नैं देहया वताव करणां ऐ ।

तलाके दे बारे च यीशु मसीह दी शिक्षा

(मरकुस 10 : 1-12)

19 जाहू यीशु एह गलां ग्लाय बैठा, तां गलीले ते चली गैआ; कने यरदन दरयाए दे पार यहूदिया दे प्रदेश च आया । 2 ताहू बडी भीड़ तिसदे पचांह चली पैई, कने तिन्हीं तिन्थु तिन्हां जो ठीक किता ।

3 ताहू फरीसी तिसियो परखणे ताई बकखे आई नैं गलाणां लग्गे, "क्या हर इक्क बजाह ते अपणियां लाड़िया जो छड्डणां ठीक ऐ?" 4 तिन्हीं जबाब दिता, "क्या तुहां नी पढ़या कि जिन्हीं तिन्हां जो बणांया, तिन्हीं शुरु ते मरद कने जणांस बणाई नैं ग्लाय,

5 इसा बजाह ते माणु अपणे माऊ बुड़े ते लग्ग होई नैं अपणियां लाड़िया सौगी रेंहगा कने सैह दौयो इक्क तन होंगे?

6 कने सैह हुण दो नी, अपर इक्क तन हन । इसताई जिसियो परमात्मैं जोड़या ऐ, तिसियो माणु लग्ग नी करे 7 तिन्हां तिस नैं ग्लाय, "भिरी मूसें एह कजो ठैहराया कि त्यागपत्र दैई नैं तिसियो छड्डी दैं?" 8 तिन्हीं तिन्हां नैं ग्लाय, "मूसें तुहां दे मने दी कठोरता दिया बजाह ते तुहां जो अपणियां अपणियां लाड़िया जो छड्णे दा हुक्म दित्या, अपर शुरु ते देहया नी था 9 कने मैं तुहां नैं ग्लांदा कि जेहड़ा कोई व्यभिचार जो छड्डी होर कुसा बजाह ते अपणियां लाड़िया जो छड्डी नैं दूईआ नैं व्याह करे, सैह व्यभिचार करदा ऐ; कने जेहड़ा तिसा छड्डिया नैं व्याह करे, सैह व्यभिचार करदा ऐ ।"

10 चेलयां तिस नैं ग्लाय, "जे मरदे दा जणांसा सौगी ऐदेया रिश्ता ऐ, तां व्याह करणां ठीक नी ।" 11 तिन्हीं तिन्हां नैं ग्लाय, "सारे वचन ग्रहण नी करी सकदे, सिर्फ सैह जिन्हां जो एह दान दित्या ऐ । 12 कजोकि कुच्छ नंपुसक ऐदेय हन, जेहड़े माऊ दे गर्भे ई ते ऐदेयो जम्मयो; कने कुच्छ नंपुसक ऐदेय हन. जिन्हां जो माणुयें नंपुसक बणांया; कने कुच्छ नंपुसक ऐदेय हन, जिन्हां सुअर्गे दे राजे ताई अपणे आप्पे जो नंपुसक बणांया ऐ । जेहड़ा इसियो ग्रहण करी सकदा ऐ, सैह इसियो ग्रहण करन ।"

जागतां जो आशीर्वाद

(मरकुस 10 : 13-16; लूका 18 : 15-17)

13 ताहू माणु जागतां जो तिस अल्ल लैई आये कि सैह तिन्हां पर हत्थ रखें कने प्रार्थना करन, अपर चेलयां तिन्हां जो झिड़केया । 14 यीशुयें ग्लाय, "जागतां जो मिन्जो अल्ल ओणां दैआ, कने तिन्हां जो मना मत करा, कजोकि सुअर्गे दा राजे ऐदेयां दा ई ऐ ।" 15 कने सैह तिन्हां पर हत्थ रखी नैं तिन्थु ते चली गैआ ।

अमीर नौजोआन कने सदा दी जिन्दगी

(मरकुस 10 : 17-31; लूका 18 : 18-30)

16 इक्क माणु यीशु अल्ल आया कने तिस नैं ग्लाय, "हे गुरु, मैं कुण दैआ खरा कम्म करे कि सदा दी जिन्दगी पां? 17 तिन्हीं तिस नैं ग्लाय, "तू मिन्जो ते भलाईया दे बारे च कजो पूछा दा? भला तां इक्क ई ऐ, अपर जे तू जिन्दगिया च प्रवेश करणां चाहदा ऐ, तां हुक्मां जो मना कर ।" 18 तिन्हीं तिस नैं ग्लाय, "कुण दै हुक्म यीशुयें ग्लाय, "एह कि खून मत करणां, व्यभिचार मत करणां, चोरी मत करणां, झूठी गवाही मत दैणां, 19 अपणे बुड़े कने अपणिया माऊ दा आदरमान करणां, कने अपणे पड़ेसिये नैं अप्पु साइआं प्यार रखणां ।"

20 तिस जुआने तिस नैं ग्लाय, "इन्हां सबना जो तां मैं मनदा ऐ; हुण मिन्जो च कुसा गला दी कमी ऐ?" 21 यीशुयें तिस नैं ग्लाय, "जे तू सिद्ध होणां चाहदा ऐ तां जा, अपणां समान बेची नैं गरीबां जो दै, कने तिजो सुअर्गे

च धन दौलत मिलगी; कने आई नैं मिन्जो पचांह चली पाँ । 22 अपर सैह जुआन एह गल्ल सुणी नैं उदास होई नैं चली गैआ, कजोकि सैह बड़ा मीर था ।

23 ताहू यीशुयें अपणे चेलयां नैं ग्लाय, "मैं तुहां नैं सच ग्लांदा कि मीरे दा सुअर्गे दे राजे च प्रवेश करणां ओखा ऐ । 24 तुहां नैं भिरी ग्लांदा कि परमात्मैं दे राजे च मीरे दा प्रवेश करणे ते ऊंटे दा सुई दे नक्के च निकळी जाणां सोखा ऐ ।" 25 एह सुणी नैं चेलयां बड़े हैराण होई नैं ग्लाय, "भिरी कुसदा उद्धार होई सकदा ऐ ।" 26 यीशुयें तिन्हां दे पाससं दिखी नैं ग्लाय, "माणुआं ते तां एह नी होई सकदा ऐ, अपर परमात्मैं ते सब कुच्छ होई सकदा ऐ । 27 इसा गला पर पतरसं तिस नैं ग्लाय, दिख, अहां तां सब कुच्छ छड्डी नैं तिजो पचांह चली पैयो हन । अपर अहां जो क्या मिलगा?" 28 यीशुयें तिन्हां नैं ग्लाय, "मैं तुहां नैं सच ग्लाय कि नौईया सुष्ठिया च जाहू माणु दा पुत्तर अपणी महिमा दे सिंहासणे पर बैगा, तां तुहां भी जेहड़े मिन्जो पचांह चली पैयो, बाराह सिंहासणे पर बैई नैं इस्राएले दे बारा गोत्रां दा न्याय करगे । 29 कने जिन्हीं कुणी घरां, या भाऊआ या बेहणां, या बुड़े, या माऊ, या बाल बच्चेयां या खेतां जो मेरे नांये ताई छड्डी दित्या ऐ तिसियो सौ गुणा मिलगा, कने सैह सदा दी जिन्दगिया दा हक्कदार हुंगा । 30 अपर मत्ते जेहड़े पैहलें हन, पचांह होंगे; कने जेहड़े पचांह हन, सैह पैहले होंगे ।

बागे दे मजदूरों दा उदारण

20 सुअर्ग दा राजे कुसी अंगूरा दे बागे दे मालके साइआं ऐ, जेहड़ा भ्यागा निकळी नैं अपणे अंगूरा दे बागे च मजदूरों जो लगाये 2 तिन्हीं मजदूरों नैं इक्क दीनार रोजे दी दिहाड़ी किन्ती कने तिन्हां जो अपणे अंगूरा दे बागे च घल्लया । 3 भिरी दिनें दे पैहले पैहरें तिन्हीं निकळी नैं होरनी लोकां जो बाजारे च बेले खडुतेयो दिख्या, 4 कने तिन्हां नैं ग्लाय, 'तुहां भी अंगूरा दे बागे च जा, कने जेहड़ा कुच्छ ठीक ऐ, तुहां जो दिंगा, सैह भी गै । 5 भिरी तिन्हीं द्ये कने त्रीयें पैहरें निकळी नैं तिआं ई किता । 6 इक्की घंटे दा दिन रेंहआ तिन्हीं भिरी निकळी नैं द्येयां जो खडुतेया दिख्या, कने तिन्हां नैं ग्लाय, 'तुहां कजो ऐन्थु दिन भर बेले खडुतेयो रेंह?' तिन्हां तिस नैं ग्लाय, इसताई कि कुणी भी अहां जो दिहाड़िया पर नी लगाया । 7 तिन्हीं तिन्हां नैं ग्लाय, तुहां भी अंगूरा दे बागे च जा ।"

8 संजा जो अंगूरा दे बागे दे मालके अपणे खजानचिये नैं ग्लाय, "मजदूरों जो सददी नैं पचांह आळ्यां ते लैई नैं पैहले आळ्यां तिकर तिन्हां जो दिहाड़ी दैई दै ।" 9 जाहू सैह आये जिन्हां पूरे दिने च इक्क घंटा लगाया था, तिन्हां जो इक्क इक्क दीनार मिलेया । 10 जेहड़ा पैहले आयेयो तिन्हां एह समझेया कि अहां जो जादा मिलगा, अपर तिन्हां जो भी इक्क दीनार ई मिलेया । 11 जाहू मिलेया तां घरे दे मालके पर कुड़कुड़ाकाई नैं गलाणां लग्गे, 12 इन्हां पचांह आळ्यां इक्क ई घंटा कम्म किता, कने तैं तिन्हां जो अहां दे बराबर दिहाड़ी दिती, जिन्हां दिन भर दा बोझ चुकेया कने धूप झेली? 13 तिन्हीं तिन्हां च इक्की जो जबाब दिता, 'हे साथी मैं तिजो नैं कुच्छ अन्याय नी करदा । क्या तैं ई मिन्जो नैं इक्क दीनार नी कित्या था? 14 जेहड़ा तेरा ऐ, चुकी लै कने चली जा; मेरी इच्छा एह ऐ कि जितणा तिजो दैं उतणा ई इस पचांह आळे जो भी दैं । 15 क्या एह ठीक नी कि मैं अपणे माले ते जेहड़ा चाहदा सैह करा? क्या मेरे खरे होणे दिया बजाह ते तू बुरिया नजरा नैं दिखा दा ऐ?' 16 इसा तरीके नैं जेहड़े पचांह हन, सैह गांह होणे; कने जेहड़े गांह हन, सैह पचांह होणे ।"

अपणिया मौती दे बारे च त्री बरी भविष्यवाणी

(मरकुस 10 : 32-34; लूका 18 : 31-34)

17 यीशु यरुशलेमे जो जांदे जांदे बारां चेलयां जो सुनसाण च लैई गैआ, कने रस्ते च तिन्हां नैं गलाणां लग्गा, 18 दिखा, अहां यरुशलेमे जो चलेयो हन; कने माणु दा पुत्तर प्रधान याजकां कने शास्त्रियां दे हत्थें पकडुआया जाणां, कने तिसियो मारणे जोग्गे ठैहराणां । 19 कने तिस जो गैर - यहूदियां दे हुआले करणां कि सैह तिसदा मजाक दुआन, कने कोड़े मारन, कने सूलिया पर टंगन, कने सैह त्रीये दिने भिरी जिंदा होई जांये ।

इक्की मारु दी विणती

(मरकुस 10 : 35-45)

20 ताहू जबदिये दे जागतां दिया मारु अपने पुतरां सौगी यीशु अल्ल आई नें प्रणांम कित्ता, 21 यीशुयें तिसा नें ग्लाय, "तू क्या चांहदी ऐ? सैह तिस नें ग्लाय, "एह वचन दे कि मेरे एह दो जागत तेरे राजे च इक्क तेरे सजे कने इक्क तेरे खबे बैठन ।" 22 यीशुयें जबाब दित्ता, "तुहां नी जाणदे कि क्या मंगा दे हन । जेहड़ा कटोरा मैं पीणे आळा, क्या तुहां पी सकदे हन?" तिन्हां तिस नें ग्लाय पी सकदे हन । 23 तिन्हीं तिन्हां नें ग्लाय, "तुहां मेरा कटोरा तां पीणे, अपर अपने सजे कने खबे कुसी जो बैठाणां मेरा कम्म नी, अपर जिन्हां ताई मेरा पिता दे पाससे ते त्यार कित्या, तिन्हां ई ताई ऐ ।"

24 एह सुणी नें दसों चले तिन्हां दूनी मारुआं पर गुस्सा होये । 25 यीशुयें तिन्हां जो अप्पु अल्ल सद्दी नें ग्लाय, "तुहां जाणदे हन कि गैर - यहूदियां दे हाकम तिन्हां पर हक्क जता दे हन; कने जेहड़े बडे हन, सैह तिन्हां पर हक्क जतां दे हन । 26 अपर तुहां च एदेया नी हुंगा, अपर जेहड़ा कोई तुहां च बडा होणां चाये, सैह तुहां दा दास बणें, 27 कने जेहड़ा तुहां च प्रधान होणां चाये, सैह तुहां दा दास बणें; 28 जिआं कि माणु दा पुतर; सैह इसताई नी आया कि तिसदी सेवा टेहल कित्ती जाये, अपर इसताई आया कि सैह अप्पु सेवा टेहल करे, कने मतेआं जो छड़ाणे ताई अपनी जात्र दें ।"

दू अत्रेयां जो ठीक करणां

(मरकुस 10 : 46-52; लूका 18 : 35-43)

29 जाहू सैह यरीहो ते निकळा दे थे, तां इक्क बडी भीड़ तिस दे पचांह चली पैई । 30 कने दो अत्रे जेहड़े सडका कंडे बैठेयो थे, एह सुणी नें कि यीशु जा दा ऐ, हक्कां पाई नें ग्लाय लगे, "हे प्रभु, दाऊदे दी औलाद, अहां पर दया कर ।" 31 लोकां तिन्हां जो झिडकेया कि चुप रहूआ; अपर सैह होर भी जोरे नें ग्लाय लगे, "हे प्रभु, दाऊदे दी औलाद, अहां पर दया कर ।" 32 ताहू यीशुयें खडौई नें तिन्हां जो सद्देया कने ग्लाय, "तुहां क्या चाहंदे हन कि मैं तुहां ताई करां?" 33 तिन्हां तिस नें ग्लाय, "हे प्रभु, एह कि अहां दियां अखी खुली जां ।" 34 यीशुयें तरस खाई नें तिन्हां दियां अखी छूईयां, कने सैह ताहू ई दिखणां लगे, कने तिसदे पचांह चली पै ।

यरुशलम च विजय प्रवेश

(मरकुस 11 : 1-11; लूका 19 : 28-40; यूहन्ना 12 : 12-19)

21 जाहू सैह यरुशलम दे नैडें पुजे कने जेतून पहाडे पर बैतफगे अल्ल आये, तां यीशुयें दू चेलयां जो एह ग्लाय नें घल्लया; 2 सामने आळे ग्रां च जा! तित्थु पुजदे ई इक्क गद्दही बन्नियो होई, कने तिसा सौगी बच्चा तुहां जो मिलणां । तिन्हां जो खोली नें मिन्जो अल्ल लैई ओआ । 3 जे तुहां जो कोई कुच्छ ग्लाय, तां ग्लानेयां कि प्रभु जो इन्हां दी जरूरत ऐ, सैह ताहू ई तिन्हां जो घल्ली दिंगा । 4 एह इसताई होया कि जेहड़ा वचन भविष्यवक्ता दे दुआरा ग्लाय गैआ था, सैह पूरा होयें

5 सिय्योने दी कुडियां नें ग्लानेयां, दिख तेरा राजा तिज्जो अल्ल ओआ दा ऐ, सैह नम्र ऐ, कने गद्देह पर बैठेया ऐ; अपर गद्दिया दे बच्चे पर ।"

6 चेलयां जाई नें, जिआं यीशुयें चेलयां नें ग्लाय था, तिआं ई कित्ता ।

7 कने गद्दही कने बच्चे जो लै आई नें, तिस पर अपने कपडे सट्टे, कने सैह तिस पर बैई गैआ । 8 ताहू मतेआं लोकां अपने कपडे रस्ते च बछायें, कने होरनी लोकां रुखां ते डालियां बड्डी नें रस्ते च बछाइआं । 9 जेहड़ी भीड़ गांह गांह चलियो कने पचांह पचांह चली ओआ दी थी, डडी डडी ग्लांदी थी, "दाऊदे दी औलादा जो होशाना, धन ऐ सैह जेहड़ा प्रभु दे नांये ते ओंदा ऐ, अम्बरे च होशाना ।" 10 जाहू तिन्हीं यरुशलमे च प्रवेश कित्ता, तां सारे शैहरे च हलचल मची गैयी, कने माणु ग्लाय लगे, "एह कुण ऐ?" 11 लोकां ग्लाय, एह गलीले दे नासरते दा भविष्यवक्ता यीशु ऐ ।

यरुशलम दे मंदरे ते वपारियां जो बाहर कड्डणां

(मरकुस 11 : 15-19; लूका 19 : 28-40; यूहन्ना 2 : 13-22)

12 यीशुयें परमात्में दे मंदर च जाई नें तिन्हां सारेयां जो, जेहड़े मंदरे च लैण दैण करा दे थे कड्डी दित्ता, अड्ढिआं दे तख्ते कने कबूतर बेचणे आळेयां दियां चौकिआं पलटी दित्तिआं । 13 कने तिन्हां नें ग्लाय, "पवित्रशास्त्रे च

लिख्या ऐ, मेरा घर प्रार्थना दा घरे दे नांये जाणेयां जांगा; अपर तुहां तां इसियो डाकुआं दा अड्डा बणां दे हन । 14 ताहू अत्रे कने लंगडे, मंदरे च तिस अल्ल आये, कने तिन्हीं तिन्हां जो ठीक कित्ता । 15 अपर जाहू प्रधान याजकां कने शस्त्रियां इन्हां अदभुत कम्मां जो, जेहड़े तिन्हीं कित्तेयो, कने जागतां जो मंदरे च 'दाऊदे दी औलादा जो होशाना ग्लांदे होये दिख्या, तां सैह गुस्सा होये, 16 कने तिस नें ग्लाय लगे, क्या तू सुणां दा ऐ कि एह क्या ग्लांदे हन?" यीशुयें तिन्हां नें ग्लाय, "हां क्या तुहां एह पवित्रशास्त्रे च कदी नी पढ़या; जागतां कने दूद पींदे बच्चेयां दे मुंमं ते तैं अपार स्तुति कराई? 17 ताहू सैह तिन्हां जो छड्डी नें शैहर दे बाहर बैतनिय्याह जो गैआ कने तित्थु रात कट्टी ।

बगैर फळां धूडे दा रुख

(मरकुस 11 : 12-14, 20-24)

18 भ्यागा जाहू सैह शैहरे जो हड्डी करी ओआ दा था तां तिसियो भूख लगी । 19 सडका कंडे धूडे दे इक्की रुखे दिखी नें सैह तिस बक्खें गैआ, कने पतरां जो छड्डी तिस च होर कुच्छ नी मिलेया कने तिस नें ग्लाय, "अजे ते तिज्जो च भिरी कदी फळ नी लगन ।" कने धूडे दा रुख ताहू ई सूकी गैआ । 20 एह दिखी नें चेलयां जो हैरानी होई कने तिन्हां ग्लाय, "एह धूडे दा रुख ताहू ई किआं सूकी गैआ?" 21 यीशुयें तिन्हां जो जबाब दित्ता, "मैं तुहां नें सच ग्लांदा जे तुहां वसुआस रखन कने शक नी करन, तां ना सिर्फ एह करगे जेहड़ा इस धूडे दे रुखे नें कित्ता ऐ, अपर जे इस पहाडे नें भी ग्लायें, पटौई जा, कने संमुदरे च जाई पौ, तां एह होई जाणां । 22 कने जेहड़ा कुच्छ तुहां प्रार्थना च वसुआसे नें मंगगे सैह सब तुहां जो मिलगा ।"

यीशु मसीह दे हक्क दा सबाल

(मरकुस 11 : 27-33; लूका 20 : 1-8)

23 सैह मंदरे च जाई नें शिक्षा दें दा था, तां प्रधान याजकां कने लोकां दे स्याणेयां तिस अल्ल आई नें पूछया, "तू एह कम्म कुस हक्क नें करदा ऐ? कने तिज्जो एह हक्क कुणी दित्या ऐ? 24 यीशुयें तिन्हां जो जबाब दित्ता, "मैं भी तुहां ते इक्क गल्ल पूछ्दा; जे सैह मिन्जो दस्सगे, तां मैं भी तुहां जो दस्सगा कि एह कम्म कुस हक्क नें करदा । 25 यहून्ने दा बपतिस्मा कुत्थु ते था? सुअर्ग दे पाससे ते या माणुआं दे पाससे ते? ताहू सैह अप्पु च बैहसणां लगे, जे अहां ग्लान 'सुअर्ग दे पाससे ते तां इन्हीं अहां जो ग्लाय, "भिरी तुहां तिसदा वसुआस कजो नी कित्ता? 26 कने जे ग्लान 'माणुआं दे पाससे ते तां अहां जो भीड़ा दा डर ऐ, कजोकि सैह सारे यहून्ने जो भविष्यवक्ता मनदे हन ।" 27 तिन्हां यीशु जो जबाब दित्ता, "अहां नी जाणदे ।" तिन्हीं भी तिन्हां नें ग्लाय, "तां मैं भी तुहां जो नी दस्सदा कि एह कम्म कुस हक्के नें करदा ऐ ।

दू पुतरां दा उदारण

28 "तुहां क्या सोचा दे हन? कुसकी माणुये दे दो जागत थे; तिन्हीं पैहले आळे अल्ल जाई नें ग्लाय, "हे जागता, अज्र अंगूरा दे बागे च कम्म कर ।" 29 तिन्हीं जबाब दित्ता, मैं नी जां दा, अपर बादे च पछताई नें गैआ । 30 भिरी बुडे दूये अल्ल जाई नें इआं ई ग्लाय, तिन्हीं जबाब दित्ता, जी हां जां दा, अपर नी गैआ । 31 इन्हां दूनी च कुणी बुडे दी इच्छा पूरी कित्ती?" तिन्हां ग्लाय, "पैहले आळें ।" यीशुयें तिन्हां नें ग्लाय, "मैं तुहां नें सच ग्लांदा कि चुंगी लैणे आळे कने वेश्याएं तुहां ते पैहलें परमात्में दे राजे च प्रवेश करदे हन । 32 कजोकि यहून्ना धार्मिकता दे रस्ते च होई नें तुहां अल्ल आया, कने तुहां तिसदा वसुआस नी कित्ता, अपर चुंगी लैणे आळेयां कने वेश्यां तिसदा वसुआस कित्ता; कने तुहां एह दिखी नें बादे च भी नी पछताये कि तिसदा वसुआस करी लेंदे ।

दुष्ट जमीदारां दा उदारण

(मरकुस 12 : 1-12; लूका 20 : 9-19)

33 इक्क होर उदारण सुणां; इक्क घरे दा मालक था, जिन्हीं अंगूरा दा बाग लगाया, तिस दे चौनी पाससेयां बाड बन्नेया तिस च रसे दे कोहूये ताई जमीन खुणी कने गुम्मत बणांया, कने जमीदारां जो तिस दा ठेका देंई नें परदेश चली गैआ । 34 जाहू फळे दा सीजन नैडें आया, तां तिन्हीं अपने दासां जो तिसदा फळ लैणे ताई जमीदारां अल्ल घल्लया । 35 अपर जमीदारां तिसदे दासां जो

पकड़ी नैं कुच्छना जो कुटेया, कने कुच्छना जो मारी दित्ता, कने कुच्छना पर पत्थर मारे । 36 भिरी तिन्हीं पैहले ते जादा होर दासां जो घल्लया, कने तिन्हां तिन्हां नैं भी तिआं ई कित्ता । 37 आखरी च तिन्हीं अपणे जागते जो तिन्हां अल्ल एह सोची नैं घल्लया कि सैह मेरे पुत्तरे दा आदर करगे । 38 अपर जमीदारां जागते जो दिखी नैं अप्पु च ग्लया, एह तां वारस ऐ, ओआ, इसियो मारी दिंदे कने इसदिया मलकीता लैई लेंदे । 39 तिन्हां तिसियो पकड़ेया कने अंगूरा दे बागे ते बाहर कड्डी नैं मारी दित्ता । 40 इसताई जाहू अंगूरा दे बागे दा मालक ओगा तां तिन्हां जमीदारां सौगी क्या करगा । 41 तिन्हां तिस नैं ग्लया, "सैह तिन्हां बुरे लोकां जो बुरी तराह ते खत्म करगा; कने अंगूरा दे बागे दा ठेका दूये जमीदारां जो दिगा, जेहडे बगते पर तिसियो फळ दैआ करगे ।" 42 यीशुयें तिन्हां नैं ग्लया, "क्या तुहां कवी पवित्रशास्त्रे च एह नी पढेया: जिस पत्थरे जो राजमिस्त्रियां निष्क्रामा समझी लैआ था, सैई कुणे दे सिरे दा पत्थर होई गैआ? एह प्रभु दे पास्से ते होया, कने म्हारी नजरा च अद्भुत ऐ ।

43 इसताई में तुहां नैं ग्लांदा कि परमात्में दा राज तुहां ते लैई लैआ जांगा कने ऐसी जातिआ जो जेहडा फळ लैयें, दित्ता जांगा । 44 जेहडा इस पत्थरे पर पौगा, सैह चकना चूर होई जांगा; कने जिस पर सैह पौगा, तिस जो पित्थी दिंगा ।" 45 प्रधान याजक कने फरीसी तिसदे उदारणा जो समझी गै कि सैह तिन्हां दे बारे च ग्ला दा ऐ । 46 कने तिन्हां तिसियो पकड़णा चाया, अपर लोकां ते डरी गै कजोकि सैह तिसियो भविष्यवक्ता मनदे थे ।

व्याहे दा कने धामा दा उदारण

(लूका 14 : 15-24)

22 यीशु भिरी तिन्हां नैं उदारणा च ग्लाणां लग्गा, 2 सुअर्ग दा राज तिस राजे साइआं ऐ, जिन्हीं अपणे जागते दा व्याह कित्ता, 3 कने तिन्हीं अपणे दासां जो घल्लया कि सादा दित्तेयां लोकां जो व्याह दी धामा च सदन; अपर तिन्हां ओणा नी चाया । 4 भिरी तिन्हीं होर दासां जो एह ग्लाई नैं घल्लया, सादा दित्तेयां लोकां नैं ग्ला: दिखा में धाम त्यार करी दित्तेयो, मेरे दांद कने पाळ्यो डंगर मारे गै हन, कने सब कुच्छ त्यार ऐ; व्याह दी धामा च ओआ ।" 5 अपर सैह अणदेखी करी नैं चली पै: कोई अपणे खेतां जो, कोई अपणे वपारे जो । 6 होरनी लोकां जेहडे बचा दे थे तिसदे दासां जो पकड़ी नैं तिन्हां दा अपमान कित्ता कने मारी दित्ते । 7 ताहू राजे जो गुस्सा आया, कने तिन्हीं अपणी सेना घल्ली नैं तिन्हां हत्यारेयां दा नाश कित्ता, कने तिन्हां दे सैहरेयां जो फुकी दित्ता । 8 ताहू तिन्हीं अपणे दासां नैं ग्लया, "व्याह दी धाम तां त्यार ऐ अपर सादा दित्तेयां माणु इस लायक नी ठेहरे । 9 इसताई चौराहेयां पर जा कने जितणे माणु तुहां जो मिलगे, सबना जो व्याह दी धामा च सद्दी लैयोआ ।" 10 तिन्हां दासां सडकां पर जाई नैं क्या बुरे क्या खरे, जितणे मिले, सारेयां जो किड्वा कित्ता; कने व्याह दा घर परोणेयां नैं भरौईया ।

11 "जाहू राजा परोणेयां जो दिखणां अंदर आया, तां तिन्हीं तित्थु इक्की माणुये जो दिख्या, जिन्हीं व्याह दे कपडे नी पैहनेयो थे । 12 तिन्हीं तिसते पूछ्या, हे दोस्त; तू व्याह दा कपडा पैहने बगैर ऐत्थू कजो आई गैआ?" तिसदा मुँ बंद होईया । 13 ताहू राजे दासां नैं ग्लया, "इसदे हत्था पैरां बन्नी नैं तिसियो बाहर नैहरे च पाई दैआ, तित्थु रोणा कने दंद पिणा हुंगा । 14 कजोकि सदयो तां मत्ते हन अपर चुणेयो थोडे हन ।"

कैसर जो कर दैगां

(मरकुस 12 : 13-17; लूका 20 : 20-26)

15 ताहू फरीसियां जाई नैं अप्पु च विचार कित्ता कि तिसियो कदेइयां गलां च फसान । 16 तिन्हां अपणे चेलयां जो हेरोदियां सौगी तिस अल्ल एह ग्लाणे जो घल्लया, "हे गुरु अहां जाणदे हन कि तू सच्चा ऐ, कने परमात्में दा रस्ता सचाईयां नैं सखांदा ऐ, कने कुसी दी परवाह नी करदा, कजोकि तू माणुआं दा मुँ दिखी नैं गलां नी करदा । 17 इसताई अहां जो दस्स तू क्या सोच दा ऐ? कि कैसर राजे जो कर दैगां ठीक ऐ कि नी ।" 18 यीशुयें तिन्हां दी दुष्टता जाणी नैं ग्लया, "हे बेईमानो, मिन्जो कजो परखा दे हन? 19 करे दे सिक्के मिन्जो दस्सा ।" ताहू सैह तिस अल्ल इक्क सिक्का लैई आये । 20 तिन्हीं तिन्हां ते पूछ्या, "एह छाप कने नां कुस दा ऐ?" 21 तिन्हां तिस नैं ग्लया, कैसर राजे दा ।" ताहू तिन्हीं तिन्हां नैं ग्लया, जेहडा कैसर दा ऐ, सैह कैसर जो; कने

जेहडा परमात्में दा ऐ, सैह परमात्में जो दैआ ।" 22 एह सुणी नैं तिन्हां जो हैरानी होई, कने तिसियो छड्डी नैं चली गै । तिसी दिन सदूकी जेहडा ग्लादे हन कि मुडदेयां दिया बजाह ते जिंदा होणां ऐ ई नी, तिस अल्ल आये कने तिसते पूछ्या,

दुवारा ते जिंदा होणां कने व्याह

(मरकुस 12 : 18-27; लूका 20 : 27-40)

23 तिसी दिन सदूकी जेहडा ग्लादे हन कि मरेयां दिया बजाह ते जिंदा होणां ऐ ई नी, तिस अल्ल आये कने तिसते पूछ्या, 24 हे गुरु, मूसें ग्लया था कि जे कोई मरद बगैर औलादा मरी जाये, तां तिसदा भाऊ तिसदिया लाडिया नैं व्याह करी नैं अपणे भाऊये ताई वंश पैदा करे । 25 हुण अहां दे ऐत्थू सत भाऊ थे; पैहला भाऊ व्याह करी नैं मरी गैआ, कने औलाद नी होणे दिया बजाह ते अपणियां लाडिया जो अपणे भाऊये ताई छड्डी गैआ । 26 इआं ई दूयें भाऊयें कने त्रीयें भी कित्ता, कने सतां तिकर ऐही होया । 27 सबना दे बाद सैह जणांस भी मरी गैई । 28 हुण एह दस्सा जे जिंदा होणे पर सैह तिन्हां सतां भाऊआं च कुस दी लाडी होंगी? कजोकि सैह सारेयां दी लाडी बणी चुकियो थी ।" 29 यीशुयें तिन्हां जो जबाब दित्ता, तुहां पवित्रशास्त्रे कने परमात्में दी सामर्थी जो नी जाणदे; इसा बजाह ते इसा भूला च पैयो हन । 30 कजोकि जिंदा होणे पर तिन्हां ना तां व्याह करणां कने ना व्याह च दित्ते जांगे अपर सुअर्ग च परमात्में दे दूतां साइआं होंगे । 31 अपर मरेयां दे जिंदा होणे दे बारे च क्या तुहां एह वचन नी पढेया जेहडा परमात्में तुहां नैं ग्लया : 32 मैं अब्राहमे दा परमात्मां, कने इसहाके दा परमात्मां कने याकूबे दा परमात्मां ऐ? सैह मरेयां दा नी, अपर जिंदायां दा परमात्मां ऐ ।" 33 एह सुणी नैं माणु तिसदिया शिक्षा ते हैरण होये ।

सबते बडा हुक्म

(मरकुस 12 : 28-34; लूका 10 : 25-28)

34 जाहू फरीसियां सुणेया कि यीशुयें सदूकियां दा मुँ बंद करी दित्ता, तां सैह कठरीये । 35 कने तिन्हां च इक्क कानून बनाणे आळें तिसियो परखणे ताई तिसते पूछ्या, 36 "हे गुरु, व्यवस्था च कुण दैआ हुक्म बडा ऐ? 37 तिन्हीं तिस नैं ग्लया, "तू परमात्मां अपणे प्रभु नैं अपणे सारे मने कने अपणियां सारिया जान्नी कने अपणियां सरिया अक्का नैं प्यार रख । 38 बडा कने खास हुक्म तां ऐही ऐ । 39 कने तिस साइआं एह दूआ हुक्म भी ऐ कि तू अपणे प्देसिये नैं अप्पु साइआं प्यार रख । 40 एह ई दो हुक्म सारी व्यवस्था कने भविष्यवक्तां दा आधार हन ।"

मसीह कुसदा पुत्तर ऐ ?

(मरकुस 12 : 35-37; लूका 20 : 41-44)

41 जाहू फरीसी कट्टे थे, तां यीशुयें तिन्हां ते पूछ्या, 42 मसीह दे बारे च तुहां क्या सोचदे हन? सैह कुस दा जागत ऐ?" तिन्हां तिस नैं ग्लया, "दाऊदे दा ।" 43 तिन्हीं तिन्हां ते पूछ्या, "तां दाऊद आत्मां च होई नैं तिसियो प्रभु कजो ग्लादा ऐ? 44 "प्रभुयें, मेरे प्रभुयें नैं ग्लया, मेरे सजे बैठ जाहू तिकर कि मैं तेरे बैरियां जो तेरे पैरां थलै नी करी दैं ।" 45 भला, जाहू दाऊद तिसियो प्रभु ग्लांदा ऐ, तां तिसदा जागत किआं होया?" 46 एह सुणी करी तिन्हां च कोई भी इक्क बोल नी ग्लाई सकेया । तिस दिने ते बाद कुसी जो भी तिसते कुच्छ पूछणे दी हिम्मत नी होई ।

शास्त्रियां कने फरीसियां ते चुकनै रहैआ

(मरकुस 12 : 38,39; लूका 11 : 43-46; 20 : 45,46)

23 ताहू यीशुयें लोकां कने अपणे चेलयां नैं ग्लया, 2 शास्त्री कने फरीसी मूसा दी गदिया पर बैठेयो हन, 3 इसताई सैह तुहां नैं जेहडा कुच्छ ग्लान सैह करणां भी कने मनणा, अपर तिन्हां साइयां कम्मा मत करदे; कजोकि सैह ग्लांदा तां हन अपर करदे नी । 4 सैह इक्क ऐदेया भारी बोझे जो चुकणां ओखा ऐ, बन्नी नैं तिस जो माणुआं दे मुडेयां पर रखदे हन; अपर अप्पु तिसियो अपणी उंगलियां नैं हिलाणां भी नी चाहंदे । 5 सैह अपणे सारे कम्म लोकां जो दसणे ताई करदे हन, सैह अपणे ताबीजां जो चौड़ा करदे कने अपणे कपड़ेयां दियां कनारियां जो जादा करदे हन । 6 धामा च खास - खास जगाह कने सभा च खास - खास आसण, 7 बाजारां च नमस्ते, कने माणु च

रब्बी गुलबाणां तिन्हां जो भांदा ऐ । 8 अपर तुहां रब्बी नी ग्लाणां, कजोकि तुहां दा इक्को ई गुरु ऐ, कने तुहां सारे हन । 9 धरती पर कुसी जो अपणां पिता नी ग्लाणां कजोकि तुहां दा इक्को ई पिता ऐ, जेहड़ा सुअर्गे च ऐ । 10 कने मालक भी नी ग्लाणां, कजोकि तुहां दा इक्को ई मालक ऐ, मतलब मसीह । 11 जेहड़ा तुहां च बडा हो, सैह तुहां दा दास बर्णे । 12 जेहड़ा कोई अपने आप्पे जो बडा बणांगा, सैह लोका कित्ता जांगा, कने जेहड़ा कोई अपने आप्पे जो लोका बणांगा, सैह बडा कित्ता जांगा ।

शास्त्रियां कने फरीसियां दे पाखंडे दी निंदा

(मरकुस 12 : 40 लूका 11 : 39-42, 44,52, 20 : 47)

13 "हे पाखंडी शास्त्रियो कने फरीसियो, तुहां पर हाय! तुहां माणुआं ताई सुअर्गे दे राजे दा दुरआजा बंद करदे हन, ना तां तुहां अप्पु ई तिस च दाखल हुंदे हन कने ना तिस च अंदर जाणे आळ्यां जो दाखल होणां दिंदे हन । 14 [हे पाखंडी शास्त्रियो कने फरीसियो, तुहां पर हाय! तुहां विधवां दे घरां जो खाई जांदे हन, कने दसणे ताई बड़ी देर तिकर प्रार्थना करदे रँहंदे हन : इसताई तुहां जो मती सज्जा मिलणी ऐ ।]

15 हे पाखंडी शास्त्रियो कने फरीसियो, तुहां पर हाय! तुहां इक्की जणे जो अपने मत च लैयोणे ताई पूरे जल कने जमीना च घूमदे हन, कने जाहू सैह मत च आई जांदा ऐ तां तिसियो अपने ते दुगाणां पाखंडी बणाई दिंदे हन ।

16 "हे अन्ने अगुवो, तुहां पर हाय! जेहड़ा ग्लांदे हन कि जे कोई मंदरे च कसम खाये तां कुच्छ नी, अपर जे कोई मंदरे दे सोने दी कसम खाये तां तिस नँ बन्नूई जांगा । 17 हे मूर्खो कने अन्नेयो, कुण बडा ऐ; सोना या सैह मंदर जिसते सोना पवित्र हुंदा ऐ । 18 भिरी ग्लांदे हन कि जे कोई वेदी दी कसम खाये तां कुच्छ नी, अपर जेहड़ा चढावा तिस पर ऐ, जे कोई तिसदी कसम खाये तां बन्नूई जांगा । 19 हे अन्ने, कुण बडा ऐ, चढावा या वेदी जिसते चढावा पवित्र हुंदा ऐ । 20 इसताई जेहड़ा वेदी दी कसम खांदा ऐ, सैह तिसदी कने जेहड़ा कुच्छ तिस पर ऐ, तिसदी भी कसम खांदा ऐ । 21 जेहड़ा मंदरे दी कसम खांदा ऐ, सैह तिसदी कने तिस च रँहणे आळे दी भी कसम खांदा ऐ, 22 जेहड़ा मंदरे दी कसम खांदा ऐ, सैह परमात्मं दे सिहासणे दी कने तिस पर बैणे आळे दी भी कसम खांदा ऐ ।

23 "हे पाखंडी शास्त्रियो कने फरीसियो, तुहां हाय, तुहां पुदीने, कने सौंफ, कने जीरे दा दसमा अंश दिंदे हन, अपर तुहां व्यवस्था दी गभीर गलां जो मतलब न्याय, कने दया, कने वसुआसे जो छड्डी दिता ऐ; चाइदा था कि इन्हां जो भी करदे रँहंदे कने तिन्हां जो भी नी छड्दे । 24 हे अन्ने अगुवो, तुहां मच्छरे जो तां छाणी दिंदे हन, अपर ऊंटे जो निगळी जांदे हन ।

25 "हे पाखंडी शास्त्रियो कने फरीसियो, तुहां कटोरे कने थालिया जो उपरे उपरे तां मांजदे हन अपर सैह अंदरे लालवी कने स्वार्थ नँ भरोयो हन । 26 हे अन्ने फरीसी पैहले कटोरे कने थालिया जो अंदरे ते मांज कि सैह बाहरे ते भी साफ होयें ।

27 "हे पाखंडी शास्त्रियो कने फरीसियो, तुहां तां देहय दुस्सदे हन कि जिआं कन्ना सफेदी पोचियो होयें जेहड़ी उपरे ते छैल दुस्सदी ऐ, अपर अंदर मुडदेयां दी हड्डियां कने सब तरां ह दी गन्दगियां नँ भरोइआं हन । 28 इस तरीके नँ तुहां भी उपरे ते माणुआं जो धर्मी दुस्सदे हन, अपर अंदर पाखंडे कने अधर्म नँ भरोयो हन ।

शास्त्रियां कने फरीसियां पर सज्जा दी भविष्यवाणी

(लूका 11 : 47-51)

29 हे पाखंडी शास्त्रियो कने फरीसियो, तुहां पर हाय; तुहां भविष्यवक्तां दियां कन्नां सवारंदे कने धर्मियां दियां कन्नां बणांदे हन, 30 कने ग्लांदे हन, 'जे अहां अपने पितरां दे दिना च होंदे तां भविष्यवक्तां दी हत्या च तिन्हां दे गवाह नी होंदे । 31 इसते तां तुहां अपने पर अप्पु ई गवाही दिंदे हन कि तुहां भविष्यवक्तां दे हत्यारेयां दी औलाद हन । 32 तुहां अपने पितरां दे पापे दा घड़ा पूरी तरां ह भरी दैआ । 33 हे कीडे दे बच्चो, कने दगाबाजो तुहां नरके दी सज्जा ते किआं बचणां । 34 इसताई दिखा, मैं तुहां अल्ल भविष्यवक्तां कने अकूमंदा कने शास्त्रियां जो घल्ला; अपर तुहां तिन्हां च कुच्छना जो मारी दैणां कने कुच्छना जो सूलिया पर टूंगे कने कुच्छना जो अपने आराधनालयां च कोडे मारगे कने इक्की सैहरे दूये सैहरे च खदेडदे फिरगे । 35 जिसते धर्मी हाबीले ते लैई नँ बिरक्याह दे पुत्तर जकरियाह तिकर,

जिसियो तुहां मंदरे कने वेदी दे बिच मारी दित्या था, जितणे धर्मियां दा खून धरतिया पर बहाया ऐ सैह सब तुहां दे मुंडे पर पोणां ऐ । 36 मैं तुहां नँ सच ग्लांदा, एह सब गलां इस बग्त दे लोकां पर आई पोंगियां ।

यरुशलेमें ताई विलाप

(लूका 13 : 34,35)

37 हे यरुशलेम, हे यरुशलेम! तू भविष्यवक्तां जो मारी दिंदा ऐ, कने जेहडे तिजो अल्ल घल्लयो, तिन्हां पर पथराव करदा ऐ । कितणी ई बार मैं चाया कि जिआं कुक्की अपने बच्चेयां जो अपने पंखा थलै किड्डा करदी ऐ, तिआं मैं तेरे जागतां जो किड्डा करी लँ, अपर तुहां लोकां नी चाया । 38 दिखा, तुहां दा घर तुहां ताई उजाड़ होई गैआ ऐ । 39 कजोकि मैं तुहां नँ ग्लांदा कि हुण ते जाहू तिकर तुहां नी ग्लांगे, "धन ऐ सैह, जेहड़ा प्रभु दे नांये ते ओंदा ऐ ताहू तिकर तुहां मिन्जो भिरी कदी नी दिखगे ।

मंदरे दे विनाश दी भविष्यवाणी

(मरकुस 13 : 1,2; लूका 21 : 5,6)

24 जाहू यीशु मंदरे ते निकळी नँ जा दा था, तां तिसदे चले तिसियो मंदरे दी रचना दस्सणे ताई तिस अल्ल आये । 2 तिन्हीं तिन्हां नँ ग्लाया, "तुहां एह सब दिखा दे हन ना! मैं तुहां नँ सच ग्लांदा, ऐत्थू पत्थरे पर पत्थर भी नी रँहणां जेहड़ा टाया नी जाणां ।

संकट कने क्लेश

(मरकुस 13 : 3-13; लूका 21 : 7-19)

3 जाहू सैह जेतून पहाड़े पर बैठया था, तां चेलयां पडदे च तिस अल्ल आई नँ ग्लाया, अहां जो दस्सा कि एह गलां काहू हुंगियां? तेरे ओणे दा कने संसार दे अंत दा क्या नशाण हुंगा?" 4 यीशुयें तिन्हां जो जबाब दिता, "चुकनै रँहआ, कोई तुहां जो नी भकाई पां, 5 कजोकि मत्ते ते ऐदेय होंगे जेहडे मेरे नांये ते आई करी ग्लांगे, मैं मसीह ऐ, कने मतेआं जो भकांगे । 6 तुहां लडाईयां कने लडाईयां दी चर्चा सुणगे, तां घबराई मत जांदे कजोकि इन्हां दा होणां जरूरी ऐ, अपर तिस बग्त अंत नी हुंगा । 7 कजोकि जाति पर जाति राजे पर राजे चढाई करणी, कने जगाह जगाह अकाल पोणे हन, कने हिलण होंगे । 8 एह सारियां गलां तकलीफां दी शुरुआत होणी ऐ । 9 ताहू सैह सताव दैणे ताई तुहां जो पकडुआंगे, कने तुहां जो मारी दिंगे, कने मेरे नांये दिया बजाह ते सारेयां देशां दे माणु तुहां नँ बैर रखगे । 10 ताहू मत्ते ठोकर खांगे, इक्की दूये जो पकडुआंगे, इक्की दूये नँ बैर रखगे । 11 मते झूठे भविष्यवक्ता उठी खडौंगे, कने मतेआं जो भकांगे । 12 अधर्म दे बदणे ते मतेआं दा प्यार ठंडा पैई जाणां, 13 अपर जेहड़ा अन्त तिकर सबर रखणां, तिस दा उद्धार होणां । 14 कने राजे दा एह सुसमाचार सारे संसारे च प्रचार कित्ता जांगा, कि सारे देशां पर गवाही होयें, भिरी अन्त आई जाणां ।

महासंकट

(मरकुस 13 : 14-23; लूका 21 : 20-24)

15 इसताई जाहू तुहां तिसा उजाड़णे आळी घृणित चीज्जा पवित्र जगाह च खडौंतियो दिखन, जिसदी चर्चा दानिय्येल भविष्यवक्तें कित्तियो थी, (जेहड़ा पदे, सैह समझे), 16 ताहू जेहड़ा यहूदिया सैहरे च होन सैह पहाडां पर नठी जान । 17 जेहड़ा छता पर होन, सैह अपने घरें समान लैणे जो थलै नी लौन; 18 कने जेहड़ा खेतां च होन, सैह अपनां कपडा लैणे जो पचां ह नी हटन ।

19 तिन्हां दिनां च जेहड़ी जणांस गर्भवती कने दूद पिलांदी होंगी, तिन्हां ताई हाय, हाय । 20 प्रार्थना करा कि तुहां जो ठंडी च या सव्त दे दिन नठणां नी पौये । 21 ~ कजोकि तिस बग्त ऐदया भारी सताव होणां, जिआं ना तां संसार दे शुरु ते अजे तिकर होया कने ना ई कदी होणां । 22 जे सैह दिन घटाये नी जांदे तां कोई भी माणु नी बचणां, अपर चुणेयां दिया बजाह ते सैह दिन घटाये जाणे । 23 तिस बग्त जे कोई तुहां नँ ग्ला, "दिखा, मसीह ऐत्थू ऐ ! या औत्थू ऐ ! तां वसुआस मत करदे ।

24 कजोकि झूठे मसीह कने झूठे भविष्यवक्ता उठी खडौंगे, कने बडे चमत्कार, कने अदभुत कम्म दस्सणे कि जे होई सकें तां चुणेयां जो भी भकाई दैन । 25 दिखा, मैं पैहले ते तुहां नँ एह सारा कुच्छ ग्लाई दिता ऐ ।

26 इसताईं जे सैह तुहां नैं ग्लान, दिखा, सैह बणे च ऐ, तां बाहर मत निकळी जांदे; या 'दिखा, सैह कोठियां च ऐ', तां वसुआस मत करदे ।

27 कजोकि जिआं बिजली पूरव ते निकळी नैं पशिचमे तिकर चमकदी ऐ, तिआं ई माणुये दे पुत्रे दा भी ओणां । 28 जित्थू लाश हो, तित्थु इलणी कडियां होणियां ।

माणुये दे पुत्रे दा ओणां

(मरकुस 13: 24-27; लूका 21 : 25-28)

29 तिन्हां दिनां दे सताव दे इकदम बादे च सूरज नैहरा होई जाणां, कने चन्द्रमे दी लौ चली जांगी, कने तारे अम्बरे ते पैई जाणां कने अम्बरे दियां शक्तियां हिलाईयां जाणियां । 30 ताहू माणु दे पुत्रेदा नशाण अम्बरे च दुस्सणां, कने ताहू धरती दे सारे कुळां दे माणु छाती पीटणी; कने माणु दे पुत्रर जो बडी सामर्था कने एश्वर्य दे सौगी अम्बरे बीच बदळां पर ओंदे दिखणां । 31 ~ सैह तुरही दी बडी उआजा सौगी अपणे दूतां जो घल्लागा, कने सैह अम्बरे दे इस बन्ने ते उस बन्ने तिकर, चौनी दिशाओं ते तिसदे चुणेयां जो कडा करगे ।

धूडे दे रूखे दा उदारण

(मरकुस 13: 28-31; लूका 21 : 29-33)

32 धूडे दे रूखे ते एह शिक्षा लैआ; जाहू तिसदियां डालियां नर्म होई जांदी कने पतर निकळणां लगदे हन, तां तुहां जाणी लैदे हन कि गर्मी नैडे ऐ । 33 इस तरीके नैं जाहू तुहां इन्हां सारियां गल्लां जो दिखा, तां जाणी लैआ कि सैह नैडे ऐ, जे दुरआजे पर ई ऐ । 34 मैं तुहां नैं सच ग्लांदा कि जाहू तिकर एह सारियां गल्लां पूरियां ना होई लैन, ताहू तिकर इसा पीढिया दा अन्त नी होणां । 35 अम्बर कने धरती टली जांगे, अपर मेरियां गल्लां कदी नी टलगी ।

जागदे रैहआ

(मरकुस 13: 32-37; लूका 17 : 26-30, 34-36)

36 तिस दिने कने तिस बरते दे बारे च कोई नी जाणदा, ना सुअर्ग दे दूत कने ना पुतर, अपर सिर्फ पिता । 37 जिआं नूह दे दिन थे तिआं ई माणुये दे पुत्रे दा ओणा भी हुंगा । 38 कजोकि जिआं जल प्रलय ते पैहले दे दिनां च, जिस दिन तिकर कि नूह जाहजे पर नी चढया, तिस दिन तिकर लोक खांदे पींदे थे, कने तिन्हां लोकां च व्याह होंदे थे । 39 कने जाहू तिकर जल प्रलय आई करी तिन्हां सारेयां जो रडाई नी लैई गैआ, ताहू तिकर तिन्हां जो कुच्छ भी पता नी लगेया; तिआं ई माणु दे पुत्रे दा ओणा भी हुंगा । 40 तिस बरत दो माणु खेतां च होंगे, इक्क लैई लैआ जाणां कने दूआ छडी दैणां । 41 दो जणांसां चक्की पिआ दियां हुंगिया, इक्क लैई ली जांगी कने दूई छडी दिती जांगी । 42 इसताईं जागदे रैहआ, कजोकि तुहां नी जाणदे कि तुहां दा प्रभु कुस दिन ओगा 43 अपर एह जाणी लैआ कि जे घरे दा मालक जाणदा हुंदा कि चोर कुस बरत ओगा तां जागदा रैहदा, कने अपणे घरे च संध लगणा नी दिंदा । 44 इसताईं तुहां भी त्यार रैहआ, कजोकि जिस बरत दे बारे च तुहां सोचदे भी नी हन, तिस बरत माणु दा पुत्रर आई जांगा ।

वसुआसी कने वेवसुआसी दास

(लूका 12 : 41-48)

45 कने सैह वसुआसे जोग्गा कने अक्कमंद दास कुण ऐ, जिसियो मालकें अपणे दास चाकरां पर अधिकारी ठेहराया कि बरत पर तिन्हां जो खाणां दें? 46 धन ऐ सैह दास, जिसियो तिसदा मालक आई नैं ऐदया ई करदे पान । 47 मैं तुहां नैं सच ग्लांदा, सैह तिसियो अपणी सारिया जायदाता पर अधिकारी ठेहरांगा । 48 अपर जे सैह दुष्ट दास सोचणां लगे कि मेरे मालके दे ओणे च देर ऐ । 49 कने अपणे साथी दासां जो मारणां लगे, कने पियक्कडां सौगी खां पीये । 50 तां तिस दासे दे मालकें ऐसे दिन ओणां, जाहू सैह तिसदा इंतजार भी नी करदा होणां, 51 कने ऐसा बरत जिसियो सैह नी जाणदा होये, ताहू सैह तिसियो भारी ताडणां दिंगा कने तिसदा हिस्सा बेईमानां सौगी ठेहराया तित्थु रोणां कने दंद पीणां हुंगा ।

दस कुआरियां कुडियां दा उदारण

25 "सुअर्गे दा राज तिनहां दस कुआरियां साइआं होणां जेहिडियां । 2 तिन्हां च पंज मूर्ख कने पंज समझदार थियां । 3 मूर्खा अपणियां मशालां तां लैइआं, अपर अप्पु सौगी तेल नी लैआ; 4 अपर समझदारां अपणी मशालां दे सौगी अपणियां कुपियां च तेल भी भरी लैआ । 5 जाहू लाडे दे ओणे च देर होई, तां सैह सारियां बोरे होणां लगियां कने सोई चलियां,

6 कने आधिया राती धूम मची दिखा, कि लाडा ओआ दा ऐ ! तिस नैं मिलणे तांई चला ।" 7 ताहू सैह सारियां कुआरियां उठी नैं मशालां जो ठीक करणां लगियां । 8 ताहू मूर्खा समझदारां नैं ग्लया, 'अपणे तेले च थोडा दिया अहां जो भी दैआ, कजोकि अहां दियां मशालां बुझणां लगी पिआं ।' 9 अपर समझदारां जबाब दिता, मुशकल ऐ एह अहां ताई कने तुहां ताई पूरा नी होणां; खरा तां एह ऐ कि तुहां बेचणे आळेयां अल्ल जाई नैं अपणे ताई खरीदी करी लैई ओआ । 10 जाहू सैह खरीदणा जा दियां थियां तां लाडा आई रैहआ, कने जेहिडियां त्यार थियां, सैह तिस सौगी व्याह दे घरे च चली गैईयां कने दुरआजा बंद करी दिता । 11 इसदे बाद सैह दूइआं कुआरियां भी आई नैं ग्लाणां लगियां, 'हे मालक, 'हे मालक अहां ताई दुरआजे खोली दैआ । 12 तिन्हीं जबाब दिता, 'मैं तुहां नैं सच ग्लांदा, मैं तुहां जो नी जाणदा । 13 इसताईं जागदे रैहआ, कजोकि तुहां ना तिस दिने जो जाणदे हन, ना तिस बरते जो ।

सिक्रेयां दा उदारण

(लूका 19 : 11-27)

14 कजोकि एह तिस माणुये दी हालत ऐ जिन्हीं प्रदेश जांदे बरत अपणे दासां जो सद्दी नैं अपणी जायदात तिन्हां जो सौपी दिती । 15 तिन्हीं इक्की पंज सिक्रे, दूये जो दो सिक्रे, कने त्रीये जो इक्क सिक्रे, हर इक्क जो तिसदिया हेसियता मताबक दिता, कने ताहू प्रदेश चली गैआ । 16 तां जिसियो पंज सिक्रे मिलेयो थे, तिन्हीं ताहू जाई नैं लैण दैण किता, कने पंज सिक्रे होर कमाये । 17 इस तरीके नैं जिसजो दो मिलेयो थे, तिन्हीं भी दो होर सिक्रे कमाये । 18 अपर जिसजो इक्क सिक्रे मिलेया था, तिन्हीं जाई नैं चिक्क खुणी, कने अपणे मालके दे सिक्रे जो छुपाई दिता ।

19 मतेआं दिनां बाद तिन्हां दासां दा मालक आई नैं तिन्हां ते हसाब लैणां लग्गा । 20 जिसजो पंज मिलेयो थे, तिन्हीं पंज सिक्रेहोर लैआई नैं ग्लया, 'हे मालक, तैं मिन्जो पंज सिक्रे दित्तेयो थे, दिख, मैं पंज सिक्रेहोर कमाये हन । 21 तिसदे मालकें तिस नैं ग्लया, 'धन, हे अच्छे कने वसुआसे जोग्गे दास, तू थोडे च वसुआसे जोग्गा रैहआ; मैं तिजो मत्तियां चीज्जां दा अधिकारी बणांगा । अपणे मालके दिया खुशीया च सेहभागी हो ।

22 "कने जिसजो दो सिक्रे मिलेयो थे, तिन्हीं भी आई नैं ग्लया, 'हे मालक, तैं मिन्जो दो सिक्रे दित्तेयो थे, दिख, मैं दो सिक्रे होर कमाये हन ।' 23 तिसदे मालकें तिस नैं ग्लया, 'धन, हे अच्छे कने वसुआसे जोग्गे दास, तू थोडे च वसुआसे जोग्गा रैहआ; मैं तिजो मत्तियां चीज्जां दा अधिकारी बणांगा । अपणे मालके दिया खुशीया च सेहभागी हो ।'

24 "अपर जिसियो इक्क सिक्रे मिलेया था, तिन्हीं आई नैं ग्लया, 'हे मालक, मैं तिजो जाणदा था कि तू कठोर माणु ऐ, तू जित्थू नी बांदा औत्थू कट्टा ऐ, कने जित्थू नी छींड़कदा औत्थू ते भी बटीणदा ऐ । 25 इसताईं मैं डरी गैआ कने जाई नैं तेरा सिक्रे चिक्का च छुपाई दिता । दिख, जेहडा तेरा ऐ, सैह एह ऐ ।' 26 तिसदे मालकें तिसियो जबाब दिता, 'हे दुष्ट कने आलसी दास, जाहू तू एह जाणदा था कि जित्थू मैं नी बाया औत्थू ते कट्टा, कने जित्थू मैं नी छींड़केया औत्थू ते बटीणदा ऐ; 27 तां तिजो चाइदा था कि मेरा सिक्रे अडतिआं जो दैई दिंदा, कने मैं आई नैं अपणां पैसा ब्याजे समेत लैई लैदा । 28 इसताईं सैह सिक्रे तिस ते लैई लैआ, कने जिस अल्ल दस सिक्रे हन, तिसियो दैई दैआ । 29 कजोकि जिस कुसी अल्ल ऐ, तिसियो होर दिता जाणां; कने तिस अल्ल मता होई जाणां, अपर जिस अल्ल नी ऐ, तिसते सैह भी, जेहडा तिस अल्ल ऐ, लैई लैआ जाणां । 30 कने इस निकम्मे दासे जो बाहरे आळे नैहरे च सद्दी दैआ, जित्थू रोणां कने दंद पिणां हुंगा ।

न्याय दा दिन

31 जाहू माणु दा पुत्तर अपणी महिमा च ओंगा कने सारे सुअर्गदूत तिस सौगी ओंगे, ता सैह अपणी महिमा दे सिंहासणे पर विराजमाण होणां । 32 कने सारियां जातिआं तिस सामने किठियां कितियां जाणियां; कने जिआं चरवाहा भेडां जो बकरियां ते लग्न करी दिंदा ऐ, तिआं ई सैह तिन्हां जो इक्की द्ये ते लग्न करणा । 33 सैह भेडां जो अपने सज्जे पाससें कने बकरियां जो खबबे पाससें खडा करणा । 34 ताहू राजा अपने सज्जे पाससें आळ्यां नें ग्लाणां, हे मेरे पिता दे धन लोको, ओआ, तिस राजे दे अधिकारी होई जा, जेहडा संसारे दे शुरु ते ई तुहां ताई त्यार कित्या ऐ । 35 कजोकि मैं भूखा था, कने तुहां मिन्जो खाणे जो दिता, मैं प्यासा था कने तुहां मिन्जो पाणी पियाया; मैं परदेशी था, कने तुहां ने मिन्जो अपने घरे ठेहराया; 36 मैं नंगा था, कने तुहां मिन्जो कपडे पैहणायें; मैं बमार था, कने तुहां मेरा सकशांत लैआ, मैं जेला च था कने तुहां मिन्जो नें मिलणां आये ।

37 ताहू धर्मी तिस जो जबाब दिंने, हे प्रभु अहां कधेडी तिजो भूखा दिख्या कने खाणा खुआया? कने प्यासा दिख्या कने पाणी पियाया? 38 अहां कधेडी तिजो परदेशी दिख्या कने अपने घरे ठेहराया? या नंगा दिख्या कने कपडे लौआये? 39 अहां कधेडी तिजो बमार या जेला च दिख्या कने तिजो नें मिलणां आये?" 40 ताहू राजा तिन्हां जो जबाब दिंगा, मैं तुहां नें सच ग्लांदा कि तुहां जेहडे मेरे इन्हां लोके ते लोके आं च कुसी इक्की सौगी कित्ता, सैह समझा मिन्जो सौगी कित्ता ।'

41 ताहू सैह खबबे पाससें आळ्यां नें ग्लांदा, हे शापित लोको, मेरे सामणे ते तिस सदा दी अग्नी च चली जा, जेहडी सैताने कने तिसदे दूतां ताई त्यार कित्तियो ऐ । 42 कजोकि मैं भूखा था, कने तुहां मिन्जो खाणे जो नी दिता; मैं प्यासा था, कने तुहां पाणी नी पियाया; 43 मैं परदेशी था, कने तुहां ने मिन्जो अपने घरे नी ठेहराया; मैं नंगा था, कने तुहां कपडे नी पैहणायें; मैं बमार कने जेला च था, कने तुहां मेरी सुधि नी लैई ।

44 ताहू तिन्हां जबाब देंगा, हे प्रभु अहां तिजो कधेडी भूखा, कने प्यासा, कने परदेशी, कने नंगा, कने बमार, कने जेला च दिख्या, कने तेरी सेवा टहल नी कित्ती?" 45 ताहू तिन्हीं तिन्हां जो जबाब देंगां, मैं तुहां नें सच ग्लांदा कि तुहां जेहडे इन्हां लोके ते लोकेयां च कुसी इक्की सौगी नी कित्ता. सैह मिन्जो सौगी भी नी कित्ता ।' 46 कने एह सदा दी सज्जा भोगे पर धर्मी सदा दी जिन्दगिया च प्रवेश करणे ।

यीशु मसीह जो जात्री ते मारणे दी साजस

(मरकुस 14 : 1,2; लूका 22 : 1,2; यूहन्ना 11 : 45-53)

26 जाहू यीशु एह सारियां ग्लां ग्लाई बैठा तां अपने चेलयां नें ग्लाणां लग्गा, 2 तुहां जाणदे हन कि दू दिना दे बाद फसह दा तौआर ऐ, कने माणु दा पुत्तर सूलिया पर टुंगणे ताई पकडुआया जाणां,

3 ताहू प्रधान याजक कने प्रजा दे पुरनिये काइफा नाये दा महायाजक दे अंगणे च कट्टरोई गै । 4 कने अप्पु च सोच - वचार करणां लगे कि यीशु जो धोखे नें पकडी नें मारी दें । 5 अपर सैह ग्लांदा थे, "तौआरे दे बगत नी, कुत्की इआं ना होयें कि लोक एकजुट होई जान ।"

बैतनिय्याह च यीशु मसीह दा अभिषेक

(मरकुस 14 : 3-9; यूहन्ना 12 : 1-8)

6 जाहू यीशु बैतनिय्याह च शमौन कोदिये दे घरे था, 7 तां इक्क जणांस संगमरमेरे दे भांडे च कीमती इत्र लैई आई कने तिस दे मुँडे पर डोली दिता । 8 एह दिखी नें तिसदे चले नराज होये कने ग्लाणां लगे, "इसदी कजो बरबादी कित्ती गैई? 9 इसियो तां खरे रेटे च बेची नें गरीबां जो बंडया जाई सकदा था ।" 10 एह जाणी नें यीशुयें तिन्हां नें ग्लाया, इसा जणांसा जो कजो सता दे हन? तिन्नै मिन्जो सौगी भलाई कित्ती ऐ । 11 कंगाल तां तुहां सौगी सदा रेंहटे हन, अपर मैं तुहां सौगी सदा नी रेंहटा । 12 तिन्नै मेरे शरीरे पर जेहडा एह इत्र डोलेया ऐ, सैह मेरे अंतिम संस्कार होणे ताई कित्ता ऐ । 13 मैं तुहां नें सच ग्लांदा कि सारे संसारे च जित्थू कुत्की एह सुसमाचार प्रचार कित्ता जांगा, तित्थु तिसदे इस कम्मे दी चर्चा भी तिसदिया यादा च कित्ती जांगी ।"

यहूदा इस्करियोतिये दा धोखा

(मरकुस 14 : 10,11; लूका 22 : 3-6)

14 ताहू यहूदा इस्करियोतिये, जेहडा बाराह चेलयां च इक्क था, प्रधान याजकां अल्ल जाई नें ग्लाया, 15 जे मैं तिसियो तुहां दे हुआले करी दें तां मिन्जो क्या दिंगे? तिन्हां तिसियो तीई चांदा दे सिक्के तोली नें देंई दिन्ते । 16 कने सैह तिस बगत ते तिसियो पकडुआणे दा मौका तोपणां लग्गा ।

यीशु मसीह दा चेलयां सौगी फसह दा आखरी खाणां

(मत्ती 14 : 12-21; लूका 22 : 7-13, 21-23; यूहन्ना 13 : 21-30)

17 अखमीरी रोटी दे तौआरे दे पैहले दिन चले यीशु अल्ल आई नें पूछणां लगे, "तू कुत्थू चाहंदा ऐ कि अहां तिजो ताई फसह खाणे दी त्यारी करन? 18 तिन्हीं ग्लाया, "सैहरे च अमुक माणुये अल्ल जाई नें तिस नें ग्ला, 'गुरु ग्ला दा ऐ कि मेरा बगत नैडे आई गैआ ऐ । मैं अपने चेलयां सौगी तेरे ऐत्थू तौआर मनाणां चाहंदा ।" 19 चेलयां यीशु दा हुक्म मनेया कने फसह त्यार कित्ता ।

20 जाहू संज होई तां सैह बारा चेलयां सौगी खाणां खाणे ताई बैठया । 21 जाहू सैह खा दे थे तां तिन्हीं ग्लाया, "मैं तुहां नें सच ग्लांदा कि तुहां च कोई इक्क मिन्जो पकडुआंगा ।" 22 इसा ग्ला पर सैह बडे उदास होये, कने सब चले इक्क करी नें तिसते पूछणां लगे, "हे गुरु, क्या सैह मैं ऐ?" 23 तिन्हीं जबाब दिता, "जेहडा मिन्जो सौगी इक्की थालिया च खा दा ऐ, सैई मिन्जो पकडुआंगा । 24 माणु दा पुत्तर तां जिआं तिसदे बारे च लिख्या ऐ, तिआं ई जाणां; अपर तिस माणु ताई शोक ऐ जिसदिया बजाह ते माणु दा पुत्तर पकडुआया जाणां ऐ :जे तिस माणु दा जन्म ई नी हुंदा, तां तिस ताई खरा हुंदा ।" 25 ताहू तिस दे पकडुआणे आळे यहूदा ग्लाणां लग्गा, "हे रब्बी, क्या सैह मैं ऐ?" तिन्हीं तिस नें ग्लाया, "तू ग्लाई बैठा ।"

प्रभु भोज

(मरकुस 14 : 22-26; लूका 22 : 14-20; 1 कुरिन्थियों 11 : 23-25)

26 जाहू सैह खा दे थे यीशुयें रोटी लैई कने आशीर्वाद मंगी नें तोडी, कने चेलयां जो देंई नें ग्लाया, "लैआ, खा; एह मेरी देह ऐ ।" 27 भिरी तिन्हीं कटोरा लैई नें धन्यावाद कित्ता, कने तिन्हां जो देंई नें ग्लाया, "तुहां सारे इस कटोरे ते पीआ, 28 कजोकि एह वायदे दा मेरा सैह खून ऐ, जेहडा मतेआं दे पापां दी माफी दे निमित्त बहाया जांदा ऐ । 29 मैं तुहां नें ग्लांदा कि अंगूरा दा एह रस तिस दिन तिकर कदी नी पीगा, जाहू तिकर तुहां सौगी अपने पिता दे राज च नौआं नी पीयें ।" 30 भिरी सैह भजन गाई नें जेतून पहाडे पर गै ।

पतरसे दे मुकरी जाणे दी भविष्यवाणी

(मरकुस 14 : 27-31; लूका 22 : 31-34; यूहन्ना 13 : 36-38)

31 ताहू यीशुयें तिन्हां नें ग्लाया, "तुहां सारे अज्ज ई राती जो मेरे बारे च ठोकर खागे, कजोकि लिखेया ऐ, मैं चरवाहे जो मारणा, कने धणे दियां भेडां रुआंह परांह खंडरोई जागियां । 32 अपर मैं अपने जिंदा होणे दे बाद तुहां ते पैहले गलीले जो जांगा ।" 33 इस पर पतरसें तिस नें ग्लाया, "जे सारे तेरे बारे च ठोकर खान तां खान, अपर मैं कदी बी ठोकर नी खांगा ।" 34 यीशुयें तिस नें ग्लाया, "मैं तिजो नें सच ग्लांदा कि अज्ज राती ई कुकडे दी बांग देंगे ते पैहले तें त्रै बरी मिन्जो ते मुकरणां ।" 35 पतरस यीशु नें ग्लाणां लग्गा, "जे मिन्जो तिजो सौगी मरणां भी पोंगा तमी मैं तिजो ते कदी नी मुकरणां ।" कने इआं ई सारे चले भी ग्लाणां लगे ।

गतसमनी बागे च प्रार्थना

(मरकुस 14 : 32-42; लूका 22 : 39-46)

36 ताहू यीशु अपने चेलयां सौगी गतसमनी नाये दिया इक्की जगाह च आया कने अपने चेलयां नें ग्लाणां लग्गा, ऐत्थू बैई रैहनेयां, जाहू तिकर मैं औत्थू जाई नें प्रार्थना करे ।" 37 सैह पतरस कने जबदिये दे दूनी जागतां जो सौगी लैई गैआ, कने दुखी कने बैचन होणां लग्गा । 38 ताहू तिन्हीं तिन्हां नें ग्लाया, "मेरा जी बडा दुखी ऐ, ऐत्थू तिकर कि मेरी जान निकळी जा दी ऐ । तुहां ऐत्थू रुका कने मिन्जो सौगी जागदे रैहूआ ।" 39 भिरी सैह थोडा होर गांह जाई नें मुंमं दे भार पैईया, कने एह प्रार्थना कित्ती, "हे मेरे पिता, जे होई सकें

तां एह दुखे दा बग्त मिन्जो ते टली जां, तमी में जिआं में चाहंदा तिआं नी, अपर जिआं तू चाहंदा ऐ तिआं ई होयें । 40 भिरी तिन्हीं चेलयां अल्ल आई नैं तिन्हां जो सुतेया दिख्या । कने पतरसे ग्लया, “क्या तुहां मिन्जो ऐ सौगी इस बग्त भी नी जागी सके । 41 जागदे रहैआ, कने प्रार्थना करदे रहैआ कि तुहां परीक्षा च ना पौन आत्मां तां त्यार ऐ, अपर शरीर कमजोर ऐ ।” 42 भिरी तिन्हीं दूयी बरी जाई नैं एह प्रार्थना किती, “हे मेरे पिता, जे एह मेरे पीणे बगैर नी हटी सकदा तां तेरी इच्छा पूरी होयें ।” 43 ताहू तिन्हीं आई नैं तिन्हां जो भिरी सुतेया दिख्या, कजोकि तिन्हां दियां अंखी निदरां नैं भरौइआं थियां । 44 तिन्हां जो छड्डी नैं सैह भिरी चली गैआ, कने तिसा उआजा च भिरी त्री बरी प्रार्थना किती । 45 ताहू तिन्हीं चेलयां अल्ल आई नैं ग्लया, “हुण सोई रहैआ, कने अराम करा; दिखा, बग्त आई रहैआ, कने माणुये दा पुत्तर पापियां दे हत्थ पकडुआया जाणां ऐ । 46 उठा, चला; दिखा, मेरा पकडुआणे आळा नैडें आई रहैआ ऐ ।

यीशु मसीह जो धोखे नैं पकड़णां

(मरकुस 14 : 43-50; लूका 22 : 47-53; यूहन्ना 18 : 3-12)

47 सैह एह ग्ला दा था कि यहूदा जेहड़ा बारां चेलयां च इक्क था आया, कने तिस सौगी प्रधान याजकां कने स्याणे माणु दिन बडी भीड़, तलवारां कने डांगा लैई करी आई । 48 तिसदे पकडुआणे आळें तिन्हां जो नशाणी दिती : “जिसदा मैं पुक्का लें सैई ऐ : तिसियो पकडी लैनेयो ।” 49 कने ताहू ई यीशु अल्ल आई नैं ग्लया, “हे रब्बी नमस्कार!” कने तिसदे मत्ते पुक्के लें । 50 यीशुयें तिस नैं ग्लया, “हे दोस्त, जिस कम्मे तांई तू आया ऐ, तिसियो करी लें ।” ताहू तिन्हां बक्खे आई नैं यीशु पर हत्थ पाया कने तिसियो पकडी लैआ । 51 यीशु दे चेलयां च इक्की हत्थ बधाई नैं अपणी तलवार कड्डी लैई कने महायाजके दे दासे पर चलाई नैं तिसदा कन बड्डी दिता । 52 ताहू यीशुयें तिस नैं ग्लया, “अपणियां तलवारा म्याना च रख कजोकि जेहड़े तलवारा जो चलांदे हन सैह तलवारा नैं खत्म किचे जागे । 53 क्या तू नी जाणदा कि मैं अपणे पिता नैं विणती करी सकदा, कने सैह सुअर्गदूतां दी बारा पलटन ते भी जादा हुण मेरे सामणे पज्राई सकदा ऐ? 54 अपर पवित्रशात्रे दी सैह गलां कि ऐसा होणां जरूरी ऐ, किआं पूरी होणी?” 55 तिस बग्त यीशुयें भीड़ा नैं ग्लया, “क्या तुहां तलवारां कने डांगा लैई नैं मिन्जो डाकूये साइआं पकड़णे तांई आयेयो हन? मैं हर दिन मंदरे च बैई नैं शिक्षा दिंदा था, अपर तुहां मिन्जो नी पकड़ैया । 56 अपर एह सब इसताई होया ऐ कि भविष्यवक्तां दे वचन पूरे होन ।” ताहू सारे चले तिसियो छड्डी नैं नठी गै ।

महासभा दे सामणे यीशु मसीह

(मरकुस 14 : 53-65; लूका 22 : 54,55, 63-71; यूहन्ना 18 : 13,14, 19-24)

57 ताहू यीशु जो पकड़णे आळे तिसियो काइफा नाये दे महायाजके अल्ल लैई गै, जित्थू शास्त्री कने स्याणे माणु कट्टे होयो थे । 58 पतरस दूरी बणाई करी तिसदे पचांह पचांह महायाजके दे अंगणे तिकर गैआ कने अंदर जाई नैं अन्त दिखणे तांई प्यादेयां सौगी बैई गैआ । 59 प्रधान याजक कने सारी महासभा यीशु जो मारणे तांई तिसदे वरखलाफ झूठी गवाहिया दिया तोपा च थे, 60 अपर मते झूठे गवाहां दे होणे पर भी सैह गवाही नी पाई सके । लास्ट च दो माणु आये, 61 कने ग्लया, “इन्हीं ग्लया ऐ कि मैं परमात्मं दे मंदरे जो ढाई सकदा कने तिसियो त्री दिनां च बणाई सकदा । 62 ताहू महायाजके खडे होई नैं यीशुये नैं ग्लया, “क्या तू कोई जबाब नी दिंगा? एह माणु तेरे वरखलाफ क्या गवाही दै दे हन?” 63 अपर यीशु चुप रहैआ । ताहू महायाजके तिस नैं ग्लया, “मैं तिजो जिं दे परमात्मं दी कसम दिंदा कि जे तू परमात्मं दा पुत्तर मसीह ऐ, तां अहां नैं ग्लाइ दै ।” 64 यीशुयें तिस नैं ग्लया, “तैं अप्पु ई ग्लाइ दिता; जे मैं तुहां नैं एह भी ग्लांदा कि हुण ते तुहां माणुये दे पुत्तरे जो सर्वशक्तिमान दे सज्जे पाससें बैठेयो, कने अम्बरं दे बदळां पर ओं दे दिखो ।” 65 इसा गला पर महायाजके अपणे कपडे फाड़े कने ग्लया, “इन्हीं परमात्मं दी निंदा किती ऐ, हुण अहां जो गवाहां दी क्या जरूरत” दिखा, तुहां हुण एह निंदा सुणी ऐ । 66 तुहां क्या सोचदे हन?” तिन्हां जबाब दिता, “एह मारणे जोगा ऐ ।” 67 ताहू तिन्हां तिसदे मुंमें पर थुकेया कने तिसियो मुक्क मारे, दूयेयां चपैड़ां मारी नैं ग्लया, 68 “हे मसीह, अहां नैं भविष्यवाणी करी नैं ग्ला कि कुणी तिजो मारेया ।”

पतरसे दा मुकरना

(मरकुस 14 : 66-72; लूका 22 : 56-62; यूहन्ना 18 : 15-18, 25 -27)

69 पतरस बाहर अंगणे च बैठ्या था कि इक्क दासाणी तिस अल्ल आई कने ग्लया, “तू भी यीशु गलीलिये सौगी था ।” 70 तिन्हीं सबना सामणे एह ग्लां दे होये मना किता, “मैं नी जाणदा तू क्या ग्लादी ऐ ।” 71 जाहू सैह बाहर अंगणे च गैआ, तां दूईया नौकराणियां तिसियो दिखी नैं तिन्हां नैं जेहड़े तित्थु थे ग्लया, “एह भी तां यीशु नासरिये सौगी था ।” 72 तिन्हीं कसम खाई नैं भिरी मना किता “मैं तिस माणु जो नी जाणदा ।” 73 थोड़िया देरा बाद लोकां जेहड़े तित्थु खडूतेयो थे, पतरसे अल्ल आई नैं तिस नैं ग्लया, “सचमुच तू भी तिन्हां च इक्क ऐ, कजोकि तेरी बोली तेरा भेद खोली दिंदी ऐ ।” 74 ताहू सैह धिक्कारणे कने कसम खाणां लग्गा : मैं तिस माणुये जो नी जाणदा ।” कने ताहू ई कुक्के बांग दैई दिती ।” 75 ताहू पतरसे जो यीशु दी ग्लाइयो गल्ल याद आई : कुक्के दे बांग दैणे ते पैहलें तैं त्रै बरी मिन्जो ते मुकरणां ऐ ।” कने सैह बाहर जाई नैं घुटी घुटी रोया ।

पिलातुसे दे सामणे यीशु मसीह

(मरकुस 15 : 1; लूका 23 : 1,2; यूहन्ना 18 : 28-38)

27 जाहू भ्याग होई तां सारे प्रधान याजकां कने लोकां दे स्याणेयां यीशु जो मारणे दी योजना बणाई । 2 तिन्हां तिसियो बन्नया कने लैई जाई नैं पिलातुस हाकमे दे हुआले करी दिता ।

यहूदा दा आत्महत्या करणां

(चेलयां दे कम्म 1 : 18,19)

3 जाहू तिसदे पकडुआणे आळे यहूदे दिख्या कि सैह आरोपी ठेहराया गैआ ऐ तां सैह पछताया कने सैह तीई चादी दे सिक्के प्रधान याजकां कने स्याणेयां अल्ल वापस लैई लाया । 4 कने ग्लया, “मैं बेकसूरे जो मारणे तांई पकडुआई नैं पाप किता ऐ ।” तिन्हां ग्लया, “अहां जो क्या? तू ई जाण ।” 5 ताहू सैह तिन्हां सिक्केयां जो मंदरे च सट्टी नैं चली गैआ, कने जाई नैं अपणे आप्पे जो गल्लफा लगाई लैआ ।

6 प्रधान याजकां तिन्हां सिक्केयां जो लैई नैं ग्लया, इन्हां जो भंडारे च रखणां ठीक नी; कजोकि एह खून दा पैसा ऐ ।” 7 कने तिन्हां सलाह करी नैं तिन्हां सिक्केयां ते परदेशियां जो दबणे तांई कुम्भारे दा खेत खरीदी लैआ । 8 इसा बजाह ते सैह खेत अज्जे तिकर खूने दा खेते दे नांये ते जाणेयां जांदा ऐ । 9 ताहू जेहड़ा वचन यिर्ययाह भविष्यवक्ता दे दुआरा ग्लया गैआ था सैह पूरा होया : तिन्हां सैह तीई सिक्के जे तिस ठेहराये होये रेते जो (जिसियो इस्राएल दी औलादा च कितणेयां ठेहराया था) लैई लैआ, 10 कने जिआं प्रभुयें मिन्जो हुक्म दिता था तिआं ई तिन्हां जो कुम्भारे दे खेत दे रेते च दैई दिता ।”

पिलातुस कने यीशु मसीह

(मरकुस 15 : 2-5; लूका 23 : 3-5; यूहन्ना 18 : 33-38)

11 जाहू यीशु पिलातुसे सामणे खडूतेया था तां पिलातुसे तिसते पूछ्या, “क्या तू यहूदियां दा राजा ऐ?” यीशुयें तिसियो सदेया, “तू अप्पु ई ग्ला दा ऐ ।” 12 जाहू प्रधान याजक कने स्याणे तिस पर आरोप लगा दे थे, तां तिन्हीं कुच्छ जबाब नी दिता । 13 इसा गला पर पिलातुसे तिस नैं ग्लया, “क्या तू नी सुणदा कि एह तेरे वरखलाफ कितणियां गवाहियां दैआ दे हन?” 14 अपर तिन्हीं तिस जो इक्की गला दा भी जबाब नी दिता, ऐत्थु तिकर कि हाकमे जो बडी हैरानी होई ।

मौती दी सज्जा दा हुक्म

(मरकुस 15 : 6-15; लूका 23 : 13-25; यूहन्ना 18 : 39 -- 19 : 16)

15 पिलातुसे दा एह रुआज था कि तिस तौआरे च लोकां तांई कुसी इक्की कैदिये जो जिसियो सैह चांहदे थे, छड्डी दिंदा था । 16 तिस बग्त तिन्हां दे ऐत्थु बरअब्बा नांये दा इक्क मनेया कैदी था । 17 कने जाहू सैह किट्टे होये, तां पिलातुसे तिन्हां नैं ग्लया, “तुहां कुसजो चांहदे हन कि मैं तुहां तांई छड्डी दैं? बरअब्बा जो, या यीशुये जो जेहड़ा मसीह नांये ते जाणेयां जांदा ऐ?”

18 कजोकि सैह जाणदा था कि तिन्हां तिसियो जळनियां नैं पकडुआया ऐ । 19 जाहू सैह न्याय दी गद्दी पर बैठया था तां तिसदिया लाडिया तिसियो सददी घल्लया, "तू तिस धर्मिये दे मामले च हत्थ मत पांदा, कजोकि मैं अज्र सुपणे च तिसदिया बजाह ते बड़ा दुख झेलया ऐ ।

20 प्रधान याजकां कने स्याणयां लोकां जो भडकाया कि सैह बरअब्बा जो छड्डी दें, कने यीशुये जो मारवाई दें । 21 पिलातुसे तिन्हां ते पूछया, "इन्हां दूनी च कुसियो चाहदे हन कि मैं तुहां ताई छड्डी दें?" तिन्हां ग्लया, "बरअब्बा जो ।" 22 पिलातुसे तिन्हां ते पूछया, "भिरी यीशु जो, जेहड़ा मसीह नांये ते जाणयां जांदा ऐ क्या करे?" सारेयां तिस नैं ग्लया, "सैह सूलिया पर टूंगया जाये 23 पिलातुसे ग्लया, कजो तिन्हीं क्या बुरा किन्तेया ऐ?" अपर सैह होर भी डडी डडी नैं ग्लयां लगे, "सैह सूलिया पर टूंगया जाये ।" 24 जाहू पिलातुसे दिख्या कि कुच्छ बणी नी सकदा अपर इसदे उल्ट हल्ला बधदा जा दा ऐ, तां तिन्हीं पाणी लैई नैं भीड़ा सामणे अपणे हत्थ धोत्ते कने ग्लया, "मैं इस धर्मिये दे खून ते बेकसूर ऐ; तुहां ई जाणां ।" 25 सारेयां लोकां जबाब दिता, इसदा खून अहां पर कने म्हारी औलाद पर होयें ।" 26 इसा गल्ला पर तिन्हीं बरअब्बा जो तिन्हां ताई छड्डी दिता, कने यीशु जो कोड़े लगुआई नैं तिन्हां दे हुआले करी दिता, कि सूलिया पर टूंगया जाये ।

सपाईयां ते यीशु मसीह दी बेञ्जती

(मरकुस 15 : 16-20; यूहन्ना 19 : 2-3)

27 ताहू पिलातुसे दे सपाईयां यीशु जो किले च लैई जाई नैं सारी पलटन तिसदे चौनी बक्खे किट्टी किन्ती, 28 कने तिस दे कपड़े खोली नैं तिसियो बैजनी रंगे दा चौला लौआया, 29 कने कंडेया दा मुकुट बणाई नैं तिसदे मुंडे पर रखया, तिसदे सज्जे हत्थ च सरकंडा दिता कने तिसदे गांह गोडे दे भार बैई नैं तिसियो मजाके च डुआई नैं ग्लया, "हे यहूदियां दे राजा, नमस्कार ।" 30 ~कने तिस पर थूकेया; कने सैई सरकंडा लैई नैं तिसदे मुंडे पर मारणां लगे । 31 जाहू सैह तिसदा मजाक करी बैठे, तां सैह चौला तिस ते खोली नैं भिरी तिस दे कपड़े तिसियो लौआई दिते, कने सूलिया पर टूंगणे ताई लैई चले ।

यीशु मसीह दा सूलिया पर टूंगया जाणां

(मरकुस 15 : 21-32; लूका 23 : 26-43; यूहन्ना 19 : 17-27)

32 बाहर जांदा जांदा तिन्हां जो शमोन नाये दा इक्क कुरेनी माणु मिलेया । तिन्हां तिसियो बेकार च पकड़ेया कि यीशु दिया सूलिया चुकी नैं लैई चले । 33 तिसा जगाह जिसियो गुलगुता या खोपड़ी दी जगाह भी ग्लांदे हन, पुञ्जी करी, 34 तिन्हां पित्त मिलाया अंगूरा दा रस यीशु जो पीणे जो दिता, अपर तिन्हीं चखी नैं पीणा नी चाया । 35 ताहू तिन्हां यीशु जो सूलिया पर टूंगया कने पर्वियां पाई नैं तिसदे कपड़े बंडी लै, 36 कने तित्थु बैई नैं पैहरा देंणां लगे । 37 कने तिसदा दोष पत्र तिसदे मुंडे उपर लगाया, कि एह यहूदियां दा राजा यीशु ऐ" । 38 ताहू तिस सौगी दो डाकू थे, इक्क सज्जे कने इक खब्बे, सूलिया पर टूंगे । 39 ओणे जाणे आळेया सर हिलाई हिलाई नैं तिसदी निंदा करदे थे, 40 कने एह ग्लांदे थे, "हे मंदरे ढाणे आळे कने त्री दिना च बनाणे आळे, अपणे आप्पे जो तां बचा! जे तू परमात्मं दा पुत्तर ऐ, तां सूलिया पर ते लौई आ ।" 41 इस तरीके नैं प्रधान याजक भी शास्त्रियां कने स्याणयां समेत मजाक करी करी नैं ग्लांदे थे, 42 इन्हीं होरनी माणुआं जो बचाया, अपर अपणे आप्पे जो नी बचाई सकदा । एह तां इस्राएले दा राजा ऐ । हुण सूलिया ते लौई आये तां अहां तिस पर वसुआस करन । 43 तिन्हीं परमात्मं पर भरोसा रखेया; जे सैह इसियो चाहदा, तां हुण इसियो छडाई लै, कजोकि इन्हीं ग्लया था, "मैं परमात्मं दा पुत्तर ऐ ।" 44 कने डाकू भी जेहड़ा तिस सौगी टूंगयो थे तिसदी निंदा करदे थे ।

यीशु मसीह दा प्राण त्यागणां

(मरकुस 15 : 33-41; लूका 23 : 44-49; यूहन्ना 19 : 28-30)

45 दोपेरा ते लैई नैं त्रीये पैहर तिकर तिस सारे देशे च नेहरा छाई रहेआ । 46 त्रीये पैहर दे नैडे यीशुये बड़ी उआजा नैं डडी नैं ग्लया, "ऐली ऐली, लमा शबक्तनी?" मतलब "हे मेरे परमात्मां, हे मेरे परमात्मां, तैं मिन्जो कजो छड्डी दिता?" 47 जेहड़े औत्थू खडूतेयो थे, तिन्हां च कितणयां एह सुणी नैं ग्लया, "सैह तां एलियाह जो हक्कां पा दा ऐ ।" 48 तिन्हां च इक्क ताहू ई दौडेया कने

स्पंज लैई नैं सिरके च डुबाया, कने सरकंडे पर रखी नैं तिसियो चुसाया । 49 होरनी ग्लया "रुकी जा, दिख, एलियाह तिसियो बचाणा ओंदा ऐ कि नी ।" 50 ताहू यीशुये जोरे नैं डडी नैं प्राण छड्डी दिते । 51 कने दिखा मंदरे दा पडदा उपरे ते थलें तिकर फटी नैं दो तुकड़े होई गैआ : कने धरती हिल्ल गैयी कने चट्टाना तीडकी गैईयां, 52 कने कब्रां खुली गैईयां, कने सुतेयो पवित्र लोकां दी मत्तियां लाशा जिंदिया होई गैईयां, 53 कने तिस दे जिंदे होणे दे बाद सैह कब्रां ते निकळी नैं पवित्र शंहर च गै कने मतेआं जो दुस्से । 54 ताहू सूबेदार कने जेहड़ा तिस सौगी यीशु दा पैहरा दे दे थे, हिल्लण कने जेहड़ा कुच्छ होया था तिसियो दिखी नैं बडे भरी डरी गै कने ग्लया, एह सच मुच परमात्मं दा पुत्तर था । 55 तित्थु मतिआं जणांसा जेहड़ियां गलीले सैहरे ते यीशु दी सेवा करदी होई तिस सौगी आईयां थियां, दूर ते एह दिखा दियां थियां । 56 तिन्हां च मरियम मगदलीनी, कने याकूब कने योसेसे दी मां मरियम, कने जबदिये दे पुत्तरां दी मां थी ।

यीशु मसीह जो कब्रा च रखेया जाणां

(मरकुस 15 : 42-47; लूका 23 : 50-56; यूहन्ना 19 : 38-42)

57 जाहू संज होई तां यूसुफ नाये दा अरिमतिया दा इक्क अमीर माणु, जेहड़ा यीशु दा चेला था, आया । 58 तिन्हीं पिलातुसे अल्ल जाई नैं यीशु दी लाश मंगी । इसा गल्ला पर पिलातुसे लाशा जो देई देंणे दा हुक्म दिता । 59 यूसुफे लाश लैई, कने तिसियो चिट्टिया चादरा च लपेटया 60 कने तिसियो अपणियां नौईआं कब्रा च रखया, जेहड़ी तिन्हीं चट्टाना च कोरियो थी, कने कब्रा दे मुंमे पर भारी पत्थर खसकाई नैं चली गैआ । 61 मरियम मगदलीनी कने दूई मरियम तित्थु कब्रा दे सामणे बैठियो थी ।

कब्रा पर पैहरा

62 दूआ दिन जेहड़ा तयारी दे दिन दे बादे दा दिन था, प्रधान याजकां कने फरीसियां पिलातुसे अल्ल किट्टे होई नैं ग्लया, 63 "हे महाराजा, अहां जो याद ऐ, कि तिस भरमाणे आळे जाहू सैह जिंदा था, तुहां जो ग्लया था, कि "मैं त्री दिना दे बाद जिंदा होई जाणां । 64 इसताई हुक्म दैया कि त्रै दिन तिकर कब्रा दी रखवाली किन्ती जां, इआं ना होयें कि तिसदे चले आई नैं तिसियो चोरी लैई जान कने लोकां नैं ग्लयां लगे, "सैह मरेयां च जिंदा होई गैआ ऐ ।" ताहू पिछला धोखा पैहले ते भी बुरा होणां । 65 पिलातुसे तिन्हां नैं ग्लया, "तुहां अल्ल अपणे पैहरेदार हन । जा, अपणियां समझा दे मताबक रखवाली करा ।" 66 सैह पैहरेदारां जो सौगी लैई नैं गै, कने पत्थरे पर मोहर लगाई नैं कब्रा दी रखवाली किन्ती ।

यीशु मसीह दा दुवारा ते जिंदा होणां

(मरकुस 16 : 1-8; लूका 24 : 1-12; यूहन्ना 20 : 1-10)

28 सब्त दे दिनां दे बाद हफते दे पैहले दिन भ्याग होणे ते पैहलें ई मरियम मगदलीनी कने दूई मरियम कब्रा जो दिखणां आईयां । 2 कने दिखा, इक्क बडा हिल्लण होया, कजोकि प्रभु दा दूत सुअर्गे ते लौत्था कने बक्खे आई नैं तिन्हीं पत्थरे जो रडुकाई दिता, कने तिस पर बैई गैआ । 3 तिसदा रूप बिजलिया साइआं कने तिसदे कपड़े पाळे साइआं चमका करदे था । 4 तिसदे उरे दे चौंकीदार कमी पै, कने मरेयां साइआं होई गै 5 सुअर्गदूतें जणांसां जो ग्लया, "मत डरा, मैं जाणदा कि तुहां जेहड़ा सूलिया पर टूंगया था तिसियो तोपा दियां हन । 6 सैह ऐत्थू नी ऐ, अपर अपणे वचने दे मताबक जिंदा होई गैआ ऐ । ओआ, एह जगाह दिखा, जित्थू प्रभु रखया था, 7 कने झटपट जाई नैं तिसदेयां चेलयां नैं ग्ला कि सैह मरेयां ते जिंदा होई गैआ ऐ, कने सैह तुहां ते पैहले गलीले जो जांदा ऐ, तुहां तित्थु तिसदा दर्शन पाणां । सुणां, मैं तुहां नैं एह सब दस्सी दिता ।"

8 ~ सैह उरे सौगी बड़ी खुशिया सौगी कब्रा ते झटपट जाई नैं तिसदे चेलयां जो खबर देंणे ताई दौडियां । 9 ताहू यीशु तिन्हां जो मिलेया । कने ग्लया, "सलाम" । तिन्हां बक्खे आई नैं कने तिसदे पैर पकडी नैं तिसियो प्रणांम किता । 10 ताहू यीशुये तिन्हां नैं ग्लया, "मत डरा; मेरे भाऊआं नैं जाई नैं ग्ला कि गलीले जो चले जा न, तित्थु सैह मिन्जो सौगी मिलगे ।"

पहरुआं दी सूचना

11 सैह जा दियां थियां कि चौकीदारां च कुच्छना सैहर च आई नै पूरा हाल प्रधान याजकां नै ग्लाई दित्ता । 12 ताहू तिन्हां स्याणेयां सौगी किडे होई नै सलाह किच्ची कने सपाईयां जो बड़ी चादी देई नै ग्लायी, 13 “तुहां ग्लाणां कि राती जो जाहू अहां सुतेयो थे, तां तिसदे चले आई नै तिसियो चुराई लैई गै । 14 कने जे एह गल्ल पिलातुसे दे कन्नां तिकर पुज्गी, तां अहां तिसियो समझाई लैंगे कने तुहां जो खतरे ते बचाई लैंगे ।” 15 कने तिन्हां पैसे लेई नै जिआं सखायो थे, तिआं ई कित्ता । एह गल्ल अजे तिकर यहूदियां च प्रचलित ऐ ।

यीशु मसीह दा दुस्सणां कने चेलयां जो आखरी हुक्म

(मरकुस 16 : 14-18 ; लूका 24 : 36-49; यूहन्ना 20: 19-23; चेलयां दे कम्म 1 : 6-8)

16 ग्याराह चले गलीले च तिस प्हाडे पर गै जिसियो यीशुयें दस्सया था । 17 तिन्हां तिसदे दर्शन पाई नै तिसियो प्रणांम कित्ता, अपर कुसी कुसी जो शक होया । 18 यीशुयें तिन्हां अल्ल आई नै ग्लायी, “सुअर्ग कने धरतिया दा सारा हक्क मिन्जो दित्ता गैआ ऐ । 19 इसतांई तुहां जा, सारेयां देशां दे लोकां जो चेला बणां; कने तिन्हां जो पिता, कने पुतर, कने पवित्र आत्मां दे नांये ते बपतिस्मा दैआ, 20 कने तिन्हां जो सारियां गल्लां जेहडा में तुहां जो हुक्म दित्ता ऐ, मनणां सखा : कने दिखा मैं संसारे दे अंत तिकर सदा तुहां सौगी ।

मरकुस

भूमिका

मरकुसे दा सुसमाचार इस गल्लां ते शरु हुंदा ऐ, परमात्मं दे सुसमाचारे दी शरुआत ।" चौनी सुसमाचारा ते होई सकदा कि पराणां कने छोटा सुसमाचार ऐ । इसदा लिखणे दा तरीका सीधा ऐ अपर जिन्हां घटनां दे बारे च एह दस्सदा ऐ सैह बडियां ई आसरदार हन । अहां दिखदे हन कि मती कने लूका दे सुसमाचारा च तिन्हां ई घटनां दी गल्ल ऐ जेहडी कि मरकुस दे सुसामचारे च ऐ अपर घटना जो गाह - पचाह कने ठीक तरीके नैं लिखणे दिया बजहा ते ऐ सुसमाचार दिया बनावटा चा अपणां योगदान दिंदा ऐ । मरकुसे दा सुसमाचारे च कम्मां दे वखाना नैं भरौया ऐ कने यीशु मसीह दिया केईआ कम्मां कने चंगाई दे आश्चर्यकर्मां दी जानकारी दिंदा ऐ । अपर मरकुसे दे मताबक यीशु मसीह दा सारिया दे बड़ा आश्चर्यकर्म दुख भोगणां कने तिस दी मौत ऐ । सबना ते पैहलें जिन्हीं इस दुखे जो समझेया सैह इक्क रोमी अफसर था, जिन्हीं यीशु मसीह जो सूलिया पर मरदे दिखी करी ग्लया, "सच यह माणु परमात्मं दा पुत्र था ।" मरकुसे दे सुसमाचारे दी पैहली लाईन दस्सदी ऐ कि "परमात्मं दे पुत्र यीशु मसीह दे सुसमाचारे दी शुरुआत ।" बाकी सुसमाचार एह दस्सदे हन कि सच क्या ऐ? प्रभु यीशु अपने कमां कने वचना नैं इसा गल्ला जो पक्का किता कि एह सुसमाचार परमात्मं दा ऐ कने सैह सच मुच ई परमात्मं दा पुत्र ऐ । अरामी भाषा दे शब्दां दे मतलब जो समझणां कने तिस च दस्सयो रिती रवाज एह दस्सदे हन कि एह सुसमाचार गैर यहूदी जातियां ताई बी लिख्या गैआ ऐ । इस सुसमाचारे च केईआ जगहा पर अहां प्रभु यीशु मसीह जो लोकां कने दुष्टात्मां नैं एह ग्लां दे दिखदे हन कि सैह यीशु दे कम्मां दे बारे च कने तिन्हां दे बारे च कुसी नैं मत ग्लां दे । सुसमाचार दे आखरी पाठे च इक्क रोमी अधिकारी यीशु मसीह जो परमात्मं दे रूपे च पणछेण करी लैंदा ऐ । इसा गल्ला ते लगदा ऐ कि मरकुसे दे सुसमाचारे जो पढ़ना इक्क रहस्य जो जाणने दे बराबर होई जांदा ऐ । आखरी दे पाठां यीशु दे पार्थिव जिन्दगी हफते दी घटना दा वखान पेश करदे हन, जिन्हां च खास ऐ, तिसदा सूलिया पर चढ़ाया जाणां कने तिसदा दुआरा जिंदा होणां ।

रूप रेखा

सुसमाचार दी शुरुआत 1: 1- 13

गलीले च यीशु मसीह दे सेवा दे कम्म 1: 14 --- 9: 50

गलीले ते यरुशलेम तिकर यात्रा 10: 1- 52

यरुशलेम च आखरी हफता 11: 1 --- 15: 47

यीशु मसीह दुआरा जिंदा होणां 16: 1- 8

जिंदा होणे ते बाद प्रभु यीशु मसीह दा दुस्सणां कने सुअर्णे च चुकेया जाणां 16: 9- 20

यूहन्ना बपतिस्मा दैणेआळे दा प्रचार

(मत्ती 3 : 1-12 लूका 3 : 1-18 यूहन्ना 1 : 19-28)

1 परमात्मं दे पुत्र यीशु मसीह दे सुसमाचारे दी शुरुआत । 2 जिआं यशायाह भविष्यवक्ता दी कताबा च लिख्या ऐ "दिख मैं अपने दूते जो तिजो अल्ल घल्लदा, जेहडा तिजो ताई रस्ता त्यार करगा ।

3 सुनसाण जगाह च इक्क हक्कां पाणे आळे दी उआज सुम्मां दी कि प्रभु दा रस्ता त्यार करा, कने तिसदियां सडकां सीधियां करा ।"

4 यूहन्ना आया, जेहडा सुनसाण जगाह च बपतिस्मा दिंदा था, कने पापां जो माफ करणे ताई मने जो बदलणे दे बपतिस्मे दा प्रचार करदा था । 5 सारे यहूदिया प्रदेशे दे, कने यरुशलेम सैहरे दे सारे रैहणे आळे निकळी नैं तिस अल्ल गै, कने अपने पापां जो मनी नैं यरदन दरैयाए च तिसते बपतिस्मा लैआ ।

6 यूहन्ना ऊंटे दे बाळां दा कपडा पैहणदा कने अपने लक्के च चमड़े दा पटका बन्नी रखदा था । कने सैह टिड्डियां कने जंगली मखीर खांदा था । 7 कने एह प्रचार करदा था, "मिन्जो ते बाच जेहडा ओणे आळा ऐ, सैह मिन्जो ते भी ताकतवर ऐ; मैं इस जोग्गा नी कि झुकी नैं तिसदे जूतेयां देयां तस्मेआं जो खोली सकें 8 मैं तां तुहां जो पाणी ते बपतिस्मा दिता ऐ अपर सैह तुहां जो पवित्र आत्मां सौगी बपतिस्मा दिंगा ।

यीशु मसीह दा बपतिस्मा कने परख

(मत्ती 3 : 1 3-4:11 लूका 3 : 21-22; 4 : 1-13)

9 तिन्हां दिना च यीशुयें गलीले दे नासरत ते आई नैं, यरदन दरैयाए च यूहन्ने ते बपतिस्मा लैआ । 10 कने जाहू सैह पाणिये ते निकळी नैं बाहर आया ताहू तिन्हीं अम्बरे जो खुलदे कने आत्मां जो कबूतरे रूपे च अपने उपर

लौं दे दिख्या । 11 कने एह आकाशवाणी होई, "तू मेरा प्यारा पुत्र ऐ, तिजो ते मैं खुश ऐ ।" 12 ताहू ई आत्मां यीशु जो बणे दे पास्सेयो घल्लया । 13 बणे च चाली दिन तिकर सैताने यीशु दी परख लैई; कने सैह जंगली जानवरा सौगी रैहआ, स्वर्गदूत आई नैं तिसदी सेवा करदे रैह ।

यीशु मसीह दा सेवा दे कम्म शुरु

(मत्ती 4 : 12-17 लूका 4 : 14-15)

14 यूहन्ना दे पकड़णे दे बाद यीशुयें गलीले सैहरे च आई नैं परमात्मं दे राजे दा सुसमाचार प्रचार किता । 15 कने ग्लया, "बत पूरा होईया, कने परमात्मं दा राज नेडै आईया ऐ; मने जो बदला कने सुसमाचार पर वसुआस करा ।"

मच्छियां पकड़णे आळेयां जो अप्पु अल्ल सदणां

(मत्ती 4 : 18-22 लूका 5 : 1-11)

16 गलीले दिया झीला कंडे चलदे - चलदे तिन्हीं शमौने कने तिसदे भाऊ अन्द्रियासे जो झीला च जाळ सट्टे दिख्या; कजोकि सैह मच्छियां पकड़णे आळे थे । 17 यीशुयें तिन्हां जो ग्लया, "मिन्जो पचाह ओआ; मैं तुहां जो माणुआं जो पकड़णे आळा बणांगां ।" 18 सैह ताहू ई जाळां जो छड्डी नैं तिसदे पचाह चली पै ।

19 थोडी गांहा जाई नैं, तिन्हीं जबदिये दे पुत्र याकूबे, कने तिसदे भाऊये यूहन्ने जो, किस्तिया पर जाळां जो ठीक करदे दिख्या । 20 तिन्हीं झट तिन्हां जो सदेया; कने सैह अपने पिता जबदिये जो मजदूरां सौगी किस्तिया पर छड्डी नैं तिसदे पचाह चली पै ।

दुष्टआत्मां दे सतायेयो माणुये जो ठीक करणां (लूका 4 : 31-37)

21 जाहू यीशु कफरनहूम च आये, तां सैह सब्त दे दिनें आराधनालय च जाई नें शिक्षा देणां लग्गा । 22 कने माणु तिसदिया शिक्षा ते हैराण होये; कजोकि सैह तिन्हां शास्त्रियां साइआं नी, अपर सैह अधिकारिये साइआं शिक्षा दिंदा था । 23 तिस बग्त, तिन्हां दे आराधनालय च इक्क माणु था, जिस च इक्क दुष्टआत्मां थी । 24 तिन्हीं जोरे नें ग्लाय, हे यीशु नासरी, अहां जो तिज्जो नें क्या कम्म? क्या तू अहां जो खत्म करणां आया? मैं तिज्जो जाणदा, तू कुण ऐ? तू परमात्मं दा पवित्र माणु ऐ । 25 यीशुयें दुष्टआत्मां जो झिडकी नें ग्लाय, "चुप रह; कने इसते निकळी जा ।" 26 ताहू दुष्टआत्मां तिसियो मरोडी नें, कने जोरे नें डडी करी तिसदे अंदरे ते निकळी गई । 27 इसा गल्ला पर सारे माणु हैराण होई नें, अप्पु च सुआल जबाब करणां लग्गे, एह क्या गल्ल ऐ? एह तां कोई नौई शिक्षा ऐ! सैह हक्के नें दुष्टआत्मां जो भी हुक्म दिंदा ऐ, कने सैह तिसदा हुक्म मनदियां हन । 28 कने तिसदा नां ताहू ई गलील दे आस्से पाससे दे सारे प्रदेशे च फैली गैआ ।

मते बमारां जो ठीक करणां (मत्ती 8 : 14-17 लूका 4 : 38-41)

29 सैह भिरी आराधनालय ते निकळी नें याकूब कने यूहन्ने सौंगी शमौन कने अन्द्रियासे दे घरे जो आया । 30 शमौने दी सस्सु जो बुखार चढया था, कने तिन्हां ताहू तिसादे बारे च तिसियो दस्सेया । 31 ताहू तिन्हीं बक्खे जाई नें तिसादा हत्थ पकडी नें तिसायो तुआळ्या; कने तिसादा बुखार उतरी गैआ, कने सैह तिसदी सेवा करणां लग्गी । 32 संजा दे बग्त जाहू सूरज घरुईया तां माणु सारे बमारां जो कने तिन्हां जो, जिन्हां च दुष्टआत्मां थियां, तिस अल्ल लैई आये । 33 कने सारा सैहर दुरआजे पर कठरोइया । 34 तिन्हां मतेआं जो जेहडे कईआं किस्मां दियां बमारियां ते दुखी थे, ठीक कित्ता, मतिआं दुष्टआत्मां जो कडुया, कने दुष्टआत्मां जो ग्लाणां नी दिता, कजोकि सैह तिसियो पणछेणदियां थियां ।

किन्ने च यीशु दा प्रार्थना करणां (लूका 4 : 42-44)

35 भ्यागा दिन निकलणे ते बडी पैहले सैह उठी नें निकळ्या, कने इक्क एकांत जगाह जो गैआ तिन्हे प्रार्थना करणां लग्गा । 36 ताहू शमौन कने तिसदे साथी तिसियो तोपणां गै । 37 जाहू सैह मिला, तां तिस जो ग्लाय, सारे माणु तिज्जो तोपा दे हन । 38 तिन्हीं तिन्हां जो ग्लाय, "ओआ; अहां होर कुत्की अक्खे बक्खे देयां ग्रां च जान, कि मैं तिन्हे भी प्रचार करी सके, कजोकि मैं इसताई निकळ्या ।" 39 सैह सारे गलीले च तिन्हां दे आरधनालयां च जाई नें प्रचार करदा कने दुष्टआत्मां जो कडुदा रहैआ ।

कोढी माणुये जो ठीक करणां (मत्ती 8:1-4 लूका 5:12-16)

40 इक्क कोढियें यीशु अल्ल आई करी तिस नें विणती कित्ती, तिन्हीं तिसदे गांघ गोडे दे भार बैई नें तिस जो ग्लाय, जे तू चाहंदा तां मिन्जो ठीक करी सकदा । 41 तिन्हीं तिस पर तरस खाई नें तिस पर हत्थ रखया, कने छूई नें तिसियो ग्लाय, मैं चाहंदा कि तू ठीक होई जां । 42 कने ताहू ई तिसदा कोढ खरा होई गैआ, कने सैह ठीक होईया । 43 ताहू तिन्हीं तिसियो समझाई नें घल्ली दिता, 44 कने तिसियो ग्लाय, "दिख कुसी नें कुच्छ मत ग्लांदा, अपर जाई नें अप्पु जो याजके जो दस्स, कने अपणे ठीक होणे दे बारे च जेहडा कुच्छ मूसं दस्सेया ऐ तिसियो भेंट चढा तां जे तिन्हां पर गवाही होयें ।" 45 अपर सैह बाहर जाई नें तिसा गल्ला जो बडा दसणां कने इस तरीके नें सनाणां लग्गा कि यीशु भिरी सरेआम ग्रांऐ च नी जाई सकेया, अपर बाहर बणां - बांडियां च रहैआ कने चौत्री पाससे दे माणु तिस अल्ल ओंदे रहै

अधरंगे दे बमार माणुये जो ठीक करणां (मत्ती 9 : 1-8; लूका 5 : 17-26)

2 कईयां दिना बाद सैह भिरी कफरनहूम सैहरे च आया, कने सुणने च आया कि सैह घरें ई ऐ । 2 भिरी इतणे माणु किह्ये होये कि दुरआजे अल्ल भी जगाह नी थी; कने सैह लोकां जो वचन सणां दा था । 3 कने माणु इक्क अधरंगे दे रोगिये जो चौं माणुआं ते चुकवाई नें तिस अल्ल लैई आये । 4 अपर जाहू सैह भीडा दिया बजाह ते तिसदे बक्खे नी पुज्जी सके, तां तिन्हां तिसा छती जो जिसा थलै यीशु था, कुआई दिता; कने जाहू सैह छती जो कुआई बैठे, तां तिस मंजोलूये जो जिस पर अधरंगे दा रोगी पैआ था, छती ते लटकाई दिता । 5 यीशुयें तिन्हां दा बसुआस दिखी नें अधरंगे दे रोगिये जो ग्लाय, "हे पुत्र तेरे पाप माफ होये ।" 6 ताहू कई शास्त्री जेहडे तिन्हे बैठयो थे, अपणे - अपणे मने च सोचणां लग्गे । 7 एह माणु इआं कजो ग्लांदा ऐ, एह तां परमात्मं दी निंदा करदा ऐ । परमात्मं जो छड्डी नें होर कुण पाप माफ करी सकदा ऐ?" 8 यीशुयें ताहू अपणिया आत्मां च जाणी लैआ कि सैह अपणे अपणे मने च ऐदेया सोचा दे हन, कने तिन्हां जो ग्लाय, "तुहां अपणे अपणे मने च एह कजो सोचा दे? 9 सोखा क्या ऐ? क्या अधरंगे दे रोगिये जो एह ग्लाणां कि तेरे पाप माफ होये, या एह ग्लाणां कि उठ अपणे मंजोलूये चुकी नें चल फिर ? 10 जिस ते तुहां जाणी लैआ कि माणु दे पुत्रे जो धरतिया पर पाप माफ करणे दा भी हक्क ऐ ।" तिन्हीं तिस अधरंगे दे रोगिये जो ग्लाय, 11 "मैं तिज्जो ग्लांदा, उठ, अपणे मंजोलूये चुकी नें अपणे घरे जो चलिया । 12 सैह उठया कने ताहू ई अपणे मंजोलूये चुकी नें सबना दे सामणे ते निकळी नें चलिया; इस ते सारे हैराण होये, कने परमात्मं दी तारीफ करी नें ग्लाणां लग्गे, अहां ऐदेया कदवी नी दिख्या ।

लेवी माणुये जो सदणां (मत्ती 9 : 9-13 लूका 5 : 27-32)

13 सैह भिरी निकळी नें झीला दे कंडे गैआ, कने सारी भीड तिसदे पचांह चली पैई, कने सैह तिन्हां जो शिक्षा देणां लग्गा । 14 जांदे जांदे तिन्हीं हलफईये दे पुत्र लेविये जो चुंगी दी चौकिया पर बैठयो दिख्या, कने तिसियो ग्लाय, "मेरे पचांह चली पो ।" कने सैह उठी नें तिसदे पचांह चली पैआ ।

15 जाहू यीशु तिसदे घरें खाणा बैठा, तां मते भरी चुंगी लैणे आळे कने पापी कने यीशु दे चले भी खाणा बैठे; कजोकि सैह मते भरी थे, कने तिसदे पचांह चली पैयो थे । 16 शास्त्रियां कने फरीसियां एह दिखी नें कि सैह तां पापियां कने चुंगी लैणे आळ्यां सौंगी खांदा पींदा ऐ । 17 यीशुयें एह सुणी नें तिन्हां जो ग्लाय, "चंगे भलेयां जो वैधे दी जरूरत नी हुंदी, पर बमारां जो ऐ । मैं धर्मियां जो नी, अपर पापियां जो बचाणां आया ।"

व्रते दा सबाल (मत्ती 9 : 14-17 लूका 5 : 33-39)

18 यूहन्ना दे चले, कने फरीसी व्रत करदे थे; तिन्हां आई नें तिसियो एह ग्लाय, "यूहन्ना दे चले कने फरीसियां दे चले कजो व्रत रखदे हन, अपर तेरे चले व्रत नी रखदे?" 19 यीशुयें तिन्हां जो ग्लाय, "जाहू तिकर लाडा बरातिआं सौंगी रहंदा ऐ, क्या सैह व्रत करी सकदे हन? जाहू तिकर लाडा तिन्हां सौंगी ऐ, ताहू तिकर सैह व्रत नी करी सकदे हन । 20 अपर सैह दिन ओंगे जाहू लाडा तिन्हां ते लग्ग कित्ता जांगा; तिस बग्त सैह व्रत करणे ।

21 "नौये कपडे दा टल्ल पराणे कपडे पर कोई नी लगांदा; नी तां सैह टल्ल तिसते कुच्छ खींज्जी लैंगा, मतलब नौआं पराणे ते, कने सैह पैहले ते जादा छकूई जांदा ऐ । 22 नौये अंगूरा दे रसे जो पुराणियां सराईयां च कोई नी रखदा, नी तां अंगूरा दा रस सराईयां जो फाडी दिंगा, कने अंगूरा दा रस कने सराईयां दोयो खराब होई जांदियां हन; अपर नौआं अंगूरा दा रस नौईयां सराईयां च भरेया जांदा ऐ ।"

सब्ले दा प्रभु (मत्ती 12 : 1-8 लूका 6 : 1-5)

23 इआं होया कि सैह सब्त दे दिनें खेतां च होई नें जा दा था, कने तिसदे चले चलदे चलदे सिलयां तोडी नें खाणां लग्गे । 24 ताहू फरीसियां तिसियो

ग्लाय, दिख एह सब्ब दे दिन सैह कम्म कजो करा दे हन जेहड़ा ठीक नी ऐ?" 25 तिन्हीं तिन्हां नै ग्लाय, "क्या तुहां एह कदी नी पढ़या कि जाहू दाऊदे जो जरूरत पैई, कने जाहू सैह कने तिसदे साथी भूखे थे, ताहू तिन्हीं क्या कित्या था? 26 तिन्हीं किआं अबियातरे महायाजके दे बग्त, परमात्मै दे घरे च जाई नै चढावे दियां रोटियां खादियां, जिसदा खाणां याजकां जो छड्डी कने होर कुसी जो भी ठीक नी लगया, कने अपने साथियां जो भी दित्तियां?" 27 ताहू तिन्हीं तिन्हां जो ग्लाय, "सब्त दा दिन माणु ताई बणाया, ना कि माणु सब्त दे दिन ताई। 28 इसताई माणु दा पुत्तर सब्त दे दिने दा भी मालक ऐ।

सूके हत्थे आळे माणुये जो ठीक करणां (मत्ती 12: 9-14 लूका 6: 6-11)

3 सैह भिरी आराधनालय च गैआ, तित्थु इक्क माणु था जिसदा इक्क हत्थ सुकी गैआ था, 2 कने कुच्छ फरीसी माणु तिस पर दोष लगाणे ताई इसा ताड़ा च थे कि दिखन, सैह सब्त दे दिन तिसियो ठीक करदा ऐ कि नी। 3 तिन्हीं सुक्केयो हत्थ आळे माणुये जो ग्लाय, बिच खडौई जा। 4 कने तिन्हीं ग्लाय, "क्या सब्त दे दिन खरा करणां ठीक ऐ या बुरा करणां, जान्नी जो बचाणा या मारणां?" अपर सैह चुप रहै। 5 तिन्हीं तिन्हां दे मने दी कठोरता ते उदास होई नै, तिन्हां जो गुस्से नै चौई पास्सें दिख्या, कने तिस माणु जो ग्लाय, "अपणां हत्थ गांह कर।" तिन्हीं गांह किता, कने तिसदा हत्थ खरा होई गैआ। 6 ताहू फरीसी बाहर जाई नै हेरोदियां सौगी तिसदे बरखलाफ साजस रचनां लगे कि सैह तिसियो किआं मारी सकन।

भीडा दा यीशु मसीह दे पचांह चलणां

7 यीशुयें अपने चेलयां सौगी झीला दे पास्से चली गैआ कने गलीले ते इक्क बडी भीड़ तिसदे पचांह चली पैई। 8 कने यहूदिया, कने यरुशलेम, कने इदूमिया, कने यरदन दरैयाए दे पारे दे, कने सूर कने सैदा दे अक्खे बक्खे ते इक्क बडी भीड़ एह सुणी नै कि सैह केदेय म्हांन कम्म करदा ऐ तिस अल्ल आई। 9 तिन्हीं अपने चेलयां जो ग्लाय, "भीडा दिया बजाह ते इक्क छोटी किस्ती मिन्जो ताई त्यार रहै तांकि सैह मिन्जो घेरी नी लैन।" 10 कजोकि तिन्हीं मतेआं जो ठीक कित्या था, इसताई जितणे माणु बमरिया च पैयो थे तिसियो छुणे ताई तिस परालें पैयी जांदे थे। 11 दुष्टआत्मां भी, जाहू तिसियो दिखदियां थियां, तां तिसदे गांह पैयी जादियां थियां, कने डडी नै ग्लादियां थियां कि तू परमात्मै दा पुत्तर ऐ; 12 कने तिन्हीं तिन्हां जो चेतावनी देई नै ग्लाय, मेरे बारे च कुसी जो मत दसदे।

बारा चले चुणणां

(मत्ती 10: 1-4 लूका 6: 12-16)

13 भिरी सैह प्हाड़े पर चढी गैआ, कने जिन्हां जो सैह चाहंदा था तिन्हीं तिन्हां जो अपने अल्ल सदेया; कने सैह तिसिया अल्ल आये। 14 ताहू तिन्हीं बारां मरदां जो चुणया कि सैह तिस सौगी सौगी रहै, कने सैह तिन्हां जो घल्लें कि सैह प्रचार करन। 15 कने दुष्टआत्मां जो कडणे दा हक्क रखन। 16 सैह एह हन; शमौन जिसदा नां पतरस रखया। 17 कने जबदिये दा पुत्तर याकूब कने याकूबे दा भाऊ यहून्ना, जिन्हां दा नां तिन्हीं बुअनरगिस व गर्जन दे पुत्तर रखया, 18 कने अन्दियास, कने फिलिप्पुस, बरतुलमै, कने मत्ती, थोमा, कने हलफई दा पुत्तर याकूब, कने तद्दै, शमौन कनानी, 19 कने यहूदा इस्करियोती जिन्हीं तिसियो बादे च पकडुआई भी दित्या था।

यीशु मसीह कने बालजबूल सैतान

(मत्ती 12: 22-32 लूका 11: 14-23; 12: 10)

20 ताहू सैह घरे जो आया; कने इतणी भीड़ कडुरोई कि सैह रोटी भी नी खाई सके। 21 जाहू तिसदे परवारे आळेयां एह सुणेया, तां सैह तिसियो पकडणां निकळे; कजोकि सैह ग्लांदे थे कि तिसदा होस ठीकाणे पर नी ऐ।

22 शास्त्री भी जेहडे यरुशलेम ते आयेयो थे, एह ग्लांदे थे, "तिस च सैतान ऐ, कने "सैह दुष्टआत्मां दे सरदार दे मदद लैई नै दुष्टआत्मां जो कडवा ऐ।"

23 इसताई सैह तिन्हां जो अप्पु अल्ल सददी नै तिन्हां जो उदारण देई नै ग्लाणां लग्गा, सैतान किआं सैताने जो कडडी सकदा ऐ? 24 जे कुसी दे राजे

च बैर पैई जां, तां सैह राज किआं टिकी सकदा ऐ? 25 कने जे कुसी दे घरे च फूट पौये, तां सैह घर किआं मजबूत होई सकगा। 26 इसताई जे सैतान अपणां ई विरोधी होई नै अप्पु च बैर पैई जां, तां सैह किआं बणी करी रहै सकदा ऐ? तिसदा तां अंत ई होई जांदा।

27 कोई माणु कुसी ताकतवरे दे घरे च बडी नै तिसदा समान चोरी नी सकदा, जाहू तिकर कि सैह पैहले तिस ताकतवरे जो बन्नी नी ले; तां भिरी तिसदे घरे चोरी करी सकदा ऐ।

28 "मैं तुहां नै सच ग्लांदा कि माणुआं दी औलादा दे सारे पाप कने निंदा जेहड़ी सैह करदे हन, माफ किती जांगी, 29 अपर जेहड़ा कोई पवित्र आत्मां दा निंदेया करगा, सैह कददी भी माफ नी किता जांगा अपर सैह सदा दे पाप दा अपराधी हुंदा ऐ।" 30 कजोकि सैह एह ग्लांदे थे कि तिस च दुष्टआत्मां ऐ।

यीशु मसीह दी माँ कने भाऊ

(मत्ती 12: 46-50 लूका 8: 19-21)

31 तित्थु तिसदी मां कने तिसदे भाऊ आये, कने बाहर खडौई नै तिसियो सादा घल्लया। 32 भीड़ तिसदे अक्खे बक्खे बैठियो थी, कने तिन्हां तिसियो ग्लाय, दिख तेरी मां कने तेरे भाऊ बाहर तिजो तोपा दे हन। 33 तिन्हीं तिन्हां जो जबाब दित्ता, "मेरी मां कने मेरे भाऊ कुण हन?" 34 कने तिन्हां तित्थु बैठेयो माणुआं पास्सें दिखी नै ग्लाय, "दिखा मेरी मां कने मेरे भाऊ एह हन। 35 कजोकि जेहड़ा कोई परमात्मै दी इच्छा पर चलगा, सैई मेरे भाऊ कने बैहण कने मां हन।

बीई बाणे आळे दा उदारण

(मत्ती 13: 1-9 लूका 8: 4-8)

4 सैह भिरी झीला दे कंडे शिक्षा दैणां लग्गा कने देयी भीड़ तिस अल्ल इणी कडुरोई गैई कि सैह झीला च इक्का किस्तिया पर चढी नै बैठिया, कने सारी भीड़ झीला दे कंडे धरतिया पर खडौई रहै। 2 कने सैह तिन्हां जो उदारणा च बडियां गल्लां सखाणां लग्गा, कने अपने शिक्षा च तिन्हां जो ग्लाय, 3 सुणां! इक्क किसान बीई बाणां निकळेया। 4 बांदे बग्त कुच्छ रस्ते दे कंडे पै कने पंछियां आई नै तिन्हां जो चुगी लैआ। 5 कुच्छ बीई पथरीली जमीना पर पै जित्थु तिन्हां जो मत्ती चिक्क नी मिली, कने डूगी चिक्क नी मिलणे दिया बजाह ते तौळी लूगी पै। 6 कने जाहू सूरज निकळेया तां फकूई गै, कने जड नी पकडणे दिया बजाह ते सूकी गै। 7 कुच्छ झाडियां च पै, कने झाडियां बधी नै तिन्हां जो जिक्की दित्ता, कने तिन्हां फळ नी दित्ता। 8 अपर कुच्छ खरिया जमीना पर पै, कने सैह लूगे कने निकळी नै फळवन्त होये; कने कईयां ती गुणां, कईयां सठ गुणां कईयां सौ गुणां फळ दित्ता। 9 ताहू तिन्हीं ग्लाय, "जिन्हां अल्ल सुनणे ताई कनं होन, सैह कनां खोली सुणी लैन।"

उदारणां दा मकसद

(मत्ती 13: 10-17 लूका 8: 9-8)

10 जाहू लोकां दे जाणे दे बाद यीशु किल्ला रहै गैआ, तां तिसदे चेलयां कने कुच्छना लोकां तिसते इन्हां उदारणा दे बारे च पूछया। 11 तिन्हीं तिन्हां जो ग्लाय, "तुहां जो तां परमात्मै दे राजे दे भेद दी समझ दित्तियो ऐ अपर बाकी लोकां ताई सारी गल्लां उदारणा च होंदियां। 12 इसताई कि

"सैह दिखदे होये दिखन कने समझी नी पान कने सुणदे होये सुणन अपर ना समझन; इआं ना होये कि सैह पापे दे रस्ते ते फिरन, कने माफ किन्ते जान।"

बीई बाणेआळे उदारणे दा मतलब

(मत्ती 13: 18-23 लूका 8: 11-15)

13 भिरी तिन्हीं तिन्हां जो ग्लाय, "क्या तुहां एह उदारण नी समझदे? तां भिरी होर उदारणा जो किआं समझगे? 14 बीई बाणे आळा वचन बांदा ऐ।

15 जेहडे रस्ते कंडे दे हन जित्थु वचन बाया जांदा ऐ, एह सैह माणु हन कि जाहू तिन्हां सुणेया, तां सैताने झट आई नै वचन जेहड़ा तिन्हां च बाया था, चुक्की लैई जांदा। 16 तिआं ई जेहडे बीई पथरीली जमीना बिच बाए जांदे हन, एह सैह माणु हन जेहडे वचने जो सुणी नै झट खुशिया नै तां मनी लैंदे हन। 17 अपर अपने अंदर जड नी रखणे दिया बजाह ते सैह थोड़े ही दिना तिकर

रहेंदे हन; इसदे बाद जाहू वचने दिया बजाह ते तिन्हां पर दुख या सताव होदा, तां सैह झट वचने जो भूली जांदे हन । 18 जेहडे बीई झुडां - बन्सूटां च बाएयो एह सैह माणु हन जिन्हां वचन तां सुणेया, 19 कने संसार दी फिकर, कने पैसे दा धोखा, कने दुईयां चीजां दा लालच तिन्हां च आई नैं वचने जो दबाई दिंदा । कने सैह कोई फळ नी दैई सकदा ऐ । 20 कने जेहडे बीई खरिया जमीना बिच बाएयो, एह सैह माणु हन जेहडे वचने सुणी नैं मनी लेंदे कने फळ लैयोदें हन कोई ती गुणां, कोई सठ गुणां कने कोई सौ गुणां ।”

दिये दा उदारण
(लूका 8 : 16-18)

21 यीशुयें तिन्हां जो ग्लाय, क्या दिये जो इसताई लैयोदें हन कि डला या मंजोलूये थलै रखया जां? क्या इसताई नी कि कलम्पे पर रखया जाये? 22 कजोकि कोई भी चीज छुपियो नी ऐ, अपर इसताई ऐ कि सामणे होई जां; कने ना कुच्छ गुप्त ऐ, अपर इसताई ऐ कि सामणे होई जां ।” 23 जे कुसकी अल्ल कन होन, तां सैह कनां खोली सुणी लैन ।” 24 भिरी तिन्हीं तिन्हां जो ग्लाय, चुकनै रहैआ कि क्या सुणदे हन । जिस नापे नैं तुहां नापदे हन तिसी नैं तुहां ताई भी नापया जांगा, कने तुहां जो मता दित्ता जांगा । 25 कजोकि जिस अल्ल ऐ तिस जो दित्ता जांगा; कने जिस अल्ल नी ऐ, तिसते सैह भी जेहडा तिस अल्ल ऐ, लैयी लैआ जांगा ।”

लूंगे आळे बीऐ दा उदारण

26 भिरी तिन्हीं ग्लाय, परमात्में दा राज् एदया ई ऐ, जिआं कोई माणु जमीना बिच बीई बांदा, 27 कने राती जो सोई जां कने दिनें जो जागें, कने पता भी नी लग्गा कि सैह बीई काहू लूंगे कने बडे होये । 28 धरती अप्पु ई फळ दिंदी ऐ, पैहले लूंग, भिरी सिन्नै, कने सिलेयां च त्यार दाणां । 29 अपर जाहू दाणां पकी जांदा ऐ ताहू सैह तौझट दराटी चलांदा ऐ, कजोकि कटणे दा बत आई रहैआ ।”

राईया दे दाणे

(मत्ती 13 : 31-32, 34 लूका 13 : 18-19)

30 भिरी तिन्हीं ग्लाय, अहां परमात्में दे राज् दी तुलना कुस नैं करन, कने कुस उदारणे सौगी तिसदा व्यान करन? 31 सैह राईया दे दाणे साइआं ऐ जाहू जमीना बिच बाया जांदा ऐ तां जमीना दे सारे बीआं ते छोटा हुंदा ऐ, 32 अपर बाणे ते बाद, लूंगी नैं सारेयां साग - पतरां ते बडा होई जांदा ऐ, कने तिसदियां इतणियां बडियां डालियां निकळदियां हन कि अम्बरे दे पंछी भी तिसदियां छाउंआं च डेरा करी सकदे हन ।” 33 सैह तिन्हां जो एह देहय दे बडे भरी उदारण दैई नैं तिन्हां दी अक्का मताबक वचन सणांदा था । 34 कने बिना उदारण ग्लाये सैह तिन्हां जो कुच्छ नी ग्लादां था; अपर पडदे च सैह अपणे खास चेलयां जो सारियां गलां दा मतलब दसदा था ।

तफाने जो शांत करणां

(मत्ती 8 : 23-27 लूका 8 : 22-25)

35 तिस दिन जाहू संज होई, तां यीशुयें चेलयां जो ग्लाय, “ओआ, अहां झीला पार चलदे ।” 36 कने सैह भीड़ा जो छड्डी नैं जिआं सैह था, तिआं ई तिसियो किस्तिया पर सौगी लैई चले; कने तिसदे सौगी होर भी किस्तियां थियां । 37 कने झीला च बडा तूफान आया, कने लेहरां दे पाणियें नैं किस्तियां भरौणा लग्गी पैईयां । 38 पर यीशु किस्तिया दे पिछले दे हिस्से च सुतेया था । ताहू तिन्हां तिसियो जगाई नैं तिसियो ग्लाय, “हे गुरु क्या तिजो फिकर नी कि अहां खत्म होया दे हन । 39 यीशुयें उठी नैं तूफाने जो झिडकेया, कने पाणिये जो ग्लाय, “डोल रहै, रुकी जा ।” कने तूफान रुकी गैआ कने बडी शांति होई गैई । 40 कने तिन्हां जो ग्लाय, “तुहां कजो डरा दे हन? क्या तुहां जो अल्ली तिकर वसुआस नी होया?” 41 सैह बडे डरी गै कने अप्पु च ग्लाणां लग्गे; एह कुण माणु ऐ, तफाने कने पाणी भी इसदा हुकम मनदे हन

बुरिया आत्मां दे सतायेयो माणुये जो ठीक करणां

(मत्ती 8 : 28-34 लूका 8 : 26-39)

5 सैह झीला दे पारले पाससैं गिरासेनियां दे देशे च पुजे, 2 जाहू यीशु किस्तिया ते लौत्था तां ताहू ई इक्क माणु जिस च दुष्टआत्मां थी, कब्रा ते निकळी नैं तिसियो मिला । 3 सैह कब्रा च रहंदा था । कने कोई तिसियो संगला नैं भी नी बन्नी सकदा था, 4 कजोकि सैह पल्लें पल्लें बेडियां कने संगलां नैं बन्नया गैआ था, अपर तिन्हीं संगलां जो तोडी दित्ता कने बेडियां दे टोटे टोटे करी दित्तेयो थे, कने कोई तिसियो काबू च नी करी सकदा था । 5 सैह हर बग्त रात दिन कब्रां कने पहाडां पर डडदा कने अप्पु जो पत्थरां नैं जख्मी करदा था ।

6 सैह यीशु जो दूरे ते ई दिखी नैं दौंडया कने तिसियो नमस्कार कित्ता । 7 कने उचियां उआजा च डडी नैं ग्लाय, “हे यीशु परमप्रधान परमात्में दे पुत्तर तिजो मिन्जो नैं क्या कम्म? मैं तिजो परमात्में दी कसम दिंदा कि मिन्जो परेसान मत कर ।” 8 कजोकि यीशुयें तिसा बुरिया आत्मां जो ग्लाय था, “हे दुष्टआत्मां, इस माणुये ते निकळी आ ।” 9 यीशुयें तिसा बुरिया आत्मां ते पूछ्या, “तेरा नां क्या ऐ? बुरिया आत्मां ग्लाय, “मेरा नां सेना ऐ; कजोकि अहां मतिआं हन ।” 10 तिन्हीं तिस नैं बडी विणती किन्ती, “अहां जो इस देशे ते बाहर मत घल्ल ।

11 तिन्हु पहाडे पर मते सूअर चुगा दे थे । 12 तिन्हां तिस नैं विणती करी नैं ग्लाय, “अहां जो इन्हां सूअरां च घल्ली दैआ कि अहां तिन्हां दे अंदर जाई सकन ।” 13 तिन्हीं तिन्हां जो हुकम दित्ता कने दुष्टआत्मां निकळी नैं सूअरां अंदर समाई गैई, कने सूअर, जेहडे दो हजार थे खडिया भेठी ते रिडकी नैं झीला च जाई पैआ कने डूबी मरया ।

14 तिन्हां दे चरवाहे नठी नैं सैहरे च कने ग्रांऐ च एह खबर सणाई, कने जेहडा होया था, लोक तिसियो दिखणां आये । 15 यीशु अल्ल आई नैं सैह तिस जो जिस च दुष्टआत्मां थियां, मतलब जिस च सेणा समाईयो थी, कपडे पैहणेयो कने ठीक हालता च बैठयो दिखी नैं डरी गै । 16 दिखणे आळेयां तिसदा जिस च दुष्टआत्मां थियां, कने सूअरां दा पूरा हाल तिन्हां जो सणाई दित्ता । 17 ताहू माणु यीशु नैं विणती करी नैं ग्लाणां लग्गे कि अहां दे लाके ते चली जा ।

18 जाहू यीशु किस्तिया पर चढणा लग्गा तां सैह जिस च पैहले ते दुष्टआत्मां थियां, तिस नैं विणती करणां लग्गा, “मिन्जो अप्पु सौगी रहणां दैआ ।” 19 अपर तिन्हीं तिसियो हुकम दित्ता, कने तिसियो ग्लाय, “अपणे घरें जाई नैं अपणे लोकां जो दस्स कि तिजो पर दया करी नैं प्रभुयें तिजो तांई केदेय बडे कम्म कित्ते हन । 20 भिरी सैह जाई नैं कने दिकापुलिस सैहरे च इसा गला दा प्रचार करणां लग्गा कि यीशुयें मिन्जो बासती केदेय बडे कम्म कित्ते । कने सारे माणु हैराण होये ।

याईरे दी मरियो कुडी कने इक्क बमार जणांस

(मत्ती 9 : 18-26 लूका 8 : 40-56)

21 जाहू यीशु भिरी किस्ती च पारेयो गैआ, तां इक्क बडी भीड तिस अल्ल कडरोई गैई । सैह झीला दे कंडे था कि 22 याईरे नांये दा आराधनालय दे सरदारां च इक्क सरदार आया, कने यीशु जो दिखी नैं पैरां पैईया, 23 कने एह ग्लाई नैं तिस नैं बडी विणती किन्ती, “मेरी लोक्की कुडी मरणा लगियो; तू आई नैं तिसा पर हत्थ रख, कि सैह ठीक होई नैं जिदा रहै ।” 24 ताहू ई यीशु तिस सौगी चली पैआ कने इक्क बडी भरी भीड तिसदे पचांइ चली पैई, ऐत्थू तिकर कि माणु तिस परालें पैई जांदे थे । 25 तिन्हु इक्क जणांस थी, जिसा जो बाराह साल ते खून चलणे दी बमारी थी । 26 तिन्हे मतेयां वैधां ते मते दुख झेलयो थे, कने अपणियां सारियां चीजां जो बेची नैं तिसायो कोई फर्क नी पैआ था, अपर सैह होर जादा बमार होई गैईयो थी । 27 सैह यीशु दी चर्चा सुणी नैं भीडा च तिसदे पचांइ ते आई कने तिसदे कपडेयां जो छुई लैआ, 28 कजोकि सैह ग्लांदा थी, “जे मैं तिसदे कपडे जो ई छुई लैंगी तां ठीक होई जांगी ।” 29 कने ताहू ई तिसादा खून चलणां बंद होईया, कने तिन्हे अपणे शरीरे ते मसूस करी लैआ कि मैं इसा बमारिया ते ठीक होई गैईयो । 30 यीशुयें ताहू ई अप्पु च जाणी लैआ कि मिन्जो ते सामर्थ निकळी ऐ, कने पचांइ मुडी नैं भीडा जो पूछ्या, “मेरे कपडे कुणी छूत्ते?” 31 तिसदे चेलयां तिसियो ग्लाय, “तू दिखा दा ऐ कि भीड तिजो पराले चढी चलियो ऐ, कने तू ग्लांदा कि

मिन्जो कुणी छुत्ता?" 32 ताहू तिन्हीं तिसियो दिखणे ताई जिन्हीं एह कम्म कित्या था, चौनी पाससें नजर घुमाई। 33 ताहू सैह जणांस एह जाणी गैई कि मिन्जो नैं केदेया भला होया ऐ, डरदी कने कमदी होई तिसदेयां पैरां पैई नैं तिसियो सारा हाल सच सच सणांई दिता। 34 यीशुयें तिसायो ग्लया, "बचा, तेरे बसुआसें तिज्जो ठीक कित्ता ऐ खुशिया नैं जा, कने अपणिया इसा बमारिया ते बची रैह।"

35 सैह एह गल्ल ग्लादा था कि आराधनालय दे सरदारे दे घरे ते लोकां आई नैं ग्लया, "तेरी कुडी तां मरियो, हुण गुरु जो कजो तकलीफ दै दा ऐ?"

36 जेहडी गल्ल सैह ग्लादे थे, तिसा जो यीशुयें अणसुणी करी नैं आराधनालय दे सरदारे जो ग्लया, "मत डर; सिर्फ बसुआस रख।" 37 कने तिन्हीं पतरस कने याकूब कने याकूबे दे भाऊये यूहन्ने जो छड्डी, होर कुसी जो अपणे सौगी ओणा नी दिता। 38 आराधनालय दे सरदारे दे घरे पुज्जी नैं, यीशुयें लोकां जो बडे रोदे कने डडदे दिख्या। 39 ताहू यीशुयें अंदर जाई नैं तिन्हां जो ग्लया, तुहां कजो रौला पा दे कने रौया दे हन। कुडी मरियो नी ऐ, अपर सुतियो ऐ।" 40 माणु तिसदा मजाक डुआणां लगे, पर तिन्हीं सारेयां जो बाहर कडडी नैं कुडिया दे माऊ बडे कने अपणे साथियां सौगी अंदरेयो, जित्थू कुडी पैइयो थी, गैआ। 41 कने कुडिया दा हत्थ पकडी नैं तिसा जो ग्लया, "तलीता कूमी।" जिसदा मतलब ऐ, "हे कुडी, मैं तिज्जो ग्ला दा, उठ।" 42 कने कुडी ताहू उठी नैं चलणां फिरणां लगी पैई; कजोकि सैह कुडी बारां सालां दी थी। इसा गला पर माणु बडे हैरण होई गै। 43 भिरी तिन्हीं तिन्हां जो समझाई करी हुक्म दिता कि एह गल्ल कुसियो पता ना लग्गे कने ग्लया, इसायो कुच्छ खाणे जो दैआ।

नासरत सैहरे च यीशु मसीह दा अपमान

(मत्ती 13 : 53-58 लूका 4 : 16-30)

6 औत्थू ते निकळी नैं सैह अपणे देशे च आया, कने तिसदे चले भी तिसदे पचाह आये। 2 सब्त दे दिन सैह आराधनालय च शिक्षा दैणां लग्गा, कने बडे माणु सुणी नैं हैरण होये कने ग्लाणां लगे, "इसियो एह गलां कुत्थू ते आई गैइआ? एह कुण दैआ ज्ञान ऐ जेहडा इसियो दित्या ऐ? सामर्था दे कम्म किआं इसदे हत्था ते होदे हन।" 3 क्या एह सैई मिस्त्री नी, जेहडा मरियम दा पुत्तर, कने याकूबे, योससे, यहूदा कने शमौने दा भाऊ ऐ? क्या तिसदियां बेहणी अहां सौगी नी रैह्दिया?" इसताई तिन्हां तिसदे बारे च ठोकर खादी। 4 यीशुयें तिन्हां जो ग्लया, "भविष्यवक्ता दा अपणे देश, कने अपणे साथियां, कने अपणे घरे जो छड्डी नैं कुत्थी भी अपमान नी हुंदा।" 5 सैह तित्थू कोई सामर्था दा कम्म नी करी सकेया, सिर्फ थोडे दे बमारां पर हत्थ रखी नैं तिन्हां जो ठीक कित्ता।

6 कने सैह तिन्हां दे वेवसुआसे पर हैरण होया, कने सैह चौनी पाससे दे प्रां च शिक्षा दिंदा रैह्आ।

बारां चेलयां जो घल्लणां

(मत्ती 10 : 5-15 लूका 9 : 1-6)

7 तिन्हीं बारां चेलयां जो अप्पु अल्ल सदयेया कने तिन्हां जो दो दो करी नैं घल्लणां लग्गा; कने तिन्हां जो दुष्टआत्मां पर हक्क दिता। 8 तिन्हीं तिन्हां जो हुक्म दिता, "रस्ते ताई सोठिया छड्डी नैं होर कुच्छ मत लैआ; ना तां रोटी, ना झोली, ना तां बटुये च पैसे, 9 अपर जूत्तियां पैहना कने दो दो कुरते मत पैहना।" 10 कने तिन्हीं तिन्हां जो ग्लया, जित्थू कुत्थी तुहां कुसी घरे च रैहन, तां जाहू तिकर तित्थू ते तुहां जान नी। ताहू तिकर तिसी घरे च रैह्आ। 11 जिसा जगाह दे माणु तुहां दा सुआगत नी करन कने तुहां दी नी सुणन, औत्थू ते निकळदे ई अपणे पैरां दिया धूडा झाडी दैआ कि तिन्हां पर गवाही होयें। 12 ताहू तिन्हां जाई नैं एह प्रचार कित्ता कि मने जो बदला, 13 कने मतेआं दियां दुष्टआत्मां जो कडेया, कने मतेआं बमारां पर तेल मळी नैं तिन्हां जो ठीक कित्ता।

यूहन्ना बपतिस्मा दैणेआळे दी हत्या

(मत्ती 14 : 1-12 लूका 9 : 7-9)

14 हेरोदेस राजें भी यीशु दी चर्चा सुणी, कजोकि तिसदा नां सारे पाससें फैलिया था, कने तिन्हीं ग्लया, "यूहन्ना बपतिस्मा दैणे आळा मरयेयां ते जिंदा होईया ऐ इसताई तिसते एह सामर्था दे कम्म प्रकट होदे हन।" 15 होरनी

लोकां ग्लया, "एह एलियाहा ऐ।" अपर कुच्छना लोकां ग्लया, "भविष्यवक्ता या भविष्यवक्तां च कुसी इक्की साइआं ऐ।" 16 हेरोदेसें एह सुणी नैं ग्लया, "जिस यूहन्ने दा सर मैं कटवाया था, सैह जिंदा होईया ऐ।" 17 हेरोदेसें अपणे भाऊ फिलिपुस दी लाडी हेरोदियास दिया बजाह ते, जिसा नैं तिन्हीं व्याह करी लैआ था, सपाईयां जो घल्ली नैं यूहन्ने जो पकडुआई नैं जेला च पाई दित्या था; 18 कजोकि यूहन्ने हेरोदेसें जो ग्लया था, "अपणे भाऊये दिया लाडिया जो रखणां तिज्जो ताई ठीक नी ऐ।" 19 इसताई हेरोदियास तिस नैं बेर रखदी थी कनेएह चाहंदी थी कि तिसियो मरुआवई दै; अपर इआं नी होई सकेया। 20 कजोकि हेरोदेस यूहन्ने जो धर्मी कने पवित्र माणु जाणी नैं तिसते डरदा था, कने तिसदी हिफाजत करदा था, कने तिसदियां गलां सुणी नैं बडा डरदा था, अपर तिन्हां जो खुशिया नैं सुणदा था।

21 ठीक मौका आया जाहू हेरोदेसें अपणे जन्म दिने च अपणे प्रधानां, कने सेणांपतियां जो, कने गलीले दे बडे बडे लोकां ताई धाम लगाई। 22 तां हेरोदियासे दी कुडी अंदर आई, कने नची नैं हेरोदेसें जो कने तिस सौगी बैठणे आलेयां जो खुश कित्ता। ताहू राजें कुडीया जो ग्लया, "तू जेहडा चाहंदी मिन्जो ते मंग मैं तिज्जो दिंगा।" 23 भिरी हेरोदेसें कुडिया जो कसम दैई नैं ग्लया, "मैं अपणे आधे राज्ज तिकर जै कुच्छ तू मिन्जो ते मंगी मैं तिज्जो दिंगा।" 24 तिन्ने बाहर जाई नैं अपणिया माऊ ते पूछ्या, "मैं क्या मंगे?" सैह ग्लई, "यूहन्ना बपतिस्मा दैणे आळे दा मुंड।" 25 सैह झट पट राजे अल्ल अंदर आई कने तिस नैं विणती कित्ती, "मैं चाहदी ऐ कि तू हुण ई यूहन्ना बपतिस्मा दैणे आळे दा मुंड इक्की थालिया च मिन्जो मंगुआई दै।" 26 ताहू राजा बडा दखी होया, अपर अपणियां कसमा दिया बजाह कने सौगी बैठणे आळेयां दिया बजाह नी तिसायो टाली नी सकेया। 27 राजें ताहू ई इक्क सपाहिये जो हुक्म दैई नैं घल्ल्या कि यूहन्ने दे मुंडे जो कटी लैयो। 28 तिन्हीं जेलखाणे च जाई नैं तिसदा मुंड कटया, कने इक्की थालिया च रक्खी नैं लैई अंदा कने कुडिया जो दिता, कने कुडिया अपणिया माऊ जो दैयी दिता। 29 एह सुणी नैं यूहन्ने दे चले आये, कने तिसदिया लाशा जो लैयी गै कने कब्र च रखया।

चेलयां दा वापस ओणां कने सुनसाण जगाह च वास

(मत्ती 14 : 13,14, लूका 9 : 10)

30 खास चेलयां यीशु अल्ल कडुरोई नैं, जेहडा कुच्छ तिन्हां कित्या कने रखया था, सारा तिसियो दसया। 31 तिन्हीं तिन्हां जो ग्लया, "तुहां अप्पु ई लग्गा कुसी सुनसाण जगाह च चली नैं थोडा अराम करा।" कजोकि तित्थू मते माणु ओदे जांदे थे, कने तिन्हां जो खाणे दा मौका भी नी मिलदा था। 32 इसताई सैह किस्तिया पर चढी नैं, सुनसाण जगाह जो पडदे नैं चली गै।

पंज हजार माणुआं जो खुआणां

(मत्ती 14 : 15-21, लूका 9 : 11-17, यूहन्ना 6 : 1-14)

33 मतेआं लोकां तिन्हां जो जांदे दिखी नैं पणछेणी लैआ, कने सारे सैहरां ते कडुरोई नैं तित्थू ते पैदल दौडे कने तिन्हां ते पैहले जाई पुजे। 34 तिन्हीं उतरी नैं बडी भीड़ दिखी, कने तिन्हां पर तरस खादा; कजोकि सैह तिन्हां भेडां साइआं थे, जिन्हां दा कोई चरवाहा ना हो; कने सैह तिन्हां जो बडियां गलां सखाणां लग्गा।

35 जाहू दिन घरुणां लग्गा, तां तिसदे चले तिस अल्ल आई नैं ग्लाणां लगे, "एह सुनसाण जगाह ऐ, कने दिन घरुणां लगेया ऐ।" 36 लोकां जो जाणां दै कि चौनी पाससे दे ग्रां कने बस्तियां च जाई करी, अपणे ताई कुच्छ खाणे जो खरीदी लैन। 37 यीशुयें जबाब दिता, "तुहां ई इन्हां जो खाणे जो दैआ।" तिन्हां तिसियो ग्लया, "क्या अहां सो दीनार दी रोटियां खरीदन, कने इन्हां जो खुआन?" 38 तिन्हीं तिन्हां जो ग्लया, "जाई नैं दिखा तुहां अल्ल कितणियां रोटियां हन?" तिन्हां पता करी नैं ग्लया, पंज कने दो मछियां हन।"

39 भिरी यीशुयें तिन्हां जो हुक्म दिता, "कि सारेयां माणुआं जो सैले घाहे पर लैणी च बैठयाळी दैआ।" 40 सैह सौ सौ कने पंजा - पजा करी नैं लैणी च बैई गै। 41 तिन्हीं तिन्हां पंजा रोटियां जो कने दू मछियां जो लैआ, कने सुअर्गे दे पाससेयो दिखी नैं धन्यावाद कित्ता, कने रोटियां तोडी - तोडी नैं चेलयां जो दिंदा गैआ कि सैह लोकां जो बंडन, कने सैह दो मछियां भी तिन्हां सारेयां जो बंडी दितियां। 42 सारे खाई नैं रज्जी गै, 43 कने तिन्हां टुकडेयां दे

बारा टोकरु भरी नैं चुक्रे, कने कुच्छ मछियां दे भी । 44 जिन्हां रोटियां खादियां, सैह पंज हजार मरद थे ।

यीशु मसीह दा पाणिजे ऊपर चलणां (मत्ती 14 : 22-33; यूहन्ना 6 : 15-21)

45 यीशुयें ताहू ई अपणे चेलयां जो किस्तिया च बैठाई नैं बैतसैदा शैहरे जो घल्ली दित्ता, जेहड़ा गलील झीला दे पारले पास्से था, कने लोकां जो भी घल्लणां लग्गा । 46 लोकां जो कने चेलयां जो घल्ली करी सैह प्रार्थना करणे ताई प्हाडियां पर चली गैआ । 47 जाहू संज होई. तां किस्ती झीला दे बिच थी, कने सैह अप्पु जमीना पर था । 48 जाहू तिन्हीं दिख्या कि चले बड़े घबराई गैयो हन, कजोकि हौआ तिन्हां दे बरखलाफ थी, तां आधिया राती दे बाद सैह झीला पर चली करी तिन्हां अल्ल आया: कने तिन्हां ते गांह निकळी जाणां चाहंदा था । 49 अपर तिन्हां तिसियो झीला पर चलदे दिखी नैं समझया कि भूत ऐ, कने डडी पै; 50 कजोकि सारे तिसियो दिखी नैं डरी गैयो थे । अपर तिन्हीं ताहू तिन्हां नैं गल्लां कित्तियां कने ग्लया, हौंसला रक्खा में ऐ; डरा मत । 51 ताहू सैह तिन्हां अल्ल किस्तिया पर आया, कने हौआ रुकी गैई कने चले बड़े हैराण होई गै । 52 सैह तिन्हां रोटियां दे बारे च नी समझे थे, कजोकि तिन्हां दे मन कठोर होई गैयो थे ।

गन्नेसरते सैहरे च बमारां जो ठीक करणां (मत्ती 14 : 34-36)

53 सैह पार उत्तरी नैं गन्नेसरत जगाह च पुजे, कने किस्ती कंडे खरेडी । 54 जाहू सैह किस्तिया ते उतरे तां लोकां ताहू तिसियो पणछेणी नैं, 55 अक्खे - बक्खे दे सारे लाक्रे च दौड़े, कने बमारां जो मजोलयां पर पाई नैं जित्थू जित्थू खबर सुणी कि यीशु ऐ, तित्थू तित्थू लैई नैं गै । 56 कने जित्थू - कुत्थी सैह ग्रा, शैहरा, या बस्तिया च जांदा था, माणु बमारां जो बजारां च रक्खी नैं तिस नैं विणती करदे थे कि सैह तिन्हां जो अपणे कपड़े दे पल्लू ई जो छूणां दें : कने जितणे तिसियो छूंदे थे, सारे ठीक होई जांदे थे ।

रीति रुआजां जो मनणे दा सबाल (मत्ती 15 : 1-9)

7 ताहू फरीसी कने कुच्छ शास्त्री जेहडे यरुशलेम ते आयेयो थे, तिस अल्ल कडरोई गै । 2 कने तिन्हां तिसदेयां कुच्छ चेलयां जो बिना हत्थां धोतेयो रोटी खांदे दिख्या । 3 कजोकि फरीसी कने सारे यहूदी, पुरखां देयां रीति रुआजा पर चलदे हन, कने जाहू तिकर खरी कित्ते हत्थां नी धोई लेंदे ताहू तिकर नी खादें; 4 कने बजारे ते आई नैं, जाहू तिकर न्होई नी लेंदे, ताहू तिकर खाणां नी खादें; कने मतिआं होर गल्लां हन, जेहड़ियां तिन्हां अल्ल मनणे ताई हन, जिआं कटोरेयां, कने लोटयां, कने तांबे दे भाडेयां जो धोणां कने मांजणा । 5 इसताई तिन्हां फरीसियां कने शास्त्रियां तिसते पूछ्या, “तेरे चले पुरखां दे रीति रुआजां पर कैनी चलदे, कने बिना हत्थां धोत्तयां रोटी कजो खादे हन । 6 तिन्हीं तिन्हां जो ग्लया, “यशयाह तुहां डोगियां दे बारे च बडी ठीक भविष्यवाणी कित्तियो; जिआं लिख्या भी ऐ; ‘एह माणु मुमें नैं तां मेरा आदर करदे हन, अपर इन्हां दा मन मिन्जो ते दूर रैहंदा ऐ ।

7 एह बेकार च मेरी भक्ति करदे हन, कजोकि माणुआं दे हुक्मां जो शिक्षा बणाई नैं सखादें हन ।

8 कजोकि तुहां परमात्में दे हुक्मां जो छडडी नैं माणुआं देयां रीति रुआजां जो मनदे हन । 9 तिन्हीं तिन्हां जो ग्लया, “तुहां अपणे रीति रुआजां जो मनणे ताई परमात्में दे हुक्मां जो किआं सफाइया नैं टाली दिंदे हन । 10 कजोकि मूसें ग्लया ऐ, ‘अपणे बुड़े कने माऊ दा आदर कर;’ कने जेहड़ा कोई बुड़े कने माऊ जो बुरा ग्लांगा, सैह जरूर जान्नी ते मारी दित्ता जांगा ।’ 11 अपर तुहां ग्लांदे हन जे कोई अपणे माऊ - बुड़े जो ग्लां, जेहड़ा कुच्छ तिज्जो मिन्जो ते फायदा होई सकदा था, सैह तां में परमात्में जो भेंट चढाई दित्या ऐ । 12 तां तुहां तिस जो तिसदे बुड़े कने तिसदिया माऊ दी कुच्छ सेवा करणां नी दिंदे । 13 इआं करी नैं तुहां अपणे रीति रुआजां ते, जिन्हां जो तुहां बणाया ऐ, परमात्में दे वचने जो टाली दिंदे हन; कने देय देय तुहां होर मत्ते कम्म करदे हन ।”

माणुये जो शुद्ध कने अशुद्ध करणेआळियां गल्लां (मत्ती 15 : 10-20)

14 ताहू तिन्हीं लोकां जो अपणे अल्ल सददी नैं तिन्हां जो ग्लया, “तुहां सारे मेरी सुणा, कने समझा । 15 ऐदेई कोई चीज नी ऐ जेहड़ी बाहरे ते आई नैं भरिष्ठ करे; अपर जेहड़ियां गल्लां माणुये दे अंदर ते निकळदियां हन, सैह ई तिसियो भरिष्ठ करदियां हन । 16 [जे कुसी दे कनं होन तां कनां खोली सुणी लैन ।] 17 जाहू सैह भीड़ा ते निकळी नैं घरेयो गैआ, तां तिसदेयां चेलयां इस उदारणे दे बारे च तिसते पूछ्या । 18 तिन्हीं तिन्हां जो ग्लया, “क्या तुहां भी नासमझ हन? क्या तुहां नी जाणदे कि जेहड़ी चीज बाहरे ते माणुये दे अंदर जांदी ऐ, सैह तिसियो भरिष्ठ भी करी सकदी? 19 कजोकि सैह तिस दे मने च नी, अपर पेटे च जांदी ऐ कने संडास च निकळी जांदी ऐ? एह ग्लाइं नैं तिन्हीं सारियां खाणे दियां चीजां जो शुद्ध ठेहराई दित्ता । 20 भिरी तिन्हीं एह भी ग्लया, “जेहड़ा बुरा माणुआं दे अंदरे ते निकळदा ऐ, सैही माणु जो बुरा करदा ऐ । 21 कजोकि अंदरे ते, माणु दे मने ते बुरे बुरे वचार, व्यभिचार, चोरी हत्या, परस्त्रीगमन, 22 लोभ, दुष्टता, छल, लुचपन, कुदृष्टि, निंदा, कमंड, कने मुखता निकळदी ऐ । 23 एह सारियां बुरिआं गल्लां अंदरे ते ई निकळदियां हन कने माणु जो भरिष्ठ करदियां हन ।”

सुरुफिनीकी जाति दी जणांसा दा वसुआस (मत्ती 15 : 21-28)

24 भिरी सैह औत्थू ते उठी नैं ‘सूर’ कने ‘सैदा’ दे देशां च आया; कने इक्की घरे च गै कने चाहंदा था कि कुसी जो पता नी लग्गे; अपर भिरी भी लोकां जो तिसदे बारे च पता लग्गी जांदा था । 25 कने ताहू ई इक्क जणांस जिसा दिया लोकिया कुडिया च दुष्टआत्मां थी, तिसदे बारे च सुणी नैं आई कने तिसदेयां पैरां पैई गैई । 26 एह जणांस यूनानी कने सुरुफिनीकी जाति दी थी । तिन्हीं तिस नैं विणती कित्ती कि मेरिया कुडिया ते बुरिया आत्मां जो कड्डी दै । 27 तिन्हीं तिसायो ग्लया, “पैहले बच्चेयां जो रजणा दै, कजोकि बच्चेयां दी रोटी लैई नैं कुत्तेयां दे गांह पाणां ठीक नी ऐ । 28 तिन्हीं तिस जो जबाब दित्ता, “एह सच ऐ प्रभु; तमी कुत्ते भी तां मेजे थलै पैयो बच्चेयां दी रोटियां दे टुकडेयां जो खाई लेंदे हन । 29 तिन्हीं तिसायो ग्लया, “इसा गल्ला दिया बजाह ते तू अपणे घरे जो चली जा; तेरिया कुडिया ते दुष्टआत्मां निकळी गैइयो ऐ ।” 30 तिन्हीं अपणे घरे आई नैं दिख्या कि कुडी मजोलूये पर पैइयो ऐ, कने दुष्टआत्मां निकळियो ऐ ।”

टौणे कने हकलेमाणु जो ठीक करणां

31 भिरी सैह सूर कने सैदा दे देशां ते निकळी नैं दिकापुलिस देशे च होई नैं गलीले दिया झीला पर आई पुजा । 32 तां लोकां इक्की टौणे जो जेहड़ा रुकी रुकी नैं ग्लांदा था, तिस अल्ल अणी करी तिस नैं विणती कित्ती कि अपणां हत्थ तिस पर रखा । 33 ताहू सैह तिस जो भीड़ा ते लग्ग लैई गैआ, कने अपणियां उंगलियां तिसदेयां कनां च पाईयां, कने थूकी नैं तिसदिया जीभा जो छुत्ता; 34 कने सुअर्गे बक्खी दिखी नैं बड़ा डुगा शाह भरेया, कने तिसियो ग्लया, “इप्पतह !” मतलब खुली जा । 35 तिसदे कनं खुली गै कने तिसदिया जीभा दी गठ भी खुली गैई, कने सैह साफ साफ ग्लाणां लग्गी पैआ । 36 ताहू तिन्हीं तिन्हां जो हुक्म दैई नैं समझाया कि कुसी नैं मत ग्लांदे; अपर जितणां तिन्हीं तिन्हां जो समझाया उतणा ई सैह होर प्रचार करणां लग्गे । 37 सैह बड़े ई हैराण होई नैं ग्लाणां लग्गे, “तिन्हीं जे किच्छ कित्या सैह सारा बधिया कित्या ऐ; दिखा; सैह टौणेयां जो सुणने दी, कने गूंगयां जो ग्लाणे दी ताकत दिंदा ऐ ।”

चार हजार माणुआं जो खुआणां (मत्ती 15 : 32-39)

8 तिन्हां दिना जाहू भिरी बडी भीड़ कडरोई, कने तिन्हां अल्ल खाणे जो कुच्छ नी था, तां यीशुयें अपणेयां चेलयां जो अप्पु अल्ल सददी नैं ग्लया, 2 “मिन्जो इसा भीड़ा पर तरस ओआ दा ऐ, कजोकि एह त्रीं दिना ते मिन्जो सौगी हन, कने इन्हां अल्ल कुच्छ भी खाणे जो नी ऐ । 3 जे में इन्हां जो भूखे पेट घरे जो घल्ली देयां, तां इन्हां ते घरे नी पुज्जी होणां; कजोकि कुच्छ

माणु बड़ी दूर ते आययो हन ।" 4 तिसदे चेलयां तिस जो जबाब दित्ता, ऐत्थू बणे च इतणियां रोटियां दा इंतजाम कुन्थू ते होई सकदा ऐ, कि एह रज्जी नैं खान?" 5 तिन्हीं तिन्हां ते पूछ्या, "तुहां अल्ल कितणियां रोटियां हन?" तिन्हां ग्लया, "सत ।"

6 ताहू यीशुयें लोकां जो हुक्म दित्ता कि सारे भुइआं बैई जा, कने सैह सत रोटियां लैइआ कने धन्यावाद करी नैं तोडियां, कने अपणे चेलयां जो दिंदा गैआ कि सैह लोकां जो बंड दे जान । 7 तिन्हां अल्ल थोडियां दियां लोक्रियां लोक्रियां मछियां भी थियां; तिन्हीं धन्यावाद करी नैं ग्लया इन्हां जो भी बंड दे जा । 8 सैह खाई नैं रज्जी गै कने चेलयां बचेयो टुकडेयां दे सत टोकरु भरी नैं चुके । 9 कने माणु चार हजार तिकर थे; ताहू तिन्हीं तिन्हां जो अपणे अपणे घरां जो घल्ली दित्ता, 10 कने ताहू ई सैह अपणे चेलयां सौगी किस्तिया पर चढी नैं दलमनूता प्रदेशे जो चली गैआ ।

फरीसियां दे दुआरा सुअर्गीय नशाणे दी मांग

(मत्ती 16 : 1-4)

11 भिरी फरीसी आई नैं तिस नैं सुआल जबाब करणां लगे, कने तिसियो परखणे ताई तिसते सुअर्गीय नशाण मंगया । 12 तिन्हीं अपणियां आत्मां च दुगा शाह भरी नैं ग्लया, इस जमाने दे माणु कजो नशाण तोपादे हन? मैं तुहां नैं सच ग्लांदा कि इस जमाने दे लोकां जो कोई नशाण नी दित्ता जाणां । 13 कने यीशुयें तिन्हां जो छड्डी नैं भिरी किस्तिया पर चढी नैं झीला पार चली गैआ ।

फरीसियां कने हेरोदेसे दा खमीर

(मत्ती 16 : 5-12)

14 चले रोटी लैणां भूली गैयो थे, कने किस्तिया च तिन्हां अल्ल इक्क ई रोटी थी । 15 तिन्हीं तिन्हां जो हुक्म दैई नैं समझाया, "दिखा, फरीसियां दे खमीरे ते कने हेरोदेसे दे खमीरे ते चुकनै रैहआ ।" 16 सैह अप्पु च सोच वचार करी नैं ग्लांणा लगे, "अहां अल्ल रोटी नी ऐ ।" 17 एह जाणी नैं यीशुयें तिन्हां जो ग्लया, "तुहां कजो अप्पु च एह वचार करा दे हन कि अहां अल्ल रोटी नी ऐ? क्या तुहां अल्ली तिकर भी नी जाणदे कने नी समझदे? क्या तुहां दा मन कठोर होई गैआ ऐ?" 18 क्या तुहां अंखी होंदेया भी कने कनां होंदेया भी नी सुणदे कने तुहां जो याद नी ऐ । 19 कि जाहू मैं पंजा हजारं ताई पंज रोटियां तोडियां थियां तां तुहां टुकडेयां दे कितणे टोकरु भरी नैं चुके?" तिन्हां तिसियो ग्लया, "बाराह टोकरु ।" 20 "कने जाहू चौं हजारं ताई सत रोटियां थियां तां तुहां टुकडेयां दे कितणे टोकरु भरी नैं चुकेयो?" तिन्हां तिसियो ग्लया, "सत टोकरु ।" 21 तिन्हीं तिन्हां जो ग्लया, "क्या तुहां अल्ली भी नी समझी सके?"

बैतसदा सैहरे च इक्की अन्ने जो ठीक करणां

22 सैह बैतसदा सैहरे च आये; तां माणु इक्की अन्ने जो तिस अल्ल लैई नैं आये कने विणती किती कि तिस जो छुये । 23 यीशुयें तिस अन्ने दा हत्थ पकड़ी नैं तिसियो ग्रांए दे बाहर लैई गैआ, कने तिसदियां अंखी च थूकी नैं तिस पर हत्थ रखया, कने तिसते पूछ्या, "क्या तिज्जो कुच्छ दुस्सा दा ऐ?" 24 तिन्हीं अंखी खोली नैं ग्लया, "मैं माणुआं जो दिखा दा; सैह मिन्जो चलदे रुखां साइआं दुस्सा दे हन ।" 25 ताहू तिन्हीं फिरी तिसदियां अंखी पर हत्थ रखया, कने अन्ने जो ध्याने नैं दिख्या । सैह ठीक होईया, कने अन्ने जो सब कुच्छ साफ साफ दुस्सणां लगी पैआ । 26 तिन्हीं तिसियो एह ग्लाइ नैं घल्लया, "इस ग्रांए अंदर पैर भी मत पांदा ।"

पतरसे दा यीशु जो मसीह स्वकार करणां

(मत्ती 16 : 13-20; लूका 9 : 18-21)

27 यीशु कने भिरी तिसदे चले कैसरिया फिलिप्पी दे ग्रांए जो चली गै । रस्ते च तिन्हीं अपणे चेलयां ते पूछ्या, "माणु मिन्जो क्या ग्लांदे हन?" 28 तिन्हां जबाब दित्ता, "कई तां तुहां जो यूहन्ना बपतिस्मा दैणे आळा; अपर कई एलिय्याह कने कई तां भविष्यवक्ता ग्लांदे हन ।" 29 तिन्हीं तिन्हां जो पूछ्या, "अपर तुहां मिन्जो क्या ग्लांदे हन?" पतरसें जबाब दित्ता, "तुहां तां

मसीह हन ।" 30 ताहू तिन्हीं तिन्हां जो हुक्म दैई नैं ग्लया कि मेरे बारे च एह कुसी नैं मत ग्लांदे ।

अपणियां मौती दी भविष्यवाणी

(मत्ती 16 : 21-23; लूका 9 : 22)

31 ताहू यीशु तिन्हां जो सखाणां लग्गा कि माणुये दे पुत्रे ताई जरूरी ऐ कि सैह बड़ा दुख झेलगा, कने स्याणे कने प्रधान याजक, कने शास्त्री तिसियो नीच समझी नैं मारी दैणां, कने सैह त्रीं दिनां बाद भिरी जिंदा होई जांगा । 32 तिन्हीं एह गल्ल तिन्हां जो साफ साफ दस्सी दिती । इसा गल्ला पर पतरस तिसियो पडदे नैं झिड़कणां लग्गा । 33 अपर तिन्हीं मुड़ी नैं अपणे चेलयां दे पाससे दिख्या, कने पतरसे जो झिड़की नैं ग्लया, हे सैतान, मेरे सामणे ते दूर होई जा कजोकि तू परमात्में दियां गल्लां पर नी, अपर माणुआं दियां गल्लां पर मन लगांदा ऐ ।"

यीशु मसीह दे पचांह चलणे दा मतलब

(मत्ती 16 : 24-28; लूका 9 : 23-27)

34 तिन्हीं भीड़ा जो कने चेलयां जो अपणे अल्ल सददी नैं तिन्हां जो ग्लया, "जेहडा कोई मिन्जो पचांह औणां चाहंदा ऐ, सैह अपणे आप्पे ते मना करें कने अपणियां सूलिया चुकी नैं, मेरे पचांह चली पौयें ।" 35 कजोकि जेहडा कोई अपणी जात्र बचाणां चाहंदा तिन्हीं जात्र गुआणी, अपर जेहडा कोई मिन्जो ताई कने सुसमाचार ताई अपणी जात्र गुआणी, तिन्हीं तिसा जात्री जो बचाणां । 36 जे माणु सारे संसारे जो हासल करें कने अपणे प्राणा जो गुआं, तां तिसियो क्या फायदा हुंगा? 37 माणु अपणे प्राणा दे बदले क्या दिंगा? 38 जेहडा कोई इस व्यभिचारी कने पापी पीढी दे बिच मिन्जो ते कने मेरियां गल्लां ते सरमांगा, तां माणुये दा पुत्र भी जाहू सैह पवित्र दूतां कने अपणे पिता दी महिमा सौगी आंगा, ताहू तिसते भी सरमांगा ।

9 यीशुयें तिन्हां जो ग्लया, "मैं तुहां नैं सच ग्लांदा कि जेहडे ऐत्थू खडुट्यो हन तिन्हां च कोई कोई ऐदेय भी हन, कि जाहू तिकर परमात्में दे राजे जो सामर्था च औंदेयां दिखी नी लैन ताहू तिकर मौती दा सुआद कदी नी चखणे ।"

यीशु मसीह दा रूप बदली जाणां

(मत्ती 17 : 1-13; लूका 9 : 28-36)

2 छिं दिनां बाद यीशु पतरस कने याकूब, कने यूहन्ने जो सौगी लैआ, कने इक्क सुनसाण उचे पहाड़े पर लैई गैआ । औत्थू तिन्हां सामणे तिसदा रूप बदली गैआ, 3 कने तिसदे कपडे ऐदेय चमकणां लगे कने इतणे चीट्टे होये कि धरतिया दा धोबी इतणे चीट्टे नी करी सकदा था । 4 कने तिन्हां जो मूसे सौगी एलिय्याह दुस्सया; सैह यीशुये नैं गल्लां करा दे थे । 5 एह सब दिखी करी पतरसें यीशु जो ग्लया, "हे रब्बी अहां दा ऐत्थू रैहणां ठीक ऐ; इसताई अहां तीन डेरे बणाई लेंदे; इक्क तुहां ताई, इक्क मूसा ताई, कने इक्क एलिय्याह ताई ।" 6 कजोकि पतरस नी जाणदा था कि क्या जबाब दें, इसताई कि सैह बडे डरेयो थे । 7 ताहू इक्की बदलें तिन्हां जो ढकी लैआ, कने तिस बदळे च एह उआज आई, "एह मेरा प्यारा पुत्र ऐ, इसदी सुणां ।" 8 ताहू तिन्हां चाणचक चौंनी पाससेयां नजर फेरी, कने यीशु जो छड्डी होर कुसी जो नी दिख्या ।

9 पहाड़े ते लौंदिया बेला यीशुयें तिन्हां जो हुक्म दित्ता, जाहू तिकर माणु दा पुत्र मरेयां च जिंदा नी होई जा, ताहू तिकर जेहडा कुच्छ तुहां दिख्या ऐ सैह कुसी नैं मत दस्सदे ।" 10 चेलयां इसा गल्ला जो याद रखया; कने अप्पु च सुआल जबाब करणां लगे, "कि मरी नैं भिरी जिंदा होणे दा क्या मतलब होई सकदा ऐ ।" 11 कने चेलयां यीशुये ते पूछ्या, "धर्म शास्त्री कजो गलांदे हन कि एलिय्याह दा पैहले औणां जरूरी ऐ । 12 यीशुयें तिन्हां जो जबाब दित्ता, "एलिय्याह सचमुच पैहले आई नैं सब कुच्छ ठीक करगा, अपर माणुये दे पुत्रे दे बारे च एह कजो लिख्या ऐ कि सैह बडे दुख झेलगा. कने सैह नीच गिणयां जांगा? 13 अपर मैं तुहां नैं ग्लांदा कि एलिय्याह तां आई रैहआ, कने जिआं तिसदे बारे च लिख्या ऐ, तिआं ई तिन्हां जे किच्छ तिस नैं कित्ता ।"

बुरिया आत्मां दे सतायेयो जागते जो ठीक करणां (मत्ती 17 : 14-21; लूका 9 : 37-43)

14 जाहूँ सैह चेलयां अल्ल आया, तां तिन्हां क्या दिख्या कि तिन्हां दे चोंनी पाससेयां बडी भीड खडूतियो थी कने शास्त्री तिन्हां नैं बँहसा दे हन । । 15 यीशु जो दिखदे ही सारे बडे हैराण होणां लग्गे, कने तिसदे पाससें दौडी नैं तिसियो नमस्कार कित्ता । 16 तिन्हीं तिन्हां ते पूछ्या, “तुहां इन्हां नैं क्या बँहस करा दे हन?” 17 तां भीडा च इक्की माणुयें तिसियो जबाब दित्ता, “हे गुरु, मैं अपने जागते जो तुहां अल्ल लैई नैं आया, जिसियो गूंगी आत्मां चिमडियो ऐ । 18 सैह जित्थु कुत्थी भी इसजो पकडदी, तित्थु ई परछाडी दिंदी,; इसदे मुँमें च झगूड निकळदा कने दंदा क्रीडदा कने अकडी जांदा ऐ । मैं तेरे चेलयां जो ग्लाय कि इसा बुरिया आत्मां जो कडडी देया, अपर एह तां कडडी नी सके ।” 19 एह सुणी नैं तिन्हीं तिन्हां जो जबाब देई नैं ग्लाय, “हे वेवसुआसियो, मैं काहूँ तिकर तुहां सौंगी रँह्या? कने काहूँ तिकर तुहां दी झेलगा, इसियो मिन्जो अल्ल लेयोआ ।” 20 ताहूँ सैह तिसियो तिस अल्ल लैई आये; कने जाहूँ यीशुयें तिसियो दिख्या, तां तिन्हीं बुरिया आत्मां जागते जो मरोड्या; कने भुइआं पैई गैआ, कने मुँमें ते झगूड चली पैआ, कने जमीना पर लम्लेटा मारणां लग्गा । 21 तिन्हीं तिसदे बुडे ते पूछ्या, “इसदा एह हाल काहूँ ते ऐ?” तिन्हीं ग्लाय, बचपने ते । 22 तिन्हीं आत्मां इसियो खत्म करणे तांई कदी अग्गी च कने कदी पाणिये च सट्टेया; अपर जे तू कुच्छ करी सके, तां अहां पर तरस खाई नैं अहां दा भला कर ।” 23 यीशुयें तिसियो ग्लाय, “जे तू करी सकदा ऐ? एह क्या गल्ल ऐ । वसुआस करणे आळेंयां तांई सब कुच्छ होई सकदा ऐ ।” 24 जागते दे बुडे ताहूँ ई गिडगिडाई नैं ग्लाय, “हे प्रभु मैं वसुआस करदा, मेरे वेवसुआसे जो दूर करी दैआ ।” 25 जाहूँ यीशुयें दिख्या कि लोकां दी भीड होर बवदी जा दी ऐ, तां तिन्हीं बुरिया आत्मां जो झिडकी नैं ग्लाय, हे गूंगी कने टोंगी आत्मां मैं तिन्जो हुक्म दिंदा ऐ, इस जागते दे अंदरे ते निकळी जा, कने भिरी कदी इस च मत औंदी ।” 26 ताहूँ बुरिया आत्मां चीड मारी कने जागते जो बडा मरोडी नैं निकळी गैई; कने जागत मरेयां साइआं होई गैआ, ऐत्थु तिकर कि माणु ग्लायणां लग्गे कि सैह मरी गैआ । 27 अपर यीशुयें तिसदा हत्थ पकडी नैं तिसियो ठालेया, कने सैह उठी खडौता । 28 जाहूँ सैह घरे जो आया तां तिसदेयां चेलयां तिसते पडदे नैं पूछ्या, “अहां तिसा बुरिया आत्मां जो कजो नी कडडी सके?” 29 यीशुयें चेलयां जो ग्लाय, “एह आत्मां बिना प्रार्थना कित्ते कुसी होर तरीके नैं नी निकळी सकदी ऐ ।”

अपणियां मौती दे बारे च दुवारी भिरी भविष्यवाणी (मत्ती 17 : 22,23; लूका 9 : 43-45)

30 भिरी सैह तित्थु ते चले, कने गलील सैहरे ते होई नैं जा दे थे । सैह चाहंदा था कुसियो पता ना लग्गे, 31 कजोकि सैह अपने चेलयां जो उपदेश दिंदा कने तिन्हां जो ग्लाय था, “माणु दा पुत्तर माणुआं दे हत्थां च पकडुआया जांगा, कने सैह तिसियो मारी दिंगे; कने सैह मरणे दे त्रीं दिना बाद मैं भिरी जिंदा होई जांगा ।” 32 अपर एह गल्ल चले दिया समझा च नी आई, कने सैह तिसते पूछणे ते उरदे थे ।

सबना ते बडा कुण ऐ ? (मत्ती 18 : 32-39)

33 भिरी सैह कफरनहूम सैहरे च आये; कनेघरें आई नैं तिन्हीं तिन्हां ते पूछ्या, रस्ते च तुहां कुसा गल्ला पर बँहसा दे थे?” 34 सैह चुप रहै, कजोकि रस्ते च तिन्हां अप्पु च एह सुआल जबाब कित्यो थे कि अहां च बडा कुण ऐ । 35 ताहूँ यीशुयें बैई नैं बाराहां जो सदया कने तिन्हां नैं ग्लाय, “जे कोई बडा होणां चाहंदा, तां सबना ते लोक्का कने सारेयां दा सेबक बर्णे ।” 36 कने यीशुयें इक्की जागते जो लैई नैं तिन्हां दे गभे खरेडी दित्ता, कने तिसियो मूडै लैई नैं तिन्हां जो ग्लाय, 37 जेहडा कोई मेरे नां ते एदेयां जागतां च कुसी इक्की जो भी ग्रहण करदा ऐ, सैह मिन्जो ग्रहण करदा ऐ, कने जेहडा कोई मिन्जो ग्रहण करदा ऐ, सैह मिन्जो नी, अपर मेरे भेजणे आळे जो ग्रहण करदा ऐ ।”

जेहडा विरोध च नी, सैह म्हारी तरफ (लूका 9 : 49-50)

38 ताहूँ यूहन्ने तिसियो ग्लाय, “हे गुरु, अहां इक्की माणुयें जो तेरे नांये ते दुष्टआत्मां जो कडदे दिख्या कने अहां तिसियो मना करणां लग्गे, कजोकि सैह अहां पचाहं नी ओआ दा था ।” 39 यीशुयें ग्लाय, “तिस जो मना मत करा; कजोकि ऐदेया कोई नी ऐ जेहडा मेरे नांये ते सामर्थी दे कम्म करें, कने ताहूँ ई मिन्जो बुरा ग्लाय सके, 40 कजोकि जेहडा अहां दे बरखलाफ नी ऐ, सैह अहां दे पाससे ऐ । 41 जेहडा कोई इक्क ग्लास पाणिये दा तुहां जो एह समझी नैं पियां कि तुहां मसीह दे हन तां मैं तुहां नैं सच ग्लाय कि तिन्हां जो तिन्हां दा प्रतिफळ जरुर मिलणां ऐ ।

ठोकरा दी बजाह बणना (मत्ती 18 : 6-9; लूका 17 : 1,2)

42 जेहडा कोई इन्हां लोक्केयां च लोक्का मिन्जो पर वसुआस करदा ऐ, जे तिसदिया बजाह ते कुसकि जो ठोकर लगदी ऐ तां तिस तांई भला एह ऐ कि घराटे दा इक्क बडा पुड तिसदे गळे च लटकाया जां कने सैह समुंदरे च सट्टी दित्ता जां । 43 जे तेरा हत्थ तिन्जो ठोकर खुआंदा ऐ तां तिसयो बड्डी करी सट्टी दै, टुंडा होई नैं सदा दी जिन्दगी च प्रवेश करणां तिन्जो तांई इसते खरा ऐ कि हत्थां होंदेया भी नरके दी अग्गी च सट्टेया जां जेहडी कदी नी बुझदी । 44 [जित्थु तिन्हां दा कीडा नी मरदा कने अग्गी नी बुझदी ।] 45 जे तेरा पैर तिन्जो ठोकर खुआंदा ऐ तां तिसयो बड्डी करी सट्टी दै, लंगडा होई नैं सदा दी जिन्दगी च प्रवेश करणां तिन्जो तांई इसते खरा ऐ कि पैरां होंदेया भी नरके दी अग्गी च सट्टेया जां । 46 [जित्थु तिन्हां दा कीडा नी मरदा कने अग्गी नी बुझदी ।] 47 जे तेरी अख तिन्जो ठोकर खुआंदा ऐ तां तिसयो कड्डी करी सट्टी दै, काणां होई नैं परमात्मं दे राजे च प्रवेश करणां तिन्जो तांई इसते खरा ऐ कि दँ अखी होंदेया भी नरके दी अग्गी च सट्टेया जां । 48 जित्थु तिन्हां दा कीडा नी मरदा कने अग्गी नी बुझदी । 49 कजोकि हर इक्क माणु अग्गी च लूणका कित्ता जांगा । 50 लूण खरा ऐ, अपर जे लूणे दा सुआद बिगडी जां, तां तिसियो कुसा चीज्जा नैं लूणका करगे? अप्पु जो लूणका रखा, कने अप्पु च मेल मिलाप करी नैं रहँआ ।

तलाक दे बारे च यीशु मसीह दी शिक्षा (मत्ती 19 : 1-12; लूका 16 : 18)

10 भिरी सैह तित्थु ते उठी नैं यहूदिया दे लाक्के च कने यरदन दरैयाए दे पार आया भीड तिस अल्ल भिरी कठोरों गैई, कने सैह भिरी अपने तरीके मताबक तिन्हां जो उपदेश दैणां लग्गा ।

2 ताहूँ फरीसी तिस अल्ल आई नैं तिसियो परखणे तांई तिसते पूछ्या, “क्या एह ठीक ऐ कि मरद अपणियां लाडिया जो छड्डी दै?” 3 तिन्हीं तिन्हां जो जबाब दित्ता, “मूसें तुहां जो क्या हुक्म दित्या ऐ?” 4 तिन्हां ग्लाय, “मूसें तलाक दैणे कने छडणे दा हुक्म दित्या ऐ ।” 5 यीशुयें तिन्हां जो ग्लाय, “तुहां दे मन कठोर होणे दिया बजाह ते तिन्हीं तुहां तांई एह हुक्म लिख्या, 6 अपर सृष्टिया दे शुरु ते ई परमात्मं मरद कने जणांस करी नैं तिन्हां जो बणांया ऐ । 7 इसा बजाह ते मरद अपने माऊ कने बुडे ते लग्ग होई नैं अपणिया लाडिया सौंगी मिली नैं रँहदा, 8 कने सैह दोगो इक्क तन होंगे; इसतांई सैह दो नी अपर इक्क जान हन । 9 इसतांई जिसियो परमात्मं जोड्या ऐ तिसियो माणु लग्ग ना करें ।” 10 घरें चेलयां इसदे बारे च तिसते भिरी पूछ्या । 11 तिन्हीं तिन्हां जो ग्लाय, “जेहडा कोई अपणिया लाडिया जो छड्डी नैं दूड्या जो व्याहई लै तां सैह पैहलिया नैं व्यभिचार करदा ऐ; 12 कने जे लाडी अपने लाडे जो छड्डी नैं दूये नैं व्याह करें तां सैह भी व्यभिचार करदी ऐ ।

जागतां जो आशीर्वाद दैणां (मत्ती 19 : 13-15; लूका 18 : 15-17)

13 भिरी माणु जागतां जो यीशु अल्ल लैयोणां लग्गे कि सैह तिन्हां पर हत्थ रखें, अपर चेलयां तिन्हां जो झिडकेया । 14 यीशुयें एह दिखी नैं नराज होई नैं तिन्हां नैं ग्लाय, “जागतां जो मिन्जो अल्ल औणां दैआ, कने इन्हां जो मत रोका, कजोकि परमात्मं दा राज्ज ऐदयां दा ऐ । 15 मैं तुहां नैं सच ग्लाय कि जेहडा कोई परमात्मं दे राज्ज जो इन्हां निके जागते साइआं मनी नी लै, सैह

तिस च कदी नी जाई सकगा । 16 कने यीशुयें जागतां जो मूडे लैआ, कने तिन्हां पर हत्थ रखी नैं तिन्हां जो आशीर्वाद दिता ।

मीर नौजौआन जागत कने सदा दी जिन्दगी

(मत्ती 19 : 16-30; लूका 18 : 18-30)

17 जाहू यीशु तित्थु ते निकळी नैं जा दा था, तां इक्क माणु तिस अल्ल दौडदा आया, कने तिसदे गांह गोड्डे टिकाई नैं तिसते पूछ्या, "हे उतम गुरु, सदा दी जिन्दगीया दा हक्क दार होणे तांई मैं क्या करेँ ।" 18 यीशुयें तिसियो ग्लाय्या, "तू मिन्जो उतम कजो ग्लांदा ऐ, कोई उतम नी, अपर इक्क मतलब परमात्मां । 19 तू हुक्मां जो तां जाणदा ऐ; "खून मत करणां, व्यभिचार मत करणां, चोरी मत करणां, झूठी गवाही मत देणां, अपणे मारु दा कने बुडे दा आदर करणां । 20 तिन्हीं तिसियो ग्लाय्या, "हे गुरु, इन्हां हुक्मां जो मैं जोआनिया ते मनदा आया ऐ । 21 यीशुयें तिसियो दिखी करी तिस नैं प्यार कित्ता, कने तिसियो ग्लाय्या, "तिज्जो च इक्की गल्ला दी कमी ऐ । जा, जेहड़ा कुच्छ तिज्जो अल्ल ऐ तिसियो बेची नैं गरीबां जो दैई दे, कने तिज्जो सुअर्गे च सच्चा धन मिलगा, कने आई नैं मिन्जो पचांह चली पौ । 22 इसा गल्लां सुणी नैं तिसदा मुंह उतरी गैआ, कने दुखी होई नैं चली गैआ, कजोकि सैह बड़ा मीर था ।

23 यीशुयें चौंनी पाससे दिखी नैं अपणे चेलया जो ग्लाय्या, मीरां दा परमात्में दे राज्जे च पुज्जणा कदेया औरा ऐ । 24 चले तिसदियां गल्लां सुणी नैं बडे हैराण होये । तां यीशुयें भिरी तिन्हां जो ग्लाय्या, "हे जागतो, जेहडे धने पर वसुआस रखदे हन, तिन्हां तांई परमात्में दे राज्जे च पुज्जणां कदेया औरा ऐ । 25 परमात्में दे राज्जे च मीर माणुये दा पुज्जणे ते उंटे दा सूईया दे नक्के ते निकळी जाणां सौरा ऐ ।" 26 सैह बडे ई हैराण होई नैं अप्पु च ग्लाय्यां लगे, तां भिरी कुसदा उद्वार होई सकदा ऐ?" 27 यीशुयें तिन्हां बक्खी दिखी नैं ग्लाय्या, "माणुआं ते तां एह नी होई सकदा ऐ, अपर परमात्में ते होई सकदा ऐ; कजोकि परमात्में ते सब कुच्छ होई सकदा?" 28 पतरस यीशुये नैं ग्लाय्यां लग्गा, "दिख अहां तां सारा कुच्छ छड्डी नैं तिज्जो पचांह चली पैयो हन ।" 29 यीशुयें ग्लाय्या, मैं तुहां नैं सच ग्लांदा कि ऐदेया कोई नी ऐ, जिन्हीं मेरे सुसमाचार तांई घरे या भाउयां या बहैणी, मारु या बुडे या बाल - बच्चेयां या खेतां जो छड्डी दिता होये, 30 कने सैह इस लोक च सौ गुणां नी पां, घरां कने भाऊआं - बहैणा कने मारुआं कने बाल - बच्चेयां कने जमीना जो, मुसीबतां दिया बजाह ते परलोक च सदा दी जिन्दगी जरूर मिलणी ऐ । 31 अपर मत्ते सारे जेहडे गांह हन, पचांह होंगे; कने जेहडे पचांह हन, सैह गांह होंगे ।

अपणिया मौती दे बारे च त्री बरी भविष्यवाणी

(मत्ती 20 : 17-19 लूका 18 : 31-34)

32 सैह यरुशलेम सैहरे जो चलेयो थे कने अल्ली तिकर रस्ते च थे; कने यीशु तिन्हां दे गांह गांह चलेया था; चले हैराण थे, कने जेहडे तिसदे पचांह पचांह चलेयो थे सैह उरयो थे । ताहू सैह भिरी तिन्हां बारां जो लैई नैं तिन्हां नैं गल्लां ग्लाय्यां लग्गा, जेहिड्यां तिस पर बितणे आळियां थियां, 33 दिखा, हुण अहां यरुशलेमे जो चलेयो हन, कने माणु दा पुत्र प्रधान याजकां कने शास्त्रियां दे हत्थ पकडुआया जांगा, कने सैह तिस जो मौती दा दोषी ठेहराई दिगे, कने गैर - यहूदियां दे हुआले करी दिगे । 34 सैह तिसदा मजाक दुआंगे, तिस पर थुक्गे, तिसियो कोडे मारगे कने तिसियो मारी देणां ऐ, कने त्री दिनां बाद सैह जिंदा होई जांगा ।"

याकूबे दी कने यहूने दी विणती

(मत्ती 20 : 20 - 28)

35 ताहू जबदिये दे पुत्र याकूबे कने यहूने तिस अल्ल आई नैं ग्लाय्या, "हे गुरु, अहां चाहंदे हन कि जेहड़ा कुच्छ अहां तिज्जो ते मंगगे, सैह तू अहां तांई करेँ ।" 36 यीशुयें तिन्हां जो ग्लाय्या, "तुहां मिन्जो ते क्या चाहंदे हन? कि मैं तुहां तांई करेँ?" 37 तिन्हां यीशु जो ग्लाय्या, "अहां जो एह दे कि तेरी महिमा च अहां ते इक्क तेरे सज्जे बक्खे कने दूआ खबे बक्खे बैठेँ ।" 38 यीशुयें तिन्हां नैं ग्लाय्या, "तुहां नी जाणदे कि क्या मंगा दे हन? जेहड़ा कटोरा मैं पीणे आळा ऐ, क्या तुहां पी सकदे हन? कने जेहड़ा बपतिस्मा मैं लैणे आळा ऐ क्या तुहां लैई सकदे हन । 39 तिन्हां यीशु जो ग्लाय्या, "अहां ते होई सकदा ऐ ।" यीशुयें तिन्हां जो ग्लाय्या, "जेहड़ा कटोरा मैं पीणे आळा ऐ, तुहां पीगे, कने जेहड़ा

बपतिस्मा मैं लैणे आळा ऐ, तिसियो तुहां लेंगे । 40 अपर जिस तांई त्यार कित्या गैआ ऐ, तिन्हां जो छड्डी नैं होर कुसी जो अपणे सज्जे कने अपणे खबे बैठाणां मेरा कम्म नी ।"

अन्ने बरतिमाई नांये दे माणुये जो ठीक करणां

(मत्ती 17 : 22,23; लूका 9 : 43-45)

41 एह सुणी नैं दसों चले याकूबे कने यहूने दी रिस करणां लगे । 42 तां यीशुयें तिन्हां जो अप्पु अल्ल सददी नैं तिन्हां जो ग्लाय्या, "तुहां जाणदे हन कि जेहडे गैर - यहूदियां दे हाकम समझे जांदे हन, सैह तिन्हां पर प्रभुता करदे हन; कने तिन्हां च जेहडे बडे हन, तिन्हां पर हक्क जतांदे हन । 43 अपर तुहां च ऐदेया नी ऐ, अपर जेहड़ा कोई तुहां ते बडा होणां चाहंदा सैह तुहां दा सेवक बणें; 44 कने जेहड़ा कोई तुहां च प्रधान होणां चाहंदा, सैह सारेयां दा दास बणें । 45 कजोकि माणुये दा पुत्र इसतांई नी आया कि तिसदी तुहां सेवा करन, अपर इसतांई आया कि अप्पु सेवा करेँ, कने मतेआं जो छडाणे तांई अपणी जात्र दें ।"

46 सैह यरीहो सैहरे च आये, कने जाहू सैह कने तिसदे चले, कने इक्क बडी भीड यरीहो ते निकळा दी थी, ताहू तिमाई दा पुत्र बरतिमाई जेहड़ा कि अन्ना भिखारी था सडका कंडे बैठया था । 47 सैह एह सुणी नैं कि यीशु नासरी हन, डडी डडी नैं ग्लाय्यां लग्गा, "हे दाऊद दी औलाद यीशु मिन्जो पर दया कर ।" 48 मतेआं लोकां तिसियो झिडकेया कि चुप रहै, अपर सैह होर भी जोरे नैं डडणां लग्गा, "हे दाऊद दी औलाद, मिन्जो पर दया कर ।" 49 ताहू यीशुयें रुकी नैं ग्लाय्या, इसियो सददा ।" कने लोकां तिस अन्ने जो सददी नैं तिसियो ग्लाय्या, "हौंसला रख्ख ! उठ ! यीशु तिज्जो सददा दा ऐ ।" 50 सैह अपणियां प्ळोडा परांह सट्टी नैं झट पट उठेया । 51 इसा गल्ला पर यीशुयें तिसियो पूछ्या, "तू क्या चाहंदा ऐ कि मैं तिज्जो तांई करेँ?" अन्ने तिसियो ग्लाय्या, "हे रब्बी, मैं चाहंदा कि मैं दिखणां लगी पौंये ।" 52 यीशुयें तिसियो ग्लाय्या, "चली जा, तेरे वसुआसे तिज्जो ठीक करी दिता ऐ । सैह ताहू ई दिखणां लगी पैआ, कने तिसा भीड़ा च तिस पचांह चली पैआ ।

यीशु मसीह दा यरुशलेमे च ओणां

(मत्ती 21 : 1-11; लूका 19 : 28-40; यहूना 12 : 12-19)

11 जाहू सैह यरुशलेम दे नैडे, जेतून प्हाडे पर 'बैतफगे' कने 'बैतनिय्याह' अल्ल आये तां तिन्हीं अपणे चेलयां च दूँ जो एह ग्लाय् नैं घल्लया, 2 "सामणे आल्ले प्राये च जा, कने तित्थु पुजदेयां ई इक्क गधिया दा बच्चा, जिस पर कदी कोई भी सुआर नी होया ऐ, बन्नया होया तुहां जो मिलगा । तिसियो खोली नैं लैयोआ । 3 जे तुहां ते कोई पूछे, 'एह कजो करा दे हन?' तां ग्लाय्यां, प्रभु जो इस दी जरूरत ऐ, कने सैह ताहू ई तिसियो ऐत्थू घल्ली दिंगा । 4 तिन्हां जाई नैं तिस बच्चे जो बाहर दुरवाजे आळे रौणे च बन्नया होया दिख्या, कने खोलणा लगे । 5 तिस प्रांऐ दे माणुआं पूछ्या, एह क्या करणां लाया, गधिया दे बच्चे जो कजो खोलादे हन । 6 जिआं यीशुयें ग्लाय्या था, तिआं ई तिन्हां नैं ग्लाय् दिता; ताहू लोकां तिन्हां जो लैई जाणां दिता । 7 तिन्हां बच्चे जो यीशु अल्ल लैई नैं तिस परालें अपणे कपडे पाई दिते कने यीशु तिस पर सुआर होई गैआ । 8 ताहू मतेआं अपणे कपडे रस्ते च बछाई कने होरना तां खेतां ते डालियां बड्डी बड्डी नैं रस्ते च बछाई दित्तियां । 9 जेहडे तिसदे गांह गांह जांदे कने पचांह पचांह चली ओं दे थे, डडी डडी नैं ग्लां दे थे, "होशाना ! धन ऐ सैह जेहड़ा प्रभु दे नाये ते ओंदा ऐ ।" 10 अहां दे पिता दाऊद दे राज जेहड़ा ओआ दा ऐ; धन ऐ ! सुअर्गे च परमात्में दी होशाना ।"

11 यीशु यरुशलेमे च पुज्जी नैं मंदरे च आया, कने चौंनी पाससे दियां सारियां चीजां जो दिखी नैं बारां चेलयां सौगी बैतनिय्याह गैआ, कजोकि संज होई गैईयो थी ।

फळां बगैर धूडे दा रुख

(मत्ती 21 : 18,19)

12 दूये दिने जाहू सैह बैतनिय्याह ते निकळे तां तिस जो भूख लगी । 13 सैह दूरे ते धूडे दे इक्की सैले रुखे जो दिक्खी नैं बक्खे गैआ कि तिस च कुच्छ मिलेँ अपर पतरां छड्डी कुच्छ नी मिलया, कजोकि धूडेयां दा सीजन नी

था । 14 इसा गला पर तिन्हीं तिसियो ग्लाय, “जा!” अजे ते तेरा फळ कोई नी खां । कने तिसदे चले सुणां दे थे ।

यरुशलम दे मंदरे ते वपारियां जो बाहर कडुणां
(मत्ती 21 : 12-17; लूका 19 : 45-48; यूहन्ना 2 : 13-22)

15 भिरी सैह यरुशलम सैहरे च आये, कने सैह मंदरे च गैआ; कने तिथु जेहडे लैण दैण करा दे थे तिन्हां जो बाहर कडुणां लग्गा, सराफां दे तख्ते कने कबूतर बेचणे आळ्यां दियां चौकिआं पलटी दित्तिआं । 16 कने मंदरे च कुसी जां भांडेयां लैई नैं औणा जाणां नी दित्ता । 17 कने शिक्षा दैई नैं तिन्हां जो ग्लाय, “क्या एह नी लिख्या ऐ कि मेरा घर सारियां जातिआं तांई प्रार्थना दा घर हुंगा? अपर तुहां तां इसियो डाकुआं दा अड्डा बणांई दित्ता ऐ । 18 एह सुणी नैं प्रधान याजक कने शास्त्री तिसियो मारणे दा मौका तोपणां लगे, कजोकि सैह तिसते डरदे थे, इसताई कि सारे माणु तिसदे उपदेशे ते हैराण होंदे थे । 19 संज होंदे ई सैह सैहरे ते बाहर चली गै ।

सूक्यो धूडे दे रूखे दी शिक्षा
(मत्ती 21 : 20-22)

20 भिरी भ्यागा जाहू सैह जिस रस्ते ते आयेयो थे तिस रस्ते ई चले तां तिन्हां तिस धूडे दे रूखे जो जडा तिकर सूक्या दिख्या । 21 पतरसे जो सैह गल्ल याद आई तिन्हीं यीशु जो ग्लाय, “हे रब्बी, दिख ! एह धूडे दा रूख जिसियो तुहां शराप दित्ता था सैह सूकी गैआ ऐ ।” 22 यीशुयें तिस जो जबाब दित्ता, “परमात्में पर वसुआस रक्ख । 23 मैं तुहां नैं सच ग्लादा कि जेहडा कोई इस पहाडे जो ग्लांग, तू पटोई नैं समुंदरे च जाई पौ, कने अपणे मने च बैम ना करे अपर वसुआस करे कि जेहडा ग्लांदा ऐ सैह होई जांगा, तां तिस तांई सैई हुंगा । 24 इसताई मैं तुहां नैं ग्लादा कि जेहडा कुच्छ तुहां प्रार्थना करी नैं मंगे, तां वसुआस करा कि तुहां जो मिलिया, कने तुहां तांई होई जांगा । 25 कने जाहू कदी तुहां खडे होई नैं प्रार्थना करदे हन तां जे तुहां दे मने कुसी नैं मनमुटाव होयें, तां तिस जो पैहले माफ़ करा; इसताई कि तुहां दा सुअर्गीय पिता भी तुहां गुनाह माफ़ करे । 26 [जे तुहां माफ़ नी करन तां तुहां दा पिता भी जेहडा सुअर्गे च ऐ, तुहां गुनाह माफ़ नी करगा ।]”

यीशु मसीह दे हक्के च उठदे सबाल
(मत्ती 21 : 23-27; लूका 20 : 1-8)

27 सैह भिरी यरुशलम सैहरे जो आये, जाहू सैह मंदरे च घूमा दा था तां प्रधान याजक कने शास्त्री कने स्याणे तिस अल्ल आई नैं पूछणां लगे, 28 “तू एह कम्म कुस हक्के नैं करदा ऐ? कने एह हक्क तिज्जो कुणी दित्ता ऐ कि तू एह कम्म करे?” 29 यीशुयें तिन्हां जो ग्लाय, “मैं भी तुहां ते इक्क गल्ल पूछदा; मिन्जो जबाब दैआ तां मैं तुहां जो दसगा कि एह कम्म कुस हक्के नैं करदा ऐ । 30 यूहन्ने दा बपतिस्मा क्या सुअर्गे दे पास्से ते था कि माणुआं दे पास्से ते था । मिन्जो जबाब दैआ ।” 31 ताहू सैह अप्पु च सोचणां लगे जे अहां ग्लांगे, ‘सुअर्गे दे पास्से ते, तां इन्हीं ग्लाणां, भिरी तुहां यूहन्ने पर वसुआस कजो नी कित्ता?’ 32 जे अहां ग्लांगे, कि माणुआं दे पास्से ते, तां लोकां दा डर ऐ, कजोकि सारे जाणदे हन कि यूहन्ना सचमुच भविष्यवक्ता था । 33 तिन्हां यीशु जो जबाब दित्ता, “अहां नी जाणदे ।” यीशुयें तिन्हां जो ग्लाय, “मैं भी तुहां जो नी दसदा कि एह कम्म कुस हक्के नैं करदा ऐ ।”

कपटी जमीदारां जो उदारण
(मत्ती 21 : 33-46; लूका 20 : 9-19)

12 भिरी सैह उदारणां च तिन्हां नैं गलां करणां लग्गा “इक्की माणुयें अंगूरा दा बाग लगाया, कने तिसदे चौनी पास्सेयां बाड बन्नया, कने रसे जो कठेरणे तांई इक्क खुणी नैं खड्डा खोदया, कने गुम्मत बणाया; कने जमीदारां जो बागे दा ठेका दैई नैं परदेश चली गैआ । 2 भिरी फळे दे सीजने च तिन्हीं जमीदारां अल्ल इकी दासे जो घल्लया कि जमीदारां ते बागे दे फळां दा हेस्सा लें । 3 अपर तिन्हां तिसियो पकड़ी नैं कुटेया कने खाली हत्थ वापस घल्ली दित्ता । 4 भिरी इक्क होर दास तिन्हां अल्ल घल्लया; तिन्हां तिसदा मुँड फाडी दित्ता, कने तसदी बेजती कित्ती । 5 भिरी तिन्हीं इक्क होर जो घल्लया; तिन्हां तिसियो मारी दित्ता । ताहू तिन्हीं होर मतेआं दासां जो घल्लया; तिन्हां च तिन्हां कुच्छना जो कुटेया कने कुच्छना जो मारी दित्ता ।

6 हुण इक्क ई रेई गैआ था, जेहडा तिसदा प्यारा पुत्तर था; आखर च तिन्हीं तिसियो भी तिन्हां अल्ल एह सोची नैं घल्लया कि सैह मेरे पुत्तरे दा लैआज करगे । 7 अपर तिन्हां जमीदारां अप्पु च ग्लाय, ऐही तां असली वारस ऐ; ओआ, जे अहां इसियो मारी दिये, तां एह सारी मलकीत म्हारी ई होई जागी । 8 तां भिरी तिसियो पकड़ी नैं मारी दित्ता, कने अंगूरा दे बागे दे बाहर सट्टी दित्ता ।

9 “इसताई अंगूरा दे बागे दा मालक क्या करगा? सैह आई नैं तिन्हां जमीदारां जो मारी दिंगा, कने अंगूरा दे बागे होरनी जमीदारां जो देई दिंगा ।

10 क्या तुहां पवित्र शास्त्र च एह वचन नी पढ़या :

“जिस पत्थरे जो राजमिस्त्रियां निकम्मा समझी लैआ था, सैई कूणे दा सिरा होई गैआ,

11 एह प्रभु दे पास्से ते होया, कने म्हारिया नजरा च बडा बधिया ऐ ।”

12 ताहू तिन्हां यीशु जो पकड़णां चाया; कजोकि सैह समझी गैयो थे कि तिन्हीं अहां दे वरखलाफ च एह उदारण ग्लाय । अपर सैह लोकां ते डरे, कने तिस जो छड्डी नैं चली गै ।

कैसरे जो कर दैणां

(मत्ती 21 : 33-46; लूका 20 : 9-19)

13 ताहू तिन्हां तिसियो गलां च फसाणे तांई कुच्छ फरीसियां कने हेरोदियां जो यीशु अल्ल घल्लया । 14 तिन्हां आई नैं यीशु जो ग्लाय, “हे गुरु अहां जाणदे हन, कि तू सच्चा ऐ, कने कुसी दी परवाह नी करदा; कजोकि तू माणुआं दा मुँ दिखी नैं गलां नी करदा, अपर परमात्में दा रस्ता सच्चाईया नैं दसदा ऐ । तां क्या कैसरे जो चुंगी दैणां ठीक ऐ कि नी? 15 अहां दैन, या ना दैन?” तिन्हीं तिन्हां दा कपट जाणी नैं तिन्हां जो ग्लाय, “मिन्जो कजो परखादे हन, इक्क सिक्का मिन्जो अल्ल लेयोआ तां कि मैं तिसियो दिखें ।” 16 सैह लैई आये, कने तिन्हीं तिन्हां जो ग्लाय, एह छाप कने ना कुसदा ऐ?” तिन्हां ग्लाय, “कैसरे दा ।” 17 यीशुयें तिन्हां जो ग्लाय, “जेहडा कैसरे दा ऐ सैह कैसर जो दैआ, कने जेहडा परमात्में दा ऐ परमात्में जो दैआ ।” ताहू सैह तिस पर बडे हैराण होये ।

दुवारा ते जिंदा होणां कने व्याह

(मत्ती 22 : 23-33; लूका 20 : 27-40)

18 भिरी सदूकिआं भी, जेहडे ग्लांदे हन कि मरेयां दा जिंदा होणां ऐ ई नी, तिस अल्ल आई नैं तिसते पूछया, 19 “हे गुरु, मूसें अहां तांई लिख्या ऐ कि जे कुसी दा भाऊ बिना औलादा मरी जां कने तिसदी लाडी रेई जां, तां तिसदा भाऊ तिसदिया लाडिया नैं व्याह करी लें कने अपणे भाऊये तांई वारस पैदा करे । 20 सैह सत भाऊ थे । पैहला भाऊ व्याह करी नैं बिना औलादा मरी गैआ । 21 ताहलू दूयें भाऊयें तिसा जणांसा नैं व्याह करी लैआ कने बिना औलादा मरी गैआ; कने तिआं ई त्रीयें भी कित्ता । 22 कने सतां ते औलादा नी होई । सारेयां दे बाद सैह जणांसा भी मरी गैई । 23 तां सैह जिंदा होणे पर कुसदी लाडी हांगी? कजोकि कि सैह सतां दी लाडी रेई चुकियो थी ।

24 यीशुयें तिन्हां नैं ग्लाय, “क्या तुहां इसा बजाह ते भूला च तां नी पैयो हन कि ना तां तुहां पवित्र शास्त्रे जो जाणदे हन, कने ना तां परमात्में दिया सामर्था जो? 25 कजोकि जाहू सैह मरेयां च जिंदा होई जांगे, तां सैह ना व्याह करगे कने ना तां व्याह च दित्ते जांगे, अपर सुअर्गे च दूतां साइआं हांगे । 26 मरेयां दे जिंदा होई जाणे दे बारे च क्या तुहां मूसा दिया कताब च झाडिया दी काहणियां च नी पढ़या कि परमात्में तिसियो ग्लाय, ‘मैं अब्राहमे दा परमात्मां, कने इसहाके दा परमात्मां, कने याकूबे दा परमात्मां ऐ?’”

27 परमात्मां मरेयां दा नी ऐ अपर जिंदायां दा परमात्मां ऐ तुहां बडी भूला च पैयो हन ।”

सबना ते जरूरी हुक्म

(मत्ती 22 : 34-40; लूका 10 : 25-28)

28 शास्त्रियां च इक्की आई नैं तिन्हां जो बैसदे सुणयां, कने एह जाणी नैं कि तिन्हीं तिन्हां जो ठीक ढंगे नैं जबाब दित्ता, तिसते पूछया, “सबना ते जरूरी हुक्म कुण देया ऐ?” 29 यीशुयें तिसियो जबाब दित्ता, “सबना ते जरूरी हुक्म एह ऐ; ‘हे इस्राएल सुण ! प्रभु अहां दा परमात्मां इक्को ई प्रभु ऐ, 30 कने तू अपणे प्रभु परमात्में जो अपणे सारे मने नैं, कने अपणे सारे प्राणां नैं, कने

अपणियां सारिया ताकता नैं प्यार रखणां । 31 कने दूआ हुक्म ऐ, तू अपणे पड़ेसिये नैं अप्पु साइआं प्यार रखणां इसते बड़ा कोई होर हुक्म नी ऐ । 32 शास्त्रियें तिसियो ग्लाय, "हे गुरु, तुहां ठीक ग्लादे ! कने एह तां तुहां सच ग्लादे हन कि परमात्मां इक्को ई ऐ, कने तिसियो छड्डी नैं होर कोई नी ऐ । 33 कने तिसियो अपणे सारे मन, कने सारिया अक्का, कने सारे प्राण, कने सारिया ताकता नैं प्यार रखणां; कने पड़ेसिये नैं भी अप्पु साइआं प्यार रखणां, सारे होम्मबलियां कने बलिदानां ते बधी नैं हन ।" 34 जाहू यीशुयें दिख्या कि तिन्हीं अक्का दा जबाब दित्ता, तां तिसियो ग्लाय, "तू परमात्में दे राजे ते दूर नी ऐ ।" कने कुसी जो भिरी तिसते कुच्छ पूछणे दी हिम्मत नी होई ।

मसीह कुसदा पुत्तर ऐ ?

(मत्ती 22 : 41-46; लूका 20 : 41-44)

35 भिरी यीशुयें मंदरे च उपदेश दिंदे होये एह ग्लाय, "शास्त्री किआं ग्लादे हन कि मसीह दाऊद दा पुत्तर ऐ ? 36 दाऊदें अप्पु ई पवित्र आत्मां च होई नैं ग्लाय "प्रभुयें मेरे प्रभु नैं ग्लाय, "मेरे सजे पास्सें बैठ, जाहू तिकर मैं तेरे बैरियां जो तेरे पैरां दी चौकी नी बणाई दें ।" 37 दाऊद तां अप्पु ई तिसियो जो प्रभु ग्लादा ऐ, भिरी सैह तिसदा पुत्तर कुत्थू ते होया?" कने भीड़ा दे माणु तिसदियां गलां खुशिया नैं सुणदे थे ।

कपटी धर्म शास्त्रियां ते चुकनै रैहआ

(मत्ती 22 : 23-33; लूका 20 : 27-40)

38 यीशुयें अपणे उपदेशे च तिन्हां जो ग्लाय, "शास्त्रियां ते चुकनै रैहआ, जेहडे लमे लमे चौले पैहनी नैं घूमणां कने बजारां च नमस्कार । 39 कने अराधनालयां च खास खास आसण कने धामा च खास जगाह चाहंदे हन । 40 सैह विधवां दे घरां जो हडपी लेंदे हन, कने दसणे ताई लमियां लमियां प्रार्थना करदे हन । एह जादा सजा पागे ।"

इक्क कंगाल विधवा दा दान

(लूका 21 : 1-4)

41 यीशु मंदरे दे दान पात्रे सामणे बैई नैं दिखा दा था कि माणु मंदरे दे दान पात्रे च किआं पांदे हन; कने बडेयां बडेयां मीरां बड़ा कुच्छ पाया । 42 इतणे च इक्क कंगाल विधवा आई नैं तिन्ने दो दमडियां, जेहिडयां इक्की धेले दे बराबर होदियां हन, पाईयां । 43 ताहू यीशुयें अपणे चेलयां जो अप्पु अल्ल सददी नैं तिन्हां जो ग्लाय, "मैं तुहां नैं सच ग्लादा कि मंदरे च दान पात्रे पाणे आळ्यां ते इन्ने कंगाल विधवा सबते जादा पाया; 44 कजोकि सबना अपणिया कमाइया ते दान पाया, अपर इन्ने अपणिया थोडिया कमाइया च जे किच्छ इसादा था मतलब सैह सारा पाई दित्ता ।"

मंदरे दे विनाशे दी भविष्यवाणी

(मत्ती 21 : 33-46; लूका 20 : 9-19)

13 जाहू सैह मंदरे ते निकळा दा था, तां तिसदे चेलयां च इक्की तिसियो ग्लाय, हे गुरु दिखा, कदेय बडे बडे पत्थर कने कदेय छेल भवन हन !" 2 यीशुयें तिसियो ग्लाय, "क्या तुहां इन्हां बडे बडे भवना जो दिखादे हन ऐत्थू तां पत्थरे पर पत्थर भी बचा नी रैहगा जेहड़ा टाया नी जांगा ।"

संकट कने कळेस

(मत्ती 24 : 3-14; लूका 21 : 7-19)

3 जाहू सैह जेतूने दे पहाडे पर मंदरे दे सामणे बैठया था, तां पतरसें कने याकूबे कने यूहन्ने कने अन्द्रियासे पडेदे नैं जाई नैं तिसते पूछया, 4 "अहां जो दस्सा कि एह गलां काहू होणियां हन? कने जाहू एह सारियां गलां होणे पर हुंगियां तां तिस बगत दा क्या नशाण हुंगा ?" 5 यीशु तिन्हां नैं गलाणां लग्गा, "चुकनै रैहआ ! कि कोई तुहां जो भरमाई नी दें । 6 मते मेरे नांये ते आई नैं गलागे, "मैं सैई ऐ ।" कने मतेआं जो भरमागे । 7 जाहू तुहां लडाईयां, कने लडाईयां दी चर्चा सुणगे, तां घबरांदे मत; कजोकि इन्हां दा होणां पक्का ऐ, अपर तिस बगत अंत नी हुंगा । 8 कजोकि जाति पर जाति, कने देश पर देश

चढाई करगा । कने जगाह जगाह हिलण होगे, कने काल पाँगे । एह तां दुखां दी शुरुआत ई होगी ।

9 "अपर तुहां अपणे बारे च चुकनै रैहआ कजोकि माणु तुहां जो महासभां दे हुआले करगे कने तुहां पंचायतीं च कुट्टे जांगे, कने मेरिया बजाह ते हाकिमां कने राजेयां अल्ल पस कित्ते जांगे, ताकि तिन्हां ताई गवाही होये । 10 अपर जरूरी ऐ कि पैहले सुसमाचार सारियां जातिआं च प्रचार कित्ता जां । 11 जाहू सैह तुहां जो लैई जाई नैं हुआले करगे, तां पैहले ते चित्ता मत करणां कि अहां क्या गलागे; पर जेहड़ा कुच्छ तुहां जो तिसी बगत दसया जांगा सैई गलाणां; कजोकि गलाणे आळे तुहां नी हन, अपर पवित्र आत्मां ऐ । 12 भाऊ जो भाऊ, कने बुडे जो पुत्तर मरुवाणे ताई दिंगे, कने बच्चे माऊ बुडे दे वरखलाफ उठी नैं तिन्हां जो मरुआई दिंगे । 13 कने मेरे नांये दिया बजाह ते सारे माणु तुहां नैं बेर करगे अपर जेहड़ा आखरी तक शबर रखगा, तिस दा ई उद्धार हुगा ।

महासंकट - काल

(मत्ती 24 : 15-28; लूका 21 : 20-24)

14 जाहू तुहां तिसा उजाड़णे आळी घृणित चीजा जो जित्थू ठीक नी औत्थू खडूतियां दिखन, (पढ़णे आळे समझी लैन) ताहू जेहडे यहूदिया च हन सैह पहाडां जो नठी जान; 15 जेहडे छती पर होगे, सैह अपणे घरे ते कुच्छ भी लैणे ताई थलै नी लौन कने अंदर नी जान; 16 कने जेहडे खेतां च होगे, सैह अपणां कपड़ा लैणे ताई पचाह नी हटन । 17 तिन्हां दिनां च जेहिडयां लैरथियां कने दूद पिया दियां हुंगियां तिन्हां ताई हाय हाय ! 18 कने प्रार्थना करा कि परमात्में ते करा कि एह ठंडी दे दिना च ना होये । 19 कजोकि सैह दिन ऐदेय कस्टिया दे होगे कि सुष्टिया दी शुरुआत ते, जेहडी परमात्में बणाईयो ऐ, अजे तिकर ना तां होये ना तां भिरी कदी होगे । 20 जे प्रभु तिन्हां दिनां जो नी घटांदा, तां कोई भी माणु नी बचदा; अपर तिन्हां चुणेयां दिया बजाह ते जिन्हां जो तिन्हीं चुणया ऐ; तिन्हां दिनां जो घटाया । 21 तिस बगत जे कोई तुहां जो ग्लां, 'दिखा, मसीह ऐत्थू हन, दिखा औत्थू हन, "तां बिलकुल वसुआस मत करदे; 22 कजोकि झूठे मसीह कने झूठे भविष्यवक्ता उठी खडूणां, कने नशाणियां, चमत्कार कने भविष्यवाणियां करणियां हन । जे होई सके परमात्में दे चुणेयां लोकां जो भी भरमाई दें । 23 अपर तुहां चुकनै रैहआ; दिखा, मैं तुहां जो सारियां गलां पैहले ई ते दस्सी दित्तियां हन ।

माणुये दे पुत्तरे दा दुवारा औणां

(मत्ती 24 : 29-31; लूका 21 : 25-28)

24 "तिन्हां दिनां च, तिसा कस्टिया दे बाद सूरजे नैंहरा होई जाणां ऐ, कने चन्द्रमे दी लौ नी रैहणी; 25 कने अम्बरे ते तारे टिरणां लग्गी पाणे हन; कने अम्बरे दियां ताकतां लाईयां जांगिया । 26 ताहू माणु माणु दे पुत्तरे जो बडिया सामर्था कने महिमा च बदळां पर औंदिया दिखगे । 27 तिस बगत सैह अपणे दूतां जो घल्ली नैं, धरतिया दे इस बरनें ते लैई नैं अम्बरे दे दूये बरनें तिकर, चौनी बक्खेयां ते अपणेयां चुणेयां लोकां जो कठेरगा ।

धूडे दे रुखे दा उदारण

(मत्ती 24 : 32-35; लूका 21 : 29-33)

28 "धूडे दे रुखे ते एह उदारण सिक्खा जाहू तिसदियां डालियां पर कुंबलू औंदे दिखदे हन, कने पतर निकलणा लगदे हन; तां तुहां जो पता लग्गी जाणां कि तौंदिया दा मौसम आई रैहआ ऐ । 29 तिआं ई जाहू तुहां इन्हां गलां जो होंदेयां दिखगे, तांह जाणी लेनेयो कि सैह नैंडे ऐ, अपर दुरआजे पर ई ऐ । 30 मैं तुहां नैं सच ग्लादा कि जाहू तिकर एह सारियां गलां नी होई लैन, ताहू तिकर इन्हां माणुआं दा अंत नी होणां । 31 अम्बर कने धरती टली सकदे हन, अपर मेरियां गलां कदी नी टली सकदियां ।

जागदे रैहआ

(मत्ती 24 : 36-44)

32 "तिस दिने दे कने तिस बगते दे बारे च कोई नी जाणदा, ना सुअर्गे दे दूत कने ना पुत्तर; अपर सिरफ पिता ई जाणदा ऐ । 33 दिखा, जागदे कने प्रार्थना करदे रैहआ; कजोकि तुहां नी जाणदे कि सैह बगत काहू औणां । 34 एह गला तिस माणुये साइआं ऐ, जेहड़ा परदेश जांदे बगत अपणां घर छड्डी जां, कने अपणे दासां जो हक्क दे, कने हर इक्की जो तिसदा कम्म दस्सी दें, कने

चौकीदारों जो जागदे रहेंगे दा हुक्म दें । 35 इसताई जागदे रहैआ कजोकि तुहां नी जाणदे कि घरे दा मालक काहू आंगा, संजा जो या अधिया राती, या कुकड़े दे बांग दैणे दे बत या लडके जो । 36 इआं नी होयें कि सैह चाणचक आई नैं तुहां जो सुतेयो दिखें । 37 कने जेहड़ा मैं तुहां नैं ग्लांदा, सैही सारेयां जो ग्लांदा : जागदे रहैआ ।”

यीशु मसीह जो जान्नी ते मारणे दी साजस
(मत्ती 26 : 1-5; लूका 22 : 1,2; यूहन्ना 11 : 45-53)

14 दूँ दिनां बाद फसह कने अखमीरे दी रोटिया दा तौआर होणे आळा था । प्रधान याजक कने शास्त्री इसा ताड़ा च थे कि यीशु जो किआं छले नैं पकड़ी नैं मारी दैइये; 2 अपर ग्लांदा थे, “तौआरे दे दिन नी कुत्थी इआं नी होइआं कि सारे लोकां इक्क होई जान ।”

बैतनिय्याह च यीशु मसीह दा अभिषेक
(मत्ती 26 : 6-13; यूहन्ना 12 : 1-8)

3 जाहू यीशु बैतनिय्याह सैहरे च शमौन कोदिये दे घरे खाणां बैठया था, ताहू इक्क जणास संगमरमरे दी इत्तरदानी च जटामानसिया दा बड़ा ई मैंह्या कने सुचा इत्तर लैई नैं आई; कने इत्तरदानियां जो भन्नी नैं इत्तरे जो तिसदे मुँडे पर डोळी दित्ता । 4 अपर कोई कोई अपणे मने च नराज होई नैं ग्लाणां लग्गे, “कि एह इत्तर कजो बरबाद करी दित्ता? 5 कजोकि एह इत्तर त्रै सौ दीनार ते भी जादा बेची नैं गरीबां च बंडया जाई सकदा था ।” कने सैह तिसायो झिडकणां लग्गे । 6 यीशुयें ग्लया, “इसा जो बक्शी दैआ; इसा जो कजो सतादे हन? इन्नै तां मिन्जो नैं भलाई किती ऐ । 7 कंगाल तुहां अल्ल हमेशा रँहदे हन, कने तुहां जाहू चान तिन्हां नैं भलाई करी सकदे हन; अपर मैं तां तुहां अल्ल हमेशा नी रहैणा ऐ । 8 जेहड़ा कुच्छ सैह करी सकी, इन्नै किता; इन्नै मेरे अंतिम संस्कारे ते पैहले ई मेरे शरीरे च इत्तर मळी दित्ता ऐ । 9 मैं तुहां नैं सच ग्लांदा कि सारे संसारे च जित्थू कुत्थी सुसमाचार प्रचार किता जांगा, औत्थू इसादे इस कम्मे दी चर्चा भी तिसादी यादा च किती जांगी ।

यहूदा इस्करियोतिये दा धोखा
(मत्ती 26 : 14-16; लूका 22 : 3-6)

10 ताहू यहूदा इस्करियोती जेहड़ा बाराह चेलयां च इक्क था, प्रधान याजकां अल्ल गैआ कि यीशु जो तिन्हां दे हत्थे पकडुआई दे । 11 सैह एह सुणी नैं खुश होये, कने तिस जो रपईये दैणे दा करार किता, कने सैह मौका तोपणां लग्गा कि तिसियो किआं पकडुआं ।

यीशु मसीह दा चेलयां सौगी फसह दा आखरी खाणां
(मत्ती 26 : 17-25; लूका 22 : 7-14 यूहन्ना 13 : 21-30)

12 अखमीरी रोटि दे तौआरे दे पैहले दिने जियाडी सैह फसह दा बलिदान करदे थे, यीशुये दे चेलयां तिसते पूछया, “तू कुत्थू चाहंदा ऐ कि अहां जाई नैं तिजो ताई फसह खाणे दी त्यारी करिये । 13 तिन्हीं अपणे दूँ चेलयां जो एह ग्लाई नैं घल्लेया कि सैहरे जो जा, कने इक्क माणु पाणिये दा घड़ा लैई नैं जा दा तुहां जो मिलगा, तिसदे पचाहू चली जानैयां । 14 कने सैह जिस घरे च जांगा, तां तिस घरे दे मालके नैं ग्लाणां, “गुरु ग्लांदा हन कि मेरा कमरा कुत्थू ऐ । जिस च मैं अपणे चेलयां सौगी फसह खाई सकें । 15 सैह तुहां जो सजियो सज्जाइयो कने त्यार कित्तियो बडी बौड दस्सगा, तिन्थु अहां ताई त्यार करा । 16 चले निकळी नैं सैहरे च आये, कने जिआं तिन्हीं तिन्हां जो ग्लया था, तिआं ई होया; कने फसह त्यार किता । 17 जाहू संज होई, तां यीशु बारां चेलयां सौगी तिस घरे जो आया । 18 जाहू सैह बैठी नैं खाणां खा दे थे, तां यीशुयें ग्लया, “मैं तुहां नैं सच ग्लांदा कि तुहां च इक्क जेहड़ा मिन्जो सौगी खाणां खा दा ऐ, सैह मिन्जो पकडुआंगा ।” 19 तिन्हां दा मुँ उतरी गैआ कने सैह इक्क इक्क करी नैं तिसियो ग्लाणां लग्गे, “क्या सैह मैं ऐ?” 20 यीशुयें तिन्हां नैं ग्लया, “सैह बारां च इक्क ऐ, जेहड़ा मिन्जो सौगी इक्की थालिया च खा दा ऐ, 21 कजोकि माणु दा पुत्तर तां, जिआं तिसदे बारे च पवित्रशास्त्रे च लिख्या ऐ, जाणां ई ऐ; अपर तिस माणु पर हाय जिसदिया बजाह ते माणु दा पुत्तर पकडुआया जांदा ऐ । जे तिस माणुये दा जन्म ई नी होंदा, तां तिस ताई भला हुंदा ।

प्रभु भोज

(मत्ती 26 : 26-30; लूका 22 : 14-20; 1 कुरिन्थियों 11 : 23-25)

22 जाहू सैह खाणां खा दे थे, तिन्हीं रोटि लैई कने आशीर्वाद मंगी नैं तोड़ी, कने तिन्हां जो दित्ती, कने ग्लया, “एह मेरा शरीर ऐ ।” 23 भिरी तिन्हीं कटोरा लैई नैं धन्यावाद किता, कने तिन्हां जो दित्ता, कने तिन्हां सारेयां तिसते पीत्ता । 24 कने यीशुयें तिन्हां जो ग्लया, “ एह कित्यो वायदे दा मेरा सैह खून ऐ, जेहड़ा मतेआं ताई बहाया जांदा ऐ । 25 मैं तुहां नैं सच ग्लांदा कि अंगूरा दा रस तिस दिन तिकर भिरी कदी नी पींगा, जाहू तिकर परमात्में दे राज्य च नौआं नी पीयें ।” 26 भिरी सैह भजन गाई नैं बाहर जेतूने दे पहाड़े पर चली गै ।

पतरसे दे मुकरी जाणे दी भविष्यवाणी

(मत्ती 26 : 31-35; लूका 22 : 31-34 यूहन्ना 13 : 36-38)

27 ताहू यीशुयें तिन्हां नैं ग्लया, “तुहां सबना ठोकर खाणी ऐ, कजोकि लिख्या ऐ : मैं रक्खवाले जो मारगा, कने भेडां रुआंह परांह खंडरोई जांगियां । 28 अपर मैं अपणे जिंदे होणे दे बाद तुहां ते पैहले ई गलीले जो जांगा ।” 29 पतरसें यीशु जो ग्लया, “सारे ठोकर खान तां खान, अपर मैं ठोकर नी खांगा ।” 30 यीशुयें पतरसे जो ग्लया, “मैं तिजो नैं सच ग्लांदा कि अज्र ई इसा राती जो कुकड़े दे दो बरी बांग दैणे ते पैहले, तैं त्रै बरी मिन्जो ते मुकरी जाणां ।” 31 अपर पतरसें होर जोर देई नैं ग्लया, “जे मिन्जो तिजो सौगी मरणां भी पौयें, तमी मैं तिजो ते कदी नी मुकरगा ।” होर नी भी इआं ई ग्लया ।

गतसमनी बागे च प्रार्थना

(मत्ती 26 : 36-46; लूका 22 : 39-46)

32 भिरी सैह गतसमनी नांये दी इक्की जगाह च आये, कने तिन्हीं अपणे चेलयां नैं ग्लया, “जाहू तिकर मैं प्रार्थना करे, ऐत्थू ई बैई रहैआ, 33 कने सैह पतरसे कने याकूबे कने यूहन्ने जो अपणे सौगी लैई गैआ; कने बड़ा ई दुखी कने बेचैन होणां लग्गा; 34 कने तिन्हां नैं ग्लया, “मेरा मन बड़ा दुखी ऐ, ऐत्थू तिकर कि मेरिया जान्नी पर बणी आइयो ऐ : तुहां ऐत्थू रुका । कने जागदे रहैआ ।” 35 भिरी सैह थोडा गांह बधया कने धरतिया पर उंदे मुँ पैई नैं प्रार्थना करणां लग्गा कि जे होई सकें तां एह दुखे दी घड़ी मिन्जो ते टली जां । 36 कने ग्लया, “हे अब्बा, हे पिता, तिजो ते सब कुच्छ होई सकदा ऐ; इस कटोरे मिन्जो ते हटाई ले; तमी जिआं मैं चाहंदा तिआं नी, अपर जेहड़ा तू चाहंदा ऐ सैई होयें ।” 37 भिरी सैह आया, कने तिन्हां जो सुतेयो दिखी नैं ग्लया, हे शमौन तू सुत्तेया ऐ? क्या तू इक्क घड़ी भी नी जागी सकेया?” 38 जागदे कने प्रार्थना करदे रहैआ कि तुहां परीक्षा च नी पौन । आत्मां तां त्यार ऐ, अपर शरीर कमजोर ऐ ।” 39 कने सैह भिरी चली गैआ कने तिआं ई प्रार्थना किती । 40 भिरी आई नैं तिन्हां जो सुतेयो दिख्या, कजोकि तिन्हां दियां अखी निंदरा च भरौइआं थियां; कने नी जाणदे थे कि तिसियो क्या जबाब दैन । 41 भिरी त्री बरी आई नैं तिन्हां नैं ग्लया, “हुण तुहां सोंदे रहैआ, सैह घड़ी आई दुकियो ऐ । दिखा माणु दा पुत्तर पापिया दे हत्थ पकडुआया जाणे आळा ऐ । 42 उठा चलिये ! दिखा मिन्जो पकडुआणे आळा नैंडे आई रहैआ ऐ ।”

यीशु मसीह जो धोखे नैं पकडुणां

(मत्ती 26 : 47-56; लूका 22 : 47-53 ; यूहन्ना 18 : 3-12)

43 सैह एह ग्ला दा था कि यहूदा जेहड़ा बारां चेलयां च इक्क था, अपणे सौगी प्रधान याजकां कने शस्त्रियां कने स्याणेयां दे पाससे ते इक्क बडी भीड लैई नैं ताहू ई आई रहैआ, जिन्हां अल्ल तलवारां कने डांगा थियां । 44 तिसदे पकडुआणे आळे तिन्हां जो एह नशाणी दित्ती कि जिसदा मैं पुक्का लैंगा सैई ऐ तिसियो पकड़ी नैं ध्याने नैं लैई जानैयां । 45 सैह आया, कने ताहू ई तिस अल्ल आई नैं ग्लया, “हे रब्बी !” कने तिसदा पुक्का लैआ । 46 ताहू तिन्हां तिस पर हत्थ पाई नैं यीशु जो पकड़ी लैआ । 47 तिन्हां च जेहड़े बक्खे खडूतेयो थे, इक्की चेलें झट तलवार खींजी नैं महायाजके दे दासे पर चलाई, कने तिसदा कन्न बड्डी दित्ता । 48 यीशुयें तिन्हां नैं ग्लया, “क्या तुहां डाकू समझी नैं मिन्जो पकडुणे ताई तलवारां कने डांगां लैई नैं आयेयो हन? 49 मैं तां हर रोज तुहां जो मंदरे च तुहां सौगी रैई नैं उपदेश दिंदा था, कने ताहू तां तुहां मिन्जो पकेडया नी; एह इसताई होया ऐ कि पवित्रशास्त्र दियां गलां

पूरियां होन ।⁵⁰ एह सब दिखी करी सारे चले तिसियो छड्डी नैं नठी गै ।
51 इक्क जुआन अपणे नंगे शरीरे पर चादर उठी नैं यीशु दे पचाह चला; कने
लोकां तिसियो चेला समझी नैं पकड़ी लैआ ।⁵² अपर सैह चादरा छड्डी नैं
नंगा नठी गैआ ।⁵³ भिरी सैह यीशु जो महायाजके अल्ल लैई गै; कने सारे
प्रधान याजक कने स्याणे कने शास्त्री तित्थु कडुरोई गै ।⁵⁴ पतरस डरदा
डरदा तिसदे पचाह पचाह महायाजके दे घरे दे अंगणे तिकर चला गैआ, कने
सपाईयां सौगी बैई नैं करी अग्गी तपणां लग्गी पैआ ।⁵⁵ प्रधान याजक कने
सारी महासभा यीशु जो मारणे ताई तिसदे बरखलाफ गवाही दी तोपा च थे,
अपर नी मिली ।⁵⁶ कजोकि मत्ते सारे तिसदे बरखलाफ झूठी गवाही दे थे,
अपर तिन्हां दी गवाही इक्क देयी नी थी ।⁵⁷ ताहू कुच्छ लोकां उठी नैं यीशु दे
बरखलाफ एह झूठी गवाही दित्ती, ⁵⁸ "अहां इसियो एह ग्लां दे सुणया ऐ, 'मैं
इस हत्थे दे बणायेयो मंदरे जो ढाई दिंगा, कने त्रीं दिनां च दूआ बणाई दिंगा,
जेहड़ा हत्थे नैं नी बणया होये ।'⁵⁹ एह गवाही भी तिन्हां दी इक्क देई नी थी ।

महासभा दे सामणे यीशु मसीह

(मत्ती 26 : 57-68; लूका 22 : 54, 55, 63-71; यूहन्ना 18 : 13,14, 19-24)

⁶⁰ ताहू महायाजके बिच खडोई नैं यीशु ते पूछया, "तू कोई जबाब नी
देणा? एह माणु तेरे बरखलाफ क्या गवाही दे दे हन?"⁶¹ अपर सैह चुप ई
रैहूआ, कने कुच्छ जबाब नी दित्ता । महायाजके तिसियो भिरी पूछया, "क्या
तुहां तिस परम प्रधान परमात्मं दे पुत्तर मसीह हन?"⁶² यीशुयें ग्लया, "हां नैं
ऐ; कने तुहां माणु दे पुतरे जो सर्वशक्तिमान परमात्मं दे सज्जे बक्खें बैठयो,
कने अम्बरे दे बदळां सौगी ओं दे दिखगे ।"⁶³ ताहू महायाजके अपणे कपडे
फाड़ी नैं ग्लया, "हुण अहां जो गवाहियां दी होर क्या जरूरत ऐ?"⁶⁴ तुहां एह
निंदा सुणी । तुहां दी क्या राय ऐ?" तिन्हां सारेयां ग्लया कि एह जात्री ते
मारणे जोगा ऐ ।⁶⁵ ताहू कुच्छ तां तिस पर थूकणां, कने तिसदा मुं ढक्की नैं
तिसियो मुक्के मारणां, कने तिसियो ग्लानां लग्गे "भविष्यवाणी कर !" कने
सपाईयां तिसियो पकड़ी नैं चप्पैडां मारियां ।

पतरसे दा मुकरना

(मत्ती 26 : 69-75; लूका 22 : 56-62; यूहन्ना 18 : 15-18, 25-27)

⁶⁶ जाहू पतरस थलै अंगणे च बैठया था, तां महायाजके दिया नौकराणियां
च इक्क ओत्थु आई, ⁶⁷ कने पतरसे जो अग्गी तपदे दिखी नैं तिसियो बड़िया
गौरा नैं दिखी नैं ग्लानां लग्गी, "तू भी तां तिस नासरी यीशु सौगी था ।"
⁶⁸ सैह मुकरी गैआ, कने ग्लया, "मैं ना ई जाणदा, ना ई समझदा कि तू क्या
ग्लया दी ऐ ।" भिरी सैह अंगणे बाहर गैआ; कने कुक्के बांग दित्ती ।⁶⁹ सैह
नौकराणी तिसियो दिखी नैं तिन्हां नैं जेहडे बक्खें खडूत्तेयो थे, भिरी ग्लानां
लग्गी, "एह तिन्हां च इक्क ऐ ।"⁷⁰ अपर पतरस भिरी मुकरी गैआ । थोड़ी देरा
बाद तिन्हां जेहडे बक्खें खडूत्तेयो थे भिरी पतरसे जो ग्लया, पक्का तू तिन्हां
च इक्क ऐ; कजोकि तू तां गलीली भी ऐ ।"⁷¹ ताहू सैह कसम खाणां लग्गा, "मैं
तिस माणु जो, जिसदी तुहां चर्चा करा दे हन, नी जाणदा ।"⁷² ताहू ई दई
बरी कुक्के बांग दित्ती । पतरसे जो सैह गल्ल याद आई जेहडी यीशुयें तिसियो
ग्लाइयो थी, कुक्के दे दो बरी बांग देणे ते पैहले तैं त्रै बरी मुकरी जाणां ।" कने
सैह इसा गल्ला जो सोची नैं रोणा लग्गा ।

पिलातुस कने यीशु मसीह

(मत्ती 27 : 1,2,11; लूका 23 : 1-5; यूहन्ना 18 : 28-38)

15 भ्याग होंदेआं ई झट पट प्रधान याजकां स्याणेयां कने शस्त्रियां कने
सारिया महासभा आळेयां सलाह करी नैं यीशु जो बन्नी नैं लैई गै,
कने पिलातुसे दे हुआले करी दित्ता ।² पिलातुसें तिसते पूछया, "क्या तू
यहूदियां दा राजा ऐ?" यीशुयें तिसियो जबाब दित्ता, "तू अप्पु ई तां ग्लया दा ऐ
।"³ प्रधान याजक यीशु पर मतिआं गल्लां दा आरोप लगा दे थे ।⁴ पिलातुसें
तिसते भिरी पूछया, "क्या तू कुच्छ जबाब नी दिंदा, दिख एह तिजो पर
कितणियां गल्लां दा आरोप लग्गा दे हन?"⁵ यीशुयें भिरी कुच्छ जबाब नी
दित्ता; ऐत्थु तिकर कि पिलातुस जो बड़ी हैराणी होई ।

मौती दी सजा दा हुक्म

(मत्ती 27 : 15-26; लूका 23 : 13-25; यूहन्ना 18 : 39-19 : 16)

⁶ पिलातुसें तिस तौआरे च कुसी इक्की कैदिये जो जिसियो सैह चाहंदे थे,
तिन्हां ताई छड्डी दैआ करदा था ।⁷ बरअब्बा नांये दा इक माणु तिन्हां
बलवाइआं सौगी जेला च बंद था, जिन्हां दंगे च खून कित्या था ।⁸ कने
भीड़ उपर जाई नैं पिलातुस नैं विणती करणां लग्गी, कि जिआं तू अहां ताई
करदा आया तिआं ई कर ।⁹ पिलातुसें तिन्हां जो जबाब दित्ता. "क्या तुहां
चाहंदे हन कि मैं तुहां ताई यहूदियां दे राजे जो छड्डी दै?"¹⁰ कजोकि सैह
जाणदा था कि प्रधान याजकां यीशु जो जलनियां नैं पकडुआया था ।
¹¹ अपर प्रधान याजकां लोकां जो भड़काया था कि सैह बरअब्बा जो ई
तिन्हां ताई छड्डी दै ।¹² एह सुणी नैं पिलातुसें तिन्हां ते भिरी पूछया, "तां
जिसियो तुहां यहूदियां दा राजा ग्लां दे हन, तिसदा मैं क्या करे?"¹³ सैह भिरी
डडी डडी ग्लानां लग्गे, "तिसियो सूलिया पर टूंगी दैआ ।"¹⁴ पिलातुसें
तिन्हां नैं ग्लया, "कजो इन्हीं क्या गुनाह कितेया ऐ?" अपर सैह होर भी डडे,
तिसियो सूलिया पर टूंगी दैआ ।"¹⁵ ताहू पिलातुसें भीड़ा जो खुश करणे दी
इच्छा ते बरअब्बा जो तिन्हां ताई छड्डी दित्ता, कने यीशु जो कोडे ल्गुआई नैं
हुआले करी दित्ता कि सूलिया पर टूंगी दैन ।

सपाईयां ते यीशु मसीह दी बेजती

(मत्ती 27 : 27-31; यूहन्ना 19 : 2-3)

¹⁶ सपाई यीशु जो किल्ले दे अंदरे आल्ले अंगणे च लैई गै, जेहड़ा प्रीटोरियुम
नांये ते जाणेया जांदा ऐ, कने सारिया पलटना जो सद्दी नैं लैई आये ।¹⁷ ताहू
सपाईयां यीशु जो बैजनी कपड़ा लौआया कने कंडेया दा मुकुट बणाई नैं
तिसदे मुँडे पर रखी दित्ता ।¹⁸ कने एह ग्लाइं नैं तिसियो नमस्कार करणां
लग्गे, "हे यहूदियां दे राजे जो अहां दा नमस्कार ।"¹⁹ सैह यीशु दे मुँडे पर
सरकंडे नैं मारदे कने तिस पर थूकदे, कने गोडे टेक्की नैं तिसियो प्रणांम
करणां लग्गे ।²⁰ जाहू सैह तिसदा मजाक डुआई बैठे, तां तिसदा बैजनी
कपड़ा खोली नैं तिसदे कपड़े लौआई करी ताहू ई यीशु जो सूलिया पर टूंगे
ताई बाहर लैई गै ।

यीशु मसीह दा सूलिया पर टंगाया जाणां

(मत्ती 27 : 32-44; लूका 23 : 26-43; यूहन्ना 19 : 17-27)

²¹ सिकन्दर कने रूफुसे दा बुड़ा शिमौन नांये दा इक्क कुरेनी माणु, जेहड़ा
ग्रांये ते ओआ दा था । तिणछी निकळेया; तिन्हां तिसियो जबरदस्ति
पकडेया कि यीशु दी सूलिया चुकी नैं लैई चल ।²² सैह यीशु जो गुलमुता
नांये दिया जगाह च जिसादा मतलब ऐ खोपडी दी जगाह ऐ, तित्थु लैई आये
।²³ तित्थु तिसियो अंगूरा दे रसे च गन्धरस मलाई नैं देणां लग्गे, अपर तिन्हीं
नी लैआ ।²⁴ ताहू तिन्हां यीशु जो सूलिया पर टूंगया कने तिसदे कपडेयां पर
पचियां पाई नैं कि कुसियो क्या मिले, तिन्हां जो बडी लैआ ।²⁵ सैह इक्क
पैहर दिन चढी आया था, जाहू तिन्हां तिसयो सूलिया पर टूंगया ।²⁶ कने
तिसदा दोष पतर लिक्खी नैं तिसदे उपर लगाया गैआ कि "यहूदियां दा
राजा" ।²⁷ सपाईयां तिस सौगी दूँ डाकुआं जो इक्क तिसदे सज्जे कने इक्क
तिसदे खबे पारसें सूलिया पर टंगाई दित्ते ।²⁸ [ताहू पवित्रशास्त्रे दा सैह
वचन कि सैह सौगी गिणया गैआ : पूरा होया, ।]²⁹ कने तित्थु रस्ते च जाणे
आळे मुँडे लाई लाई करी कने एह ग्लाइं नैं तिसदी निंदा करदे थे, "वाह !
मंदरे टाणे आळेया, कने त्रीं दिनां च बणाणे आळेया !"³⁰ सूलिया ते लौई नैं
अप्पु जो बचाई ले ।"³¹ तिआं ई प्रधान याजक भी, शास्त्रियां सौगी अप्पु च
मजाके नैं ग्लां दे थे, "इन्हीं होरनी जो तां बचाया, अपर अप्पु जो नी बचाई
सकदा ।³² इस्राएल दा राजा कने मसीह, हुण जे एह सूलिया पर ते लौई
ओंये कि अहां दिखी नैं वसुआस करन" कने जेहडे तिस सौगी सूलिया पर
टूंगयो थे, सैह तिसदी निंदा करा दे थे ।

यीशु मसीह दा प्राण त्यागणां

(मत्ती 27 : 45-56; लूका 23 : 44-49; यूहन्ना 19 : 28-30)

³³ दपैर होणे पर सारे देशे च नैहरा होई गैआ, कने त्रिये पैहरे तिकर छाई
रैहूआ ।³⁴ त्रिये पैहरे यीशुयें बड़िया उचिया उआजा च ग्लया, "इलोई
इलोई, लमा शबकत्नी?" जिसदा मतलब एह ऐ, कि हे परमात्मां, हे मेरे

परमात्मां, तें मिनजो कजो छड्डी दित्ता?" 35 जेहडे माणु बक्खे खडूतेयो थे, तिन्हां च कुच्छना एह सुणी नें ग्लाय, "दिखा एह तां एलिय्याह जो सद्दा ऐ।" 36 कने इक्की दौडी नें स्पजे जो सिरके च डबोया, कने सरकडे पर रखी नें यीशुये जो चुसणे जो दित्ता। कने तिन्हीं ग्लाय, "रुकी जा, दिखी तां लेंदे कि एलिय्याह इसियो लीणा औंदा ऐ कि नी।" 37 ताहू यीशुये जोरे नें डडी नें प्राण छड्डी दित्ते। 38 तिस बग्त मंदरे दा पडदा उपरे ते लेंई नें थलें तिकर फटी नें दो टुकडे होई गैआ। 39 जेहडा सूबेदार तिसदे सामने खडूतेया था, जाहू तिसियो इआं डडी नें प्राण छड्दे दिख्या, तां तिन्हीं ग्लाय, "सचमुच एह माणु, परमात्में दा पुत्तर था।" 40 मतिआं जणासां दूरे ते दिखा दिया थियां; तिन्हां च मरियम मगदलीनी, कने 'याकूबे' कने 'योससे' दी मां कने सलोमी थी, 41 जाहू यीशु गलीले च था तां एह जणासां तिसदे पचाह चलदियां थियां कने तिसदी सेवा टहल करदियां थियां; कने होर भी मतिआं जणासां तिन्हां सौगी यरुशलमे ते तित्थु आईयां थियां।

यीशु मसीह जो कब्रा च रखेया जाणां

(मत्ती 27 : 57-61; लूका 23 : 50-56; यूहन्ना 19 : 38-42)

42 जाहू संज होई तां इसताई कि तयारी दा दिन था, जेहडा सब्द दे इक्क दिन पैहले हुंदा ऐ, 43 अरिमतिया सैहरे दा रैहणे आळा यूसुफ आया जेहडा महासभा दा सदस्य था कने अप्पु भी परमात्में दे राजे दे इतजारें च था। सैह हिम्मत करी नें पिलातुसे अन्न गैआ कने यीशु दी लाश मंगी। 44 पिलातुस बडा हैरण होया कि सैह इतणी तौळी मरिया; कने तिन्हीं सूबेदारे जो सददी नें पूछ्या, "तिसयो मरेयो कितणी देर होई।" 45 जाहू तिन्हीं सूबेदारे ते सारा हाल जाणी लैआ, तां लाश यूसुफे जो दुआई दित्ती। 46 ताहू तिन्हीं मलमले दी इक्क चादर मूलें लैई, कने लाशा जो लौआई नें तिसा चादरा च लपेट्या, कने इक्की कब्रा च जेहडी चड्डाना पर कोरियो थी रखी दित्ता, कब्रा दे मुंमें पर इक्क भारी पत्थर खसकाई नें कब्रा दे मुंमें पर रखी दित्ता। 47 मरियम मगदलीनी कने योसेसे दी मां मरियम दिखा दी थी कि सैह कुत्थू रखया ऐ।

यीशु मसीह दा दुवारा ते जिंदा होणां

(मत्ती 28 : 1-8; लूका 24 : 1-12; यूहन्ना 20 : 1-10)

16 जाहू सब्द दा दिन बीती गैआ, तां मरियम मगदलीनी, कने याकूबे दी मां मरियम, कने सलोमी खुशबूआं आळियां चीज्जां मूलें लैईयां कि आई नें तिस पर मळ न। 2 हफते दे पैहले दिन बडी भ्यागा जाहू सूरज निकळा दा ई था, सैह कब्रा पर आईयां। 3 कने अप्पु च ग्लादियां थियां, "अहां तांई कब्रा दे मुंमें ते पत्थरे कुण टांगा?" 4 जाहू सैह कब्रा च पुज्जिआं, तां दिख्या कि पत्थर कब्रा दे मुंमें ते तां हटेया था। सैह पत्थर बडा बडा था। 5 कब्रा अंदर जाई नें तिन्हां इक्की जुआने जो जिन्हीं चिट्टे कपडे पैहेयो थे, सज्जे पाससैं बैठयो दिख्या, कने बडियां हैरण होइआं। 6 तिन्हीं तिन्हां नें ग्लाय, हैरान मत होया, तुहां यीशु नासरी जो जेहडा सूलिया पर टूंगया था, तोपा दियां हन, सैह जींदा होइया, ऐत्थू नी ऐ, दिखा, एह ई सैह जगाह ऐ

जित्थू जिन्हां तिसियो रखया था। 7 अपर तुहां जा, कने तिसदे चेलयां कने पतरसे जो ग्ला कि सैह तुहां ते पैहले गलीले जो जांगा। जिआं यीशुयें तुहां जो ग्लाय था, तुहां तित्थु ई तिसियो दिखगे।" 8 कने सैह निकळी नें कब्रा ते नट्टी गैइआं, कजोकि सैह बडियां कमी पैइआं थियां, कने डरियां थियां, कने तिन्हां कुसियो कुच्छ नी दस्सया, कजोकि डरा दियां थियां।

मरियम मगदलीनी जो यीशु मसीह दा दुस्सणां

(मत्ती 28 : 9-10; यूहन्ना 20 : 11-18)

9 हफते दे पैहले दिन भ्यागा होंदेया ई सैह जिंदा होई नें सबते पैहलें मरियम मगदलीनी जो, जिंसाते तिन्हीं सत दुष्टआत्मां कडियां थियां, दुस्सया। 10 तिन्हां जाई नें यीशु दे साथियां जेहडे शोक मनादे थे कने रोया दे थे, खबर सणाई। 11 तिन्हां एह सुणी नें कि सैह जिंदा ऐ कने तिन्हां तिसियो दिख्या ऐ, अपर तिन्हां वसुआस नी कित्ता।

दू होर चेलयां जो भी यीशु मसीह दा दुस्सणां

(लूका 24 : 13-35)

12 इसदे बाच सैह दूर रूपे च तिन्हां दूनी जो जाहू ग्रां दे पाससेयो जा दे थे, दुस्सया। 13 तिन्हां भी जाई नें दूयेयां जो खबर दित्ती, अपर उन्हां भी तिन्हां पर भी वसुआस नी कित्ता।

बादे च ग्यारां चेलयां जो भी यीशु मसीह दा दुस्सणां

(मत्ती 28 : 16-20; लूका 24 : 36-49; यूहन्ना 20 : 19-23 चेलयां दे कम्म 1 : 6-8)

14 बाच सैह जिन्हां ग्यारां जो भी, जाहू सैह खाणां बैठयो थे दुस्सया कने तिन्हां दे वेवसुआसे कने मने दी कठोरता पर लामा दित्ता, कजोकि जिन्हां तिसदे जिंदा होणे दे बाच दिख्या था, इन्हां तिन्हां पर वसुआस नी कित्ता था। 15 कने यीशुयें तिन्हां नें ग्लाय, "तुहां सारे संसारे च जाई नें सारिया सृष्टिया दे लोकां जो सुसमाचार प्रचार करा। 16 जेहडा वसुआस करगा कने बपतिस्मा लेंगा तिस दा ई उद्धार हुंगा, अपर जेहडा वसुआस नी करगा सैह दोषी ठेहराया जांगा; 17 वसुआस करणे आळियां च एह नशाण होंगे कि सैह मेरे नांये ते दुष्टआत्मां जो कडगे, नौई नौई भासा बोलगे। 18 सर्पां जो भी चुकी लेंगे, कने जे सैह जेहरे आळियां चीज्जां भी पी जान, तमी तिन्हां दा कुच्छ नकसान नी होणां ऐ।

यीशु मसीह दा सुअर्गे पर चुकया जाणां

(लूका 24 : 50-53; चेलयां दे कम्म 1 : 9-11)

19 प्रभु यीशु तिन्हां नें गल्लां करणे दे बाच सुअर्गे जो चुकया गैआ, कने परमात्में दे सज्जे पाससैं बैई गैआ। 20 कने तिन्हां निकली नें हर जगाह प्रचार कित्ता, ने प्रभु तिन्हां सौगी कम्म करदा रैहआ, कने तिन्हां नशाणियां दिया बजाह ते जेहडे सौगी सौगी होंदे थे वचना च मजबूत करदा रैहआ। आमीन।

लूका

भूमिका

यीशुदे दे बारे चा एह सुसमाचार लूका नां दे इक्की यीशु दे चेलें लिख्या ऐ। लूका अपणे जमाने दा इक्क मनेया-तनेया वैध कने इतिहासकार था। लूका इस सुसमाचारे बिच लिखदा है कि यीशु इस्रालियां ताई ता परमात्मं दा वादा कित्या होया मुक्तिदाता ऐ अपर संसारे दे बाकि लोकां ताई बी मुक्तिदाता बणी करी आया। लूका लिखदा है कि, यीशु जो “गरीबां लोकां जो परमात्मं दा सुसामाचार सुनाणे ताई परमात्मं दिया आत्मां तिसियो घल्लया।” इसा बजाह ते एह सुसमाचार कैईआं किस्मां दिआ मुश्कलां बिच फसेयो लोकां दियां चिंता नैं भरौया ऐ। जाहू अहां सुसमाचारे जो पढ़ना शुरू करदे हन तां अहां जो खुशी दी गल्ल पढ़ने जो मिलदी ऐ कि लूका यीशु दा इस संसारे च ओणे दी खबर सणांदा ऐ कने मुकदेयां पाठां च लूका लिखदा ऐ कि परमात्मं किआं यीशु सुअर्गं जो चुक्की लैआ। यीशु दे सुअर्गं जो चुक्की लेणे ते बाद किआं वसुआसे दी बडोतरी होई कने जगाह-जगाह वसुआसे दा विस्तार, एह सारी जानकारी लूके “चेलयां दे कम्म” नाये दिया कताबा च लिखयो हन। यीशु दे बारे च लूके कुछ ऐसियां गल्लां बी लिखियां हन जेहिडियां कि होरी सुसमाचारे च नी मिलदियां हन। जिआं कि यीशु दे जन्म दी खुशकबरिया दे स्वर्गदूता दा गाणां, चरवाहेयां दा यीशु जो खुरलिया च दिखणां, यीशु जाहू बारां साला दा ई था तां यरुशलम दे मंदरे चा किआं स्याणयां सौगी गल्लां करा करदा, दयालू सामरी कने उजाडू पुत्र दा उदारण। पूरे सुसमाचारे च अहां दिखदे हन कि किआं लूका प्रार्थना, पवित्र आत्मां कने यीशु सौगी लोकां दिया सेवा च लगिया जणांसा दी हिस्सेदारी कने परमात्मां किआं लोकां देयां पापां जो माफ करदा, इन्हां सारियां गल्लां पर लूका अपणे लिखयो सुसमाचार जेहड़ा कि यीशु दे बारे च ऐ, जोर दित्या ऐ।

रूप रेखा

भूमिका 1: 1- 4

यूहन्ना बपतिस्मा दैणे आळा कने यीशु दा जन्म कने बचपन 1: 5 --- 2: 52

यूहन्ना बपतिस्मा दैणे आळे दी सेवा 3: 1- 20

यीशु मसीह दा बपतिस्मा कने परख 3: 21 --- 4: 13

गलीले च यीशु मसीह दी सेवा 4: 14 --- 9: 50

गलीले ते यरुशलम तिकर यात्रा 9: 51 --- 19: 27

यरुशलम च आखरी हफता 19: 28 --- 23: 56

प्रभु यीशु मसीह दा दुआरा जिंदा होणां, कने दुस्सणां, सुअर्गं च चुकेया जाणां 24: 1- 53

परिचय

1 हे श्रीमान थियुफिलुस जी, इसताई कि मतेआं तिन्हां गल्लां जो जेहिडियां अहां दे बिच होईयां थियां, इतिहास लिखणे इन्हां साथ दित्या। 2 जिआं कि सैह माणु पैहले ते ई इन्हां गल्लां जो अपणियां अंखी नैं दिखणे आळे कने वचनां दे दास थे, तिन्हां एह गल्लां अहां तिकर पुजाईयां। 3 तां मिन्जो भी एह ठीक लग्गा कि तिन्हां सारियां गल्लां दा पूरा हाल शुरू ते ठीक - ठीक जांच परख करणे दे बाद ई तिन्हां जो इक्क इक्क करी नैं तुहां ताई लिखें। 4 कजोकि तुहां एह जाणी लैन कि सैह गल्लां जिन्हां दी तुहां सीख लियो ऐ, कितणियां अटल हन।

यूहन्ना दे जन्म दी घोषणां

5 एह तिस बग्ते दी गल्ल ऐ जाहू यहूदिया प्रदेशे च हेरोदेस राजे दा राज था, तां तित्थु जकरियाह नांये दा इक्क याजक था, कने तिसदी लाडी हारून दे वंशे दी थी जिसा दा नां इलीशिबा था। 6 जकरियाह कने इलीशिबा परमात्मं सामणे बडे धर्मी थे, कने परमात्मं दे सारे हुक्मां कने विधिया पर सीधे मने नैं चलणे आळे थे 7 अपर तिन्हां दी कोई भी औलाद नी थी, कजोकि एलीशिबा बांझ थी, कने सैह दोयो जबरें थे।

8 जाहू जकरियाह अपणी मंडलिया सौगी परमात्मं सामणे याजके दा कम्म करदा था। 9 तां याजकां दिया रीतिया मताबक तिस दे नांये पर चीडी निकली कि प्रभु दे मंदरे च जाई नैं धूप बाळ। 10 धूपे बाळणे दे बगत अराधना करणे आळे माणुआं दी सारी मण्डली बाहर प्रार्थना करा दी थी। 11 तां तिसदे सामणे परमात्मं दा इक्क स्वर्गदूत धूपे बाळणे आळिया जगाह दे सज्जें पाससं खूडतेया तिस जो दुस्सया। 12 जकरियाह तिसियो दिखी नैं विजकेया कने मने च उरना लग्गा। 13 अपर स्वर्गदूतें तिस नैं ग्लया, “हे जकरियाह, उरें मत कजोकि तेरी प्रार्थना सुणी लैईयो ऐ; कने तेरिया लाडिया इलीशिबा

ते तिजो ताई इक्क जागत पैदा होणां, कने तू तिसदा ना यूहन्ना रखेयां।

14 तिसदे पैदा होणे पर तां तुहां खुश होणां ऐ अपर होर माणुआं भी खुश होंगे। 15 कजोकि सैह परमात्मं सामणे म्हान होणां, कने अंगूरा दा रस कने शराब कदी नी पीगां; कने अपणियां माऊ दे पेटे च ई पवित्र आत्मां दी सामर्थी नैं भरौई जांगा; 16 कने इस्रालियां ते मतेआं जो तिन्हां दे प्रभु परमात्मं दे पाससे फेरगा। 17 कने परमात्मं दे भविष्यवक्ता एलियाह दी आत्मां कने सामर्थी च भरौई नैं तिस दे गांह गांह चलगा कि मां बुडेयां दा मन बाल बच्चेयां दे पाससे फेरी दे; कने हुक्म नी मनणे आळियां जो धर्मियां साइआं समझ दें; तांकि प्रभु ताई इक्क खरी मानस जात तयार होई सकें।

18 तां जकरियाह सुअर्गदूते ते पूछया, “एह मैं किआं मनी लैं, कजोकि मैं कने मेरी लाडी जबरें होई गैयो हन।” 19 सुअर्गदूते तिसजो जबाब दित्ता, “मेरा नां जिब्राईल ऐ, जेहड़ा परमात्मं सामणे खडौई रेंहदा ऐ; परमात्मं मिन्जो तिजो अल्ल एह खुशखबरी सणाणे जो घल्लया ऐ। 20 दिख, जाहू तिकर एह गल्लां पूरीयां नी होई जान, ताहू तिकर तू गुंगा रेंहगा कने ग्लाय नी सकगा, कजोकि तैं मेरीयां गल्लां दा वसुआस नी किन्ता जेहडियां कि अपणे बग्ते पर पूरीया होणियां। 21 माणु जकरियाह जो निहालणा खडूतेयो थे सैह सोचणां लगे कि जकरियाह जो मंदरे च इतणी देर कजो लग्गी। 22 जाहू सैह बाहरेयो आया, तां सैह तिन्हां जो सणांकां लगाणां लग्गा, कजोकि सैह ग्लाय नी सकदा था, तिन्हां: तां बाहर खडूतेयो माणु सब जाणी गै कि अंदर जरूर इसियो कुसकी दे दर्शन होयो हन। 23 जाहू तिसदी सेवा करणे दे दिने पूरे होई गै, तां सैह अपणे घरेयो चली गैआ।

24 तिन्हां दिना ते बाद तिसदी लाडी इलीशिबा गर्भवती होई; अपर सैह पंज मीहे तिकर माणुआं ते लुक्की रेंई। 25 सैह ग्लाय थी कि, “माणुआं च मेरी बदनामी दूर करणे ताई, परमात्मं इन्हां दिनां च दयादृष्टि करी नैं मिन्जो ताई इआं किर्तिया ऐ।”

यीशु मसीह दे जन्म दी घोषणां

26 जाहू इलीशिबा जो छैमां मीह्ना लगैआ, तां परमात्मं जिब्राईल स्वर्गदूत जो, गलीले नांये दे जिले दे नासरत शैहर च, मरियम नांये दिया इक्की कुआरिया कुडिया अल्ल घब्लेया । 27 जिसा दी मंगणी यूसुफ नांये दे माणु नैं होईयो थी: जेहड़ा कि राजा दाउदे दे खानदाने दा था । 28 स्वर्गदूतें तिसा अल्ल जाई करी ग्लाय मरियम तेरी जय होयें! तिजो पर परमात्मं दी दया होई ऐ कने सैह तिजो सौगी ऐ । 29 सुअर्गदूते दी एह गल्ल सुणी करी मरियम डरी गैई, कने सोचणां लगी कि इसा गल्ला दा क्या मतलब ऐ । 30 सुअर्गदूते तिसा जो ग्लाय, हे मरियम, डरें मत, कजोकि परमात्मं दी कृपा तिजो पर होईयो ऐ । 31 दिख, तू गर्भवती होंगी, कने इक्क जागत जमणा; तू तिसदा नां यीशु रखेयां । 32 सैह म्हान होणां कने परमप्रधाने दा पुत्तर होणां; कने प्रभु परमात्मं तिसियो तिसदे पूर्वज दाऊद राजे दा सिंहासण देणां । 33 कने सैह याकूब दे घराने पर सदा राज करगा; कने तिसदे राजे दा अन्त नी होणां । 34 तां मरियमे सुअर्गदूते नैं ग्लाय, “एह किआं हुंगा । मैं तां कुआरी ऐ ।” 35 सुअर्गदूते तिसा जो जबाब दिता, “पवित्र आत्मां कने परमप्रधान दी छतरछाया तिजो पर बणी रहणी ऐ; इसताई सैह जेहड़ा तिजो ते पैदा होणेआळा ऐ, सैह पवित्र कने परमात्मं दा पुत्तर होणां । 36 होर क्या ग्लां, तेरी रिशतेदार इलीशिबा, जिसा जो माणु बांझ ग्लां दे थे, गर्भवती ऐ कने तिसा जो छैमां मीह्ना लगैआ । 37 कजोकि जेहड़ा वचन परमात्मं दे पास्से ते हुंदा ऐ सैह वेअसर नी हुंदा । 38 मरियमा ग्लाय, दिख, मैं प्रभु दी दासी ऐ, जिआं सैह चाहंदा तिआ ई होयें ।” ताहू सुअर्गदूत तित्थु ते चली गैआ ।

मरियमा दा इलीशिबा नैं मिलणां जाणां

39 तिन्हां दिना च मरियम झटपट त्यार होई करी प्हाडी लाक्के दे यहूदा प्रदेशे दे इक्की सैहरे जो गैई, । 40 कने जकरियाह दे घरे च पुज्जी करी इलीशिबा जो नमस्कार किता । 41 जिआं ई इलीशिबा मरियमा दा नमस्कार सुणेयां, तिआं ई बच्चा तिसदे पेटे च उटकया, कने इलीशिबा पवित्र आत्मां नैं भरौई गैई । 42 सैह जोरे नैं ग्लाय लगी, मरियम तू सारियां जणांसा च धन ऐ, कने धन ऐ तेरे पेटे दा फळ । 43 एह अनुग्रह मिन्जो कतांह ते आया, कि मेरे प्रभु दी मां मिन्जो अल्ल आईयो ऐ, 44 दिख, जिआं तेरे नमस्कारे दा शब्द मेरे कनां च पैआ, तां तिआं ई बच्चा मेरे पेटे च खुशिया नैं उटकी पैआ । 45 धन एह तू कि जाहू परमात्मं दी गल्लां पर वसुआस किता कि जेहडी भी सुअर्गदूते तिजो नैं ग्लाय सैह जरूर पूरी होणी ऐ ।

मरियमा दा स्तुति गीत

46 ताहू मरियमा ग्लाय, “मेरी जान प्रभु दी तारीफ करदी ऐ । 47 कने मेरी आत्मां मेरा उद्धार करणे आळे परमात्मं च खुश ऐ, 48 कजोकि परमात्मं अपणिया दासिया दी दीनता पर दयादृष्टि किती ऐ; इसताई दिखा, अज्जे ते बाद सारे जुगा दे माणु मिन्जो धन ग्लां, 49 कजोकि सर्वशक्तिमान परमात्मं मिन्जो ताई बड़े- बड़े कम्म किन्तेयो । कने तिसदा नां पवित्र ऐ, 50 जेहड़े तिसदा डर मनदे तिन्हां पर तिसदी दया पीढ़ी ते पीढ़ी तिकर बणी रँहदी ऐ । 51 तिन्हीं अपणां जोर दस्सेया, कने जेहड़ा अपणे आपेयो बडे समझदें हन, सैह तितर बितर करी दित्यो । 52 तिन्हीं ताकतबरां जो सिंहासणा ते सट्टी दिता; कने दीनां जो ऊचां किता । 53 तिन्हीं भूखेयां भाणेयां जो खरियां चीजां नैं रज्जाया, कने अमीरां जो खाली हाथ कड्डी दिता । 54 तिन्हीं अपणे सेवकां इस्त्राएली माणुआं जो सम्भाली लैआ, कि अपणियां तिसा दया जो याद करन । 55 जेहड़ी अब्राहमं कने तिसदे वंशे पर सदा रँहगी, जेहड़ा तिन्हीं अहां दे स्याणेयां नैं ग्लाय था । 56 मरियम कोई त्रै मीह्ने तिकर इलीशिबा सौगी रँई करी अपणे घरेयो हट्टी आई ।

यूहन्ना बपतिस्मा दैणेआळे दा जन्म

57 जाहू इलीशिबा दे प्रसूता होणे दे दिन पूरे होये, तां तिन्ने जागते जो जन्म दिता । 58 तिसा दे नेहड़ प्डेस कने रिशतेदारां एह सुणी करी बडे खुश होये, कि प्रभुयें तिसा पर दया किती ऐ । 59 कने एह होया कि जाहू सैह अठमं दिने जागते दा खतना करणां आये कने तिसदा नां भी तिसदे बुड़े दे नांये पर जकरियाह रखणां लगे । 60 अपर तिसदिया माऊ ग्लाय, “ना - ना इसदा नां यूहन्ना रखणां ।” 61 तिन्हां तिस नैं ग्लाय, “तेरे खानदाने च तां कुसी दा भी नां यूहन्ना नी ऐ ।” 62 भिरी तिन्हां सणक लाई करी जकरियाह ते पूछया कि तू इसदा नां क्या रखणां चाहंदा ऐ । 63 जकरियाह लिखणे जो पट्टी मंगाई करी, तिसदा ना यूहन्ना लिखी दिता । एह दिखी सब हैरान होई गै । 64 तां ताहू ई तिसदी जवान भी खुली गैई; सैह ग्लाय लगी पैआ कने परमात्मं दा धन्यवाद करणां लगा । 65 एह सब दिखी करी तिसदे अडेसी प्डेसी ऐराण होई नैं डरणां लगे; कने एह गल्ल पूरे यहूदिया प्हाडी लाक्के च फैली गैई, 66 कने सब गल्लां जो सुणने दे बाद माणु अपणे -अपणे मने च वचार करी नैं ग्लाय लगे, “एह जागत कदेया हुंगा?” कजोकि परमात्मं दी सामर्थ इस सौगी थी ।

जकरियाह दा स्तुति गीत

67 तिस बच्चे दा बुड़ा जकरियाह पवित्र आत्मां नैं भरौई करी, भविष्यवाणी करणां लगा । 68 “इस्त्राएले दे प्रभु परमात्मं दी स्तुति होयें, कजोकि तिन्हीं अपणेयां लोका पर दृष्टि किती कने तिन्हां दा छुटकारा किता ऐ । 69 कने तिन्हीं अपणे सेवक दाऊदे दे वंशे ते अहां ताई इक्क सामर्थी उद्धार कर्ता पैदा होया, 70 जिआं तिन्हीं अपणे पवित्र भविष्यवक्तां दे मुंमं ते ग्लाय था, जेहड़े कि पराणे जमाने ते ई होंदे आयेयो हन, 71 मतलब अहां दे दुशमणा ते कने अहां दे सब बैरियां दे हत्थे नैं अहां दा उद्धार करायो ऐ । 72 कि अहां दे स्याणेयां पर दया करी नैं अपणे पवित्र वादे जो याद करा । 73 कने सैह कसम जेहड़ी तिन्हीं अहां दे पिता अब्राहमं नैं खादियो थी । 74 कि सैह अहां जो एह दिगा, कि अहां अपणे दुशमणां दे हत्थे ते छूटी करी, 75 तिसदे सामणे पवित्र कने धर्मी होई करी, जिन्दगी भर निडर होई नैं तिसदी सेवा करदे रँह । 76 हे बच्चे, तू परमप्रधान परमात्मं दा भविष्यद्वक्ता बणना, कजोकि तू परमात्मं दा रास्ता त्यार करणे ताई तिसदे गांह गांह चलगा, 77 कजोकि तिसदे लोका जो उद्धार पाणे दा ज्ञान दै, जेहड़ा कि तिसदे पापां दी माफी ते हासल हुंदा ऐ । 78 एह अहां दे परमात्मं दी तिस बड़ी दया ते हुंगा; जिस दिया बजाह ते ऊपर ते अहां पर तडके दा परगड़ा चमकणां, 79 कि नैहरे कने मौता दी छाऊआं च बैठणे आळेयां जो लौ दैं, कने अहां दे पैरां जो कल्याणे दे रस्ते च सीधे चलां ।” 80 कने सैह जागत बढुदां गैआ कने आत्मां च बलवंत हुंदा गैआ, कने इस्त्राएले च प्रगट होणे दे दिन ते लैई करी सैह ताहू तिकर सुनसाण जगाह च रँहआ,

यीशु मसीह दा जन्म

(मत्ती 1 : 18-25)

2 तिन्हां दिना च राजें औगुस्तुस केसरे अपणे देशे च लोकां दी गिणती करणे दा हुकम दिता । 2 एह पैहली लोकां दी गिणती तिस बग्त होई, जाहू किवरिनियुस सीरिया देशे दा राजपाल था । 3 तां सारे माणु अपणां - अपणां नां लखाणे ताई अपणे - अपणे सैहरे जो गै । 4 यूसुफ भी गलील प्रदेशे दे नासरत सैहरे ते यहूदिया प्रदेशे च दाऊदे दे सैहरे बेतलहमं जो गैआ, कजोकि सैह राजा दाऊद दे परवारे दा कने खानदाने दा सैहर था 5 कि अपणियां मंगंतर मरियमा सौगी जेहड़ी गर्भवती थी, नां लखाणां लैई गैआ । 6 तिसा दे औत्थू रँहदे रँहदे तिसा दे प्रसूता होणे दे दिन पूरे होई गै, 7 कने मरियमा अपणे जेहटे पुत्तरे जो जम्मेया कने तिस जो फालडूये च लपेटी करी

गाई दी खुरलिया च सुआई दित्ता; कजोकि तिन्हां ताई सराई च रैहणे जो जगाह नी मिलियो थी ।

सुअर्गदूतां दे दुआरा चरवाहेयां जो संदेश

8 कने तिस लाक्रे च मते चरवाहे थे, जेहडे राती जो दरबडे च रैई नैं अपणे धणे दा पेहरा करा करदे थे । 9 चानक परमात्मं दा इक्क दूत तिन्हां दे सामणे आई खडूता कने प्रभु दा तेज तिन्हां दे चौनी पारसं चमकेया, कने सैह बडे भरी डरी गै । 10 ताहू सुअर्गदूते तिन्हां नैं ग्लाय, "मत डरा; कजोकि दिखा, मैं तुहां जो बड़ी खुशिया दी खबर सणांदा जेहडी कि सारेयां लोकां ताई होणी ऐ । 11 कि अज्र दाऊद राजे दे सैहर बैतलहम च तुहां ताई इक्क उदारकर्ता पैदा होया ऐ, कने ऐही मसीह प्रभु ऐ । 12 तुहां ताई तिसदी एह पणछेण ऐ कि तुहां जो इक्क बच्चा जेहडा फालडूये नैं लपेटया कने खुरलिया च सुतेया दुस्सगा ।" 13 तां दिखदे दिखदे ई तिस सुअर्गदूते सौगी स्वर्गदूतां दा झुड परमात्मं दी स्तुति करदे होये कने एह ग्लादे दुस्से,

14 सुअर्गं च परमात्मं दी महिमा होयें कने धरतिया च तिन्हां माणुआं जो शान्ति मिले जिन्हां ते सैह खुश ऐ ।"

15 जाहू स्वर्गदूत तिन्हां दे बक्खे ते सुअर्गं जो चली गै, तां चरवाहे अप्पु च ग्लाणां लगे, "ओआ, अहां बैतलहमं जो चलदे कने जेहडी गल्ल परमात्मं अहां जो दस्सियो, तिसा जो जाई करी दिखदे ।" 16 कने तिन्हां ताहू जाई नैं मरियमा कने यूसुफे जो, कने खुरलिया च सैह बच्चा दिख्या । 17 तिन्हां दिखी नैं सुअर्गदूतां दी सैह गल्ल जेहडी इस जागते दे वारे च तिन्हां नैं ग्लाईयो थी, तिन्हां जो दस्सी दित्ती, 18 चरवाहेयां दी गल्लां सुणी करी सारे माणुआं जो हैरानी होई । 19 अपर मरियम तिन्हां सारियां गल्लां जो अपणे मने च रखी नैं सोचदी रैई । 20 चरवाहेयां जिआं तिन्हां नैं ग्लाय था, तिआं ई सब सुणी करी कने दिखी करी परमात्मं दी महिमा कने स्तुति करदे - करदे हट्टी गै ।

यीशु मसीह दा नामकरण

21 यीशुये दे जन्मे दे अठ दिन पूरे होये तां तिसदे खतणे दा बन्त आया, तां तिसदा नां यीशु रखेया जेहडा सुअर्गदूतें मरियमा दे पेटे च ओणे ते पैहले ग्लाई दित्या था ।

मंदरे च यीशु मसीह दा अर्पण

22 जाहू मूसा दी व्यवस्था दे मताबक तिसदे शुद्ध होणे दे दिने पूरे होये, तां सैह तिसियो यरुशलेम सैहरे दे मंदरे च परमात्मं सामणे लैई गै । 23 जिआं कि परमात्मं दी व्यवस्था च लिख्या ऐ, हर जेहटा पुत्तर प्रभु ताई पवित्र ठेहरगा ।" 24 कने परमात्मं दी व्यवस्था दे वचना मताबक घुगियां दा इक्क जोड़ा, या कबूतरे दे दो बच्चे" लैई करी बलिदान करें ।

शमौने दा गीत

25 यरुशलेमे च शिमोन नांये दा इक्क माणु था, कने सैह माणु धर्मी कने भक्त था; कने सैह पवित्र आत्मां नैं भरोया था कने इस्त्राएले दे माणुआं जो शांति दैणे आळे दा इंतजार करा दा था, । 26 कने पवित्र आत्मां तिसियो दस्सेया था कि, जाहू तिकर सैह परमात्मं दे मसीह जो दिखी नी लैगा ताहू तिकर तिसदी मौत नी होणी ऐ । 27 सैह आत्मां दी प्रेरणां ते मंदरे च आया; कने जाहू माँ - बुडे यीशु जो मंदरे च अंदरेयो लैई करी आये, कि व्यवस्था दे मताबक बलि - भेंट चढां । 28 तां तिन्हीं तिस जो अपणिया गोदी च लैआ कने परमात्मं दा धन्यवाद करी नैं ग्लाणां लग्गा कि,

29 "हे मालक, हुण तू अपणे दासे जो अपणे वचने मताबक शांतिया नैं विदा कर,

30 कजोकि हुण मैं अपणियां अंखी नैं तेरे उद्वारे जो दिखी लेया,

31 जिसियो तैं सब देसां दे लोकां ताई घल्लया ।

32 कि सैह होरनी जाति दे लोकां जो लौ दैणे ताई जोती, कने तेरे खास माणु इस्त्राएले दी महिमा होयें ।

33 यीशु दे बारे च गल्लां सुणी नैं यूसुफ कने मरियम बडे हैरान होई गै ।

34 ताहू शिमौने तिन्हां जो आशीवाद दैई नैं, तिसदिया माऊ मरियमा नैं ग्लाय, "दिख, एह बच्चा कईआं इस्त्राएलियां ताई खात्मे दा कने उन्नति दा चिन्ह होणां, जिसदे बिरोध च गल्लां किन्ती जांगियां । 35 इसते कैईआं माणु दे

मने दियां गल्लां दा पता लगणां । इक्क तलवार तेरिया जात्री जो भी चिरदी निकळी जाणी ।"

हन्नाह दी यीशु मसीह दे बारे च गवाही

36 अशेर दे गोत्रे ते फनूल नांये दे इक्की माणुये दी कुडी जिसादा नां हन्नाह था, भविष्यवक्ता थी । सैह जबरी होई गियो थी, तिन्ने सत साल तिकर ई सुहाग कित्या था । 37 सैह चौरासी साल ते विधवा थी, अपर मंदरे जो नी छडदी थी । अपर व्रत कने प्रार्थना करी नैं रात -दिन अराधना करदी थी । 38 कने हन्नाह तिस बग्त औत्थू आई नैं प्रभु दा धन्यवाद करणां लग्गी, कने तिन्हां सारेयां नैं यीशु दे बारे च ग्लाणां लग्गी जेहडे कि यरुशलेम दे छुटकारे दा इंतजार करा करदे थे ।

नासरते जो वापस ओणां

39 जाहू सैह परमात्मं दी व्यवस्था मताबक सब कुछ पूरा करी चुके तां गलील च अपणे सैहरे नासरत जो हट्टी गै । 40 कने जागत बडूदां कने ताकतवर हुंदा कने ज्ञानवान होणां लग्गा; कने परमात्मं दा अनुग्रह तिस पर था ।

जागत यीशु मसीह मंदरे च

41 यीशु दे माँ - बुडा हर साल फसह दे तौआर मनाणे ताई यरुशलेम जांदे थे । 42 जाहू यीशु बारह सालां दा होया, तां सैह रीतिया मताबक तौआरे मनाणा यरुशलेम जो गै । 43 जाहू तौआर मुक्की गैआ तां अपणे घरेयो हट्टणां लगे, अपर जागत यीशु यरुशलेम ई रैई गैआ; कने इसा गल्ला दा तिसदे मांऊ - बुडे जो भी नी पता था । 44 सैह एह समझदे रैह कि यीशु, सौगी चलेयो माणुआं सौगी हुंगा, इक्क दिने दा सफर कट्टी दित्ता, जाहू तिन्हां जो पता लग्गा कि यीशु सौगी नीये तां तिसियो अपणे रिश्तेदारां च कने जाण पहचाण आळे माणुआं च तोपणां लगे । 45 अपर जाहू यीशु नी मिलेया, तां तोपदे - तोपदे यरुशलेम जो भिरी वापस हट्टी गै । 46 तोपदे तोपदे त्रीं दिना बाद तिन्हां जो सैह मंदरे च गुरुआं बिच बैठेया कने तिन्हां सौगी सुआल जबाब करदा दिख्या । 47 जितणे माणु तिसदियां गल्लां सुणां दे थे, सैह सब तिसदी समझा ते कने सुआला जबाबां ते हैरान परेशान थे । 48 ताहू सैह तिस जो दिखी नैं हैरान होये कने तिसदी माँ ग्लाणां लग्गी, "हे पुत्तर तैं अहां सौगी इआं कजो किन्ती, "दिख मैं कने तेरे पिता तिजो तोपदे -तोपदे परेशान होई गैयो थे ।" 49 तिन्हीं तिन्हां नैं ग्लाय, तुहां मिन्जो कजो तोपा दे थे, क्या तुहां जो पता नीये कि मिन्जो अपणे पिता दे घरे च होणां जरूरी ऐ ।" 50 अपर जेहडी गल्ल यीशुयें तिन्हां नैं ग्लाई, सैह तिन्हां दिया समझा च नी आई । 51 ताहू सैह तिन्हां सौगी चली गैआ, कने नासरते च पुज्जे, कने यीशु अपणे माता पिता दा आज्ञाकारी बणी नैं रैहआ; अपर तिसदिया माऊ एह सारियां गल्लां अपणे मने च रखियां । 52 कने यीशु जुआन हुंदा गैआ कने ज्ञाने, डील - डौल च कने परमात्मं कने माणु दी कृपा सौगी गांह बधदा गैआ ।

यूहन्ना बपतिस्मा दैणेआळे दा संदेश

(मत्ती 3 : 1-12; मरकुस 1 : 1-8; यूहन्ना 1 : 19-28)

3 एह घटना राजा तिबिरियुस कैसर दे राजे दे पन्दरां सालां च जाहू पुन्तियुस पिलातुस नांये दा इक्क माणु यहूदिया दा हाकम था, कने राजा हेरोदेस गलीले पर राज करदा था कने तिसदा भाऊ फिलिप्पुस इतूरिया कने त्रखोनितिस जिल्ले पर राज करदा था, कने अबिलेने जिल्ले च लिसानियास राज करदा था । 2 कने तिस बग्त हना कने कैफा महायाजक थे, तिस बग्त परमात्मं दा वचन सुणसान जगाह च जकरियाह दे पुत्तर यूहन्ने अल्ल पुज्जा, 3 सैह यरदन दरैयाए दे अकखे बक्खे दे सारे प्रदेशां च जाई करी प्रचार करणां लग्गा, कजोकि अपणे अपणे पापां दी माफी ताई मन फिराव दे बपतिस्मे दा प्रचार करणां लग्गा । 4 जिआं यशायाह भविष्यवक्ता दे ग्लायो वचना दी कताबा च लिख्या ऐ, कि

" सुनसाण जगाह च कोई हक्कां पांदे सुम्मा दा था कि, "प्रभु दा रस्ता त्यार करा, तिसदियां सडका सीधी करा ।

5 हर इक्क घाटी भरी दिक्ती जाणी, कने सारे पहाड़ कने टिले प्लेन होई जाणे; कने जेहडे टेडे हन सीधे, कने जेहडे उबड़ खाबड़ हन सैह बराबर कित्ते जाणे।

6 कने हर प्राणी परमात्मे दे उद्धार दे दर्शन करणां ।

7 जेहडी भीड़ा दी भीड़ यूहन्ने अल्ल बपतिस्मा लैणे जो नकळी नैं ओंटी थी, तिन्हां नैं सैह ग्लांदा था, "हे सर्प दे बच्चेयो, तुहां जो कुणी दस्सी दिक्ता कि आणे आळे गुस्से ते नठा । 8 अपणे मनां जो पापां ते फेरी करी दे सबूत दैआ, कि सच मुच्च तुहां मन फेरी लैं हन कने एह सोचणां छडी दैआ "कि अहां तां पिता अब्राहम दे वंशे हन; तां अहां बची जाणां ।" कजोकि मैं तुहां नैं ग्लांदा ऐ कि परमात्मां इन्हां पत्थरां ते भी अब्राहमे तांई औलाद पैदा करी सकदा ऐ । 9 हुण गल्ल इआं कि कुआडी रुखे दिया जड़ा पर रखी दिक्तियो ऐ, इसतांई जेहड़ा खरा फळ नी दिगा, कने सैह बड्डी करी अग्गी च फूकेया जाणां ऐ । 10 ताहू लोकां तिसते पूछ्या, "तां अहां क्या करन ।" 11 यूहन्ने तिन्हां जो जबाब दिक्ता, "जिसा अल्ल दो करते हन, सैह तिस सौगी जिस अल्ल नी हन बंडी ले कने जिस अल्ल खाणयो ऐ, सैह भी इआं ई करे । 12 चुंगी लैणे आळे भी बपतिस्मा लैणां आये, कने तिसते पूछणां लग्गे, "हे गुरु, अहां क्या करन?" 13 तिन्हीं तिन्हां नैं ग्लाय, "जेहड़ा तुहां जो लैणे तांई दस्सेया तितणां ई लैआ करा, अपर धोखा धडी नैं तिस ते ज्यादा मत लेंदे । 14 भिरी सपाईयां भी तिसते पूछणां लग्गे, "अहां क्या करन?" तिन्हीं तिन्हां नैं ग्लाय, "कुसी ते रिश्त मत लेंदे कने ना ई कुसी पर झूठा मकदमा चलांदे, कने जितणी तणखा तुहां जो मिलदी ऐ तिस च ई गुजारा करणां ।"

15 जाहू लोक यीशु दिया निहालपा च बैठयो थे, कने सारे अपणे -अपणे मने च यूहन्ने दे बारे च वचार करा दे थे कि क्या ऐही मसीह तां नी ऐ । 16 तां यूहन्ने तिन्हां सबना जो ग्लाय, मैं तां तुहां जो पाणियें ते बपतिस्मा दिंदा ऐ, अपर सैह ओणे आळा ऐ जेहड़ा मिन्जो ते ताकतवर ऐ; मैं तां इस जोमा भी नी कि तिसदे जूतेयां दे तस्मेयां दी गड्डी भी खोली सके; सैह तां तुहां जो पवित्र आत्मां कने अग्गी नैं बपतिस्मा दिंदा । 17 तिसदा सूप तिसदे हत्थे च ऐ; कने सैह अपणे खेतां जो अच्छी तरांह नैं साफ करगा; कने कणका कणका जो अपणे पेडूये च इकड्डा करगा; अपर भू जो तिसा अग्गी च जेहडी बुझदी नी फूकी दिंदा ।

18 इन्हीं साहभं यूहन्ने खरियां गलां सणांई करी लोकां जो सुसमाचार सणांदा रहैआ । 19 अपर जाहू यूहन्ने गलील देश दे राजा हेरोदेसे जो अपणे भाऊ फिलिप्पुसे दी लाडी हेरोदियासा जो अपणी बनाणे दे बारे च कने तिन्हां सारे कुकर्मदे कम्मां दे बारे च जेहडे तिन्हीं कित्तेयो थे दस्सी दिक्ता । 20 हेरोदेस यूहन्ने जो कैदी बणांई करी इक्क होर जुल्म करी दिक्ता ।

यूहन्ने दा बपतिस्मा

(मत्ती 3 : 13-17; मरकुस 1 : 1-8; यूहन्ना 1 : 19-28)

21 सारे लोकां दे बपतिस्मा लैणे ते बाद यीशु भी जाहू बपतिस्मा लैई करी प्रार्थना करणां लग्गा, तां अम्बर खुली गैआ । 22 कने पवित्र आत्मां कबूतरे दे रूपे च तिस पर उतरैया, कने एह आकाशवाणी होई : "तू मेरा प्यारा पुत्र ऐ, मैं तिजो ते खुश ऐ ।

यीशु मसीह दा खानदान

(मत्ती 1 : 1-17)

23 जाहू यीशु परमात्मे दे वचाना दी सेवा करणां लग्गा, तां सैह कोई तीयां सालां दा था [जिआं कि माणु यीशु जो यूसुफे दा पुत्र समझदे थे, तां तिसदी वंशावली इआं ऐ कि, यीशु यूसुफे दा पुत्र था कने सैह एलिये दा, 24 कने सैह मत्ताते दा, कने सैह लेविये दा कने सैह मलकी दा, कने सैह यन्ना दा, कने सैह यूसुफे दा । 25 कने सैह मत्तित्याह दा, कने सैह आमोसे दा, कने सैह नहूमे दा, कने सैह असल्य्याह दा, कने सैह नोगह दा । 26 कने सैह माते दा, कने सैह मत्तित्याह दा, कने सैह शिमी दा, कने सैह योसेखे दा, कने सैह योदाह दा, 27 कने सैह यूहन्ने दा, कने सैह रेसे दा, कने सैह जरुब्बबिले दा, कने सैह शालतियेले दा, कने सैह नेरी दा, 28 कने सैह मलकी दा, कने सैह अद्दी दा, कने सैह कोसामे दा, कने सैह इलमोदामे दा, कने सैह एरे दा, 29 कने सैह येशू दा, कने सैह इलाजारे दा, कने सैह योरीमे दा, कने सैह मत्ताते दा, कने सैह लेविये दा, 30 कने सैह शमौने दा, कने सैह यहूदाह दा, कने सैह यूसुफे दा, कने सैह योनाने दा, कने सैह इलयाकीमे दा, 31 कने सैह

मलेआह दा, कने सैह मिन्नास दा, कने सैह मत्ताता दा, कने सैह नातान दा, कने सैह यिशै दा, कने सैह ओबेदे दा, कने सैह बोअजे दा, कने सैह सलमोने दा, कने सैह नहशोने दा, 33 कने सैह अम्मीनादाबे दा, कने सैह अरनी दा, कने सैह हिस्त्रोने दा, कने सैह फिरिसिये दा, कने सैह यहूदाह दा, 34 कने सैह याकूबे दा, कने सैह इसहाके दा, कने सैह अब्राहमे दा, कने सैह तिरहे दा, कने सैह नाहारे दा, 35 कने सैह सरुगे दा, कने सैह रऊ दा, कने सैह फिलिगे दा, कने सैह एबिरे दा, कने सैह शिलहे दा, 36 कने सैह अरफक्षदे दा, कने सैह शेमे दा, कने सैह नूहे दा, कने सैह लिमिके दा, 37 कने सैह मथूशिलह दा, कने सैह हनोके दा, कने सैह यिरिदे दा, कने सैह महललेले दा, कने सैह केनाने दा, 38 कने सैह इनोशे दा, कने सैह शेते दा, कने सैह आदमे दा, कने सैह परमात्मे दा ।

यीशु मसीह दी परख

(मत्ती 4 : 1-11; मरकुस 1 : 12,13)

4 यीशु बपतिस्मा लैणे दे बाद पवित्र आत्मां नैं भरौई करी, यरदन दरैयाए ते वापस चलिया; कने चाली दिनां तिकर आत्मां दे चलाणे ते सैह सुनसाण जगाह च फिरदा रहैआ । 2 कने सैतान तिसदी परीक्षा करदा रहैआ । तिन्हां दिनां च तिन्हीं कुछ नी खादा, कने जाहू सैह दिन पूरे होये, ताहू तिस जो भूख लग्गी । 3 भिरी सैताने तिस नैं ग्लाय, "जे तू परमात्मे दा पुत्र ऐ, तां इस पत्थरे नैं ग्ला, कि रोटी बणी जा ।" 4 यीशुयें तिस जो जबाब दिक्ता, "लिख्या ऐ कि, "माणु सिर्फ रोटिया नैं ई जिंदा नी रहैगा । 5 भिरी सैतान यीशु जो बडी उचिया जगाह च लैई गैआ, कने संसारे दे नजारे जो दस्सी करी ग्लाणां लग्गा, 6 "मैं इस संसारे दा हक्क कने अधिकार तिजो दिंदा, कजोकि एह सब मिन्जो दिक्ता ऐ, कने मैं जिसियो चां तिसियो दैई सकदा ऐ । 7 जे तू मिन्जो मन्ने कने पूजे, तां एह सब कुछ तेरा होई जाणां । 8 यीशुयें तिस जो जबाब दिक्ता, "पवित्रशास्त्रे च लिख्या ऐ : तू प्रभु परमात्मे दी पूजा कर; कने सिर्फ तिसियो ई मन्ना कर ।" 9 ताहू सैतान तिसियो यरुशलम जो लैई गैआ कने मंदरे दिया चुंडिया पर अणी करी ग्लाणां लग्गा, "जे तू परमात्मे दा पुत्र ऐ, तां ऐत्थू ते छाल दैई दै । 10 कजोकि पवित्रशास्त्रे च लिख्या ऐ, "सैह तेरे बारे च अपणे सुअर्गदूतां जो हुक्म दिगा, कि सैह तेरी हिफाजत करन । 11 तिन्हां तिजो हत्थां पर चुकी लैणां, कने तेरे पैरां च पत्थर नैं ठोकर भी ना लग्गे ।" 12 यीशुयें तिसियो जबाब दिक्ता, "पवित्रशास्त्रे च एह भी लिख्या ऐ, "तू प्रभु अपणे परमात्मे जो मत परखदा ।" 13 जाहू सैतान यीशु दी परख लैई बैठा, नौये मोके दिया निहालपा च कुछ बग्त तांई तिसजो छडी करी चली गैआ ।"

यीशु मसीह दा सेवा दे कम्मां दी शुरूआत

(मत्ती 4 : 12-17; मरकुस 1 : 14,15)

14 भिरी यीशु आत्मां दी सामर्थी नैं भरौई करी गलीले जो वापस आया, कने तिसदी चर्चा अक्खे बक्खे दे सारे देशे च फैली गैई । 15 सैह तिन्हां दे आराधनालयां च शिक्षा दिंदा रहैआ, कने सब तिसदी खराई करदे थे ।

नासरत सैहरे च यीशु मसीह दा अपमान

(मत्ती 13 : 53-58; मरकुस 6 : 1-6)

16 यीशु नासरत ग्रां च आया, जित्थू सैह पाळेया था; कने अपणी रीति रुआंजा मताबक सब्त के दिन आराधनालय च गैआ कने पवित्रशास्त्रे जो पढ़ने तांई खडौता । 17 यशायाह भविष्यवक्ता दी कताब तिसियो पढ़ने तांई दिक्ती, कने तिन्हीं कताब खोली करी कने एह पढी करी सणाया कि

18 प्रभु परमात्मे दी आत्मां मिन्जो पर ऐ, तिन्हीं मिन्जो पर अभिषेक कित्या कि मैं गरीबां जो सुसमाचार सणाणां, कने तिन्हीं मिन्जो इसतांई घल्लया कि कैदी जो छुटकारे दा कने अन्ने जो तिन्हां दी अंखी खोलने दा सुसमाचार प्रचार करे कने माणुआं दे सतायां जो छड्डां ।"

19 कने प्रभु परमात्मे दी कृपा कने दया दा प्रचार करे ।"

20 तां इतणां पढ़ने दे बाद यीशुयें कताब बंद करी कने सेवकां दे हत्थे च दैई दिक्ती कने बैठी गैआ; कने आराधनालय दे सारे लोकां दी नजर तिस पर लगियो थी । 21 ताहू यीशु तिन्हां नैं ग्लाणां लग्गा, "अज तुहां दे सुणने ते ई पवित्रशास्त्रे दा एह वचन पूरा होया । 22 सब माणु तिस जो सराहा करदे थे कने तिसदे मुंमे ते निकळदे वचना जो सुणी करी हैरान होये; कने ग्लाणां

लम्गे, क्या एह यूसुफ का पुत्र नी ऐ? 23 यीशुयें तिन्हां नें ग्लाय़ा, “मिन्जो पता तुहां मिन्जो पर एह टोट जरूर कसणां कि 'हे वैधा' पैहलें अपणे आप्पे जो ठीक तां करी लै! अहां सुणेयां कि जेहड़ा कुच्छ कफरनहम सैहरे च कमाया ऐ; सैह ऐत्थू अपणे देशे च भी कम्मा ।” 24 कने तिन्हीं ग्लाय़ा, “मैं तुम नें सच ग्लांदा ऐ कोई भविष्यवक्ता अपणे लाक्रे च कदी भी इज्जत नी पांदा । 25 कने मैं तुहां नें सच ग्लांदा ऐ कि एलिय्याह दे दिनां च जाहू साढ़े तीनां सालां तिकर अम्बर बंद रहैआ, ऐत्थू तिकर कि सारे देशे च बड़ा अकाल पैआ, तां इस्त्राएले च मतिआं विधवा थियां । 26 अपर एलियाह सैदा सैहरे दे सारफत प्राये दी गैर यहूदी विधवा जो छड्डी नें होर कुसी अन्न नी घल्लया । 27 कने एलिशा भविष्यवक्ता दे बरत इस्त्राएले च मते भरी कोढ़ी थे, अपर परमात्में सीरिया देशे दे गैर यहूदी नामान कोढ़ी जो छड्डी करी होर कोई खरा नी किता ।” 28 एह ग्लानां सुणदे ई जितणे भी आराधनालय च थे, सब गुस्से होई गै । 29 कने उठी करी यीशु जो अपणे पाहड़ी सैहरे ते बाहर कड्डी करी, तिसदे कनारे पर लैई गै तांकि तित्थू ते तिसियो थलें रड्काई दैन । 30 अपर सैह तिन्हां दे बीचे ते निकळी करी चली गैआ ।

बुरिया आत्मां दे सताये जो थी करणां

(मरकुस 1 : 21-28)

31 भिरी सैह गलीले दे कफरनहम सैहरे जो गैआ; कने सब्त दे दिन लोकां जो शिक्षा दे दा था । 32 सैह तिसदिया शिक्षा ते हैरान होई गै कजोकि तिसदा वचन अधिकारे सौगी हुंदा था । 33 आराधनालय च इक्क माणु था, जिस च दुष्टआत्मां थियां । सैह जोरे नें डडी करी ग्लानां लग्गा, 34 हे यीशु नासरी, तू अहां ते क्या चाहंदा, क्या तू अहां जो नाश करणां आया ऐ, मैं तिजो जानदा ऐ तू कुण ऐ, तू परमात्में दा पुत्र ऐ ।” 35 यीशुयें तिस जो झिडकी नें ग्लाय़ा, “चुप रहू, कने इस माणु ते निकळी जा ।” तां तिस माणु जो दुष्टआत्मां सबना माणुये दे सामणे मरोडी करी थलें सट्टी दित्ता कने कोई नकसान किन्तेयो बौर तिस ते निकळी गैई । 36 एह दिखी करी सबना जो हैरानी होई, कने सैह अप्पु च ग्लानां करणां लग्गे, कि “एह कितणे ताकतवर कने सामर्थी वचन हन, कजोकि सैह अधिकारे नें कने सामर्थी सौगी दुष्टआत्मां जो हुक्म दिंदा ऐ, कने सैह निकळी जादियां हन ।” 37 इस तरांह यीशु दी चर्चा चौंनो पारस्सं होणां लग्गी ।

पतरसे दिया ससु जो कने होरनी लोकां जो ठीक करणां

(मत्ती 8 : 14-17; मरकुस 1 : 29-34)

38 यीशु आराधनालय ते निकळी करी शमोने दे घरे जो गैआ । तिस बरत शमोने दी ससु जो बुखार चढ़ेया था, तां तिन्हां तिसा तांई तिस नें विणती किन्ती । 39 तिन्हीं तिसा बकरें खडौई करी बुखारे जो फटकार लगाई कने बुखार उत्तरी गैआ, कने सैह झटफट उठी नें तिसदी सेवा करणां लग्गी । 40 संजा दे बरत, जिस कुसी दे घरे च कोई भी बमारियां दे बमार माणु थे, सैह सबना जो तिस अन्न लैई आये, कने तिन्हीं इक्की इक्की माणु पर हत्थ रखी करी तिन्हां जो खरा किता । 41 कने दुष्टआत्मां भी डडदियां कने एह ग्लांदियां कि, “तू परमात्में दा पुत्र ऐ, “मते माणुआं ते निकळी गैईयां । अपर यीशु तिन्हां जो झिडकदा था कने ग्लानां नी दिंदा था, कजोकि सैह जाणदियां थियां कि सैह मसीह ऐ ।

आराधनालायां च प्रचार करणां

(मरकुस 1 : 35-39)

42 जाहू भ्याग होई तां यीशु तित्थु ते निकळी करी सुनसाण जगाह जो गैआ, भिरी भी माणुआं दी भीड़ तिसजो तोपदी होई तिसदे पचांह चली आई, कने तिस जो एह ग्लाइ करी रोकणा लग्गी. कि अहां जो छड्डी करी मत जा । 43 अपर यीशुयें तिन्हां नें ग्लाय़ा, “मिन्जो दूयेयां सैहरां च भी परमात्में दे राजे दा सुसमाचार सनाणां जरूरी ऐ, कजोकि मिन्जो इस कम्मे तांई परमात्में ई घल्लया ऐ ।” 44 कने सैह गलीले दे आराधनालायां च प्रचार करदा रहैआ ।

सबते पैहलें चेलयां जो चुणना

(मत्ती 4 : 18-22; मरकुस 1 : 16-20)

5 यीशु जाहू गलील देशे दे गनेसरत नांये दिया झीला दे कंडे खडूनेया था तां माणुआं दी बड़ी भारी भीड़ तिसदे चौंनो पारस्सं खडौई करी

परमात्में दा वचन सुणना लगियो थी तां क्या होया कि, 2 यीशुये दी नजर तिसा झीला दे कंडे खडूतियां दूँ किस्तियां पर पैई, तिन्हां ते मुछ्वारे लौई करी अपणे जाळयां धोआ करदे थे । 3 तां यीशु इक्की किस्तिया पर चढ़ी गैआ, जेहड़ी कि शमोन नांये दे इक्की माणुये दी थी, कने तिस नें ग्लानां लग्गा, किस्तिया कंडे ते थोड़ी देयी गांह लैई चल ।” तां सैह तिसा किस्तिया च बैई करी तिन्हां माणुआं जो वचन सनाणां लग्गा । 4 जाहू सैह वचन सणाई बैठा तां शमोने नें ग्लाय़ा, किस्तिया डुगिया जगाह च लैई चल, कने मच्छियां पकड़णे तांई अपणे जाळे पाणिते च सट्ट । 5 तां शमोने तिसियो जबाब दित्ता, “हे मालक, अहां तां पूरी रात मेहनत करदे रहै अपर करख भी पले नी पैआ ; अपर चलो जे तुहां ग्लादे हन तां अहां भिरी जाळ सट्टे हन ।” 6 जाहू शमोने जाळ सट्टेया तां मती भरी मच्छियां तिसदे जाळे च फसी गैईयां, कने तिसदा जाळ छकूई चला । 7 तां एह दिखी करी तिन्हां अपणे संगी साथियां जो जेहडे दूईया किस्तिया च थे, सणक लाई करी सदणा लग्गा कि आई करी अहां दी मदद करा, कने तिन्हां आई करी दूनी किस्तियां इतणी भरी लैईयां कि डूबाणां लगियां । 8 एह दिखी करी शमोन पतरस यीशु दे पैरां पर पैई करी ग्लानां लग्गा, “हे प्रभु मेरे बकरे ते चली जा कजोकि मैं पापी माणु ऐ ।” 9 कजोकि इतणी भरी मच्छियां पकड़णे ते तिसियो कने तिसदे साथियां जो बड़ी हैरानी होई । 10 कने जबदिये दे पुत्र याकूब कने यूहन्ने जो भी जेहडे तिस सौगी थे एह दिखी करी हैराणगी होई । ताहू यीशु शमोने नें ग्लानां लग्गा, “उर मत हुण जिआं तू मच्छियां पकड़दा था अज्जे दे बाद तैं माणु परमात्में दे पारस्सं फेरने तांई पकड़णे हन ।” 11 कने सैह किस्तियां जो कंडे पर लैई आये कने सब किच्छ छड्डी करी यीशु दे पचांह चली पै ।

कोढ़ी माणुये जो ठीक करणां

(मत्ती 8 : 1-4; मरकुस 1 : 40-45)

12 भिरी इक्की सैहरे च यीशुये दी मुलकात इक्की कोढ़िये सौगी होई, जिसियो बड़ा भारी कोढ़ था, सैह यीशु दे पैरां पैई करी प्रार्थना करणां लग्गा, हे प्रभु जे तू चांह तां मिन्जो खरा करी सकदा ऐ ।” 13 यीशुयें हत्थ बधाई करी तिसियो छूता कने ग्लाय़ा, “मैं चाहंदा ऐ, कि तू खरा होई जा ।” कने तिसदा कोढ़ ताहू ई चली गैआ । 14 तिसते बाद यीशुयें तिस नें ग्लाय़ा, “जेहड़ा किच्छ तिजो नें होया तिसियो कुसियो मत दरस्सदा, सीधा अपणे याजके जो जाई करी दरस्स, कने अपणे खरे होणे दे बारे च जेहड़ा कुच्छ मूसें दी विधी मताबक चढ़ावा तिसियो चढ़ा कि तिन्हां पर गवाही होये । 15 अपर यीशु दे कम्मां दी चर्चा होर भी फैलदी गैई, भिरी भीड़ा दी भीड़ तिसदी सुणने तांई कने अपणी बमारियां ते ठीक होणे तांई कड्डी होई । 16 अपर सैह तिन्हां ते दूर जाईकरी बणे च प्रार्थना करदा था ।

अधरगे दे बमार माणुये जो ठीक करणां

(मत्ती 9 : 1-8; मरकुस 2 : 1-12)

17 इक्क दिन इआं होया कि सैह वचन सनाणां लग्गेया था, कने तित्थु फरीसी कने कानूना जो मनणे आळे यहूदी भी बैठयो थे सैह गलील कने यहूदिया दे हर सैहरां ते कने ग्रां कने यरूशलेम ते आयेयो थे, कने बमारा जो ठीक करणे दी सामर्थ यीशु च थी । 18 तां तित्थु कुच्छ माणु अधरगे दे इक्की रोगिये जो मंजोलूये च चुकी करी लैई आये, सैह तिसियो यीशुये अन्न अंदरयो लिये दा तरीका तोपणां लग्गे, 19 अपर तित्थु भीड़ इतणी थी कि अंदर पैर रखणेयो जगाह भी नी थी तां सैह माणु छत्ती पर चढ़ी गै कने तिन्हां सेलां कुआई करी सैह माणु मंजे समेत तिस भोक्के ते यीशुये सामणे लौआई दित्ता । 20 तिन्हीं तिन्हां दा वसुआस दिखी करी तिस नें ग्लाय़ा, “हे माणु, तेरे पाप माफ होये ।” 21 तां एह दिखी करी शास्त्री कने फरीसी अप्पु च ग्लानां लग्गे, “एह कुण ऐ जेहड़ा परमात्में दी निंदा करदा ऐ, परमात्में जो छड्डी करी होर कोई पापां जो माफ नी करी सकदा ऐ?” 22 यीशुयें तिन्हां दे मने दियां ग्लानां जाणी नें ग्लाय़ा, “तुहां अपणे मने च क्या ग्ला करदे हन ।” 23 सोखा क्या ऐ, क्या एह ग्लानां कि 'तेरे पाप माफ होये, 'या एह ग्लानां कि ' उठ कने चल फिर ।” 24 अपर एह इसताई कि तुहां जो पता लग्गी जां कि माणु दे पुत्रे जो पाप माफ करणे दा हक्क ऐ, तिन्हीं तिस अधरगे दे रोगिये नें ग्लाय़ा, कि मैं तिजो नें ग्लांदा ऐ, कि उठ कने अपणे मंजोलूये चुकी करी अपणे घरेयो चली जा ।” 25 सैह इक्क दम उठेया कने तिन्हां दे दिखदे दिखदे जिस मंजोलूये पर सैह पैआ था तिसियो चुकी करी परमात्में दी महिमा करदा अपणे घरेयो चली

गैआ । 26 एह दिखी करी सारे हैरान होई करी परमात्में दी महिमा करणां लमगे कने बड़े डरीकरी ग्लाणां लमगे, "अज्र अहां बड़ा चमत्कार दिख्या ऐ ।

लेवी माणुये जो सदणां

(मत्ती 9 : 9-13; मरकुस 2 : 13-17)

27 कने इसते बाद यीशु सैहरे ते बाहर गैआ, कने तित्थु इक्क लेवी नांये दा चुंगी लैणे आळे माणुये जो चुंगी दी चौकिया पर बैठया दिख्या, कने यीशुयें तिस नें ग्लया, मिन्जो पचाह चली पौ । 28 ताहू सैह सब किच्छ छडी करी यीशुये पचाह चली पैआ । 29 कने लेवियें अपणे घरे बडी धाम लगाई; कने धामा च लेवियें अप्पु सौगी कम्म करणे आळ्यां जो कने होर मतेआं परोणेयां जो सदया, कने मत्ती भीड़ थी । 30 इसा गला पर फरीसी कने तिन्हां दे शास्त्री तिसदे चेलयां नें एह ग्लाई करी कुडकुडाने लमगे, "तुहां चुंगी लैणे आळ्यां कने पापियां सौगी कजो खांदे पींदे हन ।" 31 यीशुयें तिन्हां जो जबाब दिता, वैध भले कने चंगैआ तांई नी, अपर बमारां तांई जरूरी होंदे हन । 32 में धर्मियां जो नी, अपर पापियां जो बचाणे तांई आया ऐ ।"

व्रते दा सबाल

(मत्ती 9 : 14-17; मरकुस 2 : 18-22)

33 तिन्हां तिस नें ग्लया "युहने के चले तां बराबर व्रत रखदे कने प्रार्थना करदे हन, कने तिआं ई फरीसियां दे चले भी करदे, अपर तेरे चले तां खांदे पींदे हन ।" 34 यीशुयें तिन्हां नें ग्लया, "जाहू तिकर लाड़ा बरातियां सौगी ऐ, तां तुहां बरातियां ते व्रत करवाई सकदे हन ।" 35 अपर सैह दिन आंगे, जधडी लाड़ा तिन्हां ते लग्ग किता जांगा, ताहू सैह तिन्हां दिनां च व्रत करेगे ।" 36 यीशुयें इक्क होर गल्ल सणाई करी ग्लया, कि कोई भी माणु नौये कपड़े छेकी करी पराणां किन्नू तिस च नी लगांदा, नी तां नौये छकूई जाणां कने पराणे किन्नूयें तिस नें मेल भी नी खाणां ।" 37 कोई नौआं अंगूरा दा रस पराणियां सराइआं च नी भरदा, कजोकि नौआं अंगूरा दा रस तिन्हां सराइआं जो फाड़ी करी निकळी जांगा, कने सराइआं भी खराब होई जाणियां । 38 नौआं अंगूरा दा रस नौईयां सराइआं च भरणां चाइदा । 39 जेहड़ा कोई पराणां अंगूरा दा रस पी करी नौआं नी चाहंदा कजोकि सैह ग्लांदा ऐ, कि पराणां ई ठीक ऐ ।

सब्त दा प्रभु

(मत्ती 12 : 1-8; मरकुस 2 : 23-28)

6 भिरी जाहू सबते आळे दिने यीशु चेलयां सौगी कणका देयां खेतां ते होई करी जा दे थे, कने तिस दे चले कणका दे सिलेयां तोडी करी हत्थां च मली मली करी खा करदे थे । 2 तां फरीसी ग्लाणां लमगे, "तुहां सैह कम्म कजो करदे हन जेहड़ा सब्त दे दिन करणां ठीक नी ऐ ।" 3 यीशुयें तिन्हां जो जबाब दिता, "क्या तुहां एह नी पढेया कि दाऊदें जाहू सैह कने तिसदे साथी भूखे थे तां तिन्हां क्या किता ।" 4 क्या सैह परमात्में दे मंदरे च नी गै? कने तित्थु चढावे दियां रोटियां नी खादियां, जिन्हां जो खाणां याजकां जो छडी करी होर कुसी जो भी ठीक नी था ।" 5 कने तिन्हीं तिन्हां नें ग्लया, "माणु दा पुत्तर सब्त दे दिने दा भी प्रभु ऐ ।"

सूके हत्थ आळे माणुये जो ठीक करणां

(मत्ती 12 : 9-14; मरकुस 3 : 1-6)

6 इआं होया कि कुसी होर सब्त दे दिने सैह आराधनालय च जाई करी शिक्षा देंगां लमगा; कने तित्थु इक्क माणु था जिसदा खब्बा हत्थ सूकेया था । 7 शास्त्री कने फरीसी तिस पर दोष लगाणे दा मोका तोपा करदे थे सैह ग्लाणां लमगे, कि अज्र दिखदे हन कि सैह सब्त दे दिने ठीक करदा ऐ कि नी । 8 अपर यीशु तिन्हां दे मने दे वचारां जो जाणदा था; इसतांई तिन्हीं सूके हत्थे आळे माणुयें नें ग्लया, "उठ, बीच खडौई जा ।" सैह उठी करी खडौई गैआ । 9 यीशुयें तिन्हां नें ग्लया, "में तुहां ते एह पुछदा ऐ कि सब्त दे दिने क्या ठीक ऐ, खरा या बुरा करणां; जान्नी जो बचाणा या नाश करणां ।" 10 ताहू यीशुयें तित्थु बैठयां सारे माणुआं जो दिखी करी तिस माणुयें नें ग्लया, "अपणे हत्थे गांह कर ।" तिन्हीं अपणां हत्थ गांह किता कने तिसदा हत्थ ठीक होई गैआ ।" 11 अपर शास्त्री कने फरीसी आपे ते बाहर होई करी अप्पु च सोचणां लमगे कि अहां यीशुये नें क्या करन ।"

बारां चेलयां जो चुणना

(मत्ती 10 : 1-4; मरकुस 3 : 13-19)

12 तिन्हां दिना च सैह पहाडे पर प्रार्थना करणां गैआ, कने पूरी रात परमात्में नें प्रार्थना करदे बिताई ।" 13 जाहू भ्याग होई तिन्हीं अपणे सब चले अप्पु अल्ल सदे कने तिन्हां च बारह चले चुणी ले, कने तिन्हां जो चले बणाई दिता; 14 कने तिन्हां दे नां एह हन :शमौन जिसदा नां पतरस भी रखया, तिसदा भाऊ अन्द्रियास, याकूब कने यूहन्ना कने फिलिप्पुस कने बरतुल्मै, 15 कने मत्ती कने थोमा, कने हलफईये दा पुत्तर याकूब, कने शमौन जिसदा नां जेलोतेस भी ऐ, 16 कने याकूब का पुत्तर यहुदा, कने यहुदा इस्करियोती जिन्हीं बादे च यीशु जो पकड़वाया था ।

शिक्षा देंगां कने ठीक करणां

(मत्ती 4 : 23-25)

17 ताहू यीशु अपणे चेलयां सौगी पहाडे ते लौई आया कने इक्क खुलिया जगाह च खडौईया, कने तिसदे होर चले दूरे दूरे ते कने यहुदिया देश दे कने यरुशलमे दे, कने सूरे दे कने सैदा दे समंदरी लाक्के दे मते माणु कठरौयो थे । 18 सैह माणु तिसदे वचना सुणना कने अपणी बमारियां ते ठीक होणे तांई तिस अल्ल आययो थे, तिन्हां माणुआं ते यीशुयें कैई दुष्टआत्मां कड्डी करी खरे कित्ते । 19 सारे माणु तिस जो हत्थ लगाणां चाहंदे थे, कजोकि तिसते सामर्थ निकळा करदी थी कने रोगी ठीक होया करदे थे ।

आशीष भरे कने शोक वचन

(मत्ती 5 : 1-12)

20 ताहू यीशुयें अपणे चेलयां जो दिखी करी ग्लया, "धन हन तुहां जेहड़े मनां दे दीन हन, कजोकि परमात्में दा राज्र तुहां दा ऐ ।

21 "धन हन तुहां जेहड़े इस बत भी भूखे हन, कजोकि तुहां रजाये जांगे । "धन हन तुहां जेहड़े हुण रोंदे हन, कजोकि सैह हंसगे ।

22 "धन हन तुहां जाहू माणुये पुत्तरे दिया बजाह ते माणु तुहां नें बैर करगे, कने तुहां जो कड्डी दिंगे, कने तुहां दी निंदा करगे, कने तुहां दा नां बदनाम करगे ।

23 "तुहां तिस दिन खुश होई करी कूदणां, कजोकि इसतांई तुहां जो सुअर्गे च बड़ा फळ ऐ; तिन्हां दे स्याणे भी पराणे जमाने दे भविष्यवक्तां सौगी भी तिआं ई वर्ताव करदे थे ।

24 "अपर लागत ऐ तुहां पर जेहड़े अमीर हन, कजोकि तुहां अपणी शान्ति पाई चुके हन ।

25 "लागत ऐ तुहां पर जेहड़े हुण रजेयो हन, कजोकि सैह भूखे होंगे । "हाय तुहां पर जेहड़े हुण हंसदे हन, कजोकि शोक करगे कने रोंगे ।

26 लागत ऐ तुहां पर जाहू सारे माणु तुहां जो खरा ग्लान, कजोकि तिन्हां दे स्याणे भी भविष्यवक्ता सौगी इआं ई करदे थे ।

दुश्मणां नें भी प्यार रखा

(मत्ती 5 : 38-48; 7 : 12)

27 "अपर मैं तुहां सुणने आळ्यां जो ग्लांदा ऐ कि अपणे दुश्मणां नें भी प्यार रखा; जेहड़े तुहां नें बैर रखगे, तिन्हां दा भला करा । 28 जेहड़ा तुहां श्राप दें, तिन्हां जो आशीष देंआ; जेहड़ा तुहां दा अपमान करें, तिन्हां तांई प्रार्थना करा । 29 जेहड़ा तुहां दिया इक्की खाखा पर चंड मारे तिसदे बक्खे दुई भी करी देंआ; कने जेहड़ा तेरी धोती खोणा चाहंदा ऐ, तिसियो कुरता लैणे ते भी मत रोका । 30 जेहड़ा कोई तिज्जो ते मगें, तिसियो दें; कने जेहडी तेरी चीजं खोई लें, तिसते मत मंग । 31 जिआं तुहां चाहंदे हन कि माणु तुहां सौगी करन, तुहां भी तिन्हां नें तिआं ई करा । 32 जे तुहां अपणे प्यार रखणे आळ्यां सौगी प्यार रखन, तां इस च कुण देहई बडी गल्ल ऐ? कजोकि पापी भी तां अपणे प्यार रखणे आळ्यां सौगी प्यार रखदे हन । 33 जे तुहां भी अपणेयां भलाई करणे आळ्यां सौगी ई भलाई करदे हन, तां इस च कुण देहई बडी गल्ल ऐ? कजोकि पापी भी इआं ई करदे हन । 34 जे तुहां माणुआं जो उधार देंग तिसते भिरी पाणे दी उम्मीद रखदे हन, तां इस च कुण देहई बडी गल्ल ऐ? कजोकि पापी -पापियां जो उधार दिंदे हन कि तितणा भिरी पान । 35 अपर अपणे दुश्मणां नें भी प्यार रखा, कने भलाई करा कने भिरी पाणे दी

उम्मीद न रखी करी उधार दैआ; कने तुहां ताई बड़ा फळ हुंगा, कने तुहां परमप्रधान की औलाद बणना, कजोकि सैह तिन्हां बुरे माणुआं पर दयावान ऐ जेहडे धन्यवाद नी करदे । 36 जिआं तुहां दा पिता दयावान ऐ, तिआं ई तुहां भी दयावान बणां ।

कुसी पर दोष मत लग्गा (मत्ती 7 : 1-4)

37 “दोस मत लग्गा, तां तुहां पर भी दोस नी लगाया जांगा । दोसी मत ठेहरा, तां तुहां भी दोसी नी ठहराये जांगे । माफ करा, तां तुहां जो भी माफ कित्ता जांगा । 38 तुहां दिंगे, तां तुहां जो भी दित्ता जांगा । माणु तुहां जो पूरे नापे नैं जिक्की जिक्की करी कने हिलाई -हिलाई करी कने चुंड लगाई नैं तुहां दिया गोदी च पांगे, कजोकि जिस नापे नैं तुहां नापदे हन तिस नापे नैं तुहां ताई भी नापेया जांगा ।” 39 भिरी तिन्हीं तिन्हां नैं इक्क उदारण दित्ता : “क्या इक्क अन्ना, अन्ने जो रस्ता दस्सी सकदा ऐ? क्या दोयो गते च नी पांगे ।” 40 चेला अपणे गुरुये ते बड़ा नी ऐ, अपर जेहड़ा कोई सिद्ध हुंगा, सैह अपणे गुरुये साइआं हुंगा । 41 तू अपणे भाऊये दी अंखी दे कखे जो कजो दिखदा ऐ, कने तिज्जो अपणियां अंखी दा कख नी दुस्सदा? 42 जाहू तिज्जो अपणियां अंखी दा कख नी दुस्सदा, तां अपणे भाऊये नैं किआं ग्लाई सकदा ऐ, ‘हे भाऊ ठेहर मैं तेरिया अंखी दे कखे जो कड्डी दिंदा? हे पखंडी पैहलें अपणियां अंखी दे कखे जो कड्डी, ताहू जेहड़ा कख तेरे भाऊये दिया अंखी च ऐ, तिस जो ठीक करी दिखी नैं कड्डी सकदा ऐ ।

सिदेया रुख तिदेया फळ (मत्ती 7 : 16-20; 12 : 33-35)

43 “कोई खरा रुख निकम्मा फळ नी दिंदा, कने ना तां कोई निकम्मा रुख ऐ जेहड़ा खरा फळ दिंदा ऐ । 44 हर इक्क रुख अपणे फळ ते पणछेणियां जांदा ऐ; कजोकि माणु झाड़ियां ते धूडे नी तोड़दे कनेना झड़बेरी ते अंगूर । 45 खरा माणु अपणे मने दे खरे भंडार ते खरियां गलां करदा ऐ, कने बुरा माणु अपणे मने ते बुरे भण्डारे ते बुरियां गलां करदा ऐ; कजोकि जेहड़ा मने च भरोया हुंदा ऐ सैई तिसदे मुंमें च निकळदा ऐ ।

घर बणाणे आळे दो माणु (मत्ती 7 : 24-27)

46 जाहू तुहां मेरा केहणा ई नी मनदे तां मिन्जो कजो ‘हे प्रभु, हे प्रभु ग्लां दे हन? 47 जेहड़ा कोई मिन्जो अल्ल ओदां ऐ कने मेरियां गलां सुनी करी तिन्हां जो मनदा ऐ, मैं तुहां जो दस्सदा ऐ कि सैह कुस साइआं ऐ : 48 सैह माणु तिस अकूमद माणुये साइआं ऐ, जिन्हीं अपणां घर बणां दे बगत सपडे पर डुग्गी नीई खुणी करी बणाया, कने जाहू बाढ़ आई तां पाणी तिस घरे नैं लग्गा अपर तिसियो कोई नकसान नी होया; कजोकि सैह पक्का बणया था । 49 अपर जेहड़ा मेरियां गलां सुणी करी नी मनदा सैह बेवकूफ माणुये साइआं ऐ जिन्हीं चिक्का पर बगैर नीआं पाई करी घर बणाया, जाहू बाढ़ आई तिस घरे नैं लग्गा अपर सैह ताहू ई टेई करी बर्वाद होई गैआ ।

सूबेदारे दा वसुआस (मत्ती 8 : 5-13)

7 जाहू यीशु लोकां नैं एह सारियां गलां ग्लाई बैठा, तां सैह कफरनहूम सैहरे च आया । 2 तिस सैहरे च इक्क रोमी फौजा दा सूबेदार रँहदा था कने तिसदा इक्क प्यारा दास बमार कने मरणां लगैआ था । 3 जाहू तिन्हीं यीशु दी चर्वा सुणी तां कुच्छ स्याणे यहूदी माणु तिस अल्ल घल्ले कि तिस नैं विणती करन कि सैह आई करी मेरे दासे जो ठीक करे । 4 सैह यीशु अल्ल आये, कने तिस नैं बड़ी विणती करी नैं गलां लागे, “सैह इस जोग्गा ऐ कि तू तिस ताई एह करे, 5 कजोकि सैह अहां दी जाति दे माणुआं नैं प्यार रखदा ऐ, कने तिन्हीं अहां दे आराधनालय जो बणाया ऐ ।” 6 यीशु तिन्हां सौगी चली गैआ, अपर जाहू सैह सूबेदारे दे घरे पुज्जणे आळा था, तां सूबेदारे तिस अल्ल अपणे कुच्छ साथी एह ग्लाई नैं घल्लया, “हे प्रभु मेरे घर ओणे दा कष्ट मत करा, कजोकि मैं इस जोग्गा नी ऐ कि तुहां मेरे घरेयो ओन । 7 इसतांई मैं अपणे आप्पे जो इस जोग्गा भी नी समझेया कि मैं तिज्जो अल्ल ओयें, अपर जित्थु ऐ तित्थु ते वचन ग्लाई दै तां मेरा दास ठीक होई जांगा । 8 कजोकि मैं

भी कुसी अफसरे थलें कम्म करणे आळा ऐ; कने मेरे थलें भी कुच्छ सपाई कम्म करदे हन, जाहू मैं इक्की जो ग्लांदा कि जा ऐ तां चली जांदा ऐ; कने दूये दासे नैं, आ तां सैह आई जांदा ऐ; कने जाहू अपणे दासे नैं ग्लांदा, कि एह कम्म कर, तां सैह तिस कम्मे करदा ऐ 9 एह सुणी करी यीशु बड़ा हैरान होया कने तिन्हीं मुंमें फेरी करी तिसा भीड़ा जो जेहड़ा तिसदे पचांह चलियो थी ग्लया “मैं तुहां नैं ग्लांदा ऐ कि मैं इस्राएल च भी ऐदेया वसुआस नी पाया ।” 10 कने जेहडे घल्लेयो माणुआं घरे पुज्जी करी दिख्या सैह दास ठीक होई गैआ ।

विधवा दे जागते जो जिन्दगी दान

11 थोड़े दिनां बाद सैह नाईन नांये दे इक्की सैहरे जो गैआ । तिसदे चले कने माणुआं दी भीड़ तिस कने जा दी थी । 12 जाहू यीशुयें सैहरे च पैर पाया ई था, तां क्या दिख्या, कि माणु इक्की मुड़दे जो बाहर नकाल करणे जो लैई करी जा दे थे; जेहड़ा अपणियां मांऊ दा इक्को ई पुत्तर था, कने सैह विधवा थी; कने सैहरे दे मते भरी माणु नकाळे करणां तिसा सौगी चलेयो थे । 13 यीशु जो तिसाजो बिधवा जो दिखी करी तरस आया, कने तिन्हीं ग्लया, “मत रो ।” 14 ताहू तिन्हीं बक्खें आई करी अर्थिया जो छुता, कने अर्थिया चुकणे आळे रूकी गै । ताहू तिन्हीं ग्लया, “हे जुआन, मैं तिज्जो ग्लांदा ऐ, उठ !” 15 जाहू सैह मुड़दा उठी बैठा, कने गलां लागी पैआ , तिन्हीं तिसियो तिसदिया मांऊ जो दैई दित्ता । 16 एह दिखी करी सारे डरी गै, कने सैह परमात्में दी जय जय कार करी नैं गलां लागे, अहां च इक्क बड़ा भविष्यवक्ता उठया ऐ, कने परमात्में अपणे माणु पर मेहरवानी दस्सी ऐ ।” 17 कने यीशु दे बारे च एह गल्ल सारे यहूदिया कने अक्खे बक्खे दे सारे लाक्के च फैली गैई ।

यूहन्ना बपतिस्मा दैणेआळे दा सबाल (मत्ती 11 : 2-19)

18 यूहन्ना बपतिस्मा दैणे आळे दे चेलयां इन्हां सबना गलां दी खबर यूहन्ने जो सणाई । 19 ताहू यहून्नं अपणे चेलयां दू चलेयां जो अप्पु अल्ल सदी करी प्रभुये अल्ल एह पूछणे ताई घल्लया, “क्या ओणे आळा तू ई ऐ, या अहां कुसी होर दा इंतजार करन?” 20 यूहन्ने दे दो चले यीशु अल्ल जाई करी गलां लागे, यूहन्ना बपतिस्मा दैणे आळें अहां जो तिज्जो अल्ल पूछणे ताई घल्लया ऐ कि क्या ओणे आळा तू ई ऐ, या अहां कुसी होर दा इंतजार करन?” 21 तिस बगत यीशुयें कई तराह दे बमारां कने पीड़ा आळियां, कने दुष्टआत्मां आळे माणुआं जो छडाया; कने अन्ने माणु दिखणां लागे । 22 तां यीशुयें तिन्हां नैं ग्लया, “जेहड़ा कुच्छ तुहां दिख्या कने सुणेयां सैह जाई करी यूहन्ने जो दस्सा; कि अन्ने दिखदे हन, लटे चलदे -फिरदे हन, कोढी खरे कित्ते जांदा हन, बोळें सुणदे हन, मरेयो जिं दे कित्ते जांदा हन, कने गरीबां जो सुसमाचार सणांया जांदा ऐ । 23 धन ऐ सैह जेहड़ा मेरिया बजाह ते ठोकर नी खांदा ।” 24 जाहू यूहन्ने दे चले चली गै तां यीशु यूहन्ने दे बारे च लोकां नैं दस्सणा लग्गा, “तुहां उजाड़ जगाह च तुहां क्या दिखणां गैयो थे? क्या हौआ नैं हिलदे सरकंडे जो? 25 तां भिरी तुहां क्या दिखणां गैयो थे? क्या कोमल कने कीमती कने चमकीले कपडे पैहेयो माणुआं जो कने सुख विलासे च कने राज्ज मैहलां च रँहदे हन । 26 तां भिरी क्या दिखणां गैयो थे? क्या कुसी भविष्यवक्ता जो? हौं मैं तुहां नैं ग्लांदा ऐ भविष्यवक्ता ते भी बडे जो । 27 एह तां सैई माणु ऐ, जिसदे बारे धर्म शास्त्रे च लिख्या ऐ :

कि दिख, मैं अपणे दूते जो तिज्जो गांह गांह घल्लदा ऐ, जेहड़ा तिज्जो ते पैहलें तेरा रस्ता सीधा करगा ।

28 मैं तुहां नैं ग्लांदा ऐ कि जेहडे अज्जे तिकर जणांसा ते पैदा होयो हन, तिन्हां सबना च यूहन्ने ते बड़ा कोई नी ऐ :अपर परमात्में दे राज्ज च जेहड़ा लोक्के ते लोक्का ऐ, सैह तिसते भी बडा ऐ ।” 29 कने सबना आम लोकां कने चुगी लैणे आळियां भी यूहन्ने दा बपतिस्मा लैई करी परमात्में जो सच्चा मनी लैआ । 30 अपर फरीसियां कने कानून जाणने आळियां माणुआं यहून्ने ते बपतिस्मा ना लैई करी परमात्में दी मनसा जो अपणे बारे च टाली दित्ता । 31 तां मैं इस जुगे दे लोकां दी बराबरी कुसने करे कि सैह कुस साइआं ऐ? 32 सैह तिन्हां जागतां साइआं हन जेहडे बाजारे च बैई करी इक्की दूये नैं दस्सी करी ग्लादे हन, “अहां तुहां ताई बंसरी बजाई, कने तुहां नी नचे; अहां रोये, कने तुहां नी रोये । 33 कजोकि यूहन्ना बपतिस्मा दैणे आळा ना तां रोटी खांदा ना तां अंगूरा दा रस पींदा आया, कने तुहां ग्लांदा हन, कि तिस च

दुष्टआत्मां ए । 34 माणु दा पुत्तर खांदा पींदा आया ऐ, कने तुहां ग्लांदे हन, दिखा एह भूखड कने पियकड जेहडा चुंगी लैणे आळ्यां दा कने पापियां दा साथी ऐ 35 अपर परमात्मं दा ज्ञान अपणी सारी औलांदा दिया बजाह ते सच्चा ठेहराया गैआ ऐ ।”

फरीसिये दे घरें पापण जणांसा जो माफ करणां

36 भिरी कुसी फरीसियें यीशुयें नैं विणती किन्ती कि मिन्जो सौगी खाणां खा, तां एह सुणी करी यीशु तिस फरीसिये दे घरें खाणां खाणां बैठा । 37 कने दिखा तिस सैहरे दी इक्क पापण जणांसा एह जापता लग्गा कि यीशु फरीसिये दे घरें खाणां खाणां बैठया ऐ तां सैह संगमरमरे दी गडविया च इत्तर लंदा । 38 कने सैह पचांह खडौई करी रोंदी रोंदी यीशु दे पैरां जो टेपळ्यां नैं सेडी करी सिरे दे बाळां नैं पुज्जाण लग्गी, कने तिसदे पैरां जो बार बार चूमी करी तिन्हां पर इत्तर मळ्यां । 39 एह दिखी करी फरीसी जिन्हीं यीशु जो सदया था, अपणे मने च सोचणां लग्गा, “जे एह भविष्यवक्ता हुंदा तां जाणी जांदा कि एह जेहडी पैरां छूणे आळी जणांसा कुण ऐ कने कदेयी ऐ, कजोकि सैह तां पापण ऐ ।” 40 यीशुयें तिसदे मने दी जाणी करी ग्लाय, “हे शमौन मिन्जो तिज्जो नैं कुच्छ ग्लायो ऐ ।” सैह ग्लाय, “हे गुरु, ग्ल ।” 41 कुसकी महाजणे दे दो कर्जदार थे, इक्क पंजा सौ कने दूआ पंजा दीनारां दा कर्जदार था । 42 जाहू तिन्हां अल्ल दैणे जो कुच्छ नी रैहूआ, तां तिन्हीं दूनी जो माफ करी दिता । इसताई तिन्हां कुण तिस नैं जादा प्यार रखगा?” 43 शमौने जबाब दिता, “मेरिया समझा च सैह जिसदा तिन्हीं जादा छड्डी दिता । यीशुयें तिस नैं ग्लाय, “तैं ठीक ग्लाय ऐ ।” 44 कने तिसा जणांसा दे पाससैं फिरी करी तिन्हीं शमौने नैं ग्लाय, “क्या तू इसां जणांसा जो दिखादा ऐ? मैं तेरें घरें आया अपर तैं मिन्जो पैरां धोणे ताई पाणी नी दिता पर इन्नै मेरे पैर अंखी दे टेपळ्यां नैं धोत्ते कने अपणे बाळां नैं पुज्जे । 45 तैं मिन्जो पुक्का नी दिता, अपर जाहू ते मैं आया ऐ ताहू ते ई इन्नै मेरे पैरां जो चूमणा नी छडेया । 46 तैं मेरे मुँडे पर तेल नी मळ्या, अपर इन्नै मेरे पैरां पर इत्तर मळ्या ऐ । 47 इसताई मैं तुहां नैं ग्लांदा ऐ कि इसा दे पाप जेहडे मते थे माफ किते, कजोकि इन्नै जादा प्यार किता; अपर जिस दे पाप थोडे माफ होये, सैह थोडा प्यार करदा ऐ ।” 48 कने यीशुयें जणांसा जो ग्लाय, “तेरे पाप माफ होये ।” 49 ताहू जेहडे माणु तिस सौगी खाणां खाणां बैठेयो थे, सैह अपणे -अपणे मने च सोचणां लगे, “एह कुण ऐ जेहडा पापां जो भी माफ करदा?” 50 अपर यीशुयें जणांसा नैं ग्लाय, “तेरे वसुआसैं तिज्जो बचाई लैआ, खुशी खुशी चली जा ।”

यीशु मसीह दी शिष्यायें

8 इसदे बाद सैह सैहरे सैहरे कने ग्रां - ग्रां च प्रचार करदा होया कने परमात्मं दे राजे दा सुसमाचार सणांदा - सणांदा फिरणां लग्गा, कने बारह चले तिस सौगी होंदे थे, 2 कने कुच्छ जणांसां भी थियां जेहिड्यां दुष्टआत्मां नैं कने बमारियां नैं छड्डीयां थियां, कने सैह एह ऐ : मरियम जेहडी मगदलीनी कहलांदी थी, जिसा ते सत दुष्टआत्मां कडियां थियां, 3 कने हेरोदेसे दे भण्डारी खुजे दी लाडी जिसादा नां योअन्ना एह सैह भी तिन्हां सौगी थी, कने सूसन्नाह कने मतिआं होर जणांसां थियां । एह अपणियां सम्पति नैं तिसदी सेवा करदियां थियां ।

बीई बाणेआळे दा उदारण

(मत्ती 13 : 1-9; मरकुस 4 : 1-9)

4 जाहू बडी भीड किड्डी होई कने सैहरे -सैहरे दे माणु तिस अल्ल चली आंदे थे, तां तिन्हीं उदारणे च ग्लाय : 5 “इक्क बाणे आळा माणु बीई बाणां निकळ्या । बांदे बांदे कुच्छ रस्ते कंडे पै, कने रुलदे गै, कने अम्बरे दे पंछियां तिन्हां जो चुगी लैआ । 6 कुच्छ चट्टाना पर पै, कने लूगे, अपर नमी ना मिलणे ते सूकी गै । 7 कुच्छ झाडियां दे बीच पैआ, कने झाडियां सौगी सौगी बधी करी तिस जो दबाई दिता । 8 कुच्छ खरिया जमीना पर पै, कने लूगी करी सौ गुणा फळ दिता ।” एह गलाई करी तिन्हीं ऊंचे शब्दां च ग्लाय, “जिन्हां दे सुणने दे कनं होन सैह कनां खोली सुणी लैन ।”

उदारणां दा मकसद

(मत्ती 13 : 10-17; मरकुस 4 : 10-12)

9 यीशु दे चेलयां तिस ते पूछ्या कि इस उदारणे दा क्या मतलब ऐ? 10 तिन्हीं ग्लाय, “तुहां जो परमात्मं दे राजे दे भेदां दी समझ दिती गैई ऐ, अपर होरना जो उदारणां च सणांया जांदा ऐ, इसताई कि, सैह दिखी करी भी ना दिखन, कने सुणी करी भी ना समझन ।

बीई बाणेआळे दा उदारणे दा मतलब

(मत्ती 13 : 18-23; मरकुस 4 : 13-20)

11 “उदारणे दा मतलब ऐ, बीई परमात्मं दा वचन ऐ । 12 रस्ते दे कंडे सैह हन, जिन्हां तां सुणेया; ताहू सैताने आई करी तिन्हां दे मने दे वचना जो चुकी लैई जांदा ऐ कि इआं ना होयें कि सैह वसुआस करी नैं उद्धार पाई लैन । 13 चट्टाना दे सैह हन कि जाहू तां सुणदे तां हन, तां खुशी नैं वचने जो ग्रहण तां करदे हन, अपर जड ना पकडणे दिया बजाह ते थोडी देर तां वसुआस तां रखदे हन, कने परीक्षा दे बग्त बेहकी जांदे हन । 14 जेहडे झाडियां च पैयो, एह सैह हन जेहडे सुणदे तां हन, अपर गांह चलीकरी चिंता, कने धन, कने जिन्दगिया दे सुख बिलासे च फंसी जांदे हन, कने तिन्हां दा फळ नी पकदा । 15 अपर जेहडे खरिया जमीना दे सैह हन, जेहडे वचना जो सुणीकरी भले कने खरे मने च सम्भाली करी पक्के वसुआसी बणदे हन ।

दिये दा उदारण

(मरकुस 4 : 21-25)

16 “कोई दिये बाळी करी भांडे नैं नी ढकदा, कने ना मंजोलूये थलें रखदा ऐ, अपर उचिया जगाह पर रखदा ऐ कि अंदर ओणे आळे लौ पान । 17 कुच्छ छिपेया नी जेहडा सामणे नी होयें, कने न कुच्छ गुप्त ऐ जेहडा जाणेयां नी जां कने सामणे नी होयें । 18 इसताई चुकनै रैहूआ कि तुहां कुस तरीके नैं सुणदे हन? कजोकि जिन्हां अल्ल ऐ तिन्हां जो दिता जांगा, कने जिन्हां अल्ल नी ऐ तिन्हां ते भी लैई लैआ जांगा, जिसियो सैह अपणां समझदा ऐ ।

यीशु मसीह दी माँ कने भाऊ

(मत्ती 12 : 46-50; मरकुस 3 : 31-35)

19 तिसदे मां कने तिसदा भाऊ यीशु अल्ल आये, अपर भीडा दिया बजाह ते तिस नैं मिली नी सके । 20 तिस नैं ग्लाय, “तेरी मां कने तेरे भाऊ बाहर खडूतेयो हन, कने तिज्जो नैं मिलणां चाहंदे हन ।” 21 तिन्हीं इसदे जबाबे च तिन्हां नैं ग्लाय, “मेरी मां कने मेरे भाऊ एह हन, जेहडे परमात्मं दे वचने जो सुणदे कने मनदे हन ।”

तूफाने जो शांत करणां

(मत्ती 8 : 23-27; मरकुस 4 : 35-41)

22 भिरी इइक्क दिन सैह कने यीशु दे चले किस्तिया पर चढे, कने तिन्हीं तिन्हां कने ग्लाय, “ओआ, झील के पार चलें ।” 23 अपर जाहू किस्ती चलियो थी, तां यीशु सोई गैआ : कने झीला च तूफान आई गैआ, कने किस्ती पाणिये नैं भरौणां लग्गी कने सैह खतरे च थे । 24 ताहू चेलयां बक्खे आई करी यीशु जो जगाया, कने ग्लाय, “मालक! “मालक! अहां मरी चलेयो हन ।” ताहू उठी करी तिन्हीं तूफाने कने पाणिये दी लैहरां जो झिडकेया कने सैह रुकी गै कने शांत होई गै । 25 ताहू यीशुयें तिन्हां नैं ग्लाय, “तुहां दा वसुआस कुत्थ था?” अपर सैह डरी गै कने हैरान होई नैं अप्पु चा ग्लाय लगे, “एह कुण ऐ जेहडा तूफान कने पाणिये जो भी हुक्म दिंदा ऐ, कने सैह तिसदा हुक्म मनदे हन?”

बुरिया आत्मां दे सतायेयो माणुये जो ठीक करणां

(मत्ती 8 : 28-34; मरकुस 5 : 1-20)

26 भिरी सैह गिरासेनियां दे देशे च पुजे, जेहडा तिस पार गलील दे सामणे ऐ । 27 जाहू सैह झीला दे कंडे पर लुत्था तां तिस सैहरे दा इक्क माणु मिला जिस च दुष्टआत्मां थीं । सैह मतेआं दिना ते ना कपडे लगांदा था कने ना घरें रैहदा था अपर कब्रां च रैहदा था । 28 तिन्हीं यीशुये दिखी करी डडेया कने

तिस सामणे पैई करी जोरे नें ग्लाय़ा, "हे परम प्रधान परमात्मं दे पुत्तर यीशु ! मिन्जो तिज्जो नें क्या कम्म? में तिज्जो नें विणती करदा ऐ, मिन्जो दर्द मत दें । 29 कजोकि सैह तिसा बुरिया आत्मां जो तिस माणुये ते निकळणे दा हुक्म दे दा था, इसताई सैह बार- बार प्रबल होदी थी । माणु तिसियो संगला कने बेडियां नें बन्नदे थे तमी सैह बन्धनां जो तोडी दिंदा था, कने दुष्टआत्मां तिसियो बणे च भगांदी थी । 30 यीशुयें तिस ते पूछ्या, "तेरा क्या नां ऐ?" तिन्ने ग्लाय़ा, "सेना," कजोकि मतिआं दुष्टआत्मां तिस च समाई गियां थियां । 31 तिन्हां तिस नें प्रार्थना किती कि अहां जो अथाह कुंडे च जाणां मत देंआ । 32 औत्थू प्हाड़े पर मते सूअर चुगा दे थे, इसताई तिन्हां तिस नें विणती किती कि अहां जो तिन्हां च समाणां दें । तिन्हीं तिन्हां जो जाणां दिता । 33 ताहू दुष्टआत्मां तिस माणुये ते निकळी करी सूअरां च चली गैईयां कने सैह सूअर खडिया भेठी ते रीढ़की करी झीला च जाई पैआ कने डूबी करी मरिया ।

34 सूअरां दे चरवाहे एह जेहड़ा होया था दिखी करी नठी गै, कने सैहरे च कने ग्राये च जाई करी तिसदी खबर फैलाई दिती । 35 माणु एह जेहड़ा होया था तिसियो दिखणां आये, कने यीशु अल्ल आई करी जिस माणुये ते दुष्टआत्मां कडियां थियां, तिसियो यीशु दे पैरां अल्ल कपडे पैहनी करी कने शांत बैठेया दिखी डरी गै, 36 कने दिखणे आळेयां तिन्हां जो दस्सेया कि सैह माणु दुष्टआत्मां दा सताया होया कुस तरांह खरा होया । 37 ताहू गिरासेनियां सैहरे दे अक्खे बक्खे दे सारे लोकां यीशु नें विणती किती कि अहां दे इस लाक्के ते चली जा; कजोकि तिन्हां पर बड़ा भरी डर छाई गैआ था । कने सैह किस्तिया च बैई करी चली गैआ । 38 जिस माणु च दुष्टआत्मां कडियां थियां सैह यीशुये नें विणती करणां लग्गा कि मिन्जो अप्पु सौगी रैहणां देंआ, अपर यीशुयें तिसियो घल्ली करी ग्लाय़ा, 39 "अपने घरयां चलिया कने लोकां नें दस्स कि परमात्मं तिज्जो तांई कितणे बडे-बडे कम्म किचे ।"

याईरे दी मरियो कुडी कने इक्क बमार जणांस

(मत्ती 9 : 18-26; मरकुस 4 : 21-43)

40 जाहू यीशु वापस आया तां माणु तिस सौगी खुशिया नें मिले, कजोकि सैह सारे तिसदी राह दिखा दे थे । 41 इतणे च याईरे नांये दा इक्क माणु जेहड़ा आराधनालय दा सरदार था आया कने यीशु दे पैरां च पैई करी तिस नें विणती करणां लग्गा कि मेरे घरयो चल, 42 कजोकि तिसदी बारां सालां दी इक्क लौती कुडी थी, कने सैह मरना लागियो थी । जाहू सैह जा दा था, ताहू माणु तिस परालें पैई जांदे थे । 43 इक्की जणांसा जिसा जो बारां साला ते खून चलणे दा रोग था, कने तिन्ने अपणी सारी कमाई बैदां पर लगाई दिन्तियो थी, तमी तिसा जो कुसी ते भी फर्क नी पैआ, 44 पचांह ते आई करी तिसदे कपडे दे पळे जो छुता, कने झट ई तिसा दा खून चलणां बंद होई गैआ । 45 यीशुयें पूछ्या, "मिन्जो कुणी छुता?" जाहू सारे मुकरणा लग्गे, तां पतरसे कने तिसदे साथियां ग्लाय़ा, "हे मालक, तुहां जो तां भीड दबा दी ऐ कने तुहां परालें पैई जांदी ऐ ।" 46 अपर यीशुयें ग्लाय़ा, "कुणकी मिन्जो तां छुता ऐ, कजोकि में जाणी लैआ ऐ कि मिन्जो ते सामर्थ निकळी ऐ ।" 47 जाहू तिन्ने जणांसा दिख्या कि में लुक्की नी सकदी, तां कंमदी होई आई कने तिसदेयां पैरां च पैई करी सारेयां लोकां जो दस्सेया कि तिन्हीं कुसा बजाह ते तिसियो छुत्या, कने किआं तौळी खरी होई गैई । 48 यीशुयें तिसा जो ग्लाय़ा, "बेटी, तेरे वसुआसं तिज्जो खरा किता ऐ, खुश होई नें चली जा ।"

49 सैह एह ग्लादा करदा था कि, याईरे दे घरे ते इक्क माणु आई करी याईरे सरदारे नें ग्लाणां लग्गा, "कि तेरी कुडी मरी गियो ऐ : गुरु जो परेशान मत कर ।" 50 यीशुयें एह सुणीकरी तिस जो जबाब दिता, "मत डर; सिर्फ वसुआस रख, तां सैह बची जांगी ।" 51 घरे च आईकरी तिन्हीं पतरसे जो, कने यूहन्ने जो, कने याकूबे जो, कने कुडिया दे माऊ -बुडे जो छड्डी करी कने कुसियो भी अप्पु सौगी अंदर ओणां नौ दिता । 52 सारे माणु तिसा तांई रोआ दे थे, अपर तिन्हीं ग्लाय़ा, "रोआ मत; सैह मरियो नी अपर सैह सुतियो ऐ ।" 53 सैह एह जाणी करी कि सैह मरी गियो ऐ यीशु दा मजाक डुआणा लग्गे । 54 अपर यीशुयें तिसादा हत्थ पकडेया, कने जोरे नें ग्लाय़ा, "हे कुडिये उठ !" 55 ताहू तिसा दे प्राण हटी आये कने सैह ताहू ई उठी बैठी । भिरी तिन्हीं हुक्म दिता कि इसा कुडिया जो कुच्छ खाणे जो देंआ । 56 तिसा दे मां बुडे हेरान होये, अपर यीशुयें तिन्हां जो समझाया कि एह जेहड़ा होया ऐ कुसी नें मत दस्सदे ।

बारां चेलयां जो घल्लणां

(मत्ती 10 : 5-15; मरकुस 6 : 7-13)

9 भिरी यीशुयें अपणे बारां चेलयां जो सदी नें तिन्हां सबना जो दुष्टआत्मां कने बमारियां जो दूर करने दी सामर्थ कने हक्क दिता, 2 कने तिन्हां जो परमात्मं दे राजे दा प्रचार करणे कने बमारा जो ठीक करणे तांई घल्लया । 3 तिन्हीं तिन्हां जो ग्लाय़ा, "रस्ते तांई कुच्छ मत लैआ, ना सोठी, ना झोलू, ना रोटी, ना पैसे, कने ना दो-दो कुरते । 4 जिस कुसी दे भी घरयो तुहां जा, तित्थु ई रैहआ, कने तित्थु ते ई चली ओआ । 5 जेहड़ा तुहां जो ग्रहण ना करें, तिस ग्राए ते बार निकळदे ई अपणेयां पैरा दी धूडा जो झाडी देंआ कि तिन्हां पर गवाही होयें ।" 6 कने सैह निकळी नें ग्राए -ग्राए च सुसमाचार सणादे, कने हर जगाह च लोकां जो चंगा करदे करदे घूमदे रैह ।

हेरोदेसे दी उलझण

(मत्ती 14 : 1-12; मरकुस 6 : 14-29)

7 देशे दे चौथे हिस्से दा राजा हेरोदेस एह सब सुणी नें डरी गैआ, कजोकि कुच्छना ग्लाय़ा कि यूहन्ना मरेयां ते जिंदा होईया ऐ, 8 कने कुच्छना एह ग्लाय़ा कि एलिय्याह दुस्सया ऐ, कने होरनां एह ग्लाय़ा कि पराणे भविष्यवक्ता ते कोई जिंदा होया ऐ । 9 अपर हेरोदेसें ग्लाय़ा, "यूहन्ना दा तां में मुँड कटवाया, हण एह कुण ऐ जिसदे बारे च एह गल्लां सुणांदा ऐ?" कने तिन्हीं तिसियो दिखणे दी इच्छा किती ।

पंज हजार माणुआं जो खुआणां

(मत्ती 14 : 13-21; मरकुस 6 : 30-44; यूहन्ना 6 : 1-14)

10 भिरी स्याणेयां वापस आई नें जेहड़ा तिन्हां कित्या था, तिस जो दस्सेया; कने सैह तिन्हां जो लग्ग करी नें बैतसैदा नाए दे ग्राए जो लैई गैआ । 11 एह जाणी नें माणुआं दी भीड तिसदे पचांह चली पैई, कने सैह खुशिया सौगी तिन्हां नें मिलेया, कने तिन्हां नें परमात्मं दे राजे दी गल्लां करणां लग्गा, कने जेहडे खरे होणां चाहंदे थे तिन्हां जो खरा किता ।

12 जाहू दिन ढळणा लग्गा तां बारां चेलयां आई नें तिस नें ग्लाय़ा, "भीडा जो घल्ली करी कि चौनी पाससें दे ग्राए कने बस्तियां च जाई नें रुके कने खाणे दा उपाये करणां, कजोकि अहां तित्थु सुनसाण जगाह च हन ।" 13 यीशुयें तिन्हां नें ग्लाय़ा, "तुहां ई इन्हां जो खाणे जो देंआ ।" तिन्हां ग्लाय़ा, "अहां अल्ल पंज रोटियां कने दो मच्छियां जो छड्डी नें होर कुच्छ नी ऐ; अपर हां, जे अहां जाई नें तिन्हां सारेयां तांई खाणां खरीदी लैन, तां होई सकदा ऐ ।" सैह माणु तां पंज हजार मरद थे । 14 ताहू यीशुयें अपणेयां चेलयां जो ग्लाय़ा, "तिन्हां जो पंजा -पंजा करी नें इक्की इक्की पंगति च बठाळी देंआ । 15 तिन्हां इआं ई किता, कने सबना जो बठाळी दिता । 16 ताहू यीशुयें सैह पंज रोटियां कने दो मच्छियां लैईयां, सुअर्गे दे पाससें दिखी नें धन्यवाद किता, कने तोडी तोडी करी चेलेयां जो दिंदा गैआ कि लोकां जो बंडन । 17 ताहू सारे खाई नें रज्जी गै, कने चेलेयां कने बचेयो टुकडेयां दे बारा टोकरू चुके ।

पतरसे दा यीशु जो 'मसीह' स्वकार करणां

(मत्ती 16 : 13-20; मरकुस 8 : 27-30)

18 जाहू यीशु किल्ला बैई नें प्रार्थना करा दा था कने तिसदे चेले तिस सौगी थे, तां तिन्हीं तिन्हां ते पूछ्या, "माणु मिन्जो क्या ग्लादे हन ।" 19 तिन्हां यीशु जो ग्लाय़ा, "यूहन्ना बपतिस्मा देंगे आळा कने कोई तां एलिय्याह कने कोई तां एह कि पराणे भविष्यवक्ता च कोई जिंदा होया ।" 20 तिन्हीं तिन्हां ते पूछ्या, "अपर तुहां मिन्जो क्या ग्लादे हन?" पतरसें जबाब दिता, "परमात्मं दा मसीह ।" 21 ताहू तिन्हीं तिन्हां जो समझाई नें ग्लाय़ा कि एह कुसी नें मत दस्सदे ।

अपणियां मौती दी भविष्यवाणी

(मत्ती 16 : 21-23; मरकुस 8 : 31-33)

22 भिरी तिन्हीं ग्लाय़ा, "माणुये दे पुत्तरे तांई जरूरी ऐ कि सैह बड़ा दुख झेलें, कने स्याणे कने प्रधान याजक कने शास्त्री तिसियो घटिया समझी नें मारी दिंगे, कने सैह त्रीये दिने जिंदा हुंगा ।"

यीशु मसीह दे पचाह चलणे दा मतलब (मत्ती 16 : 24-28; मरकुस 8 : 34 ---9 : 1)

23 तिन्हीं सबना नै ग्लाय, "जे कोई मिन्जो पचाह ओणा चाहंदा, तां सैह अपणे आप्पे ते मना करे कने हर रोज अपणियां सुलिया चुकी नै मिन्जो पचाह चली पायें। 24 कजोकि जेहड़ा कोई अपणी जान्न बचाणा चाहंगा सैह तिसायो गुआंगा, अपर जेहड़ा कोई मिन्जो ताई अपणी जान्न गुआंगा सैह तिसियो बचांगा। 25 जेहड़ा माणु सारे संसारे जो हासल करे कने अपणी जान्न गुआई दें या तिसादा नकसान भुकतें, तां तिसियो क्या फायदा हुंगा? 26 जेहड़ा कोई मिन्जो ते कने मेरियां गलां ते शर्मांगा, माणु दा पुत्तर भी, जाहू अपणी कने अपणे पिता दे पाससे ते कने पवित्र सुअर्गेदूतां कि महिमा सौगी ओंगा, तां तिसते भी शर्मांगा। 27 मैं तुहां नै सच ग्लांदा ऐ, कि जेहड़े ऐत्थू खडूतेयो हन, तिन्हां च कुच्छ ऐदेय हन कि जेहड़े जाहू तिकर परमात्में दा राज्ज दिखी नी लेंगे, ताहू तिकर मौती दा सुआद नी चखगे।"

यीशु मसीह दा रूप बदली जाणां (मत्ती 17 : 1-8; मरकुस 8 : 2-8)

28 तिन्हां गलां दे कोई अठां दिनां बाद सैह पतरस, यूहन्ना कने याकूबे जो सौगी लैई करी प्रार्थना करणे ताई प्हाडे पर गैआ। 29 जाहू यीशु प्रार्थना करा दा ई था, तां तिसदे चेहेरे दा रूप बदली गैआ, कने तिसदे कपडे चिट्टे होई नै चमकणां लगे। 30 कने दिखा, मूसा कने एलिय्याह, एह दो माणु यीशु सौगी गलां करा दे थे। 31 एह महिमा सौगी दुस्से कने तिसदे मरणे दी चर्चा करा दे थे, जेहड़ा यरुशलेमे च होणे आळा था। 32 पतरस कने तिसदे साथी निंदरा नै भरौयो थे, जाहू ठीक तरीके नै जागे तां तिसदी महिमा कने तिन्हां दू माणुआं जो, जेहड़े तिस सौगी खडूतेयो थे, दिख्या। 33 जाहू सैह तिस अल्ल जाणां लगे, तां पतरसं यीशुयें नै ग्लाय, "हे मालक, अहां अल्ल रैहणां खरा ऐ कने अहां तीन मंडप बणांयो, इक तिजो ताई, इक मूसे ताई, कने इक एलिय्याह ताई।" सैह जाणदा नी था कि क्या ग्ला दा ऐ। 34 पतरस एह ग्ला दा ई था कि इक बदले आई नै तिन्हां जो घेरी लैआ, कने जाहू सैह तिस बदले नै घिरना लगे तां सैह डरी गै। 35 ताहू तिस बदले च इक शब्द निकळैया, "एह मेरा पुत्तर ऐ कने मेरा चुणेया ऐ, तिसदी सुणां।" 36 एह शब्द ग्लांदा ई यीशु किल्ला रैई गैआ; कने सैह चुप होई गै, कने जेहड़ा कुच्छ भी दिख्या था तिसदी चर्चा कुसणे नी किन्ती।

बुरिया आत्मां दे सतायेयो जागते जो ठीक करणां (मत्ती 17 : 14-18; मरकुस 9 : 14-27)

37 दूये दिने जाहू सैह प्हाडे ते लुत्थे तां इक माणुआं दी बडी भीड़ तिस नै आई मिली। 38 कने दिखा, भीड़ा ते इक माणु जोरें नै ग्लाणां लग्गा, "हे गुरु, मैं तिजो नै विणती करदा ऐ कि मेरे जागते पर दया कर; कजोकि सैह मेरा इक लौता जागत ऐ। 39 कने दिख, इक्की बुरिया आत्मां तिसियो पकडेया ऐ, कने सैह तिसियो मरोड़ा दी ऐ कने सैह मुँमे ते झगुडे कडा दा ऐ; कने तिसियो मरोड़ी करी बडिया मुशकला नै छडदी ऐ। 40 मैं तेरे चेलयां नै विणती किन्ती कि इसा बुरिया आत्मां जो कड्डी दैआ, अपर सैह कड्डी नी सके।" 41 यीशुयें जबाब दित्ता, "हे वेवसुआसियो कने हठीले लोको, मैं काहू तिकर तुहां सौगी रैई करी तुहां दी सुणदें रैहणां? अपणे जागते जो मिन्जो अल्ल लिआ।" 42 सैह ओआ दा ई था कि बुरिया आत्मां तिसियो पटकी करी मरोडेया, अपर यीशुयें बुरिया आत्मां जो झिडकेया कने जागते जो खरा करी नै तिसदे बुडे जो दैई दित्ता। 43 ताहू सारे माणु परमात्में दी महासामर्थ ते हैराण होये।

अपणियां मौती दे बारे च दुवारी भिरी भविष्यवाणी (मत्ती 17 : 22-23; मरकुस 8 : 30-32)

अपर जाहू सारे माणु तिसदेयां कम्मां ते जेहड़ा सैह करदा था, हैराण थे, तां तिन्हीं अपणे चेलयां नै ग्लाय, 44 तुहां तिन्हां सारियां गलां पर कनं लग्गा, कजोकि माणु दा पुत्तर माणुआं दे हत्थे च पकडुआया जाणे आळा ऐ।" 45 अपर सैह ना तां इसा गलां जो समझी सके, कने ना ई इसा गलां दा भेद पाई सके; कने सैह इसा गलां जो पूछणे ते भी डरदे थे।

सबना ते बडा कुण ऐ? (मत्ती 18 : 1-5; मरकुस 9 : 33-37)

46 भिरी तिन्हां च एह चर्चा होणां लग्गी कि अहां च बडा कुण ऐ। 47 अपर यीशुयें तिन्हां दे मने दी गल्ल जाणी लैई, कने इक बच्चा लैई नै अपणे बक्खें खरेडी दित्ता, 48 कने तिन्हां ग्लाय, "जेहड़ा कोई मेरे नांये ते इस जागते जो ग्रहण करदा ऐ; कने जेहड़ा कोई मिन्जो ग्रहण करदा ऐ, सैह मेरे घल्लणे आळे जो ग्रहण करदा ऐ, कजोकि जेहड़ा कोई तुहां च सबना ते छोटे ते छोटा ऐ, सैई बडा ऐ।"

जेहड़ा विरोधे च नी, सैह म्हारी तरफ ऐ (मरकुस 9 : 38-40)

49 ताहू यूहन्ने ग्लाय, "हे मालक, अहां इक्की माणुये जो तेरे नांये ते दुहुआत्मा जो कडदे दिख्या, कने अहां तिसियो ना किन्ती कजोकि सैह अहां सौगी कने तेरे पचाह नी ओणा चाहंदा था।" 50 यीशुयें तिन्हां नै ग्लाय, "तिस जो ना मत करा; कजोकि जेहड़ा तुहां दे विरोधे च नी ऐ, सैह तुहां पाससे।"

सामरियां दिया बजाह ते यीशु मसीह दा विरोध

51 जाहू तिस दे ऊपर चुके जाणे दे दिने पूरे होणे आळे थे, तां तिन्हां यरुशलेमे जाणे दा विचार कित्ता। 52 तिन्हीं अपणे गांह सामरिया देसा दे हर ग्रांए च इसा गलां दा संदेसा लैई करी माणु घल्ले, कि सैह तिस ताई जगाह त्यार करन। 53 अपर तिन्हां लोकां तिसियो ओणां नी दित्ता, कजोकि सैह यरुशलेमे जो जा दा था। 54 एह दिखी नै तिसदे चले याकूब कने यूहन्ने ग्लाय, "हे प्रभु, तू क्या चाहंदा ऐ कि अहां हुक्म दें, कि अम्बरे ते अग पई करी तिन्हां जो भस्म करी दें?" 55 अपर यीशुयें पचाह मुडी करी तिन्हां जो झिडकेया (कने ग्लाय, "तुहां नी जाणदे हन कि तुहां कदेयी आत्मां दे हन। कजोकि माणुये दा पुत्तर लोकां दी जान्नी लैणां नी अपर बचाणां आया ऐ।") 56 कने सैह कुसकी दूये ग्रांये च चली गै।

यीशु मसीह दा चेला बणने दी कीमत (मत्ती 8 : 19-22)

57 जाहू सैह रस्ते च चलेयो थे, तां कुणकी तिस नै ग्लाय, "जित्थू जित्थू तू जांगा, मैं तिजो पचाह पचाह चलगा।" 58 यीशुयें तिस नै ग्लाय, "लोमडियां दे भट कने अम्बरे दे पंछियां दे अल्ले होदें हन, अपर माणुये दे पुत्तर जो मुँडे ढकणे जो भी जगाह नी ऐ।" 59 यीशुयें दूये नै ग्लाय, "मिन्जो पचाह चली पौ।" तिन्हीं ग्लाय, "हे प्रभु मिन्जो पैहलें घरेयो जाणां दैआ कि मैं अपणे बुडे जो दबी ओयें।" 60 तिन्हीं तिस नै ग्लाय, "मरेयां जो अपणे मुडदे दबणां दैआ, अपर तू जाई नै परमात्में दे राज्जे दी काहणी सणां।" 61 इक्की होरनी भी ग्लाय, "हे प्रभु, मैं तिजो पचाह चली पोगा; अपर पैहलें मिन्जो घरेयो जाणां दैआ कि मैं घरे देहयां माणुआं ते विदा लैई ओयें।" 62 यीशुयें तिस नै ग्लाय, "जेहड़ा कोई अपणा हत्थ हला पर रखी नै पचाह दिखदा ऐ, सैह परमात्में दे राज्जे जोगा नी ऐ।

सत्तर चेलयां जो घल्लणां

10 इन्हां गलां दे बाद प्रभुयें होर सत्तर माणु नियुक्त कित्ते, कने जिस -जिस सैहरे कने जगाह जो सैह अप्पु जाणे आळा था, तित्थू तिन्हां जो दो-दो करी नै अप्पु ते पैहलें घल्ले। 2 यीशुयें तिन्हां नै ग्लाय, "पकयो खेत मते हन, अपर मजदूर थोडे हन; तिस ताई खेते दे मालके नै विणती करा कि सैह अपणे खेतां बढणयो होर मजदूर घल्ली दें। 3 जा, दिखा, मैं तुहां जो भेडां साइआं भेडियां दे बिच घल्लदा ऐ। 4 इसताई ना बटुआ, ना झोली, ना जूते लैआ; कने ना रस्ते च कुसियो नमस्कार करा। 5 जिस भी घरे च जा, पैहलें ग्ला, कि तिस घरे च कल्याण होयें। 6 जे तिस घरे च कोई कल्याण जोग्गा हुंगा, तां तुहां दा कल्याण तिस पर हुंगा, नी तां तुहां अल्ल वापस ओंगा। 7 तुहां तिस ई घरे च रैहूआ, कने जेहड़ा कुच्छ भी तिन्हां ते मिलें, सैह ही खा पीयें, कजोकि मजदूर जो अपणी दिहाडी मिलणी चाइदी; घर -घर नी घूमणां। 8 जिस भी सैहरे जो जा, कने तित्थू दे माणु तुहां जो रोकन, तां जेहड़ा

कुछ भी तुहां सामणे रखेया सैई खा । 9 तित्थु दे बमारां जो ठीक करा कने तिन्हां नैं ग्ला, परमात्मैं दा राज्र तुहां अल्ल आई रहूआ ऐ । 10 अपर जिस भी सैहरे च जा, कने तित्थु दे माणु तुहां जो ग्रहण ना करन, तां तिन्हां दे बजारां च जाई नैं ग्ला, 11 तुहां दे सैहरे दी धूडा भी, जेहड़ी अहां देहयां पैरां च लगिया ऐ, अहां तुहां सामणे झाडी दिदें हन; तमी एह समझी लैआ कि परमात्मैं दा राज्र तुहां अल्ल ओआ दा ऐ । 12 मैं तुहां नैं गलांदा ऐ कि तिस दिन तिस सैहरे दी हालत कने सदोमे दी हालत ज्यादा सहणे जोमी होगी ।

वेवसुआसी सैहरां जो हाय

(मत्ती 11 : 20-24)

13 "हाय खुराजीन । हाय बैतसैदा जेहड़े सामर्थी दे कम्म कित्ते गै, जे सैह सूर कने सैदा च कित्ते जांदे तां टाट उठी करी कने धूडी च बैई करी तिन्हां काहू दा मन बदली लैआ हुंदा । 14 अपर न्याय दे दिने तुहां दी हालत कने सूर कने सैदा दी हालत जादा सैहणे जोमी होगी । 15 कने हे कफरनहूम सैहर, क्या तू सुअर्गे तिकर ऊचा किता जांगा? तू तां अधोलोक तिकर थलें जांगा । 16 "जेहड़ा तुहां दी सुणदा ऐ, सैह मेरी सुणदा ऐ, कने जेहड़ा तुहां जो घटिया जाणदा ऐ, सैह मिन्जो घटिया जाणदा ऐ; कने जेहड़ा मिन्जो घटिया जाणदा ऐ; सैह मेरे घल्लणे आळे जो घटिया जाणदा ऐ ।"

सत्तरां चेलयां दा वापस ओणां

17 जाहू सैह सत्तर चले खुशी मनादे वापस आये कने ग्लाणां लगे, "हे प्रभु तेरे नांये ते दुष्टआत्मां भी अहां दे वशे च हन ।" 18 यीशुयें तिन्हां नैं ग्लाय, "मैं सैताने जो बिजळी साइआं सुअर्गे ते पांदा दिखा दा था । 19 दिखा, मैं तां तुहां जो सरपां कने डगुआं जो चिळणे दा, कने दुशमणा दी सारी सामर्थी पर हक दित्या ऐ; कने कुसा भी चीजा ते कोई नकसान नी हुंगा । 20 तमी इसते खुश मत होया कि आत्मां तुहां दे वशे च हन, अपर इसते खुश होया कि तुहां दे नां सुअर्गे च लिखेयो हन ।"

यीशु मसीह दा खुश होणां

(मत्ती 11 : 25-27; 13 : 16,17)

21 तिसा घड़िया सैह पवित्र आत्मां च होई नैं खुशीया कने भरौई गैआ, कने ग्लाय, "हे पिता, सुअर्ग कने धरतिया दे प्रभु, मैं तेरा धन्यवाद करदा ऐ कि तुहां तिन्हां सारियां गल्लां जो अकूमदा कने समझदारां ते छपाई नैं रखेया, कने जागतां पर प्रकट कित्ता । हां, हे पिता, कजोकि तुहां जो ऐही खरा लग्गा । 22 मेरे पितें मिन्जो सब कुछ दित्या ऐ; कने कोई नी जाणदा कि पुत्तर कुण ऐ सिर्फ पिता, कने पिता कुण ऐ एह भी कोई नी जाणदा सिर्फ पुत्तर दे कने सैह जिस पर पुत्तर तिसियो प्रकट करणां चाहंदा ।"

23 ताहू चेलयां दे पाससैं मुडी करी किल्ले च ग्लाय, "धन हन सैह अखी, जेहिडया इन्हां गल्लां जो तुहां दिखा दे हन कने दिखदियां हन । 24 कजोकि मैं तुहां नैं ग्लांदा ऐ कि मतेआ भविष्यवक्ता कने राजेयां नैं चाया कि जेहिडयां गल्लां तुहां दिखा दे हन दिखन अपर नी दिखियां, कने जेहिडयां गल्लां तुहां सुणदे हन सुणन अपर नी सुणियां ।

दयालू सामरी माणुये दा उदारण

25 कने दिखा, "इक कानून बनाणे आळा उठेया कने एह ग्लाई नैं तिसदी परीक्षा करणां लग्गा, हे गुरु, सदा दी जिन्दगी हासल करणे तांई मैं क्या करे?" 26 यीशुयें तिस नैं ग्लाय, "कानून च क्या लिख्या ऐ? तू किआं पढदा ऐ?" 27 तिन्हीं जबाब दित्ता, "तू प्रभु अपने परमात्मैं नैं अपने सारे मने कने सारे प्राण कने अपनी सारी शक्तिया कने अपनी सारिया अक्का दे सौगी प्यार रख, कने अपने प्देसिये नैं अप्पु साइआं प्यार रख ।" 28 यीशुयें तिस नैं ग्लाय, "तैं ठीक जबाब दित्ता, ऐही कर तां तैं जिंदे रहणां ।" 29 अपर तिन्हीं अपने आप्पे जो धर्मी ठहराणे दी इच्छा ते यीशुये ते पूछ्या, "तां मेरा प्देसी कुण ऐ?" 30 यीशुयें जबाब दित्ता, "इक माणु यरुशलैमे ते यरीहो जो जांदा था कि डाकुआं पकडी नैं तिसदे कपड़े खोली लै, कने मारी जक्की नैं अधमरा छडी नैं चली गै । 31 कने इआं होया कि तिस रस्ते ते इक याजक जा दा था, अपर तिसियो दिखी नैं कतराई करी चली गैआ । 32 इस तरीके नैं इक लेवी तिसा जगाह च आया, सैह भी तिस दिखी नैं कतराई करी चली गैआ ।

33 अपर इक सामरी यात्री तिसा जगाह ते निकळेया, कने तिन्हीं तिसियो दिखी करी तरस खादा । 34 तिन्हीं तिस अल्ल आई करी तिसदे जख्मां पर तेल कने दाखरस लगाई नैं पट्टियां बनियां कने अपने घोड़े पर बैठाई नैं सराई च लैई गैआ कने तिसदी सेवा सुवा कित्ती । 35 दूये दिने तिन्हीं दो दीनार कड्डी नैं सराई दे मालके जो दित्ते, कने ग्लाय, तिसदी सेवा सुवा करेयां, कने जेहड़ा कुछ तेरा होर लगगा, सैह मैं वापस ओणे पर तिजो देई दिंगा । 36 हुण तेरिया समझा च जेहड़ा डाकुआं पकड़ेया कने लूटी लैआ था, तिन्हां त्रीनां च तिसदा प्देसी कुण होया?" 37 तिन्हीं ग्लाय, "सैई जिन्हीं तिस पर दया कित्ती ।" यीशुयें तिस नैं ग्लाय, "जा, तूमी एह ई कर ।"

मार्था कने मरियमा दे घरें यीशु मसीह

38 जाहू सैह चलेयो थे तां इक्की प्रांये च गैआ, कने मार्था नांये दी इक्की जणांसा कने तिसियो अपने घरेयो सदयेया । 39 मरियम नांये दी तिसा दी इक बैहण थी सैह प्रभु दे चरणां च बैई करी तिसदा वचन सुणांती थी । 40 अपर मार्था सेवा करदे-करदे परेशान होई गैई, कने यीशु अल्ल आई नैं ग्लाणां लग्गी, हे प्रभु, क्या तिजो मेरी कुछ भी चिंता नी कि मेरीया बैहणी मिन्जो सेवा करणे तांई किल्लिया छड्डी दित्ता? हुण इसा जो ग्ला कि मेरी मदद कर ।" 41 प्रभुयें तिसा जो जबाब दित्ता, "मार्था, हे मार्था तू मतिआं गल्लां दी चिंता करदी कने घबरांती ऐ । 42 अपर इक गल्ल जरूरी ऐ, तिस उतम हिस्से जो मरियमा चुणी लैआ ऐ जेहड़ा तिसा ते खोता नी जांगा ।

चेलयां जो प्रार्थना करणां सखाणां

(मत्ती 6 : 9-13)

11 यीशु कुसी जगाह पर प्रार्थना करा दा था । जाहू सैह प्रार्थना करी बैठा ता तिसदे चेलयां च इक्की चेलें ग्लाय, "हे प्रभु, जिआं एह यहूना अपने चेलयां जो प्रार्थना करणां सखाया तिआं ई तू अहां जो भी सखाई दे ।

2 यीशुयें तिन्हां नैं ग्लाय, "जाहू तुहां प्रार्थना करन तां ग्ला : 'हे पिता, तेरा नां पवित्र मनेया जा, तेरा राज्र ओयें ।

3 'अहां दी दिन भर दी रोटी हर दिन अहां जो देआ कर,

4 'कने अहां दे पापां जो माफ कर, कजोकि अहां भी अपने हर इक्की अपराधिये जो माफ करदे हन, कने अहां जो परीक्षा च मत पा ।"

प्रार्थना दे बारे च यीशु मसीह दी शिक्षा

(मत्ती 7 : 9-13)

5 ताहू यीशुयें तिन्हां नैं ग्लाय, "तुहां च कुण ऐ कि जिसदा इक साथी होयें, कने सैह आधिया राती जो तिस अल्ल जाई करी तिस नैं ग्ला, हे साथी; मिन्जो तीन रोटियां दे । 6 कजोकि इक यात्री साथी मिन्जो अल्ल आया ऐ, कने तिस अल्ल रखणे तांई मिन्जो अल्ल कुछ नी ऐ । 7 कने सैह अंदरा ते जबाब दें, 'मिन्जो दुख मत दें; हुण तां दुरआजा बंद ऐ कने मेरा जागत मिन्जो सौगी विस्तरे च ऐ तिस तांई मैं तिजो उठी नैं देई नी सकदा?" 8 मैं तुहां नैं ग्लांदा ऐ, जे तिसदा साथी होणे पर भी तिसियो उठी नैं ना दें तमी तिसदी शर्म छडी नैं मगणे दिया बजाह ते तिसियो जितणी जरूरत होयें उतणी ई उठी नैं दिंगा । 9 कने मैं तुहां नैं ग्लांदा ऐ कि मंगे तां तुहां जो दित्ता जांगा; तोपणे, तां तुहां पांगे; तोरणे तां तिस तांई खोलेया जांगा । 10 कजोकि जेहड़ा कोई मंगदा ऐ, तिसियो मिलदा ऐ; कने जेहड़ा तोपदा ऐ, सैह पांदा ऐ; कने जेहड़ा ठोरदा ऐ, तिस तांई खोलेया जांगा । 11 तुहां च ऐदेया कुण पिता हुंगा, कि जाहू तिसदा पुत्तर रोटी मंगे, तां तिसियो पत्थर दें; या मच्छी मंगे, तां मच्छियां दे बदले तिसियो सर्प दें? 12 या अंडा मंगे तां तिसियो डंगु दें? 13 कने जाहू तुहां बुरे होई नैं अपने बच्चेयां जो खरियां चीजां दैणां जाणदे, तां सुअर्गीय पिता भी अपने मंगणे आळे जो पवित्र आत्मां कजो नी दिंगा ।"

यीशु मसीह कने बालजबूल सैतान

(मत्ती 12 : 22-30; मरकुस 3 : 20-27)

14 भिरी तिन्हीं इक गूंगिया आत्मां जो कडेया । जाहू गूंगी आत्मां निकळी गैई तां गूंगा ग्लाणां लग्गा, कने माणु हैराण होये । 15 अपर तिन्हां च कुछना माणुआं ग्लाय, "एह तां सैताने नां दे दुष्टआत्मां दे राजे 'बालजबूल' दिया मदता ते दुष्टआत्मां जो कडदा ऐ ।" 16 होरना तिसदी परीक्षा करणे तांई

तिसते अम्बरे दा इक्क नशाण मंगेया । 17 अपर यीशुयें तिन्हां दे मनां दियां गल्लां जाणी करी तिन्हां नें ग्लाय्या, “जिस-जिस राजे च बैर हुंदा ऐ, सैह राजे उजड़ी जांदा ऐ; कने जिस घरे च बैर हुंदा ऐ, सैह घर भी उजड़ी जांदा ऐ । 18 जे सैतान अपणां ई विरोधी होई जा, तां तिसदा राजे किआं बणी रहणां? कजोकि तुहां मेरे वारे च तां गलां दे हन कि एह सैताने दिया मदता ते दुष्टआत्मां जो कडदा ऐ । 19 भला जे मैं सैतान दी मदता ते दुष्टआत्मां जो कडदा ऐ, तां तुहां दी औलाद कुसी दी मदता नें कडदे हन? 20 अपर जे मैं परमात्में दी सामर्थी नें दुष्टआत्मां जो कडदा ऐ, तां परमात्में दा राजे तुहां अल्ल आई रहूआ ऐ । 21 जाहू ताकतवर माणु हत्थयारा बन्नी नें अपणे घरे दा पैहरा करदा ऐ, तां तिसदी धन दौलत बची रहंदी ऐ । 22 अपर जाहू तिसते बधी करी कोई होर ताकतवर युद्ध करी नें जीती लेंदा, तां तिसदे सैह हत्थयार जिन्हां पर तिसदा भरोसा था, खोई लेंदा कने तिसदिया धन दौलता लूटी नें बंडी दिंदा ऐ । 23 जेहड़ा मिन्जो सौगी नी सैह मेरे विरोधे च ऐ, कने जेहड़ा मिन्जो सौगी नी बटीणदा सैह रंगाडदा ऐ ।

अधूरा सुधार मुसीबता दा घर (मत्ती 12 : 43-45)

24 “जाहू दुष्टआत्मां माणु ते निकळी जांदी ऐ तां सुकिया जगाह पर आराम करणे जो तोपदी रहंदी ऐ, कने जाहू नी मिलदा तां ग्लांदी ऐ, मैं अपणे तिस घरे जो जित्थू ते निकळियो थी चली जांगी । 25 कने आई नें तिसियो झाडेया झड़ाया कने सज्या सजाया पांदी ऐ । 26 ताहू सैह जाई नें अपणे ते बुरी सत होर आत्मां जो अप्पु सौगी लैई ओंदी, कने सैह तिस च समाई नें वास करदी ऐ, कने तिस माणुये दी हालत पैहले ते बुरी होई जांदी ऐ ।”

धन कुण ऐ ?

27 जाहू सैह एह गल्लां ग्ला दा ही था तां माणुआं दी भीडा च कुणकी जणांसा जोर नें ग्लाय्या, “धन ऐ सैह गर्भ जिस च तू रहूआ कने सैह चिचू जेहड़ा तें पितेया ।” 28 तिन्हीं ग्लाय्या, “हाँ, अपर धन सैह हन जेहड़े परमात्में दा वचना जो सुणदे कने मनदे हन ।”

सुअर्गीय नशाणे दी मांग (मत्ती 12 : 38-42)

29 जाहू माणुआं दी बडी भीड किड्डी होंदी जांदी थी तां सैह ग्लाय्यां लगा, “इस जुगे दे माणु बुरे हन: सैह नशाण तां पां दे हन; अपर योना दे नशाणा छड्डी नें होर कोई नशाण तिन्हां जो नी दिता जांगा । 30 जिआं योना नीनवे दे लोकां तांई नशाण ठहरेया, तिआं ई माणुये दा पुत्तर भी तिस जुगे दे लोकां तांई ठेहरणा । 31 दक्षिण देशे दिया राणिया न्याय दे दिने इस बगते दे माणुआं सौगी उठी करी तिन्हां जो दोषी ठेहरांगी, कजोकि सैह सुलेमान दा ज्ञान सुणने जो धरतिया दे पास्से ते आई, कने दिखा, ऐत्थू सैह ऐ जेहड़ा सुलेमाने ते बडा ऐ । 32 नीनवे दे माणु न्याय दे दिने इस बगते दे लोकां सौगी खड्डी नें, तिन्हां जो दोषी ठहरांगे; कजोकि तिन्हां योना दा प्रचार सुणी नें मन बदलेया था कने दिखा, ऐत्थू सैह ऐ जेहड़ा योना ते भी बडा ऐ ।

शरीरे दा दिव्या

(मत्ती 5 : 15; 6 : 22,23)

33 “कोई माणु दिव्ये बाळी करी तलघरे च या भांडे थलें नी रखदा अपर उचिया जगाह रखदा ऐ कि अंदर ओणेआळे परगडे जो दिखन । 34 तेरे शरीरे दा दिव्या तेरी अख ऐ, इसताई एह जाहू तिकर तेरी अख साफ ऐ तां तेरा सारा शरीर भी परगडा ऐ; अपर जाहू सैह बुरी ऐ तां तेरा शरीर भी नैहरे साइआं ऐ । 35 इस ताई चुकनै रहणां कि जेहड़ा परगडा तिजो च ऐ सैह नैहरा नी होई जां । 36 इसताई जे तेरा सारा शरीर परगडा होयें कने तिसदा कोई हिस्सा नैहरा नी रहें तां सारे दा सारा ऐदेया परगडा हुंगा, जिआं तिस बगते हुंदा ऐ जाहू दिव्या अपणियां लौई ते तिजो लौ दिंदा ऐ ।”

शास्त्रियां कने फरीसियां ते चुकनै रहूआ (मत्ती 23 : 1-36; मरकुस 12 : 38-40)

37 जाहू सैह गल्लां करा दा था ताहू कुणकी फरीसियें तिस नें विणती किन्ती मिन्जो अल्ल खाणां खाई लै । सैह अंदर जाई करी खाणां खाणां बैठा । 38 फरीसियां जो एह दिखी नें हैरानी होई कि तिन्हीं खाणां खाणे पैहलें नौहता नी । 39 प्रभुयें तिस नें ग्लाय्या, “हे फरीसियो, तुहां कटोरे कने थाळिया जो उपरे-उपरे ते तां माजदे हन, अपर तुहां दे अंदर नैहरा कने बुराई भरोईयो ऐ । 40 हे वेअकेयो जिन्हीं बाहरे दा हिस्सा बणांया ऐ, क्या तिन्हीं अंदरे दा हिस्सा नी बणांया? 41 अपर हां, अंदरे आळी चीज्रां जो दान करी दैआ, तां दिखा, सब कुच्छ तुहां तांई खरा होई जांगा ।

42 “अपर हे फरीसियो, तुहां पर हाय, तुहां पुदीने, कने ब्रही दा कने हर तरांहे दे साग- सब्जिया दा दसमा हिस्सा दिंदे हन, अपर न्याय जो कने परमात्में दे प्यारे जो टाळी दिंदे हन; चाइदा तां था कि तिन्हां जो भी करदे रहंदे कने तिन्हां जो भी नी छडदे । 43 हे फरीसियो, तुहां जो हाय ! तुहां आराधनालायां च जरूरी-जरूरी आसन कने बाजारां च नमस्कार चाहंदे हन । 44 हाय तुहां पर ! कजोकि तुहां तिन्हां लुकियां कब्रा साइआं हन, जिन्हां पर माणु चलदे हन अपर नी जाणदे ।”

45 ताहू इक्क कानून बनाणे आळें तिस जो जबाब दिता, हे गुरु, इन्हां गल्लां ग्लायें नें तू म्हारी निंदा करदा ऐ ।” 46 तिन्हीं ग्लाय्या; “हे कानून बनाणे आळेयो तुहां जो भी हाय ! तुहां शरीरे दे बोझ हन जिन्हां जो चुकणा मुशकल ऐ, माणुये उपर लददे हन अपर तुहां अप्पु तिन्हां बोझा जो अपणियां इक्की उगली नें भी नी छूदें हन । 47 हाय तुहां पर ! तुहां तिन्हां भविष्यवक्ता दी कब्रां बणांदे हन, जिन्हां जो तुहां दे ई बाप दादुआं नें मारी दिव्या था । 48 कने तुहां गवाह हन, कने अपणे बाप-दादुआं दे कम्मां ते सहमत हन; कजोकि तिन्हां तिन्हां जो मारी दिव्या कने तुहां तिन्हां दियां कब्रां बणांदे हन । 49 इसताई परमात्में दा ज्ञान भी दस्सदा ऐ, मैं तिन्हां अल्ल भविष्यवक्तां जो कने स्याणयां जो घल्लगी, कने सैह तिन्हां च कुच्छना जो मारी दिंदा ऐ, कने कुच्छना जो सतांगे ।” 50 तांकि जितणे भी भविष्यवक्तां दा खून संसारे दी सृष्टिया ते बहाया गैआ ऐ, सारेयां दा लेखा इस ताई जुगें दे लोकां ते लैआ जा : 51 हाबीले दी हत्या ते लैई करी जकरियाह दी हत्या तिकर, जेहड़ा वेदी कने मंदरे दे बिच मारेया जांगा । मैं तुहां नें सच ग्लांदा ऐ इन्हां सारेयां दा लेखा तिस बगते दे लोकां ते लैआ जांगा । 52 हे कानून बनाणे आळेयो हाय तुहां पर ! तुहां अल्ल ज्ञान तां ऐ, इसताई ना तां तुहां परमात्में दे राजे च हाजर होदे कनेजेहड़े कि इस च हाजर होणा चाहंदे हन तिन्हां जो तुहां हाजर होणां नी दिंदे ।”

53 जाहू यीशु तिथु ते चली गैआ, तां शास्त्री कने फरीसी बुरी तरांहे तिसदे पचांह पैई गै कने छेडणां लग्गे कि यीशु तिन्हां दे सुआलां दा जबाब दें, 54 कने ताका च लग्गी रह कि तिसदे मुंमे दी कोई गल्ल पकड़न ।

पाखंड दे बरखलाफ चतौनी

(मत्ती 10 : 26,27)

12 इतणे च जाहू हजारं माणुआं दी भीड लग्गी गैई, ऐत्थू तिकर कि सैह इक्की-दूये परालें चढ़णा लग्गी पैयो थे, ताहू यीशु सबते पैहलें अपणे चलेयां नें ग्लाय्यां लग्गा, “फरीसियां दे डोंगी आळें खमीरे ते चुकनै रहेंद्यों । 2 कुच्छ भी ढकेया नी जेहड़ा खोलेया नी जांगा, कुच्छ भी छुपेया नी ऐ जेहड़ा जाणेया नी जांगा । 3 इस ताई जेहड़ा किच्छ तुहां नैहरे च ग्लाय्या ऐ, सैह परगडे च सुणया जांगा, कने जेहड़ा तुहां कमरेयां च कनां कनं ग्लाय्या ऐ, सैह छती पर चढी करी प्रचार किता जांगा ।

परमात्में ते डरा?

(मत्ती 10 : 28,31)

4 “मैं तुहां नें जेहड़े मेरे साथी हन ग्लांदा ऐ कि जेहड़े शरीरे जो मारदे हन अपर तिसदे पचांह होर कुच्छ नी करी सकदे, तिन्हां ते मत डरा । 5 मैं तुहां जो समझांदा कि तुहां जो कुसते डरणां चाइदा, मरणे ते बाद जिस जो नरके च पाणे दा हक्क ऐ, तिस ते डरा, हाँ मैं तुहां नें ग्लांदा तिस ते डरा । 6 क्या दो पैसे पंज चिड़ियां नी बिकदियां? तमी परमात्मां तिन्हां च इक्की जो भी नी

भुलदा । 7 तुहां दे मुँडे दे सारे बाळ भी गिणयो हन, इस ताई डरा मत, तुहां मतिआं चिड़ियां ते बधी करी हन ।

यीशु मसीह जो मना चाऐ मत मना
(मत्ती 10 : 32,33; 12 : 32; 10 : 19,20)

8 "मैं तुहां नैं ग्लांदा ऐ जेहड़ा कोई मिन्जो माणुआं सामणे मनी लेंगा तिस माणुये दा पुत्तर भी परमात्में दे सुअर्गे दूतां सामणे मनी लेंगा । 9 अपर जेहड़ा माणुआं दे सामणे नकारी दिंगा सैह मैं परमात्में दे सुअर्ग दूतां सामणे नकारी देणा ।

10 "जेहड़ा कोई माणुये दे पुत्तरे दे विरोधे च कोई गल्ल बोलें, तिसदा सैह अपराध माफ कित्ता जांगा, अपर जेहड़ा कोई पवित्र आत्मां दी निंदा करें, तिसदा अपराध माफ नी कित्ता जांगा ।

11 "जाहू माणु तुहां जो सभा कने हाकमां कने अधिकारियां सामणे लैई जान, तां चिता मत करणां कि अहां कुस तरीके नैं या क्या जबाब दिगे कने क्या ग्लांगे । 12 कजोकि पवित्र आत्मां तुहां जो तिस बग्त तुहां जो सखाई दिंगा कि क्या ग्लाणां चाइदा ।"

इक्क मीर मुख माणुये दा उदारण

13 भिरी भीड़ा च इक्की माणुयें तिस नैं ग्लाय, "हे गुरु, मेरे भाऊये जो ग्ला कि बुड़े दी जायदात मिन्जो सौगी बंडी लें ।" 14 यीशुयें तिन्हां नैं ग्लाय, "हे माणु, कुणी मिन्जो तुहां दा न्यायी या बडणे आळा नियुक्त कित्या ऐ?" 15 कने तिन्हीं तिन्हां नैं ग्लाय, "चुकनै रैहआ, कने हर तरांह दे लालचे ते कने अपने आप्पे जो बचाई रखा; कजोकि कुसी दी जिन्दगी तिसदी जायदाता दी बहुतायत नैं नी हुंदा ।" 16 यीशुयें तिन्हां नैं इक्क उदारण ग्लाय :कुसी अमीरे दिया जमीना च बड़ा अनाज होया । 17 ताहू सैह अपने मने च सोचणां लग्गा, 'मैं क्या करें कजोकि मिन्जो अल्ल जगाह नी जित्थू मैं अपनां अनाज दान करें ।' 18 कने तिन्हीं ग्लाय, 'मैं एह करगा मैं अपने पेडूयां तोड़ी करी तिन्हां ते बडा बणांगां; कने तित्थू अपनां सारा अनाज कने धन दौलत रखगा; 19 कने अपने प्राणां नैं ग्लांका कि प्राण, तिजो ताईं मते सालां ताईं धन दौलत रखियो ऐ; चैन कर, खा पी कने सूखे नैं रैह ।' 20 अपर परमात्में तिस नैं ग्लाय, 'हे मुख ! इसा राती ई तेरे प्राण तिजो ते लैई लें जांगे; ताहू जेहड़ा किच्छ तें कठेरया सैह कुसदा हुंगा?' 21 तदेया ई सैह माणु भी ऐ जेहड़ा अपने ताईं धन कठेरदा ऐ, अपर परमात्में दिया नजरा च अमीर नी ।"

परमात्में पर भरोसा रखा
(मत्ती 6 : 25-34)

22 भिरी तिन्हीं अपने चेलयां नैं ग्लाय, "इस ताईं मैं तुहां नैं ग्लांदा ऐ, अपने प्राणां दी चिता मत करा कि अहां क्या खांगे; ना अपने शरीरे दी चिता कि क्या पैहनगे । 23 कजोकि खाणे ते प्राण कने कपडयां ते शरीर बधी नैं ऐ । 24 कोगलेयां पर ध्यान दैआ; सैह ना तां बांदे हन, ना बडदे; ना तिन्हां अल्ल भंडार कने ना तां पेडू हुंदा ऐ; तमी परमात्मां तिन्हां जो पाळदा ऐ । तुहां दी कीमत इन्हां पंछियां ते भी जादा ऐ ।" 25 तुहां च ऐदेया कुण ऐ जेहड़ा चिता करी नैं अपनी उमरा च इकक घड़ी भी बधाई सकदा ऐ? 26 इस ताईं जे तुहां सारेयां ते छोटा कम्म भी नी करी सकदे, तां होरनी गल्लां ताईं कोई चिता करदे हन? 27 जंगली फूलां दे रूखां पर ध्यान करा कि सैह किआं फुलदे हन :सैह ना मेहनत करदे, ना कटदे हन; तमी मैं तुहां जो ग्लांदा ऐ कि सुलेमान भी अपनी पूरी वादशाही जिन्दगिया च इन्हां फूलां साइआं नी सज्जी सकेया । 28 इस ताईं परमात्मां मैदाने दे घाहे जो, जेहड़ा अज्र ऐ कल भाड़े च झोकी दित्ता जांगा, ऐदेया पैहणदा ऐ; तां हे वेवसुआसियो सैह तुहां जो कजो नी पैहनांगा? 29 कने तुहां इसा गल्लां दी तोपा च मत रैहआ कि क्या खांगे क्या पींगे कने ना शक करा । 30 कजोकि संसारे दी जातिआं इन्हां सारियां चीज्जां दियां तोपा च रैहदियां हन कने तुहां दा पिता जाणदा ऐ तुहां जो इन्हां चीज्जां दी जरूरत ऐ । 31 अपर परमात्में दे राजे दी तोपा च रैहआ तां एह चीज्जां भी तिजो मिली जागियां ।

सुअर्गीय धन दौलत
(मत्ती 6 : 19-21)

32 "हे छोटे झुण्ड, मत डर; कजोकि तेरे पिता जो एह भांदा ऐ, कि तिजो राज्र दें । 33 अपणिया धन दौलता बेची करी दान करी दैआ; अपने बासती ऐसे बटुये बणां जेहड़े पराणे नी होंदे, ग्लाणे दा मतलब एह ऐ कि सुअर्गे च इतणा धन किड्डा करा जेहड़ा घटदा नी कने जिस अल्ल चोर जांदा, कने कीड़ा नी लगदा । 34 कजोकि जित्थू तेरा धन ऐ तित्थू तेरा मन भी लगेया रैहगा ।

जागदे रैहआ

35 "तुहां दा लक्क बनेयां रैह कने तुहां दे दिर्ये बळदे रैह । 36 कने तुहां तिन्हां माणुआं साइआं बणा, जेहड़े अपने मालके दे इंतजारे च रैहदे हन कि सैह व्याहे ते काहू वापस आंगा, कि जाहू सैह आई नैं दुरआजे ठारें तां इक्कदम तिस ताईं खोली दै । 37 धन हन सैह दास जिन्हां जो मालक आई नैं जागदे दिखें : मैं तिजो नैं सच ग्लांदा कि सैह लक्के बनी करी खाणां खुआणा बैठांगा, कने बक्खें आई नैं तिन्हां दी सेवा करगा । 38 जे सैह अधिया राती या भ्यागा दे बग्त आई नैं जागदे दिखें, तां सैह दास धन हन । 39 अपर तू एह जाणी रख कि जे घरे दा मालक जाणदा कि चोर कुस बग्त आंगा, तां जागदा रैहदा अपने घरे च संध नी लगणा दिंदा 40 तूमी तयार रैह :कजोकि जिस बग्त तू सोचदा भी नी, तिस बग्त ई माणु दा पुत्तर आई जागां ।"

वसुआसी कने वेवसुआसी दास
(मत्ती 24 : 45-51)

41 ताहू पतरसें ग्लाय, "हे प्रभु क्या एह उदारण तें अहां नैं ग्लादा कि सबना नैं ग्लादा ऐ ।" 42 प्रभुयें ग्लाय, "सैह वसुआसे जोग्गा कने अक्कमंद भंडारी कुण ऐ, जिसदा मालक दासां चाकरां पर सरदार बणांया कि तिन्हां जो खाणे दी समग्री दें । 43 धन ऐ सैह दास, जिसियो तिसदा मालक आई नैं एह देहया ई करदे पां, 44 मैं तुहां नैं सच ग्लांदा ऐ, सैह तिसियो अपनी सारिया धन दौलता दा हक्कदार बणांगा । 45 अपर जे सैह दास सोचणां लग्गा कि मेरे मालके ओणे च देर करा दा ऐ, कने दासां कने दासियां जो मारणां-पिटणा लग्गा, कने खाणां-पीणा कने पियक्कड़ होणां लग्गा । 46 तां तिस दासे दा मालक ऐसे दिने आंगा, जाहू सैह तिसदा इंतजार नी करा दा होयें, कने ऐसे बग्त आंगा जिसजो सैह जाणदा नी होयें, कने तिसियो जादा सज्जा दैई नैं तिसदा हिस्सा वेवसुआसियां सौगी ठेहरांगा । 47 सैह दास अपने मालके की इच्छा जाणदा था, कने तयार नी रैहआ कने ना तिसदिया इच्छा मताबक चला, बड़ी मार खांगा । 48 अपर जेहड़ा नी जाणी करी मार खाणे जोग्गा कम्म करें सैह थोड़ी मार खांगा । इसताईं जिसियो मता दित्ता गैआ ऐ, तिसते बड़ा मंगेया जांगा; कने जिस जो मता दित्ता गैआ ऐ, तिसते मता लैई लैआ जांगा ।

यीशु मसीह दे ओणे दा सबूत
(मत्ती 10 : 34-36)

49 "मैं धरतिया पर अग लगाणा आया ऐ; कने क्या चाहंदा ऐ सिर्फ एह कि हुण सुलग जांदी । 50 मिन्जो तां इक्क बपतिस्मा लैणां ऐ, कने जाहू तिकर सैह ना होई लें ताहू तिकर मैं कदेयी तंगिया च रैहगा । 51 क्या तुहां समझदे हन कि मैं धरतिया पर मलाप करणा आया ऐ? मैं तुहां नैं ग्लांदा ऐ; नी, अपर लग्गा करणा आया ऐ । 52 कजोकि हुण ते इक्की घरे च पंज माणु अप्पु च बैर रखगे तीन दूँ ते कने दो त्रीं ते । 53 पिता पुत्तरे नैं, कने पुत्तर पिता नैं बैर रखगा; मां कुड़िया नैं, कने कुड़ी माऊ नैं, सस नुमां नैं, कने नू ससू नैं बैर रखगी ।"

बगते दे लछण
(मत्ती 16 : 2-3)

54 तिन्हीं माणुआं दी भीड़ा नैं भी ग्लाय, "जाहू तुहां बदळे जो पश्चिमा ते उठदे दिखदे हन तां झट गलांदे हन कि बरखा होगी, कने एह ई हुंदा ऐ; 55 कने जाहू दक्षिणी होआ चलदिया दिखदे हन तां गलांदे हन कि लू चलगी, कने इआं ई हुंदा ऐ । 56 हे डोंगियो, तुहां धरतिया कने अम्बरे दे रूप रंगे च भेद करी सकदे हन, अपर इस जुगे दे बारे च कजो भेद करणां नी जाणदे?

अपणे विरोधिये नें समझौता

(मत्ती 5 : 25-26)

57 "तुहां अप्पु ई फैसला कजो नी करी लेंदे कि ठीक क्या ऐ ।" 58 जाहू तुहां अपणे बैरिये सौगी कोर्ट कचेहरी जो मकदमे ताई जांदे हन तां तिस सौगी रस्ते च ई समझौता करणे दी सोची लै, इआं ना होयें कि सैह तिजो हाकमे अल्ल लैई जां, कने हाकम तिजो सपाईये दे हुआले करी दें कने सपाई तिजो जेला च पाई दें । 59 मैं तुहां नें ग्लांदा ऐ कि जाहू तिकर तू दमड़ी दमड़ी भर ना दें ताहू तिकर तित्थु ते छूटी नी पांगा ।

मन फिरा या नाश हों

13 तिस बग्त कुच्छ माणु आई पुजे, कने तिस नें तिन्हां गलीलियां दी चर्चा करणां लगे, जिन्हां दा खून पिलातुसे तिन्हां दे ई बलिदानां सौगी मिलाया था । 2 एह सुणी करी तिन्हीं तिन्हां नें ग्लाय, "इसदा मतलब ऐ कि तुहां इन्हां गलीलियां जो होरनी गलीलियां ते जादा पापी समझदे थे जिन्हां सौगी एह सब किच्छ होया? जिस दिया बजाह ते इन्हां पर ऐसी मुसीबत आई । 3 मैं तुहां नें ग्लांदा ऐ कि नी; अपर जे तुहां मन नी बदलगे तां तुहां भी सारे इस तरीके नें नाश होंगे । 4 या, क्या तुहां समझदे हन कि सैह ठारां माणु जिन्हां पर शीलोहे दा टावर पैआ, कने सैह दबौई करी मरी गै :यरुशलम दे कने सारे रहणे आळ्यां ते जादा अपराधी थे? 5 मैं तुहां नें ग्लांदा ऐ कि नी; अपर जे तुहां मने नी बदलगे तां तुहां सारे ही इसा तरीके नें नाश होंगे ।

फळां बगैर धूडे दे रूखे दा उदारण

6 भिरी तिन्हीं एह उदारण भी ग्लाय; "कुसकी दे अंगुरा दे बागे च धूडे दा रुख लगया था । 7 ताहू तिन्हीं बागे दे रखवाळे नें ग्लाय, "त्रीं सालां ते इस धूडे दे रूखे च फळ तोपणां ओंदा ऐ अपर फळ नी मिलदा । इसियो बड्डी दें कजोकि इन्हीं बेली जमीन रोकियो?" 8 तिन्हीं तिस जो जबाब दित्ता, "हे मालक, इसियो इक्क साल होर दिखी लैआ तांकि मैं इस दे चौनी पाससं खुणी नें खाद पाई सकें । 9 जे अगले साल फळ दिंगा तां ठीक ऐ, नी तां इसियो बड्डी दिंगे ।"

सब्त दे दी कुबड़िया जणांसा जो ठीक करणां

10 सब्त दे दिन यीशु इक्की आराधनालय च शिक्षा दें दा था । 11 तित्थु इक्क जणांसा थी जिसा जो ठारा साल ते इक्क कमजोर करणे आळी आत्मां चिमडियो थी, कने सैह कुबड़ी होई गियो थी कुस भी तरीके नें सीधी नी होई सकदी थी । 12 यीशुयें तिसा जो सदेया कने ग्लाय, "हे नारी, तू अपणियां कमजोरिया ते छूटी गैई ऐ ।" 13 ताहू तिन्हीं तिसा परालें हत्थ रखेया, कने इक्कदम सीधी होई गैई कने प्रभु दी महिमा करणां लग्गी । 14 इसताई कि यीशुयें सब्त दे दिन तिसा जणांसा जो खरा कित्या था, "एह दरखी करी आराधनालय दा सरदार गुस्सा करी नें लोका नें ग्लाणां लग्गा, "छै दिन हन जिन्हां च कम्म करणां चाइदा, इन्हां दिना ई चंगाई लैणी चाइदी ना कि सब्ते आळे दिने ।" 15 एह सुणी नें प्रभुयें जबाब दित्ता, "हे डोंगियो, क्या सब्ते आळे दिने तुहां च हर इक्क अपणे दांदे या गद्धे जो घराळा ते खोली करी पाणी पियाणा नी लैई जांदा? 16 तां एह क्या ठीक नी था कि एह जणांसा जेहड़ी अब्राहमे दी कुडी ऐ जिसा जो सैताने ठारां साला ते बन्नी रखियो थी, सब्ते आळे दिने तिस बंधने ते छडाई जांदी ऐ?" 17 जाहू तिन्हीं एह गलां ग्लाय्यां, तां तिस दे सारे विरोधी शर्मिंदा होई गै, कने सारी भीड़ तिन्हां महिमा दे कम्मां ते जेहड़ा सैह करदा था, खुश होई ।

राईया दे दाणे दा उदारण

(मत्ती 13 : 31,32 मरकुस 4 : 30-32)

18 भिरी तिन्हीं ग्लाय, "परमात्में दा राज कुस साइआं ऐ? कने मैं तिसदी तुलना कुसणे करे? 19 सैह राईया दे इक्की दाणे साइआं ऐ, जिसयो माणुयें लैई करी अपणे बागे च बाया : कने सैह बधी करी रुख बणी गैआ; कने अम्बरे दे पंछियां कने तिसदियां डाळियां पर बसेरा कित्ता ।"

खमीरे दा उदारण

(मत्ती 13 : 33)

20 तिन्हीं भिरी ग्लाय, "मैं परमात्में दे राजे दी तुलना कुसणे करे? 21 सैह तिस खमीरे साइआं ऐ, जिसजो कुणकी जणांसा लैई नें तीन किलो आटे च मिलाया, कने होंदे होंदे सारा आटा खमीर होई गैआ ।"

संगड़ा दुरआजा

(मत्ती 7 : 13,14 21-23)

22 सैह सैहरे-सैहरे, कने ग्रांए-ग्रांए च होई नें शिक्षा दिंदा होया यरुशलमें दे पाससे जा दा था, 23 तां कुणकी तिसते पूछ्या, "हे प्रभु, क्या उद्धार पाणे आळे थोडे हन?" यीशुयें तिस नें ग्लाय, 24 संगड़े दुरआजे ते दाखल होणे दी कोशश करा, कजोकि मैं तुहां नें सच ग्लांदा कि मते दाखल होणां तां चाहंगे, कने सैह दाखल नी होई सकगे । 25 जाहू घरे दा मालक उठी नें दुरआजे बंद करी दित्यो होन, कने तुहां बाहर खडौई करी रोंदे पीटदे दुरआजे खोलणे ग्लाणां, "हे प्रभु, मिन्जो ताई खोली दें, कने सैह जबाब दिंगा, "मैं तुहां जो नी जाणदा, तुहां कुत्थु दे हन?" 26 ताहू तुहां ग्लाणां, "अहां कने तिजो सामणे खादा पीता कने तें अहां दे बजारां च शिक्षा दित्ती ।" 27 अपर सैह ग्लांगा, "मैं तुहां नें ग्लांदा ऐ, मैं नी जाणदा तुहां कुत्थु ते हन । हे बुरे कम्मां करणे आळ्यो, तुहां सारे मिन्जो ते दूर हन ।" 28 तित्थु रोणां कने दंद पीणां हुंगा; जाहू तुहां अब्राहमे जो कने इसहाके जो कने याकूबे जो कने सारे भविष्यवक्तां जो परमात्में दे राजे च बैठयो, कने अपणे आप्पे जो बाहर कडदे होये दिखगे; 29 सारे संसारे ते माणु परमात्में दे राजे च अपणी अपणी जगाह लैणां ओणां । 30 कने दिखा, कुच्छ पचांह हन सैह गांह होंगे, कने कुच्छ जेहडे गांह हन, सैह पचांह होंगे ।"

हेरोदेसे दी दुशमणी

31 तिस बग्त कुच्छना फरीसियां आई नें तिस नें ग्लाय, "ऐत्थु ते निकळी करी चली जा, कजोकि हेरोदेस राजा तिजो मारी देणां चाहदा ऐ ।" 32 यीशुयें तिन्हां नें ग्लाय, "जाई नें तिसा लोमड़ीया नें ग्लाई दें कि दिख, मैं अज्र भी कने कल भी दुष्टआत्मां जो कडदा कने बमारियां जो ठीक करदा ऐ, कने त्रीये दिने अपणां कम्म पूरा करगा । 33 तमी मिन्जो अज्र कने कल कने परसुं चलणां जरूरी ऐ, कजोकि होई नी सकदा कि कोई भविष्यवक्ता यरुशलमे दे बाहर मारेया जां ।

यरुशलमें ताई विलाप

(मत्ती 23 : 37-39)

34 "हे यरुशलमे ! हे यरुशलमे ! तू जेहड़ा भविष्यवक्तां जो मारी सकदा ऐ, कने जेहड़ा तिजो अल्ल घल्लेयो तिन्हां पर पत्थर मारदा ऐ । कितणी ई बरी मैं एह सोचया कि जिआं कुकड़ी अपणे बच्चेयां जो अपणे पंखा थलें किड्दा करी नें रखदी ऐ, तिआं ई मैं भी तेरेयां जागतां जो किड्दा करगा, अपर तुहां एह नी सोचेया । 35 दिखा, तुहां दा घर तुहां ताई उजाड़ छड्डी जांदा ऐ, कने मैं तुहां नें ग्लांदा ऐ जाहू तिकर तुहां नी ग्लांगे, धन हन सैह, जेहडे प्रभु दे नाये ते ओंदे हन, ताहू तिकर तुहां मिन्जो भिरी कदी भी नी दिखगे ।"

फरिसिये दे घरें यीशु मसीह

14 भिरी यीशु सब्त दे दिने फरिसियां दे सरदारां च कुसी इक्की सरदारे दे घरे रोटी खाणां गैआ :कने सैह तिसियो ताड़ा दे थे 2 तित्थु इक्क माणु तिसदे सामणे था, जिसियो जलंधर दा रोग था । 3 तिस जो दिखी करी यीशुयें कानून बनाणे आळ्यां नें कने फरीसीयां नें ग्लाय, "क्या सब्त दे दिन खरा करणां ठीक ऐ या नी?" 4 अपर सैह चुप चाप रैह ताहू यीशुयें तिसियो छुई करी खरा कित्ता कने जाणां दित्ता, 5 कने तिन्हीं ग्लाय, तुहां च इदेया कुण ऐ, जिसदा गद्धा या दांद खुऐ च पैई जां कने सब्त दे दिन तिस जो तौळी बाहर नी कड्डे?" 6 सैह इसा गलां दा तिन्हां अल्ल कोई भी जबाब नी था ।

नम्रता कने परोणेयां दा आदर सम्मान

7 जाहू तिन्हीं दिख्या कि सदेयो माणु कदेइआं खास खास जगाह तोपी लेंदे हन तां इक्क उदारण देंई नैं तिन्हीं ग्लाय, 8 "जाहू कोई तिजो व्याहे च सदे, तां खास जगाह च नी बैणा, कुत्थी इआं ना होयें कि तिन्हीं तिजो ते भी बडे जो सदेया होयें । 9 कने जिन्हीं तिजो कने तिसियो दूनी जो सदेया होयें, आई नैं तजो ग्लां, इसियो जगाह दे, कने ताहू तिजो शर्मिदा होई नैं सबना ते घटिया जगाह च बैणा पोयें । 10 अपर जाहू भी तिजो सदेया जां ता साबना ते घटिया जगाह च जाई नैं बैठ, कि जाहू सैह जिन्हीं तिजो सदेया ऐ तिजो अल्ल आई नैं ग्लां, हे साथी गांह जाई नैं बैठ, जाहू तिजो सौगी बैणे आळेयां सामणे तेरी महिमा होंगी । 11 कजोकि जेहड़ा कोई अपणे आप्पे जो बडा बणांगा, सैह छोटा किता जांगा; कने जेहड़ा कोई अपणे आप्पे जो छोटा बणांगा, सैह बडा किता जांगा । 12 ताहू तिन्हीं अपणे सदेणे आळे नैं भी ग्लाय, "जाहू तू दिने दी कने राती दी धाम दें, तां अपणे साथियां या भाऊआं या रिशतेदारा या अमीर प्देसियां जो मत सद, कुत्थी इआं ना होयें कि सैह भी तिजो सदन, कने तिजो नैं बदला होई जां । 13 अपर जाहू तू धाम देंगी तां गरीबां, डुडेयां, लटेयां, कने अन्नेयां जो सद । 14 ताहू तू धन हुगा, कजोकि तिन्हां अल्ल तिजो बदला देंगे तांई कुच्छ नी ऐ, अपर तिजो धर्मियां दा जिंदे होणे पर इस दा फळ मिलगा ।"

बडिया धामा दा उदारण

(मत्ती 22 : 1-10)

15 तिस सौगी खाणां खाणे आळेयां ते इक्की एह गलां सुणी नैं तिस नैं ग्लाय, "धन ऐ सैह जेहड़ा परमात्में दे राजे च रोटी खांगा ।" 16 तिन्हीं तिस नैं ग्लाय, "कुणी माणुये बडी धाम दिती कने सबना जो सदेया । 17 जाहू खाणां तयार होई गैआ तां तिन्हीं अपणे दासे दे हत्थ सादा घल्लया कि जेहड़े माणु सदेयो तिन्हां जो ग्ला, "ओआ, हुण खाणां तयार ऐ ।" 18 अपर सैह सारे माफी मगणा लगे पैहले आळें तिस नैं ग्लाय, "मैं जमीन खरीदी लैई, कने जरूरी ऐ कि मैं तिसा जो दिखे; मेरी तिजो नैं विणती ऐ, मिन्जो माफ करी दें । 19 दूयें ग्लाय, "मैं पंज जोडियां दांदा दियां खरिदियां हन, कने तिन्हां जो परखणां चलेया; मैं तिजो कने विणती करदा ऐ मिन्जो माफ करी दें ।" 20 इक्की होर नी ग्लाय; मैं व्याह कित्या ऐ, इसतांई मैं नी आई सकदा । 21 तिन्हीं दासैं आई नैं अपणे मालके जो एह गलां सणाईयां, ताहू घरे दे मालकें गुस्से च आई नैं अपणे दासे नैं ग्लाय, सैहरे दे बजारां कने गलियां च तौळी जाई नैं गरीबां कने डुडेयां कने लटेयां कने अन्नेयां जो ऐत्थियो लैई आ । 22 दासैं भिरी ग्लाय, "हे मालक, जिआं तैं ग्लाय था, सैह ई किता गैआ ऐ; कने भिरी भी जगाह बचियो ऐ ।" 23 मालके दासे नैं ग्लाय, 'सडका च कने बाडेयां अल्ल जा कने लोका जो मजबूर करी नैं लैई आ ताकि मेरा घर भरौई जां । 24 कजोकि मैं तुहां नैं ग्लादा ऐ कि तिन्हां सदेयो लोकां च कोई भी मेरे खाणे जो नी चखगा ।"

चेला बणने दी कीमत

(मत्ती 10 : 37,38)

25 जाहू माणुआं दी बडी भीड तिस सौगी जा दी थी तां तिन्हीं पचांह मुडी करी तिन्हा नैं ग्लाय, 26 "जे कोई मिन्जो अल्ल ओयें, कने अपणे बुडे कने मारु कने लाडी कने बचेयां कने भाऊआं कने बैहणा अपर अपणे प्राणा जो भी घटिया मत समझ तां सैह मेरा चेला नी होई सकदा; 27 कने जेहड़ा कोई अपणियां सूलिया नी चुकें, सैह भी मेरा चेला नी होई सकदा ।

28 "तुहां च कुण ऐ जेहड़ा घर बणांगा चाहंदा ऐ, कने पैहलें बैई नैं हिसाब किताब ना करे कि पूरा करणे दी सामर्थ मिन्जो अल्ल ऐ, कि नी ।" 29 कुत्थी इआं ना होयें कि जाहू सैह घरे दी निआं पाई लें अपर तयार नी करी सकें, तां सारे दिखणे आळे एह गलाई नैं तिस दा मजाक डुआणां लगे, 30 "एह माणु बणांगा तां लग्गा अपर तयार नी करी सकेया ?" 31 या कुण देहया राजा ऐ जेहड़ा दूये राजे नैं युद्ध करणां चलेया होयें, कने पैहलें बैई नैं वचार नी करी लें कि जेहड़ा भी हजार सैनिक सौगी लैई करी मिन्जो नैं युद्ध करणां ओंदा ऐ, क्या मैं दस हजार सैनिक लैई करी तिसणे युद्ध करी सकदा ऐ कि नी? 32 नी तां तिस दूर रेंहदे ई सैह दूतां जो घल्ली करी मिलाप करणां चाहंगा । 33 इस

तरीके नैं तुहां च जेहड़ा कोई अपणां सारा कुछ त्यागी नी दें, सैह मेरा चेला नी होई सकदा ।

वेसुआदा लूण

(मत्ती 5 : 13; मरकुस 9 : 50)

34 "लूण तां खरा ऐ, अपर जे लूणै दा सुआद बिगडी जां तां सैह कुसा चीज्जां नैं लूणका किता जांगा । 35 सैह ना तां जमीना दे ना तां खादी दे कम्म ओंदा ऐ तिसियो तां माणु बाहर सट्टी दिंदे हन, जिन्हां दे सुणने दे कनं होन सैह सुणी लैन ।"

गुआचिया भेडा दा उदारण

(मत्ती 18 : 12-14)

15 सारे चुंगी लैणे आळे कने पापी तिस अल्ल ओआ दे थे तांकि सैह तिसदी सुणन । 2 अपर फरीसी कने शास्त्री कुडकुड़ाई नैं ग्लाणां लगे, "एह तां पापियां नैं मिलदा ऐ कने तिन्हां कने खादा पींदा ऐ ।" 3 ताहू यीशुयें तिन्हां नैं एह उदारण ग्लाय : 4 "तुहां च कुण ऐ तिस दियां सौ भेडा हन, तिन्हां च इक्क गुआची जां, तां नडिनूयें जो बणे च छड्डी नैं, तिसा गुआचिया जो जाहू तिकर मिली ना जां ताहू तिकर तोपदा नी रैह ?" 5 कने जाहू सैह मिली जादी ऐ, ताहू सैह बडिया खुशीया नैं तिसायो मुँडे पर चुकी लेंदा ऐ; 6 कने घरें आई नैं साथियां कने प्देसियां जो किटठा करी नैं ग्लादा ऐ, "मिन्जो सौगी खुशी मना, कजोकि मेरी गुआचियो भेड मिली गियो ऐ ।" 7 मैं तुहां नैं ग्लांदा ऐ कि इन्हीं साहभें नैं इक्क मन बदलणे आळे पापिये दे बारे च भी सुअर्गे च इतणी खुशी होंदी ऐ, जितणी कि नडिनूयें ऐसे धर्मी माणुआं दे बारे च नीं होंदी, जिन्हां जो मन बदलणे दी जरूरत नी होंदी ।

गुआचेयो सिक्के दा उदारण

8 "या कुण ऐसी जणांस होंगी जिसा अल्ल दस सिक्के होन, कने तिन्हा च इक्क गुआची जां, तां सैह दिखे बाळी नैं कने घरे दी झाड़ चम्ब करी, जाहू तिकर मिली नी जां जी लगाई नैं तोपदी नी रैह? 9 कने जाहू मिली जांदा ऐ, तां सैह अपणी प्देसणियां जो कठेरी नैं ग्लादी ऐ, मिन्जो सौगी खुशी करा, कजोकि मेरा गुआचेया सिक्का मिली गैआ ऐ ।" 10 मैं तुहां नैं ग्लांदा ऐ, इन्हीं साहभें इक्क पापी माणु दे मन बदलणे ते परमात्में दे स्वर्गदूता सामणे खुश हुंदा ऐ ।"

उडाऊ जागते दा उदारण

(मत्ती 18 : 12-14)

11 भिरी तिन्हीं ग्लाय, "इक्की माणुये दे दो जागत थे । 12 तिन्हां ते लोकें जागतें बुडें जो ग्लाय, "हे बापू, जायदाता च जेहड़ा मेरा हिस्सा ऐ सैह मिन्जो देंई दें ।" बुडें तिन्हां जो अपणी जायदात बराबर बंडी दिती । 13 जादा दिन नी होयो थे कि लोकें जागतें सब कुच्छ किट्टा करी नैं दूर देशे जो चली गैआ, कने तित्थु बुरे कम्मां च अपणी पूरी धन दौलत डुआई दिती । 14 जाहू सैह सब कुच्छ खर्ची बैठा, तां तिस देशे च बडा अकाल पैआ, कने सैह गरीब होई गैआ । 15 कने सैह जेहड़े तिस देशे च रेंहदे थे तिन्हां दे इक्की दे घरें जाई रैहआ कने तिन्हीं तिसियो अपणी खेतां च सूअरां चगाणे ताई रखी लैआ । 16 कने सैह चाहंदा था कि तिन्हां फळियां नैं जिन्हां जो सूअर खादे थे, कने तिन्हां फळियां खाई अपणां पेट भरें; कने तिसियो कोई भी कुच्छ नी दिंदा था । 17 जाहू सैह अपणे आप्पे च आया ताहू सैह ग्लाणां लग्गा, "मेरे पिता अल्ल कितणे मजदूर कम्म करदे कने तिन्हां जो रोटी मिलदी ऐ, कने मैं ऐत्थू भूखा मरा दा ऐ । 18 मैं हुण उठी नैं अपणे बुडे अल्ल चलेया कने तिस नैं ग्लांगा कि बापू जी, मैं सुअर्गे दे विरोधे च कने तेरिया नजरा च पाप कित्या ऐ । 19 हुण मैं तुहां दा जागत केहलाणे जोग्गा नी रैहआ, मिन्जो अपणां इक्क मजदूर बणाई नैं रखी लैआ ।

20 "ताहू सैह उठी नैं, अपणे बुडे अल्ल चला : सैह अल्ली दूर ई था कि तिसदे बुडे तिसियो दिखी करी तरस खादा, कने दौडी नैं तिसियो गळे लगाया, कने बडा प्यार किता कने चूमया । 21 जागतें बुडे नैं ग्लाय, 'बापू जी, मैं सुअर्गे दे विरोधे च कने तेरिया नजरा च पाप कित्या ऐ; कने मैं तेरा जागत केहलाणे जोग्गा नी रैहआ ।' 22 अपर बुडें अपणे दासां नैं ग्लाय, 'झट

पट करा खरे खरे कपड़े कड़ी नैं तिसियो पैहना, कने तिसदे हत्थे च गूठी, कने पैरां च जूतियां पौआ, 23 कने पाळेया भेडू लैआई करी मारा तांकि अहां खान कने खुशी मनान । 24 कजोकि मेरा एह जागत मरी गैआ था, भिरी जिंदा होई गैआ : गुआची गैआ था, हुण मिली गैआ ऐ ।' कने सैह खुशी मनाणा लम्गे ।

25 "अपर तिसदा बडा जागत खेतां च था । जाहू सैह आंदे आंदे घरे अल्ल पुज्या, तां तिन्हीं गाणे बजाणे कने नचणे दी उआज सुणी । 26 तिन्हीं इक्की दासे जो सदी नैं पूछ्या, 'एह क्या होआ दा ?' 27 तिन्हीं तिस नैं ग्लाय, 'तेरा लोक्का भाऊ आया ऐ, कने तेरे बुडे पाळेया भेडू बडाया ऐ, इसतांई कि तिसियो सही सलामत पाया ऐ ।' 28 एह सुणी नैं सैह गुस्से नैं भरौई गैआ अन्दर जाणां लम्गा, तां तिसदा बुडा बाहर आई नैं तिसियो मनाणा लम्गा । 29 तिन्हीं बुडे जो जबाब दिता, दिख, मैं इतणे सालां ते तेरी सेवा करा दा ऐ कने कदी भी तेरा हुक्म नीं टाळेया, तमीं तैं मिन्जो कदीभी इक्क बरी बकरिया दा बच्चा भी नीं दिता कि मैं अपणे साथियां खुशी मना । 30 अपर जाहू तेरा एह जागत, जिन्हीं तेरी सारी धन दौलत वेश्या च दुआई करी आया तां तिस तांई तुहां पाळेया भेडू बडाया ।' 31 तिन्हीं तिस नैं ग्लाय, जागत, तू हमेशा मिन्जो सौगी ऐ; कने जेहडा कुच्छ मेरा ऐ सैह सब तेरा ई ऐ । 32 अपर हुण खुशी मनाणा कने मगन होणा चाइदा कजोकि एह तेरा भाऊ मरी गैआ ऐ; गुआची गैआ था, हुण मिली गैआ ऐ ।"

चलाक भंडारी

16 भिरी तिन्हीं चेलयां नैं भी ग्लाय, "कुसकी अमीरे दा इक्क भण्डारी था, कने लोकां तिसदे सामणे एह इलजाम लगाया कि सैह तेरी सारी धन दौलत दुआई दिंदा ऐ । 2 कने तिन्हीं तिसियो सदी नैं ग्लाय, एह क्या ऐ जेहडा मैं तेरे बारे च सुणांदा ऐ? अपणे भण्डारी खाते दा हसाब दै, कजोकि तू गांह जो भण्डारी नीं रैई सकदा ।' 3 ताहू भण्डारी सोचणां लम्गा, 'हुण मैं क्या करे? कजोकि मेरा मालक हुण भण्डारिये दा कम्म मिन्जो ते खोआ दा ऐ । चिक्क तां मिन्जो ते खुणी नीं जांदी; कने भीख मगणे च मिन्जो शर्म आंदी ऐ । 4 मैं समझी गैआ कि मैं क्या करगा, तां कि जाहू मैं भण्डारिये दा कम्म छड्या तां लोकां मिन्जो अपणे घरे च रखी लैन । 5 ताहू तिन्हीं अपणे मालके दे अडतियां जो इक्क-इक्क करी नैं सदेया कने पैहले ते पूछ्या, 'तिजो पर मेरे मालक दा कितणा कर्ज ऐ?' 6 तिन्हीं ग्लाय, 'सौ मण तेल, ताहू तिन्हीं तिस नैं ग्लाय, 'अपणे खाते पकड़ी लै कने बैई नैं झटपट पंजा लिखी दै । 7 भिरी तिन्हीं दूये ते पूछ्या, 'तिजो पर कितणा कर्ज ऐ?' तिन्हीं ग्लाय, 'सौ मण कणक, ताहू तिन्हीं तिस नैं ग्लाय, 'अपणे खाते पकड़ी लै कने असी लिखी दै ।'

8 "मालके तिस अधर्मी भण्डारिये जो तारीफ किन्ती कि तिन्हीं चलाकिया दा कम्म किन्ता ऐ । कजोकि तिस संसारे दे माणु अपणे बग्ते दे लोकां सौगी अपणे सभावे च जोतिया दे लोकां ते जादा चलाक हन । 9 यीशुयें ग्लाय, मैं तुहां नैं ग्लांदा ऐ कि अधर्मे दी कमाईया नैं साथी बणाई लैआ, तांकि जाहू धन मुकी जांगा तां सैह सुअर्गे च तुहां दा सुआगत करन । 10 जेहडा थोडे ते थोडे च सच्चा ऐ, सैह मते च भी सच्चा ऐ । कने जेहडा थोडे ते थोडे च अधर्मी ऐ, सैह मते च भी अधर्मी ऐ । 11 इसतांई जाहू तुहां अधर्मे दे धने च सच्चे नीं ठेहरन, तां सच्चा धन तिजो कुण दिंगा । 12 कने जे तुहां पराए धन च सच्चे नीं ठेहरे तां जेहडा तुहां दा ऐ, तिसियो तुहां जो कुण दिगां ?

13 "कोई भी दास दूये मालके दी सेवा नीं करी सकदा : कजोकि सैह तां इक्की नोकरे नैं बैर कने दूये नैं प्यार रखगा; या इक्की कने मिलया रैहगा कने दूये जो घटिया समझगा । तुहां परमात्में जो कने धन दूनी दी सेवा नीं करी सकदे ।"

यीशु मसीह दे कुच्छ उपदेश

(मत्ती 11 : 12,13; 5 : 31,32; मरकुस 10 : 11,12)

14 फरीसी जेहडे लालची थे, एह सारियां गल्लां सुणी करी तिसदा मजाक दुआणा लम्गे । 15 यीशुयें तिन्हां नैं ग्लाय, तुहां तां माणुआं साइआं अपणे आप्पे जो धर्मी ठहरांदे हन, अपर परमात्मां तुहां दे मनां जो जाणदा ऐ, कजोकि जेहडी चीज माणुआं दियां नजरा च म्हान ऐ, सैह परमात्में दी नजरा च बुरी ऐ । 16 "कानून कने भविष्यवक्ता यूहन्ने तिकर रैह; तिस बग्त परमात्में दे राजे दा सुसमाचार सणाया जांदा ऐ, कने हर कोई तिस च मजबूतिया नैं

दाखल हुंदा ऐ । 17 अम्बर कने धरतिया दा टली जाणां कानूने दे इक्की बिन्दु दे मिटी जाणे ते ठीक ऐ । 18 "जेहडा कोई अपणियां लाडिया जो छड्डी करी नैं दूईया नैं व्याह करदा ऐ, सैह व्यभिचार करदा ऐ कने जेहडा कोई छड्डिया जणांसा नैं व्याह करदा ऐ, सैह भी व्यभिचार करदा ऐ ।

मीर माणु कने गरीब लाजर

19 "इक्क अमीर माणु था जेहडा बैंगनी कपड़े कने मलमल पैहनदा कने हर रोज सुख-विलासे च कने बडी धूम धाम नैं रैहदा था । 20 लाजर नांये दा इक्क गरीब जरख्मा नैं भरौया तिसदे घरे दे गेटे सामणे छड्डी दिता जांदा था, 21 कने सैह चाहंदा था कि अमीर माणुये दे मेज पर जूठा पोंदा था तिस नैं अपणां पेट भरें; ऐत्थू तिकर कि कुत्ते भी तिसदेयां जरख्मा जो चटदे थे । 22 इआं होया कि सैह कंगाल मरी गैआ, कने सुअर्गदतां तिसियो लैई करी अब्राहमे दी गोदा च रखी दिता । सैह अमीर भी मरी गैआ कने दबी दिता, 23 कने अधोलोक च तिन्हीं दर्द च पैयो अपणियां अंखी चुकियां, कने दूरे ते लाजरे जो अब्राहमे दिया गोदी च दिख्या । 24 ताहू तिन्हीं जोरे नैं ग्लाय, 'हे पिता अब्राहम मिन्जो पर दया करी नैं लाजरे जो घल्ली दै, जे सैह अपणियां उंगलिया पाणिये च सेडी नैं मेरिया जीभा जो टंडीया करें, कजोकि मैं इसा अग्गी च तडफा दा ऐ ।' 25 अपर अब्राहमे ग्लाय, 'हे पुत्तर, याद कर कि तू अपणियां जिन्दगिया च खरियां चीज्जां लैई चुकेया ऐ, कने तिआं ई लाजर बुरिआं चीज्जां : अपर हुण सैह ऐत्थू शांति पा दा ऐ, कने तू तडफा दा ऐ । 26 इन्हां सारियां गल्लां जो छड्डी करी अहां दे कने तुहां दे बीच इक्क बडा बडा खड्डा ठेहराया ऐ कि जेहडा ऐत्थू ते तिस पार तुहां अल्ल जाणां चां, सैह नीं जाई सकदा; कने ना कोई औत्थू ते इस पार अहां अल्ल आई सकदा ।' 27 तिन्हीं ग्लाय, 'तां हे पिता, मैं तिजो नैं विणती करदा ऐ कि तू तिसियो मेरे पिता दे घरये घल्ल, 28 कजोकि मेरे पंज भाऊ हन; सैह तिन्हां दे सामणे तिन्हां गल्लां दी गवाही दें, एह ना होयें कि सैह भी इसा दर्द देंगे आळिया जगाह च ओन ।' 29 अब्राहमे तिस नैं ग्लाय, 'तिन्हां अल्ल तां मूसा कने भविष्यवक्तां दियां कताबा हन, सैह तिन्हां दी सुणन ।' 30 तिन्हीं ग्लाय, नी, हे पिता अब्राहम; अपर जे कोई मरेया तिन्हां अल्ल जां, तां सैह मने बदलगे ।' 31 तिन्हीं तिस नैं ग्लाय, जाहू सैह मूसा कने भविष्यवक्तां दी नीं सुणदे, तां जे मरेयां ते कोई जिंदा भी होई जां तमी तिसदी नीं मनगे ।

ठोकरा दी बजाह बणना

(मत्ती 18 : 6,7,21,22; मरकुस 9 : 42)

17 भिरी तिन्हीं अपणे चेलयां नैं ग्लाय, "होई नीं सकदा कि ठोकरा नीं लगन, अपर हाय, तिस माणुये पर जिसदिया बजाह सैह ओंदियां हन । 2 जेहडा तिन्हां छोटेयां च कुसी इक्की जो ठोकर लगांदा ऐ, तिस तांई एह भला हुंदा कि चक्रिया दा पुड तिसदे गळे च लटकया जांदा, कने सैह समुंदरे च सट्टी दिता जांदा । 3 चुकनै रैहआ; जे तेरा भाऊ अपराध करें तां तिस जो समझा, कने जे पछतां तां तिसियो माफ कर । 4 जे दिन भर च सैह सत बरी तेरा अपराध करें कने सत बरी तिजो अल्ल आई नैं ग्लां, कि मैं पछतांदा ऐ, तां तिसियो माफ कर ।"

वसुआस

5 ताहू स्याणेयां प्रभुये नैं ग्लाय, "अहां दा वसुआस बधेया ।" 6 प्रभुयें ग्लाय, "जे तुहां जो राईया दे दाणे बराबर भी वसुआस होंदा, तां तुहां इस शहतूत दे रूखे नैं ग्लांदे हन कि जडा ते पटौई करी समुंदरे च लम्गी जा, तां सैह तुहां दी मनी लैदा ।

इक्की दासे दा कम्म

7 "तुहां च देहया कुण ऐ, जिसदा दास हळा जोतदा ऐ या भेडां चारदा ऐ, कने जाहू सैह खेतां च आई करी तिसियो ग्लां, 'तौळी आई नैं खाणां खाई लै ?' 8 कने एह मत ग्ला, मेरा खाणां त्यार कर, कने जाहू तिकर मैं खां- पीयें ताहू तिकर लक्के कसी करी मेरी सेवा कर; तिसदे बाद तूमी खाई पी लैआं ? 9 क्या सैह तिस दासे दा साहन मनगा कि तिन्हीं सैह कम्म किन्ते जिन्हां दा हुक्म दित्या था? 10 इसी तरीके नैं तुहां भी जाहू तिन्हां सारेयां कम्मां जो

करी लैआ जिन्हां दा हुकम तुहां जो दित्या ऐ, तां ग्लाय, “अहां निकम्मे दास हन; जेहड़ा अहां जो करणां चाइदा था अहां सिर्फ सैई कित्या ऐ।”

कोढ़े दे दस बमार माणुआं जो ठीक करणां

11 देहया होया कि सैह यरुशलम सैहरे जांदे होये सामरिया ग्रंए कने गलीले सैहरे दे बीच होई नै जा दा था। 12 कुसी ग्रंए ते दाखल होंदे बग्त तिसियो दस कोढ़ी मिले। 13 तिन्हां दूर खडौई करी जोर नै ग्लायणां लग्गे, “हे यीशु, हे मालक, अहां पर दया कर।” 14 तिन्हीं तिन्हां जो दिखी नै ग्लाय, “जा कने अपने आप्पे जो याजके जो दरसा।” कने सैह चलदे चलदे ई खरे होई गै। 15 ताहू तिन्हां च इक्की एह दिखी नै कि मैं खरा होई गैआ ऐ, जोरे नै परमात्मं दी महिमा करदा करदा मुड़ेया; 16 कने यीशु दे पैरां पर मुंमं भार पैई नै तिसदा धन्यवाद करणां लग्गा; कने सैह सामरी था। 17 इसा ग्ल्या पर यीशुयें ग्लाय, “क्या दसो खरे नी होये, तां भिरी सैह नौ कुत्थू हन? 18 क्या इस परदेसिये जो छड्डी नै होर कोई नी निकळैया जेहड़ा परमात्मं दी महिमा करदा ऐ?” 19 ताहू तिन्हीं तिस नै ग्लाय, “उठी करी चली जा; तेरे वसुआसं तिजो खरा कित्ता ऐ।”

परमात्मं दे राजे दा ओणां (मत्ती 24 : 23-28, 37-41)

20 जाहू फरीसियां तिसते पूछया कि परमात्मं दा राज़ काहू ओंगा, तां तिन्हीं तिन्हां जो जबाब दित्ता, “परमात्मं दा राज़ प्रकट रूप च नी ओंदा। 21 कने माणु एह नी ग्लाने, दिखा, ऐत्थू ऐ, या औत्थू ऐ। कजोकि दिखा, परमात्मं दा राज़ तुहां दे बीच ई ऐ।” 22 भिरी तिन्हीं चेलयां नै ग्लाय, “सैह दिन ओगें, जिन्हां च तुसां माणुये दे पुत्रे दे दिना च इक्क दिन जो दिखणां चाहंगे, कने दिखी नी पांगे। 23 माणु तुहां नै ग्लाने, दिखा, औत्थू ऐ! या 'दिखा, ऐत्थू ऐ!' अपर तुहां चली मत जांदे कने ना ई तिसदे पचाहू जानेयो। 24 कजोकि जिआं बिजली अम्बरे दे इक्की पाससे ते निकळी करी दूये पाससं चमकदी ऐ तिआं ई माणुये दा पुत्र भी अपने दिने च प्रकट हुंगा। 25 अपर पैहलें जरूरी ऐ कि सैह बड़ा दुख झेलें, कने इस जुगे दे माणु तिसियो नीच समझन। 26 जिआं नूह दे दिना च होया था, तिआं ई माणुये दे पुत्रे दे दिना च भी हुंगा। 27 जिस दिन तिकर नूह चाहजे पर नी चढ़ेया था, तिस दिन तिकर माणु खांदे पींदे थे, कने तिन्हां च व्याह होंदे थे। 28 कने जिआं लूते दे दिनां च होया था कि माणु खांदे पींदे, कने लैण दैण करदे, कने रुख लगादे कने घर बणांदे थे; 29 अपर जिस दिन लूत सदोमे ते निकळैया, तिस दिन अग कने गंधक अम्बरे ते बरसी कने सबना जो नष्ट करी दित्ता। 30 माणुये दे पुत्रे दे प्रकट होणे दे दिने भी इआं ई हुंगा।

31 तिस दिन जेहड़ा छती पर होयें कने तिसदा समान घरें होयें, सैह तिसियो कने लैणे ताई ना उतरे; कने तिआं ई जेहड़ा खेतां च होयें तां सैह पचाहो ना हट्टें। 32 लूते दिया लाडिया जो याद रखा। 33 जेहड़ा कोई अपनी जान बचाणा चाहंगा सैह तिसा जो गुआंगा, कने जेहड़ा कोई तिसा जो गुआंगा सैह तिसा जिंदा रखगा। 34 मैं तुहां नै गलांदा ऐ, तिसा राती दो माणु इक्की मंजोलूये पर होंगे; इक्की जो लैई लैआ जांगा कने दूआ छड्डी दित्ता जांगा। 35 दो जणासां सौगी सौगी चक्की पीआ दियां हुंगियां, इक्क लैई ली जांगी कने दूई छड्डी दित्ती जांगी। 36 [दो माणु खेतां च होंगे, तां इक्क लैई लैआ जांगा कने दूआ छड्डी दित्ता जांगा।] 37 एह सुणी नै तिन्हां तिसते पूछया, “हे प्रभु एह कतांह हुंगा?” तिन्हीं तिन्हां नै ग्लाय, जित्थू माणु हन, तित्थू बाज किड्डे होंगे।

अधर्मी हाकमे दा कने विधवा दा उदारण

18 भिरी तिन्हीं इसदे बारे च कि लगातार प्रार्थना करणां कने हिम्मत नी हारणां, इसदे बारे च एह उदारण ग्लाय : 2 कुसी सैहरे च इक्क न्यायी रेंहदा था, जेहड़ा ना परमात्मं ते डरदा था कने ना कुसी माणुआं दी परवाह करदा था। 3 तिस सैहरे च इक्क विधवा भी रेंहदी थी, जेहड़ा तिस अल्ल आई नै ग्ला करदी थी, मेरा न्याय चुकाई नै मिन्जो बैरिये ते बचा। 4 कुच्छ बग्त तिकर तां सैह नी मन्नेया अपर अंत च सोची करी नै ग्लाय, ‘कने मैं ना परमात्मं ते डरदा, कने ना माणुआं दी कुच्छ परवाह करदा ऐ; 5 तमी सैह एह विधवा मिन्जो सतांदी रेंहदी ऐ, इसताई मैं तिसा दा न्याय

चुकांगा, कुत्थी इआं ना कि पल्लें पल्लें आई नै अंत च मेरे नक्के च दम करेँ।” 6 प्रभुयें ग्लाय, “सुणां, एह अधर्मी न्यायी क्या ग्लांदा ऐ? 7 इसताई क्या परमात्मं अपने चुपेयां दा न्याय नी चुकांगा, जेहड़े दिन-रात तिसदी दुहाई दिंदे रेंहदे हन? 8 मैं तुहां नै सच ग्लांदा ऐ, सैह तौळी तिसदा न्याय चुकांगा। तमी माणु दा पुत्र जाहू ओंगा, तां क्या सैह धरतिया पर वसुआस पांगा?”

फरीसी कने चुंगी लैणेआळे दा उदारण

9 तिन्हीं तिन्हां नै जेहड़े अपने पर भरोसा रखदे थे, कि अहां धर्मी हन, कने दूयेयां जो घटिया जाणदे थे, एह उदारण ग्लाय : 10 दो माणु मंदरे च प्रार्थना करणां गै; इक्क फरीसी था कने दूआ चुंगी लैणे आळा। 11 फरीसी खडौई नै अपने मने च प्रार्थना इआं करणां लग्गा, ‘हे परमात्मं, मैं तेरा धन्यवाद करदा ऐ कि मैं दूयेयां माणुआं साइआं बुरे कम्म करणे आळा कने अन्यायी कने व्यभिचारी नी ऐ, कने ना इस चुंगी लैणे आळे साइआं ऐ। 12 मैं हपते च दो बरी व्रत रखदा ऐ; मैं अपणिया सारिया कमाईया दा दसमा हिस्सा भी दिंदा ऐ।’ 13 “अपर चुंगी लैणे आळे दूर खडौई नै, सुअर्गे बक्खी अखी चुकणा भी नी चाया, अपर अपनी छातिया पीटी-पीटी नै ग्लाय, ‘हे परमात्मं मिन्जो पापिये पर दया कर।’ 14 मैं तुहां नै ग्लांदा ऐ कि सैह दूआ नी, अपर एही माणु धर्मी ठहराया कने जाई नै अपने घरेयो गैआ; कजोकि जेहड़ा कोई अपने आप्पे जो बड़ा बणांगा, सैह छोटा कित्ता जांगा; कने जेहड़ा अपने आप्पे जो छोटा बणांगा, सैह बड़ा कित्ता जांगा।”

जागतां जो आशीर्वाद

(मत्ती 19 : 13-15; मरकुस 10 : 13-16)

15 भिरी माणु भी अपने बच्चेयां जो भी तिस अल्ल लैयेणा लग्गे कि सैह तिन्हां पर हाथ रखें; अपर चेलेयां दिखी नै तिन्हां जो झिडकेया। 16 यीशुयें बच्चेयां जो अप्पु अल्ल सदी नै ग्लाय, “जागतां जो मिन्जो अल्ल ओणा दैआ, कने तिन्हां जो मना मत करा : कजोकि परमात्मं दा राज़ ऐदेयां दा ई ऐ। 17 मैं तुहां नै सच ग्लांदा ऐ कि जेहड़ा कोई परमात्मं दे राज़े जो जागतां साइआं ग्रहण नी करगा सैह तिस च कदी दाखल नी होई पांगा।

मीर माणु कने सदा दी जिन्दगी

(मत्ती 19 : 16-30; मरकुस 10 : 17-31)

18 कुणकी सरदारें तिसते पूछया, “हे उत्तम गुरू, सदा दी जिन्दगिया दा अधिकारी होणे ताई मैं क्या करेँ?” 19 यीशुयें तिस नै ग्लाय, “तू मिन्जो उत्तम कजो ग्लांदा ऐ? कोई उत्तम नी, बस इक्क ऐ, मतलब परमात्मं। 20 तू हुक्मां जो तां जाणदा ऐ, व्यभिचार मत करणां, हत्या मत करणां, कने चोरी मत करणां, झूठी गवाई ना दैणां, अपने बुड़े दा कने अपणियां माऊ दा आदर करणां।” 21 तिन्हीं ग्लाय, “मैं तां तिन्हां सबना जो लडकपन ते ई मन्नदा आया ऐ।” 22 एह सुणी नै यीशुयें तिस नै ग्लाय, “तिजो च हुण भी इक्की ग्ल्या दी कमी ऐ, अपनां सब किच्छ बेची करी गरीबां जो बंडी दै; कने तिजो सुअर्गे च धन मिलगा, कने आई नै मिन्जो पचाहू चली पाँ।” 23 सैह एह सुणी नै बड़ा उदास होया, कजोकि सैह बड़ा मीर था। 24 यीशुयें तिसियो दिखी नै ग्लाय, “मीरां दा परमात्मं दे राज़े च दाखल होणां कितणा मुश्कल ऐ। 25 परमात्मं दे राज़े च मीरां दे दाखल होणे ते, ऊँटे दा सूईया दे नक्के च निकळी जाणां सोखा ऐ।” 26 इस ग्ल्या पर सुणने आळेया ग्लाय, “तां कुसदा उद्धार होई सकदा ऐ?” 27 तिन्हीं ग्लाय, “जेहड़ा माणुये ते नी होई सकदा, सैह परमात्मं ते होई सकदा ऐ।” 28 पतरसं ग्लाय, “दिखां, अहां तां घरा-बारां छड्डी नै तिजो पचाहू चली पैयो हन।” 29 तिन्हीं तिन्हां नै ग्लाय, “मैं तुहां नै सच ग्लांदा ऐ कि ऐदेया कोई नी जिन्हीं परमात्मं दे राज़े ताई घरे जो, या लाडिया जो या भाऊये जो, या माऊ- बुड़े जो, या बाल-बच्चेयां जो छड्डी दित्या होयें; 30 कने इस बग्त कई गुणा जादा नी पां कने ओणे आळे जुगे च सदा दी जिन्दगी।”

अपणिया मौती दे बारे च त्री बरी भविष्यवाणी

(मत्ती 20 : 17-19; मरकुस 10 : 32-34)

31 भिरी तिन्हीं अपने बारां चेलयां जो सौगी लैईया कने जाई करी तिन्हां ग्लाय, “दिखां अहां यरुशलमेमं जो चलेयो हन, कने जितणियां ग्ल्यां माणु दे

पुत्रे ताई भविष्यवक्ता दे दुआरा लिखियां हन, सैह सारियां पूरियां होन ।
32 कजोकि सैह होरना जातिआं दे हत्थां च दित्ता जांगा, कने सैह तिसियो मजाके च डुआंगे, कने तिसदी बैजती करगे, कने तिस पर थूकगे, 33 कने तिसियो डंडे मारगे, कने जान्नी ते मारगे; कने सैह त्रीये दिने जिदा हुंगा ।”
34 अपर तिन्हां जो इन्हां गल्लां च कोई भी गल्ल नी समझ नी आई; कने एह गल्ल तिन्हां ते छूपी रैई, कने जेहड़ा गलाया था सैह तिन्हां दी समझा च नी आया ।

अन्ने भिखारिये जो ठीक करणां

(मत्ती 20 : 29-34; मरकुस 10 : 46-52)

35 जाहू सैह यरीहो सैहरे अल्ल पुज्जा, तां इक्क अन्ना सडका कंडे बैई करी भीख मंगां दा था । 36 सैह माणु दी भीड़ा दी चलणे दी उआजा सुणी नैं पूछणां लग्गा, “एह क्या होया दा ऐ?” 37 तिन्हां दस्सेया, “यीशु नासरी जादे हन ।” 38 ताहू तिन्हीं जोरे नैं गलाया, “हे यीशु, दाऊदे दी औलाद, मिन्जो पर दया कर !” 39 जेहड़ा गांह गांह जा दे थे, सैह तिसियो झिड़कणां लगे कि चुप रहै; अपर सैह होर डडणा लग्गा, “कि एह दाऊदे दी औलाद मिन्जो पर दया कर ।” 40 ताहू यीशुयें खडौई नैं हुक्म दित्ता कि तिसियो मिन्जो अल्ल लैई ओआ, कने जाहू सैह यीशु अल्ल आया तां यीशुयें तिसते पूछ्या, 41 “तू क्या चाहंदा ऐ कि मैं तिज्जो ताई करे?” तिन्हीं गलाया, “हे प्रभु, एह कि मैं दिखणां लग्गी पोयें ।” 42 यीशुयें गलाया, “दिखणां लग्गी पौ; तेरे वसुआसें तिज्जो खरा करी दित्ता ऐ ।” 43 सैह ताहू ई दिखणां लग्गी पैआ कने परमात्में दी महिमा करदा करदा तिसदे पचांह चली पैआ ; कने सारे लोकां दिखी करी परमात्में दी स्तुति किन्ती

चुंगी लैणेआळा जकई

19 यीशु यरीहो च पुज्जा कने रस्ते च चलेया था । 2 तित्थु जकई नांये दा इक्क माणु था जेहड़ा चुंगी लैणे आळ्यां दा सरदार था । 3 सैह यीशु जो दिखणां चाहंदा था कि सैह कुण ऐ । अपर मती भीड होणे दिया बजाह ते दिखी नी सकदा था, कजोकि सैह बोणा था । 4 ताहू सैह तिसियो दिखणे ताई गांह दौडी नैं इक्क गूलर दे रुखे जो चढी गैआ, कजोकि यीशु तिस रस्ते च जाणे आळा था । 5 जाहू यीशु तिसा जगाह पुज्जा, तां ऊपर दिख्या कने तिस नैं गलाया, “हे जकई, झटपट लौई आ; कजोकि अज्र मैं तेरें घरें रैहणां ऐ ।” 6 सैह झटपट लुत्था कने खुश होई नैं यीशु जो अपने घरेयो लैई गैआ ।

7 एह दिखी नैं सारे माणु कुडकुड़ाई नैं गलाणां लगे, “सैह तां इक्क पापी माणुये दे घरेयो चलेया ऐ ।”

8 जकई खडौई करी प्रभु नैं गलाया, “हे प्रभु, दिखा, मैं अपनी आधी धन दौलत गरीबां जो दिंदा, कने कुसी नैं बेईमानी करी नैं लैई लैआ ऐ तां तिस जो चार गुणां वापस करी दिंदा ऐ ।” 9 ताहू यीशुयें तिस नैं गलाया, “अज्र इस घरे च उद्धार आया ऐ, इसताई एह भी अब्राहम दा इक्क पुत्र ऐ ।” 10 कजोकि माणुये दा पुत्र गुआचेयां जो तोपणां कने तिन्हां दा उद्धार करणां आया ऐ ।

दसां मोहरां दा उदारण

(मत्ती 25 : 14-30)

11 जाहू सैह एह गल्लां सुणां दे थे, तां तिन्हीं इक्क उदारण गलाया, इसताई कि सैह यरुशलमे अल्ल था, कने सैह समझदे थे कि परमात्में दा राज हुण प्रकट होणे आळा ऐ । 12 कने तिन्हीं गलाया, “इक्क मीर माणु दूर देशे जो चलेया तांकि राज पद पाई नैं वापस ओयें ।” 13 तिन्हीं अपनेयां दासां च दसा जो सदी नैं तिन्हां जो दस सिक्के दित्ते कने तिन्हां नैं गलाया, “मेरे वापस ओणे तिकर लैण-दैण करणां ।” 14 अपर तिसदे सैहरे अक्खे बक्खे दे रैहणे आळे तिसते बैर रखदे थे, कने तिसदे पचांह दूतां दिया बजाह ते बुलावा घल्लया, ‘अहां नी चाहंदा कि एह अहां पर राज करे ।’

15 “जाहू सैह राज पद पाई नैं वापस आया, तां इआं होया कि तिन्हीं अपनेयां दासां जो जिन्हां जो सिक्के दित्यो थे तिन्हां जो अप्पु अल्ल सदेयां तांकि पता करे कि तिन्हां लैण दैण ते क्या-क्या कमाया ।” 16 ताहू पैहले आई नैं गलाया, ‘हे मालक, तेरे सिक्के ते दस होर सिक्के कमाये हन ।’ 17 मालकें तिस नैं गलाया, ‘धन, हे उत्तम दास ! तू मते ते ई थोडे च वसुआसे जोगा

निकळैया हुण दसां सैहरां पर हक्क रख । 18 दूयें आई नैं गलाया, ‘तेरे सिक्के ते पंज होर सिक्के कमाये हन ।’ 19 तिन्हीं तिस नैं भी गलाया, ‘तूमी पंजा सैहरां पर हाकम होई जां ।’ 20 त्रीयें दासें भी आई नैं गलाया, ‘हे मालक, दिख तेरा सिक्का एह ऐ, जिसजो मैं अगोछे च बन्नी नैं रखदा था ।’ 21 कजोकि मैं तिज्जो ते उरदा था, इसताई कि तू कठोर माणु ऐ : जेहड़ा तैं नी रखेया तिसियो चुकी लैदा ऐ, कने जेहड़ा तैं नी बाया, तिसियो पुट्टी लैदा ऐ ।’ 22 मालकें तिस नैं गलाया, हे दुष्ट दास, मैं तेरे ई मुंमे ते तिज्जो दोषी ठेहरांदा ऐ । तू मिन्जो जाणदा था कि सख्त माणु ऐ, जेहड़ा मैं नी रखेया तिसियो चुकी लैदा, कने जेहड़ा मैं नी बाया तिसियो पुट्टा ऐ; 23 तां तैं मेरे सिक्के सौकारां अल्ल कजो नी रखी दित्ते कि आई नैं ब्याजे समेत लैई लैदा ?’ 24 कने जेहड़े माणु बक्खें खडूतेयो थे, तिन्हीं तिन्हां नैं गलाया, ‘सैह सिक्का इसते लैई लैआ, कने जिस अल्ल दस सिक्के हन तिसियो दैई दैआ ।’ 25 तिन्हां तिस नैं गलाया, हे मालक, तिस अल्ल तां सिक्के हन ।’ 26 मैं तुहां नैं गलांदा कि जिस अल्ल ऐ, तिस जो दित्ता जांगा; कने जिस अल्ल नी ऐ, तिसते सैह भी जेहड़ा तिस अल्ल ऐ लैई लैआ जांगा । 27 अपर मेरे तिन्हां बैरियां जो जेहड़ा नी चाहंदा थे कि मैं तिन्हां पर राज करे, तिन्हां जो ऐत्थियो लैआई करी मेरे सामणे मारा ।”

यरुशलमे च विजय प्रवेश

(मत्ती 21 : 1-11; मरकुस 11 : 1-11; यूहन्ना 12 : 12-19)

28 एह गल्लां गलाई करी यीशु यरुशलमे सैहरे दे बक्खी गांह गांह चलया । 29 जाहू सैह जैतून नांये दे पहाड़े पर बैतफगे ग्रांए कने बैतनिय्याह ग्रांए अल्ल पुज्जा, तां तिन्हीं अपने बारां चलेयां च दूँ जो एह गलाई नैं घल्लया, 30 “सामणे दे ग्रांए च जा; कने तिस च पुज्जदे ई इक्क गद्विया दा बच्चा जिस पर कदी कोई सवार नी होया, बन्नेया मिलगा, तिसियो खोली नैं लैई ओआ ।” 31 जे कोई तुहां ते पूछे कि कजो खोलादे हन, तां एह ग्लानेयो कि प्रभु जो इसदी जरूरत ऐ ।”

32 जेहड़े दो चले घल्लेयो थे, तिन्हां जाई नैं जिआं तिन्हीं तिन्हां नैं गलाया था, तिआं ई गलाया । 33 जाहू सैह गद्वे दे बच्चे जो खोला दे थे, तां तिस गद्वे दे मालकें तिन्हां ते पूछ्या, “इस बच्चे जो कजो खोलादे?” 34 तिन्हां गलाया, “प्रभु जो इसदी जरूरत ऐ ।” 35 सैह तिसियो यीशु अल्ल लैई आये, कने अपने कपड़े तिस बच्चे परालें रखी नैं यीशु जो तिस पर बैठाई दित्ता । 36 जाहू यीशु जा दा था, तां सैह अपने कपड़े रस्ते च बछां दे जादे थे ।

37 बक्खें ओंदे ओंदे जाहू सैह जैतून पहाड़े दी ढलाना पर पुज्जा, तां चलेयां दी सारी मण्डली तिन्हां सारेयां सामर्थी दे कम्मां दिया बजाह ते जेहड़े तिन्हां दिखयो थे, खुश होई नैं जोरे नैं परमात्में दी स्तुति करणां लगे :

38 “धन ऐ सैह राजा, जेहड़ा प्रभु दे नांये ते ओंदा ऐ, सुअर्ग च शांति कने आकाशमण्डल च महिमा होयें !”

39 ताहू माणुआं दी भीड़ा च थोड़े फरीसी तिस नैं गलाणां लगे, “हे गुरु, अपने चलेयां जो झिड़क ।” 40 तिन्हीं जबाब दित्ता, “मैं तुहां नैं सच गलांदा ऐ, जे एह चुप रहै तां पत्थर डडी पांगे ।

यरुशलमे ताई विलाप

41 जाहू सैह बक्खें आया तां सैहरे जो दिखी नैं तिस पर रोया । 42 कने गलाया, “क्या ई भला हुंदा कि तू, हाँ तू ई, तिस दिन च कुशल दी गल्लां जाणदा, अपर हुण तेरियां अखी ते छूपी गैईयां हन ।” 43 कजोकि सैह दिन तिज्जो पर भी आगे कि तेरे बैरी मोर्चा बन्नी करी तिज्जो घेरी लैगे, कने चौनी पाससे ते तिज्जो दबांगे; 44 कने तिज्जो कने तेरे जागतां जो जेहड़े तिज्जो च हन, चिक्का च मलांगे, कने तिज्जो च पत्थर पर पत्थर भी नी छडगे; कजोकि तैं तिस मोक्के जो जाहू तिज्जो पर कृपा दृष्टि किन्ती गैई नी पणछेणयां”

यरुशलमे दे मंदरे ते वपारियां जो बाहर कड्डणां

(मत्ती 21 : 12-17; मरकुस 11 : 15-19; यूहन्ना 2 : 13-22)

45 ताहू यीशु मंदरे च जाई नैं तित्थु बैठयो वपार करणे आळ्यां जो बाहर कड्डणां लग्गा, 46 कने तिन्हीं गलाया, “लिख्या ऐ, मेरा घर प्रार्थना दा घर हुंगा, अपर तुहां तिसियो डाकुआ दा अड्डा बणाई दित्ता ऐ ।”

47 यीशु हर रोज मंदरे च शिक्षा दिंदा था ; कनेप्रधान याजक कने शास्त्री कने लोका दे खास तिसियो खत्म करणे दा मौका तोपदे थे । 48 अपर कोई

उपाय नी निकाली सके एह कुस तरांह करन, कजोकि सारे माणु बड़े चांये नैं तिसदी सुणदे थे ।

यीशु मसीह दे हक दा सबाल

(मत्ती 21 : 23-27; मरकुस 11 : 27-33)

20 इक दिन इआं होया कि जाहू यीशु मंदरे च लोकां जो शिक्षा दै दा कने सुसमाचार सणादा था, ता प्रधान याजक कने शास्त्री, स्याणयां सौगी आई करी बकखें खडौई गै; 2 कने ग्लाणां लगे, “अहां जो दस्स, तू इन्हां कम्मां जो कुस हक नैं करदा ऐ, कने सैह कुण ऐ जिन्हीं तिजो एह हक दित्या ऐ?” 3 तिन्हीं तिन्हां जो जबाब दित्ता, “मैं भी तुहां ते इक गल्ल पूछदा ऐ; मिन्जो दस्सा 4 यूहन्ने दा बपतिस्मा सुअर्गे दे बकखे ते था या माणुआं दे बकखे ते था?” 5 ताहू सैह अप्पु चा ग्लाणां लगे, “जे अहां ग्लां, ‘सुअर्गे दे पास्से ते, ‘तां इन्हीं ग्लाणां, ‘भिरी तुहां तिस पर वसुआस कजो नी कित्ता?’ 6 कने जे अहां ग्लां, ‘माणुआं दे पास्से ते, ‘तां सारेयां लोकां अहां पर पत्थर मारणे, कजोकि सैह सचमुच जाणदे हन कि यूहन्ने भविष्यवक्ता था ।” 7 इस तांई तिन्हां जबाब दित्ता, “अहां नी जाणदे कि सैह कुस दे पास्से ते था ।” 8 यीशुयें तिन्हां नैं ग्लाय, “तां मैं भी तुहां जो नी दस्सणा कि मैं एह कम्म कुस हक नैं करदा ऐ ।”

दुष्ट जमीदारां दा उदारण

(मत्ती 21 : 33-46; मरकुस 12 : 1-12)

9 ताहू यीशु लोकां नैं एह उदारण ग्लाणां लगा : “इक्की माणुयें अंगूरा दा बाग लगाया, कने जमीदारां जो तिसदा ठेका दैई दित्ता कने मते दिना बासती परदेस चली गैआ । 10 जाहू बग्त आया तां तिन्हीं जमीदारां अल्ल इक्की दासे जो घल्लया कि सैह अंगूरा दे बागे च थोड़े फळां दा हिस्सा लैई ओयें, अपर जमीदारां तिसियो मारी कूटी करी खाली हत्थ वापस घल्ली दित्ता । 11 भिरी तिन्हीं इक होर दास घल्लया, कने तिन्हां तिसियो भी मारी नैं कने तिसदी बेइजती करी नैं खाली हत्थ वापस घल्ली दित्ता । 12 भिरी तिन्हीं तीन दास होर घल्ले, कने जमीदारां तिन्हां जो भी जखमी करी नैं कड्डी दित्ता । 13 ताहू अंगूरा दे बागे दे मालकें ग्लाय, ‘मैं क्या करे? मैं अपणे प्यारे जागते जो घल्लदा, जरूर सैह इसदी इजत करे ।’ 14 जाहू जमीदारां तिस जो दिख्या तां अप्पु च ग्लाणां लगे, ‘एह तां बागे दा वारिस ऐ; ओआ, अहां इसियो मारी दिदे कि सारी मलकीत म्हारी होई जां ।’ 15 कने तिन्हां तिसियो अंगूरा दे बागे ते बाहर कड्डी नैं मारी दित्ता । इस तांई अंगूरा दे बागे दा मालक तिन्हां नैं क्या करगा? 16 सैह तिन्हां जमीदारां जो खत्म करगा, कने अंगूरा दे बागे दूयेयां जो दिंगा ।” 17 तिन्हीं तिन्हां दे बकखी दिखी नैं ग्लाय, “भिरी एह क्या लिख्या ऐ :

‘जिस पत्थरे जो राजमिस्रियां निकमा ठेहराया था, सैई कुणे दा सिरा होई गैआ ।’

‘जिस पत्थरे जो राजमिस्रियां निकमा ठेहराया था, सैही कुणे दा सिरा होई गैआ ।’

18 जेहड़ा कोई तिस पत्थरे पर पोंगा सैह चकनाचूर होई जांगा, कने जिस पर सैह पोंगा, तिसियो पित्थी दिंगा ।”

कैसरे जो कर दैणां

(मत्ती 22 : 15-22; मरकुस 12 : 13-17)

19 तिस बग्त शास्त्रियां कने प्रधान याजकां तिसियो पकड़णा चाया, कजोकि सैह समझी गैयो थे कि तिन्हीं अहां पर एह उदारण ग्लाय, अपर सैह लोकां ते डरे । 20 कने सैह तिसदी ताक च लगे कने भेदी घल्ले कि धर्म का भेष बदली करी तिसदी कोई ना कोई गल्ल पकड़न, जे तां तिसियो हाकमां दे हक कने अधिकारियां दे हुआले करी दिंगे । 21 तिन्हां तिसते एह पूछया, “हे गुरु, अहां जाणदे हन कि तू ठीक ग्लांदा कने सखांदा भी ऐ, कने कुसी दी बुराई नी करदा, अपर परमात्में दा रस्ता सच्चाईया नैं दस्सदा ऐ । 22 क्या अहां जो कैसरे जो टैक्स दैणां ठीक ऐ कि नी?” 23 तिन्हीं तिन्हां दी चलाकिया जो जाणी नैं तिन्हां नैं ग्लाय, 24 “इक दीनार मिन्जो भी दस्सा । तिस पर कुसदी मोहर कने नां ऐ?” तिन्हां ग्लाय, “कैसरे दा ।” 25 तिन्हीं तिन्हां नैं ग्लाय, “तां जेहड़ा कैसर दा ऐ, सैह कैसर जो दैआ; कने जेहड़ा

परमात्में दा ऐ, सैह परमात्में जो दैआ ।” 26 सैह लोकां दे सामणे इसा गल्ला च पकड़ी नी सके, अपर तिसदे जबाबे ते हैरान होई नैं चुप रैई गै ।

दुवारा ते जिंदा होणां कने व्याह

(मत्ती 22 : 23-33; मरकुस 12 : 18-27)

27 भिरी सदूकी जो ग्लांदे हन कि मरेयां दा जिंदा होणा ऐ कि नी, तिन्हां च कुच्छना तिस अल्ल आई नैं पूछया, 28 “हे गुरु, मूसें अहां तांई लिख्या ऐ, ‘जे कुसी दा भाऊ अपणिया लाडिया दे होंदे बगैर औलादा मरी जां, तां तिसदा भाऊ तिसदिया लाडिया नैं ब्याह करी लैं, कने अपणे भाऊये तांई वंश पैदा करे ।’ 29 सत भाऊ थे, पैहला भाऊ ब्याह करी नैं बगैर औलादा मरी गैआ । 30 भिरी दूयें, 31 कने त्रीयें भी तिसा जणांसा नैं ब्याह करी लैआ । तिसा रीतिया च सतो विना औलादा ते मरी गै । 32 तिस ते बाद सैह जनानी भी मरी गेई । 33 इसतांई जिंदा होणे पर सैह तिन्हां च कुसदी लाडी होंगी, कजोकि सैह सता दी लाडी होई चुकियो थी ।” 34 यीशुयें तिन्हां नैं ग्लाय, “इस जुगे दियां औलादा च तां ब्याह हुंदा ऐ, 35 अपर जेहड़े माणु तिस जोगे ठेहरगे कि इस जुगे जो कने मरेयां च जिंदा होणे जो हासल करन, सैह ना तां ब्याह करगे कने ना ब्याहे च दित्ते जांगे । 36 सैह भिरी मरणे तांई भी नी; कजोकि सैह स्वर्गदूतां साइआं होंगे, कने दुआरा जिंदा होणे दी औलाद होणे ते परमात्में दी भी औलाद होंगे । 37 अपर इसा गल्ला जो कि मरे भी जिंदा होंदे हन, मूसें भी झाडी दी कथा च प्रकट कित्ता ऐ कि सैह प्रभु जो ‘अब्राहमे दा परमात्मा, कने इसहाके दा परमात्मा, कने याकूबे दा परमात्मा’ ग्लांदा ऐ । 38 परमात्मां मुडदेयां दा नी अपर जिंदायां दा परमात्मां ऐ : कजोकि तिसदे नैडे सारे जिंदा हन ।” 39 ताहू एह सुणी नैं शास्त्रीयां च कुच्छना एह ग्लाय, “हे गुरु, तैं ठीक ग्लाय ।” 40 कने तिन्हां जो भिरी तिसते होर कुच्छ पूछणे दी हिम्मत नी होई ।

मसीह कुसदा पुत्तर ऐ ?

(मत्ती 22 : 41-46; मरकुस 12 : 35-37)

41 भिरी तिन्हीं तिन्हां ते पूछया, मसीह जो दाऊदे दी औलाद किआं गलांदे हन? 42 दाऊद अप्पु भी भजन संहिता दिया कताबा च ग्लांदा ऐ :

‘प्रभुयें मेरे प्रभु नैं ग्लाय,

43 मेरे खबबे बकखें बैठ, जाहू तिकर कि मैं तेरे बैरियां जो तेरेयां पैरां थलैं नी करी दैं ।’

44 दाऊद तां तिस जो प्रभु ग्लांदा ऐ; तां भिरी सैह तिसदी औलाद किआं होया?”

शास्त्रियां ते चुकनै

(मत्ती 22 : 41-46; मरकुस 12 : 35-37)

45 जाहू सारे माणु सुणां दे थे, तां तिन्हीं अपणे चेलयां नैं ग्लाय, 46 शास्त्रियां ते चुकनै रैहआ, जिन्हां जो लम्मे लम्मे कपड़े पैहनी करी घूमणा खरा लगदा ऐ, कने जिन्हां जो बजारां च नमस्कार, कने सभां च खास आसन कने जेवनारां च खास जगाह प्यारी लगदी ऐ । 47 सैह विधवां दे घर खाई जांदे हन, कने दस्सणे तांई बड़ी देर प्रार्थना करदे रैहदे हन एह बड़ी सज्जा पागे ।

गरीब विधवा दा दान

(मरकुस 12 : 41-44)

21 भिरी यीशुयें अखी चुकी नैं मीरां जो अपणां-अपणां दान भण्डारे च पादें दिख्या । 2 तिन्हीं इक गरीब विधवा जो भी तिस च दो दमड़ियां पादें दिख्या । 3 ताहू तिन्हीं ग्लाय, “मैं तुहां नैं सच ग्लांदा ऐ कि इसा गरीबा विधवा तां सबना ते जादा पाया ऐ । 4 कजोकि तिन्हां सबना अपणियां-अपणियां मीरिया च दाने च थोड़ा पाया ऐ, अपर तिन्हे अपणी गरिबिया च अपणी सारी कमाई पाई दित्ती ऐ ।”

मंदरे दे विनाश दी भविष्यवाणी
(मत्ती 24 : 1,2; मरकुस 13 : 1,2)

5 जाहू कुच्छ माणु मंदरे दे बारे च गला दे थे कि सैह कदेय छैल पत्थरां न कने दान कित्तियां चीजां न सजाया ऐ, तां तिन्हीं ग्लाय, 6 "सैह दिन ओगें, जिन्हां च एह सब कुछ जेहड़ा तुहां दिखदे हन, तिन्हां च ऐत्थू कुसी भी पत्थरे पर पत्थर भी नी रेंहगा जेहड़ा ढाया नी जांगा ।"

संकट कने क्लेश
(मत्ती 24 : 3-14; मरकुस 13 : 3-13)

7 तिन्हां तिसते पूछ्या, "हे गुरु, एह सब काहू हुंगा? कने एह गलां जाहू पूरियां होणे पर हुंगियां, तां तिस बते दा क्या नशाण हुंगा?" 8 तिन्हीं ग्लाय, "चुकनै रेंहआ कि भरमया ना जां, कजोकि मते भरी मेरे नांये ते आई नै ग्लां, मैं सैई ऐ, 'कने एह भी कि, 'बग्त निकळी जा दा ऐ ।' तुहां तिसदे पचांह मत चली जादे । 9 जाहू तुहां लड़ाईयां कने हंगामे दी चर्चा सुणगे तां घबराई मत जादे, कजोकि तिन्हां पैंहलें होणां जरूरी ऐ; अपर तिस बग्त इकदम अंत नी हुंगा ।"

10 ताहू तिन्हीं तिन्हां नै ग्लाय, "जातिआ पर जाती कने राजे पर राज चढाई करगा, 11 कने बडे-बडे हिल्लण होंगे, कने जगाह जगाह पर अकाल कने महामारियां पोंगियां, कने अम्बरे च बुरियां गलां कने बडे-बडे नशाण प्रकट होंगे । 12 अपर इन्हां सारियां गलां होणे ते पैंहलें मेरे नांये दिया बजाह ते तुहां जो पकड़गे, कने सतांगे, कने पंचायता च घसीटगे कने जेलां च करी दिंगे, कने राजेयां कने हाकमां दे सामणे लैई जांगे । 13 अपर एह तुहां तांई गवाही दैणे दा मौका होई जांगा । 14 इसताई अपणे- अपणे मने च ठाणी लैआ कि अहां पैंहलें ई जबाब दैणे दी चिंता नी करगे । 15 कजोकि मैं तुहां जो ऐसे शब्द कने अक्क दिंगा कि तुहां दे सब विरोधी सामना या विरोध नी करी सकगे । 16 तुहां दे मां - बुडे, कने भाऊ, कने रिशतेदार, कने साथी भी तुहां जो पकड़ुआंगे; ऐत्थू तिकर कि तुहां च कुच्छना जो मारी दिंगे । 17 मेरे नांये दिया बजह ते सारे माणु तुहां नै बैर रखगे । 18 अपर तुहां दे मुँडे दा इक्क बाळ भी बांका नी हुंगा । 19 अपणे धीरजे नै तुहां अपणियां जान्नी जो बचाई रखगे ।

यरुशलेमें दे विनाशे दी भविष्यवाणी
(मत्ती 24 : 15-21; मरकुस 13 : 14-19)

20 "जाहू तुहां यरुशलेमे जो सेना नै घिरया होया दिखगे, तां जाणी लैनेयां कि तिसदा उजड़णा नेडें ऐ । 21 ताहू जेहड़े यरुशलेमे च होन सैह पहाड़ां पर नठी जान; कने जेहड़े यरुशलेमे अंदर होन सैह बाहरयो निकळी जान; कने जेहड़े ग्रांए च होन सैह तिस ग्रांए च ना जान । 22 कजोकि एह बदला लैणे दे ऐसे दिने होंगे, जिन्हां च लिखियां सारियां गलां पूरियां होई जागियां । 23 तिन्हां दिनां च जेहड़ी लैरथी कने दूध पियाणे आळी होंगी, तिसा तांई हाय ! कजोकि देशे च बड़ा सताव कने तिन्हां लोकां पर बड़ा प्रकोप हुंगा । 24 सैह तलवारा दी धार बणी जांगे, कने सारेयां देशा दे लोका च बंदी होई नै पञ्जाये जांगे; कने जाहू तिकर होरना जातिआं दा बग्त पूरा ना होयें, ताहू तिकर यरुशलेम होरना जातिआं नै रेंदिया जांगा ।

माणुये दे पुत्रे दा ओणां
(मत्ती 24 : 29-31; मरकुस 13 : 24-27)

25 "सूरजे च कने चन्द्रमे च कने तारेयां च नशाण दुस्सगे; कने धरतिया पर सारे देसां दे लोकां जो मसीबत होंगी, कजोकि सैह समुंदरे दी गरजणां न कने लहरा दे रौळे नै घबराई जांगे । 26 उरे दिया बजाह ते कने संसारे पर ओणे आळी मसीबतां दा इंतजार करदे करदे लोकां दे जी च जी नी रेंहगा, कजोकि अम्बरे दियां शक्तियां लोळियां जागियां । 27 ताहू सैह माणुये दे पुत्रे जो सामर्था दे कने बड़ी महीमा सोगी बदळे पर ओंदे देखगे । 28 जाहू एह गलां होणां लगगियां, तां सीधे होई नै अपणे मुँड ऊपर चुकनेयां; कजोकि तुहां दा छूटकारा नेडें हुंगा ।"

धूडे दे रुखे दा उदारण
(मत्ती 24 : 32-35; मरकुस 13 : 28-31)

29 तिन्हीं तिन्हां नै इक्क उदारण भी ग्लाय : "धूडे दे रुखे कने सारेयां रुखा जो दिखा । 30 जिआं तिन्हां प्लुसां निकळदियां हन, तां तुहां दिखी नै अप्पु ई जाणी लेंदे हन कि गर्मिया दा मौसम ओणे आळा ऐ । 31 तिस तरीके नै जाहू तुहां एह गलां होंदे दिखन, ताहू जाणी लैआ कि परमात्मं दा राज्ञ ओणे आळा ऐ । 32 मैं तुहां नै सच ग्लांदा ऐ कि जाहू तिकर एह सारियां गलां नी होई लैन, ताहू तिकर तिसा पीढीया दा कदीभी अन्त नी होणां । 33 अम्बर कनेधरती टळी जांगे, अपर मेरियां गलां कदी नी टळगियां ।

जागदे रेंहआ
(मत्ती 24 : 36-41; मरकुस 13 : 32-37)

34 "इस बजाह ते चुकनै रेंहआ, एह नी होयें कि तुहां दे मने च खमार, कने मतवालेपन, कने इसा जिन्दगिया दी चिंता नै सुस्त होई जान, कने सैह दिन तुहां पर साइआं चाणचक आई पोयें । 35 कजोकि सैह सारे धरतिया पर रेंहणे आळेयां पर इसी तरांह आई पोंगा । 36 इसताई जागदे रेंहआ कने हर बग्त प्रार्थना करदे रेंहआ कि तुहां इन्हां सब ओणे आळियां मसीबतां ते बची करी रेंह कने माणुये साइआं खडौणे जोगा तां बणा ।"

37 सैह हर दिन मंदरे च शिक्षा दिंदा था, कने रातियो बाहर जाई नै जैतून नांये दे पहाड़े पर रेंहदा था; 38 कने भ्यागा तडकें ई सारे माणु तिसदी सुणने तांई मंदरे च तिस अल्ल ओंदे थे

यीशु मसीह जो जान्नी ते मारणे दी साजस
(मत्ती 26 : 1-5; मरकुस 14 : 1,2; यूहन्ना 11 : 45-53)

22 अखमीरी रोटिया दा तौआर जेहड़ा फसह दे नांये जाणेयां जांदा ऐ, नेडें था; 2 कने प्रधान याजक कनेशास्त्री इस सोच वचारे च रेंहदे थे कि यीशु जो किआं जान्नी ते मारन, अपर सैह लोकां ते उरदे थे ।

यहूदा इस्करियोतिये दा धोखा
(मत्ती 26 : 14-16; मरकुस 14 : 10,11)

3 ताहू सैतान यहूदा च समाईया, जेहड़ा इस्करियोती नांये ते जाणेयां जांदा था कने यीशु दे बारां चेलेयां च गिणेया जांदा था । 4 तिन्हीं जाई नै प्रधान याजकां कने अधिकारियां नै गल्ल-बात किती कि यीशु जो किआं तिन्हां दे हुआले करें । 5 सैह खुश होये, कने तिसियो पैसे दैणे दा वादा किता । 6 तिन्हीं मनी लैआ, कने मौका तोपणां लग्गा कि जाहू भीड़ ना होयें तां यीशु जो तिन्हां दे हुआलें करी दिंगा ।

चेलयां सौगी फसह दी आखरी धाम
(मत्ती 26 : 17-25; मरकुस 14 : 12-21; यूहन्ना 13 : 21-30)

7 ताहू अखमीरी रोटिया दे तौआरे दा दिन आया, जिस च फसह दा मेम्ना बलि चढाणा जरूरी था । 8 यीशुयें पतरसे नै कने यहूने जो एह ग्लाई नै घल्लया : "जाई नै अहां तांई फसह त्यार करा ।" 9 तिन्हीं तिसते पूछ्या, "तू अहां ते फसह दी त्यारी कतांह चाहंदा ऐ ?" 10 तिन्हीं तिन्हां नै ग्लाय, "दिखा, सैहरे च पुज्रदे ई इक्क माणु पाणिये दा घडे लैई नै चलेया तुहां जो मिलगा; जिस घरे च सैह जां तुहां तिसदे पचांह चली जानेयां, 11 कने तिस घरे दे मालके नै ग्लाणां, कि "गुरु तिजो नै ग्लांदा ऐ कि सैह कमरा कुत्थू ऐ जिस च मैं अपणे चेलेयां सौगी फसह खां?" 12 सैह तुहां जो इक्क सजियां सजाइयो बोड़ दस्सगा; तिथु ई त्यारी करनेयां । 13 तिन्हां जाई नै, जिआं यीशुयें तिन्हां नै ग्लाय था, तिआं ई होया कने फसह त्यार किती ।

प्रभु - भोज
(मत्ती 26 : 26-30; मरकुस 14 : 22-26; 1 कुरिन्थियां 11 : 23-25)

14 जाहू बग्त आई रेंहआ, तां सैह चेलयां सौगी खाणां बैठा । 15 कने तिन्हीं तिन्हां नै ग्लाय, "मिन्जो बड़ी लालसा थी कि दुख झेलणे ते पैंहलें एह फसह तुहां सौगी खां । 16 कजोकि मैं तुहां नै ग्लांदा ऐ कि जाहू तिकर सैह परमात्मं दे राजे च पूरा नी होयें ताहू तिकर मैं तिसा जो कदी नी खांगा 17 ताहू तिन्हीं

कटोरा लैई नैं धन्यवाद किता कने ग्लाय, "इसियो लैआ कने अप्पु चा बंडी लैआ । 18 कजोकि मैं तुहां नैं ग्लांदा ऐ कि जाहू तिकर परमात्मैं दा राज्र नी ओयें ताहू तिकर मैं अंगूरा दा रस अज्जे ते बाद कदी नी पींगा ।" 19 भिरी तिन्हीं रोटी लैई, कने धन्यवाद करी नैं तोडी, कने तिन्हां जो एह गलाई नैं दिती, "एह मेरा शरीर ऐ जेहड़ा तुहां तांई दिता जांदा ऐ : मेरिया यादा तांई ऐही करा करा ।" 20 इस तरीके नैं तिन्हीं खाणे ते बाद कटोरा भी एह गलाई नैं दिता, "एह कटोरा मेरे तिस खूने च जेहड़ा तुहां तांई बहाया जांदा ऐ नौआं वादा ऐ । 21 अपर दिखा, मेरे पकडुआणे आळे दा हत्थ मेरे सौगी टेबले पर ऐ । 22 कजोकि माणुये दा पुतर तां जिआं तिस तांई ठेहराया जांदा ऐ, अपर हाय तिस माणुये पर जिसदिया बजाह ते सैह पकडुआया जांदा ऐ !" 23 ताहू सैह अप्पु चा पूछणां लगे कि अहां च कुण ऐ, जेहड़ा एह कम्म करगा ।

म्हान कुण? पर सबाल जबाब

24 तिन्हां च एह बैटस बाजी भी होई तिन्हां च बड़ा कुण समझेया जांदा ऐ । 25 तिन्हीं तिन्हां नैं ग्लाय, "होरनी जाति दे राजे तिन्हां पर प्रभुता करदे हन; कने जेहडे तिन्हां पर हक्क रखदे हन, सैह भलाई करणे आळे नांये ते जाणे जांदा हन । 26 अपर तुहां ऐदेय मत होंदे; अपर जेहड़ा तुहां च बड़ा ऐ, सैह लोक्के साइआं कने जेहड़ा प्रधान ऐ, सैह सेवके साइआं बणैं । 27 कजोकि बड़ा कुण ऐ, सैह जेहड़ा खाणां बैठया ऐ, या जेहड़ा सेवा करा करदा सैह? क्या सैह नी जेहड़ा खाणां बैठया ऐ? अपर मैं तुहां बिच दासे साइआं ऐ ।

28 "तुहां सैह हन, जेहडे मेरिया परीक्षा दे बत लगातार मिन्जो सौगी रेंह; 29 कने जिआं मेरे पिते मेरे तांई इक्क राज्र ठहराया ऐ, तिआं ई मैं तुहां तांई ठहरांदा ऐ, 30 तांकि तुहां मेरे राज्रे च मेरी मेज पर खांगे-पींगे, अपर सिंहासणे पर बैई नैं इस्त्राएले दे बारां गोत्रां दा न्याय करा ।

पतरसे दे मुकरी जाणे दी भविष्यवाणी

(मत्ती 26 : 31-35; मरकुस 14 : 27-31; यूहन्ना 13 : 36-38)

31 "शमौन, हे शमौन ! दिख, सैताने तुहां लोकां जो मंगी लैआ ऐ कि कणका साइआं फटके, 32 अपर मैं तिजो तांई विणती किती कि तेरा वसुआस चली नी जां; कने जाहू तुहां फिरन तां अपणे भाऊआं जो मजबूत करा ।" 33 तिन्हीं तिन्हां नैं ग्लाय, "हे प्रभु, मैं तेरे कने जेला च जाणे जो कने मरणे जो भी त्यार ऐ ।" 34 तिन्हीं ग्लाय, "ओ पतरसा, मैं तिजो नैं ग्लांदा ऐ कि अज्ज कुकडे दे बांग दैणे ते पैहलें तैं तीन बरी मेरा मना करणां कि तू मिन्जो नी जाणदा ।"

बटुआ, झोलू, कने तलवार

35 भिरी तिन्हीं तिन्हां नैं ग्लाय, "जाहू मैं तुहां जो बटुए, कने झोळी, कने जूते बगैर घल्लया था, तां क्या तुहां जो कुसी चीज्रा दी कमी होई थी?" 36 तिन्हीं तिन्हां नैं ग्लाय, "अपर हुण जिस अल्ल बटुआ होयें सैह तिसियो लैं कने तिआं ई झोलीया भी, कने जिस अल्ल तलवार ना होयें सैह अपणे कपडे बेची नैं खरीदी लैं । 37 कजोकि मैं तुहां नैं ग्लांदा ऐ, कि एह जेहड़ा लिखिया ऐ : सैह अपराधियां सौगी गिणेयां, तिसदा मिन्जो च पूरा होणां जरूरी ऐ; कजोकि मेरे बारे च लिखियां गल्लां पूरियां होणे पर हन ।" 38 तिन्हां ग्लाय, "हे प्रभु, दिख ऐत्थू दो तलवारा हन ।" यीशुयें तिन्हां नैं ग्लाय, "बड़ियां हन ।"

जैतूने दे फ्हाडे पर यीशु मसीह दी प्रार्थना

(मत्ती 26 : 36-46; मरकुस 14 : 32-42)

39 ताहू सैह बाहर निकली नैं, अपणी रीतिया मताबक जैतून दे फ्हाडे पर गैआ, कनेचले तिसदे पचांह चली पै । 40 तिसा जगह पुजी नैं तिन्हीं तिन्हां कने ग्लाय, "प्रार्थना करा कि तुहां परीक्षा च मत पोआ ।" 41 भिरी सैह इक्की पत्थरे जो जितणी दूर सट्टी सकदे थे लगभग अपणे चेलयां ते तितणी दूर लग्ग गैआ, कने गोडयां भार बैई नैं प्रार्थना करणां लग्गा, 42 "हे पिता, जे तू चां तां तिस कटोरे जो मेरे बक्खे ते हटाई लैं, तमी मेरी नी अपर तेरी ई इच्छा पूरी होयें ।" 43 ताहू सुअंगें ते इक्क दूत तिसियो दुस्सेया जेहड़ा तिसियो सामर्थ दिंदा था । 44 सैह बड़िया मुसीबता ते व्याकुल होई नैं होर भी जोरे नैं प्रार्थना करणां लग्गा; कने तिसदा पसीना मना खूने दिया बड़िया बड़िया बूदा साइआं धरतिया पर पैआ था । 45 ताहू सैह प्रार्थना ते उठया कने अपणे

चेलयां अल्ल आई नैं तिन्हां जो उदासी दे मारे सुतेया दिख्या 46 कने तिन्हीं तिन्हां नैं ग्लाय, "कजो सुतेयो हन? उठा, प्रार्थना करा कि परीक्षा च ना पो न ।"

यीशु मसीह जो धोखे नैं पकडुणां

(मत्ती 26 : 47-56; मरकुस 14 : 43-50; यूहन्ना 18 : 3-12)

47 सैह एह ग्ला दा ई था कि इक्क माणुआं दी भीड़ आई, कने तिन्हां बारां चेलयां च इक्क जिसदा ना यहूदा था तिन्हां गांह गांह ओआ दा था । सैह यीशुये दा पुक्का लैणे तांई तिस अल्ल आया । 48 यीशुयें तिस नैं ग्लाय, "हे यहूदा, क्या तैं पुक्का लैई नैं माणुये दे पुत्रे जो धोखे नैं पकडुआणा आया ऐ?" 49 तिसदेयां साथियां कने जाहू दिख्या कि क्या होणे आळा ऐ, तां ग्लाय, "हे प्रभु, क्या अहां तलवार चलान?" 50 कने तिन्हां च इक्की महायाजके दे दासैं पर तलवार चलाई नैं तिसदा सज्जा कनं डुआई दिता । 51 इसा गल्ला पर यीशुयें ग्लाय, "हुण बस करा ।" कने तिसदा कनं छूई नैं तिसियो ठीक किता । 52 ताहू यीशुये प्रधान याजका कने मंदरे दे अधिकारियां कने स्याणेयां यहूदी नेतेयां नैं ग्लाय, "क्या तुहां मिन्जो डाकू समझी नैं तलवारां कने डांगा लैई करी निकळये हन? 53 जाहू मैं मंदरे च हर दिन तुहां सौगी था, तां तुहां मिन्जो पर हत्थ नी पाया; अपर एह तुहां दा बग्त ऐ, कने नैहरे दा हक्क ऐ ।

पतरसे दा मुकरना

(मत्ती 26 : 57,58, 69-75; मरकुस 14 : 53,54, 66-72; यूहन्ना 18 : 12-18, 25-27)

54 भिरी सैह तिस जो पकडी नैं लैई चले, कने महायाजके दे घरेयो लैई गै । कने पतरस तिसदे बड़ी पचांह चलेया था; 55 कने जाहू सैह अगणे च अग्गी सळगेरी नैं किट्टे बैठे, तां पतरस भी तिन्हां बिच बैई गैआ । 56 ताहू इक्क नौकराणियां तिसियो अग्गी दिया लौई च बैठयो दिखी नैं कने तिसदे पाससैं ताक्की नैं ग्लाय, "एह भी तिस सौगी था ।" 57 अपर तिन्हीं एह गलाई नैं ना किती, "हे नारी, मैं तिसियो नी जाणदा ।" 58 थोड़िया देरा बाद कुणकी होरनी भी तिसियो दिखी नैं ग्लाय, "तूमी तां तिन्हां च ऐ ।" पतरस ग्लाय, "हे माणु, मैं नी ऐ ।" 59 कोई घंटे बाद इक्क होर माणु वसुआसे नैं ग्लाय, "पक्का एह भी तां तिस सौगी था, कजोकि एह गलीली ऐ ।" 60 पतरस ग्लाय, "हे माणु, मैं नी जाणदा कि तू क्या ग्लादा ऐ !" सैह ग्लादा ई था कि ताहू ई कुकडे बांग दिती । 61 ताहू प्रभुयें पचांह मुडी नैं पतरसे पाससैं दिख्या, कने पतरसे जो प्रभु दी सैह गल्ल याद आई जेहड़ी तिन्हीं ग्लायी थी, "अज्ज कुकडे दे बांग दैणे ते पैहले, तैं मिन्जो पणछेणने ते तीन बरी मुकरना ।" 62 कने सैह बाहर निकळी नैं अंखी भरी भरी रोया ।

यीशु मसीह दा अपमान

(मत्ती 26 : 67,68; मरकुस 14 : 65)

63 जिन्हां माणुआं यीशु जो पकडेया था, सैह तिसियो मजाक डुआई करी मारना कूटणां लगे; 64 कने तिसदियां अंखी ढक्की नैं तिसते पूछया, "भविष्य वाणी करी नैं दस्स कि तिजो कुणी मारेया । 65 कने तिन्हां मतिआं होर भी निंदा दियां गल्लां तिसदे वरखलाफे च गलाईयां ।

महासभा दे सामणे यीशु मसीह

(मत्ती 26 : 59-66; मरकुस 14 : 55-64; यूहन्ना 18 : 19-24)

66 जाहू दिन होया तां लोकां दे स्याणेयां कने प्रधान याजक कने शास्त्री कितठे होयें, कने तिसियो अपणी महासभा च लैआई नैं पूछया, 67 "जे तू मसीह ऐ, तां अहां नैं गलाई दै ।" तिन्हीं तिन्हां नैं ग्लाय, "जे मैं तुहां नैं गलां, तां तुहां वसुआस नी करणां 68 जे पूछें, तां तुहां जबाब नी दैणां । 69 अपर हुण ते माणुये दा पुतर सर्वशक्तिमान परमात्मैं दी सज्जे पाससैं बैठया रेंहगा ।" 70 इसा गल्ला पर सारेयां ग्लाय, "तां क्या तू परमात्मैं दा पुतर ऐ ?" तिन्हीं तिन्हां नैं ग्लाय, "तुहां अप्पु तां गलादे हन, कजोकि मैं ऐ ।" 71 ताहू तिन्हां ग्लाय, "हुण अहां जो गवाहिया दी क्या जरूरत ऐ; कजोकि अहां अप्पु तां तिसदे मुमें ते सुणी लैआ ।"

पिलातुस कने यीशु मसीह

(मत्ती 27 : 1,2, 11-14; मरकुस 15 : 1-5; यूहन्ना 18 : 28-38)

23 ताहू सारी सभा उठी नैं तिस पिलातुसे अल्ल लैई गई । 2 सैह एह ग्लाई नैं यीशु पर दोष लगाणां लगे: "अहां इसियो लोकां जो भकां दे, कने कैसरे जो टैक्स देणे ते ना करदे, कने अपणे आप्पे जो मसीह, राजा ग्लां दे सुणेया ऐ ।" 3 पिलातुसे तिस ते पूछ्या, "क्या तू यहूदियां दा राजा ऐ?" तिन्हीं तिसियो जबाब, "तू अप्पु ई तां ग्लादा ऐ ।" 4 ताहू पिलातुसे प्रधान याजकां कने लोकां नैं ग्लाय, "मैं इस माणुये च कोई दोष नी पांदा ।" 5 अपर सैह होर भी जोरे जोरे नैं ग्लाणां लगे, "एह गलीला ते लैई करी ऐत्थु तिकर, सारे यहूदियां च शिक्षा दैई नैं लोकां जो भडकांदा ऐ ।" 6 एह सुणी नैं पिलातुसे पूछ्या, "क्या एह माणु गलीली ऐ?" 7 कने एह जाणी नैं कि सैह हेरोदेस दी रियासत दा ऐ, तिसियो हेरोदेस अल्ल घल्ली दित्ता, कजोकि तिन्हां दिनां च सैह भी यरुशलमे च था ।

हेरोदेस कने यीशु मसीह

8 हेरोदेस यीशुये जो दिखी नैं बड़ा खुश होया, कजोकि सैह मतेआं दिनां ते यीशु जो दिखणां चाहंदा था; इस तांई कि तिसदे बारे च सुणेया था, कने तिसते कुच्छ चमत्कार दिखणे दी उम्मीद रखदा था । 9 सैह तिसते मतिआं गलां पूछ्दा रहूआ, अपर तिन्हीं तिसियो कुच्छ भी जबाब नी दित्ता । 10 प्रधान याजक कने शास्त्री खडौई करी पूरा जोर लगाई नैं तिस पर दोष लगा दे थे । 11 ताहू हेरोदेसें अपणे सपाईयां सौगी तिसदी बेइजती करी नैं मजाक डुआया कने भडकीले कपडे पैहनाई करी तिसियो पिलातुसे अल्ल घल्ली दित्ता । 12 तिस दिन पिलातुस कने हेरोदेस साथी होई गै; तिसते पैहले सैह इक्की दूये दे बैरी थे ।

पिलातुसे दिया बजाह ते यीशु मसीह जो मौती दी सज्जा

(मत्ती 27 : 15-26; मरकुस 15 : 6-15; यूहन्ना 18 : 39 --- 19:16)

13 पिलातुसे प्रधान याजकां कने अधिकारियां कने लोकां सदी नैं तिन्हां नैं ग्लाय, 14 "तुहां इस माणुये जो लोकां दे भकाणे आळा दस्सी नैं मिन्जो अल्ल लैई आयेयो हन, कने दिखा, मैं तुहां सामणे तिसदी जाचं किन्ती, अपर जिन्हां गलां दा तुहां तिस पर दोष लगादे हन तिन्हां गलां दे बारे च मैं तिस च कुछ भी दोष नी पाया ऐ; 15 ना हेरोदेसें, कजोकि तिन्हीं तिसियो अहां अल्ल वापस घल्ली दित्ता ऐ : कने दिखा, इसते ऐदेया कुच्छ नी होया कि सैह मौता दी सज्जा जोग्गा ठेहराया जा । 16 इस तांई मैं तिसियो मारी करी छड्डी दिंदा ऐ ।" 17 [पिलातुस तौआरे दे बत तिन्हां तांई इक्क कैदिये जो छडणे पर मजबूर था ।] 18 ताहू सारे मिली नैं ग्लाणां लगे, "इसदा कम्म तमाम कर, कने अहां तांई बरअब्बा जो छड्डी दै ।" 19 सैह कुसी हंगामे दिया बजाह ते जेहड़ा सैहरे च होआ दा था, कने हत्या दिया बजाह ते जेला च पाया गैआ था । 20 अपर पिलातुसे यीशुये जो छडणे दी इच्छा ते लोकां जो भिरी ते समझाया, 21 अपर तिन्हां जोरे नैं ग्लाय, "इसियो सूलिया पर टूंगा, सूलिया पर ।" 22 तिन्हीं त्री बरी तिन्हां नैं ग्लाय, "कजो, तिन्हीं कुण दैई बुराई किन्तियो ऐ? मैं तिस च मौती दी सज्जा जोग्गी कोई गल्ल नी पाई । इस तांई मैं तिसियो मार दुआई नैं छड्डी दित्ता ऐ ।" 23 अपर सैह जोरे जोरे नैं उडी करी पचांह पैई गै कि सैह सूलिया पर टूंग्या जा, कने तिन्हां दा रौला इतणा बधी गैआ । 24 कने तां पिलातुसे हुक्म दित्ता कि तिन्हां दी विणतिया मताबक किन्ता जा । 25 तिन्हीं तिस माणुये जो हंगामे कने हत्या दिया बजाह ते जेला च पाया था, कने जिसियो सैह मंगदे थे, छड्डी दित्ता; कने यीशु जो तिन्हां दी इच्छा मताबक हुआले करी दित्ता ।

यीशु मसीह दा सूलिया पर टंगाया जाणां

(मत्ती 27 : 32-44; मरकुस 15 : 21-32; यूहन्ना 19 : 17-27)

26 जाहू सैह तिसियो लैई नैं जा दे थे, तां तिन्हां शमौन नांये दे इक्की कुरेनी जो जेहड़ा ग्रांए ते ओआ दा था, पकडी नैं तिस पर सूली चकाई दिती कि तिसियो यीशुये पचांह पचांह लैई चले । 27 लोकां दी बडी भीड़ तिसदे पचांह चली पैई कने तिसा च भीड़ा च मतिआं जणांसा भी थियां जेहड़ियां यीशु तांई छातिया पीटा दियां कने रौआ दियां थियां । 28 यीशुये तिन्हां दे पास्सें दिखी

नैं ग्लाय, "हे यरुशलमे दी कुड़ियो, मिन्जो तांई मत रौआ; अपर अपणे कने अपणे जागतां तांई रौआ । 29 कजोकि दिखा, सैह दिन ओआ दे हन, जिन्हां च माणु ग्लागे, 'धन हन सैह जेहड़ियां बॉझ हन कने सैह गर्भ जेहड़ा नी जन्मेयो कने सैह चीचू जिन्हा नैं दूद नी पियाया ।' 30 तिस बत, 'सैह पहाड़ां नैं ग्लाणां लगे कि अहां पर पोआ कने 'टिलेयां नैं अहां जो ढकी लैआ ।'

31 कजोकि जाहू सैह सैले रुखां सौगी इआं करदे हन, तां सुकेयां रुखां सौगी क्या कुच्छ नी किन्ता जांगा?"

32 सैह होर दूँ माणुआं जो भी जेहड़े बुरे कम्म थे तिस सौगी सूलिया पर टूंगणे तांई लैई गै ।

33 जाहू सैह तिसा जगाह च जिसा जो खोपडी दी जगाह ग्लां दे हन पुजे, तां तिन्हां तित्थु तिसियो कने तिन्हां बुरे कम्म करणे आळ्यां जो भी, इक्की जो सज्जे पास्सें कने दूये जो खब्बे पास्सें सूलिया पर टूगे । 34 ताहू यीशुये ग्लाय, "हे पिता, इन्हां जो माफ कर, कजोकि एह नी जाणदे कि क्या करा दे हन ।" कने तिन्हां चिह्नियां पाई नैं तिसदे कपडे बंडी दित्ते ।

35 माणु खडौई करी दिखा दे थे, कने अधिकारी भी मजाक डुआई करी ग्लां दे थे : "तिन्हीं दूयेयां जो बचाया, जे एह परमात्मं दा मसीह ऐ, कने तिसदा चुणेया ऐ, तां अपणे आप्पे जो बचाई लै ।" 36 सपाई भी आई नैं सिरका दैई नैं तिसदा मजाक डुआई नैं ग्लां दे थे, 37 "जे तू यहूदियां दा राजा ऐ, तां अपणे आप्पे जो बचा ।" 38 कने तिसदिया सूलिया पर इक्क दोष -चिड्डी भी लगियो थी : "एह यहूदियां दा राजा ऐ ।"

मने बदलणेआळा कुकर्मी

39 जेहड़े बुरे कम्म करणे आळे थे तिन्हां च इक्की तिसदी निंदा करी नैं ग्लाय, "क्या तू परमात्मं ते भी नी डरदा ? तू भी तां सैई सज्जा पा दा ऐ, 40 इसा गलां पर दूये तिसियो झिडकी नैं ग्लाय, "क्या तू परमात्मं ते भी नी डरदा ? तू भी तां सैई सज्जा पा दा ऐ, 41 अहां तां कानूने मताबक सजा पा दे हन, अपर इन्हीं तां कोई बुरा कम्म नी किन्त्या ।" 42 ताहू तिन्हीं ग्लाय, "हे यीशु, जाहू तिकर तू अपणे राजे च ओंगा, तां मिन्जो याद रखेयां ।" 43 तिन्हीं तिस नैं ग्लाय, "मैं तुहां नैं सच ग्लांदा ऐ कि अज्जे ते ई तू मिन्जो सौगी सुअर्ग माणु च हुंगा ।"

यीशु मसीह दा प्राण त्यागणां

(मत्ती 27 : 45-56; मरकुस 15 : 33-41; यूहन्ना 19 : 28-30)

44 लगभग बारा बजे ते तीन बजे तिकर सारे देशे च नैहरा होई गैआ, 45 कने सूरजे दा परगड़ा चली गैई, कने मंदरे दा पडदा बिचा ते फटी गैआ, 46 कने यीशुये बडे जोरे नैं उडी नैं ग्लाय, "हे पिता, मैं अपनी आत्मां तेरे हत्थां च दिंदा ऐ ।" कने एह ग्लाई नैं प्राण छड्डी दित्ते । 47 सूबेदारं, जेहड़ा कुच्छ होया था दिखी नैं परमात्मं दी महिमा किन्ती, कने ग्लाय, "पक्का एह माणु धर्मी था ।" 48 कने भीड़ जेहड़ा एह दिखणे जो किड्डी होईयो थी, तिसा घटना जो दिखी नैं छाती पीटदी होई वापस चली गैई । 49 अपर तिसदे सारे जाण पणछेणां आळे, कने जेहड़ियां जणांसां गलीला ते तिस सौगी आईयां थियां, दूर खडौई एह सब कुच्छ दिखा दियां थियां ।

यीशु मसीह जो कब्र च रखणां

(मत्ती 27 : 57-61; मरकुस 15 : 42-47; यूहन्ना 19 : 38-42)

50 तित्थु यूसुफ नांये दा महासभा दा इक्क सदस्य था जेहड़ा सज्जन कने धर्मी मर्द था । 51 कने तिन्हां दी योजना कने तिन्हां दे तिस कम्म ते खुश नी था । सैह यहूदियां दे सैहरे अरीमतिया दा रहणे आळा कने परमात्मं दे राजे दा इंतजार करणे आळा था । 52 तिन्हीं पिलातुसे अल्ल जाई नैं यीशु दी लाश मंगी; 53 कने तिसियो लौआई नैं मलमले दी चादरा च लपेटया, कने इक्की कब्र च रखेया, जेहड़ी चट्टाना च कोरियो थी; तिसा च कोई भी कदी नी रखेया था । 54 सैह तयारिया दा दिन था, कने सब्त दा दिन शुरू होणे आळा था । 55 तिन्हां जणांसा जेहड़ियां तिस सौगी गलीले ते आईयां थियां, पचांह -पचांह जाई नैं तिसा कब्र जो दिख्या, कने एह भी कि तिसदी लाश किआं रखियो ऐ । 56 ताहू तिन्हां वापस आई नैं मुशकां आळियां चीज्जां कने इत्तर तयार किन्ता, कने सब्त दे दिन तिन्हां हुक्म मताबक अराम किन्ता ।

यीशु मसीह दा दुवारा ते जिंदा होणां
(मत्ती 28 : 1-10; मरकुस 16 : 1-8; यूहन्ना 20 : 1-10)

24 अपर हफते दे पँहले दिने बड़िया भ्यागा जो सँह तिन्हां मुश्कां आळियां चीजां जो जेहिडियां तिन्हां त्यार कित्तियां थिया, लैई नँ कब्रा पर आईयां । ² तिन्हां पत्थरे जो कब्रा ते खिसकेया दिख्या, ³ अपर अन्दर जाई नँ प्रभु यीशु दी लाश नी दुस्सी । ⁴ जाहू सँह इसा गला पर हैरान होआ दियां थियां तां दिखा, दो माणु चमकदे कपड़ेयां च तिन्हां अल्ल आई खडूते । ⁵ डरे दे मारे तिन्हां धरतिया दी पास्सें मुँ लटकाया था तां तिन्हां दूँ माणुआं तिन्हां नँ ग्लया, “तुहां जिंदा जो मरेयां च कजो तोपादियां हन? ⁶ सँह ऐन्थु नी ऐ, अपर जिंदा होईया ऐ । याद करा कि तिन्हीं गलीले च रैई करी तुहां नँ ग्लया था, ⁷ 'जरूरी ऐ कि माणुये दा पुत्तर पापियां दे हत्थ पकडुआया जांगा, कने सूलिया पर टूंगेया जां, कने त्री दिने जिंदा होई जांगा ।' ⁸ ताहू तिसदियां गलां तिन्हां जो याद आईआं, ⁹ कने कब्रा ते वापस आई नँ तिन्हां ग्यारहा चेलयां जो, कने होरना सारेयां जो, एह सारियां गलां ग्लाइं नँ सणाईयां । ¹⁰ तिन्हां चेलयां नँ एह गलां ग्लाइयां सँह मरियम मगदलीनी कने योअन्ना कने याकूबे दी मां मरियम कने तिसा सौगी होर जणांसा भी थियां । ¹¹ अपर तिन्हां दियां गलां तिन्हां जो काहणियां साइआं लगियां, कने तिन्हां तिन्हां जणांसा दा वसुआस नी कित्ता । ¹² ताहू पतरस कब्रा अल्ल दौडी नँ गैआ, कने झुकी नँ सिर्फ कपड़े पैयो दिखे, कने जेहड़ा होया था तिसते हैरान होई नँ अपणे घरेयो चली गैआ ।

इम्माऊस दे रस्ते पर चेलयां सौगी
(मरकुस 16 : 12,13)

¹³ तिस दिन तिन्हां च दूँ माणुआं इम्माऊस नांये दें ग्रांए जो जा दे थे, जेहड़ा यरुशलेमे ते कोई सत मौल दी दूर था । ¹⁴ सँह तिन्हां सारियां गलां पर जेहिडियां होईयां थियां, अप्पु च गल्ल बात करदे जा दे थे, ¹⁵ कने जाहू अप्पु चा गल्ल बात कने पूछ ताछ करा दे थे, तां यीशुयें अप्पु आई नँ तिन्हां सौगी चली पैआ । ¹⁶ अपर तिन्हां दियां अंखी ऐसियां बंद करी दित्तियां थियां कि यीशु जो पणछेणी नी सके । ¹⁷ तिन्हीं तिन्हां ते पूछ्या, “एह क्या गलां हन, जेहिडियां तुहां चलदे-चलदे अप्पु चा करा दे हन?” सँह चुप खडूतेयो रैई गै । ¹⁸ एह सुणी नँ तिन्हां नँ क्लियोपास नांये दे इक्की माणुयें ग्लया, “क्या तू यरुशलेमे च किल्ला परदेशी ऐ, जेहड़ा नी जाणदा कि तिन्हां दिना च तिस च क्या क्या होया ऐ?” ¹⁹ तिन्हीं तिन्हां ते पूछ्या, “कुण देईयां गलां?” तिन्हां तिस नँ ग्लया, “यीशु नासरी दे बारे च जेहड़ा परमात्में कने सारेयां लोकां दे नेडें कम्म कने वचना च सामर्थी भविष्यवक्ता था, ²⁰ कने प्रधान याजकां कने अहां दे अधिकारियां तिसियो पकडु आई दित्ता कि तिस पर मौती दा हुक्म दिता जां; कने तिसियो सूलिया पर टूंगेया । ²¹ अपर अहां जो उम्मीद थी कि एह ई इस्त्राएले जो छूटकारा दिंगा । तिन्हां सारियां गलां दे सिवाये तिसा घटना जो होयो त्रीआ दिन ऐ, ²² कने अहां च केईयां जणांसा भी अहां जो हैरानिया च पाई दित्या ऐ, जेहिडियां भ्यागा कब्रा पर गियां थियां; ²³ कने जाहू तिसदी लाश नी दिखी तां एह गलांदियां होईयां आईयां कि अहां स्वर्गदूतां दे दर्शन कित्ते; जिन्हां ग्लया कि सँह जिंदा ऐ । ²⁴ ताहू अहां दे साथियां च इक्क कब्रा पर गैआ, कने जिआं जणांसां ग्लया था तिआं ई दिख्या; अपर तिसियो नी दिख्या ।” ²⁵ ताहू तिन्हीं तिन्हां नँ ग्लया, “हे वेअक्केयो, कने भविष्यवक्तां दी सारियां गलां पर वसुआस करणे पर कितणे मंद हन ! ²⁶ क्या जरूरी नी था कि मसीह एह दुख झेली नँ अपणी महिमा च दाखल होयें?” ²⁷ ताहू

तिन्हीं मूसा ते कने सारे भविष्यवक्ता ते शुरू करी नँ सारे पवित्रशास्त्र च अपणे बारे च लिखियां गलां दा मतलब तिन्हां जो समझाई दित्ता ।

²⁸ इतणे च सँह तिस ग्रांए अल्ल पुजे जिथू सँह जा दे थे, यीशुयें ऐदेया वर्ताव कित्ता जिआं कि तिसियो गाह जाणां होयें । ²⁹ अपर तिन्हां एह ग्लाइं नँ तिसियो रोकेया, “अहां सौगी रुकी जा, लगभग संज होईयो ऐ कने हुण दिन ज्यादा ढळी गैआ ऐ । “ताहू सँह तिन्हां सौगी रैहणे ताई अंदर गैआ । ³⁰ जाहू सँह तिन्हां सौगी खाणां बैठा, तां तिन्हीं रोटी लैई धन्यवाद कित्ता कने रोटी तोडी नँ तिन्हां जो दैणां लग्गा । ³¹ ताहू तिन्हां दियां अंखी खुली गियां; कने तिन्हां तिसियो पणछेणी लैआ, कने सँह तिन्हां दियां अंखी ते गायब होई गैआ । ³² तिन्हां अप्पु चा ग्लया, “जाहू सँह रस्ते च अहां नँ गलां करा दा था कने पवित्रशास्त्र दा मतलब समझादा था, तां क्या अहां दे मने च उक्तेजना नी पैदा होई थी?” ³³ सँह तिस बत उठी नँ यरुशलेम जो वापस चली गै कने तिन्हां ग्यारा चेलयां जो कने तिन्हां साथियां जो किटठा दिख्या । ³⁴ सँह गलां दे थे, “प्रभु सचमुच जिंदा होया ऐ, कने शमौने जो दुस्सया ऐ ।” ³⁵ ताहू तिन्हां रस्ते दियां गलां तिन्हां जो दुस्सी दित्तियां कने एह भी कि तिन्हां तिसियो रोटी तोडदे बत किआं पणछेणयां ।

यीशु मसीह दा दुस्सणां कने चेलयां जो आखरी हुक्म
(मत्ती 28 : 16-20; मरकुस 16 : 14-18; यूहन्ना 20 : 19-23; चेलयां दे कम्म 1 : 6-8)

³⁶ सँह एह गलां ग्ला दे ई थे कि सँह आप्पु ई तिन्हां दे बिच आई खडूता, कने तिन्हां नँ ग्लया, “तुहां जो शांति मिलें ।” ³⁷ अपर सँह घबराई गै, कने डरी गै, कने समझे कि अहां कुसी भूते जो दिखा दे हन । ³⁸ तिन्हीं तिन्हां नँ ग्लया, “कजो घबराद हन? कने तुहां दे मने च कजो शक होया दा ऐ ? ³⁹ मेरे हत्थां कने पैरां जो दिखा कि मैं सँह ई ऐ । मिन्जो छूई नँ दिखा, कजोकि आत्मां जो हड्डी मास नी ऐ दा जिआं मिन्जो च दिखदे हन ।”

⁴⁰ एह ग्लाइं नँ तिन्हीं तिन्हां जो अपणे हत्थ पैर दुस्से । ⁴¹ जाहू खुशिया दे मारे तिन्हां जो वसुआस नी होया, कने सँह हैरान होदे थे, तां तिन्हीं तिन्हां ते पूछ्या, “क्या तुहां अल्ल ऐन्थु कुच्छ खाणेयो ऐ?” ⁴² तिन्हां तिसियो भुनियां मच्छिया दा टुकड़ा दित्ता । ⁴³ तिन्हीं लैई नँ तिन्हां दे सामणे खादा । ⁴⁴ भिरी तिन्हीं तिन्हां नँ ग्लया, “एह मेरी सँह गल्ल ऐ, जेहडी मैं तुहां सौगी रैई करी तुहां नँ ग्लाइयो थी कि जरूरी ऐ कि जितणियां गलां मूसा दी व्यवस्था कने भविष्यवक्तां कने भजनां दिया कताबा च मेरे बारे च लिखियां हन, सारियां पूरियां होन ।” ⁴⁵ ताहू तिन्हीं पवित्रशास्त्र समझणे ताई तिन्हां दा दिमाग खोली दित्ता,

⁴⁶ कने तिन्हां नँ ग्लया, “इआं लिख्या ऐ कि मसीह दुख झेलगा, कने त्रीये दिने मरेयां ते जिंदा हुंगा, ⁴⁷ कने यरुशलेमे ते लैई नँ सारियां जातिआं च मन बदलणे दा कने पापा दी माफी दा प्रचार, तिस दे नांये ते कित्ता जांगा । ⁴⁸ तुहां इन्हां सारियां गलां दे गवाह हन । ⁴⁹ कने दिखा, जिसदी प्रतिज्ञा मेरे पिते कित्ती ऐ, मैं तिसजो तुहां पर लौआंगा कने जाहू तिकर सुअर्गे ते सामर्थ नी पान, ताहू तिकर तुहां तिस सँहरे च रुकी रैहआ ।”

यीशु मसीह दा सुअर्गे पर चुक्या जाणां
(मरकुस 16 : 19,20; चेलयां दे कम्म 1 : 9-11)

⁵⁰ ताहू सँह तिन्हां जो बेतनिय्याह ते बाहर लैई गैआ, कने अपणां हत्थ चुकी नँ आशीष दित्ती; ⁵¹ कने तिन्हां जो आशीष दैई करी सँह तिन्हां ते लग्न होई गैआ कने सुअर्गे पर चुकी लैआ गैआ । ⁵² ताहू सँह तिस जो दण्डवत करी नँ बड़े खुश होई नँ यरुशलेम जो वापस हटी आये । ⁵³ कने सँह लगातार मंदरे आई नँ परमात्में दी स्तुति कर दे थे ।

यूहन्ना

भूमिका

यूहन्ने दा लिख्या यीशु मसीह दे बारे च सुसमाचारे च यीशु जो परमात्मं दे सदा दे वचना दे बारे च इआं दस्सदा ऐ जिन्हीं शरीरे दे रूपे च आई करी अहां च डेरा कित्ता ।" इसा कताबा च एह गल्ल स्पष्ट ऐ, कि एह सुसमाचार इसताई लिख्या ऐ कि इसदे पाठक वसुआस करन कि यीशु ई प्रतिज्ञात उधारकर्ता मतलब परमात्मं दा पुत्र ऐ, कने सैह यीशु च वसुआस दे दुआरा जिन्दगी हासल करी सकन (20: 31)

भूमिका च यीशु जो परमात्मं दे सदा दे वचन दे रूप च दस्सदा ऐ तिसदे बाद सुसमाचार दे पैहले हिस्से च सत आश्चर्यकर्मा या नशाणां दा वखान ऐ तिन्हां च एह प्रगट हुंदा ऐ कि यीशु प्रतिज्ञात उधारकर्ता मतलब परमात्मं दा पुत्र ऐ । सुसमाचारे च यीशु दी जिन्दगिया दिआं खास घटना दे बारे च यूहन्ना लिखदा ऐ अपर भिरी बी यूहन्ना खास सबालां पर अपणां ध्यान दिंदा ऐ । 1 यीशु कुण ऐ?:- पैहले पाठे चा यूहन्ना यीशु जो "वचन दस्सदा" है जेहड़ा कि परमात्मं सौगी तिस बग्त भी था जाहू कि परमात्मं सारी सृष्टी रची कने तिस दे वचन जिंदा बणी गै तांजे लोक दिखी सकन कि परमात्मां दिखणे च कदेया लगदा ऐ । यूहन्ना बपतिस्मा देणे बाळा यीशु जो "परमात्मं दा मेम्ना" ग्लांदा है जेहड़ा कि संसारे देयां लोका दे पापां जो अप्पु पर चुकी लेंदा ऐ । कुच्छना लोकां यीशु मसीह पर वसुआस कित्ता कने तिसदे अनुयायी बणी गै, जाहू कि होरनी लोकां तिसदा विरोध कित्ता कने वसुअस करणे ते मना करी दिता । 13 - 17 पाठे च यीशु जो पकडुआये जाणे आळी रात जो, यीशु दी तिसदे चलेयां सौगी घनिष्ठ सेहभगिता, आखरी दे पाठां च यीशु दे पकडुआये जाणे कने मुकद्दमे, यीशु जो सुलिया चढाये जाणे, दबे जाणे, दुआरा जिंदा होणां, कने दुआरा जिंदा होणे दे बाद चलेयां पर प्रगट होणे दा वखान ऐ ।

यूहन्ना मसीह दे दुआरा सदा दी जिन्दगी दे दान पर जोर दिंदा ऐ । एह इक्क एसा दान ऐ जेहड़ा हुण शुरु हुंदा ऐ कने तिन्हां जो हासल हुंदा ऐ जेहड़े यीशु जो रस्ता, सच, जिन्दगी दे रूप च ग्रहण करदे हन । आत्मिक गल्लां जो दशाणे तांई दैनिक जिन्दगिया दी सधारण चीजां दा प्रतीकां दे रूप च प्रयोग यूहन्ने दी इक्क खास गल्ल ऐ, जिआं - जल - रोटी, रोटी, जोती, चरवाहा कने तिसदियां भेडां, कने अंगूरा दी बेल कने तिसदे फळ ।

रूप रेखा

भूमिका 1: 1- 18

यूहन्ना बपतिस्मा दैणे आळा कने यीशु दे पैहले चले 1: 19 -51

यीशु दी सेवा दे कम्म 2: 1 --- 12: 50

यरुशलेम दे अन्त दे कुच्छ दिन 13: 1 --- 19: 42

प्रभु यीशु मसीह दा दुआरा जिंदा होणां कने दुस्सणां 20: 1- 31

उपसंहार : गलील च पैहलें दुस्सणां 21: 1-25

वचन देहधारी होया

1 सृष्टिया ते पैहले वचन था, कने वचन परमात्मं सौगी था । कने वचन परमात्मां था । 2 ऐही सृष्टिया ते पैहले परमात्मं सौगी था 3 सब कुच्छ तिसदिया बजाह ते पैदा होया कने जेहड़ा कुच्छ पैदा होया ऐ, तिस च कोई भी चीज तिसदे विना पैदा नी होई । 4 तिस च जिन्दगी थी कने सैह जिन्दगी माणुआं दी जोती थी । 5 जोती नैहरे च चमकदी कने नैहरे तिसियो ग्रहण नी कित्ता ।

6 इक्क माणु परमात्मं दे पास्से ते आया जिसदा नां यूहन्ना था । 7 सैह इसताई आया था कि जोती दी गवाही दैई सकें कि जोती दी गवाही दै, तांकि सारे तिसदिया बजाह ते वसुआस करन । 8 यूहन्ना सैह जोती नी था, अपर सैह परमात्मं दी तिसा जोतिया दी गवाही दैणां आया था ।

9 सच्ची जोती जेहड़ी हर इक्क माणुये जो लौ दिंदी ऐ, संसारे च जोती ओणे आळी थी । 10 सैह संसारे च था, कने संसार तिसदिया बजाह ते पैदा होया, कने संसारे दे माणुआं तिसियो नी पणछेणया । 11 सैह अपणे घरे आया कने तिसदे अपणेयां तिसियो नी अपनाया । 12 अपर जितणेयां तिस पर वसुआस कित्ता, तिन्हीं तिन्हां जो परमात्मं दी औलाद होणे दा हक्क दिता, मतलब तिन्हां जो जेहड़े तिसदे नांये पर वसुआस रखदे हन । 13 सैह ना तां खून ते, ना तां शरीरे दिया मर्जिया ते, ना तां माणुये दिया मर्जिया ते अपर परमात्मं ते पैदा होया ऐ ।

14 कने वचन माणुये दे रूपे च आया (देहधारी होया); कने अनुग्रह कने सचाईया नैं पूरा भरौई नैं अहां दे बिच च डेरा कित्ता । कने अहां तिसदी ऐसी महिमा दिखी, जिआं पिता दे इकलौते दी महिमा । 15 यूहन्ने तिसदे बारे च गवाही दिती, कने जोरे नैं ग्लाय, "एह सैई ऐ, जिसदे बारे च मैं ग्लाय कि जेहड़ा मिन्जो ते बाद ओआ दा, सैह मिन्जो ते म्हान ऐ कजोकि सैह मिन्जो ते

पैहले दा था ।" 16 कजोकी तिसदे गुणां ते ई अहां सबना अनुग्रह पर अनुग्रह हासल कित्ता । 17 इसताई कि व्यवस्था तां मूसा दिया बजाह ते दिती गैई, अपर अनुग्रह कने सचाई यीशु मसीह दिया बजाह ते पुजी । 18 परमात्मं जो कुणी कदी नी दिख्या, इकलौता पुत्र जेहड़ा पिता दे मुडै (गोदी) च ऐ, तिन्हीं तिसियो प्रकट कित्ता ।

यूहन्ना बपतिस्मा दैणेआळे दी गवाही

(मत्ती 3 : 1-12; मरकुस 1 : 1-8; लूका 3 : 1-18)

19 यूहन्ने दी गवाही एह ऐ, कि जाहू यहूदियां यरुशलेमे ते याजकां कने लेवियां जो तिसते एह पूछणे तांई घल्लया, "तू कुण ऐ?" 20 तां तिन्हीं एह मनी लैआ कने मना नी कित्ता । अपर मनी लैआ, मैं मसीह नी ऐ । 21 ताहू तिन्हां तिसते पूछया, तां भिरी एह कुण? क्या तू एलियाह ऐ? तिन्हीं ग्लाय, "मैं नी ऐ ।" "तां क्या तू सैह भविष्यवक्ता ऐ?" तिन्हीं जबाब दिता, "नी ।" 22 ताहू तिन्हां तिसते पूछया "भिरी तू कुण ऐ? तांजे अहां अपणे घल्लणे आळेयां जो जबाब दें । तू अपणे बारे च क्या ग्लांदा ऐ?" 23 तिन्हीं ग्लाय, "जिआं यशायाह भविष्यवक्ता ग्लाय था : मैं सैह उआज ऐ जेहड़ा सुणसान जगाह च जोरे जोरे नैं ग्ला करदा ऐ : " परमात्मं दे पास्सें फिरा कने अपणे मनां जो सीधे रस्ते च लैईआ, 24 सैह माणु फरीसियां दे पास्से ते घल्लेयो थे,

25 तिन्हां माणुआं भिरी तिसते पूछया, "जे तू ना मसीह ऐ, कने ना तां एलियाह, कने ना सैह भविष्यवक्ता ऐ, तां भिरी बपतिस्मा कजो दिंदा ऐ?" 26 यूहन्ने तिन्हां जो जबाब दिता, मैं तां पाणिये च बपतिस्मा दिंदा अपर तुहां बिच इक्क माणु खडूत्या ऐ, जिसियो तुहां नी जाणदे । 27 मतलब एह सैह ई ऐ जेहड़ा मेरे बाद ओणे आळा ऐ, जिसदेयां जूतेयां दे तस्मेयां दियां गट्टा मैं खोलणे जोग्गा भी नीये ।" 28 एह सारियां गल्लां यरदन दरैयाए पार बैतनिय्याह नांये दिया जगाह च होईयां, जित्थू यूहन्ना बपतिस्मा दिंदा था ।

परमात्मं दा मेम्ना

29 दूये दिने यूहन्ने यीशु जो अपणे अल्ल ओंदे दिखी नैं ग्लाय़ा, दिखा एह परमात्मं दा मेम्ना ऐ जेहड़ा संसारे दे पापे जो अप्पु उपर लैई लेंदा ऐ, 30 एह सैई ऐ जिसदे बारे च मैं ग्लाय़ा था, इक्क माणु मिन्जो पचांह ओआ दा ऐ जेहड़ा मिन्जो ते म्हान ऐ, कजोकि सैह मिन्जो ते पैहले था, 31 मैं भी तां तिसियो नी जाणदा था अपर इसताई मैं पाणिये च बपतिस्मा दिंदा आया कि सैह इस्राएल पर प्रकट होई जां । 32 कने यूहन्ने एह गवाही दिती, मैं आत्मां जो कबूतर दे रूपे च सुअर्गे ते लौंदे कने तिस पर बैहंदे दिख्या था । 33 मैं तां तिसियो पणछेणदा नी था, अपर जिन्हीं मिन्जो पाणिये नैं बपतिस्मा दैणे तांई घल्लया, तिन्हीं मिन्जो नैं ग्लाय़ा, जिस पर तू आत्मां जो लौंदे कने रुकदे दिखगा, सैई पवित्र आत्मां नैं बपतिस्मा दैणे आळा ऐ । 34 कने मैं दिख्या, कने गवाही दिती कि ऐही परमात्मं दा पुत्तर ऐ ।"

यीशु मसीह दे पैहले चले

35 दूये दिने भिरी यूहन्ना अपणे दूँ चेलयां सौगी तिसा जगाह खडूतेया था, 36 कने जाहू तिन्हीं यीशु जो तिन्ची जांदे दिख्या तां तिन्हीं ग्लाय़ा, दिखा एह परमात्मं दा मेम्ना ऐ, 37 ताहू यूहन्ना दे दूनी चेलेयां एह ग्लांदे सुणयां तां सैह यीशु दे पचांह चली पै । 38 यीशुयें मुडी नैं तिन्हां जो अपणे पचांह ओंदे दिख्या कने तिन्हां जो ग्लाय़ा, "तुहा कुसियो तोपा करदे हन?" तिन्हां तिस नैं ग्लाय़ा, "हे रब्बी (मतलब हे गुरु), तू कुत्थू रेंहदा ऐ?" 39 यीशुयें तिन्हां नैं ग्लाय़ा, आईआ कने दिखी लैआ ।" ताहू तिन्हां तिस सौगी जाई नैं तिसदे रैहणे दी जगाह दिखी, कने सैह दिन भर तिस सौगी रैह । कजोकि तकरिबन दस घटेयां दे लगभग था । 40 तिन्हां दूँई च, जेहड़ा यूहन्ना दी गल्ल सुणी नैं यीशु दे पचांह चली पैयो थे, तिन्हां च इक्क शमौन पतरसे दा भाऊ अन्द्रियास था । 41 अन्द्रियासे पैहलें अपणे सक्के भाऊ शमौने नैं मिली नैं तिसियो ग्लाय़ा, "अहां जो ख्रिस्त, मतलब मसीह मिली गैआ ।" 42 अन्द्रियास अपणे भाऊ शमौने जो यीशु अल्ल लैई आया । यीशुयें तिस पर नजर करी नैं ग्लाय़ा, तू यूहन्ने दा पुत्तर शमौन ऐ । अज्जे तू कैफा यानी पतरस नांये ते जाणेया जांगा ।

फिलिप्पुस कने नतनएले जो सदगां

43 दूये दिने यीशुयें गलीले जो जाणे दे बारे च सोचेया । यीशु फिलिप्पुस नांये दे इक्की माणुयें नैं मिलया कने ग्लाय़ा, मेरे पचांह चली पाँ । 44 फिलिप्पुस भी अन्द्रियासे कने पतरसे दे सैहर बैतसैदा दा रैहणे आळा था । 45 फिलिप्पुस नतनएल नांये दे इक्की माणुयें नैं मिलया कने तिसियो ग्लाय़ा, "जिसदे बारे च मूसा दी व्यवस्था च कने भविष्यवक्तां ग्लाय़ा ऐ, सैह अहां जो मिली गैआ; सैह युसुफे दा पुत्तर, यीशु नासरी ऐ ।" 46 नतनएलें तिस नैं ग्लाय़ा, "क्या कोई खरी चीज भी नासरते ते निकळी सकदी ऐ?" फिलिप्पुस तिस नैं ग्लाय़ा, "चली नैं दिखी लै ।" 47 यीशुयें नतनएले जो अपणे अल्ल ओंदे दिखी नैं तिसदे बारे च ग्लाय़ा, दिखा एह सचमुच इस्राएली ऐ : इस च बेमानी नी ऐ ।" 48 नतनएलें तिस नैं ग्लाय़ा, "तू मिन्जो किआं जाणदा ऐ?" यीशुयें तिसियो जबाब दिता, इसते पैहले कि फिलिप्पुस तिसो सदया, जाहू तू धूडे दे रूखे थलें था, ताहू मैं तिजो दिख्या था ।" 49 नतनएलें तिस जो जबाब दिता, हे रब्बी तू परमात्मं दा पुत्तर ऐ; तू इस्राएल दा महाराजा ऐ ।" 50 यीशुयें तिस जो जबाब दिता, मैं जेहड़ा तिजो ग्लाय़ा कि मैं तिजो धूडे दे रूखे थलें दिख्या, क्या तू इसताई वसुआस करदा ऐ? तू इसते भी बडे बडे कम्म दिखगा ।" 51 भिरी तिस नैं ग्लाय़ा, "मैं तुहां नैं सच सच ग्लांदा कि तुहां सुअर्गे जो खुलया, कने परमात्मं दे सुअर्गदूतां जो माणु दे पुत्तरे उपर लौंदे कने उपर जांदे दिखगे ।"

गलीले दे काना सैहरे च पैहला चमत्कारे दा कम्म

2 भिरी त्रीये दिने गलीले दे काना च कुसकी दा व्याह था, कने यीशु दी मां भी तित्थु ई थी । 2 यीशु कने तिसदे चले भी तिस व्याह च सदयेयो थे । 3 जाहू अंगूरा दा रस मुकी गैआ, तां यीशु दी माऊ तिसियो ग्लाय़ा, "इन्हां अल्ल होर अंगूरा दा रस नीये । 4 यीशुयें तिसाया ग्लाय़ा, "हे जणांसे तू मिन्जो कजो ग्ला करदी? अल्ली तिकर मेरा बग्त नी आया ।" 5 तिसदिया

माऊ दासां नैं ग्लाय़ा, जेहड़ा कुच्छ सैह तुहां नैं ग्लांगा सैई करनैयो । 6 तित्थु यहूदियां दे पवित्र करणे दे रुआजे मताबक पत्थरां दे छै घडे रखेयो थे, जिन्हां च दो - दो कने त्रै - त्रै मण ओंदा था । 7 यीशुयें तिन्हां नैं ग्लाय़ा, घडेयां च पाणी भरी दैआ ।" तिन्हां घडेयां जो मुंमैं तिकर भरी दिता । 8 ताहू तिन्हीं तिन्हां नैं ग्लाय़ा, हुण कड्डी नैं धामा दे वोटिये (मुखिये) अल्ल लैई जा ।" कने सैह लैई गै । 9 जाहू धामा दे वोटिये (मुखिये) सैह पाणी चकखेया, जेहड़ा अंगूरा दा रस बणी गैआ था कने तिसियो पता नी चलेया कि सैह कुत्थु ते आया ऐ, (अपर दासां जो पता था जिन्हां पाणी कडेया था,) तां धामा दे वोटिये (मुखिये) लाडेयो सद्दी करी तिस नैं ग्लाय़ा, 10 हर इक्क माणु पैहले खरिया किस्मा दा अंगूरा दा रस दिंदा ऐ, कने जाहू परोणे पी नैं मतवाळे होई जांदे हन, ताहू तू घटिया किस्मा दिंदा ऐ; अपर तैं खरिया किस्मा दा अंगूरा दा रस अल्ली तिकर बचाई करी रखेया ऐ, 11 यीशुयें गलीले दे काना च अपनां एह पैहला चमत्कार दस्सी नैं अपनी जय जयकार करवाई कने तिसदेयां चेलेयां तिस पर वसुआस किता ।

12 इसदे बाद सैह कने तिसदी मां कने तिसदे भाऊ कने तिसदे चले कफरनहूम सैहरे जो गै कने तित्थु कुच्छ दिन रैह ।

यरुशलमे दे मंदरे ते वपारियां जो बाहर कडुणां

(मत्ती 21 : 12,13; मरकुस 11 : 15-17; लूका 19 : 45,46)

13 यहूदियां दा फसह दा तौआर नैडे था कने यीशु यरुशलमे जो गैआ । 14 तिन्हीं मंदरे च दांदा जो, भेडां कने कबूतरां बेचणे आळे वपारियां जो कने अडतिआं जो बैठेया दिख्या । 15 ताहू तिन्हीं रस्सियां दा कोड़ा बणाई नैं, सारियां भेडां कने दांदा जो मंदरे ते कड्डी दिता, कने अडतिआं दे पैसे रंगाडी दिते कने बैठणे आळे पटडेयां जो सद्दी दिते, 16 कने कबूतर बेचणे आळेयां नैं ग्लाय़ा, इन्हां जो ऐत्थु ते लैईआ । मेरे पिता दे घर जो वपारे दा घर मत बणां ।" 17 ताहू तिसदे चेलयां जो याद आई कि पवित्र शास्त्रे च लिख्या ऐ, तेरे घरे दी लगन मिन्जो खाई जांगी ।" 18 इसा गल्ल पर यहूदी तिस नैं ग्लाणां लग्गे, तू जेहड़ा एह करदा ऐ तां अहां जो कुण दैआ चमत्कार दस्सदा ऐ?" 19 यीशुयें तिन्हां जो जबाब दिता, "इस मंदरे जो ढाई दैआ, कने मैं इसियो त्रै दिनां च खरेडी दिगा" 20 यहूदियां ग्लाय़ा, "इस मंदरे जो बणाणेयो छत्ताली साल लग्गेयो हन, कने क्या तू इसियो त्रै दिनां च खरेडी सकदा ऐ?" 21 अपर तिन्हीं अपणे शरीरे (देही) दे मंदरे दे बारे च ग्लाय़ा था । 22 जाहू सैह मरी करी जिंदा होई गैआ तां तिसदेयां चेलेयां जो एह गल्ल याद आई कने तिन्हां तिस पवित्रशास्त्रे दे वचना कने यीशु मसीह दी ग्लाईयां गल्लां पर वसुआस किता ।

यीशु मसीह माणुआं दे मनां जो जाणदा ऐ

23 जाहू यीशु यरुशलमे च फसह दे तौआरे च था, तां मतेआं तिन्हां चमत्कारां जो जेहड़ा सैह दस्सदा था दिखी नैं तिसदे नांये पर वसुआस किता । 24 अपर यीशुयें अपणे आप्पे जो तिन्हां दे भरोसे पर नी छडेया, कजोकि सैह सबना जो जाणदा था । 25 कने तिसियो जरूरत नी थी कि माणु दे बारे च कोई गवाही दै, कजोकि सैह अप्पु ई जाणदा था कि माणु दे मने च क्या ऐ?"

यीशु मसीह कने निकुदेमुस

3 फरीसियां च नीकुदेमुस नांये दा इक्क माणु था, जेहड़ा यहूदियां दा सरदार था । 2 तिन्हीं राती यीशु अल्ल आई नैं ग्लाणां, "हे गुरु, अहां जाणदे हन कि तू परमात्मं दे पाससे ते गुरु होई नैं आया ऐ कजोकि कोई इन्हां चमत्कारां जो जेहड़ा तू दस्सदा ऐ, जे परमात्मां तिसदे सौगी नी होये तां नी दस्सी सकदा ।" 3 यीशुयें तिस जो जबाब दिता, "मैं तिजो नैं सच सच ग्लांदा, जे कोई नौये सिरे ते नी जम्मैं तां परमात्मं दा राजे जो नी दिखी सकदा ।" 4 निकुदेमुसे तिस नैं ग्लाय़ा, माणु जाहू स्याणां होई जांदा, तां किआं जन्म लैई सकदा? क्या सैह अपनी माऊ दे पेट च दूई बरी अंदर जाई नैं जन्म लैई सकदा ऐ । 5 यीशुयें जबाब दिता, मैं तिजो नैं सच सच ग्लांदा, जाहू तिकर कोई माणु पाणी कने आत्मां ते नी जम्मैं तां सैह परमात्मं दे राजे च प्रवेश नी करी सकदा । 6 कजोकि जेहड़ा शरीरे ते जम्मैया ऐ, सैह शरीर ऐ, कने जेहड़ा आत्मां ते जम्मैया ऐ, सैह आत्मां ऐ । 7 हैराण मत होये कि मैं तिजो नैं ग्लाय़ा, तिजो तांई नौये सिरे ते जन्म लैणां जरूरी ऐ । 8 हौआ

जित्थु चाहंदि ऐ तित्थु चलदी ऐ कने तू तिसदिया उआजा सुणदा ऐ, अपर नी जाणदा कि सैह कताह ते ओंदी ऐ कने कुत्थियो जांदी ऐ? जेहड़ा कोई आत्मां ते जम्मैया ऐ सैह ऐदेया ई ऐ।⁹ निकुदेमुसें तिसियो जबाब दिता, एह गलां किआं होई सकदियां हन।¹⁰ एह सुणी नै यीशुयें तिसियो ग्लया, तू इस्राएलियां दा गुरु होई नै भी क्या इन्हां गलां जो नी जाणदा?¹¹ मैं तिज्रो नै सच सच ग्लांदा कि अहां जेहड़ा जाणदे हन सैह ग्लांदे हन कने जिसियो अहां दिख्या तिसदी गवाही दिदें हन, कने तुहां म्हारी गवाही ग्रहण नी करदे।¹² जाहू मैं तुहां नै धरतिया दियां गलां ग्लाईयां कने तुहां वसुआस नी किता, तां जे मैं तुहां नै सुअर्गे दियां गलां ग्लां तां भिरी किआं वसुआस करगे?¹³ कोई सुअर्गे च नी गैआ, सिर्फ सैई जेहड़ा सुअर्गे ते आया, मतलब माणु दा पुत्तर जेहड़ा सुअर्गे च ऐ।¹⁴ कने जिस तरीके नै मूसें बणे च सरपे जो ऊचिया जगाह पर चढ़ाया, तिस तरीके नै जरूरी ऐ, कि माणुये दा पुत्तर भी उचिया जगाह पर चढ़ाया जां।¹⁵ तांकि जेहड़ा कोई तिस पर वसुआस करगा सैह सदा दी जिन्दगी पांगा।

¹⁶ कजोकि परमात्में इस संसारे नै इतणां प्यार किता कि तिन्हीं अपणां इकलौता पुत्तर देई दिता तांकि जेहड़ा कोई तिस पर वसुआस करगा सैह नाश नी हुगा पर सदा दी जिन्दगी पांगा।¹⁷ परमात्में अपणे पुत्तर जो संसारे च इसताई नी घल्लया कि संसारे पर सज्जा दा हुक्म दे, अपर इसताई कि संसार तिसदिया बजाह ते उद्धार पां।¹⁸ जेहड़ा तिस पर वसुआस करदा ऐ, तिस पर सज्जा दा हुक्म नी होदां, अपर जेहड़ा तिस पर वसुआस नी करदा, सैह गुनेगार ऐ; इसताई कि तिन्हीं परमात्में दे इकलौते पुत्तर दे नांये पर वसुआस नी किता।¹⁹ कने सज्जा दे हुक्मे दी बजाह ऐ कि जोती संसारे च आई, कने माणुआं जो नैहरा जोतिया ते जादा प्यारा लगा कजोकि तिन्हां दे कम्म बुरे थे।²⁰ कजोकि जेहड़ा कोई बुरा करदा ऐ, सैह जोतिया नै बैर रखदा ऐ, कने जोतिया बक्खे नी ओंदा कजोकि जोतिया च तिसदे कम्म सामणे आई जांदे हन।²¹ अपर जेहड़ा सच्चाईया पर चलदा ऐ, सैह जोतिया बक्खे ओंदा ऐ, तांकि तिसदे कम्म सामणे ओंन कजोकि सैह परमात्में दे पाससे ते कित्यो हन।

यीशु मसीह दे बारे च यूहन्ने दी गवाही

²² इसदे बाद यीशु कने तिसदे चले यहूदिया देशे च आये; कने सैह तित्थु तिन्हां सौगी रैई नै बपतिस्मा देणां लगा।²³ यूहन्ना भी शालेम दे बक्खे ऐनोन च बपतिस्मा दिंदा था, कजोकि तित्थु मता पाणी था, कने माणु आई नै बपतिस्मा लेंदे थे।²⁴ यूहन्ना तिस बत तिकर जेला च नी पाया था।²⁵ तित्थु यूहन्ना दे चेलयां दा कुसकी यहूदिये सौगी पवित्रता दे बारे च सुआल जबाब होया।²⁶ कने तिन्हां यूहन्ने अल्ल आई नै तिसियो ग्लया, हे गुरु, जेहड़ा माणु यदरन दरैयाए पार तिज्रो सौगी था, कने जिसदी तें गवाही दिती, दिखा, सैह बपतिस्मा दे दा ऐ, कने सारे तिस अल्ल ओआ दे हन।²⁷ यूहन्ने जबाब दिता, जाहू तिकर माणुये जो सुअर्गे ते नी दिता जां, ताहू तिकर सैह कुच्छ नी पाई सकदा।²⁸ तुहां तां अप्पु ई मेरे गवाह हन कि मैं ग्लया, मैं मसीह नी, अपर तिसदे गांह घल्लया।²⁹ जिसदी लाड़ी ऐ, सैह ई लाड़ा ऐ, अपर लाड़े दा जेहड़ा साथी सौगी खडूतेया तिसदी सुणदा ऐ, लाड़े दिया उआजा ते बड़ा खुश हुंदा ऐ" हुण मेरी एह खुशी पूरी होई ऐ।³⁰ जरूरी ऐ कि सैह बढे कने मैं घटे।³¹ जेहड़ा सुअर्गे ते ओंदा ऐ, सैह सबते म्हांन ऐ, जेहड़ा धरतिया ते ओंदा ऐ सैह धरतिया दा ऐ, कने धरतिया दियां गलां ग्लांदा ऐ: जेहड़ा सुअर्गे ते ओंदा ऐ, सैह सबना ते ऊपर ऐ।³² जेहड़ा कुच्छ तिन्हीं दिख्या कने सुणया ऐ, तिसदी गवाही दिंदा ऐ; कने कोई तिसदी गवाही ग्रहण नी करदा।³³ जिन्हीं तिसदी ग्लाईयां गलां पर वसुआस करी लैआ तिन्हीं इसा गलां पर छाप लगाई दिती कि परमात्मां सच्चा ऐ।³⁴ कजोकि जिसियो परमात्में घल्लया ऐ, सैह परमात्में दियां गलां ग्लांदा ऐ, कजोकि सैह आत्मां नापी नापी नै नी दिंदा।³⁵ पिता पुत्तरें नै प्यार रखदा ऐ, कने तिन्हीं सारियां चीज्जां तिसदे हत्थ च देई दिती।³⁶ जेहड़ा पुत्तरें पर वसुआस करदा ऐ, सदा दी जिन्दगी तिसदी ऐ; अपर जेहड़ा पुत्तरें दी नी मनदा, सैह जिन्दगिया जो नी दिखगा, अपर परमात्में दा गुस्सा तिस पर रेंहदा ऐ।"

यीशु मसीह कने सामरी जणां

4 भिरी जाहू प्रभु जो पता लगा कि फिरिसियां सुणया ऐ कि यीशु यूहन्ना ते जादा चले बणांदा कने तिन्हां जो बपतिस्मा दिंदा ऐ - 2 हलाकि यीशु अप्पु नी अपर तिसदे चले बपतिस्मा दिंदे थे।³ ताहू सैह यहूदिया जो छड्डी नै भिरी गलीले जो चली गैआ।⁴ कने तिस जो सामरिया च होई नै जाणां जरूरी था।⁵ इसताई सैह सूखार नांये दे सामरिया दे इक्की सैहरे तिकर आया, जेहड़ा तिसा जमीना अल्ल ऐ जिसियो याकूबे अपणे पुत्तर यूसुफे जो दित्या था।⁶ कने याकूबे दा खूअ भी तित्थु था। तां यीशु रस्ते च थकी नै तिस खूये पर इंया ई बैई गैआ। एह गल्ल दपेरा दे बगत होई।

⁷ इतणे च इक्क सामरी जणांसा पाणी भरणां आई। यीशुयें तिसायो ग्लया, मिन्जो पाणी पिया।⁸ कजोकि तिसदे चले तां सैहरे च खाणां मूले लैणां गैयो थे।⁹ तिन्ने सामरी जणांसा यीशु मसीह नै ग्लया, तू यहूदी सामरी जाणांसा ते पाणी कजो मंगा दा ऐ?" (कजोकि यहूदी सामरिया सौगी कोई भी बर्ताव नी रखदे।)¹⁰ यीशुयें जबाब दिता, जे तू परमात्में दे वरदाने जो जाणदी कने एह भी जाणदी कि सैह कुण ऐ जेहड़ा तिज्रो ग्लांदा ऐ, 'मिन्जो पाणी पिया,' तां तू तिसते मंगदी, कने सैह तिज्रो जिन्दगी दा पाणी दिंदा।¹¹ जणांसा तिसियो ग्लया, हे प्रभु तिज्रो अल्ल पाणी भरणे जो तां कुच्छ भी नीये, कने खूअ डुगा ऐ, तां सैह जीवने दा पाणी तिज्रो अल्ल कताह ते आया? ¹² क्या तू अहां दे बुड़े याकूबे ते बडा ऐ, जिन्हीं अहां जो एह खूअ दित्या; कने अप्पु ई अपणी ओलाद, कने अपणे डंगरा सौगी इसते पित्या?" ¹³ यीशुयें तिसा जो जबाब दिता, जेहड़ा कोई एह पाणी पींगा सैह भिरी प्यासा नी रेंहगा, ¹⁴ अपर जेहड़ा कोई तिस पाणियें च पींगा जेहड़ा मैं तिसियो दिंगा। सैह भिरी सदा काल तिकर प्यासा नी हुंगा; अपर जेहड़ा पाणी मैं तिसियो दिंगा, तिस च इक्क पाणिये दा खूअ बणी जांगा जेहड़ा सदा दी जिन्दगी ताई निकळदा रेंहगा।¹⁵ जणांसा तिसियो ग्लया हे प्रभु सैह पाणी मिन्जो दे तांजे मैं प्यासी ना होयें कने ना पाणी भरणे जो इतणी दूर ओयें।

¹⁶ यीशुयें तिसायो ग्लया, जा अपणे लाड़े जो ऐत्थियो सदी लैयो।¹⁷ जणांसा जबाब दिता, मैं बगैर लाड़ें ऐ। यीशुयें ग्लया तू ठीक ग्लांदि ऐ, मैं बगैर लाड़े ऐ।¹⁸ कजोकि तू पंज लाड़े करी चुकियो ऐ, कने जिस अल्ल तू हुण ऐ सैह भी तेरा लाड़ा नी। एह तें सच ग्लया।¹⁹ जणांसा तिसियो ग्लया, हे प्रभु मिन्जो लगदा ऐ कि तू भविष्यवक्ता ऐ।²⁰ अहां दे स्याणेयां इसी प्हाड़े पर आराधना किती, कने तुहां ग्लांदे हन कि सैह जगाह जित्थु आराधना करणां चाइदी यरुशलमे च ऐ।²¹ यीशुयें तिसायो ग्लया, हे नारी मेरी गलां दा वसुआस कर कि सैह बगत ओआ दा ऐ कि तुहां ना तां इस प्हाड़े पर पिता दी आराधना करी सकगे ना ई यरुशलमे च।²² तुहां जिसियो नी जाणदे, तिसदी आराधना करदे हन; कने अहां जिसियो जाणदे हन तिसदी आराधना करदे हन; कजोकि उद्धार यहूदियां दे बिचे ते ऐ।²³ अपर बगत ओआ दा ऐ, कने हुण भी ऐ, जिस च सच्चे भक्त पिता दी आराधना आत्मां कने सचाईया नै करगे, कजोकि पिता अपणे ताई ऐदेयो ई भक्तां जो तोपदा ऐ।²⁴ परमात्मां आत्मां ऐ, कने जरूरी ऐ कि तिसदी आराधना करणे आळे आत्मां कने सचाईया नै आराधना करन।²⁵ जणांसा तिसियो ग्लया, मैं जाणदी कि मसीह जिसियो ख्रिस्त भी ग्लांदे हन ओणे आळा ऐ; जाहू सैह ओंगा, तां अहां जो सारियां गलां दस्सी दिंगा।²⁶ यीशुयें तिसा नै ग्लया, मैं सैह ई ऐ जेहड़ा तिज्रो नै ग्ला करदा ऐ।"

चेलयां दी वापसी

²⁷ इतणे च तिसदे चले वापस आई गै, कने हैराण होणां लगे कि सैह इक्की जणांसा नै गलां करा दा ऐ, तमी कुसी जो भी पूछणे दी हिम्मत नी पैई, "तू क्या चाहंदा ऐ?" या "इसा नै कजो गलां करा करदा ऐ?"²⁸ ताहू जणांसा अपणे घड़े छड्डी नै सैहरे च चली गैई, कने लोकां नै गलाणां लग्गी,²⁹ ओआ, इक्की माणुये जो दिखा, जिन्हीं सारा कुच्छ जेहड़ा मैं कित्या मिन्जो दस्सी दिता। कुत्की ऐही तां मसीह नी ऐ?"³⁰ ताहू सैह सैहरे ते निकळी नै तिस अल्ल ओणा लगे।³¹ इस बीच तिसदे चेलयां यीशुये नै एह विणती किती, हे रब्बी कुच्छ खाई लै।³² अपर तिन्हीं अपणे चेलयां नै ग्लया, "मिन्जो अल्ल खाणे ताई देहया खाणां ऐ जिसियो तुहां नी जाणदे।"³³ ताहू चले अप्पु च गलाणां लगे, "क्या कुणकी इसियो खाणे ताई कुच्छ अंदेया?"³⁴ यीशुये

तिन्हां नें ग्लाय़ा, "मेरा खाणां एह ऐ कि अपणे घल्लणे आळे दी इच्छा दे मताबक चलें कने तिसदा कम्म पूरा करें। 35 क्या तुहां नी ग्लांदे, बडाईया बडणे जो अल्ली तिकर चौर मीहने पेयो हन?" दिखा, मैं तुहां नें ग्लांदा, अपनी अंखी चुकी नें खेतां पर नजर फेरा कि फसल बडणे पक्की होईयो ऐ। 36 फसला जो बडणे आळे जोदिहाडी मिलदी ऐ कने सदा दी जिन्दगिया तांई फळ पांदा ऐ, तांजे बाणेआळा कने बडणे आळा दोयो मिली नें मजा करन। 37 कजोकि ऐत्थू एह गल्ल ठीक बँहदी ऐ कि: 'बाणेआळा होर ऐ कने बडणे आळा होर।' 38 मैंई तुहां जो सँह खेतां दी फसल बडणे तांई घल्लया जिस च तुहां मेहनत नी किती: दूयां माणुआं मेहनत किती कने तुहां तिन्हां दिया मेहनता दे फळे च भागी होये।"

सामरियां दा वसुआस करणां

39 तिस सँहरे दे मते सामरी माणु तिसा जाणांसा दे ग्लाणे नें यीशु पर वसुआस किता, कजोकि तिन्ने एह गवाही दितियो थी: तिन्हीं सब कुच्छ जेहड़ा मैं कित्या, इन्हीं सब कुच्छ मिन्जो दस्सी दिता। 40 इसतांई जाहू एह सामरी तिस अल्ल आये, तां तिस नें विणती करणां लगे कि अहां दे सँहरे च रँह। कने सँह तिन्थु दो दिन तिकर रँहआ। 41 तिसदे वचने दिया बजाह ते होर मतेआं लोकां वसुआस किता। 42 कने तिसा जणांसा नें ग्लाय़ा, हुण अहां तेरे ग्लाणे पर ई वसुआस नी करदे; कजोकि अहां अप्पु ई सुणी लँआ, कने जाणदे हन कि ऐई सचमुच च संसारे दा उद्धार करणे आळा ऐ।"

43 भिरी तिन्हां दूँई दिना बाद सँह तिन्थु ते निकळी नें गलीलेयो चली गँआ। 44 कजोकि यीशुयें अप्पु ई गवाही दिती कि भविष्यवक्ता अपणे देशे च आदर मान नी पाई सकदा। 45 जाहू सँह गलीले च आया, तां गलीली माणुआं तिसदा सुआगत किता; कजोकि तिन्हां सब कुच्छ दिख्या था, जेहड़ा तिन्हीं यरुशलेमे च इक्क तौआरे दे दिने कित्तेया था, (कजोकि सँह सारे माणु भी इस तौआरे च शामिल थे।)

राजकर्मचारी दे जागते जो ठीक करणां

46 ताहू सँह भिरी गलीले दे काना सँहरे च आया जित्थु तिन्हीं पाणिये जो अंगूरा दा रस बणांया था। तिन्थु राजे दा इक्क मुलाजम था जिसदा जागत कफरनहूम सँहरे च बमार था। 47 सँह एह सुणी नें कि यीशु यहूदिया ते गलीले च आई गँआ, तिस अल्ल गँआ कने तिस नें विणती करणां लगा कि चली नें मेरे पुत्रे जो ठीक करी दे: कजोकि सँह मरणे आळा था। 48 यीशुयें तिस नें ग्लाय़ा, जाहू तिकर तुहां चमत्कार कने अदभुत कम्म नी दिखगे ताहू तिकर कदी भी वसुआस नी करणे। 49 राजे दे मुलाजम तिस नें ग्लाय़ा, हे प्रभु मेरे जागते दी मौत होणे ते पैहलें चल, 50 यीशुयें तिस नें ग्लाय़ा जा तेरा जागत जिंदा ऐ। 51 तिस माणुयें यीशु दी ग्लाईया गल्ला पर वसुआस किता कने चली गँआ। 52 सँह रस्ते च ई था कि तिसदे दास तिस नें आई मिले कने ग्लाणां लगे, तेरा जागत जिंदा ऐ। 53 तिन्हीं अपणे दासां ते ते पूछ्या, कुस बत सँह ठीक होणां लग्गा?" तिन्हां तिस नें ग्लाय़ा, कल सातमे घंटे च तिसदा बुखार उतरी गँआ था। 54 ताहलू तिस जागते दा बुड़ा जाणी गँआ कि एह तिसी बग्त ठीक होया जिस बग्त यीशुयें तिस नें ग्लाय़ा, तेरा जागत जिंदा ऐ," कने तिन्हीं कने तिसदे सारे परिवारें वसुआस किता। 54 एह दूआ चमत्कार था जेहड़ा यीशुयें यहूदिया ते गलीले च आई नें दस्सया।

ठतियां सालां दे बमार माणुये जो ठीक करणां

5 इन्हां गल्लां दे बाद यहूदियां च इक्क तौआर आया, कने यीशु यरुशलेमे जो गँआ। 2 यरुशलेमे च भेडा दे ओबरे दे दुआरे अल्ल इक्क तळाह था जिसियो इब्रानी बोलिया च बैतहसदा ग्लांदे हन; तिसदे पंज ओसारे हन। 3 इन्हां ओसारेयां च मते बमार, अन्ने, लंगड़े कने सूक्खे अंगा आळे [पाणी दे हिलने दी उम्मीदा च] रँहदे थे। 4 [कजोकि खास बगते पर परमात्में दे सुअर्गदूत तळाहे च लौई करी पाणिये जो हिलांदे थे। पाणियें हिलांदे ई जेहड़ा कोई पैहले लौंदा सँह खरा होई जांदा था चाहे तिसदी कोई भी बमारी कजो ना होयें।] 5 तिन्थु इक्क माणु था, जेहड़ा ठतियां सालां ते बमारिया च पैआ था। 6 यीशुयें तिसियो बमार दिखी नें कने एह जाणी नें कि सँह मतेआं दिना दा इसा हालता च पैआ ऐ, तिसते पूछ्या. क्या तू खरा होणां चाहंदा ऐ। 7 तिन्हीं बमारें तिसियो जबाब दिता, हे प्रभु मिन्जो अल्ल कोई माणु नीये कि

जाहू पाणी जो हिलांदे तां ताहू मिन्जो तळाये च लौआं; अपर मिन्जो पुज्रदे पुज्रदे दूआ मिन्जो ते पैहले लौई जांदा ऐ। 8 यीशुयें तिस नें ग्लाय़ा, उठ अपणे मंजोलूये चुक, कने चल फिर। 9 सँह माणु तालु ई ठीक होई गँआ, कने अपणे मंजोलूये चुकी नें चलणां फिरणां लग्गी पैआ।

10 सँह सब्त दा दिन था। इसतांई यहूदी तिस माणुये जेहड़ा ठीक होया था। ग्लाणां लगे, "अज्र तां सब्त दा दिन ऐ, तां तिज्रो मंजोलू चुकणां ठीक नीये। 11 तिन्हीं माणुये तिन्हां जो जबाब दिता, जिन्हीं मिन्जो ठीक किता, तिन्हीं मिन्जो ग्लाय़ा, अपणे मंजोलूये चुक, कने चल फिर। 12 तिन्हां यहूदियां तिस माणुये ते पूछ्या, सँह कुण माणु ऐ जिन्हीं तिज्रो ग्लाय़ा, मंजोलूये चुक कने चल फिर। 13 अपर जेहड़ा खरा होई गँआ था सँह नी जाणदा था कि कूणी ठीक किता ऐ कजोकि यीशु तिसा जगाह च भीड़ होणे दिया बजाह ते तिन्थु ते चली गँआ था। 14 इन्हा गल्लां होणे दे बाद सँह यीशु जो मंदरे च मिला। यीशुयें तिस नें ग्लाय़ा, दिख तू खरा होई गँआ ऐ: हुण भिरी ते पाप मत करदा इआं ना होयें कि हुण तू भारी मुसीबत च फंसी जा। 15 तिस माणुयें जाई करी यहूदियां नें ग्लाई दिता कि जिन्हीं मिन्जो ठीक कित्या सँह यीशु ऐ। 16 इसा बजाह ते यहूदी यीशु जो सताणां लगे, कजोकि सँह ऐदेय कम्म सब्त आळे दिने ई करदा था। 17 इसा गल्ला पर यीशुयें तिन्हां नें ग्लाय़ा, मेरा पिता अल्ली तिकर कम्म करदा ऐ, कने मैं भी कम्म करदा। 18 इस गल्ला दिया बजाह ते यहूदी माणु यीशु जो मारने दी होर भी जादा कोशस करणां लगे, कजोकि सँह ना सिर्फ सब्त दे दिन दी कानूने जो तोड़दा था, अपर परमात्में जो अपणां पिता ग्लाई नें अप्पु जो परमात्में बराबर बणांदा था।

जागते दा हक्क

19 इसा गल्ला पर यीशुयें तिन्हां नें ग्लाय़ा, मैं तुहां नें सच सच ग्लांदा, पुत्र अप्पु ते कुच्छ नी करी सकदा, सिर्फ तिन्हां कम्मां करी सकदा जेहड़ा सँह अपणे पिता जो करदे दिखदा ऐ। कजोकि जिन्हां जिन्हां कम्मा जो सँह करदा ऐ तिन्हांजो पुत्र भी तिसा रितिया नें करदा ऐ। 20 कजोकि पिता अपणे पुत्रे सौंगी प्यार रखदा ऐ कने जेहड़ा जेहड़ा कम्म सँह अप्पु करदा ऐ, अपणे पुत्रे जो दस्सदा ऐ; कने पुत्रें इस ते भी बडे बडे कम्म तिसियो करी नें दस्सणे तांकि तुहां हैराण होन। 21 जिआं पिता मरेयां जो दुआलदा कने जिंदा करदा ऐ, तिआ ई पुत्र भी तिन्हां जो चाहंदा ऐ जिन्हां जो जिंदा करदा ऐ। 22 पिता कुसी दा न्याय नी करदा, अपर न्याय करणे दा सारा कम्म पुत्रे जो सौंपी दित्या ऐ। 23 कि सारे लोक जिआं पिता दा आदर करदे हन तिआं ई पुत्रे दा भी आदर करन। जेहड़ा पुत्रे दा आदर नी करदा, सँह पिता दा जिन्हीं तिसियो घल्लया ऐ, आदर नी करदा। 24 मैं तिज्रो नें सच सच ग्लांदा, जेहड़ा मेरा वचन सुणी नें मेरे घल्लणे आळे पर वसुआस करदा ऐ, सदा दी जिन्दगी तिसदी ऐ; कने तिस पर सज्जा दा हुक्म नी होंदा, अपर मरने दे बाद भी जिन्दगी पाणी ऐ।

25 मैं तिज्रो नें सच सच ग्लांदा, सँह बग्त ओणे आळा ऐ, कने हुण भी ऐ, जिस च मरेयो माणु परमात्में दे पुत्रे दी उआजा सुणगे, कने जेहड़े सुणगे सँह जीगे। 26 कजोकि जिस तरीके नें परमात्मां अप्पु च जिन्दगी रखदा ऐ, तिसा रीतिया नें तिन्हीं पुत्रे जो भी जिन्दगी रखणे दा हक्क दित्या; 27 जे तिसियो न्याय करणे दा भी हक्क दित्या ऐ, कजोकि सँह माणुये दा पुत्र ऐ। 28 इन्हां गल्लां सुणी करी हैराण मत होआ; कजोकि सँह बग्त ओआ करदा ऐ कि जितणे कब्रा च हन सँह तिसदी उआज सुणी नें निकळी ओंगें। 29 जिन्हां खरे कम्म कित्यो तिन्हां दुवारा जिन्दगी पाणे तांई जिंदा होंगां, कने जिन्हां बुरे कम्म कित्यो तिन्हां सज्जा दी जिन्दगी पाणे तांई जिंदा होंगां।

यीशु मसीह दे बारे च गवाही

30 मैं अप्पु ते कुच्छ नी करी सकदा; जिआं सुणदा, तिआं ई न्याय करदा; कने मेरा न्याय सच्चा हुंदा ऐ, कजोकि मैं अपनी इच्छा नी अपर अपणे घल्लणे आळे दी इच्छा चाहंदा। 31 जे मैं अप्पु ई अपणे बारे च गवाही दें तां मेरी गवाही सच्ची नी होणी। 32 मेरे बारे च गवाही देंणे आळा होर ऐ, कने मैं जाणदा कि जेहड़ी गवाही सँह मेरे बारे दिंदा ऐ, सँह सच्ची ऐ। 33 तुहां यूहन्ना ते पछाया कने तिन्हीं सच्च दी गवाही दिती ऐ। 34 अपर मैं अपणे बारे च माणु दी गवाही नी चाहंदा; अपर मैं एह गल्लां इसतांई ग्लांदा कि तुहां उद्धार पान। 35 सँह तां बळदा कने चमकदा दित्या था, कने तुहां जो थोड़ी देर तिकर तिसदी

जोतिया च मगन होणां खरा लम्गा । 36 अपर मिन्जो अल्ल जेहडी गवाही ऐ सैह यूहन्ना दी गवाहिया ते बडी ऐ; कजोकि जेहडा कम्म पितें मिन्जो पूरा करणे दी जिम्मेवारी दित्तियो मतलब तिन्हां कम्मां जो मैं करता ऐ, सैह कम्म ई मेरे गवाह हन कि मिन्जो मेरे पितें घल्लया ऐ । 37 कने पिता जिन्हीं मिन्जो घल्लया ऐ, तिन्हीं मेरी गवाही दित्ती ऐ । तुहां ना कदी तिसदी उआज सुणी, कने ना तिसदा रूप दिख्या । 38 कने तुहां तिसदेयां वचना जो नी मनदे, कजोकि जिन्हीं तिसियो घल्लया तुहां तिसदा वसुआस नी करदे । 39 तुहां पवित्रशास्त्रे च तोपदे हन कने सोचदे हन कि तिस च सदा दी जिन्दगी तिस च ई ऐ, कने एह पवित्रशास्त्र ई मेरे बारे च गवाही दिंदा ऐ । 40 भिरी भी तुहां जिन्दगी पाणे तांई मिन्जो अल्ल औणा नी चाहंदे । 41 मैं माणुआं ते आदर नी चाहंदा । 42 अपर मैं तुहां जो जाणवा कि तुहां च परमात्में दा प्यार नीये । 43 मैं अपणे पिता दे नांये ते आया, कने तुहां मिन्जो नी अपनादे; जे होर कोई अपणे नांये ते ओंये, तां तिसियो तुहां अपनाई लैणां । 44 तुहां किआं वसुआस करी सकदे अपर तुहां जेहडे इक्की द्ये ते आदर चाहंदे हन कने सैह आदर जेहडा सिर्फ इक्क सच्चा परमात्मां ऐ तिसते नी पाणां चाहंदे । 45 एह मत सोचा कि मैं परमात्में दे सामणे तुहां पर दोष लगाणां; तुहां पर दोष लगाणे आळा तां मूसा ऐ जिस पर तुहां आस रखियो ऐ । 46 कजोकि जे तुहां मूसा दा वसुआस करदे, तां मेरा भी वसुआस करदे, इसतांई कि तिन्हीं मेरे बारे च लिख्या ऐ । 47 अपर तुहां तिसदियां लिखेयां लेखा पर वसुआस नी करदे, तां मेरेयां वचना पर किआं वसुआस करणे?"

पंज हजार माणुआं जो खुआणां

(मत्ती 14 : 13-21; मरकुस 6 : 30-44; लूका 9 : 10-17)

6 इन्हां गल्लां दे बाद यीशु गलीले दिया इक्की झीला तिबिरियास झीला दे पारले पास्सेयो चली गैआ । 2 कने माणुआं दी इक्क बडी बडी भीड़ तिसदे पचाह चलयो थी कजोकि जेहडे चमत्कार दे कम्म सैह बमारां पर करदा था सैह तिन्हां जो दिखदे थे । 3 ताहू यीशु प्हाडे पर गौई करी अपणे चेलयां सौगी तित्थु बैई गैआ । 4 यहूदियां दे फसह दा तौआर नैडे था । 5 जाहू यीशुयें अपणी नजर चुकीं नैं इक्क बडिया भीड़ा जो अपणे अल्ल ओदें दिख्या, तां फिलिप्पुसें ग्लया, अहां इन्हां जो खाणे तांई कताह ते रोटी खरीदी नैं लेयोन?" 6 तिन्हीं एह गल्ल तिसियो परखणे तांई ग्लाइ, कजोकि तिसियो पता था कि तिन्हीं क्या करणां । 7 फिलिप्पुसें तिस जो जबाब दित्ता, दू दीनारां दियां रोटियां भी तिन्हां तांई पूरियां नी होणियां कि तिन्हां सबना जो थोडी थोडी मिली जां । 8 तिसदे चेलयां च शमौन पतरसे दे भाऊयें अन्द्रियासें यीशु नैं ग्लया, 9 ऐत्थू इक्क मूंडा ऐ जिस अल्ल जौआं दियां पंज रोटियां कने दो मछियां हन; अपर इतणे भरी लोकां तांई सैह क्या हन?" 10 यीशुयें ग्लया, लोकां बैठाली दैआ । 11 तिसा जगाह बड़ा भरी घाह था; कने लगभग पंज हजार मरद तित्थु बैई गै । 11 ताहू यीशुयें सैह पंज रोटियां लैईयां, कने परमात्में दा धन्यवाद करी नैं बैठणे आळेयां जो बंडी दित्तियां; कने तिआं ई मछियां भी जितणियां सैह चाहंदे थे बंडी दित्तियां । 12 जाहू सैह खाई नैं रज्जी गै तां तिन्हीं अपणे चेलयां नैं ग्लया, बचेयो टुकडेयां बटौली लैआ तांकि कुच्छ भी बर्वाद नी होयें । 13 तां तिन्हां बटीणे कने जौआं दियां पंज रोटियां दे टुकडेयां जो जेहडे खाणे आळेयां ते बाद भी बचेयो रोटियां दे बारा टोकरु भरें । 14 जाहू जेहडा कम्म तिन्हीं करी नैं दस्सया तिसियो सैह माणु दिखी नैं ग्लयां लगे, "पक्का एह सैह ई भाविष्यवाणी करणे आळा ऐ जेहडा संसारे च ओणे आळा था ।"

15 भिरी यीशु जो पता लम्गी गैआ कि सैह मिन्जो राजा बनाणे तांई पकडुआणां चाहंदे हन, भिरी प्हाडे पर किल्ला चली गैआ ।

यीशु मसीह दा पाणिये ऊपर चलणां

(मत्ती 14 : 22-33; मरकुस 6 : 45-52)

16 जाहू संज होई, तां तिसदे चले झीला कंडे गै । 17 कने कफरनूह सैहरे जो जाणे तांई तिसदे चले किस्तिया पर चढी नैं झीला पार करणां लगे । तिस बरत नैहरा होई गैआ था, कने यीशु अल्ली तिकर तिन्हां अल्ल नी आया था । 18 ताहू ई तेज तफाने दिया बजाह ते झीला च लेहरां चलणां लगियां पैईआं । 19 जाहू सैह किस्तिया चलाई नैं लगभग तीन चार मील गांह निकळी गै तां तिन्हां यीशु जो झीला पर चलदे कने किस्तिया नैडें ओदें दिख्या कने डरी गै । 20 अपर तिन्हीं तिन्हां नैं ग्लया, मैं ऐ उरा मत । 21 ताहू सैह

किस्तिया पर चढाई लैआ कने झटपट किस्ती तिसा जगाह पर पुज्जाई दित्ती जित्थू सैह चलेयो थे ।

लोकां दा यीशु मसीह जो तोपणां

22 द्ये दिने तिसा भीड़ा, जेहडी भीड़ झीला पार खडूतियो थी, एह दिख्या कि ऐत्थू इक्की जो छड्डी होर कोई किस्ती नी ऐ; कने यीशु अपणे चेलयां सौगी तिसा किस्तिया पर नी चढया था, अपर सिर्फ तिसदे चले किस्तिया च गैयो हन । 23 ताहू होर किस्तियां तिबिरियासे ते तिसा जगाह दे नैडे आईआं, जित्थू तिन्हां प्रभु दे धन्यावाद करणे दे बाद रोटी खादी थी । 24 इसतांई जाहू भीड़ा दिख्या कि ऐत्थू ना यीशु ऐ कने ना तिसदे चले, तां सैह भी किस्तियां पर चढी नैं यीशु जो तोपदे तोपदे कफरनहूम सैहरे च आई पुजे ।

यीशु मसीह जिन्दगिया दी रोटी

25 जाहू तिन्हां यीशु जो झीला दे इस पार दिख्या, तां तिस नैं ग्लया, हे गुरु तू ऐत्थू काहू आया?" 26 यीशुयें तिन्हां जो जबाब दित्ता, मैं तुहां नैं सच सच ग्लांदा ऐ, तुहां मिन्जो इसतांई नी तोपा दे हन कि तुहां चमत्कार दिख्या, अपर इसा गल्ला तांई कि तुहां रोटियां खादी कने रज्जी गै । 27 इस खाणे तांई मेहणत मत करा जेहडा खत्म होई जाणां, अपर तिस खाणे तांई मेहणत करा जेहडा सदा दी जिन्दगिया तिकर बणी रैहणां ऐ, जिसियो माणु दा पुत्तर तुहां जो दिंदा; कजोकि पिता मतलब परमात्में तिस पर मोहर लगाईयो ऐ । 28 तिन्हां यीशु नैं ग्लया, परमात्में दे कम्मां करणे तांई अहां क्या करन?" 29 यीशुयें तिन्हां जो जबाब दित्ता परमात्में दा कम्म एह ऐ कि जिसियो तिन्हीं घल्लया ऐ, तुहां तिस पर वसुआस करा । 30 ताहू तिन्हां यीशु नैं ग्लया, भिरी तू कुण देहया चमत्कार दरस्सदा कि अहां तिसियो दिखी नैं तेरा वसुआस करन? तू कुण देहया कम्म दरस्सदा ऐ? 31 अहां दे स्याणेयां बणे च मना खादा: जिआं लिख्या ऐ, तिन्हीं तिन्हां जो खाणे तांई सुअर्गें ते रोटी दित्ती । 32 यीशुयें तिन्हां नैं ग्लया, मैं तुहां नैं सच सच ग्लांदा ऐ कि मूसें तुहां जो सैह रोटी सुअर्गें ते नी दित्ती, अपर मेरा पिता तुहां जो सच्ची रोटी सुअर्गें ते दिंदा ऐ । 33 कजोकि परमात्में दी रोटी सैई ऐ जेहडी सुअर्गें ते लौई करी संसारे जो जिन्दगी दिंदी ऐ । 34 ताहू तिन्हां तिस नैं ग्लया, हे प्रभु एह रोटी अहां जो हमेशा दैआ कर ।"

35 यीशुयें तिन्हां ग्लया, जिन्दगी दी रोटी मैं ऐ : जेहडा मिन्जो अल्ल ओंदा ऐ सैह कदी भूखा नी रैहगा, कने जेहडा मिन्जो पर वसुआस करदा ऐ सैह कदी प्यासा नी हुंगा । 36 अपर मैं तुहां नैं ग्लया था कि तुहां मिन्जो दिखी भी लैआ ऐ भिरी भी वसुआस नी करदे । 37 जेहडा कुच्छ पिता मिन्जो दिंदा ऐ सैह सब मिन्जो अल्ल ओंगा, कने जेहडा कोई मिन्जो अल्ल ओंगा तिसियो मैं कदी नी कडगा । 38 कजोकि मैं अपणी इच्छा नी अपर अपणे घल्लणे आळे दी इच्छा पूरी करणे तांई सुअर्गें ते लुत्थेया । 39 कने मिन्जो घल्लणे आळे दी इच्छा एह ऐ कि जेहडा कुच्छ तिन्हीं मिन्जो दित्ता ऐ, तिसते मैं कुच्छ नी गुआं, अपर तिसियो आखरी दिने भिरी जिंदा करें । 40 कजोकि मेरे पिता दी इच्छा एह ऐ कि जेहडा कोई पुत्तरे जो दिखगा कने तिस पर वसुआस करगा, सैह सदा दी जिन्दगी पां; कने मैं तिसियो आखरी दिने भिरी जिंदा करगा ।"

41 एह सुणी करी यहूदी तिस पर कुडकुड़ाणां लगे कजोकि तिन्हीं ग्लया था, जेहडी रोटी सुअर्गें ते लुत्थियो सैह मैं ऐ । 42 कने तिन्हां ग्लया, क्या एह यूसुफे दा जागत यीशु नी, जिसदे माऊ बुडे जो अहां जाणंदे हन? तां हुण एह किआं ग्ला दा ऐ कि मैं सुअर्गें ते लुत्थेया । 43 यीशुयें तिन्हां जो जबाब दित्ता, अप्पु च मत कुडकुड़ाआ । 44 मिन्जो अल्ल मेरे पिता दी इच्छा बगैर कोई नी आई सकदा, जिन्हीं मिन्जो घल्लया ऐ, जाहू पिता तिसियो खींजी नी लें; कने मैं तिसियो आखरी दिने भिरी जिंदा करगा । 45 भविष्यवक्तां दे लेख्रां च एह लिख्या ऐ; सैह सारे परमात्में दे पास्से ते सखाएयो होणे । जिन्हीं कुणी भी पिता ते सुणया कने सिखया ऐ, सैह मिन्जो अल्ल ओणां ऐ । 46 एह गल्ल नीये कि कुणकि पिता जो दिख्या ऐ, अपर जेहडा परमात्में दे पास्से ते ऐ, सिर्फ तिन्हीं पिता जो दिख्या ऐ । 47 मैं तुहां नैं सच सच ग्लांदा कि जेहडा कोई वसुआस करदा ऐ, सदा दी जिन्दगी तिस दी ऐ । 48 जिन्दगी दी रोटी मैं ऐ । 49 तुहां देयां स्याणेयां बणे च मना खादा कने मरी गै । 50 एह सैह रोटी ऐ जेहडी सुअर्गें ते लौंदी ऐ तांकि माणु तिस ते खान कने नी मरन । 51 जिन्दगी दी रोटी जेहडी सुअर्गें ते लुत्थियो, सैह मैं ऐ । जे कोई इसा

रोटिया च खां, तां सैह हर रोज जिंदा रँह्या; कने जेहड़ी रोटी में संसारे दिया जिन्दगिया ताई दैणी, सैह मेरा मांस ऐ।

52 इसा गला पर यहूदी एह ग्लाई नँ अप्पु च कुडकुड़ाणां लगे, एह माणु किआं अहां जो अपणां मांस खाणे जो दैई सकदा ऐ?" 53 यीशुयें तिन्हां नँ ग्लाय्या में तुहां नँ सच सच ग्लांदा कि जाहू तिकर तुहां माणु दे पुत्तरे दा मांस नी खान, कने तिसदा खून नी पीन, ताहू तिकर तुहां च जिन्दगी नी। 54 जेहड़ा मेरा मांस खांदा कने मेरा खून पींदा ऐ, सदा दी जिन्दगी तिस दी ऐ; कने में तिसियो आखरी दिने च भिरी जिंदा करगा। 55 कजोकि मेरा मांस तां सच्चा खाणां ऐ, कने मेरा खून सच्ची च पीणे दी चीज ऐ। 56 जेहड़ा मेरा मांस खांदा कने मेरा खून पींदा ऐ सैह मिन्जो च बणी रँहदा ऐ कने में तिस च। 57 जिआं जिदे पिते मिन्जो घल्लया, कने में पिता दिया बजाह ते जिंदा ऐ, तिआं ई सैह भी जेहड़ा मिन्जो खांगा मेरिया बजाह ते जिंदा रँह्या। 58 जेहड़ी रोटी सुअर्गे ते लुत्थियो ऐही ऐ, तिसा रोटिया साइआं नी जेहड़ी स्याणेयां खादी कने मरी गे; जेहड़ा कोई एह रोटी खांगा, सैह हमेशा जिंदा रँह्या। 59 तिन्हीं एह सब गलां कफरनहूम सैहरे दे इक्की आराधनालय च शिक्षा दिंदे बत ग्लाईयां।

सदा दी जिन्दगिया दे वचन

60 तिसदे चेलयां च मतेआं एह सुणी नँ ग्लाय्या, एह सख्त बोल ऐ; इसियो कुण सुणी सकदा ऐ?" 61 यीशुयें अपणे मने च एह जाणी लैआ कि मेरे चले अप्पु च इसा गला पर कुडकुड़ादे हन, तिन्हां ते पूछया, क्या इसा गला ते तुहां जो ठोकर लगदी ऐ? 62 जे तुहां जो माणु दे पुत्तरे जो तित्थु उपरयो जांदे दिखगे, जित्थु सैह पैहले था, तां क्या हुंगा? 63 आत्मां ई ऐ जेहड़ी जिन्दगी दैणे आळी (जीवनदायक) ऐ, शरीरे ते कुच्छ भी फायदा नीये; जेहड़े वचन में तुहां नँ ग्लाये सैह आत्मां ऐ, कने जिन्दगी भी हन। 64 अपर तुहां च कुच्छ देहय भी हन जेहड़े वसुआस नी करदे। "कजोकि यीशु शुरु ते जाणदा था कि वसुआस नी करणे आळे कुण हन, कने सैह कुण ऐ; कने कुणी मिन्जो पकडुआणा। 65 कने यीशुयें ग्लाय्या, इसताई में तुहां नँ ग्लाय्या था कि कोई मिन्जो अल्ल ताहू टिकर नी आई सकदा, जाहू तिकर तिसियो पिता दे पास्से ते एह वरदान नी दित्ता जां।"

पतरसे दा वसुआस

66 इसा गला दा परणांम एहह होया कि तिसदे मते चले उल्टे पैरें पचाह हटी गे कने भिरी तिस सौगी नी चले। 67 ताहू यीशुयें तिन्हां बारां चेलयां नँ ग्लाय्या, क्या तुहां भी चली जाणां चाहंदे हन?" 68 शमौन पतरसें तिस जो जबाब दित्ता, "हे प्रभु अहां कुस अल्ल जान? सदा दी जिन्दगियां दे वचन तां तिजो अल्ल हन। 69 कने अहां वसुआस कित्ता कने जाणी गैयो हन कि परमात्मं दा पवित्र माणु तू ई ऐ।" 70 यीशुयें तिन्हां जो जबाब दित्ता, क्या मैं अप्पु ई तुहां बारां जणेयां जो नी चुणेया? भिरी भी तुहां च इक्क माणु सैतान ऐ। 71 एह तिन्हीं शमौन इस्करियोती दे जागते यहूदा दे बारे च ग्लाय्या था, कजोकि तिन्हां बारां च इक्क सैह ई तिसियो पकडुआणे आळा था।

यीशु मसीह कने तिसदे भाऊ

7 इन्हां गलां होणे ते बाद यीशु गलीले च घूमदा फिरदा रँह्या, कजोकि यहूदी तिसियो मारणे दा कोशस करा दे थे, इसताई सैह यहूदिया च घूमणा नी चाहंदा था। 2 यहूदियां दा इक्क झोपड़ियां दा तौआर नैडु था। 3 इसताई तिसदे भाऊयां तिस नँ ग्लाय्या, "ऐत्थू ते यहूदिया जो चली जा, कि जेहड़ा कम्म तू करदा ऐ तिन्हां जो तेरे चले तित्थु भी दिखी सकन। 4 कजोकि ऐसा कोई नीये जेहड़ा मशूर होणां चां, कने लुकी नँ कम्म करे। जे तू एह कम्म करदा ऐ, तां अपणे आप्पे जो संसारे सामणे प्रकट कर। 5 कजोकि तिसदे भाऊ भी तिस पर वसुआस नी करदे थे। 6 ताहू यीशुयें तिन्हां नँ ग्लाय्या, मेरा अल्ली तिकर बत नी आया, अपर तुहां ताई हर बत ठीक ऐ। 7 संसार तुहां नँ बैर नी करी सकदा, अपर सैह मिन्जो नँ बैर करदा ऐ कजोकि मैं तिसदे बारे च इसा गला दी गवाही दिंदा कि तिसदे कम्म बुरे हन। 8 तुहां ई तिस तौआरे जो जा; मैं हुण इस तौआरे च नी जांगा, कजोकि मेरा पूरी तराह बत अल्ली तिकर नी आया।" 9 सैह तिन्हां नँ एह गलां ग्लाई नँ गलीले च ई रूकी गैआ।

झोपड़ियां दे तौआरे च यीशु मसीह

10 अपर जाहू तिसदे भाऊ तौआरे जो चली गै तां सैह भी तिस तौआरे जो गैआ अपर चोरी छिपी नँ गैआ। 11 यहूदी तौआरे च तिसियो एह ग्लाई नँ तोपणां लगे, सैह कुत्थू ऐ?" 12 कने लोकां बिच तिसदे बारे च खुशर फुशर साइआं मतिआं गलां होईयां : कुच्छ ग्लांदा थे, सैह भला माणु ऐ।" कने कुच्छ ग्लांदा थे, नी सैह लोकां जो ठगदा ऐ। 13 भिरी भी यहूदियां दे डरे दे मारे कोई माणु तिसदे बारे च खुली नँ नी ग्लांदा था।

तौआरे च यीशु मसीह दा उपदेश

14 अपर जाहू तौआरे दा आधा दिन बीती गैआ, तां यीशु मंदरे च जाई नँ शिक्षा दैणां लग्गा। 15 ताहू यहूदी हैरान होई नँ ग्लाणां लगे, इसियो बगैर पढे ज्ञान कताह ते आई गैआ?" 16 यीशुयें तिन्हां जो जबाब दित्ता, मेरी शिक्षा मेरी नी, अपर मेरे घल्लणे आळे दी ऐ। 17 जे कोई माणु तिसदिया इच्छा पर चलणां चां, तां सैह ई इसा शिक्षा दे बारे च जाणी सकदा ऐ कि एह परमात्मं दे पास्से ते ऐ या मैं अपणियां तरफा ते ग्लांदा ऐ। 18 जेहड़ा अपणिया तरफा ते कुच्छ ग्लांदा ऐ, सैह अपणी बाह बाह चाहंदा ऐ; अपर जेहड़ा अपणे घल्लणे आळे दी बाह बाह चाहंदा ऐ सैई सच्चा ऐ, कने तिस च बुरे कम्म नी। 19 क्या मूसें तुहां ताई नियम नी बणायेयो? कने तुहां भिरी भी तिन्हां नियमा पर नी चलदे। तुहां कजो मिन्जो मारणां चाहंदे हन?" 20 माणुआं यीशु जो जबाब दित्ता, "तिजो च दुष्टआत्मां ऐ! कुण तिजो मारणां चाहंदा ऐ। 21 यीशुयें तिन्हां जो जबाब दित्ता, मैं इक्क कम्म कित्ता, कने तुहां सारे हैराण होंदे हन। 22 इसा बजाह ते मूसें तुहां जो खतणे दा हुक्म दित्ता ऐ (एह नी कि सैह मूसा दे पास्से ते ऐ अपर स्याणेयां ते चली आया ऐ,) कने तुहां सब्त दे दिन माणु दा खतणां करदे हन। 23 जाहू सब्त दे दिन माणु दा खतणां इसताई कित्ता जांदा ऐ कि मूसा दे नियम दा उल्लघन नी होये, तां तुहां मिन्जो पर इसताई जल्लन करा करदे हन कि मैं सब्त दे दिन इक्की माणुये जो पूरिया रीतिया नँ ठीक कित्ता। 24 मुं दिख्ता न्याय मत करा। अपर ठीक ठाक न्याय करा।"

क्या यीशु ई मसीह ऐ?

25 ताहू यरूशलेमें दे कुच्छ माणु ग्लाणां लगे, क्या एह सैई माणु नीये जिसियो मारणे दी कोशस करा करदे हन। 26 अपर दिख्ता, सैह तां खुल्लमुखला गलां करा करदा ऐ कने कोई तिसियो कुच्छ नी ग्ला करदे हन क्या सच च अधिकारियां जो पता लग्गी लैआ ऐ कि ऐही मसीह ऐ?" 27 कुच्छ भी होये, अपर अहां तां इसियो जाणदे हन कि एह कुत्थू दा ऐ; अपर मसीह जाहू आंगा तां कुसियो पता नी लगणां कि सैह कुत्थू दा ऐ। 28 ताहू यीशुयें मंदरे च शिक्षा दिंदे दिंदे जोरे नँ ग्लाय्या, तुहां मिन्जो जाणदे हन, कने एह भी जाणदे हन कि मैं कुत्थू दा ऐ। मैं तां अप्पु ते नी आया, अपर मेरा घल्लणे आळा सच्चा ऐ, तिसियो तुहां नी जाणदे। 29 मैं तिसियो जाणदा कजोकि मैं तिसदे पास्से ते ऐ कने तिन्हीं मिन्जो घल्लया ऐ। 30 इसा गला पर तिन्हां तिसियो पकडणां चाया, तमी कुसियो भी तिस पर हत्थ नी पाणे दी हिम्मत नी होई कजोकि तिसदा बत अल्ली तिकर नी आया था। 31 भिरी भी भीड़ा च मतेआं माणुआं तिस पर वसुआस कित्ता, कने ग्लाणां लगे, "मसीह जाहू आंगा तां क्या इसते जादा चमत्कार दस्सगा जेहड़े इन्हीं दस्से?"

यीशु मसीह जो पकडणे दी कोशस

32 फरीसियां लोकां जो तिसदे बारे च लुक्की छुपी करी एह गलां करदे सुणया; कने प्रधान याजकां कने फरीसियां तिसियो पकडणे जो सपाई घल्ले। 33 इस गला पर यीशुयें ग्लाय्या, मैं थोड़ी देर तिकर होर तुहां सौगी ऐ, ताहू अपणे घल्लणे आळे चली जाणां। 34 तुहां मिन्जो तोपणां, अपर नी मिलणां; कने जित्थू मैं होणां, तित्थु तुहां नी आई सकदे।" 35 इस गला सुणी नँ यहूदी अप्पु च ग्लाणां लगे, इन्हीं कुत्थू जाणां कि अहां जो दुआरी नी मिलणां? क्या सैह तिन्हां अल्ल जांगा जेहड़ा यूनानियां च तां तु होई नँ रँहदे हन, कने यूनानियां जो भी शिक्षा दिंगा? 36 एह क्या गल्ल ऐ जेहड़ी तिन्हीं ग्लाई, कि तुहां मिन्जो तोपणां, अपर नी मिलणां; कने जित्थू मैं होणां तित्थु तुहां नी आई सकदे?"

जिन्दगी - पाणी दी नदियां

37 तौआरे दे मुकदे दिने, जेहड़ा खास दिन था, यीशु खडौई गैआ कने जोरे नैं ग्लाणां लग्गा, जे कोई प्यासा होयें तां मिन्जो अल्ल ओयें कने पीयें ।
 38 जेहड़ा मिन्जो पर वसुआस करगा, जिआं पवित्रशास्त्र च ऐ, तिसदे दिले च जिन्दगिया दे पाणी दियां नदियां चली पोणियां । 39 तिन्हीं एह वचन पवित्र आत्मां दे बारे च ग्लाय, जेहड़ी वसुआस करणे आळे जो मिलणे आळी थी; कजोकि आत्मां अली तिकर नी लुत्थेया था, कजोकि यीशु भी अली तिकर अपनी महिमा तिकर नी पुज्या था ।
 40 ताहू भीड़ा ते कुच्छना लोकां एह गल्लां सुणी नैं ग्लाय, सचमुची ऐही सैह भविष्यवाणी करणे आळा ऐ । 41 होर माणु ग्लाणां लगे, एह मसीह ऐ । अपर कुच्छना ग्लाय, "कजो? क्या मसीह गलीले ते ओंगा?" 42 क्या पवित्रशास्त्र च एह नी लिख्या कि मसीह दाऊदे दे वंशे ते कने बैतलहम प्रांये ते ओंगा, जित्थू दाऊद रँहदा था । 43 जे तिसदिया बजाह ते माणुआं च बैर पैआ । 44 तिन्हां माणुआं च कुच्छ तिसियो पकड़णां चाहंदे थे, अपर कुसी जो भी तिस पर हत्थ पाणे दी हिम्मत नी होई ।

यहूदी अगुआं दा वेवसुआस

45 ताहू सपाई प्रधान याजकां कने फरीसियां अल्ल वापस आये; प्रधान याजकां कने फरिसियां सपाईयां नैं ग्लाय तुहां तिसियो कजो नी लैई करी आये?" 46 सपाईयां जबाब दित्ता, कुसी भी माणुये कदी भी ऐदियां गल्लां नी कित्तियां । 47 फरीसियां तिन्हां जो जबाब दित्ता, क्या तुहां भी भकाइते हन । 48 क्या अधिकारियां च या फरीसियां च कुणी भी तिस पर वसुआस कित्ता ऐ । 49 अपर एह माणु जेहड़े नियमा नी जाणंदे, सराफित हन । 50 नीकुदेमुसें, जेहड़ा तिस अल्ल पैहलें आया था कने तिन्हां च इक्क था, तिन्हां नैं ग्लाणां लग्गा, 51 "क्या अहां दे नियम कुसी माणुये जो, जाहू तिकर पैहले तिसदी सुणी नैं जाणी नी लैन कि सैह क्या करदा ऐ, दोषी ठहरांदी ऐ? 52 तिन्हां तिसियो जबाब दित्ता, क्या तू भी गलीले दा ऐ? तोप कने दिख कि गलील च कोई भविष्यवाणी करणे आळा प्रकट नी होणां ।"
 53 ताहू हर कोई अपने अपने घरेयो चली गै ।

व्यभिचारिणियां जो माफी

8 अपर यीशु जैतून दे पहाडे जो गैआ । 2 भ्यागा सैह भिरी मंदरे जो आया, सारे माणु तिस अल्ल आये कने सैह बैई नैं तिन्हां जो शिक्षा देंगां लग्गा । 3 ताहू शास्त्री कने फरीसी इक्की जणांसा जो पकड़ी लैई करी आये जेहड़ी व्यभिचारे करदे पकड़ियो थी । कने तिसा जो गभे खरेडी नैं यीशुये नैं ग्लाय । 4 हे गुरु एह जणांस व्यभिचार करदी पकड़ियो ऐ । 5 मूसा दे नियमे च अहां जो हुक्म दित्या ऐ कि ऐदियां जणांसा जो पत्थर मारी मारी मकाई दैआ । तू इसा जणांसा दे बारे च क्या ग्लांदा ऐ । 6 तिन्हां तिसियो परखणे ताई एह गल्ल ग्लाई तांकि तिस पर इल्जाम लगाणे ताई कोई मौका मिली जा । अपर यीशु निष्ठा होई नैं उंगलिया नैं धरती पर लिखणांलग्गा । 7 जाहू सैह तिसते पुछादे ई थे, तां तिन्हीं सीधे होई नैं तिन्हां जो जबाब दित्ता, "तुहां च जिन्हीं पाप नी कित्या (निष्पाप), सैई पैहले इसा जो पत्थर मारें ।" 8 कने सैह भिरी निष्ठा होई नैं उंगलिया नैं धरती पर लिखणां लग्गा । 9 अपर सैह इसा गल्ला सुणी नैं बडेयां ते लैई नैं लोक्केयां तिकर, इक्क इक्क करी नैं तित्थु ते चली गै कने यीशु किल्ला रँई गैआ, कने जणांस भी तित्थु गभे खडौंतियो रँई गैई । 10 यीशुये सीधे होई नैं तिसाते पुछ्या, हे नारी, सैह कतांह गै? क्या कुणी भी तिजो सज्जा दा हुक्म नी दित्ता?" 11 तिन्हीं ग्लाय, हे प्रभु कुणी भी नी ।" यीशुये ग्लाय, मैं भी तिजो सज्जा दा हुक्म नी दिंदा; जा कने भिरी पाप मत करदी ।"

यीशु मसीह संसारे दी जोती

12 यीशुये भिरी लोकां नैं ग्लाय, संसारे दी जोती मैं ऐ; जेहड़ा मिन्जो पंचा चलदा सैह नैहरे च नी चलदा, अपर जिन्दगी दी जोती पांदा ऐ ।"
 13 फरीसियां तिस नैं ग्लाय, तू अपनी गवाही अप्पु दिंदा ऐ, तेरी गवाही ठीक नी । 14 यीशुये तिन्हां जो जबाब दित्ता, भले ई मैं अपनी गवाही अप्पु दिंदा ऐ, भिरी भी मेरी गवाही ठीक ऐ, कजोकि मैं जाणदा कि मैं कतांह ते आया । कने

कतांह जाणां? अपर तुहां नी जाणंदे कि मैं कतांह ते आया ऐ या कतांह जो जाणां ऐ । 15 तुहां शरीरे दे मताबक न्याय करदे हन; मैं कुसी दा न्याय नी करदा । 16 कने जे मैं न्याय करां भी, तां मेरा न्याय सच्चा ऐ; कजोकि मैं किल्ला नीये, अपर मैं ऐ, कने मेरा पिता मिन्जो सौगी ऐ जिन्हीं मिन्जो घल्लया । 17 तुहां दे नियमा च भी लिक्खा ऐ कि दूँ जणेयां दी गवाही मिली नैं ठीक होंदी ऐ । 18 इक्क तां मैं अप्पु अपनी गवाही दिंदा, कने दूआ पिता मेरी गवाही दिंदा ऐ जिन्हीं मिन्जो घल्लया ।" 19 तिन्हां तिस नैं ग्लाय, तेरा पिता कुत्थू ऐ?" यीशुये जबाब दित्ता, ना तुहां मिन्जो जाणंदे हन, ना मेरे पिता जो, जे मिन्जो जाणंदे तां मेरे पिता जो भी जाणंदे । 20 एह गल्लां तिन्हीं मंदरे च शिक्षा दिंदे भंडार घरे च ग्लाय, कने कुणी भी तिसियो नी पकड़ेया, कजोकि तिसदा बत अली तिकर नी आया था ।

अपणे बारे च यीशु मसीह दी राय

21 तिन्हीं भिरी तिन्हां नैं ग्लाय, मैं चली पैआ, कने तुहां मिन्जो तोपणां कने अपणे पापे च मरणां जित्थू मैं चलेया तित्थु तुहां नी आई सकदे ।"
 22 इसा गल्ला सुणी करी यहूदी ग्लाणां लगे, क्या एह अपणे आप्पे जो मारी दिंगा, जेहड़ा एह ग्ला करदा ऐ, जित्थू मैं चलेया तित्थु तुहां नी आई सकदे?" 23 तिन्हीं तिन्हां नैं ग्लाय, तुहां थलें दे हन, मैं उपरे दा ऐ, तुहां संसारे दे हन, मैं संसार दा नीये । 24 इसताई मैं तुहां नैं ग्लाय कि तुहां अपने पापां च मरणां, कजोकि जे तुहां वसुआस नी करणे कि मैं सैई ऐ तां तुहां अपने पापां च मरणां ।" 25 तिन्हां तिस नैं ग्लाय, "तू कुण ऐ?" यीशुये तिन्हां नैं ग्लाय, "सैई ऐ जेहड़ा शुरु ते तुहां नैं ग्लांदा आया ऐ ।" 26 तुहां दे बारे च मिन्जो बड़ा कुच्छ ग्लाणां कने फैसला करणां ऐ; अपर मिन्जो घल्लणे आळा सच्चा ऐ, कने जेहड़ा मैं तिसते सुणया ऐ सैई संसारे च ग्लांदा ऐ । 27 सैह एह नी समझे कि अहां नैं पिता दे बारे च ग्लांदा ऐ । 28 ताहू यीशुये ग्लाय, जाहू तुहां माणु दे पुत्रे जो उचिया जगाह पर चढ़ाणां, ताहू जाणना कि मैं सैई ऐ; मैं अप्पु ते कुच्छ नी करदा अपर जिआं मेरे पितें मिन्जो सखाया तिआं ई एह गल्लां ग्ला करदा ऐ । 29 मिन्जो घल्लणे आळा मेरे सौगी ऐ; तिन्हीं मिन्जो किल्ला नी छडेया कजोकि मैं हमेशा सैई कम्म करदा जिसते सैह खुश हुंदा ऐ ।" 30 सैह एह गल्लां ग्ला दा ई था कि मते माणुआं तिस पर वसुआस कित्ता ।

सच तुहां जो अजाद करगा

31 ताहू यीशुये तिन्हां यहूदी माणुआं नैं जिन्हां तिस पर वसुआस कित्या था, ग्लाय, जे तुहां मेरे वचना च बणी रँह्यो, तां सचमुची मेरे चले केहलाणां । 32 तुहां सच जो जाणना, कने सच तुहां जो अजाद करगा ।" 33 तिन्हां तिस जो जबाब दित्ता, अहां तां अब्राहमे दे वंशे ते हन, कने कदी कुसी दे गुलाम नी बणें । भिरी तू किआं अहां जो ग्लांदा ऐ कि तुहां अजाद होई जाणां?" 34 यीशुये तिन्हां जो जबाब दित्ता, मैं तुहां नैं सच सच ग्लांदा ऐ कि जेहड़ा कोई पाप करदा ऐ सैह पापे दा गुलाम ऐ । 35 गुलाम हमेसा घरें नी रँहदा; पुत्र हमेसा रँहदा ऐ । 36 इसताई जे पुत्र तुहां जो अजाद करगा, तां सचमुची तुहां अजाद होई जाणां । 37 मैं जाणदा कि तुहां अब्राहमे दे खानदाने ते हन; तमी मेरे वचना जो तुहां दे दिले च जगाह नी ऐ, इसताई तुहां मिन्जो मकाणां चाहंदे हन । 38 मैं सैई करदा जेहड़ा अपने पिता अल्ल दिख्या ऐ; कने तुहां सैई करदे रँहदे हन जेहड़ा तुहां अपने पिता ते सुणया ऐ । 39 तिन्हां तिसियो जबाब दित्ता, अहां दा बुड़ा तां अब्राहमे ऐ ।" यीशुये तिन्हां नैं ग्लाय, जे तुहां अब्राहमे दी औलाद होंदे तां अब्राहमे साइआं कम्म करदे । 40 अपर हुण तुहां मिन्जो साइआं माणुये जो मकाणां चाहंदे हन, जिन्हीं तुहां जो सैह सच्चा वचन सुणांया जेहड़ा तिन्हीं परमात्में ते सुणया ऐदया कम्म तां अब्राहमे भी नी कित्या था । 41 तुहां अपने बुड़े साइआं कम्म करदे हन ।" तिन्हां तिस नैं ग्लाय, अहां व्यभिचार ते नी जम्मेयो, अहां दा इक्को ई पिता ऐ, मतलब परमात्मां ।" 42 यीशुये तिन्हां नैं ग्लाय जे परमात्मां तुहां दा पिता होंदा, तां तुहां मिन्जो नैं प्यार रखदे; कजोकि मैं परमात्में दे पास्से ते आया । मैं अप्पु ते नी आया, अपर तिन्हीं मिन्जो घल्लया । 43 तुहां मेरी गल्ल कजो नी समझदे?" इसताई कि तुहां मेरे वचना सुणी नी सकदे । 44 तुहां अपने बुड़े सैताने ते हन कने अपने बुड़े दी इच्छां जो पूरा करणां चाहंदे हन । सैह तां शुरु ते ई हत्यारा ऐ कने सच नी ग्लांदा, कजोकि सच तिस च ऐ ई नी । कने जाहू सैह झूठ ग्लांदा ऐ, तां सभावे ते ई ग्लांदा ऐ, कने

सैह झूठा ई नी अपर झूठ दा भी बुड़ा ऐ।⁴⁵ अपर मैं जेहड़ा सच ग्लांदा इसताई तुहां मेरा वसुआस नी करदे।⁴⁶ तुहां च कृण मिन्जो पापी ठैहरांदा ऐ? जे मैं सच ग्लांदा तां तुहां मेरा वसुआस कजो नी करदे? ⁴⁷ जेहड़ा परमात्म ते हुंदा ऐ, सैह परमात्म दियां गलां सुणदा ऐ कने तुहां इसताई नी सुणदे कि परमात्म दे पास्से ते नी हन।¹

यीशु मसीह कने अब्राहम

⁴⁸ एह सुणी मैं यहूदियां तिस नैं ग्लाय, क्या अहां ठीक नी ग्लांदा कि तू सामरी ऐ, कने तिजो च दुष्टआत्मां ऐ? ⁴⁹ यीशुयें जबाब दित्ता, मिन्जो च दुष्टआत्मां नी; अपर मैं अपने पिता दा आदर करदा, कने तुहां मेरा अपमान करदे हन। ⁵⁰ अपर मैं अपनी पूजा करवाणां नी चाहंदा, हा इक्क ऐ जेहड़ा चाहंदा ऐ कने न्याय करदा ऐ। ⁵¹ मैं तुहां नैं सच सच ग्लांदा कि जे कोई माणु मेरे वचना पर चलदा, तां सैह सदा काल तिकर मौती जो नी दिखगा। ⁵² यहूदियां तिस नैं ग्लाय, हुण अहां जो पता लगी गैआ कि तिजो च दुष्टआत्मां ऐ। अब्राहम मरी गैआ, कने भविष्यवाणी करणे आळे भी मरी गै; कने तू ग्लांदा ऐ, जे कोई मेरे वचना पर चलगा तां सैह सदा काल तिकर मौता दा सुआद नी चखगा। ⁵³ अहां दा बुड़ा अब्राहम तां मरी गैआ। क्या तू तिसते बडा ऐ? कने भविष्यवाणी करणे आळे भी मरी गै। तू अपने आप्पे जो क्या समझदा ऐ? ⁵⁴ यीशुयें जबाब दित्ता, जे मैं अपनी महिमा अप्पु ई करे, तां मेरी महिमा कुच्छ नीये; अपर मेरी महिमा करणे आळा मेरा पिता ऐ जिसियो तुहां ग्लांदा हन कि सैह तुहां दा परमात्मां ऐ। ⁵⁵ तुहां तां तिसियो नी जाणया अपर मैं तिसियो जाणदा ऐ। जे मैं ग्लां कि मैं तिसियो नी जाणदा तां मैं तुहां साइआं झूठा ठैहरगा; अपर मैं तिसियो जाणदा कने तिसदेयां वचना पर चलदा ऐ। ⁵⁶ तुहां दा बुड़ा अब्राहम मेरा दिन दिखणे दी आशा ते बडा मगन था; कने तिन्हीं दिख्या कने खुशी मनाई। ⁵⁷ यहूदियां तिस नैं ग्लाय, अली तिकर तू पंजा सालां दा भी नीये, भिरी भी तैं अब्राहमे जो दिख्या ऐ? ⁵⁸ यीशुयें तिन्हीं नैं ग्लाय, मैं तुहां नैं सच सच ग्लांदा कि अब्राहमे दे पैदा होणे ते पैहले दा मैं ऐ। ⁵⁹ ताहू तिन्हीं तिसियो मारणे ताई पत्थर चुके, अपर यीशु पडदे नैं मंदरे ते निकली गैआ।

जन्मजात दे अन्ने दियां अखी ठीक करणां

9 जांदा बगत तिन्हीं इक्की माणुये जो दिख्या जेहड़ा जन्मे ते अन्ना था। ² तिसदेयां चेलयां तिसते पूछ्या, हे रब्बी कुणी पाप कित्या था कि एह अन्ना जम्मेया, इस माणुयें या इसदे मां बुड़े? ³ यीशुयें जबाब दित्ता, नी तां इन्हीं पाप कित्या था, ना इसदे माऊ बुड़े; अपर एह इस ताई होया कि परमात्म दे कम्म तिस च प्रकट होन। ⁴ जिन्हीं मिन्जो घल्लया ऐ, अहां जो तिसदे कम्म दिन ई दिन च करणां जरूरी ऐ; सैह रात ओणे आळी ऐ जिस च कोई कम्म नी करी सकदा। ⁵ जाहू तिकर मैं संसारे च ऐ, ताहू तिकर संसारे दी जोती ऐ। ⁶ एह ग्लाई नैं तिन्हीं धरती पर थूकया, कने तिस थूके नैं चिक्क सैडी, कने सैह चिक अन्ने दियां अखी पर लगाई नैं ⁷ तिसियो ग्लाय “जा, शीलोह दे कूडे च धोई ले” (शीलोह दा मतलब ‘घल्लया होया ऐ’)। तिन्हीं जाई नैं धोतिआं, कने दिखदा होया वापस आई गैआ। ⁸ ताहू तिसदे प्डेसी कने जिन्हां तिसियो पैहले भीख मंगदे दिख्या था, ग्लाणां लगे, “क्या एह सैई नी, जेहड़ा सैई नैं भीख मंगदा था।” ⁹ कुच्छना लोकां ग्लाय, “एह सैई ऐ, होर ग्लाणां लगे, नी अपर तिस साइआं ऐ, तिन्हीं ग्लाय, मैं सैई ऐ।” ¹⁰ ताहू सैह तिसते पूछणां लगे, तेरियां अखी किआं खुली गैइआं? ¹¹ तिन्हीं जबाब दित्ता, यीशु नांये दा इक्की माणुयें चिक्क सैडी, कने मेरियां अखी पर लगाई नैं मिन्जो ग्लाय, शीलोह च जाई नैं धोई लै, कने मैं गैआ कने धोतिआं कने दिखणां लगी पैआ। ¹² तिन्हां तिसते पूछ्या, “सैह कुत्थु ऐ?” तिन्हीं ग्लाय, मैं नी जाणदा।¹

फरीसियां दे दुआरा चंगाईया दी जांच - पडताल

¹³ माणु तिसियो जेहड़ा शुरू ते अन्ना था फरीसियां अल्ल लैई गै। ¹⁴ जधैडी यीशुयें चिक्क सैडी नैं तिसदियां अखी खोलियां थियां, सैह सब्त दा दिन था। ¹⁵ भिरी फरीसियां भी तिसते पूछ्या कि तिसदियां अखी किआं खुली गैइआं। तिन्हीं तिन्हां नैं ग्लाय, तिन्हीं मेरियां अखी पर चिक्क लगाई भिरी मैं धोई लैइआं, कने हुण दिखणां लगी पैआ ऐ। ¹⁶ इस गलां पर कुच्छ फरीसी माणु

ग्लाणां लगे, एह माणु परमात्म दे पास्से ते नी, कजोकि सैह सब्त दे दिने नी मनदा। दूयां ग्लाय, पापी माणु देहय चमत्कार किआं दस्सी सकदा ऐ? तिन्हां च बैर पैई गैआ। ¹⁷ तिन्हां तिस अन्ने नैं भिरी ग्लाय, तिन्हीं तेरियां अखी खोलियां हन। तू तिसदे बारे च क्या ग्लांदा ऐ? तिन्हीं ग्लाय, सैह भविष्यवाणी करणे आळा ऐ। ¹⁸ अपर यहूदी माणुआं जो वसुआस नी होया कि सैह अन्ना था कने हुण दिखणा लगी पैआ ऐ, तां तिन्हां तिसदे माऊ बुड़े जो सददी नैं ¹⁹ तिन्हां ते पूछ्या, क्या एह तुहां दा जागत ऐ, जिसियो तुहां ग्लांदा हन कि अन्ना पैदा होया था? भिरी हुण सैह किआं दिखणां लगी पैआ ऐ? ²⁰ तिसदे माऊ - बुड़े जबाब दित्ता, अहां तां जाणदे हन कि एह अहां दा जागत ऐ, कने अन्ना पैदा होया था। ²¹ अपर अहां एह नी जाणदे हन कि एह हुण किआं दिखणां लगी पैआ ऐ, कने ना एह जाणदे हन कि कुणी तिसदियां अखी खोली दित्तियां हण। एह समझदार ऐ, इसते पूछी लैआ; इन्हीं अपने बारे च अप्पु दस्सी देणां। ²² एह गलां तिसदे माऊ बुड़े इसताई ग्लाईयां कजोकि सैह यहूदियां ते डरदे थे, कजोकि यहूदी माणु सब इक्क होई गैये थे कि जे कोई ग्लांदा कि सैह मसीह ऐ, तां आराधनालय ते कड्डी दित्ता जांदा। ²³ इसा बजाह ते तिसदे माऊ बुड़े ग्लाय, एह समझदार ऐ इसते पूछी लैआ। ²⁴ ताहू तिन्हां तिस माणु जो जेहड़ा अन्ना था, दूई बरी भिरी सददी नैं तिसियो ग्लाय, परमात्म दी स्तुति कर। अहां तां जाणदे हन कि सैह माणु पापी ऐ। ²⁵ तिन्हीं जबाब दित्ता, मैं नी जाणदा कि सैह पापी ऐ या नी; मैं इक्क गल्ल जाणदा कि मैं अन्ना था कने हुण दिखणां लगी पैआ ऐ। ²⁶ तिन्हां तिस नैं भिरी ग्लाय, तिन्हीं तिजो नैं क्या कित्ता? कने किआं तेरियां अखी खोलियां? ²⁷ तिन्हीं तिन्हां नैं ग्लाय, मैं तां तुहां नैं ग्लाई तां बैठा, कने तुहां नी सुणया; हुण दूई बरी कजो सुनणा चाहंदा हन? क्या तुहां भी तिसदे चले बणना चाहंदा हन? ²⁸ ताहू सैह तिसदी बुराई करी नैं ग्लाणां लगे, तू ई तिसदा चेला ऐ, अहां तां मूसा दे चले हन। ²⁹ अहां जाणदे हन कि परमात्म मूसा नैं गलां कित्तियां; अपर तिस माणुये जो नी जाणदे कि कुत्थु दा ऐ। ³⁰ तिन्हीं तिन्हां जो जबाब दित्ता, एह तां हैराणिया दी गल्ल ऐ कि तुहां नी जाणदे कि सैह कुत्थु दा ऐ, तमी तिन्हीं मेरियां अखी खोली दित्तियां। ³¹ अहां जाणदे हन कि परमात्मां पापियां दी नी सुणदा, अपर जे कोई परमात्म दा भक्त होये कने तिसदिया इच्छा पर चलदा ऐ तां सैह तिसदी सुणदा ऐ। ³² संसारे शुरू होणे ते लैई करी अन्ने तिकर एह कदी सुणणे च नी आया कि कुणकी जन्म जात दे अन्ने दियां अखी खोलियां हन। ³³ जे एह माणु परमात्म दे पास्से ते नी होंदा, तां कुच्छ भी नी करी सकदा। ³⁴ तिन्हां तिसजो जबाब दित्ता, तू बिल्कुल पापां च जम्मेया ऐ, तू अहां जो क्या सखांदा ऐ? कने तिन्हां तिसियो बाहर कड्डी दित्ता।

आत्मिक अंधापन

³⁵ यीशुयें जाहू एह सुणया कि तिन्हां सैह माणु बाहर कड्डी दित्ता ऐ, कने जाहू तिस नैं मुलाकात होई तां ग्लाय, क्या तू परमात्म दे पुत्रे पर वसुआस करदा ऐ? ³⁶ तिन्हीं जबाब दित्ता, हे प्रभु सैह कुण ऐ, कि मैं तिस पर वसुआस करे? ³⁷ यीशुयें तिस नैं ग्लाय, तैं तिसियो दिख्या भी ऐ, कने जेहड़ा तिजो सौगी गलां करदा ऐ सैह ई ऐ। ³⁸ तिन्हीं ग्लाय, हे प्रभु, मैं वसुआस करदा। कने तिसियो प्रणांम कित्ता। ³⁹ ताहलू यीशुयें ग्लाय, मैं इस संसारे च न्याय ताई आया, तां जे जेहड़े नी दिखदे सैह दिखन, कने जेहड़े दिखदे हन सैह अन्ने होई जांन। ⁴⁰ जेहड़े फरीसी तिस सौगी थे तिन्हां एह गलां सुणी नैं तिस नैं ग्लाय, क्या अहां भी अन्ने हन? ⁴¹ यीशुयें तिन्हां नैं ग्लाय, जे तुहां अन्ने होंदे तां पापी नी होंदे; अपर हुण ग्लांदा हन कि अहां दिखदे हन, इसताई तुहां दा पाप बणी रहंदा ऐ।

चरवाहे दा कने भेडां दा उदारण

10 मैं तुहां नैं सच सच ग्लांदा कि जेहड़ा कोई भेड़शाला च दुरआजे ते च नी जांदा, अपर कुसी दूये पास्से ते लंगी जांदा ऐ, सैह चोर कने डाकू ऐ। ² अपर जेहड़ा दुरआजे ते अंदरेयो जांदा ऐ सैह भेडां दा चरवाहा ऐ। ³ तिस ताई दुआरपाल दुरआजे खोली दिंदा ऐ, कने भेडां तिसदी उआज सुणदियां हन, कने सैह अपणियां भेडां जो नां लैई लैई नैं सददा ऐ कने बाहरेयो लैई जांदा ऐ। ⁴ जाहू सैह अपणियां सारियां भेडां जो बाहरेयो कड्डी दिंदा ऐ, तां सैह तिन्हां दे गांह गांह चलदा ऐ कने भेडां तिसदे पंचा पंचा

चलदियां हन, कजोकि सैह तिसदिया उआजा पणछैणदियां हन । 5 अपर तिन्हां कुसकी पखले दे पंचा नी जाणां, अपर पखले ते नष्टी पोणां, कजोकि सैह पखलेयां दी उआजा नी पणछैणदियां । 6 यीशुयें तिन्हां नैं एह उदारण ग्लया, अपर सैह नी समझे कि एह क्या गल्ल ए जेह्दी सैह अहां नैं ग्लांदा ए ।

यीशु मसीह इक्क खरा चरवाहा

7 ताहू यीशुयें तिन्हां नैं भिरी ग्लया, मँ तुहां नैं सच सच ग्लांदा, भेडां दा दुरआजा मँ ए । 8 जितणे मिन्जो ते पैहलें आयेयो सैह सारे चोर कने डाकू हन अपर भेडां तिन्हां दी नी सुणी । 9 दुरआजा मँ ए; जे कोई मेरे दुआरा अंदर जां, तां तिन्हीं उद्धार पाणां, कने अंदर बाहर आई जाई सकगा कने तिसियो घाह मिलगा । 10 चोर कुसी होर कम्मे ताई नी अपर सिर्फ चोरी करणां, मारना कने खत्म करणां ओंदा ए; मँ इसताई आया कि सैह जिन्दगी पान, कने मती सारी पान । 11 खरा चरवाहा मँ ए; खरा चरवाहा भेडां ताई अपणी जान दिंदा ए । 12 मजदूर जेह्दा ना तां चरवाहा ए कने ना तां भेडां दा मालक ए, भेडिये जो ओंदे दिखी नैं भेडां जो छडी नैं नष्टी जांदा ए; कने भेडिया तिन्हां जो पकड़दा कने रुआं परांह करी दिंदा ए । 13 सैह इसताई नष्टी जांदा ए कि सैह मजदूर ए, कने तिसियो भेडां दी फिकर नी । 14 खरा चरवाहा मँ ए; मँ अपणियां भेडां जो जाणदा ए, कने मेरियां भेडां मिन्जो जाणदियां हन । 15 जिआं पिता मिन्जो जाणदा ए कने मँ पिता जो जाणदा ए कने मँ भेडां ताई अपणी जान दिंदा ए । 16 मेरियां होर भी भेडां हन, जेह्दियां इस भेडशाला दियां नी हन । मिन्जो तिन्हां जो भी लैयोणा जरूरी ए । सैह मेरी उआज सुणगियां, ताहू इक्क ई झुंड कने इक्क चरवाहा होणां । 17 पिता इसताई मिन्जो नैं प्यार रखदा ए कि मँ अपणी जान दिंदा ए कि तिसियो भिरी लैई लैं । 18 कोई तिसियो मिन्जो ते खोई नी सकदा, अपर मँ तिसियो अप्पु ई दिंदा ए । मिन्जो तिसियो दैणे दा भी हक्क ए, कने तिसियो भिरी लैई लैणे दा भी हक्क ए : एह हुक्म मिन्जो पिता ते मिलया ए ।

19 इन्हां गल्लां दिया बजाह ते यहूदी माणुआं च भिरी पैई बैर गैआ । 20 तिन्हां च मते माणु ग्लाणां लगे, तिस च दुष्टआत्मां ए, कने सैह पागल ए; तिसदी कजो सुणदे हन? 21 होर माणु ग्लाणां लगे, एह गल्लां ऐदेया माणु दी नी हन जिस च दुष्टआत्मां होयें । क्या दुष्टआत्मां अन्नेयां दियां अखी खोलो सकदी ए?"

यहूदियां दा वेवसुआस

22 यरुशल्लेम च स्थापना दा तौआर मनाणां लाया था; कने ठंडी दा मौसम था । 23 यीशु मंदरे च सुलैमाने दे बरांडे च घुमा करदा था । 24 ताहू यहूदी माणुआं तिसियो आई नैं घेरी लैआ कने पूछ्या, तू अहां दे मनां जो काहू तिकर दुविधा च रखगा? जे तू मसीह ए तां अहां नैं साफ साफ ग्लाई दै । 25 यीशुयें तिन्हां जो जबाब दिता, "मँ तुहां नैं ग्लाई दिता अपर तुहां वसुआस करदे ई नी हन । जेह्दा कम्म मँ अपणे पिता दे नाये ते करदा सैह ई मेरे गवाह हन, 26 अपर तुहां इसताई वसुआस नी करदे कजोकि मेरियां भेडां च नी हन । 27 मेरियां भेडां मेरी उआज सुणदियां हन; मँ तिन्हां जो जाणदा, कने सैह मिन्जो पचांह पचांह चलदियां हन । 28 कने मँ तिन्हां जो मेरे हत्थे ते खोई नी सकदा । 29 मेरा पिता जिन्हीं तिन्हां जो मिन्जो दित्या ए, सबना ते बडा ए, कने कोई तिन्हां जो पिता दे हत्थे ते खोई नी सकदा 30 मँ कने पिता इक्क ई हन । 31 यहूदी माणुआं तिसियो मारणे ताई पत्थर चुके । 32 इसा गल्ला सुणी करी यीशुयें तिन्हां नैं ग्लया, मँ तुहां जो अपणे पिता दे पास्से मते भले कम्म दस्से हन; तिन्हां कम्मा च कुस कम्मे ताई तुहां मिन्जो पर पत्थर मारा करदे हन?" 33 यहूदियां तिसियो जबाब दिता, खरयां कम्मा ताई अहां तिजो पर पत्थर नी मारदे अपर परमात्में दी निंदा करणे दिया बजाह ते; कने इसताई कि तू माणु होई नैं अप्पु जो परमात्मां बणांदा ए । 34 यीशुयें तिन्हां जो जबाब दिता, क्या तुहां देया नियमा च नी लिख्या ए, मँ ग्लया, तुहां ईश्वर हन? 35 जे तिन्हीं तिन्हां जो ईश्वर ग्लया जिन्हां अल्ल परमात्में दा वचन पुज्या (कने पवित्रशास्त्रे दी गल्ल झूठी नी होई सकदी), 36 तां जिसियो पितें पवित्र बणाई नैं इस संसारे च घल्लया ए, कने तुहां तिस नैं ग्लांदा हन, तू बुराई करदा ए, इसताई कि मँ ग्लया, मँ परमात्में दा पुत्तर ए? 37 जे मँ अपणे पिता देयां कम्मा नी करदा तां मेरा वसुआस मत करा । 38 अपर जे मँ करदा ए, तां

चाहे मेरा वसुआस भी मत करा, अपर तिन्हां कम्मा दा तां वसुआस करा, तांकि तुहां जाणन कने समझी सकन कि पिता मिन्जो च ए कने मँ पिता च ए । 39 ताहू तिन्हां भिरी तिसियो पकड़णे दी कोशस किन्ती अपर सैह तिन्हां दे हत्थे ते निकळी गैआ ।

40 भिरी सैह यरदन दरैयाए दे पार तिसा जगाह चली गैआ, जित्थू यूहन्ना पैहलें बपतिस्मा दिंदा था, कने तित्थु ई रहैआ । 41 मते सारे माणु तिस अल्ल आई नैं ग्लांदा थे, यहून्ने तां कोई चमत्कार नी दस्सया, अपर जेह्दा कुच्छ यहून्ने इसदे बारे च ग्लया था, सैह सब सच था । 42 कने तित्थु मतेआं यीशुये पर वसुआस किता ।

लाजरे दी मौत

11 मरियम कने तिसदी बैहण मार्था दे ग्रां बैतनिय्याह दा लाजर नांये दा इक्क माणु बमार था । 2 एह सैई मरियम थी जिन्ने प्रभु पर इतर पाई नैं तिसदेयां पैरां जो अपणे बाळां नैं पुंजेया था, इसा दा भाऊ लाजर बमार था । 3 तिसदियां बैहणा तिसियो सनेहा घल्लया, हे प्रभु, दिख जिस नैं तू प्यार करदा ए सैह बमार ए । 4 एह सुणी नैं यीशुयें ग्लया एह बमारी मौता दी नी; अपर परमात्में दी महिमा ताई ए, कि तिसदिया बजाह ते परमात्में दे पुत्तर दी महिमा होयें । 5

यीशु मार्था नैं कने तिसादिया बैहणी नैं कने लाजरे नैं प्यार रखदा था । 6 भिरी भी जाहू तिन्हीं सुणया कि सैह बमार ए, तां जिसा जगाह पर सैह था, तित्थु दो दिन होर रुकी गैआ । 7 इसदे बाद तिन्हीं चेलयां नैं ग्लया, ओआ, अहां भिरी यहूदिया जो चलन । 8 चेलयां तिसियो ग्लया, हे गुरु, हुण तां यहूदी तिजो पर पत्थर मारणां चाहंदे थे, कने क्या तू भिरी तित्थियो जाणां चाहदा ए? 9 यीशुयें जबाब दिता, "क्या दिने दे बाराह घंटे नी होंदे? जे कोई दिने चलें तां ठोकर नी लगदी, कजोकि इस संसारे दी लौई जो दिखदा ए । 10 जे कोई राती चलें तां ठोकर लगदी ए, कजोकि तिस च लौ नी होंदी । 11 तिन्हीं एह गल्लां ग्लाई करी, कने इसदे बाद तिन्हां नैं ग्लाणां लग्गा, अहां दा साथी लाजर सोई गैआ ए, अपर मँ तिसियो जगाणां चलेया । 12 ताहू चेलयां तिस नैं ग्लया, हे प्रभु जे सैह सोई गैआ ए, तां तिन्हीं खरा होई जाणां । 13 यीशुयें तां तिसदिया मौती दे बारे च ग्लया था, अपर सैह समझे कि तिन्हीं निदरां च सोणे दे बारे च ग्लया । 14 ताहू यीशुयें तिन्हां नैं साफ साफ ग्लाई दिता, लाजर मरिया; 15 कने मँ तुहां दिया बजाह ते खुश ए कि मँ तित्थु नी था जिस ते तुहां वसुआस करन । अपर हुण ओआ अहां तिस अल्ल चलिये । 16 ताहू थोमा जिसियो दिदमुस ग्लांदा थे, अपणे साथी चेलयां नैं ग्लाणां लग्गा, "ओआ, अहां भी तिस अल्ल मरणा चलन ।"

यीशु मसीह दा दुवारा जिंदा होणां कने जिन्दगी

17 तित्थु पुज्जदेयां ई यीशु जो एह पता लग्गा कि लाजरेयो कब्र च रखेयो चार दिन होईयो हन । 18 बैतनिय्याह यरुशल्लेम ते कोई दो मील दी दूरी पर था । 19 मते सारे यहूदी माणु मार्था कने मरियमा अल्ल तिसा दे भाऊये दिया मौता पर दिलासा देणे ताई आयेयो थे । 20 जाहू मार्था यीशु दे ओणे दी खबर सुणी तां तिस नैं मिलणां गैई, अपर मरियम घरें बैई रैई । 21 मार्था यीशुयें नैं ग्लया, हे प्रभु जे तू ऐत्थू होंदा, तां मेरा भाऊ कदी भी नी मरदा । 22 कने मँ हुण भी जाणदी कि जेह्दा कुच्छ तू परमात्में ते मंगणां, परमात्मां तिजो देणां । 23 यीशुयें तिसा नैं ग्लया, तेरा भाऊ भिरी जिंदा होई जाणां । 24 मार्था तिस नैं ग्लया, "मँ जाणदी ए कि आखरी दिने दोवारा जिंदा होणे दे बगत्तर पर तिन्हीं जिंदा होई जाणां । 25 यीशुयें तिसा नैं ग्लया, दोवारा जिंदा होणां कने जिन्दगी मँ ई ए; जेह्दा कोई मिन्जो पर वसुआस करदा ए सैह जे मरी भी जां तमी तिन्हीं जिंदा होणां । 26 कने जेह्दा कोई जिंदा ए, कने मिन्जो पर वसुआस करदा ए, सैह सदा काल तिकर नी मरगा । "क्या तू इसा गल्ला पर वसुआस करदी ए । 27 तिन्ने तिस नैं ग्लया, हां हे प्रभु, मँ वसुआस करदी कि परमात्में दा पुत्तर मसीह जेह्दा संसारे च ओणे आळा था, सैह तू ई ए ।

यीशु मसीह रोया

28 एह ग्लाई नैं सैह चली गैई, कने अपणियां बैहणी मरियमा जो डोल करी सददी नैं ग्लया, "गुरु ऐत्थू ई ए कने तिजो सददा करदा ए । 29 एह सुणी करी सैह झटपट उठी नैं तिस अल्ल आई । 30 यीशु अल्ली ग्रांए च नी पुज्या था

अपर तिसा जगाह ई था जित्थू मार्था तिस नें मिलियो थी ।³¹ ताहू तित्थु जेहडे यहूदी माणु तिसा सौगी घरे च थे कने तिसायो दिलासा दैआ करदे थे, एह दिखी नें कि मरियम झटपट उठी नें बाहरेयो गई ऐ एह समझे कि सैह कब्रा पर रोणां चलियो ऐ, तां सैह भी तिसा पंचा चली पै ।³² जाहू मरियम तित्थु जाई रैई जित्थु यीशु था, तां तिसियो दिखदे ई तिसदेयां पैरां पैई गई कने ग्लाय, “हे प्रभु जे तू एत्थू हुंदा तां मेरा भाऊ नी मरदा ।”³³ जाहू यीशुयें तिसा जो कने तिन्हां यहूदियां जो जेहडे तिसा सौगी आयेयो थे, रोदे दिख्या, तां आत्मां च बड़ा भरी उदास कने परेशान होया, ³⁴ कने ग्लाय, तुहां तिसियो कुत्थू रखया ऐ? तिन्हां तिस नें ग्लाय, हे प्रभु, चली नें दिखी लैआ ।”³⁵ यीशु रोया । ³⁶ ताहू यहूदी ग्लायों लगे, दिखा, सैह तिस नें कितणा प्यार रखदा था । ³⁷ अपर तिन्हां च कुच्छना ग्लाय, क्या एह जिन्हीं अन्ने दियां अखी खोलियां, एह भी नी करी सकया कि एह माणु नी मरदा?”

लाजरे जो मरेयां ते जिंदा करणां

³⁸ यीशु मने च भिरी बड़ा ई उदास होई नें कब्रा पर आया । सैह इक्क गुफा थी कने इक्क पत्थर तिसा पर रखेया था । ³⁹ यीशुयें ग्लाय, “पत्थरे टाआ ।” तिस मरेयो दी बैहण मार्था तिस नें ग्लायों लगी, हे प्रभु इस च हुण तां मुश्क ओआ दी ऐ, कजोकि मेरे भाऊये मरेयो चार दिन होई चुकेयो हन ।”⁴⁰ यीशुयें तिसा नें ग्लाय, क्या मैं तिजो नें नी ग्लाय था कि जे तू वसुआस करगी, तां परमात्मनं दी महिमा जो दिखगी । ⁴¹ ताहू तिन्हां तिस पत्थरेयो टाया । यीशुयें अखी चुकी नें ग्लाय, हे पिता, मैं तेरा धन्यावाद करदा कि तैं मेरी सुणी लैई ऐ । ⁴² मैं जाणदा था कि तू सदा मेरी सुणदा ऐ, अपर जेहडी भीड़ अक्खें बक्खें खडूतियो ऐ, तिन्हां दिया बजाह ते मैं इआं ग्लाय, जिसते कि सैह वसुआस करन कि तैं मिन्जो घल्लया ऐ ।”⁴³ एह ग्लाय नें तिन्हीं जोरे नें हक्क पाई, हे लाजर निकळी आ ।”⁴⁴ जेहडा मरी गैआ था जिसदे हत्थ पैर कफने नें बनेयो थे सैह तिआं ई निकळी आया, कने तिसदा मुँ कपडे नें लपेटया था । यीशुयें तिन्हां नें ग्लाय, इसियो खोली दैआ कने जाणां दैआ ।”

यीशु मसीह जो जान्नी ते मारणे दी साजस (मत्ती 26 : 1-5; मरकुस 14 : 1,2; लूका 22 : 1,2)

⁴⁵ ताहू जेहडे यहूदी मरियमा सौगी आयेयो थे कने तिसदा एह कम्म दिख्या था, तिन्हां च मतेआं तिस पर वसुआस कित्ता । ⁴⁶ अपर तिन्हां च कुच्छ माणु फरीसियां अल्ल जाई नें यीशु दे कम्मा दी खबर सणांई । ⁴⁷ इसा गल्ला गल्ला सुणी करी प्रधान याजकां कने फरीसियां महासभा सददी, कने ग्लाय, “अहां करदे क्या हन? एह माणु तां मते चमत्कार दरस्सादा ऐ । ⁴⁸ अहां इसियो इआं ई छड्डी दैन, तां सबना इस पर वसुआस करी लैणां, कने रोमी आई नें अहां दिया जगाह कने जातिआं दुनी पर हक्क जमाई लैणां ।”⁴⁹ ताहू तिन्हां च काइफा नांये दे इक्की माणुयें जेहडा तिस साले दा महायाजक था, तिन्हां नें ग्लाय, तुहां कुच्छ भी नी जाणदे; ⁵⁰ कने ना एह समझदे हन कि तुहां तांई एह खरा ऐ कि अहां दे लोकां तांई इक्क माणु मरे, कने सारी जाति खत्म नी होयें ।”⁵¹ एह गल्ल तिन्हीं आपणियां तरफा ते नी ग्लाय, अपर तिस साले दा महायाजक होई नें भविष्यवाणी कित्ती, कि यीशु तिसा जाति तांई मरणां । ⁵² कने ना सिर्फ तिसा जाति तांई, अपर इसतांई भी कि परमात्मनं दी लग्न लग्न औलांदा जो इक्क करी दें । ⁵³ कने तिसी दिने ते सैह तिसियो मकाणे दी स्कीम बनाणां लगे ।

⁵⁴ इसतांई यीशु तिस बगत ते यहूदियां दे सामणे सरेआम नी च घुमया, अपर तित्थु ते बणे दे इक्की प्रदेश इफ्राईम नांदे दे इक्की सैहरे जो चली गैआ; कने अपणे चेलयां सौगी तित्थु रैहणां लगा ।

⁵⁵ यहूदियां दा फसह दा तौआर नैडें था, कने मते माणु फसह ते पैहलें देहात सैहरे ते यरुशलम सैहरे जो गै कि अपणे आप्पे जो शुद्ध करन । ⁵⁶ कने सैह यीशु जो तोपणां लगे कने मंदरे च खड्गै नें अप्पु च ग्लायों लगे, तुहां क्या सोचदे हन? क्या सैह तौआरे च नी ओगा?”⁵⁷ प्रधान याजकां कने फरीसियां एह हुक्म दैई रखेया था कि जे कुसकियो पता लगी गैआ कि यीशु कतांह ऐ तां दरस्सनेयो, तांकि सैह तिसियो पकड़ी सकन ।

यीशु मसीह दे पैरां च इत्तर पाणां (मत्ती 26 : 6-13; मरकुस 14 : 3-9)

12 यीशु फसह दे छै दिन पैहलें बैतनिय्याह सैहरे च आया जित्थु लाजर था, जिसियो यीशुयें मरेयां ते जिंदा कित्ता था । ² तित्थु तिन्हां तिस तांई धाम बणांई; कने मार्था तिसदी सेवा करा दी थी, कने लाजर तिन्हां च इक्क था, जेहडा तिस सौगी धाम खाणां बैठया था । ³ ताहू मरियमा जटामासियां दा आधा किलो कीमती इतर लैई नें यीशु दे पैरां पर डोळैया, कने अपणे बाळां नें तिसदे पैर पुज्जें, कने इतरे दिया मुश्का नें सारा घर खुशबूदार होई गैआ । ⁴ अपर तिसदे चेलयां च यहूदा इस्कोरियोती नांये दा इक्क चला जेहडा तिसियो पकडुआणे आळा था, ग्लायों लगा, ⁵ एह इतर त्रै सौ दीनार च बेचीं नें गरीबां जो कजो नी दित्ता ?”⁶ तिन्हीं एह गल्ल इसतांई नी ग्लाय कि तिसियो गरीबां दी फिकर थी अपर इसतांई कि सैह चोर था, कने तिसा अल्ल तिन्हां दी झोली रैहदी थी कने तिसा च जेहडा कुच्छ पांदे थे, सैह कड्डी लैदा था । ⁷ यीशुयें ग्लाय, इसा जो रणा दैआ । इसा जो एह मेरे दबणे दे दिने तांई रखणां दैआ । ⁸ कजोकि गरीब तां तुहां सौगी हमेशा रैहदे हन, अपर मैं तुहां सौगी हमेशा नी रैहणां ।

लाजरे जो जान्नी ते मारणे दी साजस

⁹ जाहू यहूदियां दी भीड़ा जो पता लगी गैआ कि सैह तित्थु ऐ, तां सैह ना सिर्फ यीशु दिया बजाह ते आये अपर इसतांई भी कि लाजरे जो भी दिखणां आये, जिसियो तिन्हीं मरेयां च जिंदा कित्ता था । ¹⁰ ताहू प्रधान याजकां लाजरे जो भी मकाणे दी स्कीम बणांई । ¹¹ कजोकि तिसदिया बजाह ते मते यहूदी चली गै कने यीशु पर वसुआस कित्ता ।

यरुशलमं च विजय - प्रवेश

(मत्ती 21 : 1-11; मरकुस 11 : 1-11; लूका 19 : 28-40)

¹² दूयें दिने मते सारे माणु जेहडे तौआरे च आयेयो थे एह सुणया; कि यीशु यरुशलम सैहरे च ओणां लगेया ऐ । ¹³ इसतांई तिन्हां खजुरे दियां डालियां लैइआ कने तिस नें मिलणां चली पै, कने जोर नें ग्लायों लगे, होशाना ! धन ऐ इस्राएल दा राजा, जेहडा प्रभु दे नांये ते ओआ दा ऐ ।

¹⁴ जाहू यीशु जो खोत्ते दा इक्क बच्चा मिला; तां सैह तिस पर बैई गैआ, जिआं लिख्या ऐ ।

¹⁵ हे सिव्योन दी कुड़ी, मत डर; दिख, तेरा राजा खोत्ते दे बच्चे पर चढ़ी नें ओआ दा ऐ ।”

¹⁶ तिसदे चले पैहलें एह गल्ल नी समझेयो थे, अपर जाहू यीशु दे चमत्कार दिखे तां तिन्हां जो याद आया कि एह गल्लां तिसदे बारे च लिखियां थियां कने लोकां तिस नें देहया ई बर्ताव कित्ता था । ¹⁷ ताहू भीड़ां देयां तिन्हां माणुआं गवाही दित्ती, जेहडे तिस बगत तिस सौगी थे जाहू तिन्हीं लाजरे जो कब्रा ते सददी नें मरेयां च जिंदा कित्ता था । ¹⁸ इसा बजाह ते ई माणु तिस नें मिलणां चली आयेयो थे कजोकि तिन्हां सुणया था कि तिन्हीं एह चमत्कार दरस्सया ऐ । ¹⁹ ताहू फरीसियां अप्पु च ग्लायों लगे, “सोच्चा तां सैही कि तुहां ते कुच्छ नी होया करदा । दिखा, संसार तिस पंचा चली पैआ ऐ ।”

यूनानियां दा यीशु मसीह जो तोपणां

²⁰ जेहडे माणु तिस तौआरे च आराधना करणां आयेयो थे तिन्हां च कुच्छ यूनानी थे । ²¹ तिन्हां गलील दे बैतसैदा दे रैहणे आळे फिलिप्पुसे अल्ल आई नें तिस नें विणती कित्ती, श्रीमान, अहां यीशुयें नें मिलणां चाहदे हन । ²² फिलिप्पुसे आई नें अन्द्रियासे नें ग्लाय, ताहू अन्द्रियासे कने फिलिप्पुसे जाई नें यीशु नें ग्लाय । ²³ इसा गल्ला पर यीशुयें तिन्हां नें ग्लाय, सैह बगत आई गैआ ऐ कि माणुये दे पुत्तरे दी जय जयकार होयें । ²⁴ मैं तुहां नें सच सच ग्लांदा कि जाहू तिकर कणका दा दाणां जमीना च पैई नें मरी नी जांदा, सैह किल्ला रैहदा ऐ; अपर जाहू मरी जांदा ऐ, तां मते दाणे लैयोदा ऐ । ²⁵ जेहडा अपणियां जान्नी जो प्यारा जाणदा ऐ, सैह तिसायो गुआई दिंदा ऐ; कने जेहडा इस संसारे च अपणियां जान्नी जो प्यारा नी जाणदा ऐ, सैह सदा दी जिन्दगी तांई तिसदी रखवाली करगा । ²⁶ जे कोई मेरी सेवा करे, तां मिन्जो पंचा चली

पौर्ये; कने जित्थू में ऐ, तित्थु मेरा सेवक भी होणां । जे कोई मेरी सेवा करें, तां पितें तिसदा आदर करणां ।

सूलिया दी मौती दा इशारा

27 हुण मेरा जी परेशान ऐ । इसताई हुण में क्या ग्लां? हे पिता, मिन्जो इस बगते तें बचा? ना, कजोकि में इसा बजाह ते इस बगते जो पुज्जा ऐ । 28 हे पिता, अपणे नांये दी जय जयकार कर । 1 ताहू एह आकाशवाणी होई, में तिसदी जय जयकार किन्ती ऐ, कने भिरी भी करगा । 29 ताहू जेहडे माणु खडौई नैं सुणां दे थे तिन्हां ग्लायी कि अम्बर गरजेया ऐ । होर ग्लायीं लगे, कोई सुअर्गदूत इस नैं ग्लायी । 30 इस ग्लायी पर यीशुयें ग्लायी, एह उआज मिन्जो ताई नी, अपर तुहां ताई आईयो ऐ । 31 हुण इस संसारे दा न्याय हुंदा ऐ, हुण इस संसारे दा अधिकारी कड्डी दैणां ऐ; 32 कने में जे धरतिया पर ते उचिया जगाह चढ़ाया जांगा, तां सबना जो अप्पु अल्ल खीजगा । 33 इआं ग्लायीं नैं तिन्हीं एह दस्सी दिता कि सैह कैदयी मौता नैं मरगा । 34 इसा ग्लायी पर लोकां तिस नैं ग्लायी, अहां नियमे दी एह ग्लायी सुणी ऐ कि मसीह हमेशा रेंहणां ऐ, भिरी तू कजो ग्लांदा ऐ कि माणुये दे पुत्रे जो उंचे पर चढ़ाया जाणां जरूरी ऐ? एह माणु दा पुत्र कुण ऐ? 35 यीशुयें तिन्हां नैं ग्लायी, जोती हुण थोडी देर तिकर तुहां सौगी ऐ । जाहू तिकर जोती तुहां सौगी ऐ ताहू तिकर चली रेंहआ, इआं नी होयें कि नैहरा तुहां जो आई नैं घेरी लें; जेहडा नैहरे च चलदा ऐ सैह नी जाणदा कि कतां चलेया ऐ । 36 जाहू तिकर जोती तुहां सौगी ऐ, जोतिया पर वसुआस करा तांकि तुहां जोती दी औलाद बणां । 1

यहूदियां दा वेवसुआसे च बणी रैहणां

एह ग्लायीं करी नैं यीशु चली गैआ कने तिन्हां ते लुक्की रेंहआ । 37 तिन्हीं तिन्हां सामणे इतणे चमत्कार दस्से, तमी तिन्हां तिस पर वसुआस नी किता; 38 तांकि यशायाह भविष्यवक्ता दा वचन पूरा होयें जेहडा तिन्हीं ग्लायी :

“हे प्रभु अहां दे समाचारे दा कुणी वसुआस किता ऐ? कने प्रभु दी बाई दा जोर कुणी दिख्या ऐ?”

39 इसा बजाह ते सैह वसुआस नी करी सके, कजोकि यशायाहें एह भी ग्लायी;

40 तिन्हीं तिन्हां दियां अखी अत्रियां, कने तिन्हां दा मन कठोर करी दित्यो हन; कुत्की इआं नी होयें कि सैह अखी नैं दिखन कने मन नैं समझन, कने फिरन, कने में तिन्हां जो ठीक करां । 1

41 यशायाहें एह ग्लायीं इसताई ग्लायीं कि तिन्हीं तिसदी महिमा दिखी, कने तिन्हीं तिसदे बारे च ग्लायीं किन्तियां । 42 तमी अधिकारियां च भी मतेआं तिस पर वसुआस किता, अपर फरीसियां दिया बजाह ते नी मनदे थे, कुत्की इआं नी होयें कि सैह अरधानालय ते कड्डे दैन; 43 माणुआं दिया तरफा ते तारीफ तिन्हां जो परमात्में दी तारीफा ते जादा बढिया लगदी थी ।

यीशु मसीह दे वचन : न्याय दा आधार

44 यीशुयें जोरे नैं ग्लायी, जेहडा मिन्जो पर वसुआस करदा ऐ, सैह मिन्जो पर नी अपर मिन्जो घल्लणे आळे पर वसुआस करदा ऐ । 45 कने जेहडा मिन्जो दिखदा ऐ, सैह मेरे घल्लणे आळे जो दिखदा ऐ । 46 में संसारे च जोती बणी नैं आया ऐ, तांकि जेहडा कोई मिन्जो पर वसुआस करें सैह नैहरे च नी रेंह । 47 जे कोई मेरियां ग्लायीं सुणी नैं नी मने, तां में तिसियो अपराधी नी ठहरांदा; कजोकि में संसारे जो अपराधी ठहराणे ताई नी, अपर संसारे दा उद्धार करणे ताई आया ऐ । 48 जेहडा मिन्जो तुच्छ जाणदा ऐ कने मेरियां ग्लायीं ग्रहण नी करदा ऐ तिसियो अपराधी ठहराणे आळा तां इक्क ऐ; मतलब जेहडा वचन में ग्लायी ऐ, सैई पिछले दिना च तिसियो अपराधी ठहरांगा । 49 कजोकि में अपणिया तरफा ते ग्लायीं नी किन्तियां; अपर पिता जिन्हीं मिन्जो घल्लया ऐ तिन्हीं मिन्जो हुक्म दित्या ऐ कि क्या क्या ग्लां कने क्या क्या बोलें? 50 कने में जाणदा कि तिसदा हुक्म सदा दी जिन्दगी ऐ । इसताई में जेहडा कुच्छ ग्लांदा ऐ, सैह जिआं पिता नैं मिन्जो नैं ग्लायी ऐ तिआं ई ग्लांदा ऐ । 1

यीशु मसीह दा चेलयां दे पैर धोणां

13 फसह दे तौआरे ते पैहलें, जाहू यीशु जो पता लग्गा कि मेरा सैह बगत आई पुज्जा ऐ कि मिन्जो संसारे छड्डी नैं अपणे पिता अल्ल जाणां, तां सैह अपणेयां माणुआं नैं जेहडे संसारे च थे जिआं प्यार सैह करदा था, अंत तिकर तिआं ई प्यार करदा रेंह । 2 जाहू सैतान शमौने दे पुतरें यहूदा इस्करियोतिये दे मने च एह ग्लायी पाई चुकेया था कि तिसियो पकडुआं तां खाणे दे बगत, 3 यीशुयें, एह जाणी नैं कि पितें सारा कुच्छ मेरे हत्थे च करी दित्या ऐ कने में परमात्में पाससे ते आया ऐ कने परमात्में अल्ल ई चलेया ऐ । 4 खाणां खाई नैं सैह उठया कने अपणे शरीरे दे पराले आळे कपडे खोली दित्ते, कने परना लैई नैं अपणां लक बन्नी लैआ । 5 भिरी इक्की भांडे च पाणी भरी नैं चेलयां दे पैरां धोणां कने जेहडा परना तिसदे लक्के बन्नया था तिस नैं पुज्जा लग्गा । 6 जाहू यीशु शमौन पतरसे अल्ल आया, ताहू पतरसें तिसियो ग्लायी, हे प्रभु, क्या तू मेरे पैरां धोणां लगेया ऐ । 7 यीशुयें तिसियो जबाब दित्ता, जेहडा में करदा, तू तिसियो अल्ल नी जाणदा, अपर इसदे बाद समझी जाणां । 8 पतरसें तिस नैं ग्लायी, तू मेरे पैरां कदी नी धोई सकदा । 9 एह सुणी नैं यीशुयें तिस नैं ग्लायी, “जे में तिज्जो नी धोयें, तां तेरा मेरा कुच्छ भी हेस्सा दा नीये । 10 शमौन पतरसें तिस नैं ग्लायी, हे प्रभु, तां मेरे पैर ई नी पर, मेरेयां हत्थां कने मुँडे भी धोई दै । 11 यीशुयें तिस नैं ग्लायी, “जेहडा नौई बैठया ऐ तिसियो पैरां छड्डी होर कुच्छ धोणे दी जरूरत नी, अपर सैह बिल्कुल शुद्ध ऐ; कने तुहां शुद्ध हन, अपर सारे दे सारे शुद्ध नी हन । 12 सैह तां अपणे पकडुआणे आळे जो जाणदा था, इसताई तिन्हीं ग्लायी, “तुहां सारे दे सारे शुद्ध नी ।

12 जाहू सैह तां तिन्हां दे पैरां धोई बैठा, कने अपणे कपडेयां लाई नैं भिरी बैई गैआ, तां तिन्हां नैं ग्लायीं लग्गा, क्या तुहां समझे कि में तुहां नैं क्या किता? 13 तुहां मिन्जो गुरु कने प्रभु ग्लांदा हन कने ठीक ई ग्लांदा हन, कजोकि में सैई ऐ । 14 जे में प्रभु कने गुरु होई नैं तुहां दे पैर धोत्ते, तां तुहां जो भी इक्की दूये दे पैर धोणां चाइदे । 15 कजोकि में तुहां जो नमूना दस्सी दिता ऐ कि जिआं में तुहां नैं किता ऐ, तुहां भी तिआं ई करा करा । 16 में तुहां नैं सच सच ग्लांदा, दास अपणे मालके ते बडा नी, कने नी घल्लया होया अपणे घल्लणे आळे ते । 17 तुहां एह ग्लायीं जाणदे हन, कने जे तिन्हां पर चलन तां धन हन । 18 में तुहां सबना दे बारे च नी ग्ला दा; जिन्हां जो में चुणी लैआ ऐ, तिन्हां जो में जाणदा; अपर एह इसताई ऐ कि पवित्रशास्त्रे दा एह वचन पूरा होया, जेहडा मेरी रोटी खांदा ऐ, तिन्हीं मिन्जो पर लत्त चुकी ऐ । 19 हुण में तिसदे होणे ते पैहलें तुहां जो दस्सी दिंदा कि जाहू एह होई जांगा तां तुहां वसुआस करन कि में सैई ऐ । 20 में तुहां नैं सच सच ग्लांदा कि जेहडा मेरे घल्लणे आळे जो ग्रहण करदा ऐ, सैह मिन्जो ग्रहण करदा ऐ; कने जेहडा मिन्जो ग्रहण करदा ऐ, सैह मेरे घल्लणे आळे जो ग्रहण करदा ऐ ।

छल करणे दी तरफ इशारा

(मत्ती 26 : 20-25; मरकुस 14 : 17-21; लूका 22 : 21-23)

21 एह ग्लायीं ग्लायीं नैं यीशु आत्मां च परेशान होई गैआ कने एह गवाही दित्ती, में तुहां नैं सच सच ग्लांदा कि तुहां च इक्की मिन्जो पकडुआणां । 22 चले शक करी नैं कि सैह कुस दे बारे च ग्ला दा ऐ, इक्की दूयें बक्खी दिखणां लग्गी पै । 23 तिसदे चेलयां च इक्क जिसियो यीशु प्यार करदा था, यीशु दी छातिया दे पाससे निट्टा होई नैं बैठया था । 24 शमौन पतरसें तिस बक्खी इशारा करी नैं तिसते पूछया, दस्सा भला, सैह कुस दे बारे च ग्ला करदा ऐ । 25 ताहू तिन्हीं तिआं ई यीशु दी छातिया बक्खी निट्टा होई नैं तिसते पूछया, “हे प्रभु सैह कुण ऐ?” 26 यीशुयें जबाब दित्ता, जिसियो में एह रोटी दा टुकडा डुबाई नैं दिंगा सैई ऐ । कने तिन्हीं टुकडा डुबाई नैं शमौन इस्करियोती दे जागते यहूदे जो दित्ता । 27 टुकडा लैदे ई सैतान तिस च समाईया । ताहू यीशुयें तिस नैं ग्लायी, जेहडा तू करा दा ऐ, तौळी कर । 28 अपर बैठणे आळयां च कुसी जो पता नी लग्गा कि तिन्हीं एह ग्लायीं तिस नैं कजो ग्लायी ऐ । 29 यहूदे अल्ल झोली रेंहदी थी इसताई कुच्छना चेलयां समझया कि यीशु तिस नैं ग्ला दा ऐ कि जेहडा कुच्छ अहां जो तौआरे बासती चाइदा सैह खरीदी लें, या एह कि गरीबां जो कुच्छ दै । 30 सैह टुकडा लैई नैं ताहू ई बाहरेयो चली गैआ; कने एह राती दा बगत था ।

नौआं हुक्म

31 जाहूँ सैह बाहरेयो चली गैआ तां यीशुयें ग्लाय़ा, “हुण माणुये दे पुत्रे दी महिमा होई ऐ, कने परमात्में दी महिमा तिस च होई ऐ; 32 जे तिस च परमात्में दी महिमा होई,] तां परमात्मं भी अप्पु च तिसदी महिमा करणी कने तौळी करणी । 33 हे बच्चो, मैं होर थोड़ी देर तुहां अल्ल ऐ : भिरी तुहां मिन्जो तोपणां, कने जिआं मैं यहूदियां नें ग्लाय़ा, जित्थु मैं चलेया ऐ तित्थु तुहां नी आई सकदे, तिआं ई मैं हुण तुहां नें भी ग्लाय़ा दा ऐ । 34 मैं तुहां जो इक्क नौआं हुक्म दिंदा कि इक्की दूये नें प्यार रखा; जिआं मैं तुहां नें प्यार रखेया ऐ, तिआं ई तुहां भी इक्की दूये नें प्यार रखा । 35 जे अप्पु च प्यार रखगे, तां इसते ई सबना जो पता लगणां कि तुहां मेरे चले हन ।”

पतरसे दा मुकरी जाणे दा इशारा

(मत्ती 26 : 31-35; मरकुस 14 : 27-31; लूका 22 : 31-34)

36 शमौन पतरसें तिस नें ग्लाय़ा, हे प्रभु तू कुत्थू चलया ऐ?” यीशुयें जबाब दिता, जित्थु मैं चलेया तित्थु तू मिन्जो पचा नी आई सकदा; अपर इसदे बाद मिन्जो पचा ओणां । 37 पतरसें तिस नें ग्लाय़ा, हे प्रभु, हुण मैं तिज्जो पचाहं कजो नी आई सकदा? मैं तां तिज्जो तांई अपणी जान भी दैई सकदा । 38 यीशुयें जबाब दिता, “क्या तू मिन्जो तांई अपणी जान दिंगा? मैं तिज्जो नें सच सच ग्लांदा कि कुकड़े दे बाग दैणे ते पैहलें तू मेरा त्रै बरी इन्कार करणां ।

परमात्में तिकर पुज्जणे दा रस्ता

14 तुहां दा मन परेशान ना होयें; परमात्में पर वसुआस रखा कने मिन्जो पर भी वसुआस रखा । 2 मेरे पिता दे घरे च मती भरी रैहणे दी जगाह ऐ, जे नी होंदी तां मैं तुहां नें ग्लाय़ा दिंदा; कजोकि मैं तुहां तांई जगाह त्यार करणां चलेया ऐ । 3 कने जे मैं जाई नें तुहां तांई जगाह त्यार करदा, तां भिरी आई नें तुहां जो अप्पु अल्ल लैई जांगा कि जित्थु मैं रैहूँ तित्थु तुहां भी रैहूँ । 4 जित्थु मैं चलेया तुहां तित्थु दा रस्ता जाणदे हन । 5 थोमैं तिस नें ग्लाय़ा, हे प्रभु, अहां नी जाणदे कि तू कुत्थू चलेया ऐ; तां रस्ते दा किआं पता हुंगा?” 6 यीशुयें तिस नें ग्लाय़ा, रस्ता कने सच कने जिन्दगी मैं ऐ; मिन्जो बगैर कोई भी पिता अल्ल नी पुज्जी सकदा 7 जे तुहां मिन्जो जाणया होंदा, तां मेरे पिता जो भी जाणदे; कने हुण तिसियो जाणदे हन, कने तिसियो दिख्या भी ऐ । 8 फिलिप्पुसैं तिस नें ग्लाय़ा, हे प्रभु, पिता जो अहां जो दस्सी दै, ऐही अहां तांई बोहत ऐ । 9 यीशुयें तिस नें ग्लाय़ा, “हे फिलिप्पुस, मैं इतणे दिना ते तुहां सौगी ऐ, कने क्या तू मिन्जो नी जाणदा? जिन्हीं मिन्जो दिख्या ऐ तिन्हीं पिता जो दिख्या ऐ । तू कजो ग्लाय़ा दा ऐ कि पिता जो अहां जो दस्स? 10 क्या तू वसुआस नी करदा कि मैं पिता च ऐ कने पिता मिन्जो च ऐ; एह गल्लां जेहिड्यां मैं तुहां नें करदा ऐ, अपणियां तरफा ते नी ग्लांदा, अपर पिता मिन्जो च रैई नें अपणयां कम्मा करदा ऐ । 11 मेरा वसुआस करा कि मैं पिता च ऐ कने पिता मिन्जो च ऐ; नी तां कम्मा दिया बजाह ते मेरा वसुआस करा । 12 मैं तुहां नें सच सच ग्लांदा कि जेहड़ा मिन्जो पर वसुआस करदा ऐ, एह कम्म जेहड़े मैं करदा सैह भी करगा, अपर इन्हां ते भी बडे कम्म करणे हन, कजोकि मैं पिता अल्ल चलेया । 13 जेहड़ा कुच्छ तुहां मेरे नांये ते मंगगे, सैई मैं करणां कि पुत्रे दिया बजाह ते पिता दी महिमा होयें । 14 जे तुहां मिन्जो ते मेरे नांये ते कुच्छ मंगगे, तां मैं सैह करणां ।

पवित्र आत्मां दा वादा

15 जे तुहां मिन्जो नें प्यार रखदे हन, तां मेरे हुक्मा जो मनगे । 16 मैं पिता नें विणती करगा, कने सैह तुहां जो इक्क होर सहायक दिंगा कि सैह हमेशा तुहां सौगी रैहूँ । 17 मतलब सच दा आत्मां, जिसियो संसार ग्रहण नी करी सकदा, कजोकि सैह ना तिसियो दिखदा ऐ कने ना तिसियो जाणदा ऐ; तुहां तिसियो जाणदे हन, कजोकि सैह तुहां सौगी रैहदा ऐ, कने सैह तुहां च हुगा ।

18 मैं तुहां जो अनाथ नी छडणां, मैं तुहां अल्ल ओंदा ऐ । 19 कने थोड़ी देर रैई गैई ऐ कि भिरी संसारे मिन्जो नी दिखणां, अपर तुहां मिन्जो दिखणां; इसताई कि मैं जिंदा ऐ, तुहां भी जिंदा रैहणां । 20 तिस दिन तुहां जाणी लेंगे कि मैं अपणे पिता च ऐ, कने तुहां मिन्जो च, कने मैं तुहां च । 21 जिस अल्ल मेरे हुक्म हन कने सैह तिन्हां जो मनदा ऐ, सैई मिन्जो नें प्यार रखदा ऐ; कने

जेहड़ा मिन्जो नें प्यार रखदा ऐ तिस नें मेरा पिता प्यार रखणां, कने मैं तिस नें प्यार रखणां कने अपणे आप्पे जो तिस पर प्रकट करगा । 22 तिन्हीं यहूदें जेहड़ा इस्करियोती नी था, तिस नें ग्लाय़ा, “हे प्रभु, क्या होया कि तू अप्पु जो अहां पर प्रकट करणां चाहदा ऐ कने संसारे पर नी?” 23 यीशुयें तीसियो जबाब दिता, “जे कोई मिन्जो नें प्यार रखगा तां सैह मेरे वचना जो मनगा, कने मेरा पिता तिस नें प्यार रखगा, कने अहां तिस अल्ल ओणां कने तिस सौगी रैहणां । 24 जेहड़ा मिन्जो नें प्यार नी रखदा, सैह मेरेयां वचना नी मनदा; कने जेहड़ा वचन तुहां सुणदे हन सैह मेरा नी अपर पिता दा ऐ, जिन्हीं मिन्जो घल्लया । 25 एह गल्लां मैं तुहां सौगी रैही करी तुहां नें ग्लाय़ा हन । 26 अपर सहायक मतलब पवित्र आत्मां जिसियो पिता मेरे नांये ते घल्लगा, सैह तुहां जो सारियां गल्लां सखांगा, कने जेहड़ा कुच्छ मैं तुहां नें ग्लाय़ा ऐ सैह सारा तुहां जो याद करांगा । 27 मैं तुहां जो शांति दैई नें चलेया, मैं अपणी शांति तुहां जो दिंदा ऐ, जिआं संसार दिंदा ऐ, मैं तुहां जो नी दिंदा : तुहां दा मन परेशान नी होयें कने ना ई डरे । 28 तुहां सुणया कि मैं तुहां नें ग्लाय़ा, मैं चली पैआ, कने तुहां अल्ल भिरी ओणां । जे तुहां मिन्जो नें प्यार रखदे, तां इसा गल्ला ते खुश होंदे कि मैं पिता अल्ल चली पैआ, कजोकि पिता मिन्जो ते बडा ऐ । 29 कने मैं ई हुण इस होणे ते पैहलें तुहां नें ग्लाय़ा दिया ऐ, कि जाहूँ सैह होई जां, तां तुहां वसुआस करन । 30 मैं हुण तुहां नें होर मतिआं गल्लां नी करणियां, कजोकि इस संसारे दा अधिकारी ओआ दा ऐ । मिन्जो पर तिसदा कोई हक्क नी; 31 अपर एह इसताई होणां लगेया ऐ कि संसारे जो पता लग्गी जां कि मैं पिता नें प्यार रखदा ऐ, कने जिआं पितें मिन्जो हुक्म दित्या मैं तिआं ई करदा । उठा ऐत्थु ते चली पांदे ।

यीशु मसीह सच्ची अंगूरा दी बेल

15 सच्ची अंगूरा दी बेल मैं ऐ, कने मेरा पिता जमीदार ऐ । 2 जेहड़ी डाळी मिन्जो च ऐ कने फळदी नी ऐ, तिसायो सैह बड्डी दिंदा ऐ जेहड़ी फळदी ऐ तिसायो छांटदा तांकि होर फळें । 3 तुहां तां तिस वचने दिया बजाह ते जेहड़ा मैं तुहां नें ग्लाय़ा ऐ, शुद्ध हन । 4 तुहां मिन्जो च बणी रैहूँ, कने मैं तुहां च । जिआं डाळी जे अंगूरा दी बेली च बणी नी रैहूँ तां अप्पु ते नी फळी सकदी, तिआं ई तुहां भी जे मिन्जो च बणी नी रैहूँ तां नी फळी सकदे हन । 5 मैं अंगूरा दी बेल ऐ तुहां डाळियां हन । जेहड़ा मिन्जो च बणी रैहदा ऐ कने मैं तिस च, सैह मते फळ दिंदा ऐ, कजोकि मिन्जो ते बखर होई नें तुहां कुच्छ भी नी करी सकदे । 6 जे कोई मिन्जो च बणी नी रैहूँ, तां सैह डाळिया साइआं सट्टी दैणां, कने सूकी जाणां ऐ; कने माणुआं तिन्हां जो बटीणी नें अग्गी च पाई दिंदे हन, कने सैह फकूई जांदे हन । 7 जे तुहां मिन्जो च बणी रैहूँ, कने मेरा वचन तुहां च बणी रैहूँ, तां जेहड़ा मर्जी मंगगे कने सैह तुहां तांई होई जाणां । 8 मेरे पिता दी महिमा इसी ते होंदी ऐ कि तुहां मता सारा फळ लैई करी ओन तांई तुहां मेरे चले होंगे । 9 जिआं पितें मिन्जो नें प्यार रखेया, तिआं ई मैं भी तुहां नें प्यार रखेया; मेरे प्यारे च बणी रैहूँ । 10 जे तुहां मेरे हुक्मां जो मनगे, तां मेरे प्यारे च बणी रैहूँ; जिआं कि मैं अपणे पिता दे हुक्मां जो मानया ऐ, कने तिसदे प्यारे च बणी रैहदा ऐ । 11 मैं एह गल्लां तुहां नें इसताई ग्लाय़ां हन, कि मेरी खुशी तुहां च बणी रैहूँ, कने तुहां दी खुशी पूरी होई जां ।

12 मेरा हुक्म एह ऐ, कि जिआं मैं तुहां नें प्यार रखेया, तिआं ई तुहां भी इक्की दूये नें प्यार रखा । 13 इसते बडा प्यार कुसी दा नी कि कोई अपणे साथियां तांई अपणी जान दै । 14 जेहड़ा हुक्म मैं तुहां जो दित्या, जे तिसियो मनन तां तुहां मेरे साथी हन । 15 अज्जे ते मैं तुहां जो दास नी ग्लाय़ां, कजोकि दास नी जाणदा कि तिसदा मालक क्या करदा ऐ; अपर मैं तुहां जो साथी ग्लाय़ा ऐ, कजोकि मैं जेहिड्यां गल्लां अपणे पिता ते सुणियां, सैह सारियां दरस्सी दित्तियां । 16 तुहां मिन्जो नी चुणया अपर मैं तुहां जो चुणया ऐ कने तुहां जो न्युक्त कित्या कि तुहां जाई नें फळ लैयोन कने तुहां दा फळ बणी रैहूँ, कि तुहां मेरे नांये ते जेहड़ा कुच्छ पिता ते मंगन, सैह तुहां जो दै । 17 इन्हां गल्लां दे हुक्म मैं तुहां जो इसताई दित्ते कि तुहां इक्की दूये नें प्यार रखन ।

संसार दे बर

18 जे संसार तुहां नें बर रखदा ऐ, तां तुहां जाणदे हन कि तिन्हीं तुहां ते पैहलें मिन्जो नें बर रखेया । 19 जे तुहां संसारे दे होंदे, तां संसार अपणेयां नें प्यार रखदा; अपर इसा बजाह ते कि तुहां संसारे दे नी, अपर मैं तुहां जो संसारे ते चुणी लैआ ऐ, इसताई संसार तुहां नें बर रखदा ऐ । 20 जेहडी गल मैं तुहां नें ग्लाइयो थी, दास अपणे मालके ते बडा नी होंदा, तिसा जो याद रखा । जे तिन्हां मिन्जो सताया, तां तुहां जो भी सताणां; जे तिन्हां मेरी गल मनी, तां तुहां दी भी मनणी ऐ । 21 अपर एह सब कुच्छ तिन्हां मेरे नांये दिया बजाह ते तुहां नें करणां, कजोकि सैह मेरे घल्लणे आळे जो नी जाणदे । 22 जे मैं नी ओंदा कने तिन्हां नें गल्लां नी करदा, अपर हुण तिन्हां अल्ल तिन्हां दे पापे ताई कोई भाना नीये । 23 जेहडा मिन्जो नें बर रखदा ऐ, सैह मेरे पिता नें भी बर रखदा ऐ । 24 जे मैं तिन्हां च सैह कम्म नी करदा जेहडे होर कुणी नी किचे, तां सैह पापी नी होंदे; अपर हुण तां तिन्हां मिन्जो कने मेरे पिता दूनी जो दिख्या कने दूनी नें बर रखेया । 25 एह इसताई होया कि सैह वचन पूरा होयें, जेहडा तिन्हां दे नियमा च लिख्या ऐ, तिन्हां मिन्जो नें बेकार बर किता । 26 अपर जाहू सैह सहायक ओणां, जिसियो मैं तुहां अल्ल पिता दे पाससे ते घल्लणां मतलब सच दा आत्मां जेहडा पिता दे पाससे ते निकळदा ऐ, तां तिन्हीं मेरी गवाही देंगी ऐ । 27 कने तुहां भी मेरे गवाह हन कजोकि तुहां शुरु ते मिन्जो सौगी रैहयो हन ।

16 एह गल्लां मैं तुहां नें इसताई ग्लाइयां कि तुहां ठोकर नी खान । 2 सैह तुहां जो आराधनालायां ते कड्डी दिंगे, अपर सैह बत ओआ दा ऐ, कि जेहडा कोई तुहां जो मारगा सैह समझगा कि मैं परमात्में दी सेवा करदा ऐ । 3 इआं तिन्हां इसताई करणां कि तिन्हां ना तां पिता जो जाणेया ऐ कने ना तां मिन्जो जाणदे हन । 4 अपर एह गल्लां मैं ने इसताई तुहां नें ग्लाइयां, कि जाहू इन्हां दा बत ओयें तां तुहां जो याद आई जां कि मैं तुहां नें पैहलें ई ग्लाइ दित्या था ।

पवित्र आत्मां दे कम्म

मैंई शुरु च तुहां नें एह गल्लां इसताई नी ग्लाइयां कजोकि मैं तुहां सौगी था । 5 अपर हुण मैं अपणे घल्लणे आळे अल्ल चली पैआ; कने तुहां च कोई मिन्जो ते नी पूछ दा, तू कुत्थू चली पैआ ऐ?" 6 अपर मैं जेहिड्यां एह गल्लां तुहां नें ग्लाइयां हन, इसताई तुहां दा मन दुखे नें भरौई गैआ ऐ । 7 तमी मैं तुहां नें सच ग्लांदा कि मेरा जाणां तुहां ताई खरा ऐ, कजोकि जे मैं नी जां ता सैह सहायक तुहां अल्ल नी ओणां; अपर जे मैं जां तां तिसियो तुहां अल्ल घल्लगा । 8 जाहू सैह ओगा तां पाप कने धार्मिकता कने न्याय दे बारे च संसारे दा शक दूर करगा; 9 पाप दे बारे च इसताई कि सैह मिन्जो पर वसुआस नी करदे । 10 कने धार्मिकता दे बारे च इसताई कि मैं पिता अल्ल चली पैआ, कने तुहां मिन्जो भिरी नी दिखगे; 11 न्याय दे बारे च इसताई कि संसारे दा अधिकारी अपराधी ठहराया गैआ ऐ ।

12 मिन्जो तुहां नें होर भी मतिआं गल्लां ग्लाणियां हन, अपर हुण तुहां तिन्हां जो सैई नी सकदे । 13 अपर जाहू सैह, मतलब सच दा आत्मां ओणां, तां तुहां जो सब सचाईया दा रस्ता दस्सगा, कजोकि सैह अपणियां तरफा ते नी अपर जेहडा कुच्छ सुणना सैई दस्सणां, कने ओणेआळियां गल्लां तुहां नें दस्सणियां हन । 14 तिन्हीं मेरी महिमा करणी ऐ, कजोकि तिन्हीं मेरियां गल्लां ते तुहां जो दस्सणां । 15 जेहडा कुच्छ पिता दा ऐ, सैह सब मेरा ऐ; इसताई मैं ग्लाय्या कि सैह मेरियां गल्लां जो लैई नें तुहां जो दस्सगा ।

दुख सुखे च बदली जांगा

16 थोडिया देरा बाद तुहां मिन्जो नी दिखगे, कने भिरी थोडी देरा बाद मिन्जो दिखगे । 17 ताहू तिसदे कुच्छना चेलयां अप्पु च ग्लाय्या, एह क्या ऐ जेहडा सैह अहां नें ग्लांदा ऐ, थोडिया देरा बाद तुहां मिन्जो नी दिखगे, कने भिरी थोडिया देरा बाद मिन्जो दिखगे? कने एह इसताई कि मैं पिता अल्ल चलेया । 18 ताहू तिन्हां ग्लाय्या, एह थोडी देरा बाद, जेहडा एह ग्लांदा ऐ, क्या गल्ल ऐ, अहां नी जाणदे कि सैह क्या ग्लांदा ऐ । 19 यीशुयें एह जाणी नें कि सैह मिन्जो ते पूछणां चाहंदे हन, तिन्हीं तिन्हां नें ग्लाय्या, क्या तुहां अप्पु च मेरिया इसा गल्ला दे बारे च पूछताछ करा दे हन, थोडिया देरा बाद तुहां

मिन्जो नी दिखणां, कने भिरी थोडिया देरा बाद मिन्जो दिखणां? 20 मैं तुहां नें सच सच ग्लांदा कि तुहां रोणां कने भिरी दुख मनाणां, अपर संसार खुशी मनागा; तुहां जो दुख होणां, अपर तुहां दुख खुशिया च बदली जाणां । 21 प्रसूता दे बग्त जणांसा जो दुख हुंदा ऐ, कजोकि तिसा दा दुखे दा बग्त आई पुज्रया ऐ, अपर जाहू सैह जागते जो जन्म दैई दिंदी ऐ, तां इसा खुशिया च कि संसारे च इक्क माणु पैदा होया, तिस पीडा जो भिरी याद नी करदी । 22 तिआं ई तुहां जो भी हुण तां दुख ऐ, अपर जाहू मैं तुहां नें भिरी मिलणां कने तुहां दे मने च खुशी आई जाणी; कने तुहां दिया खुशिया जो कोई तुहां ते खोई नी सकदा । 23 तिस दिन तुहां मिन्जो ते कुच्छ नी पूछणां । मैं तुहां नें सच सच ग्लांदा, जे पिता ते कुच्छ मंगगे, तां सैह मेरे नांये ते तुहां जो दिगा । 24 अल्ली तिकर तुहां मेरे नांये ते कुच्छ नी मंगेया; मंगगे तां पांगे तांकि तुहां दी खुशी पूरी होई जां ।

संसारे पर जीत

25 मैं एह गल्लां तुहां नें उदारणां च ग्लाइयां हन, अपर सैह बग्त ओणां ऐ कि मैं तुहां नें भिरी उदारणां च नी ग्लांगा, अपर खुली नें तुहां जो पिता दे बारे च दस्सणां । 26 तिस दिन तुहां मेरे नांये ते मंगगे; कने मैं तुहां नें एह नी ग्लांदा कि मैं तुहां तांई पिता नें विणती करगा; 27 कजोकि पिता तां अप्पु ई तुहां नें प्यार रखदा ऐ, इसताई कि तुहां मिन्जो नें प्यार रखेया ऐ कने एह भी वसुआस कित्या ऐ कि मैं पिता दे पाससे ते आया । 28 मैं पिता दे पाससे ते संसारे च आया; मैं भिरी संसारे जो छड्डी नें पिता अल्ल चलेया ।"

29 तिसदे चले ग्लाणां लगगे, दिख, हुण तां तू खुली नें ग्ला करदा ऐ, कने कोई उदारण नी ग्ला करदा । 30 हुण अहां जाणी गयो हन, कि तू सब कुच्छ जाणदा ऐ, कने इसदी जरूरत नी कि कोई तिजो ते कुच्छ पूछे; इस ते अहां वसुआस करदे हन कि तू परमात्में दे पाससे ते आया ऐ । 31 एह सुणी नें यीशुयें तिन्हां नें ग्लाय्या, "क्या तुहां अल्ली वसुआस करदे हन? 32 दिखा, सैह बग्त ओणां लगेया ऐ अपर आई रैहूआ ऐ कि तुहां सबना लग्ग लग्ग होई नें अपणां अपणां रस्ता नापी लैणां, कने मिन्जो किल्ला छड्डी देंगां; तमी मैं किल्ला नी कजोकि पिता मिन्जो सौगी ऐ । 33 मैं एह गल्लां तुहां नें इसताई ग्लाइयां हन कि तुहां जो मिन्जो च शांति मिले । संसारे च तुहां जो दुख हुंदा ऐ, अपर हौंसला रखा, मैं संसारे जो जीती लैआ ऐ ।"

यीशु मसीह दी महायाजकीय प्रार्थना : अप्पु ताई

17 यीशुयें एह गल्लां ग्लाइयां कने अपणी अखी अम्बरे दे पाससे चुकी नें ग्लाय्या, हे पिता, सैह बग्त आई रैहूआ ऐ; अपणे पुत्रे दी महिमा कर कि पुत्र भी तेरी महिमा करे, 2 कजोकि तैं तिसियो सारे प्राणियां पर हक्क दित्या, कि जिन्हां जो तैं तिसियो दित्या ऐ तिन्हां सारेयां जो सैह सदा दी जिन्दगी दें । 3 कने सदा दी जिन्दगी एह ऐ कि सैह तिजो इक्कमात्र सब्बे परमात्में जो कने यीशु मसीह जो, जिसियो तैं घल्लया ऐ, जाणन । 4 जेहडा कम्म तैं मिन्जो करणे जो दित्या था, तिसियो पूरा करी नें मैं धरतिया पर तेरी महिमा किती ऐ । 5 हुण हे पिता, तू अपणे सौगी मेरी महिमा तिसा महिमा नें कर जेहडी संसारे दिया सृष्टिया ते पैहले, मेरी तिजो सौगी थी ।

अपणे चेलयां ताई

6 मैं तेरा नां तिन्हां माणुआं दे सामणे अंदा ऐ जिन्हां जो तैं संसारे च मिन्जो ताई दित्ता । सैह तेरे थे कने तैं तिन्हां जो मिन्जो ताई दित्ता, कने तिन्हां तेरे वचने जो मनी लैआ ऐ । 7 हुण सैह जाणी गयो हन कि जेहडा कुच्छ तैं मिन्जो दित्या ऐ सैह सारा तेरे पाससे ते ऐ । 8 कजोकि जेहडे वचन तैं मिन्जो दित्तयो, मैं सैह वचन तिन्हां अल्ल पज्जाई दित्ते; कने तिन्हां वचना जो ग्रहण किता, कने सच सच जाणी लैआ ऐ कि मैं तेरे पाससे ते आया, कने वसुआस करी लैआ ऐ कि तैंई मिन्जो घल्लया । 9 मैं तिन्हां तांई विणती करदा ऐ, संसारे तांई विणती नी करदा अपर तिन्हां तांई जेहडे तैं मिन्जो दित्तयो हन, कजोकि सैह तेरे हन; 10 कने जेहडा कुच्छ मेरा ऐ सैह सब तेरा ऐ, कने जेहडा तेरा ऐ सैह मेरा ऐ, कने इन्हां ते मेरी महिमा प्रकट होई ऐ । 11 मैं हुण संसारे च नी रैहणां, अपर इन्हां संसारे च रैहणां, कने मैं तिजो अल्ल ओआ दा । हे पवित्र पिता, अपणे तिस नांये ते जेहडा तैं मिन्जो दित्या ऐ, तिन्हां दी रक्षा कर कि सैह भी अहां साइआं इक्क होंन । 12 जाहू मैं तिन्हां सौगी था, तां मैं तेरे तिस नांये ते,

जेहड़ा तैं मिन्जो दित्या ऐ तिन्हां दी रक्षा किती । मैं तिन्हां दी चौकसी किती, कने विनाश दे पुत्तरे जो छडी तिन्हां च होर कोई नाश नी होया, इसताई कि पवित्रशास्त्रे च जेहड़ा ग्लया सैह पूरा होयें । 13 अपर हुण मैं तिजो अल्ल ओआ दा ऐ, कने एह गल्लां संसारे च ग्लांदा ऐ, कि सैह मेरी खुशी अपणे च पूरी पान । 14 मैं तेरा वचन तिन्हां अल्ल पज्जाई दित्ता ऐ; कने संसारें तिन्हां नैं बर किता, कजोकि जिआं मैं संसारे दा नी; तिआं ई सैह भी संसार दे नी हन । 15 मैं एह विणती नी करदा ऐ कि तू तिन्हां जो संसारे ते चुकी लैआ; अपर एह कि तिन्हां जो तिस दुष्ट ते बचाई रख । 16 जिआं मैं संसारे दा नी ऐ, तिआं ई सैह भी संसारे दे नी हन । 17 सचाईया नैं तिन्हां जो पवित्र कर: तेरा वचन सच ऐ । 18 जिआं तैं मिन्जो संसारे च घल्लया, तिआं ई मैं भी तिन्हां जो संसारे च घल्लया; 19 कने तिन्हां ताई मैं अप्पु जो पवित्र करदा, तांकि सैह भी सचाईया नैं पवित्र कित्ते जान ।

सारे वसुआसियां ताई

20 "मैं सिर्फ इन्हां ताई विणती नी करदा, अपर तिन्हां ताई भी जेहड़े इन्हां वचना दे दुआरा मिन्जो पर वसुआस करगे । 21 कि सैह सारे इक्क हॉन; जिआं तू हे पिता मिन्जो च ऐ, कने मैं तिजो च, तिआं ई सैह भी अहां च होन, जिस ते संसार वसुआस करे कि तैं मिन्जो घल्लया ऐ । 22 सैह महिमा जेहडी तैं मिन्जो दित्ती मैं तिन्हां जो दित्ती ऐ, कि सैह तिआं ई इक्क हॉन जिआं कि अहां इक्क हन, 23 मैं तिन्हां च कने तू मिन्जो च कि सैह सिद्ध होई नैं इक्क होई जांन कने संसार जाणे कि तैं ई मिन्जो घल्लया, कने जिआं तैं मिन्जो नैं प्यार रखेया तिआं ई तिन्हां नैं प्यार रखेया । 24 हे पिता, मैं चाहंदा कि जिन्हां जो तैं मिन्जो दित्या ऐ, जित्थू मैं ऐ तित्थू सैह भी मिन्जो सौगी होन, कि सैह मेरी तिसा महिमा जो दिखन जेहडी तैं मिन्जो दित्ती ऐ, कजोकि तैं संसारे दी सुष्टिया ते पैहले मिन्जो नैं प्यार रखेया । 25 हे धार्मिक पिता, संसारें मिन्जो नी जाणेया, अपर मैं तिजो जाणया; कने इन्हां भी जाणेया कि तैं ई मिन्जो घल्लया ऐ । 26 मैं तेरा नां तिन्हां जो दस्सया कने दस्सदा रेंगा कि जेहड़ा प्यार तिजो मिन्जो नैं था सैह तिन्हां च रेंह, कने मैं तिन्हां च रेंह ।"

यीशु मसीह जो धोखे नैं पकड़णां

(मत्ती 26 : 47-56; मरकुस 14 : 43-50; लूका 22 : 47-53)

18 यीशुयें एह गल्लां ग्लाई नैं अपणे चेलयां सौगी किद्रोन नाले दे पारले पाससेयो गैआ । तित्थू इक्क बाग था, जिस च सैह कने तिसदे चले गै । 2 तिसियो पकडुआणे आळा यहूदा भी सैह जगाह जाणदा था, कजोकि यीशु अपणे चेलयां सौगी तिसा जगाह जांदा था । 3 ताहू यहूदा, सैनिकां दे इक्की झुंडे जो कने प्रधान याजकां कने फरीसियां दे पाससे ते प्यादयां जो लेई नैं, दिये कने मशालां कने हत्थयां जो लेई नैं तिसा जगाह आया । 4 ताहू यीशु, तिन्हां सारियां गल्लां जो जेहिडयां तिस पर होणे आळियां थियां जाणी नैं, निकळेया कने तिन्हां नैं ग्लया, कुसियो तोपा दे हन?" 5 तिन्हां तिसियो जबाब दित्ता, यीशु नासरिये जो ।" यीशुयें तिन्हां नैं ग्लया, मैं ऐ तिसियो पकडुआणे आळा यहूदा भी तिन्हां सौगी खडौतेया था । 6 तिसदे एह ग्लांदा ई, मैं ई ऐ, "सैह पचाई हटी नैं जमीना पर पैई गै । 7 ताहू तिन्हीं भिरी तिन्हां ते पूछ्या, तुहां कुसियो तोपा दे हन ।" सैह ग्लाणां लगे, "यीशु नासरिये जो" । 8 यीशुयें जबाब दित्ता, "मैं तां तुहां नैं ग्लाई बैठा ऐ कि मैं ई ऐ, जे मिन्जो तोपदे हन तां इन्हां जो जाणां दैआ ।" 9 एह इसताई होया कि सैह वचन पूरा होयें जेहड़ा तिन्हीं ग्लया था, "जेहड़े तैं मिन्जो दित्ते तिन्हां ते मैं इक्क भी नी गुवाआं ।" 10 ताहू शमौन पतरसे तलवार, जेहडी तिस अल्ल थी, खीजी कने महायाजके दे दासे पर चलाई नैं तिसदा सजा कनं बड्डी दित्ता । तिस दासे दा नां मलखुस था । 11 ताहू यीशुयें पतरसे जो ग्लया, अपणिया तलवारा म्याना च रख । जेहड़ा कटोरा पितें मिन्जो दित्या ऐ, क्या मैं तिसियो नी पीयें ।

हन्ना कने यीशु मसीह

12 ताहू सैनिकां कने तिन्हां दे सूबेदार कने यहूदियां दे प्यादयां यीशु जो पकडी नैं बन्नी लैआ, 13 कने पैहले तिसियो हना अल्ल लैई गै, कजोकि सैह तिस साले दे महायाजके काइफे दा सौरा था । 14 एह सैई काइफा था, जिन्हीं यहूदियां जो सलाह दित्तियो थी कि अहां दे लोकां ताई इक्की मरदे दा मरना खरा ऐ ।

पतरसे दा मुकरना

(मत्ती 26: 69,70; मरकुस 14: 66-68; लूका 22: 55-57)

15 शमौन पतरस कने इक्क होर चेला भी यीशु दे पचाह चली पैआ । एह चेला महायाजके दा बाकम था, इसताई सैह यीशुये सौगी महायाजके दे अंगणे च गैआ । 16 अपर पतरस बाहर दुरआजे पर खडौई रेंहआ । ताहू सैह दूआ चेला जेहड़ा महायाजके दा बाकम था, बाहर निकळेया कने नौकराणियां नैं ग्लाई नैं पतरसे जो अंदर लैई आया । 17 तिसा नौकराणियां नैं जेहडी दुआरपालिनी थी, पतरसे नैं ग्लाणां लगी, कुत्थी तू भी इस माणु दे चेलयां च इक्क नी ऐ?" तिन्हीं ग्लया, "मैं नी ऐ ।" 18 दास कने प्यादे ठंडी दिया बजाह ते क्योले परखाई नैं अग्गी तपा करदे थे, कने पतरस भी तिन्हां सौगी अग्गी तपाणां खडौई गैआ ।

महायाजके दे दुआरा यीशु मसीह दी पूछताछ

(मत्ती 26 : 59-66; मरकुस 14 : 55-64; लूका 22 : 66-71)

19 ताहू महायाजके यीशु ते तिसदे चेलयां दे बारे च कने तिसदिया शिक्षा दे बारे च पूछ ताछ किती । 20 यीशुयें तिसियो जबाब दित्ता, "मैं संसारें नैं खुली नैं गल्लां किन्तियां; मैं आराधनालयां कने मंदरे च, जित्थू सारे यहूदी कठोरदे थे, सदा शिक्षा दित्ती कने लुकी नैं कुच्छ भी नी ग्लया । 21 तू मिन्जो ते कजो पूछा दा ऐ? सुनणे आळयां ते पूछ कि मैं तिन्हां नैं क्या ग्लया दिख, सैह जाणदे हन कि मैं क्या क्या ग्लया ऐ ।" 22 जाहू तिन्हीं एह ग्लया, तां प्यादयां च इक्की जेहड़ा बक्खे खडूतेया था, यीशु जो थपड मारी नैं ग्लया, क्या तू महायाजके जो इस तरीके जबाब दिंदा ऐ?" 23 यीशुयें तिसियो जबाब दित्ता, "जे मैं बुरा ग्लया, तां तिसा बुराईया दी गवाही दे; अपर जे खरा ग्लया, तां मिन्जो कजो मारा दा ऐ?" 24 हने तिसियो बनेयो ई काइफा महायाजके अल्ल घली दित्ता ।

पतरसे दा दुवारी भिरी मुकरणां

(मत्ती 26 : 71-75; मरकुस 14 : 69-72; लूका 22 : 58-62)

25 शमौन पतरस खडौई नैं अग्गी तपा दा था । ताहू तिन्हां तिस नैं ग्लया, कुत्थी तू भी तिसदे चेलयां च तां नी ऐ?" तिन्हीं मुकरी नैं ग्लया, मैं नी ऐ ।" 26 महायाजके दे दासां च इक्की, जेहड़ा तिसदे रिश्तेदारां च था जिसदा कनं पतरसें बड्डी दित्या था, ग्लाणां लग्गा, "क्या मैं तिजो तिस सौगी बागे च नी दिख्या था?" 27 पतरस भिरी मुकरी गैआ, कने ताहू ई कुकड़ें बांग दित्ती ।

पिलातुस कने यीशु मसीह

(मत्ती 27 : 1,2, 11-14; मरकुस 15 : 1-5; लूका 23 : 1-5)

28 ताहू सैह यीशु जो काइफा दे बक्खे आले किल्ले जो लैई गैआ, कने भ्यागा दा बत था, अपर सैह अप्पु किल्ले अंदर नी गैआ तांकि अशुद्ध नी होन अपर फसह खाई सकन । 29 ताहू पिलातुस तिन्हां अल्ल बाहर निकळी नैं आया कने ग्लाणां लग्गा, "तुहां इस माणुये पर कुसा गल्ला दा दोष लगां दे हन?" 30 तिन्हां तिसियो जबाब दित्ता, "जे सैह कुकर्मी नी हुंदा तां अहां तिसियो तेरे हुआले नी करदे ।" 31 पिलातुसें तिन्हां नैं ग्लया, "तुहां ई इसियो लैई जाई करी अपणे नियमे मताबक तिसदा न्याय करा ।" यहूदी माणु तिस नैं ग्लाणां लगे, "अहां जो हक्क नीये कि कुसी दी जात्र लैन ।" 32 एह इसताई होया कि यीशु दी सैह गल्ल पूरी होयें जेहडी तिन्हीं एह इशारा दिंदे होये ग्लाईयो थी कि तिसदी मौत किआं होंगी ।

33 ताहू पिलातुस भिरी किल्ले अंदर गैआ, कने यीशु जो सवदी नैं तिसते पूछ्या, क्या तू यहूदियां दा राजा ऐ?" 34 यीशुयें जबाब दित्ता, "क्या तू एह गल्ल अपणियां तरफा ते ग्लांदा ऐ या दूयां मेरे बारे च तिजो नैं एह ग्लया ऐ?" 35 पिलातुसें जबाब दित्ता, "क्या मैं यहूदी ऐ? तेरी ई जाति कने प्रधान याजकां तिजो मेरे हुआले कित्या ऐ । तैं क्या कित्या ऐ?" 36 यीशुयें जबाब दित्ता, मेरा राज इस संसारे दा नीये; जे मेरा राज इस संसारे दा होंदा, तां मेरे दास लडदे कि मैं यहूदियां दे हुआले नी हुंदा अपर मेरा राज ऐत्थू दा नीये ।" 37 पिलातुसें तिस नैं ग्लया, "तां क्या तू राजा ऐ?" यीशुयें जबाब दित्ता, तू ग्लादा ऐ कि मैं राजा ऐ । मैं इसताई जन्म लैआ कने इसताई संसारे च आया कि सच दी गवाही दें । जेहड़ा कोई सच दा ऐ, सैह मेरी उआज सुणदा ऐ ।" 38 पिलातुस तिस नैं ग्लाणां लग्गा, "सच क्या ऐ?"

मौती दी सज़ा दा हुकम

(मत्ती 27 : 15-31; मरकुस 15 : 6-20; लूका 23 : 13-25)

एह ग्लाई नैं सैह भिरी यहूदियां अल्ले ते निकळी गैआ कने तिन्हां नैं ग्लाय़ा, मँ तां तिस च कोई दोष नी पांदा । ³⁹ अपर तुहां दी एह रीत ऐ कि मँ फसह च तुहां तांई इक्की माणुये जो छड्डी दैं कने क्या तुहां चाहंदे हन कि मँ तुहां तांई यहूदियां दे राजा जो छड्डी दैं । ⁴⁰ ताहलू तिन्हां भिरी डडी नैं ग्लाय़ा, इसियो नी, अपर अहां तांई बरअब्बा जो छड्डी दैंआ । कने बरअब्बा डाकू था ।

19 इसा गल्ला पर पिलातुसं यीशु जो कोडे लगुआये । ² सपाईयां कंडेयां दा मुकुट बणाई नैं तिसदे मुँडे पर रखया, कने तिसियो बैजनी कपडे लौआई दित्ते, ³ कने तिस अल्ल आई आई नैं ग्लाय़ां लगे, "हे यहूदियां दे राजा, प्रणाम !" कने तिसियो थपड़ भी मारे । ⁴ ताहलू पिलातुसं भिरी बाहर निकळी नैं लोकां नैं ग्लाय़ा. "दिखा, मँ तिसियो तुहां अल्ल भिरी लैई अंदा; तांकि तुहां जाणन कि मँ इस च कोई भी दोष नी पांदा ।" ⁵ ताहलू यीशु कंडेयां दा मुकुट कने बैजनी कपडे लगाई नैं बाहर निकळेया; कने पिलातुसं तिन्हां नैं ग्लाय़ा, दिखा एह माणु !" ⁶ जाहलू प्रधान याजकां कने प्यादेयां तिसियो दिख्या, तां डडी नैं ग्लाय़ां लगे, इसियो सूलिया पर टंगा, सूलिया पर ।" पिलातुसं तिन्हां नैं ग्लाय़ा, "तुहां ई इसियो लैई नैं सूलिया पर टंगा, कजोकि मँ तिस च कोई दोष नी पांदा ।" ⁷ यहूदियां तिसियो जबाब दित्ता, "अहां भी नियम हन कने तिस नियमे मताबक सैह मरणे दा हक्कदार ऐ, कजोकि तिन्हीं अप्पु जो परमात्मं दा पुत्र बणांया ऐ ।" ⁸ जाहलू पिलातुसं एह गल्ल सुणी तां होर भी डरी गैआ, ⁹ कने भिरी किल्ले दे अंदर गैआ कने यीशुये नैं ग्लाय़ा, तू कतांह दा ऐ?" अपर यीशुये तिसियो कुच्छ भी जबाब नी दित्ता । ¹⁰ इसा गल्ला पर पिलातुसं तिस नैं ग्लाय़ा, "मिन्जो नैं कजो नी ग्लादा ऐ? क्या तू नी जाणदा कि तिज्जो छडणे दा हक्क मिन्जो ऐ, कने तिज्जो सूलिया पर टंगणे दा भी मिन्जो हक्क ऐ ।" ¹¹ यीशुये जबाब दित्ता, "जे तिज्जो उपरे ते नी दित्ता जांदा, तां तेरा मिन्जो पर कुच्छ हक्क नी होंदा; इसतांई जिन्हीं मिन्जो तेरे हत्थ पकडुआया ऐ तिसदा पाप जादा ऐ ।"

¹² इसा गल्ला पर पिलातुस तिसियो छडणा चाहंदा था, अपर यहूदियां डडी डडी नैं ग्लाय़ा, "जे तू इस जो छड्डी दिंगा, तां तेरी भक्ति कैसरे दे पासं नी । जेहड़ा कोई अप्पु जो राजा बणांदा ऐ सैह कैसरे दा सामणां करदा ऐ ।" ¹³ एह गल्लां सुणी नैं पिलातुस यीशु जो बाहरेयो लैई आया कने तिसा जगाह इक्क चबूतरा था जिसियो इब्रानी च 'गब्ता' ग्लांदे थे, कने तित्थु न्याय आसणे पर बैठी गैआ । ¹⁴ एह फसह दी त्यारिया दा दिन था, कने छि घंटेया दे लगभग था । ताहलू तिन्हीं यहूदियां नैं ग्लाय़ा, "दिखा तुहां दा राजा ।" ¹⁵ अपर सैह डडे, "लैई जा ! लैई जा ! तिसियो सूलिया पर टंगा !" पिलातुस तिन्हां नैं ग्लाय़ां लग्गा, "क्या मँ तुहां दे राजे जो सूलिया पर टंगा?" प्रधान याजकां जबाब दित्ता, कैसरे जो छड्डी अहां दा होर कोई राजा नी ।" ¹⁶ ताहलू तिन्हीं तिसियो तिन्हां दे हुआले करी दित्ता तांजे सैह सूलिया पर टंगी दित्ता जां ।

यीशु मसीह दा सूलिया पर टंगाया जाणां

(मत्ती 27 : 32-44; मरकुस 15 : 21-32; लूका 23 : 26-43)

¹⁷ ताहलू सैह यीशु जो लैई गै, कने तिन्हीं अपणियां सूलिया चुकी नैं तिसा जगाह तिकर बाहरेयो गैआ, जेहडी खोपडी दी जगाह कने इब्रानी च गुलगुता ग्लांदे थे । ¹⁸ तित्थु तिन्हां तिसियो कने तिस सौगी होर दू माणुआं जो सूलिया पर टंगया, इक्की जो ऐत्थू कने इक्की जो औत्थू, कने बीच यीशु जो । ¹⁹ पिलातुसं इक्क दोष पत्र लिखी नैं सूलिया पर लगाई दित्ता, कने तिस च एह लिख्या था, "यीशु नासरी यहूदियां दा राजा ।" ²⁰ एह दोष पत्र मतेआं यहूदी माणुआं पढ़ेया, कजोकि सैह जगाह जिथू यीशु सूलिया पर टंगेया था सैहरे दे नैडे था; कने पत्र इब्रानी कने लतीनी कने यूनानी भासा च लिख्या था । ²¹ ताहलू यहूदियां दे प्रधान याजकां पिलातुसं नैं ग्लाय़ा, यहूदियां दा राजा मत लिख अपर एह कि तिन्हीं ग्लाय़ा यहूदियां दा राजा ऐ ।" ²² पिलातुसं जबाब दित्ता, "मँ जेहड़ा लिखी दित्ता, सैह लिखी दित्ता ।" ²³ जाहलू सैनिक यीशु जो सूलिया पर टंगी बैठे, तां तिसदे कपडे लैई नैं चार हिस्से कित्ते, हर सैनिके ताई इक्क हिस्सा, कने कुरता भी लैआ, अपर कुरता बगैर सितेयो उपरे ते थलें तिकर बुणया था । ²⁴ इसतांई तिन्हां अप्पु च ग्लाय़ा, अहां इसियो छेकन नी, अपर इस पर पर्ची पांदे कि एह कुसदा हुंगा ।" एह इसतांई होया कि पवित्रशास्त्रे च जेहड़ा ग्लाय़ा गैआ सैह पूरा होयें, "तिन्हां मेरे कपडे अप्पु च

बंडी लै कने मेरे कपडेयां च पर्ची पाई । ²⁵ कने सैनिकां इआं ई किन्ता । यीशु दी सूलिया अल्ल तिसदी मां, कने तिसदिया माऊ दी बेंहण, क्लोपासे दी लाडी मरियम, कने मरियम मगदलीनी खडौंतियो थी । ²⁶ जाहलू यीशुयें अपणियां माऊ, कने तिस चले जो जिस नैं सैह प्यार रखदा था बक्खे खडौंतेयो दिख्या तां अपणियां माऊ नैं ग्लाय़ां लग्गा, "हे नारी, दिख, एह तेरा जागत ऐ ।" ²⁷ ताहलू तिन्हीं चले नैं ग्लाय़ा. एह तेरी मां ऐ ।" कने तिसी बत ते सैह चेला तिसायो अपणे घरेयो लैई गैआ ।

यीशु मसीह दी मौत

(मत्ती 27 : 45-56; मरकुस 15 : 33-41; लूका 23 : 44-49)

²⁸ इसदे बाद यीशुयें एह जाणी नैं कि हुण सब कुच्छ पूरा होईया, इसतांई कि पवित्रशास्त्रे च जेहड़ा ग्लाय़ा गैआ सैह पूरा होयें, ग्लाय़ा, मँ प्यासा ऐ ।" ²⁹ तित्थु सिरके नैं भरया इक्क पांडा रखया था, तिन्हां सिरके च सैडया होया स्पंज जो जुफे दिया डालिया पर रखी नैं तिसदे मुँमे नैं लगाया । ³⁰ जाहलू यीशुयें सैह सिरका लैआ, तां ग्लाय़ा, "पूरा होया" कने मुँडे लटकाई नैं प्राण छड्डी दित्ते ।

वरछे नैं बेधणां

³¹ इसतांई कि सैह त्यारी दा दिन था, यहूदियां पिलातुसं नैं विणती किती कि तिन्हां दियां जंगा तोडियां जान कने सैह लौआये जान, तांकि सब्द दे दिने सैह सूलिया पर रहै, तांकि सब्दे दा दिन बडा दिन था । ³² सैनिकां आई नैं तिन्हां माणुआं च पैहले दी जंगा तोडियां ताहलू दूये दियां भी, जेहड़ा तिस सौगी सूलिया पर टंगेयो थे; ³³ अपर जाहलू यीशु अल्ल आई नैं दिख्या कि सैह मरिया ऐ, तां तिसदियां जंगा नी तोडियां । ³⁴ अपर सैनिकां च इक्की बरछे नैं तिसदी बक्खी बिन्नी, कने तिस च ताहलू ई खून कने पाणी निकळेया । ³⁵ जिन्हीं एह दिख्या, तिन्हीं गवाही दिती ऐ, कने तिसदी गवाही सच्ची ऐ; कने सैह जाणदा ऐ कि सैह सच ग्लांदा ऐ कि तुहां भी वसुआस करा । ³⁶ एह गल्लां इसतांई होइआं कि पवित्रशास्त्रे च जेहड़ा ग्लाय़ा गैआ था सैह पूरा होयें, "तिसदी कोई हड्डी नी तोडणी ऐ ।" ³⁷ भिरी इक्क होर जगाह पर एह लिख्या ऐ; जिसियो तिन्हां बिन्नेया ऐ, तिस पर तिन्हां दी नजर होणी ।

यीशु मसीह जो कब्रा च रखेया जाणां

(मत्ती 27 : 57-61; मरकुस 15 : 42-47; लूका 23 : 30-56)

³⁸ इन्हां गल्लां दे बाद अरिमतिया दे युसुफं जेहड़ा यीशु दा चेला था, अपर यहूदियां दे डरे ते इसा गल्ला जो छुपाई रखदा था, तिन्हीं पिलातुसे नैं विणती किती कि क्या सैह यीशु दी लाश लैई जाई सकदा ऐ । पिलातुसं तिसदी विणती सुणी, कने सैह आई नैं तिसदी लाशा लैई गैआ । ³⁹ निकुदेमुस भी, जेहड़ा पैहले यीशु अल्ल राती गैआ था, पंजा सेर दे लगभग मिलेया गन्धरस कने एलवा लैई आया । ⁴⁰ ताहलू तिन्हां यीशु दी लाश लैई, कने यहूदियां दे दबने दी रीता मताबक तिसियो सुगंधित समग्रिया सौगी कफने च लपेटया । ⁴¹ तिसा जगाह पर जिथू यीशु सूलिया पर टंगया था, इक्क बाग था, कने तिस बागे च इक्क नौई कब्र थी जिसा च कोई भी नी रखेया था । ⁴² इसतांई यहूदियां दी त्यारिया दे दिने दिया बजाह ते तिन्हां यीशु जो तिसा च रखेया, कजोकि सैह कब्र नैडें थी ।

खाली कब्र

(मत्ती 28 : 1-8; मरकुस 16 : 1-8; लूका 24 : 1-12)

20 हफते दे पैहले दिन मरियम मगदलीनी तडकें ई नैहरे च कब्रा पर आई, कने पत्थरे जो कब्रा ते हटया दिख्या । ² ताहलू सैह दौडी कने शमौन पतरस कने तिस दूये चले अल्ल जिस नैं यीशु प्यार रखदा था, आई नैं ग्लाय़ां लगी, "सैह प्रभु जो कब्र ते कड्डी लैइयो हन, कने अहां नी जाणदियां कि तिसियो कतांह रखी दित्ता ऐ ।" ³ ताहलू पतरस कने सैह दूआ चेला निकळी नैं कब्रा दे बक्खेयो चले । ⁴ सैह दायो सौगी सौगी दौडा दे थे, अपर दूआ चेला पतरस ते गांह निकळी नैं कब्रा पर पैहलें पुजिया; ⁵ कने झुकी नैं कपडे पैयो दिखे, अपर सैह अंदर नी गैआ । ⁶ ताहलू शमौन पतरस तिसदे पचांह पचांह पुजिया, कने कब्रा अंदर गैआ कने कपडे पैयो दिखे; ⁷ कने सैह परना जेहड़ा तिस दे मुँडे नैं बन्नया था, कपडेयां सौगी नी पैआ था, अपर

लगा इक्की जगाह लपेटी नैं रखेया दिख्या । 8 ताहू दूआ चेला भी जेहड़ा कब्रा पर पैहलें पुज्या था, अंदर गैआ कने दिखी नैं वसुआस किता । 9 एह तां अल्ली तिकर पवित्रशास्त्रे दी सैह गल्ल नी समझेयो थे कि तिसियो मरेयां च जिंदा होणां हुंगा । 10 ताहू एह चले अपणे घरेयो वापस गै ।

मरियम मगदलीनी पर प्रकट होणां (मत्ती 28 : 9-10; मरकुस 16 : 9-11)

11 अपर मरियम रोंदी कब्रा अल्ल बाहर ई खडौई रैई, कने रोंदे रोंदे कब्रा दे पाससे झुकी नैं दिख्या, 12 दू सुअर्गदूतां जो चिट्टे चमकदार कपड़े पैहणेयो इक्की जो सरहाणे कने दूये जो पैदिया बैठेया दिख्या, जित्थू यीशु दी लाश रखियो थी । 13 तिन्हां तिसा नैं ग्लाय, "हे नारी, तू कजो रीआ दी ऐ?" तिन्नै तिन्हां नैं ग्लाय, सैह मेरे प्रभु जो चुकी लैइयो कने मैं नी जाणदी कि तिसियो कुत्थू रखया ऐ । 14 एह ग्लाइ नैं सैह पचाह मुड़ी कने यीशु जो खडुतेयो दिख्या, अपर नी पणछैणी नी पाई कि यीशु ऐ । 15 यीशुयें तिसा नैं ग्लाय, "हे नारी, तू कजो रोया दी ऐ? कुसियो तोपदी ऐ?" तिन्नै माली समझी नैं तिस नैं ग्लाय, "हे महाराज, जे तैं तिसियो चुकी लैआ ऐ तां मिन्जो दुस्स कि तिसियो कुत्थू रखेया ऐ, कने मैं तिसियो लैई जाणा ।" 16 यीशुयें तिसा नैं ग्लाय, "मरियम!" तिन्नै पचाह मुड़ी नैं तिस नैं ग्लाय, "रबूनी!" इब्रानिया भासा च ग्लाय, मतलब हे गुरु । 17 यीशुयें तिसा नैं ग्लाय, "मिन्जो मत छू, कजोकि मैं अल्ली तिकर पिता अल्ल उपर नी गैआ, अपर मेरे भाऊयां अल्ल जाई नैं तिन्हां नैं ग्लाइ दे, कि मैं अपणे पिता कने तुहां दे पिता, कने अपणे परमात्मं कने तुहां दे परमात्मं अल्ल ई उपरेयो चलेया ऐ । 18 मरियम मगदलीनी नैं जाई नैं चेलयां जो दुस्सया, मैं प्रभु जो दिख्या कने तिन्हीं मिन्जो नैं एह गल्लां ग्लाययां ।"

यीशु मसीह दा दुस्सणां कने चेलयां जो आखरी हुक्म (मत्ती 28 : 16-20; मरकुस 16 : 14-18; लूका 24 : 36-49)

19 तिसी दिने जेहड़ा हफते दा पैहला दिन था संजा दे बग्त जाहू तित्थु दे दुरआजे जित्थू चले थे, यहूदियां दे डरे दे मारे बंद थे, ताहू यीशु आया कने तिन्हां दे बीच खडौई नैं तिन्हां नैं ग्लायणां लगी, तुहां जो शांति मिले । 20 कने एह ग्लाइ नैं तिन्हीं अपणां हत्थ कने अपणी बक्खी तिन्हां जो दुस्सी ताहू चले प्रभु जो दिखी नैं खुश होये । 21 यीशु भिरी तिन्हां नैं ग्लायणां लगा, तुहां जो शांति मिले; जिआं पितें मिन्जो घल्लया ऐ, तिआं ई मैं भी तुहां जो घल्लदा ऐ । 22 एह ग्लाइ नैं तिन्हीं तिन्हां पर फूक मारी नैं तिन्हां नैं ग्लाय, पवित्र आत्मां लैआ । 23 जिन्हां दे पाप तुहां माफ करणे, सैह तिन्हां तांई माफ होई गैयो हन; जिन्हां दे तुहां रखन, सैह रखे गैयो हन ।"

थोमे पर प्रकट होणां

24 अपर बाराह च इक्क, मतलब थोमा जिसियो दिदुमुस भी ग्लां दे थे, जाहू यीशु आया था ताहू सैह तिन्हां सौगी नी था । 25 जाहू होर चले तिस नैं ग्लायणां लगे, "अहां प्रभु जो दिख्या ऐ, ताहलू तिन्हीं तिन्हां नैं ग्लाय, "जाहू तिकर मैं तिसदेयां हत्थां च मेखां दे भोके नी दिखी लैं, कने मेखां दे भोकेयां च अपणियां उंगली नी पी लैं, कने तिसदिया बक्खिया च अपणां हत्थ नी पाई लैं ताहू तिकर मैं वसुआस नी करगा ।"

26 अठां दिना बाद तिसदे चले भिरी घरे अंदर थे, कने थोमा तिन्हां सौगी था; कने दुरआजे बंद थे, ताहू यीशु आया कने तिन्हां बिच खडौई नैं ग्लायणां लगा, तुहां जो शांति मिले । 27 ताहू तिन्हीं थोमे नैं ग्लाय, "अपणी उंगली ऐत्थू लाई नैं मेरे हत्थां जो दिख कने अपणां हत्थ लै आई नैं मेरिया बक्खिया च पा, कने वेवसुआसी नी पर वसुआसी बण ।" 28 एह सुणी थोमे जबाब दिता, "हे मेरे प्रभु हे मेरे परमात्मा ।" 29 यीशुयें तिस नैं ग्लाय, "तैं मिन्जो दिख्या ऐ, क्या इसतांई वसुआस किता ऐ? धन हन सैह जिन्हां बिना दिक्खे वसुआस किता ।"

इसा कताबा दा मकसद

30 यीशुयें होर भी मते चमत्कार चेलयां सामने दुस्से, जेहड़े इसा कताबा च लिखे नी गै; 31 अपर एह इसतांई लिखयो हन कि तुहां वसुआस करा कि

यीशु ई परमात्मं दा पुत्तर मसीह ऐ, कने वसुआस करी नैं तिसदे नाये ते जिन्दगी पान ।

तिबिरियास दिया झीला दे कंडे चेलयां पर प्रकट होणां

21 इन्हां गल्लां दे बाद यीशुयें अपणे आप्पे जो तिबिरियास झीला दे कंडे चेलयां पर अपणे आप्पे जो प्रकट किता, कने इस तरीके नैं प्रकट किता । 2 शमौन पतरस, कने थोमा जिसियो दिदुमुस ग्लां दे थे, कने गलील दे काना सैहरे दा नतनएल, कने जबदी दे पुत्तर, कने तिसदे चेलयां च दो होर जणे कठरोयो थे । 3 शमौन पतरसं तिन्हां नैं ग्लाय, मैं मच्छी पकड़णा चलेया ऐ । 4 तिन्हां तिसियो ग्लाय, "अहां भी तिज्जो सौगी चलदे ।" कने सैह निकळी नैं किस्तिया पर चढ़े, अपर तिसा राती तिन्हां जो कुच्छ नी मिला ।

4 भ्याग होंदेयां ई यीशु कनारे पर आई खडूता; तमी चले तिसियो पणछैणी नी सके कि एह यीशु ऐ । 5 ताहू यीशुयें तिन्हां नैं ग्लाय, हे जागतो क्या तुहां अल्ल कुच्छ मछियां हन? तिन्हां जबाब दिता, "नी ।" 6 तिन्हीं तिन्हां नैं ग्लाय, किस्तिया दे सज्जे कंडे जाळ पा तां मिलणियां हन । कने तिन्हां जाळ पाया, कने मतिआं मछियां होणे दिया बजाह ते जाळे जो खीज्जीं नी सके । 7 ताहू तिन्हीं चेलें जिस नैं यीशु प्यार रखदा था, तिन्हीं पतरसं नैं ग्लाय, "एह तां प्रभु ऐ ।" शमौन पतरसं एह सुणी नैं कि सैह प्रभु ऐ, लक्के च परना कसी लैआ, कजोकि सैह गंगा था, कने झीला च छाळ देई दिती । 8 अपर दूये चले छोटिया किस्तिया पर मछियां नैं भरौये जाळे जो खीजदे खीजदे आये, कजोकि सैह कंडे ते जादा दूर नी था, अपर कोई दो सौ हत्थ पर थे ।

9 जाहू सैह कंडे पर लुत्थे, तां तिन्हां क्योले दी अग कने तिस पर मच्छी रखियो, कने रोटी दिखी । 10 यीशुयें तिन्हां नैं ग्लाय, "जेहिडियां मछियां तुहां हण पकड़ियां हन, तिन्हां च कुच्छ लैई ओआ ।" 11 तां शमौन पतरसं किस्तिया पर चढ़ी नैं इक्क सौ त्रियुन्जा बडियां मछियां नैं भरौया जाळ कंडे पर खिंज्या, कने इतणी मछियां होणे पर भी जाळ नी फटेया । 12 यीशुयें तिन्हां नैं ग्लाय, "ओआ, खाणां खांदे ।" चेलयां च कुसी जो हिम्मत नी होई कि तिसते पृच्छन, तू कुण ऐ?" कजोकि सैह जाणदे थे कि एह प्रभु ई ऐ । 13 यीशु आया कने रोटी लैई नैं तिन्हां जो दिती, कने तिआं ई मच्छी भी । 14 एह त्री बरी ऐ कि यीशु मरेयां च जिंदा होणे दे बाद चेलयां जो दुस्सया ।

यीशु मसीह कने पतरस

15 खाणां खाणे दे बाद यीशुयें शमौन पतरसं नैं ग्लाय, "हे शमौन, यूहन्ने दे पुत्तर, क्या तू इन्हां ते बधी नैं मिन्जो नैं प्यार रखदा ऐ?" तिन्हीं तिस नैं ग्लाय, "हाँ प्रभु; तू तां जाणदा ऐ कि मैं तिज्जो नैं प्यार करदा ऐ ।" तिन्हीं तिस नैं ग्लाय, "मेरे मेम्नयां जो चगा ।" 16 तिन्हीं भिरी दूई बरी तिस नैं ग्लाय, "हे शमौन, यूहन्ने दे जागत, क्या तैं मिन्जो नैं प्यार रखदा ऐ?" तिन्हीं तिस नैं ग्लाय, "हाँ प्रभु; तू तां जाणदा ऐ कि मैं तिज्जो नैं प्यार रखदा ऐ ।" तिन्हीं तिस नैं ग्लाय, "मेरियां भेडां दी रखवाली ।" 17 तिन्हीं त्री बरी भिरी तिस नैं ग्लाय, "हे शमौन, यूहन्ने दे पुत्तर, क्या तू मिन्जो नैं प्यार रखदा ऐ?" पतरस उदास गैआ कि तिन्हीं तिस नैं त्री बरी इआं ग्लाय, "क्या तू मिन्जो नैं प्यार रखदा ऐ?" कने तिस नैं ग्लाय, हे प्रभु, तू तां सब कुच्छ जाणदा ऐ; कने तू एह भी जाणदा ऐ कि मैं तिज्जो नैं प्यार रखदा ऐ । यीशुयें तिस नैं ग्लाय, "मेरियां भेडां जो चगा । 18 मैं तिज्जो नैं सच सच ग्लांदा, जाहू तू जोआन था तां अपणे लक्के बन्नी नैं जित्थू चाहंदा था औत्थू फिरदा था; अपर जाहू तू जबरा हुंगा तां अपणेयां हत्था फलांगा; कने दूआ तेरा लक्के बन्नी नैं जित्थू तू नी चाहगा औत्थू तिज्जो लैई जांगा ।" 19 तिन्हीं इन्हां गल्लां ते इशारा किता कि पतरस कदेई मौता ते परमात्मं दी महिमा करगा । कने ताहू तिन्हीं तिस नैं ग्लाय, "मेरे पचाह चली पौ ।"

यीशु मसीह कने तिसदा प्यारा चेला

20 पतरसं मुड़ी नैं तिस चले जो पचाह ओंदे दिख्या, जिसियो यीशु प्यार रखदा था, कने जिन्हीं खां दे बग्त तिसदी छातिया दे पाससे झुकी नैं पूछया था, "हे प्रभु, तेरा पकड़ुआणे आळा कुण ऐ?" 21 तिसियो दिखी नैं पतरसं यीशुयें नैं ग्लाय, "हे प्रभु तिसदा क्या हाल हुंगा?" 22 यीशुयें तिस नैं ग्लाय, "जे मैं चां कि सैह मेरे ओणे तिकर रुकी रँहआ, तां तिज्जो इसते क्या? तू मिन्जो पचाह चली पौ ।" 23 इसतांई भाऊयां च एह गल्ल फैली गैई कि तिन्हीं

चेले नी मरणां; तमी यीशुयें तिस नें एह नी ग्लायी कि सैह नी मरगा, अपर एह कि "जे में चां कि सैह मेरे ओणे तिकर रुकेया रेंह, तां तिज्जो इसते क्या?"

अंत

²⁴ एह सैई चेला ऐ जेहड़ा इन्हां गल्लां दी गवाही दिंदा ऐ कने जिन्हीं इन्हां गल्लां जो लिख्या ऐ, कने अहां जाणदे हन कि तिसदी गवाही सच्ची ऐ ।

²⁵ होर भी मते कम्म हन, जेहड़े यीशुयें कित्तयो; जे सैह इक्क इक्क करी नें लिखे जांदे तां में समझदा कि कताबां जेहड़ियां लिखियां जांदियां सैह संसारे च भी नी समांदियां ।

चेलयां दे कम्म

भूमिका

चेलयां दे कम्मां दा वखान लूका रचित सुसमाचार ते अग्गे दा वखान ऐ । इसदा खास मकसद एह दस्सणां ऐ कि यीशु दे शुरू दे विरोधियां पवित्र आत्मां दी अगुआई च, यीशु दे बारे च सुसमाचारे जो "यरुशलेम कने सारे यहूदिया कने सामरिया च, कने धरतिया दी छोर तिकर" (1: 8) किआं फैलाया । एह मसीही आन्दोलन दा विवरण ऐ जेहड़ा यहूदी लोकां दे बीच शुरू होया, होर बधी करी पूरे संसार दे लोकां दा वसुआस बणी गैआ । लेखक इसा गला दा भी ध्यान रखदा ऐ कि तिसदे पाठकां जो एह निश्चा आई जां कि मसीही लोक रोमी साम्राज्य ताई इक्क विद्रोही राजनैतिक ताकत नी थे, कने मसीही वसुआस यहूदी धर्म दी पूर्ति था ।

चेलयां दे कम्म दिया कताबा जो त्रै हिस्सेयां च बंडेया जाई सकदा ऐ, जेहड़ा निरंतर बढ़दे क्षेत्र जो दस्सदा ऐ जिन्हां च यीशु मसीह दा सुसमाचार प्रचार किता गैआ कने कलेसियां स्थापित किती गैई : 1) यीशु मसीह दा सुअर्ग जाणे दे बाद यरुशलेम च मसीही आन्दोलन दी शरुआत; 2) पलस्तीन दे होरनी हिस्सेयां च इसदा प्रसार; कने 3) भूमध्य सागर दे देशां च रोम तिकर इसदा प्रसार ।

चेलयां दे कम्मां दी इक्क खास विशेषता ऐ पवित्र आत्मां जो क्रियाशीलता । सैह पिन्तेकुस्त दे दिन यरुशलेम च किट्टे होये वसुआसियां पर बड़ी सामर्थ सौगी लौंदा ऐ, कने इसा कताबा च वर्णित घटनां दे दौरान कलेसिया कने तिसदे अगुआं दा मार्गदर्शन करदा कने सामर्थ दिंदा ऐ । चेलयां दे कम्मां च दित्ते गै कई उपदेशां च प्रारम्भिक मसीही संदेश दा सार पेश किता ऐ, कने इन्हां च वर्णित घटनां वसुआसियां दी जिन्दगी च कने कलेसिया दी सेहभागिता च इस इस संदेश दी सामर्थ जो प्रगट करदी ऐ ।

रूप रेखा

गवाही ताई त्त्यारी 1: 1 -26

क. यीशु दा आखरी हुक्म कने प्रतिज्ञा 1: 1- 14

ख. यहूदा दा उतराधिकारी 1: 15 -26

यरुशलेम दी गवाही 2: 1 --- 8: 3

यहूदिया कने सामरिया च गवाही 8: 4 --- 12: 25

पौलुसे दा सेवा दे कम्म 13: 1 --- 28: 31

क. पैहली पचार यात्रा 13: 1 --- 28: 31

ख. यरुशलेम च सम्मेलन 15: 1- 35

ग. दुई प्रचार यात्रा 15: 36 --- 18: 22

घ. त्री प्रचार यात्रा 18: 23 --- 21: 16

च. यरुशलेम, कैसरिया कने रोम च कैदी पौलुस 21: 17 --- 28: 31

परिचय

1 हे थियुफिलुस, मैई तां पैहलिया कताबा च तिन्हां सारियां गलां दे बारे च लिख्या ऐ जेहड़ा यीशु शुरू ते करदा कने सखांदा रहैआ, 2 तिस दिन तिकर जाहू सैह तिन्हां चेलयां जो जिन्हां जो तिन्हीं चुणोया था पवित्र आत्मां दिया बजाह ते हुक्म दैई करी ऊपर उठाया नी गैआ । 3 तिन्हीं दुख झेलणे दे बाद बड़े पक्क्यां सबूतां नैं अपणे आप्पे जो जिंदा दस्सेया, कने चालियां दिनां तिकर सैह तिन्हां जो दुस्सदा रहैआ, कने परमात्मं दे राजे दियां गलां करदा रहैआ । 4 कने तिन्हां नैं मिली करी तिन्हां जो हुक्म दिता, "यरुशलेमे जो मत छड्डा, अपर पिता दी तिसा प्रतिज्ञा दे पूरे होणे दा इंतजार करदे रहैआ, जिसदी चर्चा तुहां मिन्जो ते सुणियो । 5 कजोकि यूहन्ने तां पाणिये च बपतिस्मा दित्या पर थोड़ेयां दिनां बाद तुहां पवित्र आत्मां ते बपतिस्मा पांगे ।"

यीशु मसीह दा सुअर्ग पर चुकया जाणां

6 कने तिन्हां किट्टे होई नैं तिसते पूछ्या, "हे प्रभु, क्या तू इस बग्त इस्त्राएले दा राज फेरी दिगां ।" 7 तिन्हीं तिन्हां नैं ग्लाय, "तिन्हां बगतां या कालां जो जाणना, जिन्हां जो पितें अपणे अधिकार च रख्या ऐ, तुहां दा कम्म नी । 8 अपर पवित्र आत्मां तुहां पर ओंगी ताहू तुहां सामर्थ पांगे; यरुशलेम कने सारे यहूदिया कने सामरिया च, कने धरतिया दे अंत तिकर मेरे गवाह होंगे ।" 9 एह ग्लाय नैं तिन्हां दे दिखदे -दिखदे ऊपरयो चुकी लैआ, कने बदळां तिसियो तिन्हां दी अंखी ते लकाई लैआ । 10 तिसदे जां दे बग्त

जाहू सैह अम्बरे बकखी दिखा दे थे, तां दिखा दो माणु चिट्टेयां कपडेयां लाई करी तिन्हां अल्ल आई खडूते, 11 कने तिन्हां नैं ग्लाय, "हे गलीली माणुओ, तुहां कजो खडूई करी अम्बरे बकखी दिखा दे हन, एही यीशु, जेहड़ा तुहां दे बकखे ते सुअर्ग पर चुकी लैआ गैआ ऐ, जिस तरीके नैं तुहां तिसियो सुअर्ग च जां दे दिख्या ऐ तिस ई तरीके नैं सैह भिरी ओंगा ।"

मत्तियाहे जो यहूदे दा औधा मिलणां

12 ताहू सैह जैतून नांये दे प्हाड़े ते जेहड़ा यरुशलेमे दे नैडे ते कुल इक्क सब्त दे दिने तक्र दूर ऐ, यरुशलेमे जो वापस हट्टी आये । 13 जाहू सैह तित्थु पुजे तां तिसा कमरे दिया बोडी च गै, जित्थु पतरस कने यूहन्ना कने याकूब कने अन्द्रियास कने फिलिप्पुस कने थोमा कने बरतुल्मै कने मत्ती कने हलफईये दा पुत्तर याकूब कने शमौन जेलोतेस कने याकूबे दा पुत्तर यहूदा रहैदे थे । 14 एह सब कने तिसदे भाऊ कने यीशु दी माता मरियम कने होर जणासां सौगी इक्क मन होई करी प्रार्थना च लग्गी रहै । 15 तां पतरस तिन्हां लगभग इक्क सौ भी माणुआं दे बिच खडूई करी ग्लायणां लग्गा, 16 "हे भाऊओ, जरूरी था कि पवित्रशास्त्रे दा सैह वचन पूरा होयें जेहड़ा पवित्र आत्मां दाऊदे दे मुंमं ते यहूदा दे बारे च, जेहड़ा यीशु जो पकड़वाणे आळें दा अगुवा था, जेहड़ा पैहलें ई दस्सी दित्या था । 17 कजोकि सैह तां अहां च गिणोया गैआ, कने इसा सेवकाईया च साझी भी होया । 18 तिन्हीं अधर्म दिया कमाईया नैं इक्क खेत खरीदेया, कने मुंडे भार पैआ कने तिसदा पेट फटी गैआ कने तिसदियां सारियां आन्दा निकळी गियां । 19 इसा गलां जो यरुशलेम दे सारे रहणे आळें जाणी गै, ऐत्थू तिकर कि तिस खेते दा नां तिन्हां दिया भासा च

'हकलदमा' मतलब 'खूने दा खेत' पैई गैआ । 20 भजन संहिता च लिख्या ऐ, 'तिसदा घर उजडी जां, कने तिस च कोई ना बस्सें, 'कने 'तिसदी जगाह कोई दूआ लैई लें ।'

21 इसताई जितणेयां दिनां तिकर प्रभु यीशु अहां सौगी ओंदा जांदा रैहूआ -- मतलब यूहन्ने दे बपतिस्मे ते लैई करी तिसियो अहां दे सामणे ते ऊपर चुकणे तिकर - जेहडे लोक लगातार अहां सौगी रैहू, 22 ठीक ऐ कि तिन्हां च इक माणु अहां सौगी तिसदे जिंदे होणे दा गवाह होई जां । 23 ताहू तिन्हां दूनी जो खरेडी दिता, इक यूसुफ जिसियो बर-सबा भी ग्लां दे थे, कने तिसदा असली नां यूसतुस ऐ, कने दूआ मत्तियाहे जो, 24 कने एह प्रार्थना किती, "हे प्रभु, तू जेहड़ा सारेयां देयां मनां जाणदा ऐ, एह प्रकट कर कि इन्हां दूनी च तें कुसीयो चुणया ऐ, 25 कि सैह इसा सेवकाईया कने प्रेरिताईया दी जगाह लें, जिसायो यहूदा छडी करी अपणियां जगाह जो चली गैआ ।" 26 ताहू तिन्हां तिन्हां दे बारे च चिडियां पाईयां, कने चिड्डी मत्तियाह दे नांये पर निकळी । कने सैह तिन्हां म्यारां चेलयां सौगी गिणेया गैआ ।

पवित्र आत्मां दा लौणां

2 जाहू पिन्तेकुस्त दा दिन आया, तां सैह सारे इक्की जगह कठरोयो थे । 2 इक दम अम्बरे ते बडे तूफाने दी उआज आई, कने पूरा घर जित्थू सैह बैठयो थे, हिल्ली गैआ । 3 कने तिन्हां जो अग्गी साइआं जीभां निकळदियां दुस्सियां कने तिन्हां च हर इक्की जो दुस्सणां लग्गी । 4 सैह सारे ई पवित्र आत्मां नं भरोई गै, कने जिआं आत्मां तिन्हां जो ग्लाणे दी सामर्थ्य दिती, सैह होर बोली ग्लाणां लग्गे ।

5 अम्बरे थलें दी हर इक जाति ते भक्त यहूदी यरूशलेमे च ई रेंहदे थे । 6 जाहू एह उआज आई तां भीड किड्डी होई गैई कने लोक डरी गै, कजोकि हर इक्की जो ऐही सणांई दिंदा था कि सैह मेरिया बोलिया च ग्ला दे हन । 7 सैह सारे च हैरान कने परेशान होई नं ग्लाणां लग्गे, "दिखा एह जेहड़ा ग्ला दे हन क्या सारे गलीली नी हन ।" 8 तां भिरी कजो अहां च हर इक अपणे-अपणे जन्म भूमि दी बोली सणां करदा ऐ । 9 अहां जेहड़ा पारथी कने मेदी कने एलामी कने मेसोपोटामिया कने यहूदिया कने कप्पदूकिया कने पुन्तुस कने आसिया, 10 कने फ्रुगिया कने पन्फूलिया कने मिस्त्र कने लीबिया देश जेहड़ा कुरेने दे अक्खे बक्खे दे हन इन्हां सारें देसां दे रैहणे आळ्यां कने रोमी प्रवासी, 11 मतलब यहूदी कने यहूदी मत धारण करणे आळे, क्रेती कने अरबी भी हन, अपर अपणी-अपणी भाषा च तिन्हां ते परमात्में दे बडे बडे कम्मा दी चर्चा सुणदे हन । 12 कने एह सब हैरान होये कने डरी करी इक्की दूये नं ग्लाणां लग्गे, "एह क्या होआ दा ऐ ।" 13 अपर दूये मजाक करी नं ग्लाणां लग्गे, "एह तां नौईया शराबा दे नशे च मस्त हन ।"

पतरसे दा भाषण

14 ताहू पतरस तिन्हां म्यारां सौगी खडौई नं जोरे नं ग्लाणां लग्गा, "हे यहूदी कने हे यरूशलेमे च रैहणे आळ्यो, एह जाणी लैआ, कने कनं लगाई नं मेरियां गलां जो सुणां । 15 जिआं तुहां समझा दे हन, एह लोक नशे च नी हन, कजोकि अल्ली तां दिन चढेया ऐ । 16 अपर एह सैह गल्ल ऐ, जेहडी योएल भविष्यवक्ते ग्लाईयो थी :

17 परमात्मां ग्लांदा ऐ, कि अंत दे दिनां च इआं होंणा कि मैं अपणी आत्मां सारेयां लोकां जो दिंगा, कने तुहां दे पुत्तर कने तुहां दियां कुडियां भविष्यवाणी करगियां, कने तुहां दे जुआन माणु दर्शन दिखगे, कने तुहां दे स्याणे सुपने दिखगे ।

18 अपर मैं अपणे दासां कने अपणी दासियां पर भी तिन्हां दिना च अपणी आत्मां दैणी ऐ, कने तिन्हां भी भविष्यवाणी करणी ऐ ।

19 कने मैं ऊपर अम्बरे च अनोखे कम्म कने थलें धरतिया पर चमत्कार, मतलब खूने दा कने अग्गी दा कने धूर्ये दा बदळ दस्सगा ।

20 प्रभु दे म्हान कने तेजस्वी दिनां ओणे ते पैहले सूरज नैहरे कने चन्द्रमा खूने साइआं होई जाणां ।

21 जिन्हीं कुणी प्रभु दा नां लैणां, तिन्हीं उद्धार पाणां ।

22 "हे इस्राएलियो, इन्हां गलां सुणां : यीशु नासरी इक माणु था जिसदा परमात्में दे पास्से ते होणे दा सबूत तिन्हां सामर्थी दे कम्मां कने हैरान करणे आळे कम्मां कने नशाणा ते दुस्सदा ऐ, जेहडे परमात्में तुहां दे बिच तिसदिया

बजाह ते दस्से जिन्हां जो तुहां अप्पु ई जाणदे हन । 23 तिसी यीशु जो, जेहड़ा परमात्में दी बणांई होई योजना कने पैहले दे ज्ञानां मताबक पकडुवाया गैआ, तुहां अधर्मियां दे हत्थां नं सूलिया पर टूंगी करी मारी दिता । 24 अपर तिसियो परमात्में मौती दे बंधना ते छड्डी करी जिंदा किता; कजोकि तिस तांई सम्भव ई नी था कि मौत तिसियो अपणे वशे च रखी पांदी । 25 कजोकि दाऊद तिसदे बारे च ग्लांदा ऐ,

'मैं प्रभु जो हमेशा अपणे सामणे दिखदा रैहूआ कजोकि सैह मेरे सजे पास्सें ऐ, तांकि मैं पैई नी जां ।

26 इसताई मेरा मन खुश होया, कने मेरी जीभ भी मगन ऐ अपर मेरा पूरा शरीर आशा च बणी रैहणां ।

27 कजोकि तू मेरेयां प्राणां जो अधोलोक च नी छडगा; कने ना अपणे पवित्र माणुआं जो सडना दिगा ।

28 तें तां मिन्जो जिन्दगिया दा रस्ता दस्सेया ऐ; तें मिन्जो अपणे दर्शणा सौगी कने खुशिया सौगी भरी दिगा ।'

29 "हे भाऊओ, मैं कुलपति दाऊद दे बारे च तुहां सौगी हिम्मत ना नं ग्लाई सकदा ऐ कि सैह तां मरी गैआ कने दबेया कने तिसदी कब्र अजे तिकर अहां दे ऐत्थू मौजूद ऐ । 30 सैह भविष्यवक्ता था, सैह जाणदा था कि परमात्में मिन्जो सौगी कसम खादियो ऐ कि मैं तेरे वंशे च इक्की माणुये जो तेरे सिंहासणे पर बैठाळगा; 31 तिन्हीं होणे आळी गला जो पैहले ते ई दिखी करी मसीह दे जिंदे होणे दे बारे च भविष्यवाणी किच्चियो थी, कि नां तां तिसदा प्राण अधोलोक च रैहणां कने ना तां तिसदा शरीर सडणां । 32 इसी यीशु जो परमात्में जिंदा किता, जिसदे अहां सारे गवाह हन । 33 इस तरीके नं परमात्में दे सजे हत्थे नं संबना ते ऊची जगाह पाई नं, कने पिता ते सैह पवित्र आत्मां पाई करी नं जिसा दी प्रतिज्ञा किच्चियो थी तिन्हीं एह दैई दिती ऐ जेहड़ा तुहां दिखदे कने सुणदे हन । 34 कजोकि दाऊद तां सुअर्गे पर नी चढया; अपर ग्लांदा ऐ, 'प्रभुयें मेरे प्रभु नं ग्लाय, मेरे सजे पास्सें बैठ, 35 जाहू तिकर कि मैं तेरे बैरियां जो तेरे पैरां दी चौकी ना करी दें ।" 36 कने हुण इस्राएले दा सारा घराना पक्के तरीके नं जाणी लैआ कि परमात्में तिस यीशु जो जिसियो तुहां सूलिया पर चढाया, प्रभु भी ठहराया कने मसीह भी ।" 37 जाहू लोकां एह सुणेयां तां तिन्हां दा मन व्याकुल होई गै, कने सैह पतरस कने बाकी चेलयां ते पूछणां लग्गे, "हे भाऊओ अहां क्या करन ।" 38 पतरस तिन्हां नं ग्लाणां लग्गा, "मने बदला, कने तुहां चा हर इक अपणे-अपणे पापां दी माफी तांई यीशु मसीह दे नांये ते बपतिस्मा लेंगे; तां तुहां पवित्र आत्मां दा दान पांगे । 39 कजोकि एह प्रतिज्ञा तुहां, कने तुहां दिया औलादी, कने तिन्हां सारेयां दूरे-दूरे देयां लोकां तांई भी ऐ जिन्हां जो प्रभु अहां दा परमात्मां अपणे अल्ल सस्दगा ।" 40 तिन्हीं होर भी मतिआं गलां ते गवाही दैई करी समझाया कि अप्पु जो इसा टेढीया जातिआ ते बचा । 41 कने जिन्हां तिसदा वचन ग्रहण किता तिन्हां बपतिस्मा लैआ; कने तिस दिन तीन हजार माणु होर जुडी गै । 42 कने सैह चेलयां ते शिक्षा पाणे च, कने संगती रखणे च, कने रोटी तोड़णे च, कने प्रार्थना करणे च लग्गी रैहू ।

वसुआसियां दी संगति

43 कने सारेयां लोकां च डर छाई गैआ, कने बडे अनोखें कम्म कने चमत्कार चेलयां दिया बजाह ते प्रकट होदे थे । 44 कने सारे वसुआस करणे आळे किडे रेंहदे थे, कने तिसदियां सारियां चीज्रां साझे च थियां । 45 सैह अपणी-अपणी धन दौलत कने समान बेची बेची करी जिआं जिस दी जरूरत होंदी थी बंडी दिंदे थे । 46 सैह रोज इक मन होई करी मंदरे च किटठे होदें थे, कने घर-घर रोटी तोड़दे कने खुशी कने मने दी सीधाई सौगी खाणां खांदे थे, 47 कने परमात्में दी स्तुति करदे थे, कने सारे लोक तिन्हां ते खुश थे : कने जेहड़ा उद्धार पांदे थे, तिन्हां जो प्रभु हर रोज तिन्हां च मिलाई दिंदा था ।

लंगडे भिखारी माणुये दा ठीक होणां

3 पतरस कने यूहन्ना दोपेरा बाद प्रार्थना दे बग्त मंदरे च जा दे थे । 2 कने माणु इक जन्म दे लंगडे जो लैई करी ओआ दे थे, जिसियो सैह हर रोज मंदरे दे दुआरे अल्ल बैठाई दिंदे थे, जिस दुआरे जो 'सुंदर' ग्लांदा थे, तांकि सैह मंदरे च ओणे जाणे आळ्यां ते भीख मंगे । 3 जाहू तिन्हीं पतरस कने यूहन्ने जो मंदरे च जांदे दिख्या, तां तिन्हीं तिन्हां ते भी भीख मंगी ।

4 पतरसें कने यूहन्ने तिसदे पाससें ध्याने नैं दिखीकरी ग्लाय, “अहां बक्खीं दिख 1” 5 कने तां सैंह तिन्हां ते कुच्छ मिलणे दी उम्मीदा च तिन्हां पाससें दिखणां लग्गा ।

6 ताहू पतरसें ग्लाय, “चांदी कने सोना तां मिन्जो अल्ल ए नी, अपर जेहड़ा मिन्जो अल्ल ए सैंह तिजो दिंदा ऐ; यीशु मसीह नासरी दे नांये ते चल फिर 1” 7 कने तिन्हीं तिसदा सज्जा हत्थ पकड़ी नैं तिसियो दुआळेया; कने इकदम तिसदे पैरां कने गोडेयां च जोर आई गैआ । 8 सैंह उटकी करी खडौई गैआ कने चलणां फिरणां लग्गा; कने चलदा, कने कूददा, कने परमात्मैं दी स्तुति करदा करदा तिन्हां मंदरे जो गैआ । 9 सारेयां लोकां तिसियो चलदे फिरदे कने परमात्मैं दी स्तुति करदे दिखी करी, 10 तिसियो पणछेणी लैआ कि एह सैंह ई ऐ जेहड़ा मंदरे दे 'सुन्दर दुआरे अल्ल बैई नैं भीखा मंगदा था; कने तिसा घटना नैं जेहड़ी तिस सौगी होईयो थी सैंह बडे हैरान कने परेशान होये ।

मंदरे च पतरसे दी शिक्षा

11 जाहू सैंह पतरस कने यूहन्ना जो पकड़ी करी चलेया था, तां सारे लोक बडे हैरान होई करी तिस आसारे तिकर दौड़ी आये, जेहड़ा सुलेमाने दा था । 12 एह दिखी करी पतरसें लोकां नैं ग्लाय, “हे इस्त्राएलियो, तुहां इस माणुये पर कजो शक करदे हन, कने अहां पाससें कजो इआं दिखा करदे हन जिआं कि अहां अपणियां सामर्थी नैं या भक्तिया नैं इसियो चलणे फिरणे जोग्गा बर्णाई दिता । 13 अब्राहम कने इसहाक कने याकूब दे परमात्मां, अहां दे स्याणेयां दे परमात्मैं अपणे सेवक यीशु दी महिमा किती, जिसियो तुहां पकडुआई दिता, कने जाहू पिलातुसें तिसियो छडणे दा वचार किता, तां तुहां सबना सामणे इन्कार किता । 14 तुहां तिस पवित्र कने धर्मी दा इन्कार किता, कने विणती किती कि इक्की हत्यारे जो तुहां तांई छड्डी दिता जां; 15 कने तुहां जिन्दगिया दा रस्ता दस्सणे आळे जो मारी दिता, जिसियो परमात्मैं मरेयां ते जिंदा किता; कने इसा गल्ला दे अहां गवाह हन । 16 कने तिसदे ई नांये सौगी तिस वसुआसे दिया बजाह ते जेहड़ा तिसदे नांये पर ऐ, इस माणुये जो जिसियो तुहां दिखा दे कने जाणदे भी हन सामर्थ दित्तियो ऐ । तिस वसुआसे नैं जेहड़ा तिसदिया बजाह ते ऐ, इसियो तुहां सारेयां दे सामणे बिलकुल ठीक ठाक करी दिता ऐ ।

17 “हुण हे भाऊओ मैं जाणदा ऐ कि एह कम्म तुहां नासमझा च किन्तेया, कने जिआं ई तुहां देयां अधिकारियां भी किता । 18 अपर जिन्हां गल्लां जो परमात्मैं सारेयां भविष्यवक्तां दे मुंमैं ते पैहले ई दस्सी दित्या था, कि तिसदा मसीह दुख झेलगा, तिन्हीं तिन्हां जो इस तरीके नैं पूरा किता । 19 इसतांई, मने बदला कने वापस आई जा कि तुहां दे पाप धुलीं जान, जिसते प्रभु दे सामणे तुहां तांई शान्ति दे दिन ओन, 20 कने सैंह यीशु मसीह जो घल्ले, जेहड़ा तुहां तांई पैहले ई मसीह ठेहराया ऐ । 21 जरूरी ऐ कि सैंह सुअर्गे च तिस बरते तिकर रैंह जाहू तिकर कि सैंह सारियां गल्लां दा सुधार ना करी लैं जिसदी चर्चा पराणे बरते ते परमात्मैं अपणे पवित्र भविष्यवक्तां दे मुंमैं ते किती ऐ । 22 जिआं कि मूसैं ग्लाय, “प्रभु परमात्मां तुहां दे भाऊआं च तुहां तांई मिन्जो साइआं इक्क भविष्यवक्ता खरेडणां, जेहड़ा कुच्छ सैंह तुहां नैं ग्लां, तिसदी सुणना । 23 अपर हर इक्क माणु जेहड़ा तिस भविष्यवक्ता दी ना सुणें, लोकां च खत्म करया जाणां । 24 कने शमूएले ते लैई करी तिसदे बादे आळेयां तिकर जितणे भी भविष्यवक्तां बोले तिन्हां सबना इन्हां दिनां दा संदेश दित्या था । 25 तुहां भविष्यवक्तां दी औलाद कने तिस वादे दे हकदार हन, जेहड़ा परमात्मैं तुहां दे स्याणेयां नैं कित्यो हन, जाहू तिन्हीं अब्राहमे नैं ग्लाय, “तेरे वंशे दिया बजाह ते धरतिया दे सारे घराने आशीष पांगे । 26 परमात्मैं अपणे सेवके जो चुकी करी पैहले तुहां अल्ल घल्लया, कि तुहां च हर इक्क जो तिसदी बुराईयां ते फेरी करी आशीष दें 1”

महासभा दे सामणे पतरस कने यूहन्ना

4 जाहू सैंह लोकां नैं एह ग्ला दे थे, तां याजक कने मंदरे दे अधिकारी कने सदूकी तिन्हां अल्ल आये । 2 कजोकि सैंह बडे गुस्सें होई गै कि सैंह लोकां जो सखादे थे कने यीशु दा उदारण देंई देंई करी मरेयां दे जिंदा होणे दा प्रचार करदे थे । 3 तिन्हां सैंह पकड़ी पाये कने दो दिन तिकर जेला च पाई

दित्ते कजोकि संज होई गियो थी । 4 अपर वचना सुणने आळेयां च बडेयां वसुआस किता, कने तिन्हां दी गिणती पंज हजार माणुआं दे करीब होई गैई ।

5 दूये दिने भी इआं ई होया कि तिन्हां दे अधिकारियां कने स्याणेयां कने शास्त्री 6 कने महायाजक हना कने कैफा कने यूहन्ना कने सिकन्दर जितणे भी महायाजके दे घराने दे थे, सारे यरूशलेमे च किट्टे होये । 7 सैंह तिन्हां जो गब्बे खरेडी करी पूछणां लग्गे कि तुहां एह कम्म कुसा शक्तियां नैं कने कुस नांये नैं किता ऐ । 8 ताहू पतरसें पवित्र आत्मां होई नैं तिन्हां नैं ग्लाय, 9 “हे लोकां दे अधिकारियो कने स्याणेयो, इस कमजोर माणुये सौगी जेहड़ी भलाई किती गैई ऐ, जे अज्र अहां ते तिसदे बारे च पूछया जांदा ऐ, कि सैंह किआं खरा होया । 10 तां तुहां सब कने इस्त्राएली माणु जाणी लैन कि यीशु मसीह नासरी दे नांये ते जिसियो तुहां सूलिया पर चढ़ाया, कने परमात्मैं मरेयां ते जिंदा किता, एह माणु तुहां दे सामणे भला चंगा खडूतेया ऐ । 11 एह सैंह पत्थर ऐ जिसियो तुहां राजमिस्त्रियां घटिया जाणेया सैंह ई कुणे दे सिरे दा पत्थर बणी गैआ । 12 कुसी होर दूये ते उद्धार नी; कजोकि सुअर्गे दे थलें माणु च होर कोई दूआ नां नी दित्ता गैआ, जिस तांई अहां उद्धार पाई सकन 1”

13 जाहू तिन्हां पतरसे कने यूहन्ने दी हिम्मत दिखी, कने एह जाणेया कि एह अनपढ़ कने साधारण माणु हन, तां हैरान होये; भिरी तिन्हां जो पणछेणयां, कि एह तां यीशु सौगी रहयो हन । 14 तिस माणुये जो जेहड़ा खरा कित्या था, तिन्हां सौगी खडूतेया दिखीकरी, सैंह तिन्हां दे वरखलाफ च कुच्छ भी नी ग्लाय सके । 15 अपर तिन्हां जो सभा ते बाहर जाणे दा हुकम देंई करी, सैंह अप्पु चा सलाह करणां लग्गे, 16 “अहां इन्हां माणुआं सौगी क्या करन, कजोकि यरूशलेमे दे सारे रहणे आळे जाणदे हन, कि इन्हां इक्क नशाणी दितियो ऐ कने इन्हां दा मना नी करी सकदे । 17 अपर इसतांई कि एह गल्ल लोकां च होर जादा फैली ना जां, अहां तिन्हां जो धमकान, कि सैंह इस नांये ते भिरी कुसी भी माणुये नैं गल्ल ना करन 1” 18 ताहू तिन्हां जो सदेया कने चतौनी देंई करी एह ग्लाय, “यीशु दे नांये ते कुच्छ भी नी ग्लाय कने ना सखाणां 1” 19 अपर पतरसे कने यूहन्ने तिन्हां जो जबाब दिता, “तुहां ई न्याय करा; क्या एह परमात्मैं सामणे एह ठीक हुंगा कि अहां परमात्मैं दियां गल्लां नी मनन कने तुहां दियां गल्लां मनन । 20 कजोकि एह तां अहां ते होई नी सकदा कि जेहड़ा अहां दिख्या कने सुणेयां ऐ, सैंह नी ग्लान 21 ताहू तिन्हां पतरस कने यूहन्ने जो धमकाई करी छड्डी दिता, कजोकि लोकां दिया बजाह ते तिन्हां जो सज्जा देंणे दी कोई भी गल्ल नी मिली, इसतांई जेहड़ी गल्ल होई थी तिसदिया बजाह ते सारे लोक परमात्मैं दी तारीफ करदे थे । 22 सैंह माणु जेहड़ा ठीक होया था, तिसदी चाली साल ते भी जादा उमर थी ।

वसुआसियां दी प्रार्थना

23 सैंह छूटी करी अपणे साथियां अल्ल आये, कने जेहड़ा कुच्छ प्रधान याजकां कने स्याणेयां तिन्हां नैं ग्लाय था, तिन्हां जो सणाई दिता । 24 एह सुणीकरी तिन्हां इक्क मन होई करी जोरे नैं ग्लाय, “हे मालिक, तू सैंई ऐ जिन्हीं सुअर्ग कने धरती कने समंदर कने जेहड़ा कुच्छ तिस च ऐ बणाया । 25 तैंई पवित्र आत्मां दे दुआरा अपणे सेवक अहां दे पिता दाऊदे दे मुंमैं ते ग्लाय,

होरना जातिआं च हुल्लड कजो मचेया, कने देश - देश देयां लोकां कजो बेकार गल्लां सोचियां?

26 प्रभु कने तिस मसीह दे वरखलाफ च धरती दे राजे खडौई गै, कने हाकम इक्क साथ किट्टे होई गै हन 1”

27 कजोकि सचमुच तेरे सेवक यीशु दे वरखलाफ च, जिन्हां दा तैं अभिषेक किता, हेरोदेस कने पुन्तियुस पिलातुस भी होरनां जातिआं कने इस्त्रलियां सौगी इस सैंहरे च किट्टे होई गै हन, 28 कि जेहड़ा कुच्छ पैहले ते तेरिया समर्थी नैं कने इच्छा दे मताबक पक्का होई चुकेया था पूरा होये । 29 हुण हे प्रभु, तिन्हां दियां धमकियां जो दिख; कने अपणेयां दासां जो एह वरदान दे कि तेरा वचन बडिया हिम्मत सौगी सणां । 30 चगां करणे तांई तू अपणां हत्थ गांह कर कि चमत्कार कने अद्भुत कम्म तेरे पवित्र सेवक यीशु दे नांये ते किन्ते जान 1” 31 जाहू सैंह प्रार्थना करी बेटे, तां सैंह जगाह जित्थू सैंह कठरोयो थे हिल्ली गैई कने सैंह सारे पवित्र आत्मां नैं भरोई गै, कने परमात्मैं दा वचन हिम्मत सौगी सणां दे रैंह ।

वसुआसियां दी सामूहिक जिन्दगी

32 वसुआस करणे आळ्यां दी मण्डली इक्क चित कने इक्क मन दी थी, ऐत्थु तिकर कि कोई भी अपणियां जायदाता जो अपणी नी ग्लांदा था, अपर सारा कुच्छ साझी था । 33 चले बड़िया समर्था नै प्रभु यीशु दे जिंदे होणे दी गवाही दिंदे रैह कने तिन्हां सारेयां पर बड़ा अनुग्रह था । 34 तिन्हां च कोई भी पाखंडी नी था; कजोकि जिन्हां अल्ल जगाह या घर थे, सैह तिन्हां जो बेची-बेचीकरी, बिकियां चीज्रां दे पैसे लैयां दे थे, कने तिन्हां जो चेलयां देयां पैरां च रखी दिंदे थे; 35 कने जिआं जिसियो जरूरत होंदी थी, तिस दे मताबक हर इक्की जो बंडी दिंदे थे । 36 युसूफ नांये दा साइप्रस दा इक्क लेवी था जिसदा नां चेला बरनबास (मतलब शान्ति दा पुत्तर) रखेया था । 37 तिसदी कुच्छ जमीन थी, जिसा जो तिन्हीं बेची करी कने जेहडे पैसे मिले सैह चेलयां देयां पैरां पर रखी दित्ते ।

हनन्याह कने सफीरा

5 हनन्याह नांये दा इक्क माणु था कने तिसदिया लाडिया दा नां सफीरा था, तिन्हां कुच्छ जमीन बेची । 2 कने तिन्हां पैसेयां च कुच्छ पैसे रखी लै; कने एह गल्ल तिसदी लाडी भी जाणदी थी, कने तिसदा इक्क हेस्सा लैई करी चेलयां दे पैरां गांह रखी दित्ता । 3 पतरसें ग्लाय, “हे हनन्याह ! सैताने तेरे मने च एह गल्ल कजो पाई कि तू पवित्र आत्मां नै झूठ ग्लां, कने जमीना दे पैसेयां च कुच्छ रखी लै? 4 जाहू तिकर तिज्जो अल्ल रैई, क्या तेरी नी थी, कने जाहू बिकी गैई तां क्या तेरे वशे च नी थी, तू एह गल्ल अपणे मने च कजो सोची, तू माणुआं नै नी, अपर परमात्मं नै झूठ ग्लाय ऐ ।” 5 एह गल्लां सुणदे ई हनन्याह पैई गैआ कने प्राण छड्डी दित्ते, कने सारेयां सुणनेआळ्यां च बड़ा डर छाई गैआ । 6 भिरी जुआन माणुआं उठी करी तिसदी अर्थी बणाई कने बाहरेयो लैई जाई करी दबी दित्ता । 7 घट ते घट त्रीं घंटेयां बाद तिसदी लाडी जेहडा कुच्छ होया था नी जाणदी थी अंदरेयो आई । 8 ताहू पतरसें तिसा नै ग्लाय, “मिन्जो दस्स क्या तुहां सैह जमीन इतणे च बेचियो थी, तिन्ने ग्लाय, “हॉ इतणे च ई ।” 9 पतरसें तिसा नै ग्लाय, “एह क्या गल्ल ऐ कि तुहां दूनी ई प्रभु दी आत्मां दी परीक्षा लैणे तांई राजी कजो होये, दिख, तेरे लाडे जो दबणे आळे अल्ली तिकर दुरआजे पर ई खडूतेयो हन, कने तिज्जो भी बाहरेयो लैई जागे ।” 10 ताहू ई सैह झट तिसदेयां पैरां च पैई गैई, कने प्राण छड्डी दित्ते; कने जुआना माणुआं अंदर आई करी तिसा जो भी मरेया दिख्या, कने बाहरेयो लंदी कने लाडे सौगी दबी दित्ती । 11 पूरी कलेसिया पर कने इन्हां गल्लां जो सुणने आळ्यां पर बड़ा डर छाई गैआ ।

नशाण कने चमत्कार दे कम्म

12 चेलयां देयां हत्थां ते बडे चमत्कार कने अद्भुत कम्म लोकां बिच होणां लगे, कने सैह इक्क मन होई करी सुलैमान दे ओसारे च किटठे होंदे थे । 13 अपर होरना च कुसियो भी एह हिम्मत नी होंदी थी कि तिन्हां नै जाई करी मिलन; तां भी लोक तिन्हां दी बढ़ाई ई करदे थे । 14 वसुआस करणे आळे बडे भरी मर्द कने जणांसां प्रभु दी कलीसिया च जादा ते जादा बधदे जांदे थे । 15 ऐत्थु तिकर कि लोक बमारां जो सडकां च अंगी करी, मंजोलूयां कने बिस्तरेयां पर लम्बे पाई दिंदे थे कि जाहू पतरस ओंगा, तां तिसदिया परछांई ई तिन्हां च कुसी पर पैई जां । 16 यरूशलम दे अक्खे बक्खे देयां सैहरां ते भी मते भरी लोक बमारा कने दुष्टआत्मां दे सतायां जो अंगी अंगी करी, किटठे होंदे थे, कने सैह सारे खरे कित्ते जांदे थे ।

चेलयां दी गिरफ्तारी

17 ताहू महायाजक कने तिसदे सारे साथी जेहडा सदूकियां दे दले दे थे, गुस्से नै भरौई गै । 18 कने चेलयां जो पकडी करी जेला च बंद करी दित्ता । 19 अपर रातियो प्रभु दे इक्की सुअर्गे दूतें जेला दे दुरआजे खोली करी तिन्हां बाहर अंगी करी ग्लाणां लग्गा, 20 “जा, मंदरे च खडूई करी इसा जिन्दगिया दियां सारियां गल्लां लोकां जो सणा ।” 21 सैह एह सुणीकरी भ्याग होंदे ई मंदरे च आई करी शिक्षा देणां लगे । ताहू महायाजक कने तिसदे साथियां आईकरी महासभा जो कने इस्त्राएलियां दे सारे स्याणेयां जो किटठा किता, कने जेला च संदेशा घल्लेया

कि तिन्हां जो लैई ओआ । 22 अपर सैनिकां तित्थु पुज्जी करी तिन्हां जो जेला च नी मिले, कने वापस आई करी खबर दित्ती, 23 “अहां जेला जो बड़िया सावधानियां नै बंद कित्या था, कने पैहरेदार बाहर गेटे पर खडूतेयो थे; अपर जाहू खोलया, तां अंदर कोई नी मिला ।” 24 जाहू मंदरे दे अधिकारियां कने प्रधान याजकां एह गल्लां सुणियां, तां तिन्हां दे बारे च बड़िया चिता च पैई गै कि तिन्हां दा क्या होया । 25 इतणे च कुणकी आई नै तिन्हां जो दस्सेया, “दिखा, जिन्हां जो तुहां जेला च बन्द करी नै रखेया था, सैह माणु मंदरे च खडूई करी लोकां जो शिक्षा देआ करदे हन ।” 26 ताहू अधिकारी सपाईयां सौगी जाई करी तिन्हां जो लैई आये, अपर जोर जबरदस्ती करी नै नी, कजोकि सैह लोकां ते डरदे थे कि अहां पर पत्थर नी मारन ।

27 तिन्हां चेलयां जो अंगी करी महासभा दे सामणे खरेडी दित्ता; ताहू महायाजके तिन्हां ते पूछया, 28 “क्या अहां तुहां जो धमकी दैई करी नी ग्लाय था कि तुहां इस नांये ते शिक्षा मत दिंदे, तमी दिखा, तुहां सारे यरूशलमे जो अपणियां शिक्षा नै भरी दिता ऐ कने तिस माणुये दा खून अहां से सरे पाणां चाहंदे हन ।” 29 ताहू पतरसें कने होरनां चेलयां जबाब दित्ता, “माणुआं दे हुक्मे ते बधी करी परमात्मं दे हुक्मे दा पालन करणां ई अहां दा फर्ज ऐ । 30 अहां दे स्याणेयां दे परमात्मं यीशु जो जिंदा किता, जिसियो तुहां सुलिया पर लटकाई करी मारी दित्या था । 31 तिसियो परमात्मं प्रभु कने उद्धारकर्ता ठेहराई करी, अपणे सज्जे हत्थे नै म्हांन करी दिता ऐ, कि सैह इस्त्राएलियां जो मन बदलणे दी शक्ति कने पापां दी माफी प्रदान करें । 32 अहां इन्हां गल्लां दे गवाह हन कने तिआं ई पवित्र आत्मां भी, जिसियो परमात्मं तिन्हां जो दित्या ऐ जेहडे तिसदेयां हुक्मा मनदे हन ।”

33 एह सुणीकरी सैह जली गै कने तिन्हां जो मारणां लगे । 34 अपर गमलीएल नांये दा इक्क फरीसियें जेहडा कानून बनाणे आळा कने सारेयां लोकां च प्रमुख था, न्यायलय च खडूई करी चेलयां जो थोडे बग्त ताई बाहर घल्लणे दा हुक्म दिता । 35 ताहू तिन्हीं ग्लाय, “हे इस्त्राएलियो, जेहडा कुच्छ तुहां इन्हां माणुआं नै करणां चाहंदे हन, सोची समझी करी करनेयो । 36 कजोकि इन्हां दिनां दे पहले थियुदास एह ग्लांदा आया कि मैं भी कुच्छ ऐ; कने कोई चार सौ माणु तिस सौगी होई गैयो थे, अपर सैह मारी दिता कने जितणे लोक तिसियो मनदे थे, सारे लग्ग लुग होई नै मुकी गै । 37 तिसदे बाद नां लिखणे दे बग्त यहूदा गलीली आया, कने कुच्छ लोक तिन्हीं अपणे पाससे करी लै; सैह भी खत्म होई गै कने जितणे लोक तिसियो मनदे थे, सैह सारे लग्ग लुग होई गै । 38 इसताई हुण मैं तुहां नै ग्लांदा ऐ, इन्हां माणुआं ते दूर ई रैहआ कने इन्हां नै कोई मतलब मत रखा; कजोकि जे एह धर्म या घट माणुआं दे पाससे ते ऐ ताहू तां खत्म होई जांगा; 39 अपर जे परमात्मं दे पाससे ते ऐ, तां तुहां इसियो कदी भी मिटाई नी सकदे । कुत्थी इआं ना होयें कि तुहां परमात्मं नै भी लडणे आळे ठेहरन ।” 40 ताहू तिन्हां तिसदी गल्ल मनी लैई; कने चेलयां जो सददी करी पिटवाया; कने एह हुक्म दैई करी छड्डी दिता कि यीशु दे नांये दी भिरी कोई गल्ल मत करदे । 41 सैह इसा गल्ला ते खुश होई करी महासभा दे सामणे ते चली गै, कि अहां तिसदे नांये तांई वेईजत होणे जोगे तां ठहरे हन । 42 सैह हर रोज मंदरे च कने घर --घर शिक्षा देणां लगे, कने इसा गल्ला दा सुसमाचार सणाने ते नी रुके कि यीशु ई मसीह ऐ ।

सतां सेवकां दा चुणयां जाणां

6 तिन्हां दिनां च जाहू चेलयां दी गिनती जादा बढणां लग्गी, ताहू यूनानी बोली ग्लाणे आळे इब्रानी बोली लाणे आळे पर कुडकुडाणां लगे, कि हर रोज दी सेवकाई च अहां दियां विधवां दी सुधि नी ली जांदी । 2 ताहू तिन्हां बारां चेलयां बाकि चेलियां दी मण्डलिया जो अपणे अल्ल सददी नै ग्लाय, “एह ठीक नी कि अहां परमात्मं दा वचन छड्डी करी खलाणे पलाणे दी सेवा च रैह । 3 इसताई, हे भाऊओ, अपणे च सत सुनाम मर्दा जो जेहडे पवित्र आत्मां कने अक्का नै भरपूर होन, चुणी लैआ, कि अहां तिन्हां जो एह कम्म दें । 4 अपर अहां तां प्रार्थना च कने वचना दी सेवा च लगे रैहणां ।” 5 एह गल्ल पूरी मंडलिया जो खरी लग्गी, कने तिन्हां सित्फनुस नांये दा इक्क माणु जेहडा वसुआस कने पवित्र आत्मां नै भरौया था, कने फिलिप्पुस, कने प्रुखुरुस, कने निकानोर, कने तीमोन, कने परमिनास, कने अन्ताकियावासी नीकुलाउस जेहडा यहूदी मत च आई गैआ था, चुणी लैआ । 6 तिन्हां जो चेलयां दे सामणे खरेडी दिता कने तिन्हां प्रार्थना करी नै तिन्हां पर हत्थ

रखेया । 7 परमात्मं दा वचन फैलदा गैआ कने यरुशलमें च चेलयां दी गिणती बडी बधदी गैई; कने याजकां दा इक्क बड़ा समाज इस मत जो मनणे आळे होई गैआ ।

स्तिफनुसे दी गिरपतारी

8 स्तिफनुस अनुग्रह कने सामर्थी नें भरौई करी लोकां च बड़े-बड़े अनोखे कम्म कने चमत्कार दस्सणां लग्गा । 9 ताहू तिस आराधनालय च जेहडी लिबिरतीनां दी थी, कने कुरेनी कने सिंकंदरिया कने किलकिया कने एशिया दे लोकां च कई इक्क उठी करी स्तिफनुस ते बैहस वाजी करणां लग्गे । 10 कने तिस ज्ञाने दा कने तिसा आत्मां दा जिस नें गल्लां करदा था, सैह सामना नी करी सके । 11 इसा गल्ला पर तिन्हां केई लोकां जो उकसाया जेहडे ग्लाणां लग्गे, "अहां तां इसियो मूसा कने परमात्मं दे विरोध च निंदा दी गल्लां ग्लां दे सुणेया ऐ ।" 12 कने लोकां कने स्याणेयां कने शास्त्रियां जो भड़काई दिता भिरी आई करी तिसियो पकड़ी करी महासभा च लैई आये । 13 कने झूठे गवाह खरेडी दिते, जिन्हां ग्लाय, "एह माणु इसा पवित्र जगाह दे कने व्यवस्था दे विरोध च ग्लाणां नी छडदा । 14 कजोकि अहां तिसियो एह ग्लां दे सुणेया एह कि एही यीशु नासरी इसा जगाह जो ढाई दैणां, कने तिन्हां रीतियां जो बदली दिगां जेहिड्यां मूसें अहां जो सौपियां हन ।" 15 ताहू सारेयां लोकां जेहडे सभा च बैठयो थे, तिस पर नजर लगाई तां तिसदा मुँ सुअर्ग दूते साइआं दुस्सया ।

स्तिफनुसे दा भाषण

7 ताहू महायाजकें ग्लाय, "क्या एह गल्लां सच हन ।" 2 सितफनुस ग्लाणां लग्गा, "हे भाऊओ, कने पितरो सुणां । अहां दा पिता अब्राहम हारान च बसणे ते पैहलें जाहू मेसोपोटामिया च था; ताहू तेजोमय परमात्मं तिस जो दर्शन दिते, 3 कने तिस नें ग्लाय, तू अपणे देशे च कने अपणे लोकां जो छड्डी करी तिस देशे च जा, जिसियो मैं तिजो दस्सणां ।" 4 ताहू सैह कसदियां दे देशे ते निकळी करी हारान च जाई बसेया । तिसदे बुडे दी मौती दे बाद परमात्मं तिसियो तित्थु ते इस देशे च अंगी करी बसाया जिस च हुण तुहां बसेयो हन, 5 कने तिसियो कुच्छ भी मीरास मतलब पैर रखणे दी भी जगाह नी दिती, अपर प्रतिज्ञा किती कि मैं एह देस तेरे कने तेरे बाद तेरे वंशे दे हत्थ करी दिगां; अपर तिस बग्त तिसदा कोई पुत्तर भी नी था । 6 कने परमात्मं इआं ग्लाय, 'तेरी औलादा दे लोक परायें देशे च परदेसी होंगे, कने तिन्हां सैह दास बनाणे कने चार सौ सालां तिकर दुख दैणां । 7 भिरी परमात्मं ग्लाय, 'जिसा जातिआ दे सैह दास होंगे, तिन्हां जो मैं सज्जा दिंगा, कने तिसदे बाद सैह निकळी करी इसा जगाह मेरी सेवा करणे ।' 8 कने तिन्हीं तिस नें खतणां करणे दा वादा किता; कने इसा हालता च इसहाक उत्राह ते पैदा होया कने अठमें दिने तिसदा खतणां किता; कने इसहाके ते याकूब कने याकूबे ते बारा कुलपति पैदा होये । 9 "कुलपतियां यूसुफे सौगी बैर रखी करी तिसियो मिस्त्र देस जाणे आळ्यां दे हत्थे बेची दिता । अपर परमात्मां तिस सौगी था, 10 कने तिन्हीं तिसियो सारे क्लेशां ते छडाई करी मिश्र दे राजा फिरौन दिया नजरा च अनुग्रह कने अक्ल प्रदान किती, कने तिन्हीं तिसियो पूरे मिस्त्र पर कने अपणे घराने दा हाकम बणाई दिता । 11 ताहू मिस्त्र कने कनान दे पूरे देशे च अकाल पैआ; जिस ते भारी क्लेश होया, कने अहां दे पितरां जो अन्न नी मिलदा था । 12 अपर याकूबे एह सुणीकरी मिस्त्र च अनाज ऐ अहां दे पितरां जो पैहली बरी घल्लया । 13 दूई बरी अप्पु ई यूसुफे अपणे भाऊ जो अपणे बारे च दस्सया कने यूसुफे दी जाति फिरौन जो पता लगी गैआ । 14 ताहू यूसुफे अपणे पिता याकूबे कने अपणे सारे परवारे जो, जेहडे पचत्तर माणु थे, सददी घल्लया । 15 ताहू याकूबे मिस्त्र देशे च गैआ; कने तित्थु सैह कने अहां दे बाप दादे मरी गै । 16 तिन्हां दियां लाशां शकेमे च पज्जाई करी तिसा कब्रा च रखियां, जिसा जो अब्राहमें चाँदी दैई करी शकेम च हमार दिया औलादी ते खरीदी लियो थी ।

17 "अपर जाहू तिसा प्रतिज्ञा ते पूरा होणे दा बग्त आया, जेहडी परमात्मं अब्राहमें सौगी किंतियो थी, तां मिस्त्र देशे च सैह माणु बदी गै कने मते भरी होई गै । 18 ताहू मिस्त्र च दूआ राजा होया करदा था जेहडा यूसुफे जो नी जाणदा था । 19 तिन्हीं अहां दियां जातिआ नें चलाकी करी नें अहां दे पितरां सौगी बुरा वर्ताव किता, कि तिन्हां जो अपणेयां बच्चेयां जो सट्टी दैणां पैआ कि

सैह जिं दे ना रेहू । 20 तिस बग्त मूसा पैदा होया । सैह परमात्मं दिया नजरा च बड़ा ई छैळ था । सैह तीनां मीहेयां तिकर अपणे बुडे दे घरे च पाळया गैआ । 21 जाहू सट्टी दिता तां फिरौन दी कुडिया तिसियो चुकी लैआ, कने अपणां पुत्तर संमझी करी पाळया । 22 मूसे जो मिस्त्रियां दी सारी पढाई कराई गैई, कने सैह वचना कने कम्मा दूनी च सामर्थी था ।

23 "जाहू सैह चालियां सालां दा होया, तां तिसदे मने च आया कि मैं अपणे इस्त्राएली भाऊआं सौगी मुलाकात करें । 24 तिन्हीं इक्की माणुये पर अन्याय होंदे दिखी करी तिसियो बचाया, कने मिस्त्री माणुये जो मारी करी सताएयो दा बदला लैआ । 25 तिन्हीं सोचया कि तिसदे भाऊ समझणे कि परमात्मां तिसदे हत्थां नें तिन्हां दा उद्धार करगा, अपर सैह नी समझे । 26 दूये दिने जाहू सैह अप्पु चा लड़ा दे थे, तां सैह तित्थु आई रेहूआ; कने एह ग्लाई करी तिन्हां दा मेल करणां लग्गा, 'हे माणुओ, तुहां तां भाऊ -भाऊ हन, इक्की -दूये पर कजो अन्याय करदे हन?" 27 अपर जेहडा अपणे प्देसिये पर अन्याय करा करदा था, तिन्हीं एह ग्लाई करी हटाई दिता, 'तिजो कुणी अहां पर हाकम कने न्याय करणे आळा बणांया ऐ ।' 28 क्या जिस तरीके नें तैं कल मिस्त्रिये जो मारी दित्या तिआं ई मिन्जो भी मारी दैणां चाहंदा ऐ । 29 एह गल्ल सुणीकरी मूसा नट्टी गैआ कने मिघान देशे च परदेसी बणी करी रेहणां लग्गा, कने तित्थु तिसदे दो जागत पैदा होये ।

30 "जाहू पूरे चाली साल होई गै, तां इक्कीं सुअर्ग दूतें सीनै प्हाडे दे बणे च तिसियो बळदे झिलां दिया अग्गी च दर्शन दिता । 31 मूसा जो एह दर्शन दिखीकरी हैरानी होई कने जाहू दिखणे तांई सैह गांह गैआ, तां प्रभु दी एह उआज आई, 32 मैं तेरे बाप दादियां, अब्राहमे दा, इसहाके दा कने याकूबे दा परमात्मां ऐ; ताहू तां मूसा कर्मीं पैआ, ऐत्थू तिकर कि तिसियो दिखने दी हिम्मत नी पैई । 33 ताहू परमात्मं तिस नें ग्लाय, 'अपणेयां पैरां ते जूतेयां खोली लै, कजोकि जिसा जगाह च तू खडौतेया ऐ, सैह पवित्र जगाह ऐ । 34 मैं तां हकीकत च अपणे माणुआं दी जेहडे मिस्त्र च हन, दुर्दशा जो दिख्या ऐ; कने तिन्हां दी आह कने तिन्हां दा रोणां सुणेया ऐ; इसतांई तिन्हां जो छडाणे तांई लुत्थेया ऐ हुण आ, मैं तिजो मिस्त्र देशे च घल्लया ।' 35 "जिस मूसा जो तिन्हा एह ग्लाई करी नकम्मा ठेहराया था, 'तिजो कुणी अहां पर हाकम कने न्याय करणे आळा बणांया ऐ, तिसियो ई परमात्मं हाकम कने छडाणे आळा बणांई करी, तिस सुअर्ग दूते दिया बजाह ते जिन्हीं तिसियो झाडियां च दर्शन दित्या था, घल्लया । 36 एह माणु मिस्त्र कने लाल समंदर कने बणे च चालियां सालां तिकर हैरानी आळे कम्म कने चमत्कार दस्सी दस्सी करी तिन्हां जो कड्डी लैई आया । 37 एह सैई मूसा ऐ, जिन्हीं इस्त्राएलियां नें ग्लाय, 'परमात्मां तुहां दे भाऊआं च तुहां तांई मिन्जो साइआं इक्क भविष्यवक्ता उठाणां ।' 38 एह सैई ऐ, जिन्हीं बणे च कलेसिया बिच तिस सुअर्ग दूते सौगी सीनै प्हाडे पर तिस नें गल्लां किंतियां हन कने अहां देयां पितरां सौगी था, तिसियो जिं दे वचन मिलेयो कि अहां तिकर पज्जां । 39 अपर अहां देयां पितरां तिसदी नी मनी, अपर तिसियो हटाई करी अपणां मन मिस्त्र दे पास्सें फेरया, 40 कने हारुने सौगी ग्लाय, 'अहां तांई ऐसे देवता बणां, जेहडा अहां दे गांह गांह चलें, कजोकि एह मूसा जेहडा अहां जो मिस्त्र देशे ते कड्डी लैई आया, अहां नी जाणदे कि तिसियो क्या होया । 41 तिन्हां दिना च तिन्हां इक्क बछडा बणांई करी तिसदी मूर्तियां गांह बलि चढाई, कने अपणे हत्थे दे कम्मां नें मगन होणां लग्गे । 42 कने परमात्मं मुँमो मोडीकरी तिन्हां जो छड्डी दिता, कि आकाशगण जो पुज्जन, जिआं भविष्यवक्ता दिया कताबा च लिख्या ऐ, 'हे इस्त्राएल दे घराने, क्या तुहां चाली सालां तिकर पशु बलि कने अन्नबलि मिन्जो ई चढां दे रेहू?

43 तुहां मोलेके दे तम्बू कने रिफान देवता दे तारे जो लैई करी फिरदे थे, मतलब तिन्हां मूर्तियां जो जिन्हां जो तुहां दण्डवत करणे तांई बणांया था, कने मैं तुहां जो बेबीलोन दे परे लैई जाई करी बसाणां ।'

44 "साक्षी दा तम्बू बणे च अहां दे पितरां बिच था, जिआं तिन्हीं ठहराया जिन्हीं मूसे नें ग्लाय, 'जेहडा आईकरी तैं दिख्या ऐ, तिस दे मताबक इसियो बणां ।' 45 तिस तम्बूये जो अहां दे पितरां पराणे बग्त च पाई करी यहोशू जो सौगी ऐत्थियो लैई आये; जिस बग्त कि तिन्हां गैर - यहुदियां पर हक्क जताया, जिन्हां जो अहां दे पितरां सामणे कड्डी दिता, कने सैह तम्बू दाऊदे दे बग्त तिकर रेहूआ । 46 तिस पर परमात्मं अनुग्रह किता; कने तिन्हीं विणती किती कि सैह याकूबे दे परमात्मं तांई रेहणेयां जगाह बणां । 47 अपर सुलेमाने

तिस ताई घर बणाया । 48 अपर परम प्रधान परमात्मां हत्थे दे बणांयो घरां च नी रँहदा जिआं कि भविष्यवक्तां ग्लाय, 49 प्रभु ग्लांदा ऐ, सुअर्ग मेरा सिंहासण कने धरती मेरे पैरां दी चौकी ऐ, मिन्जो ताई तुहां कुस तरीके दा घर बणागे, कने मेरे आरामे दी कुण दैई जगाह होंगी ।

50 क्या एह चीजां मेरे हत्थे दियां बणाईयां नी । 51 "हे हठीले, कने मने दे कने कनां दे खतणां रहित लोको, तुहां हमेशा पवित्र आत्मां दा विरोध करदे हन । जिआं तुहां दे पितर करदे थे, तिआं ई तुहां भी करदे हन । 52 "भविष्यवक्तां च कुसियो तुहां दे पितरां नी सताया?" तिन्हां तिस धर्मी दे ओणे दी खबर देणे आळे जो पराणे जमाने च ई मारी दिता; कने हुण तुहां भी तिसियो पकडुआणे आळे कने मारी देणेआळे होये हन । 53 तुहां सुअर्गदूतां दिया बजाह ते बणांयो नियम तां मिले, अपर तिन्हां दा पालन नी किता ।"

50 क्या एह चीजां मेरे हत्थे दियां बणाईयां नी ।

51 "हे हठीले, कने मने दे कने कनां दे खतणां रहित लोको, तुहां हमेशा पवित्र आत्मां दा विरोध करदे हन । जिआं तुहां दे पितर करदे थे, तिआं ई तुहां भी करदे हन । 52 "भविष्यवक्तां च कुसियो तुहां दे पितरां नी सताया?" तिन्हां तिस धर्मी दे ओणे दी खबर देणे आळे जो पराणे जमाने च ई मारी दिता; कने हुण तुहां भी तिसियो पकडुआणे आळे कने मारी देणेआळे होये हन । 53 तुहां सुअर्गदूतां दिया बजाह ते बणांयो नियम तां मिले, अपर तिन्हां दा पालन नी किता ।"

स्तिफनुस पर पत्थर मारणां

54 एह गलां सुणीकरी सैह जळी गै कने अहां पर गुस्सा करणां लगे । 55 अपर तिन्हीं पवित्र आत्मां नैं भरौई करी सुअर्ग बक्खें दिख्या कने परमात्में दी महिमा जो कने यीशु जो परमात्में दे सज्जे हत्थे दे बक्खें खडूतेया दिखीकरी गलाणां लग्गा, 56 "दिखा, मैं सुअर्ग जो खुलेया, कने माणुये दे पुत्रे जो परमात्में दे सज्जे हत्थे बक्खें खडूतेया दिखा करदा ऐ ।" 57 ताहू तिन्हीं जोरे नैं ग्लाई करी कनं बंद करी लै, कने इक्क साथ तिस पर झपटी पै; 58 कने तिस सैहरे दे बाहर निकळी करी तिस पर पत्थर मारणां लगे । गवाहां अपणे कपडे शाऊल नां दे इक्की जुआन माणुये दे पैरां अल्ल खोली करी रखी दिते । 59 सैह सितफनुस पर पत्थर मारदे रँह, कने सैह एह ग्लाई करी प्रार्थना करदा रँहआ, "हे प्रभु यीशु, मेरी आत्मां जो कबूल कर ।" 60 भिरी गोडे दे भार बैई नैं जोरे नैं गलाणां लग्गा, "हे प्रभु, एह पाप तिन्हां पर मत लग्गा ।" कने एह ग्लाई करी सोई गैआ । शाऊल तिसदे कत्ले ते सहमत था ।

कलेसिया पर अत्याचार

8 तिस दिन यरुशलेमे दी कलेसिया पर बड़ा उपद्रव शुरू होई गैआ कने चेलयां जो छड्डी करी सारे ते सारे यहूदिया कने सामरिया देसां जो तितर बितर होई गै । 2 कुच्छना भक्तां सितफनुस जो कब्र च रखेया कने तिस ताई बडे रोये । 3 शाऊल कलेसिया जो उजाड़ा दा था; कने घर-घर जाई करी माणुआं कने जणासां जो घसीटी-घसीटी करी जेला च पांदा था ।

सामरिया सैहरे च फिलिप्पुसे दा प्रचार

4 जेहड़ा तितर बितर होये थे, सैह सुसमाचार सणां दे वापस ओणां लगे; 5 कने फिलिप्पुस सामरिया सैहरे च जाई करी लोकां जो मसीह दा प्रचार करणां लग्गा । 6 जेहिडयां गलां फिलिप्पुसे ग्लाईयां थियां, तिन्हां लोकां सुणी करी कने जेहडे चमत्कार सैह दरस्सदा था तिन्हां दिखी - दिखी करी, इक्क चित होई करी मन लगाया । 7 कजोकि मतेआं ते दुष्टआत्मां बडे जोरे नैं डडी करी ग्लांदिआं होईयां निकळी गियां, कने मते भारी अधरंगे दे रोगी कने लगडे भी खरे होई गै; 8 कने तिस सैहरे च बड़ी खुशी छाई गैई ।

जादूगर शमौन

9 इसते पँहले तिस सैहरे च शमौन नांये दा इक्क माणु था, जेहड़ा जादू -टोणा करी नैं सामरिया दे लोकां जो हैरान करदा था कने अपणे आप्पे जो इक्क म्हान माणु ग्लांदा था । 10 छोटे ते लैई करी बडे तिकर सारे तिसदी इज्जत करी नैं ग्लां दे थे, "एह माणु परमात्में दी सैह शक्ति ऐ, जेहड़ी म्हान केहलां दी ऐ ।" 11 तिन्हीं मतेआं दिनां ते तिन्हां जो अपणे जादू दे कम्मा नैं हैरान करी रखेया था, इसताई सैह तिसियो बडे मनदे थे । 12 अपर जाहू तिन्हां फिलिप्पुसे पर वसुआस किता जेहड़ा परमात्में दे राजे दा कने यीशु दे नांये दा सुसमाचार सणांदा था तां लोक, क्या मर्द, क्या जणांसां, बपतिस्मा लैणां लगे । 13 ताहू शमौने अप्पु भी वसुआस किता कने बपतिस्मा लैई करी फिलिप्पुसे सौगी रँहणां लग्गा । सैह चमत्कार कने बडे-बडे सामर्थी दे कम्मां होदेयां दिखी करी हैरान हुंदा था ।

सामरिया सैहरे च पतरस कने यूहन्ना

14 जाहू चेलयां जेहडे यरुशलेमे च थे, सुणेया कि सामरियां परमात्में दा वचन मनीं लैआ ऐ तां पतरस कने यूहन्ना तिन्हां अल्ल घल्ले । 15 तिन्हां जाई करी तिन्हां ताई प्रार्थना किती कि पवित्र आत्मां पान । 16 कजोकि आत्मां अल्ली तिकर तिन्हां च कुसी पर भी नी लुत्थेया था; तिन्हां तां सिर्फ प्रभु यीशु दे नांये दा बपतिस्मा लैआ था । 17 ताहू तिन्हीं तिन्हां पर हत्थ रखे कने तिन्हां पवित्र आत्मां पाई लैई । 18 जाहू शमौने दिख्या कि चेलयां दे हत्थ रखणे ते पवित्र आत्मां दिती जांदी ऐ, तां तिन्हां अल्ल पैसे लैआई करी गलाणां लग्गा, 19 "एह हक्क मिन्जो भी दैआ, कि जिस कुसी पर भी हत्थ रखे सैह पवित्र आत्मां पांन ।" 20 पतरस तिस नैं गलाणां लग्गा, "तेरे पैसे तेरे सौगी खत्म होन, क्योकि तैं परमात्में दा दान पैसेयां नैं खरीदणे दा विचार किता । 21 इसा गलां च ना तेरा हेस्सा ऐ, ना योगदान; कजोकि तेरा मन परमात्में पाससैं सीधा नी ऐ । 22 इसताई अपणी इसा बुराईया ते मन फेरी करी प्रभु अल्ल प्रार्थना कर, होई सकदा ऐ तेरे मने दा वचार माफ किता जां । 23 कजोकि मैं दिखदा ऐ कि तू पिते साइआं कडवाहटा च कने बुरे कम्मां दे बन्धना च पैआ ऐ ।" 24 शमौने जबाब दिता, "तुहां मेरे ताई प्रभु नैं प्रार्थना करा कि जेहिडयां गलां तुहां ग्लाईयां हन, तिन्हां च कोई भी मिन्जो पर ना आई पोन ।" 25 कने एह गवाही दैई करी कने प्रभु दे वचन सणांई करी यरुशलेमे जो चली आये कने सामरियां दे प्रां च सुसमाचार सणां दे गै ।

फिलिप्पुस कने कूश देशे दा अधिकारी

26 भिरी परमात्में दे इक्की स्वर्गदूतें फिलिप्पुसे नैं ग्लाय, "उठ कने दक्षिण दे बक्खे तिस रस्ते पर जा, जेहड़ा यरुशलेमे ते गाजा जो जांदा ऐ ।" एह रेगिस्तानी रस्ता ऐ । 27 सैह उठी करी चली पैआ, कने दिखा, कूश देशे दा इक्क माणु ओआ दा था जेहड़ा खोजा कने कूशियो दी राणी कन्दोके दा मंत्री कने खजाची था । सैह आराधना करणे ताई यरुशलेमे च आया था । 28 सैह अपणे रथे च बैठया था, कने यशायाह भविष्यवक्ता दिया कताब पढदा पढदा वापस ओआ दा था 29 ताहू आत्मां फिलिप्पुसे नैं ग्लाय, "बक्खें जाईकरी इस रथे सौगी होई जा ।" 30 फिलिप्पुस तिसदे पाससैं दोडेया कने तिसियो यशायाह दी कताबा पढदे सुणेया कने पूछया, "तू जेहड़ा पढा दा ऐ क्या तिसियो समझदा भी ऐ ।" 31 तिन्हीं ग्लाय, "जाहू तिकर कोई मिन्जो नी समझां तां मैं किआं समझणां?" कने तिन्हीं फिलिप्पुसे नैं विणती किती की सैह चढी करी तिस सौगी बैई गैआ । 32 पवित्रशास्त्रे दा जेहड़ा सैह पाठ पढा दा था, सैह एह था :

"सैह भेडां साइआं बलि होणे ताई पज्जाया गैआ, कने जिआं मेम्ना भेडां कतरणे आळ्यां सामणे चुपचाप रँहदा ऐ, तिआं ई तिन्हीं भी अपणां मुं नी खोलया ।

33 तिसदी दीनता च तिसदा न्याय नी होई सकेया । तिस बरते दे माणुआं दा वर्णन कुण करगा, कजोकि धरतिया ते तिसदे प्राण चुकी लैयो हन ।"

34 इस गलां पर खोजें फिलिप्पुसे ते पूछया, "मैं तिजो नैं प्रार्थना करदा ऐ, एह दरस्स कि भविष्यवक्ता एह कुसदे बारे च ग्लांदा ऐ, अपणे या कुसी दूये दे बारे च ।" 35 ताहू फिलिप्पुसे अपणां मुं खोलया, कने पवित्र शास्त्रे दा शुरू ते तिसियो यीशु दा सुसमाचार सणांया । 36 रस्ते च चलदे -चलदे सैह इक्की पाणिये आळी जगाह पुजे । ताहू खोजा गलाणां लग्गा, "दिख ऐत्थू पाणी भी ऐ, हुण मिन्जो बपतिस्मा लैणे ते कुण रोकी सकदा ऐ ।" 37 फिलिप्पुसे ग्लाय, "जे तू सारे मने नैं वसुआस करदा ऐ तां तू लैई सकदा ऐ ।" तिन्हीं जबाब दिता, "मैं वसुआस करदा ऐ कि यीशु मसीह परमात्में दा पुत्र ऐ ।" 38 ताहू तिन्हीं रथ खडा करणे दा हुक्म दिता, कने फिलिप्पुस कने खोजा दोयो पाणिये च चली गै, कने तिन्हीं खोजे जो बपतिस्मा दिता । 39 जाहू सैह पाणिये ते निकळी करी बाहरेयो आये तां प्रभु दा आत्मां फिलिप्पुसे जो चुकी लैई गैआ, कने खोजें तिसियो भिरी नी दिख्या, कने सैह खुश हुंदा अपणे रस्ते च चली गैआ । 40 फिलिप्पुस अशदोद च आई निकळ्या, कने जाहू तिकर कैसरिया च नी पुजा, ताहू तिकर सैहरे सैहरे च सुसमाचार सणांदा गैआ ।

शाऊले दा मन बदलणां

9 शाऊल जेहड़ा अली तिकर प्रभु दे चेलयां जो धमकाणे कने मारने दी धुना च था, महायाजके अल्ल गैआ । 2 कने तिसते दमिश्क दे आराधनालयां दे नांये पर इस मतलब जो लैई करी दी चिड्डी मंगी कि क्या मर्द क्या जणासां, जिन्हां जो सैह इस रास्ते च पान तिन्हां जो बन्नीकरी यरुशलेम जो लैई आये । 3 अपर चलदे -चलदे जाहू सैह दमिश्क सैहरे अल्ल पुज्जा, तां चाणचक अम्बरे दे चौनी पास्सेयां ते बिजली चमकी, 4 कने सैह धरती पर पैई गैआ कने एह उआज सुणी, "हे शाऊल, हे शाऊल, तू मिन्जो कजो सतांदा ऐ । 5 तिन्हीं पूछ्या, हे प्रभु, तू कुण ऐ?" तिन्हीं ग्लाय्या, "मैं यीशु ऐ, जिसियो तू सतांदा ऐ । 6 अपर हुण उठी करी सैहरे जो जा, कने जेहड़ा तिज्जो करणां ऐ सैह तिज्जो नँ दस्सेया जांगा । 7 जेहड़े माणु तिस सौगी थे, सैह भोचके रैई गै; कजोकि उआज तां सुणां करदे थे अपर तिन्हां जो कोई नि दुस्सा करदा था । 8 ताहू शाऊल जमीना पर पैआ था उठेया, अपर जाहू अंखी खोलियां तां तिसियो कुच्छ नी दुस्सा करदा था, कने सैह तिसदा हत्थ पकड़ी नँ दमिश्क सैहरे च लैई गै । 9 सैह तीन दिन तिकर नी दिखी सकेया, कने ना खादा ना पीता ।

10 दमिश्क सैहरे च हनन्याह नांये दा इक्क दास था, तिस नँ प्रभुयें दर्शन दैई करी ग्लाय्या, हे हनन्याह !" तिन्हीं ग्लाय्या, हाँ प्रभु ।" 11 ताहू प्रभुयें तिस नँ ग्लाय्या, उठी करी तिसा गलिया च जा जेहड़ी सीधी जांदी ऐ, कने यहूदा दे घरे शाऊल नांये दा इक्क तरसुसवासी जो पूछ; कजोकि दिख, सैह प्रार्थना करा दा ऐ, 12 कने तिन्हीं हनन्याह नांये दे इक्की मर्दे जो अंदर ओंदे कने अपणे ऊपर हत्थ रखदे दिख्या ऐ; तांकि भिरी ते नजर पां ।" 13 हनन्याह जबाब दित्ता, हे प्रभु मैं इस माणुये दे बारे च मतेआं ते सुणेया ऐ कि इन्हीं यरुशलेमे च तेरे पवित्र लोकां सौगी बड़ा बुरा कित्या ऐ । 14 कने इसियो प्रधान याजकां ते एह हक्क दित्या ऐ कि जेहड़े लोक तेरा नां लेंदे हन तिन्हां सबना जो एह बन्दी बणाई लें । 15 अपर प्रभुयें तिस नँ ग्लाय्या, "तू चली जा; कजोकि सैह तां गैर - यहूदियां कने राजेयां कने इस्त्रालियां दे सामणे मेरा नां प्रकट करणे तांई मेरा चुणिया जण ऐ । 16 कने मैं तिसियो दस्सगा कि मेरे नांये तांई तिसियो कदेया कदेया दुख झेलणा पोंगा ।" 17 ताहू हनन्याह उठी करी तिस घरे च गैआ, कने तिस पर अपणां हत्थ रखी करी ग्लाय्यां लग्गा, "हे भाऊ शाऊल, प्रभु, मतलब यीशु, जेहड़ा तिस रस्ते च, जिसते तू आया तिज्जो दुस्सया था, तिन्हीं मिन्जो घल्लया ऐ, कि तू दिखणां लगी पौयें कने पवित्र आत्मां नँ भरोई जां ।" 18 कने एकदम तिसदियां अंखी च छिलके साइआं कोई चीज्र पैई कने सैह दिखणां लगी पैआ, कने उठीकरी बपतिस्मा लैआ, 19 कने भिरी खाणां खाईकरी ताकत पाई,

दमिश्क सैहरे च शाऊल दे दुआरा प्रचार

सैह केई दिना तिकर तिन्हां चेलयां सौगी रैहूआ जेहड़े दमिश्क सैहरे च थे । 20 कने सैह ताहू ई आराधनालयां च यीशु दा प्रचार करणां लग्गा कि सैह परमात्में दा पुत्र ऐ । 21 सारे सुणने आळे हेरान होई करी ग्लाय्यां लग्गे, "क्या एह सैई माणु नी ऐ जेहड़ा यरुशलेमें च जेहड़े यीशु दा नां जो लेंदे थे, तिन्हां जो मारदा था; कने ऐत्थू भी इसतांई आया कि तिन्हां जो पकड़ी करी प्रधान याजकां अल्ल लैई जां । 22 अपर शाऊल होर भी सामर्थी हुंदा गैआ, कने इसा गल्ला दा सबूत दैई करी कि मसीह ऐत्थू ई ऐ, दमिश्क सैहरे दे रैहणे आळे यहूदियां दा मुँ बंद करदा रैहूआ ।

23 जाहू मते दिन होई गै, तां यहूदियां तिसियो मारणे दी योजना बणाई । 24 अपर तिन्हां दी योजना शाऊल जो पता लगी गैई । सैह तां तिसियो मारणे तांई रात दिन फटका पर ताक्का च लगेयो रैहदे थे । 25 अपर रातियो तिस देयां चेलयां तिसियो टोकरे च बैठाया, कने सैहरे दी चार दिवारी ते लटकई करी लौआई दित्ता ।

यरुशलेम सैहरे च शाऊल

26 यरुशलेमे च पुज्जी करी तिन्हीं चेलयां सौगी मिली करी जाणे दी कोशश किन्ती; अपर सारे तिसते डरदे थे, कजोकि तिन्हां जो वसुआस नी हुंदा था, कि सैह भी चेला ऐ । 27 अपर बरनबास तिसियो अपणे सौगी चेलयां अल्ल लैई गैआ कने तिन्हां जो दस्सेया कि इन्हीं कुस तरीके नँ रस्ते च प्रभु जो दिख्या

कने तिन्हीं इस नँ गल्लां किन्तियां; भिरी दमिश्क इन्हीं बड़िया हिम्मतानें यीशु दे नांये दा प्रचार कित्ता । 28 सैह तिन्हां सौगी यरुशलेमे च ओंदा जांदा रैहूआ । 29 कने बेझिझक होई करी प्रभु दे नांये दा प्रचार करदा; कने यूनानी भासा ग्लाय्या आळे यहूदियां सौगी गल्लबात कने वाद विवाद करदा था; अपर सैह तिसियो मारणे दी कोशश करणां लग्गे । 30 एह जाणी करी भाऊ तिसियो कैसरिया सैहरे च लैई आये, कने तरसुस जो घल्ली दित्ता । 31 इस तरांहे सारे यहूदिया, कने गलील कने सामरिया च कलेसिया जो चैन मिला, कने तिसदी उन्नति होंदी गैई; कने सैह प्रभु दे डरे कने पवित्र आत्मां दी शांति च चलदी कने बधदी गैई ।

लुद्धा कने याफा च पतरस

32 भिरी इआं होया कि पतरस हर जगाह फिरदा फिरदा तिन्हां पवित्र माणुआं अल्ल भी पुज्जा जेहड़े लुद्धा च रैहदे थे । 33 तित्थु तिसियो एनियास नांये दा इक्क अधरणे दा इक्क रोगी माणु मिला, जेहड़ा अठां सालां ते मंजोलूये पर पैआ था । 34 पतरसं तिस नँ ग्लाय्या, "हे एनियास ! यीशु मसीह तिज्जो खरा करदा ऐ उठ अपणे बछाणे चुक ।" ताहू सैह झट उठी खडौता । 35 ताहू लुद्धा सैहरे दे कने शारोन सैहरे दे सारे रैहणे आळे तिसियो दिखी करी प्रभु दे पाससं फिरे ।

36 याफा च तबीता मतलब दोरकास नांये दी इक्क वसुआसनी रैहदी थी । सैह मते खरे खरे कम्म कने दान करा करदी थी । 37 तिन्हां दिनां च सैह बमार होई करी मरी गैई; कने तिन्हां तिसायो नौआई करी अटारिया पर रखी दित्ता । 38 इस तांई कि लुद्धा याफा दे बखरें था, चेलयां एह सुणीकरी कि पतरस तित्थु ऐ, दो माणु घल्ली करी तिस नँ विणती किन्ती, "अहां अल्ल ओणे च देर मत कर ।" 39 ताहू पतरस उठी करी तिन्हां सौगी चली पैआ, कने जाहू सैह पुज्जा तां सैह तिसियो अटारिया पर लैई गै । सारियां विधवां रोंदियां रोंदियां तिसदे बखरें आई खडौतियां, कने जेहड़े कुरते कने कपडे दोरकासं तिन्हां सौगी रैहदे बणांयो थे, दस्सणा लगियां । 40 ताहू पतरसं सबना जो बाहर करी दित्ता, कने गोडेयां भार बैई करी प्रार्थना किन्ती कने लाशा बखरी दिख्या ग्लाय्या, "हे तबीता दिख, उठ, ताहू तिन्हीं अपणियां अंखी खोली दित्तियां; कने पतरसे दिखी करी उठी बैठी । 41 तिन्हीं वाल दैई करी तिसायो दुआलेया, कने पवित्र लोकां कने विधवां जो सददी करी तिसायो जिंदा दस्सी दित्ता । 42 एह गल्ल सारे याफा च फैली गैई, कने मतेआं प्रभु पर वसुआस कित्ता । 43 कने पतरस याफा च शमौन नांये दे कुसी चमडे दा धंधा करणेआळे दे सौगी बड़े दिन रैहूआ ।

कुरनेलियुसे दा पतरसे जो सदगां

10 कैसरिया च कुरनेलियुस नांये दा इक्क माणु था, जेहड़ा इतालियानी नांये दी सेना दा सूबेदार था । 2 सैह भक्त था, कने अपणे सारे घराने सौगी परमात्में ते डरदा था, कने यहूदी लोकां जो बड़ा दान दिंदा, कने बराबर परमात्में नँ प्रार्थना करदा था । 3 तिन्हीं संजा दे बग्त दर्शन च स्पष्ट रूपे नँ दिख्या कि परमात्में दा इक्क सुअर्गदूत तिस अल्ल अंदर आई करी ग्लाय्या, "हे कुरनेलियुस !" 4 तिन्हीं तिसियो ध्याने नँ दिख्या कने डरी करी ग्लाय्या, "हे प्रभु, क्या ऐ?" तिन्हीं तिस नँ ग्लाय्या, तेरी प्रार्थनां कने तेरे दान यादा तांई परमात्में सामणे पुज्जे हन; 5 कने हुण याफा च माणु घल्ली करी शमौने जो, जेहड़ा पतरस नांये ते जाणेया जादा ऐ, सददी लै । 6 सैह शमौन, चमडे दा कम्म करणे आळे दे घरें परोणां बणी करी रैहू दा ऐ, जिसदा घर समुंदरे कंडे ऐ ।" 7 जाहू सैह सुअर्गदूत जिन्हीं तिस नँ गल्लां किन्तियां थियां चली गैआ, तां तिन्हीं दो सेवक, कने जेहड़े तिसदे सामणे हाजर रैहदे थे तिन्हां च इक्क भक्त सिपाईये जो सददेया, 8 कने तिन्हां जो सारियां गल्लां दस्सी करी याफा जो घल्लया ।

पतरसे दा दर्शन

9 दूये दिने जाहू सैह चलदे चलदे सैहरे अल्ल पुज्जे, तां दोपेरा दे बग्त पतरस कोठे पर प्रार्थना करणे जो चढेया । 10 तिसियो भूख लगी कने कुच्छ खाणां चाहंदा था, अपर जाहू सैह तयारी करा दे थे तां सैह बेहोश होई गैआ; 11 कने तिन्हीं दिख्या, कि अम्बर खुली गैआ; कने इक्की थाले जो बड़िया चादरा साइआं चौनी कुणेयां ते लटकदा होया, धरती दे पास्से लौआ करदा ऐ ।

12 जिस च धरतिया दे सब तरांह दियां चिद्धियां कने रेंगणे आळे जन्तु कने अम्बरे दे पंछी थे । 13 तिसियो इक्क ऐसी उआज सुम्मी, "हे पतरस उठ, मार कने खा ।" 14 अपर पतरसं ग्लाय, "नी प्रभु कदी भी नी; कजोकि मैं कोई भी अपवित्र या बुरी चीज नी खाई ऐ ।" 15 भिरी दूई बरी तिसियो उआज सुम्मी, "जेहड़ा कुच्छ परमात्मं शुद्ध ठेहराया ऐ, तिसियो तू बुरा मत ग्ला ।" 16 त्री बरी भी इआं ई होया; ताहू सैह थाल अम्बरे पर चुकी लैआ ।

17 जाहू पतरस अपने माने च सोचा ई करदा था, कि एह दर्शन जेहड़ा मैं दिख्या सैह क्या होई सकदा ऐ, तां दिखा, सैह माणु जिन्हां जो कुरनेलियुसं घल्लया था, शमौने दे घरे दा पता पूछदे तिसदे ई घरे आई रैह, 18 कने हक्कां पाई करी पूछणां लगे, "क्या शमौने जिसियो पतरस भी ग्लादे हन, परोणां ऐत्थु ई ऐ?" 19 पतरस तां तिस दर्शने दे बारे च सोचा दा ई था, कि आत्मां तिस नैं ग्लाणां लग्गा, "दिख त्रे माणु तिजो तोपा दे हन ।" 20 कने उठी करी थले जा, कने बेझिझक तिन्हां सौगी चली जा; कजोकि मैं ई तिन्हां जो घल्लया ऐ ।" 21 ताहू पतरसं लौई करी तिन्हां माणुआं नैं ग्लाय, "दिखा, जिसियो तुहां तोपा दे हन, सैह मैं ई ऐ तुहां दे ओणे दी क्या बजाह ऐ?" 22 तिन्हां ग्लाय, "कुरनेलियुस सूबेदार जेहड़ा धर्मी कने परमात्मं ते डरणे आळे कने सारी यहूदी जाति च नेक माणु ऐ, तिन्हीं इक्क पवित्र सुअर्गदूते दा दर्शन पाया ऐ कि तिजो अपने घरें सददी करी तिजो ते वचन सुणे ।" 23 ताहू तिन्हीं तिन्हां जो अंदर सददी करी तिन्हां जो रैहणे दी जगाह दित्ती ।

कुरनेलियुसे दे घरें पतरस

दूये दिने सैह तिन्हां सौगी गैआ, कने याफा दे भाऊआं ते कुच्छ तिस सौगी चली पै । 24 दूये दिने सैह कैसरिया पुजे, कने कुरनेलियुसं अपने परवारे जो कने प्यारे साथियां जो किट्टा करी नैं तिन्हां दा इंतजार करदा रैहआ था । 25 जाहू पतरस अंदरेयो ओणां लगेया था, कुरनेलियुस तिस नैं मिला कने तिसदे परां पर पैई करी प्रणांम किता; 26 अपर पतरस तिसियो चुकी करी ग्लाणां लग्गा, "खडौई जा, मैं भी तां माणु ऐ ।" 27 कने तिस सौगी गल्लबात करदा करदा अंदर गैआ, कने मते लोकां जो किट्टे दिखी करी 28 तिन्हीं ग्लाय, "तुहां जाणदे हन कि होरनी जाति दी संगति करणां या तिस अल्ल जाणां यहूदी तांई अधर्म ऐ, अपर परमात्मं मिन्जो दस्सेया ऐ कि कुसी भी माणु जो अपवित्र या बुरा मत ग्ला । 29 इसतांई मैं जाहू सदया तां बौर ग्लाणे ते ई चली आया । हुण मैं पूछदा ऐ कि मिन्जो कुस कम्मे तांई सदया ऐ ।" 30 कुरनेलियुस ग्लाणां लग्गा, "इसा घडिया च पूरे चार दिन होई गैयो हन, मैं अपने घरें सजा प्रार्थना करा दा था: तां दिखा इक्क माणु चमकदे कपडे लगाई नैं, मिन्जो सामणे आई खडौता । 31 कने ग्लाणां लग्गा, "हे कुरनेलियुस, तेरी विणती सुणी लैई ऐ कने तेरे दान परमात्मं सामणे याद किते गै हन । 32 इसतांई कुसी जो याफा घल्ली करी शमौने जो जिसियो पतरस भी ग्लादे हन, सददी घल्ल । समुंदरे कंडे शमौने, चमडे दा कम्म करणे आळे दा परोणां ऐ ।" 33 ताहू मैं झट तिजो अल्ल माणु घल्ले, कने तैं खरा किता जेहड़ा तू आई गैआ । हुण अहां सारे ऐत्थु परमात्मं सामणे हन, तांकि जेहड़ा कुच्छ परमात्मं तिजो नैं ग्लाय ऐ, तिसियो सुण ।"

पतरसे दी शिक्षा

34 ताहू पतरस ग्लाणां लग्गा, "हुण मिन्जो वसुआस होई गैआ कि परमात्मां कुसी दा पक्षपात नी करदा । 35 अपर हर जातिआ च जेहड़ा तिसते डरदा कने धर्म दे कम्म करदा ऐ, सैह तिसियो खरा लगदा ऐ । 36 जेहड़ा वचन तिन्हीं इस्त्रापलियां अल्ल घल्लया, जाहू तिन्हीं यीशु मसीह दिया बजाह ते (जेहड़ा सबना दा प्रभु ऐ) शांति दा सुसमाचार सणाया, 37 एह वचन तुहां जाणदे हन, जेहड़ा यहूना दे बपतिस्मे दे प्रचारे ते बाद गलीले ते शुरू होई करी सारे यहूदिया बिच फैली गैआ : 38 परमात्मं जिस तरीके नैं यीशु नासरिये जो पवित्र आत्मां कने सामर्थी नैं अभिषेक किता; सैह भलाई करदा कने सबना जो जेहड़े सैताने दे सतायो हन, खरा करी दिंदा, कजोकि परमात्मां तिस सौगी था । 39 अहां तिन्हां सारे कम्मां दे गवाह हन; जेहड़े तिन्हीं यहूदिया दे देस च कने यरुशलमे च भी कित्ते, कने तिन्हां तिसियो सुलिया पर लटकाई करी मारी दिता । 40 तिस जो परमात्मं त्रीये दिने जिंदा किता, कने प्रगट भी करी दिता; 41 सारेयां लोकां पर नी अपर तिन्हां गवाहां पर जिन्हां जो परमात्मं पैहलें ई चुणी लैआ था मतलब अहां पर जिन्हां तिसदे

मरेयां ते जिंदा होणे ते बाद तिन्हां सौगी खादा पीता; 42 कने तिन्हीं अहां जो हुक्म दिता लोकां च प्रचार करा कने गवाही दैआ, कि एह सैई ऐ जिसियो परमात्मं जिंदाया कने मरेयां दा न्यायी ठेहराया ऐ । 43 तिसदी सारे भविष्यवक्ता गवाही दिंदा हन कि जेहड़ा कोई तिस पर वसुआस करगा, तिस जो तिसदे नांये दिया बजाह ते पापां दी माफी मिलणी ऐ ।"

गैर - यहूदियां च पवित्र आत्मां लौणां

44 पतरसं एह गल्लां ग्लादा ई था कि पवित्र आत्मां वचन सुणने आळ्यां पर लौई आया । 45 कने जितणे खतना कित्तयो वसुआसी पतरसं सौगी आययो थे, एह सारे हैरान होई गै कि होरना -जातिआं पर भी पवित्र आत्मां दा दान दिता गैआ ऐ । 46 कजोकि तिन्हां तिन्हां जो हर तरांह दी भाषा ग्लादे कने परमात्मं दी महिमा करदे सुणेया । इसा गल्ला पर पतरसं ग्लाय, 47 "क्या कोई पाणी जो रोकी करी रखी सकदा ऐ कि एह बपतिस्मा नी पान, जिन्हां अहां साइआं पवित्र आत्मां जो पाया ऐ ।" 48 कने तिन्हीं हुक्म दिता कि तिन्हां जो यीशु मसीह दे नांये पर बपतिस्मा दिता जां । ताहू तिन्हां तिस नैं विणती किती कि सैह कुच्छ दिन होर तिन्हां सौगी रैह ।

पतरसे दे दुआरा अपने कम्मां दा स्पष्टीकरण

11 भिरी चेलयां कने भाऊआं जेहड़ा यहूदिया च सुणेया कि गैर - यहूदियां भी परमात्मं दा वचन मनी लैआ ऐ । 2 कने जाहू पतरस यरुशलमे च आया, तां खतना कित्तयो माणु तिस नैं बँहसणां लगे, 3 "तैंई खतणां नी कित्तयो माणुआं अल्ल जाईकरी तिन्हां सौगी खादा ।" 4 ताहू पतरसं जेहड़ा होया था तिन्हां जो शुरू ते इक्क इक्क करी नैं ग्लाई दिता: 5 "मैं याफा सैहरे च प्रार्थना करा दा था, कने बेहोश होई करी इक्क दर्शन दिख्या कि इक्क थाल बडिया चादरा साइआं चौंणी कुणेयां च लटकेया, अम्बरे ते लौई करी मिन्जो अल्ल आया । 6 जाहू मैं तिस पर ध्यान दिता, तां तिस च धरतिया दी चिद्धियां कने बणे दे डंगर कने रेंगणे आळे जानवर कने अम्बरे दे पंछी दिखे; 7 कने एह उआज सुणी, 'हे पतरस उठ, मार कने खा ।' 8 मैं ग्लाय, 'नी प्रभु, नी, कजोकि कोई अपवित्र या बुरी चीज मेरे मुँमें च कदी नी गेई ।' 9 इस जबाबे च अम्बरे ते दूई बरी आवाज आई, 'जेहड़ा कुच्छ परमात्मं शुद्ध ठेहराया ऐ, तिसियो बुरा मत ग्ला ।' 10 त्री बरी भिरी इआं ई होया; ताहू सब कुच्छ भिरी अम्बरे च खीजी लैआ । 11 कने दिखा, झट त्रे माणु जेहड़े कैसरिया ते मिन्जो सौगी घल्लेयो थे, तिस घरें जिस च अहां थे, आई खडूते । 12 ताहू आत्मां मिन्जो तिन्हां सौगी बेझिझक जाणे जो ग्लाय, कने एह छे भाऊ भी मिन्जो सौगी चली पै; कने अहां तिस माणुये दे घरें गै । 13 तिन्हीं अहां जो गलाया, कि तिन्हीं इक्की सुअर्गदूते जो अपने घरें खडूतेया दिख्या, जिन्हीं तिस नैं ग्लाय, "याफा च माणु घल्ली करी शमौने जो जेहड़ा पतरस नांये ते जाणेयां जांदा ऐ, सददी लै ।" 14 जाहू तिजो नैं ऐदियां गल्लां ग्लां, जिन्हां दिया बजाह ते तू कने तेरा सारा घराना उद्धार पांगा ।" 15 जाहू मैं गल्लां करणां लग्गा, तां पवित्र आत्मां तिन्हां पर तिस तरीके नैं उतरेया जिस तरीके नैं शुरू च अहां ऊपर उतरेया था 16 ताहू मिन्जो परमात्मं दा सैह वचन याद आया; जेहड़ा तिन्हीं ग्लाय था, "यूहन्ना तां पाणिये च बपतिस्मा दिता, अपर तुहां पवित्र आत्मां नैं बपतिस्मा पाणां ।" 17 कने जाहू परमात्मं तिन्हां जो भी सैई दान दिता, जेहड़ा अहां जो परमात्मं यीशु मसीह पर वसुआस करणे ते मिलेया था; तां मैं कुण था जेहड़ा परमात्मं जो रोकी सकदा ।" 18 एह सुणीकरी चुप रैह, कने परमात्मं दी तरीफ करणां लगे, "ताहू तां परमात्मं गैर - यहूदियां च मन बदलणे दा दान दिता ऐ ।"

अन्ताकिया दी कलेसिया

19 जेहड़े माणु तिस कल्लेशे च मारे जेहड़ा स्तिफनुसे दिया बजाह ते पैआ था, तितर बितर होई गैयो थे, सैह फिरदे फिरदे फीनीके कने साईप्रस कने अन्ताकिया च पुजे; अपर यहूदियां जो छड्डी करी होर कुसी जो वचन नी सणां दे थे । 20 अपर तिन्हां च कुच्छ साईप्रस वासी कने कुरेनी थे, जेहड़े अन्ताकिया च आईकरी यूनानियां च भी प्रभु यीशु दा सुसमाचार सनाणां लगे । 21 प्रभु दा हत्थ तिन्हां पर था कने बडे भरी माणु वसुआस करी नैं प्रभु दे पाससं फिरे । 22 जाहू तिन्हां दी चर्चा यरुशलमे दी कलेसिया च सुणने च आई, ताहू तिन्हां बरनबासे जो अन्ताकिया घल्लया । 23 सैह तित्थु पुज्जी करी

परमात्मं दे अनुग्रह जो दिखी करी खुश होया, कने सबना जो शिक्षा दिंदा कि तन मन लगाई करी प्रभुये नैं लिपटी रहूआ । 24 सैह इक्क भला माणु था, कने पवित्र आत्मां नैं कने वसुआसे नैं भरौया था; कने होर भी केई लोक प्रभु च आई मिले । 25 ताहू सैह शाऊले जो तोपणे तांई तरसुसे जो चली गैआ । 26 जाहू सैह तिस नैं मिला तां तिसियो अन्ताकिया लैई आया; कने इआं होया कि सैह इक्क साल तिकर कलेसिया सौगी मिलदे कने मते लोका जो शिक्षा दिंदे रहू; कने चले सबना ते पैहलें अन्ताकिया च ई मसीह केहलाये ।

27 तिन्हां दिना च मते भविष्यवक्ता यरुशलेम ते अन्ताकिया आये । 28 तिन्हां च अगबुश नांये दा इक्क माणु खडौई करी आत्मां दिया प्रेरणा नैं एह दस्सेणां लग्गा कि सारे संसारे च बड़ा अकाल पोणां --- सैह अकाल क्लौदियुस दे बग्त च पैआ । 29 ताहू चेलेयां एह फेसला कित्ता कि हर इक्क अपणियां -अपणियां दौलता मताबक यहूदिया च रहणे आळ्यां भाऊआं दी मदता तांई कुच्छ घल्लन । 30 तिन्हां इआं ई कित्ता; कने बरनबास कने शाऊल दे हत्थ स्याणेयां अल्ल कुच्छ घल्ली दित्ता ।

पतरसे दी जेला ते मुक्ति

12 तिस बग्त हेरोदेस राजें कलेसिया दे कईयां माणुआं जो सताणे तांई तिन्हां पर हत्थ चुके । 2 तिन्हीं यहूने दे भाऊये याकूबे जो तलवारा नैं मरवाई दित्ता । 3 जाहू तिन्हीं दिख्या कि यहूदी माणु इस ते खुश होंदे हन, तां तिन्हीं पतरसे जो भी पकडी लैआ । सैह दिन अखमीरी रोटिया दे दिन थे । 4 तिन्हीं तिसियो पकडी करी जेला च पाई दित्ता, कने चौं चौं सपाईयां दे पेहरे च रखया; एह सोची नैं कि फसह दे बाद तिसियो लोकां सामणे लैयोयें । 5 जेला च पतरस बंद था; अपर कलेसिया तिस तांई लौ लगाई करी परमात्मं नैं प्रार्थना करा दी थी ।

6 जाहू हेरोदेस तिसियो लोकां सामणे लैयोणे आळा ई था, तिसा राती पतरस दू जंजीरा नैं बनेया दू सपाईयां दे गबे सुतेया था; कने चौकीदार दुरआजे पर जेला दी रखवाळी करा दे थे । 7 ता दिखा, प्रभु दा इक्क सुअर्गदूत आई खडौता कने तिसा जेला च लौ चमकी कने तिन्हीं पतरसे दिया पसलिया पर हत्थ मारी करी तिसियो जगाया कने ग्लया । “उठ, तौळी कर ।” कने तिसदेयां हत्थां ते जंजीरा खुली करी पैईयां । 8 ताहू स्वर्गदूत तिस नैं ग्लणां लग्गा, “त्यार हो, कने अपणे जूतेयां पाई लै ।” तिन्हीं सैई कित्ता । भिरी तिन्हीं तिस नैं ग्लया, “अपणे कपडे लगाई करी मिन्जो पचांह चली पौ ।” 9 सैह निकळी करी तिस दे पचांह चली पैआ ; अपर एह नी जाणदा कि जेहड़ा कुच्छ सुअर्ग दूत करा दा सैह सच ऐ, अपर एह समझेया कि में दर्शन दिखा दा ऐ । 10 ताहू सैह पैहले कने दूये पेहरे ते निकळी करी तिस लोहे दे गेटे अल्ल पुजे, जेहड़ा सैहरे दे बखें ऐ । सैह तिन्हां तांई अप्पु ई खुली गैआ, कने सैह निकळी करी गळीया च होई करी गै, इक्क दम ई स्वर्ग दूत तिसियो छड्डी करी चली गैआ । 11 ताहू पतरसें चुकनै होई करी ग्लया, “हुण मैं सच जाणी लैआ ऐ प्रभुयें अपणां स्वर्गदूत घल्ली करी मिन्जो हेरोदेस दे हत्थां ते छडबाई लैआ, कने यहूदियां दी सारी आस तोडी दित्ती ।” 12 एह जाणी करी सैह तिस यहूने दिया माऊ मरियमा दे घरे आया, जेहड़ा मरकुस कहलादां ऐ । तित्थु मते लोक किडे होई करी प्रार्थना करा दे थे । 13 जाहू तिन्हीं दुरआजे दी खिडकी ठोरी, तां रुदे नांये दी इक्क दासी दिखणां आई । 14 पतरसे दी उआज पणछेणी करी तिन्ने दुरआजा नी खोलया, अपर दोडी करी अंदर गैई कने दस्सेया कि पतरस दुरआजे पर खडूतेया ऐ । 15 तिन्हां तिसा नैं ग्लया, “तू पागल ऐ ।” अपर सैह वसुआसे नैं ग्लणां लग्गी कि इआं ई ऐ । ताहू तिन्हां ग्लया, “तिसदा सुअर्गदूत होणां ।” 16 अपर पतरस ठोरदा ई रहूआ, अपर तिन्हां खिडकी खोली, कने तिस जो दिखी करी हैरान होई गै । 17 ताहू तिन्हीं तिन्हां जो हत्थे नैं सनक लगाई कि चुप रहूआ; कने तिन्हां जो ग्लया कि प्रभु कुस तरीके नैं तिसियो जेला ते कड्डी करी लैई आया ऐ । भिरी ग्लणां लग्गा, “याकूब कने भाऊआं जो एह गल्ल दस्सी दिनेयो ।” ताहू निकळी करी दूईया जगाह चली गैआ ।

18 भ्यागा सपाईयां च बडी हबडा तफरी मची गैई कि पतरसे दा कया होआ । 19 जाहू हेरोदेशें तिसदी तोप पाई कने सैह नी मिला, तां चौकीदारां दी जाच करी नैं हुक्म दित्ता कि सैह मारी दित्ते जान; कने सैह यहूदिया जो छड्डी करी कैसरिया च जाई करी रहणां लग्गा ।

राजा हेरोदेसे दी मौत

20 हेरोदेस सूर कने सैदा दे लोकां ते बड़ा नराज था । इसतांई सैह इक्क मन होई करी तिस अल्ल आये, कने बलास्तुसे जो जेहड़ा राजे दा इक्क कर्मचारी था, मनाई करी मेळ कराणां चाहंदा था; कजोकि राजे दे देशे ते तिन्हां दे देशे दा पाळन -पोसण हुंदा था । 21 ठेहरायो दिन हेरोदेस राजें आळे कपडे पैहनी करी सिंहासणे पर बैई गैआ, कने तिन्हां जो भाषण दैणां लग्गा । 22 ताहू लोक ग्लाय उठे, “एह तां माणुये दा नी परमात्मं दी उआज ऐ ।” 23 तिस बग्त प्रभु दे इक्की सुअर्ग दूतें इक्क दम बमार करी दित्ता, कजोकि तिन्हीं परमात्मं दी महिमा नी किती; कने तिस च कीडे पैई गै जेहड़े तिसियो खाणां लग्गे कने सैह मरी गैआ । 24 अपर परमात्मं दा वचन बधदा कने फैलदा गैआ ।

25 जाहू बरनबास कने शाऊल अपणी सेवा पूरी करी बैठे तां यहूने जो जेहड़ा मरकुस नांये ते जाणेया जांदा ऐ, सौगी लैई करी यरुशलेम च आये ।

बरनबासे जो कने शाऊले जो घल्लणां

13 अन्ताकिया दी कलेसिया च मते भविष्यवक्ता कने उपदेशक थे; जिआं कि बरनबास कने शमौन जिसियो नीगर ग्लांदे थे; कने लुकियुस कुरेनी, कने चौथाई देशे दे राजा हेरोदेसे दा दूदभाऊ मनाहेम, कने शाऊल । 2 जाहू सैह व्रत रखी करी परमात्मं दी भक्ति करा दे थे, तां पवित्र आत्मां ग्लया, “मिन्जो तांई बरनबासे कने शाऊले जो तिस कम्मे तांई लग्ग कर जिस तांई मैं तिन्हां जो सदेया ऐ ।” 3 ताहू तिन्हां व्रत रखी करी प्रार्थना किती कने तिन्हां पर हत्थ रखी नैं तिन्हां जो घल्ली दित्ता ।

पौलुसे दी पैहली प्रचार - यात्रा

4 कने सैह पवित्र आत्मां दे घल्लेयो सिलूकिया जो चली गै; कने तित्थु ते चाहजे पर चढीकरी साइप्रस जो चली पै; 5 कने सलमिस च पुज्जी करी, परमात्मं दा वचन यहूदियां दे अराधनालयां च सणांया । यहूना तिन्हां दा सेवक था । 6 सैह सारे तिस टापूये ते होंदे होये पाफुस तिकर पुजे । तित्थु तिन्हां जो बार - यीशु नांये दा इक्क यहूदी जादूगर कने झूठा भविष्यवक्ता मिला । 7 सैह हाकम सिरगियुस पौलुसे सौगी था, जेहड़ा अक्कमंद माणु था । तिन्हीं बरनबासे जो कने शाऊले जो अपणे अल्ल सददी नैं परमात्मं दा वचन सनाणां चाया । 8 अपर इलीमास जादूगरें, कजोकि ऐही तिसदे नांये दा मतलब ऐ, तिन्हां दा वरोध करी नैं हाकमे जो वसुआस करणे ते रोकणां चाया । 9 ताहू शाऊलें जिसदा नां पौलुस भी ऐ, पवित्र आत्मां नैं भरौई करी तिस बखें टक लगाई करी दिख्या कने ग्लणां लग्गा, 10 “हे सारे कपट नैं कने चतुराईयां नैं भरेयो सैताने दी औलाद, संकल कने धर्म दे बैरी, कया तू प्रभु दे सिधियां रस्तेयां जो टेडा करना नी छडणां ।” 11 हुण दिख, प्रभु दा हत्थ तिजो पर लगेआ ऐ; कने तू थोडे बग्त तिकर अन्ना रेंहणां कने सूरजे जो नी दिखणां ।” ताहू इक्क दम धुधलापन कने नैहरा छाई गैआ, कने सैह तांह तुंह टटोलना लग्गा तांकि जे कोई तिसदा हत्थ पकडी करी लैई चलें । 12 ताहू हाकमे जेहड़ा होया था तिसियो दिखी करी कने प्रभु दी शिक्षा ते हैरान होई करी वसुआस कित्ता ।

पिसिदिया ते अन्ताकिया च

13 पौलुस कने तिसदे साथी पाफुसें चाहजे च बैई करी पंपूलिया दे पीरगे च आये; कने यहूना तिन्हां जो छड्डी करी यरुशलेमे जो वापस आई गैआ । 14 पिरगे ते गांह जाई करी पिसिदिया दे अन्ताकिया च पुजे; कने सब्द दे दिने अराधनालय च जाई करी बैई गै । 15 व्यवस्था कने भविष्यवक्ता दी कताब पढणे ते बाद आराधनालय देयां अधिकारियां तिन्हां जो संदेशा घल्लेया, “हे भाऊओ, जे लोकां दियां शिक्षा तांई तुहां दे मने च कोई गल्ल ऐ तां दस्सा ।” 16 ताहू पौलुसें खडे होई करी कने हत्थ नैं सनक लगाई करी नैं ग्लणां लग्गा, “हे इस्राएलियो, परमात्मं ते डरणेआळ्यो सुणां, 17 इन्हां इस्राएली लोकां दे परमात्मं तुहां जो चुणी लैआ, कने जाहू एह माणुमिन्न देशे च परदेसी होई करी रहंदे थे, तां तिन्हां दी उन्नति किती: कने ताकतवर भुजा नैं कड्डी अंदा । 18 सैह कोई चाली साल तिकर बणे च तिन्हां दी सेहंदा रहूआ, 19 कने कनान देशे च सतां जातिआं दा नाश करी नैं तिन्हां दा देस कोई साढे चार सौ सालां च इन्हां दिया मिरासा च दैई दित्ता । 20 इसते बाद तिन्हीं शमूल भविष्यवक्ता

तिकर तिन्हां च न्यायी ठेहराये । 21 तिसदे बाद तिन्हीं इक्क राजा मंगेआ, ताहू परमात्मं चाली साल तांई विन्यामीन दे गोत्रे च इक्क माणु, मतलब कुसी दे पुत्तर शाऊले जो तिन्हां पर राजा ठेहराया । 22 भिरी तिन्हीं लग्ग करी नें दाऊदे जो तिन्हां दा राजा बणाया; जिसदे बारे च तिन्हीं गवाही दिती, 'मिन्जो इक्क माणु, यिंशै दा पुत्तर दाऊद, मेरे मने मताबक मिली गैआ ऐ; सैह ई मेरी सारी इच्छा पूरी करगा ।' 23 इस दे वंश च परमात्मं अपनी प्रतिज्ञा मताबक इस्त्राएले अल्ल इक्क उदारकर्ता, मतलब यीशुये जो घल्लाया । 24 जिसदे ओणे ते पैहले यहन्ने सारयां इस्त्राएलियां च मन बदलणे दे बपतिस्मं दा प्रचार कित्ता । 25 जाहू यहन्ना अपनी सेवा पूरी करणे पर था, ता तिन्हीं ग्लाय, 'तू मिन्जो क्या समझदा ऐ, मैं सैह नी । अपर दिख, मेरे बाद इक्क ओआ दा ऐ जिस देयां पैरां दे मैं जूतेयां भी मैं खोलणे दे जोग्गा नी ।' 26 'हे भाऊओ, तुहां जेहडे अब्राहमे दी औलाद हन; कने तुहां जेहडे परमात्मं ते डरदे हन, तुहां अल्ल इस उद्दारे दा वचन घल्लया ऐ । 27 कजोकि यरुशलमे च रहणे आळ्यां कने तिन्हां देयां अधिकारियां, ना तिसियो पणछेणया कने ना ई भविष्यवक्तां दी गल्लां समझियां, जेहडी हर सब्त दे दिन्ने पढियो जांदी ऐ, इसतांई तिसियो दोषी मनी करी तिन्हां गल्लां जो पूरा कित्ता । 28 तिन्हां मारणे जोग्गा कोई दोष तिस च नी पाया, तमी पिलातुसे नें विणती किती कि सैह मारी दिता जा । 29 जाहू तिन्हां तिसदे बारे च लिखियां गल्लां पूरियां कितीयां, तां तिसियो सुलियां ते लौआई करी कब्र च रखेया । 30 अपर परमात्मं तिस जो मरेयां च जिंदा कित्ता, 31 कने सैह तिन्हां जो जेहडे तिस सौगी गलील ते यरुशलमे आयेयो थे, मतेआं दिना तिकर दुस्सदा रहआ; लोकां सामणे हुण सैह ई तिसदे गवाह हन । 32 अहां तिज्जो तिसा प्रतिज्ञा जो जेहडी पितरां नें कितीया थी, हे सुसमाचार सणां दे हन, 33 कि परमात्मं यीशु जो जिंदा करी नें, सैह ई प्रतिज्ञा अहां दिया औलादी तांई पूरी किती; जिआ दूये भजने च लिख्या ऐ; तू मॅरा पुत्तर ऐ; अज्ज मॅई तिज्जो पैदा कित्या ऐ ।'

34 कने तिसदे इस तरीके नें मरेयां ते जिंदा होणे दे बारे च भी कि सैह कदी नी सडे, तिन्हीं एह ग्लाय ऐ, 'जिआं मैं दाऊदे पर कितीयो पवित्र कने अटल कृपा तिज्जो पर भी करगा ।'

35 इसतांई तिन्हीं इक्क होर भजने च भी ग्लाय ऐ, तू अपने पवित्र माणुआं जो सडना नी दिंगा ।'

36 कजोकि दाऊद तां परमात्मं दिया इच्छा मताबक अपने बगते च सेवा करी नें मरी गैआ, कने अपने स्याणेयां च जाई मिला, कने सडी भी गैआ ।

37 अपर तिसियो परमात्मं जिंदा कित्या, सैह सडी भी नी सकेया ।

38 इसतांई, हे भाऊओ, तुहां जाणी लैआ कि इसदिया बजाह ते ई पापां दी माफी दा समाचार तुहां जो दित्या जांदा ऐ; 39 कने जिन्हां गल्लां च तुहां मूसा दिया व्यवस्था दिया बजाह ते बेकसूर नी ठेरी सकदे थे, तिन्हां सारयां च हर इक्क वसुआस करणे आळा तिस तांई बेकसूर ठेहरदा ऐ । 40 इसतांई चुकनै रहआ, इआं ना होयें कि जेहडा भविष्यवक्ता दियां कताबा च आया ऐ, तुहां पर भी आई पोयें ।

41 हे निंदा करणे आळ्यो, दिखा कने भोचके होई करी मरी जा; कजोकि मैं तुहां दे दिनां च इक्क कम्म करदा ऐ, एह कम्म कि जे कोई तुहां नें तिसदी निंदा करे, तां तुहां कदी वसुआस नी करगे ।

42 तिन्हां दे बाहर निकळदे बग्त लोक तिन्हां नें विणती करणां लग्गे कि अगले सब्त दे दिने अहां एह गल्लां भिरी सणांईयां जान । 43 जाहू सभा उठी गैई तां यहूदियां कने यहूदी मत आळे मते सारे भक्त पौलुसे दे कने बरनबासे पचाह चली पै; कने तिन्हां तित्थु माणुआं नें गल्लां करी नें समझाया कि परमात्मं दे अनुग्रह च बणी रहआ ।

पौलुसे दे दुआरा गैर - यहूदियां च प्रचारे दी शुरुआत

44 अगले सब्त दे दिन सैहरे दे सारे लोक परमात्मं दे वचन सुणने जो किड्डे होई गै । 45 अपर यहूदी भीडा जो दिखी करी डाह नें भरी गै, कने निंदा करदे करदे पौलुसे दियां गल्लां दा विरोध च ग्लाय लग्गे । 46 ताहू पौलुस कने बरनबासे निडर होई करी ग्लाय लग्गा, 'जरूरी था कि परमात्मं दा वचन पैहले तुहां जो सणाया जांदा; अपर जाहू तुहां तिसियो जो दूर हटाई करी कने अपने जो सदा दी जिन्दगिया जोग्गा ठेहरां, तां दिखा, अहां होरना जातिआं दे पास्सें फिरदे हन । 47 कजोकि प्रभुयें अहां जो एह हुक्म दित्या ऐ, मॅई तिज्जो गैर - यहूदियां तांई जोती ठेहराया ऐ कजोकि तू धरतिया दे इस छोर तिकर उद्दारे दा दुरवाजा होन ।'

48 एह सुणीकरी होर जातिआं खुश होइआं, कने परमात्मं दे वचन दी महिमा करणां लग्गे; कने जितणे भी सदा दी जिन्दगिया तांई ठेहराये गैयो थे, तिन्हां वसुआस कित्ता । 49 ताहू प्रभु दा वचन तिस सारे देशे च फैलणा लगा । 50 अपर यहूदियां उच्च कुल दियां भक्त जणासां जो कने सैहरे दे प्रमुख लोकां जो उसकाया, कने पौलुस कने बरनबास दे खलाफ अत्याचार करवाई करी तिन्हां जो अपने लाक्के ते कड्डी दिता । 51 ताहू सैह तिन्हां सामणे अपने पैरां दी धूड झाडी करी इकुनियुम जो चली गै । 52 कने चले खुशिया नें कने पवित्र आत्मां नें भरौई गै ।

इकुनियुम सैहरे च पौलुस कने बरनबास

14 इकुनियुम च इआं होया कि सैह यहूदियां देयां आराधनालयां च सौगी सौगी गै, कने इस तरीके नें गल्लां कितीयां कि यहूदियां कने यूनानियां दूनी ते मतेआं वसुआस कित्ता । 2 अपर वसुआस नी करणे आळे यहूदियां गैर - यहूदियां दे मन भाऊआं दे खलाफ उसकाये कने कटुता पैदा करी दिती । 3 सैह मतेआं दिनां तांई तित्थु रहै, कने प्रभु दे भरोसे पर हिम्मत सौगी गल्लां करदे थे; कने सैह तिन्हां दे हत्थां ते चमत्कार कने अद्भुत कम्म करवाई करी अपने अनुग्रह दे वचना पर गवाही दिंदा था । 4 अपर सैहरे देयां लोकां च बैर पैई गिया था, इसते कई माणु यहूदियां दे पास्से कने कई चेलयां पास्सें होई गै । 5 अपर जाहू होर जातिआं कने यहूदी तिन्हां दा अपमान कने तिन्हां पर पत्थर मारणे तांई अपने अधिकारियां सौगी तिन्हां पर दौडे, 6 ताहू सैह इसा गल्ला जो जाणी गै, कने लुकाउनिया दे लुस्त्रा कने दिरबे सैहरां च, कने अकखे बकखे देयां प्रदेशां च नटी गै 7 कने तित्थु सुसमाचार सनाणां लग्गे ।

लुस्त्रा सैहरे च कने दिरबे सैहरे च

8 लुस्त्रा च इक्क माणु बैठया था, जेहडा पैरां दा कमजोर था । सैह जन्म ते ई लंगडा था कने कदी भी नी चलेया था । 9 सैह पौलुसे जो गल्लां करदे सुणां दा था । पौलुसे तिसदे पास्सें टक्क लगाई करी दिख्या कि तिसियो खरे होणे दा वसुआस ऐ, 10 कने जोरे नें ग्लाय लग्गा, 'अपणे पैरां दे भार सीधा खडा हो ।' ताहू सैह उछळी करी चलणां फिरणां लग्गी पैआ । 11 माणुआं पौलुसे दा एह कम्म दिखी करी लुकाउनिया दी भाषा च जोरे नें ग्लाय, 'अहां दे बिच माणु दा रूप धारण करी नें देवता लौई आये हन ।' 12 तिन्हां बरनबासे जो ज्यूस, कने पौलुसे जो हिरमेस ग्लाय कजोकि सैह गल्लां करणे च मुख्य था । 13 ज्युसे दे तिस मंदरे दा पुजारी जेहडा तिन्हां दे सैहरे सामणे था, दांद कने फुला दे हार फाटके पर लगाई करी लोकां सौगी बलिदान करणां चाहंदा था । 14 अपर चेलें बरनबासे कने पौलुसें जाहू एह सुणया, तां अपने कपडे फाडे कने भीडा च लपके, कने जोरे नें ग्लाय लग्गे, 15 'हे लोको, तुहां क्या करदे हन, अहां भी तां तुहां साइआं सुख -दुःख भोगणे आळे माणु हन, कने तुहां जो सुसमाचार सणां दे हन कि तुहां इन्हां बेकार चीजां ते लग्ग होई करी जिंदा परमात्मं दे पास्सें फिरा, जिन्हीं सुअर्ग कने धरती कने समंदर कने जेहडा कुच्छ तिन्हां च ऐ बणाया । 16 तिन्हीं बीते बतां च सारियां जातिआं जो अपने -अपणे रस्ते च चलणां दिता । 17 तमी तिन्हीं अपने आप्पे जो गवाही दैणे बगैर नी छडेया; अपर सैह भलाई करदा रहआ, कने अम्बरे ते बरखा कने फलवन्त मौसम दैई करी तुहां दे मने जो खाणे नें कने खुशिया नें भरदा रहआ ।' 18 एह ग्लाय करी भी तिन्हीं लोकां जो बडिया मुशकला नें रोकेया कि तिन्हां तांई बलिदान नी करन ।

19 अपर कुच्छना यहूदियां अन्ताकिया कने इकुनियुम ते आई करी लोकां जो अपने बकखें करी लैआ, कने पौलुसे पर पत्थर मारे, कने मरेया समझीकरी तिसियो सैहरे दे बाहर घसीटी करी लैई गै । 20 अपर जाहू चले तिसदे चौनी पास्सें आई खडौते, तां सैह उठी करी सैहरे च गैआ कने दूयें दिने बरनबासे सौगी दिरबे जो चली गैआ ।

सीरिया ते अन्ताकिया जो वापस ओणां

21 सैह तिस सैहरे दे लोकां जो सुसमाचार सणांई करी, कने मते चले बणांई करी, लुस्त्रा कने इकुनियुम कने अन्ताकिया जो वापस चली आये, 22 कने चेलयां दे मना जो स्थिर करदे रहै कने एह शिक्षा दिंदे थे कि वसुआसे च बणी रहआ; कने एह ग्लाय दे थे, 'अहां मते दुख झेली करी परमात्मं दे राजे

च प्रवेश करणां पोणां ।²³ कने तिन्हां हरेक कलेसिया च तिन्हां तांई स्याणे ठहराये, कने व्रत सौगी प्रार्थना करी नैं तिन्हां प्रभु दे हत्थ दित्ता जिस पर तिन्हां वसुआस कित्या था ।

²⁴ ताहू पिसिदिया ते होई करी सैह पन्फूलिया पुजे; ²⁵ भिरी पिरगा च वचन सणाईकरी अन्तलिया च आये, ²⁶ कने तित्थु ते सैह चाहजे पर अन्ताकिया गै, जित्थु सैह तिस कम्मं तांई जेहडा तिन्हां पूरा कित्या था परमात्मं दे अनुग्रह च दित्यो थे । ²⁷ तित्थु पुज्जी करी तिन्हां कलेसिया किट्टी किट्टी कने दस्सेया कि परमात्मं तिन्हां सौगी रैई करी कदेय बडे बडे कम्म किट्टे, कने गैर - यहूदियां तांई वसुआसे दा रस्ता खोली दित्ता । ²⁸ कने सैह चेलयां सौगी मते दिनां तिकर रैह ।

यरुशलमं दी सभा

15 भिरी कुच्छ माणु यहूदिया ते आईकरी भाऊआं जो सखाणां लगे: "जे मूसा दी रीतिया पर तुहां दा खतना ना होयें तां तुहां उद्धार नी पाई सकदे हन" ² जाहू पौलुसे दा कने बरनबासे दा तिन्हां कने बडी लडाई कने बँहस वाजी होई ता एह ठहराया गैआ कि पौलुस कने बरनबास कने तिन्हां च कुच्छ माणु इन्हां गलां दे बारे च चेलयां कने स्याणेयां अल्ल यरुशलमं जो जान । ³ कने कलेसिया दे माणु तिन्हां जो थोडी दूर तिकर पजाई आये; कने सैह फीनीके कने सामरिया च होई करी होरना जातिआं दे मन बदलणे दा समाचार सणादे गै, कने सारे भाऊ बडे खुश होये । ⁴ जाहू सैह यरुशलमं च पुजे, तां कलेसिया कने चले कने स्याणे तिन्हां नैं बडिया खुशिया सौगी मिले, कने तिन्हां दस्सेया कि परमात्मं तिन्हां सौगी होई करी कदेय -कदेय कम्म कित्यो हन । ⁵ अपर फरीसियां दी मंडलिया ते जिन्हां वसुआस कित्या था, तिन्हां च कुच्छ उठीकरी गलाणां लगे, "तिन्हां जो खतना करणे कने मूसा दी व्यवस्था जो मनणे दा हुक्म देणां चाइदा ।"
⁶ ताहू चले कने स्याणे इन्हा गलां दे बारे च सलाह करणे तांई किट्टे होये । ⁷ ताहू पतरसं नैं बडी बँहस - वाजी होई जाणे दे बाद पतरस खडौई करी तिन्हां नैं गलाणां लग्गा, "हे भाऊओ, तुहां जाणदे हन कि बडे दिन होये परमात्मं तुहां ते मिन्जो चुणी लैआ कि मेरे मुँमें ते होर जातिआं परमात्मं दा वचन सुणीकरी वसुआस करन । ⁸ मने जो जाचणे आळे परमात्मं तिन्हां जो भी अहां साइआं पवित्र आत्मां दैई करी तिन्हां दी गवाई दित्ती; ⁹ कने वसुआसे दिया बजाह ते तिन्हां दे मन साफ करी नैं अहां च कने तिन्हां च कोई भेद नी रखेया, ¹⁰ तां हुण तुहां कजो परमात्मं दी परीक्षा करदे हन कि चेलयां दे गळे च ऐसा जुगळा रखा, जिसियो ना तां अहां दे स्याणे चुकी सकदे थे कने ना तां अहां चुकी सकदे हन ।"
¹¹ हां अहां दा एह वसुआस ऐ कि जिस तरीके नैं तिन्हां प्रभु यीशु दे अनुग्रह नैं उद्धार पाणां; तिस तरीके नैं अहां भी पाणां ।

¹² ताहू सारी सभा चुपचाप बरनबास कने पौलुसे दी सुणना लगी, कि परमात्मं तिन्हां दिया बजाह ते होरना जातिआं च कदेय बडे बडे चमत्कार, कने अद्भुत कम्म दस्से हन । ¹³ जाहू सैह चुप होये तां याकूब गलाणां लग्गा, "हे भाऊओ, मेरी सुणां । ¹⁴ शमौने दस्सेया कि परमात्मं पैहलें होरनी जाती पर कदैई कृपावृष्टी किट्टी कि तिन्हां च अपणे नांये तांई इक्क माणु बणाई लैन । ¹⁵ इसते भविष्यवक्तां दियां गलां भी मिलदियां हन, जिआं कि लिख्या ऐ, ¹⁶ इसदे बाद मै भिरी आई करी दाऊदे दा पैआ डेरा चुकणां, कने तिसदे खंडरां जो भिरी बनाणां, कने तिसियो खरेडणां,

¹⁷ इसतांई जे बाकि माणु, मतलब सारे गैर - यहूदियां जो मेरे नांये दियां केहलांदियां हन, प्रभु जो तोपा,

¹⁸ एह सैई प्रभु ग्लांदा ऐ जेहडा संसारे दी सृष्टिया ते इन्हां गलां दा समाचार दिंदा आया ऐ ।"

¹⁹ इसतांई मेरी सोच एह ऐ कि दूईयां जातिआं च जेहडे माणु परमात्मं पाससं फिरदे हन, अहां तिन्हां जो दुख ना दें; ²⁰ अपर तिन्हां जो लिखी घल्लन कि सैह मूर्ति दी अशुद्धता कने व्यभिचार कने गळा घुटेयां दे मासे ते कने खूने ते दूर रैहआ । ²¹ कजोकि पराणे जमाने ते सैहरे - सैहरे च मूसा दी व्यवस्था दा प्रचार करणे आळे होंदे चले आये हन, कने सैह हर सब्त दे दिन आराधनालय च पढी जांदी ऐ ।"

गैर - यहूदियां दे वसुआसियां जो चिट्टी

²² ताहू पूरी कलेसिया सौगी चेलयां कने स्याणेयां जो खरा लग्गा कि अपणे माणुआं च कुच्छ माणु चुणन, कजोकि यहूदा जिसियो बरसब्बा भी ग्लांदे हन, कने सिलासे जो जेहडा भाऊआं च मुखिया था; कने तिन्हां जो पौलुसे कने बरनबासे सौगी अन्ताकिया जो घल्लन । ²³ तिन्हां तिन्हां दे हत्थे एह लिखी घल्लया, "अन्ताकिया कने सिरिया कने कलिकिया च रैहणे आळेयां भाऊआं जो जेहडे गैर - यहूदियां च हन, चेलयां कने स्याणे भाऊआ दा नमस्कार । ²⁴ अहां सुणेया ऐ कि अहां च कुच्छना तित्थु जाईकरी, तुहां अपणियां गलां नैं डराई दित्ता; कने तुहां दे मन बदली दित्ते हन अपर अहां तिन्हां जो कोई हुक्म नी दित्या था । ²⁵ इसतांई अहां इक्क मन होई करी ठीक समझेया कि चुणेयां माणुआं जो अपणे प्यारे बरनबासे कने पौलुसे सौगी तुहां अल्ल घल्लन । ²⁶ एह ऐदेय माणु हन जिन्हां अपणे प्राण अहां दे प्रभु यीशु मसीह दे नांये तांई मुसीबता च पायेयो हन । ²⁷ इसतांई अहां यहूदा जो कने सिलासे जो घल्लया ऐ, जेहडे अपणे मुँमें ते भी एह गलां ग्लाणियां हन । ²⁸ पवित्र आत्मां जो कने अहां जो ठीक पता लग्गा ऐ कि इन्हां जरूरी गलां जो छड्डी करी, तिजो पर होर भार ना पान; ²⁹ कि तुहां मूर्तियां पर बलि कित्तेयां ते कने खूने ते, कने घुटेयां दे मासे ते, कने व्यभिचार ते दूर रैहआ, इन्हां ते दूर रैहआ तां तुहां दा भला होणां । गांह शुभ ।"

³⁰ भिरी सैह जाई करी अन्ताकिया पुजे, कने सभा जो किट्टा करी नैं सैह पत्री तिन्हां जो दैई दित्ती । ³¹ सैह पत्री पढी करी तिसा शिक्षा दियां गलां ते बडे खुश होये । ³² यहूदें कने सिलासें जेहडे अप्पु भी भविष्यवक्ता थे, मतिआं गलां नैं भाऊआं जो शिक्षा दैई करी मजबूत कित्ता । ³³ सैह कुच्छ दिन रैई करी, भाऊआं सौगी शांतिया नैं विदा होये कि अपणे घल्लणे आळेयां अल्ल भिरी जान । ³⁴ [अपर सिलासे जो तित्थु रैहणां खरा लग्गा] । ³⁵ अपर पौलुस कने बरनबास अन्ताकिया च रैई पै, कने होर मते माणुआं सौगी प्रभु दे वचने दी शिक्षा दिंदे कने सुसमाचार सणादे रैह ।

पौलुसे दी दूई प्रचार - यात्रा पौलुसे च कने बरनबासे च बैर

³⁶ कुच्छ दिनां बाद पौलुसें गलाया, "जिन्हां - जिन्हां सैहरां च अहां प्रभु दा वचन सणांया था, ओआ, भिरी तिन्हां च चलीकरी अपणेयां भाऊआं जो दिखी ओंदे कि सैह कदेय हन ।"
³⁷ ताहू बरनबासें यहूदें जो जिसियो मरकुस भी ग्लांदे हन, सौगी निणे दा ख्याल कित्ता । ³⁸ अपर पौलुसें तिसियो जेहडा पंफुलिया च तिन्हां ते लग्ग होई गैआ था, कने कम्म पर तिन्हां सौगी नी गैआ, सौगी निणां खरा नी समझेया । ³⁹ कने ऐसी बँहस होई कि सैह इक्की दूये ते लग्ग होई गै; कने बरनबास, मरकुसे जो लैई करी चाहजे पर बैई करी साइप्रस सैहरे जो चली गैआ; ⁴⁰ अपर पौलुसें सिलासे जो चुणी लैआ, कने भाऊआं जो परमात्मं दे अनुग्रह च सौपी करी तित्थु ते भी चली गैआ; ⁴¹ कने सैह कलेसियां जो पक्का करदा करदा सिरिया कने किलिकिया ते होंदे होंदे निकळेया ।

पौलुसे दा तीमुथियुसे जो सौगी लेणां

16 भिरी सैह दिरबे सैहरे च कने लुस्त्रा सैहरे च भी गैआ । तित्थु तीमुथियुस नांये दा इक्क दास था, जेहडा कुसी वसुआसणी यहूदनियां दा जागत था, अपर तिसदा बुडा यूनानी था । ² सैह लुस्त्रा सैहरे देयां कने इकुनियुम सैहरे देयां भाऊआं च अच्छा बोल चाल था । ³ पौलुसे दी इच्छा थी कि सैह तिस सौगी चलें; कने जेहडे यहूदी माणु तिन्हां जगाह च थे तिन्हां दिया बजाह ते तिसदा खतणां कित्ता, कजोकि सैह सारे जाणदे थे, कि तिसदा बुडा यूनानी था । ⁴ कने सैहरे - सैहरे जांदे जांदे सैह तिन्हां विधियां जो जेहडियां चेलयां कने स्याणेयां ठहराईयां थियां, मनणे तांई तिन्हां जो पुजांदे जांदे थे । ⁵ इस तरांह कलेसिया वसुआसे च पक्की होंदी गैई कने गिणती च भी बधदी गैई । ⁶ सैह फ्रुगिया कने गलातिया प्रदेशां च होई करी गै, कजोकि पवित्र आत्मां तिन्हां जो एशिया च वचन सणाणे जो मना कित्ता । ⁷ तिन्हां मुसिया सैहरे अल्ल पुज्जी करी, बितुनिया सैहरे च जाणे दी सोची; अपर यीशु दिया आत्मां तिन्हां जो जाणां नी दित्ता । ⁸ तां सैह मुसिया ते होई करी त्रोआस सैहरे च आये । ⁹ तित्थु पौलुसें राती जो इक्क दर्शन दिख्या कि इक्क मकिदुनी मर्द खडौई करी तिस नैं विणती करी नैं ग्ला करदा

कि, "पारले कनारें मकिदुनिया देशे च आ, कने अहां दी मदद कर ।"
10 तिसदे एह दर्शण दिखदे ई अहां इकदम मकिदुनिया जाणे दी सोची, एह समझी करी परमात्मं अहां जो सुसमाचार सनाणे ताई सदेया ऐ ।

फिलिप्पी च : लुदिया दा मन बदलणां

11 इसताई त्रोआस ते चाहेजे च बैई करी अहां सीधे सुमात्राके कने दूये दिने नियापुलिस च आये । 12 तित्थु ते अहां फिलिप्पी पुजे, जेहड़ा मकिदुनिया तिस लाके दा खास सैहर कने रोमियों दी बस्ती ऐ; कने अहां तिस सैहरे च कुच्छ दिन तिकर रहै । 13 सबत दे दिन अहां सैहरे दे फाटके दे बाहर नदियां कडे एह समझी करी गै कि तित्थु प्रार्थना करणे दी जगाह होणी ऐ, कने बैई करी तिन्हां जणांसा जो जेहिडयां किट्टीयां होइआं थियां, गल्लां करणां लग्गे । 14 लुदिया नांये दी इक्क थुआथिरा सैहरे दी बैजनी कपडेयां बेचणे आळी इक्क दासी जणांसा सुणां करदी थी । प्रभुयें तिसा दा मन खोलया कि सैह पौलुसें दियां गल्लां पर मन लग्गां । 15 जाहू तिन्नै अपणे परवारे सौगी बपतिस्मा लैआ, तां तिन्नै अहां नैं विणती किन्ती, "जे तुहां मिन्जो प्रभु दी वसुआसणी समझदे हन, तां चली करी मेरे घरें रहैआ, "कने सैह अहां जो मनाई करी लैई गैई ।

पौलुस कने सीलास जेला च

16 जाहू अहां प्रार्थना करणे दिया जगाह जो चलेयो थे, ताहू अहां जो इक्क दासी मिली जिसा च भावी ग्लाणे आळी आत्मां थी; कने भावी ग्लाणे नैं अपणे मालकां ताई बड़ा कुच्छ लैई ओंदी थी । 17 सैह पौलुसे पास्सेकने अहां दे पचांह आई करी डडणां लग्गी, "एह माणु परमप्रधान परमात्मं दे दास हन, जेहडे अहां उद्वारे दे रस्ते दा संदेश सणादे हन ।" 18 सैह बडे दिन तिकर इआं ई करदी रैई; अपर पौलुस दुखी होया, कने मुडीकरी तिसा आत्मां नैं ग्लाणां लग्गा, "मै तिन्नो यीशु मसीह दे नांये ते हुक्म दिंदा ऐ कि इसा ते निकळी जा ।" कने सैह ताहू ई निकळी गैई ।

19 जाहू तिसा दे मालकां दिख्या कि अहां दी कमाईया दी आशा पर पाणी फिरि गैआ ऐ, तां पौलुसे जो कने सिलासे जो पकड़ी करी चौके दे प्रधानां अल्ल घसीटदे लैई गै; 20 कने तिन्हां जो हाकमां अल्ल लैई गै कने ग्लाणां लग्गे, "एह माणु जेहडे यहूदी हन, अहां दे सैहरे च बड़ी हलचल मचाणां लगेयो हन; 21 कने ऐदियां रीतियां दस्सा दे हन, जिन्हां जो ग्रहण करणां कने मनणां अहां रोमियां ताई खरा नी ऐ ।" 22 ताहू भीड़ा दे माणु तिन्हां दे वरखलाफ कडे होई करी चढी आये, कने हकमां तिन्हां दे कपडे फाड़ी दित्ते, कने तिन्हां जो बेंत मारणे दा हुक्म दित्ता । 23 मते बेंत लगाई करी हाकमां तिन्हां जो जेला च पाई दित्ता कने ठाणेदारे जो हुक्म दित्ता कि तिन्हां पर कडे पेहरे च रखा । 24 ठाणेदारे एह हुक्म सुणी करी तिन्हां जो जेला दी कोठरिया च रखया कने तिन्हां देयां पैरां जो लकड़िया च ठोकी दित्ता ।

पौलुस कने सीलास दी जेला ते मुक्ति

25 अधिया राती पौलुस कने सिलास प्रार्थना करदे करदे परमात्मं देयां भजना गा दे थे, कने कैदी तिन्हां दी सुणां दे थे । 26 इतणे च इकदम हिल्लण होणां लग्गा, ऐत्थु तिकर कि जेला दी नीई तक हिल्ली गैई, कने इकदम जेला दे दुरआजे खुली गै, कने सारे बंधन खुली गै । 27 ठाणेदार जागी पैआ, कने जेला दे दुरआजे खुले दिखी करी समझेया कि कैदी नठी गै हन, तां तिन्हीं तलवारा कड्डी करी अपणे आप्पे जो मारणां लग्गा । 28 अपर पौलुसें जोरे नैं ग्लाणां लग्गा, "अपणे आप्पे जो कुच्छ नकसान मत कर, कजोकि अहां सारे ऐत्थु ई हन ।" 29 ताहू तिन्हीं दिव्या मंगवाई करी झट अंदर गैआ, कने डरे कंमदा कंमदा पौलुसें कने सिलासे दे पैरां पैई गैआ; 30 कने तिन्हां जो बाहर अणी करी ग्लाणां लग्गा, "हे सज्जनों, उद्वार पाणे ताई मैं क्या करे ।" 31 तिन्हां ग्लाय्या, "प्रभु यीशु मसीह पर वसुआस कर, तां तू कने तेरे घराने उद्वार पाणां ।" 32 कने तिन्हां तिसियो कने तिसदे परवारे दे सारे माणुआं जो प्रभु दा वचन सणांया । 33 राती तिसी बग्त तिन्हीं तिन्हां जो अणी करी तिन्हां दे जख्म साफ कित्ते, कने तिन्हीं अपणे परवारे दे सारे माणुआं सौगी बपतिस्मा लैआ । 34 ताहू सैह तिन्हां जो अपणे घरेयो लैईया कने तिन्हां जो खाणेयो रखेया, कने पूरं परवारे सौगी परमात्मं पर वसुआस करी नैं खुशी मनाई ।

35 जाहू भ्याग होई तां हाकमे सपाईयां दे हत्थ घल्ली कि तिन्हां माणुआं जो छड्डी दैआ । 36 ठाणेदारे एह गल्लां पौलुसें नैं ग्लाय्यां, "हाकमे तुहां जो छड्डी

देणे दा हुक्म घल्ली दित्ता ऐ । इसताई हुण निकळी नैं खुश होई करी चली जा ।" 37 अपर पौलुस तिन्हां नैं ग्लाणां लग्गा, "तिन्हां रोमी माणुआं दोषी ठेहराये बगैर ई अहां जो लोकां सामणे मारेया कने जेला च पाया था । हुण क्या अहां चुपचाप निकळी जान? इआं नी होणां; अपर सैह अप्पु आईकरी अहां जो बाहर कडन ।" 38 सपाईयां एह गल्लां हाकमा नैं ग्लाय्यां, कने सैह एह सुणी करी कि रोमी हन डरी गै, 39 कने आईकरी तिन्हां जो मनाया, कने बाहर लैई जाई करी विणती किन्ती कि सैहरे ते चली जा । 40 सैह जेला ते निकळी करी लुदिया नांये दे माणुये दे घरेयो गै, कने भाऊआं नैं मिली करी तिन्हां जो शांति दिती, कने चली गै ।

थिस्सलुनीके दे सैहरे च

17 भिरी सैह अम्फिपुलिस सैहरे ते कने अपुल्लिनिया सैहरे ते होईकरी थिस्सलुनिके च आये, जित्थु यहूदियां दा इक्क आराधनालय था । 2 पौलुस अपणिया रीतिया मताबक तिन्हां अल्ल गैआ, कने त्रै सबत तिकर तिन्हा सौगी पवित्रशास्त्रां पर विचार विमर्श कित्ता; 3 कने तिन्हां दा मतलब खोली खोली नैं समझांदा गैआ कि मसीह जो दुख झेलणां कने मरेयां च जिंदा होणां, जरूरी था; कने ऐही यीशु जिसदा मैं तुहां जो समाचार सणा करदा ऐ, मसीह ऐ ।" 4 तिन्हां च कितणेयां, कने भक्त यूनानियां च मतेआं, कने मतिआं भरी अक्कमंद जणांसा मनी लैआ, कने पौलुसे कने सीलासे सौगी मिली गै । 5 अपर यहूदियां गुस्से नैं भरोई करी कुच्छ बाजारू माणुआं जो कने कुच्छ बुरे माणुआं जो अपणे सौगी लैआ, कने भीड़ कठेरी करी सैहरे च दंगा करणां लग्गे, कने यासोने दे घरें हमला करी नैं तिन्हां जो लोकां सामणे अणने दी कोशश किन्ती । 6 सैह तिन्हां जो तित्थु नी मिले तां सैह बकदे बकदे यासोने जो कने कुच्छना भाऊआं जो सैहरे देयां हाकमा सामणे घसीटी करी लैई आये, "एह लोक जिन्हां संसारे जो उल्टा पुलटा करी दित्ता था, ऐत्थु भी आई गैयो हन । 7 यासोने तिन्हां जो अपणे घरें रखया ऐ । एह सारे दे सारे एह ग्लादे हन कि यीशु राजा ऐ, कने कैसरे देयां हुक्मां दा विरोध करदे हन ।" 8 तिन्हां माणुआं जो कने सैहरे देयां हाकमा जो एह सणाई करी डराई दित्ता । 9 इसताई तिन्हां यासाने कने बाकि लोकांजो जमानत लैई करी तिन्हां जो छड्डी दित्ता ।

बिरीया दे सैहरे च

10 भिरी भाऊआ झट रातो -रात पौलुसे जो कने सिलासे जो बीरिया सैहरे जो घल्ली दित्ता; कने सैह तित्थु पुज्जी करी यहूदियां दे आराधनालय च गै । 11 एह माणु तां थिस्सलुनिके दे यहूदियां ते जादा खरे थे कने इन्हां लोकां पूरा मन लगाई करी वचन ग्रहण कित्ता, कने हर रोज पवित्रशास्त्रां च तोपदे रहै कि एह गल्लां इआं ई हन कि नी । 12 इसताई तिन्हां च मतेआं, कने यूनानी अक्कमंद जणांसां च कने मर्दा च मतेआं वसुआस कित्ता । 13 अपर जाहू थिस्सलुनिके दे यहूदी जाणी गै कि पौलुस बीरिया सैहरे च भी परमात्मं दा वचन सणांदा ऐ, ता सैह तित्थु जाई करी भी दंगे करणां लग्गे । 14 ताहू भाऊआं झट पौलुसे जो घल्ली दित्ता कि समुंदरे कंडे चली जां; अपर सिलास कने तीमुथियुस तित्थु ई रहै । 15 पौलुसे जो पुज्जाणे आळे तिसियो एथेंस सैहरे तिकर लैई गै; अपर सीलासे कने तीमुथियुसे ताई एह हुक्म दित्ता कि तिस अल्ल तौळी तौळी ओन ।

एथेंस दे सैहरे च

16 जाहू पौलुस एथेंस सैहरे च तिन्हां दा इंतजार करा दा था, तां सैहरे जो मूर्तियां नैं भरोया दिखी करी तिसदा मन जळी गैआ । 17 कने सैह आराधनालय च यहूदियां कने भक्तां नैं, कने चौके च जेहडे लोक तिस नैं मिलदे थे तिन्हां नैं हर रोज बेंहस बसाई करदा था । 18 ताहू इपिकुरी कने स्तोईकी दार्शनिका च कुच्छ तर्क करणां लग्गे, कने कुच्छ ग्लाणां लग्गे, "एह बक बक करणे आळा क्या ग्लाणां चाहंदा ऐ?" अपर दूयेयां ग्लाय्या, "सैह होरना देवतेयां दा प्रचार करणे आळा लगदा ऐ" -कजोकि सैह यीशु दे जिंदा होणे दा सुसमाचार सणादा था । 19 ताहू सैह तिसियो अपणे सौगी अरियुपगुस जो लैई गै कने पूछया, "क्या अहां जाणी सकदे हन कि एह नौआं मत जेहड़ा तू सणा करदा, क्या ऐ । 20 कजोकि तू अनोखियां गल्लां अहां जो सणांदा ऐ, इसताई अहां जाणना चाहंदा हन कि इन्हां दा क्या मतलब ऐ ।"

21 (इसताई सारे एथेंसवासी कने परदेशी जेहडे तित्थु रँहदे थे, नौइआं नौइआं गलां करणां कने सुणने दे सिवाय होर कोई कम्म नी करदे थे ।)

अरियुपगुसे दी सभा च पौलुसे दा भाषण

22 ताहू पौलुस अरियुपगुस दे बिच खडौई करी गलाणां लग्गा, "हे एथेंस देयो लोको, मैं दिखदा ऐ कि तुहां हर गला च देवतेयां जो बड़े मनणे आळे हन । 23 कजोकि मैं घूमदा घूमदा जाहू तुहां दियां पूजणे आळियां चीजां जो दिखदा था, तां इक्क ऐसी वेदी दिखी, जिसा पर लिख्या था, 'अणजान परमात्मं ताई ।' इसताई जिसियो बगैर जाणयो पूजदे हन, मैं तुहां जो तिसदा समाचार सणांदा ऐ । 24 जिन्ही परमात्मं धरतिया कने तिसदियां सारियां चीजां जो बणांया, सैह सुअर्ग कने धरती दा मालक होई करी, हत्थे दे बणांया मंदरा च नी रँहदा; 25 ना कुसी चीजा दी जरूरता दे मताबक माणुआं दे हत्थां दी सेवा लँदा ऐ, कजोकि सैह अप्पु ई सबना जो जिन्दगी कने सास कने सब कुच्छ दिंदा ऐ । 26 तिन्हीं इक्की ई मकसदे सौगी सौगी माणुआं दी सब जातिआं पूरी धरतिया पर रँहणे ताई बणाईयां हन; तिन्हीं लोकां ताई ठीक बगत फिक्स करी दिता कने तिसा जगाह दी, जित्थु सैह रँह, सीमायें बन्नी दित्तियां । 27 कि सैह परमात्मं जो तोपन, कने होई सकदा ऐ तिसियो परखी करी पान भी, तां सैह अहां ते कने कुस ते दूर नी । 28 कजोकि अहां तिस च जिंदे रँहदे, कने चलदे -फिरदे, कने टिकी रँहदे हन; जिआं तुहां दे कई कवियां भी गलाया ऐ, 'अहां तां तिसदे ई वंश हन ।' 29 कने अहां परमात्मं दी औलाद होई चुकेयो हन, अहां जो एह कदी भी समझणां नी चाइदा कि परमात्मां सोने या रुप या पत्थरे साइआं ऐ, जेहडे माणु दी कारीगिरिया नैं कने कल्पना नैं बणांयो हन । 30 इसताई परमात्मं अज्ञानता दे बगतां पर ध्यान नी दिता, अपर हुण हर जगाह सारे माणुआं जो मने बदलणे दा हुक्म दिंदा ऐ । 31 कजोकि तिन्हीं इक्क दिन ठेहराया ऐ, जिस च सैह तिस माणुये दे दुआरा ते धर्म दे संसारे दा न्याय करणां, जिसियो तिन्हीं बणांया, कने तिसियो मरेयां च जिंदा करी नैं एह गल्ल सारेयां च पक्की करी दिती ऐ ।"

32 मरेयां ते दोवारी जिंदे होणे दी गल्ल सुणी करी कुच्छ तां मजाक करणां लग्गे, कने कुच्छ गलाणां लग्गा, "एह गल्ल अहां तिजो ते भिरी कदेडकी सुणगे ।" 33 इसा गल्ला पर पौलुस तिन्हां दे बिचे ते निकळी गैआ । 34 अपर कुच्छ माणु तिस सौगी मिली गै, कने वसुआस किता; जिन्हां च दियनुसियुस जेहडा अरियुपगुस दा सदस्यथा, कने दमरिस नांये दी इक्क जणास थी, कने तिन्हां सौगी होर भी माणु थे ।

कुरिन्थुस दे सैहरे च

18 इसते बाद पौलुस एथेंस जो छडी करी कुरिन्थुस च आया । 2 तित्थु तिसियो अक्विला नांये दा इक्क यहूदी माणु मिला, जिसदा जन्म पुन्तुसे च होया था । सैह अपणियां लाडिया प्रिसकिल्ला सौगी इटली ते हाल ई च आया था, कजोकि कलौदियुसें सारेयां यहूदियां जो रोम ते निकळी जाणे दा हुक्म दित्या था । इसताई सैह तिन्हां अल्ल गैआ । 3 तिसदा कने तिन्हां दा इक्क ई वपार था इसताई सैह तिन्हां सौगी रँहआ कने सैह कम्म करणां लग्गे; कने तिन्हां दा कम्म तम्बू बणाणे दा था । 4 सैह हर इक्क सबत दे दिन आराधनालय च बँहस बसाई करी नैं यहूदियां कने यूनानियां जो भी समझांदा था ।

5 जाहू सीलास कने तीमुथियुस मकिदुनिया सैहरे च आये, तां पौलुस वचन सणाणे दिया धुना च यहूदियां जो गवाही देणां लग्गा कि यीशु ई मसीह ऐ । 6 अपर जाहू सैह विरोध कने निंदा करणां लग्गे, तां तिन्हीं अपणे कपडे झाडी करी तिन्हां नैं गलाया, "तुहां दा खून तुहां दे ई मुंडे पर रँह । मैं बेकसूर ऐ । अज्जे ते मैं गैर - यहूदियां अल्ल जाणां ।" 7 तित्थु ते चली करी सैह तितुस युस्तुस नांये दे इक्की परमात्मं दे भक्ते दे घरें आया; जिसदा घर आराधनालय सौगी ई था । 8 ताहू आराधनालय दे अधिकारियें क्रिसपुसे अपणे सारे परवारे सौगी प्रभु पर वसुआस किता; कने बड़े भरी कुरिन्थुवासियां सुणी करी वसुआस किता कने बपतिस्मा लँआ । 9 प्रभुयें इक्की राती दर्शन देई करी पौलुसे नैं गलाणां लग्गा, "मत डर अपर ग्लाई जा चुप मत रँह; 10 कजोकि मैं तिजो सौगी ऐ, कने कोई भी तिजो पर हमला करी नैं तेरा नकसान नी करी सकदा, कजोकि इस सैहरे च मेरे मते माणु हन ।" 11 इसताई सैह तित्थु परमात्मं दा वचन डेड साल तिकर सखादां रँहआ ।

12 जाहू गल्लियो अखाया देशे दा हाकम था, तां यहूदी माणुआं इक्क होई करी पौलुसे जो पकड़णां आये, कने तिसियो अदालता च अणी करी गलाणां लग्गे" 13 "एह लोकां जो समझांदा कि परमात्मं दी भक्ति इस तरीके नैं करा, जेहडी व्यवस्था दे उलट ऐ ।" 14 जाहू पौलुस गलाणां लग्गा ई था, तां गल्लियो यहूदियां नैं गलाणां लग्गा, "हे यहूदियो, जे एह अन्याय या बुराईया दी गल्ल होदी, तां ठीक हुंदा कि मैं तुहां दी सुणदा । 15 अपर जे एह बँहस बसाई दे शब्दां च, कने ना च कने तुहां ऐत्थू दी व्यवस्था दे बारे च ऐ, तां तुहां ई जाणन; कजोकि मैं इन्हां गलां दा न्यायी नी बणना चाहंदा ।" 16 कने तिन्हीं तिन्हां जो न्याय आसणे दे सामणे ते कड्डी दिता । 17 ताहू सारेयां लोकां आराधनालय दे अधिकारिये सोस्थिनेस जो पकडी करी न्याय आसण दे सामणे मारेया । अपर गल्लियो इन्हां गलां दी जरा भी चिंता नी किती ।

अन्ताकिया जो वापस ओणां

18 पौलुस बड़े दिन तिकर तित्थु रँहआ । भिरी भाऊआं ते विदा लँई करी किंखिया सैहरे च इसताई मुंड मुण्डाया, कजोकि तिन्हीं मनत मंगियो थी कने चाहजे च सीरिया सैहरे जो चली पैआ कने तिस सौगी प्रिसकिल्ला कने अक्विला थे । 19 तिन्हीं इफिसुस सैहरे च पुज्जी करी तिन्हां जो तित्थु छडेया, कने अप्पु आराधनालय च जाईकरी यहूदियां नैं बँहसणा लग्गा । 20 जाहू तिन्हां तिस नैं विणती किती, "अहां सौगी होर कुच्छ दिन रँह ।" तां तिन्हीं स्वकार नी किता; 21 अपर एह ग्लाई करी तिन्हां ते विदा होई करी चली गैआ, "जे परमात्मं चाया तां मैं तुहां अल्ल भिरी ओंगा ।" ताहू सैह इफिसुस ते चाहजे पर बैई नैं चली पैआ ; 22 कने कैसरिया सैहरे च आई करी [यरुशलमे जो] गैआ कने कलेसिया जो नमस्कार करी नैं अन्ताकिया सैहरे च आया

पौलुसे दी त्री प्रचार - यात्रा

23 भिरी कुच्छ दिन रँई करी सैह तित्थु ते चली गैआ, कने इक्की पाससें गलतिया कने फुर्गिया देसां च सारे चेलेयां जो मजबूत करदा रँहआ ।

इफिसुस दे सैहरे च अपुल्लोस

24 अपुल्लोस नांये दा इक्क यहूदी, जिसदा जन्म सिकन्दरिया च होया था, जेहडा बडा गलाणे आळा (विद्वान) मर्द था, इफिसुस च आया । 25 तिन्हीं प्रभु दे रस्ते दी शिक्षा पाइयो थी, कने मन लगाईकरी यीशु दे बारे च ठीक -ठीक सणादा कने सखांदा था, अपर सैह सिर्फ यहूने दे बपतिस्मे दी गल्ल जाणदा था । 26 सैह आराधनालय च निडर होई करी गलाणां लग्गा, अपर प्रिसकिल्ला कने अक्विला तिसदियां गलां सुणी करी तिसियो अपणे अल्ल लँई गै कने परमात्मं दा रस्ता होर जादा बारिकिया नैं समझाया । 27 जाहू तिन्हीं तिसियो निश्चा किता नदी पार अखाया जो जां तां भाऊआं तिसियो हिम्मत देई करी चेलेयां जो लिख्या कि सैह तिस नैं अच्छी तरांह मिलन; कने तिन्हीं तित्थु पुज्जी करी तिन्हां लोकां दी बडी मदद किती जिन्हां अनुग्रह दिया बजाह ते वसुआस कित्या था । 28 कजोकि सैह पवित्रशास्त्र ते सबूत देई - करी कि यीशु ई मसीह ऐ, बड़े जोशे सौगी यहूदियां जो सारेयां सामणे निरुत्तर करदा रँहआ ।

इफिसुस दे सैहरे च पौलुस

19 जाहू अपुल्लोस कुरिन्थुस च था, तां पौलुस उपरे दे सारे परदेसां ते होईकरी इफिसुस च आया । तित्थु कुच्छना चेलेयां जो दिखी करी 2 तिन्हीं गलाया, "क्या तुहां वसुआस करदे बगत पवित्र आत्मां जो पाया?" तिन्हां तिस नैं गलाया, "अहां तां पवित्र आत्मां दी चर्चा भी नी सुणी ।" 3 तिन्हीं तिन्हां नैं गलाया, "तां भिरी तुहां कुसदा बपतिस्मा लँआ?" तिन्हां गलाया, "यहूने दा बपतिस्मा ।" 4 पौलुसें गलाया, "यहूने एह ग्लाई करी मन बदलणे दा बपतिस्मा दित्या कि जेहडा मिन्जो ते बाद ओणे आळा ऐ, तिस पर मतलब यीशु पर वसुआस करणां ।" 5 एह सुणी करी तिन्हां प्रभु यीशु दे नांये ते बपतिस्मा लँआ । 6 जाहू पौलुसें तिन्हां पर हत्थ रखे, तां पवित्र आत्मां तिन्हां पर लुत्थी, कने सैह अलग - अलग भाषा गलाणां कने भविष्यवाणी करणां लग्गे । 7 एह सब लगभग बारा मर्द थे ।

8 सैह आराधनालय च जाई करी तीन मीह्ने तिकर निडर होई करी गलांदा रँहआ, कने परमात्मं दे राजे दे बारे च बँहस करदा कने समझांदा रँहआ ।

9 अपर जाहू कुच्छ माणु कठोर होई नैं तिसदी नी मनी अपर लोकां सामणे इस रस्ते जो बुरा ग्लानां लगे, तां तिन्हीं तिन्हां जो छड्डी दिता कने चेलयां जो अलग - अलग करी लैआ, कने हर रोज तुरनुस दिया पाठशाला च विचार विमर्श करदा था । 10 दू सालां तिकर एह ई हुंदा रहैआ, ऐत्थू तिकर कि आसिया दे रहणे आळे क्या यहूदी कने क्या यूनानी सारेयां वचन सुणी लैआ ।

11 परमात्मां पौलुसे दे हत्थां ते सामर्थी दे अनोखे कम्म दरसदा था । 12 ऐत्थू तिकर कि रुमाल कने अंगोछे तिसदे शरीरे नैं चौआई करी बमारां पर रखदे थे कने बमारियां दूर होई जांदियां थियां; कने दुष्टआत्मां निकळी जांदियां थियां । 13 अपर कुच्छ यहूदी झाड़ फूक करदे फिरदे थे, एह ग्लानां लगे कि जिन्हां च दुष्टआत्मां होन तिन्हां जो प्रभु यीशु दा नां लैई करी कोशश फूकन, "जिस यीशु दा प्रचार पौलुस करदा ऐ, मैं तुहां तिसदी कसम दिदा ।" 14 कने सिक्कवा नाये दे इक्क यहूदी प्रधान याजके दे सत पुत्र थे, जेहडे इआं ई करदे थे । 15 ताहू बुरिया आत्मां जबाब दिता यीशु जो मैं जाणदी ऐ, कने पौलुसे जो भी पणछणदी ऐ, अपर तू कुण ऐ ।" 16 कने तिन्हीं माणुये जिस च दुष्टआत्मां थी तिन्हां पर लपकी करी कने तिन्हां जो वसे च करी नैं, तिन्हां जो देहया काबू कित्ता कि सैह नंगे कने जखमी होई करी तिस घरे ते नठी गै । 17 एह गल्ल इफिसुस दे रहणे आळे सारे यहूदी कने यूनानी भी जाणी गै, कने तिन्हां सारेयां पर डर बैई गैआ; कने प्रभु यीशु दे नांये दी तारीफ होई । 18 जिन्हां वसुआस कित्या था, तिन्हां च मतेआं आईकरी अपणेयां - अपणेयां कम्मां जो मनी लैआ कने प्रकट कित्ता । 19 जादू करणे आळेयां च मतेआं अपणियां - अपणियां पोथियां कठेरी करी सबना सामणे फुकी दित्तियां, कने जाहू तिन्हां दा मूल जोडेया, तां पंजा हजार चांदिया देयां सिक्केयां बराबर निकळेया । 20 इस तरीके नैं प्रभु दा वचन बलपूर्वक फैलदा कने प्रबल हुंदा गैआ ।

21 जाहू एह गल्लां होई चुकियां तां पौलुसे आत्मां च ठाणी लैआ कि मकिदुनिया कने अखाया ते होई करी यरुशलम जो जां, कने ग्लाय, "तित्थु जाणे ते बाद मिन्जो रोमे जो दिखणां भी जरूरी ऐ ।" 22 इसताई अपणी सेवाकाल च तीमुथियुस कने इरास्तुस जो मकिदुनिया घल्ली करी अप्पु कुच्छ दिन तांई आसिया च रैई पैआ ।

इफिसुस दे सैहरे च हुल्लड

23 तिस बग्त तिस रस्ते दे बारे च बड़ी हडबडी होई । 24 कजोकि देमेत्रियुस नांये दा इक्क सन्यारा अरतिमिस देविया दे चांदिया दे मंदर बणवाई करी कारीगरां जो बड़ा भरी कम्म दुआंदा था । 25 तिन्हीं तिन्हां जो कने इस कम्मे नैं जुडियां चीजां जो कठेरी करी ग्लाय, "हे माणुओ, तुहां जाणदे हन कि इस कम्मे च अहां जो कितणां पैसा मिलदा ऐ । 26 तुहां दिखदे हन कने सुणदे हन कि सिर्फ इफिसुस सैहरे च ई नी, अपर सारे आसिया सैहरे च एह ग्लाइ ग्लाइ करी इन्हीं पौलुसें बडे भरी लोकां जो समझाया कने भरमाया भी ऐ, कि जेहडी हत्थे दी कारीगिरी ऐ, सैह ईश्वर नी । 27 इसते हुण बस इसा गल्ला दा ई डर नी ऐ कि अहां इस धंधे दी प्रतिष्ठा खत्म होई जाणे दा भी डर ऐ, अपर एह कि म्हान अरतिमिस देवी दा मंदर घटिया समझेया जाणां, कने जिसियो सारा आसिया सैहरे कने संसार पूजदा ऐ तिसदा महत्व भी जांदा रहणां ।"

28 सैह एह सुणी करी गुस्से नैं भरैई गै कने जोरे -जोरे नैं ग्लानां लगे, "इफिसियो दी अरतिमिस देवी म्हान ऐ ।" 29 कने सारे सैहरे च बड़ा हुल्लड मची गैआ, कने लोकां मकीदुनियावासी गयुस कने अरिस्तर्खुस जो जेहडे पौलुसे दे संगी यात्री थे, पकडी लैआ, कने सौगी सौगी रंगशाला जो दौडी गै । 30 जाहू पौलुसें लोकां अल्ल अंदर जाणां चाया तां चेलयां तिसियो जाणां नी दिता । 31 आसिया देयां हाकमा भी तिसदेयां कुच्छ साथियां तिसयो जाई नैं एह ग्लाइ घल्लया कि रंगशाला च जाई करी जोखिम मत उठांदा । 32 तित्थु कोई कुच्छ बकदा था कने कोई कुच्छ, कजोकि सभा च बड़ी गडबडी होआ दी थी, कने बडे मते माणु एह जाणदे भी नी थे कि अहां कुस तांई किडे होआ दे हन । 33 ताहू तिन्हां सिक्कन्दरे जो, जिसियो यहूदियां खरेडेया था, भीड़ा च गांह चली आया । सिक्कन्दर हत्थे नैं इशारा करी नैं लोकां सामणे जबाब देणां चाहंदा था । 34 अपर जाहू तिन्हां एह जाणी लैआ कि एह यहूदी ऐ, तां सारे इक्क ई गल्ला पर कोई दो घंटे तिकर ग्लाइ रेहू, "इफिसियो दी अरतिमिस देवी म्हान ऐ ।" 35 ताहू सैहरे देयां मंत्रियां लोकां जो शांत करी नैं ग्लानां लगा, "हे इफिसुस देयो लोको, कुण नी जाणदा कि इफिसियो दा सैहरे म्हान देवी

अरतिमिस दा मंदर, कने ज्यूस ते पाससे ते पैआ होया मूर्तिया दा टहलुआ ऐ । 36 अपर इन्हां गल्लां दा खण्डन ई नी होई सकदा, तां ठीक एह ऐ कि तुहां शांत रहैआ कने बगैर सोचे समझे कुच्छ मत करा । 37 कजोकि तुहां एह माणु लंदे हन जेहडे ना मंदरे लुटणे आळे हन कने ना ई अहां दिया देविया दी चर्चा करणे आळे हन 38 जे देमेत्रियुस कने तिसदे साथी कारीगरां दा कुसी नैं झगड़ा होयें तां अदालत खुली ऐ कने हाकम भी हन; सैह इक्की दूये पर फैसला करन । 39 अपर जे तुहां कुसी होरनी गल्ला दे बारे च पूछणां चाहंदा हन, तां नियत सभा च फैसला कित्ता जाणां । 40 कजोकि अज्जे दे दंगे दिया बजाह ते दोष लगाणे दा डर ऐ, इसताई कि इसदी कोई भी बजाह नी, कने अहां इसा भीड़ा च किडे होणे दा कोई जबाब नी देई सकदे ।" 41 एह ग्लाइ करी तिन्हीं सभा जो घल्ली दिता ।

मकिदुनिया, यूनाने च कने त्रोआसे च पौलुस

20 जाहू हुल्लड रुकी गैआ तां पौलुसे चेलयां जो सदी करी समझाया, कने तिन्हां ते विदा होई करी मकिदुनिया दे पाससें चली पैआ । 2 तिस सारे प्रदेशे ते होई करी कने चेलयां जो हॉसला देई करी सैह यूनान च आया । 3 जाहू त्रै मीह्ने रैई करी सैह तित्थु ते चाहजे बैई करी सीरिया सैहरे जो जाणे आळा था, तां यहूदी तिसियो मारणे दिया ताका च लग्गी पै, इसताई तिन्हीं एह फैसला कित्ता कि मकिदुनिया होईकरी वापस होई जां । 4 बिरिया दे पुरुसे दा पुत्तर सोपत्रुस कने थिस्सलुनिकियों च अरिस्तर्खुस कने सिक्कुन्दुस, कने दिरबे दा गयुस, कने तीमुथियुस, कने आसिया दा तुखिकुस कने त्रुफिमस आसिया तिकर तिस सौगी चली पै । 5 सैह गांह जाईकरी त्रोआसे च अहां दा इंतजार करदे रेहू । 6 कने अहां अखमीरी रोतिया देयां दिना दे बाद फिलिप्पी ते चाहजे पर चढी करी पंजा दिनां च त्रोआसे च तिन्हां अल्ल पुज्जे, कने सत दिन तित्थु ई रेहू ।

त्रोआसे च यूरुसुस जो जिंदा करणां

7 हपते दे पैहले दिन जाहू अहां रोतिया तोडणे जो किडे होये, तां पौलुसे जेहडा दूयें दिने जाणे आळा था, तिन्हीं तिन्हां नैं गल्लां कित्तियां; कने अधिया राती तिकर गल्लां करदा रहैआ । 8 जिसा बोडी पर अहां किडे थे, तिसा च बडे दिरबे बळा करदे थे । 9 कने युतखुस नांये दा इक्क जुआन मुंडू खिडकीया च बैठया गुडिया निदरा नैं झुरा मारादा था । जाहू पौलुस बड़ी देर तिकर गल्लां करदा रहैआ तां सैह माणु निदरा च त्रीआ बोडी ते पैई गैआ, कने मरेया चुकेया । 10 अपर पौलुस लौई करी तिस नैं लिपटी गैआ, कने गळे लाई करी ग्लानां लगा, "डरा मत; कजोकि तिस दे प्राण तिस च ई थे ।" 11 कने ऊपर जाई करी रोटी तोडी कने खाई करी इतणीया देरा तिकर तिन्हां नैं गल्लां करदा रहैआ कि भ्याग होई गैई । भिरी सैह चली गैआ । 12 कने सैह तिस जुआन मुंडूये जो जिंदा लैई आये कने बड़ी शांति पाई ।

त्रोआसे च मिलेतुसे दी यात्रा

13 अहां पैहले ई चाहजे पर चढी करी अस्सुसे जो एह सोची करी गांह चली गै कि तित्थु ते अहां पौलुसे जो चढाई लैण, कजोकि तिन्हीं एह इसताई ठेहराया था कि सैह अप्पु ई पैदल जाणे आळा था । 14 जाहू सैह अस्सुस च अहां जो मिला तां अहां तिसियो छड्डी करी मितुलेने च आये । 15 तित्थु ते चाहजे लैई करी अहां दूये दिने खियुसे सामणे पुज्जे, कने अगले दिने सामुसे च जाई रेहू; भिरी दूयें दिने मिलेतुस च आये । 16 कजोकि पौलुसें इफिसुस अल्ल ते होईकरी जाणे दी सोचियो थी कि कुत्थी इआं ना होयें कि तिसियो आसिया च देर लग्गें; कजोकि सैह जल्दवाजिया च था कि जे होई सके तां सैह पिन्तेकुस्त दे दिन यरुशलमे च रेहू ।

इफिसुस च स्याणेयां जो शिक्षा

17 तिन्हीं मिलेतुसे ते इफिसुस च संदेशा घल्लया, कने कलेसिया देयां स्याणेयां जो सदया । 18 जाहू सैह तिस अल्ल आये, तां तिन्हां ग्लाय: "तुहां जाणदे हन कि पैहले ई दिने ते जाहू मैं आसिया च पुज्जा, मैं हर बग्त तुहां सौगी किआं रेहूआ - 19 मतलब बडिया दीनता नैं, कने टपळे चढाई -चढाई करी, कने तिन्हां परीक्षा च जेहिड्यां यहूदियां दिया बजाह ते मिन्जो पर आई पैई, मैं प्रभु दी सेवा करदा ई रेहूआ; 20 कने जेहिड्यां - जेहिड्यां गल्लां तुहां दे

फायदे दियां थियां, तिन्हां जो दस्सणे कने लोकां सामणे कने घर -घर सखाणे ते कदी नी झिझकेया, ²¹ अपर यहूदियां कने यूनानियां दे सामणे गवाही दिंदा रहूआ कि परमात्मं दे पाससे मन फराणां कने अहां दे प्रभु यीशु मसीह पर वसुआस करणां चाइदा । ²² हुण दिखा, मैं आत्मां सौगी बन्नेया यरुशलेम जो चलेया, कने नी जाणदा कि तित्थु मिन्जो पर क्या क्या बितणां; ²³ सिर्फ एह कि पवित्र आत्मां हर सैहरे च गवाही दैई दैई करी मिन्जो नैं ग्लांदा ऐ कि बन्धन कने क्लेश तिजो ताई त्यार हन । ²⁴ अपर मैं अपणेयां प्राणां जो कुच्छ नी समझदा कि तिसियो प्यारा जाणे, अपर एह कि मैं अपणिया दौडा जो कने सेवा जो पूरिया करे, जेह्डी मैं परमात्मं दे अनुग्रह दे सुसमाचार पर गवाही दैणे ताई प्रभु यीशु ते पाई ऐ । ²⁵ हुण दिखा, मैं जाणदा ऐ कि तुहां सारे जिन्हां च मैं परमात्मं दे राजे दा प्रचार करदा फिरदा, मेरे मुंमें जो भिरी नी दिखगे । ²⁶ इसताई मैं अज्र दे दिने तुहां सौगी गवाही दैई करी ग्लांदा ऐ, कि मैं सबना दे खूने ते बेकसूर ऐ । ²⁷ कजोकि मैं परमात्मं दिया सारिया मनसा जो तुहां जो पूरे तरीके नैं दस्सणे ते नी झिझकेया । ²⁸ इसताई अपणी कने अपणे पूरे झूडे दी चौकसी रखा जिस च पवित्र आत्मां तुहां जो अधिकारी बणांया ऐ, कि तुहां परमात्मं दिया कलेसिया दी रखवाळी करन, जिसियो तिन्हीं अपणे खूने नैं खरीदी लैआ ऐ । ²⁹ मैं जाणदा ऐ कि मेरे जाणे ते बाद फाड़णे आळे भेड़िये तुहां च आगे जिन्हां झूडे जो नी छडणां । ³⁰ तुहां च ऐसे ऐसे माणु उठी खडोणे, जिन्हां चेलयां जो अपणे पचांह खींजी लैणे आळ्यां सिधियां कने पुठियां गल्लां करणियां हन । ³¹ इसताई जागदे रहूआ, कने याद रखा कि मैं त्रे साल तिकर रात -दिन रौई रौई करी हर इक्की जो चतौनी दैणां नी छडेया । ³² कने हुण मैं तुहां जो परमात्मं जो, कने तिन्हां दे अनुग्रह दे वचना जो सौपी दिंदा ऐ; जेह्दा तुहां दी तरक्की करी सकदा ऐ कने सारे पवित्र कित्तेयो लोकां च बंडी करी मीरास दैई सकदा ऐ । ³³ मैं कुसी दे सोने चांदी, कने कपडेयां दा लालच नी किता । ³⁴ तुहां अप्पु ई जाणदे हन कि इन्हां हत्थां ई मेरी कने मेरे साधियां दियां जरूरतां पूरियां कित्तियां हन । ³⁵ मैं तुहां जो सब कुच्छ करी नैं दस्सेया कि इस तरीके नैं मेहनत करदे करदे कमजोरियां जो संभाळणां कने पभु यीशु दे वचन याद रखणां जरूरी ऐ, जेह्दा तिन्हीं अप्पु ई ग्लायो ऐ: 'लैणे ते देणा खरा ऐ ।'

³⁶ एह ग्लाई करी तिन्हीं गोडे टेके कने तिन्हां सबना सौगी प्रार्थना किती । ³⁷ ताहू सैह सारे बड़े रौये कने पौलुसे दे गळें लग्गी करी तिसियो चूमणां लगे । ³⁸ सैह खास कर इसा गल्ला ते दुखी थे जेह्डी तिन्हीं ग्लाई थी कि तुहां मेरे मुंमें भिरी नी दिखगे । ताहू तिन्हां तिसियो चाहजे तिकर छडेया ।

पौलुसे दा यरुशलेमें जो जाणां

21 जाहू अहां तिसते लग्ग होई करी चाहजे पर चली पै, तां सीधे रस्ते ते थोड़ी दूर आये, कने दूये दिने रुदुसे च कने तित्थु ते पतरा च । ² तित्थु इक्क चाहजे फीनीके जो चलेया मिला, कने अहां तिस चाहजे पर चढ़ी गै । ³ जाहू साइप्रस दुस्सेया, तां अहां चाहजे जो सज्जे पाससें मोड़ी करी कने सीरिया जो चलीकरी सूर च लुत्थे; कजोकि तित्थु चाहजे दा समान लुआणां था । ⁴ चेलयां सौगी मिली करी अहां तित्थु सत दिन रहै । तिन्हां आत्मां दे सखायो पौलुसे नैं ग्लायो कि यरुशलेममे च पैर भी मत रखदा । ⁵ जाहू सैह दिन पूरे होई गै, तां अहां तित्थु ते चली पै; कने सबना जणांसा कने जागतां समेत अहां जो सैहरे दे बाहर तिकर छडेया; कने अहां कंडे पर गोडे दे भार बैई करी प्रार्थना किती, ⁶ ताहू इक्की दूये ते लग्ग होई करी, अहां तां चाहजे पर बैठे कने सैह अपणे -अपणे घरेयो चली गै ।

⁷ ताहू अहां सूरे ते जलयात्रा पूरी करी नैं पतुलिमयिस सैहरे च पुजे, कने भाऊआ जो नमस्कार करी नैं तिन्हां सौगी इक्क दिन रहै । ⁸ दूये दिने तित्थु ते चली करी अहां कैसरिया च आये, कने फिलिप्पुस सुसमाचार प्रचारके दे घरे जाईकरी तिस अल्ल रहै, जेह्दा सतां च इक्क था । ⁹ तिसदियां चार कुआरियां कुडियां थियां, जेह्दिंयां भविष्यवाणी करदियां थियां । ¹⁰ जाहू अहां तित्थु मते दिन रहै, तां अगबुस नांये दा इक्क भविष्यवक्ता यहूदिया च आया । ¹¹ तिन्हीं अहां अल्ल आई करी पौलुसे दा लक्के बनणे आळा पटका लैई लैआ, कने अपणे हत्थ पैर बन्नी करी ग्लायो लग्गा, "पवित्र आत्मां एह ग्लांदा ऐ कि जिस माणुये दा एह पटका ऐ, तिसियो यरुशलेम च यहूदी इस तरीके नैं बन्नां, कने गैर - यहूदियां दे हत्थ दैणां ।" ¹² जाहू अहां एह गल्लां सुणियां, तां अहां कने तित्थु देयां लोकां विणती किती कि यरुशलेमे जो मत जांदा । ¹³ अपर पौलुसें जबाब दिता, "तुहां क्या करदे हन कि रौई -रौई करी मेरे

दिले तोडदे हन, मैं तां प्रभु यीशु दे नांये ताई यरुशलेम च सिर्फ ना बंधे जाणे ताई अपर मरणे ताई भी त्यार ऐ ।" ¹⁴ जाहू सैह नी मनेया तां अहां एह ग्लाई करी चुप होई गै, "प्रभु दी इच्छा पूरी होयें ।"

¹⁵ इन्हां दिना दे बाद अहां त्यारी किती कने यरुशलेमे जो चली पै । ¹⁶ कैसरिया ते भी कुच्छ चले अहां सौगी चली पै, कने अहां जो मनासोन नांये दा साइप्रस दे इक्क पराणे चले अल्ल लैई आये, कि अहां तिस अल्ल रहै ।

पौलुसे दी याकूबे नैं मुलाकात

¹⁷ जाहू अहां यरुशलेम च पुजे, तां भाऊ बड़े खुश होई करी अहां नैं मिले । ¹⁸ दूये दिने पौलुस अहां जो याकूबे अल्ल लैई गैआ, जित्थु सारे स्याणे किडे थे । ¹⁹ ताहू तिन्हीं तिन्हां जो नमस्कार करी नैं जेह्दे जेह्दे कम्म परमात्मं तिसदिया सेवा दे दुआरा होरना जातिआं च कित्तेयो थे, इक्क -इक्क करी नैं सारे दस्से । ²⁰ तिन्हां एह सुणी करी परमात्मं दी महिमा किती, भिरी तिस नैं ग्लायो, "हे भाऊ, तू दिखदा ऐ कि यहूदियां च केईयां हजारो वसुआस किता ऐ; कने सारे व्यवस्था दिया धुना च हन ।" ²¹ तिन्हां जो तेरे बारे च सखाया ऐ, कि तू गैर - यहूदियां च रहणे आळे यहूदियां जो मूसा दियां शिक्षां जो त्यागणे दी शिक्षा दिंदा ऐ, कने ग्लांदा ऐ, कि ना अपणे बच्चयां दा खतणां करा कने ना ई रीतिया पर चला । ²² तां भिरी क्या किता जां?" माणुआं जरूर सुणना कि तू आया ऐ । ²³ इसताई जेह्दा अहां तिजो नैं ग्लांदा हन, सैह कर । अहां अल्ल चार माणु हन जिन्हां मन्नत मगियो ऐ । ²⁴ तिन्हां जो लैई करी तिन्हां सौगी अपणे आप्पे जो शुद्ध कर; कने तिन्हां जो खर्चा नि दें कि सैह मुँडे दे बाळां कटवान । ताहू सबना जो पता लग्गी जांगा कि जेह्दिंयां गल्लां तेरे बारे च दस्सियां, तिन्हां च कोई सचाई नी अपर तू अप्पु भी व्यवस्था जो मनी करी तिन्हां मताबक चलदा ऐ । ²⁵ अपर तिन्हां गैर - यहूदियां दे बारे च जिन्हां वसुआस किता ऐ, अहां एह फैसला करी नैं लिखी घल्लया ऐ कि सैह मूर्तियां दे सामणे बलि कित्तेयो मासे ते, कने खूने ते कने गळे घुटेयां दे मासे ते, कने व्यभिचारे ते बची रहूआ । ²⁶ ताहू पौलुस तिन्हां माणुआं जो लैई करी कने दूये दिने तिन्हां सौगी शुद्ध होई करी मदरे च गैआ, कने तित्थु दस्सी दिता कि शुद्ध होणे दे दिन, मतलब तिन्हां च हर इक्की ताई चढावा चढाणे दे दिन कधेडी पूरे होणे ।

मंदरे च पौलुसे दा पकड़ेया जाणां

²⁷ जाहू सैह सत दिन पूरे होणे आळे थे, तां आसिया देयां यहूदियां पौलुसे जो मंदरे च दिखीकरी सारेयां लोका जो भडकाया, कने इआं ई बकी करी तिसियो पकड़ी लैआ, ²⁸ "हे इस्त्राएलियो, मदद करा; एह सैई माणु ऐ, जेह्दा लोकां दे, कने व्यवस्था दे, कने इसा जगाह दे वरोधे च हर जगाह सारेयां लोकां जो सखांदा ऐ, ऐत्थु तिकर कि यूनानियां जो भी मन्दरे च अणी करी तिन्हीं इसा शुद्ध जगाह जो अशुद्ध किता ऐ ।" ²⁹ तिन्हां इसते पैहले इफिसुसवासो त्रुफिमस जो तिस सौगी सैहरे च दिख्या था, कने समझी बैठे थे कि पौलुस तिसियो मंदरे च लैई आया ऐ ³⁰ ताहू सारे सैहरे च रौळा पैई गैआ, कने लोक दौडी करी किडे होई गै, कने पौलुसे जो घसीटी करी मंदरे बाहर लैई आये कने झट दवार बंद करी दित्ते । ³¹ जाहू सैह तिसियो मारी दैणां चाहदे थे, तां सपाईयां दे सरदारो जो खबर घल्ली कि सारे यरुशलेम च रौळा पैआ ऐ । ³² ताहू सैह झट सैनिकां कने सूबेदारां जो लैई करी तिन्हां अल्ल झट दौडी आये; कने तिन्हां सपाईयां दे सरदारो जो कने सैनिकां जो दिखी करी पौलुसे जो मरणां कटणां छड्डी दिता । ³³ ताहू सपाईयां दे सरदारो बक्खे आईकरी तिसियो पकड़ी लैआ; कने दूँ सगळां नैं बनणे दी सलाह दैई करी पूछणां लग्गा, "एह कुण ऐ कने इन्हीं क्या कित्तेयो ऐ ।" ³⁴ अपर भीडा च कोई कुच्छ होर कोई कुच्छ होर बकदा रहूआ । जाहू हुल्लडे दिया बजाह ते सैह ठीक सचाई नी जाणी सके, तां तिसियो गदे च लैई जाणे दा हुक्म दिता । ³⁵ जाहू सैह पैडियां पर पुजा, तां एह होया कि भीडा दे दबावे नैं जुआना जो तिसियो चुकी करी लैई जाणां पैआ । ³⁶ कजोकि लोकां दी भीड़ एह बकदी तिस पचांह चली पियो थी, "तिसियो खत्म करी दैआ ।"

³⁷ जाहू सैह पौलुसे जो गदे जो लैई जाणे आळे थे, तां तिन्हीं सपाईयां दे सरदारो नैं ग्लायो, "क्या मिन्जो इजाजत ऐ कि तुहां नैं कुच्छ ग्लां?" तिन्हीं ग्लायो, "क्या तू यूनानी जाणदा ऐ?" ³⁸ क्या तू सैह भिस्त्री नी, जिन्हीं कुच्छ बगत पैहलें विद्रोह शुरू करया था, कने रेगिस्तान च चार हजार हत्यारो लोकां

दी अगुआई करा दा था ।³⁹ पौलुसें ग्लाय, "मैं तां तरतुसे दा यहूदी माणु ऐ । किलिकिया दे प्रसिद्ध सैहरे दा निवासी ऐ । मैं तिज्जो नैं विणती करदा ऐ कि मिन्जो लोकां नैं ग्लान करणां दै ।"⁴⁰ जाहू तिन्हीं हुक्म दिता, तां पौलुसें पैडियां पर खडौई करी लोकां जो हत्थे नैं इशारा किता । जाहू सैह चुप होई गै तां सैह इब्रानी भाषा च ग्लानां लग्गा;

भीड़ा दे सामणे पौलुसे दा भाषण

22 हे भाऊओ कने पितरो, मेरी सुणां, जेहड़ा हुण मैं तुहां सामणे दस्सणां चाहंदा ऐ ।"

² सैह एह सुणी करी कि सैह अहां नैं इब्रानी भाषा च ग्ला दा ऐ, कने चुप होई गै, ताहू तिन्हीं ग्लाय,

³ "मैं तां यहूदी माणु ऐ, जेहड़ा किलिकिया दे तरसुसे च पैदा होया; अपर इस सैहरे च गमलीएल देयां पैरां अल्ल बैई करी पढ़ाया ऐ, कने पितरां दी व्यवस्था दी ठीक तरीके पर सखाया ऐ; कने परमात्मैं तांई बड़ा खुश था, ठीक तिआं ई जिआं तुहां सब हन ।⁴ मैं तां मर्दा कने जणांसा दूनी जो बन्नी बन्नी करी जेला च पाई पाई करी, इस पंथे दे लोकां जो तड़फाया कने तिन्हां जो मरवाई भी दिता ।⁵ इसा ग्लानां तांई महायाजक कने सारे स्याणे गवाह हन, कि तिन्हां च मैं भाऊआ देयां नाये दियां चिठियां लैई करी दमिशके जो चलेया था, कि जेहड़े तित्थु हन तिन्हां जो भी सज्जा दोआणे तांई बन्नी करी यरुशलमे जो लैई ओयें ।

अपणे मन बदलणे दा वखान

(चेलयां दे कम्म 9:1-19; 26:12-18)

⁶ "जाहू मैं चलदा चलदा दमिशक अल्ल पुज्जा, तां इआं होया कि दोपेरा दे बगत झट इक्क बड़ी जोती अम्बरे च मेरे चौनी पाससें चमकी ।⁷ मैं जमीना पर पैई गैआ कने एह गल्ल सुणी, 'हे शाऊल 'हे शाऊल, तू मिन्जो कजो सतांदा ऐ ।'⁸ मैं जबाब दिता, 'हे प्रभु तू कुण ऐ, तिन्हीं मिन्जो नैं ग्लाय, 'मैं यीशु नासरी ऐ, जिसियो तू सतांदा ऐ ।'⁹ मिन्जो सौगी जेहड़े थे तिन्हां जोती तां दिखी पर जेहड़ा मिन्जो नैं ग्लाना करा दा था तिसदी गल्ल नी सुणी ।¹⁰ ताहू मैं ग्लाय, 'हे प्रभु, मैं क्या करे, प्रभुयें मिन्जो नैं ग्लाय, उठी करी दमिशके चली जा, कने जेहड़ा कुच्छ तेरे करणे तांई ठेहराया ऐ तित्थु तिज्जो नैं सब दस्सी दैणां ।'¹¹ जाहू तिसा जोतिया दी लौई दिया बजाह ते मिन्जो कुच्छ नी दुस्सया, तां मैं अपणे संगी साथियां दे हत्थ पकड़े कने मैं दमिशके च आया ।¹² "ताहू हनन्याह नाये दा इक्क माणु था सैह व्यवस्था दा पालण करणे आळा इक्क भक्त था, जेहड़ा तित्थु रैहणे आळे सारेयां यहूदियां सौगी तिसदा अच्छा बोल चाल था, मिन्जो अल्ल आया, ¹³ कने खडौई करी मिन्जो नैं ग्लाय, 'हे भाऊ शाऊल, भिरी दिखणां लग्ग ।' तिस ई बगत मेरियां अंखी खुली गियां कने मैं तिसियो दिख्या ।¹⁴ ताहू तिन्हीं ग्लानां लग्गा, अहां दे पितरां दे परमात्मैं मिन्जो इसतांई ठेहराया ऐ कि तू तिसदिया इच्छा जो जाणे, कने तिस धर्मिये जो दिखें कने तिसदे मुंमैं ते ग्लानां सुणे ।¹⁵ कजोकि तू तिसदे पाससे ते सारे माणुआं सामणे तिन्हां ग्लानां दा गवाह हुंगा जेहिडियां तैं दिखियां कने सुणीयां हन ।¹⁶ हुण कजो देर करदा ऐ, "उठ, बपतिस्मा लै, कने तिसदा नां लैई करी अपणेयां पापां जो धोई लै ।"

गैर - यहूदियां च प्रचार दी सूचना

¹⁷ "जाहू मैं भिरी यरुशलमे च आई करी मंदरे च प्राथनां करा दा था, तां बैहोश होई गैआ, ¹⁸ कने तिसियो दिख्या कि सैह मिन्जो नैं ग्लानां ऐ, 'तौल करी नैं यरुशलमे ते झट निकळी जा; कजोकि तिन्हां मेरे बारे च तेरी गवाही नी मनणी ।'¹⁹ मैं ग्लाय, 'हे प्रभु सैह तां तुहां जाणदे हन कि मैं तिज्जो पर वसुआस करणे आळ्यां जो जेला च पांदा कने जगाह जगाह आराधनालय च मरवांदा था ।²⁰ जाहू तेरे गवाह स्तिफनुस दा खून बहाया जा दा था तां मैं भी तित्थु खडौतेया था कने इसा ग्लानां ते सहमत था, जिन्हां तिसदी हत्या किच्चियो थी, मैं तिन्हां दे कपडेयां दी रखवाळी करा दा था ।²¹ कने तिन्हीं मिन्जो नैं ग्लाय, 'चली जा, कजोकि मैं तिज्जो गैर - यहूदियां अल्ल दूर-दूर घल्लणां ।"

²² सैह इसा ग्लानां तिकर तिसदी सुणदे रैहू, ताहू जोरे नैं ग्लानां लग्गे, "एह दे माणु जो खत्म करा, तिन्हां दा जिदा रैहणां ठीक नी ।"²³ जाहू सैह जोरे नैं

डडदे कपडे फेंकदे कने अम्बरे दे पाससें धूड़ा उडांदा थे; ²⁴ तां सपाईयां दे सरदारे ग्लाय, "इसियो गढे च लैई जा, कने कोड़े मारी करी जांचा, कि मैं जाणी सके कि लोक कुसा बजाह ते इसदे वरखलाफ इआं ई ग्ला दे हन ।"²⁵ जाहू तिन्हां तिसियो जोड़ेयां नैं बन्नेया तां पौलुसें तिस सूबेदारे नैं जेहड़ा बक्खें खडौतेया था, ग्लानां लग्गा, "क्या एह ठीक ऐ कि तू इक्क रोमी माणुये जो, कने सैह भी बगैर गुनाह किच्चियो कोड़े मारगा?" ²⁶ सूबेदार एह सुणी करी सपाईयां दे सरदारे नैं ग्लानां लग्गा, "तू एह क्या करा दा ऐ, एह तां रोमी माणु ऐ ।"²⁷ ताहू सपाईयां दे सरदारे तिस अल्ल आई करी ग्लाय, "मिन्जो दस्स, क्या तू रोमी ऐ?" तिन्हीं ग्लाय, "हॉ ।"²⁸ एह सुणी करी सपाईयां दे सरदारे ग्लाय, "मैं रोमी होणे दा औदा बड़े पैसे दैई करी पाया ऐ ।" पौलुसें ग्लाय, "मैं तां पैदाईसी रोमी ऐ ।"²⁹ ताहू जेहड़े लोक तिसियो परखणे पर थे, इकदम तिसदे बक्खें ते हटी गै; कने सपाईयां दे सरदारे भी एह जाणी करी कि एह रोमी ऐ कने मैं तिसियो बन्नेया ऐ उरी गैआ ।

महासभा दे सामणे पौलुस

³⁰ दूये दिने तिन्हीं ठीक ठीक परखणे दिया इच्छा ते ई कि यहूदी तिस पर दोष कजो लग्गा करदे हन, तिसदे बंधन खोली दिचे; कने प्रधान याचका कने सारी महासभा जो किट्टे होणे दी सलाह दिती, कने पौलुसे जो थलै लैई जाई करी तिसदे सामणे खरेडी दिता ।

23 पौलुसें महासभा दे पाससें टक लगाई करी दिख्या कने ग्लाय, "हे भाऊओ, मैं अज्जे तिकर परमात्मैं दे तांई बिलकुल सच्चे विवेके सौगी जिन्दगी बिताई ऐ ।"² इसा ग्लानां सुणी करी हनन्याह महायाजकें तिन्हां जो जेहड़े तिस अल्ल खडौतेयो थे, तिसदे मुंमैं च चंड मारणे दा हुक्म दिता ।

³ ताहू पौलुसें तिस नैं ग्लाय, "हे चूना फेरियो भीत, परमात्मां तिज्जो मारगा । तू कानूने मताबक मेरा न्याय करणे जो बैठया ऐ, कने भिरी क्या कानून दे विरुद्ध मिन्जो मारणे दा हुक्म दिंदा ऐ?" ⁴ जेहड़े बक्खें खडौतेयो थे तिन्हां ग्लाय, "क्या तू परमात्मैं दे महायाजके जो बुरा भला ग्लानां ऐ ।"⁵ पौलुसें ग्लाय, "हे भाऊओ, मैं नी जाणदा था कि एह महायाजक ऐ; कजोकि लिख्या ऐ : 'अपणेयां लोकां दे प्रधाने जो बुरा मत ग्ला ।'"

⁶ ताहू पौलुसें एह जाणी करी कि इक्क झुंड सद्कियां कने दूआ फरिसियां दा ऐ, सभा च जोरे नैं ग्लानां लग्गा, "हे भाऊओ, मैं फरीसी कने फरीसियां दे खानदाने दा ऐ, मरेयां दी उम्मीद कने दुआरा जिदे होणे दे बारे च मेरा मकदमा होणां लगेया ऐ ।"⁷ जाहू तिन्हीं एह गल्ल ग्लानां तां फरिसियां कने सद्कियां च लडाई होणां लग्गी; कने सभा च बैर पैई गैआ । ⁸ कजोकि सद्कियां तां एह ग्लाने हन, कि ना दुआरा जिदा होणां ऐ ना स्वर्गदूत कने ना आत्मा ऐ; अपर फरीसी इन्हां सबना जो मनदे हन । ⁹ ताहू बड़ा शोर शरावा होणां लग्गा कने कुच्छ शास्त्री जेहड़े फरीसियां दे झुंडे दे थे, उठी करी खडौई गै कने एह ग्लानां करी लडणां लग्गे, "अहां इस माणुये च कोई बुराई नी पांदा, कने जे कोई आत्मा या स्वर्गदूत तिस नैं ग्लानां ऐ तां क्या?" ¹⁰ जाहू बड़ी लडाई होई, तां सपाईयां दे सरदारे इस डरे नैं कि सैह पौलुसे दे टुकड़े-टुकड़े ना करी दै, सपाईयां जो हुक्म दिता कि लौई करी तिसियो तिन्हां दे बीचे ते जबरदस्ती कड्डा, कने गढे जो लैई जा । ¹¹ तिसा ई राती प्रभुयें तिस अल्ल खडौई करी ग्लाय, "हे पौलुस, हॉसला रख; कजोकि जिआं तैं यरुशलमे च मेरी गवाही दिती, तिआं ई तिज्जो रोमे च भी मेरी गवाही दैणी पोणी ऐ ।"

पौलुसे जो जान्नी ते मारणे साजस

¹² जाहू भ्याग होई तां यहूदियां साजस रची कने कसम खादी कि जाहू तिकर अहां पौलुसे जो मारी ना दैन, ताहू तिकर खान पीन तां अहां जो हाय । ¹³ जिन्हां अप्पु च एह कसम खादियो थी, सैह चालियां माणुआं ते जादा थे । ¹⁴ तिन्हां प्रधान याजकां कने स्याणेयां अल्ल जाई करी ग्लाय, "अहां एह ठाणी लैआ ऐ कि जाहू तिकर अहां पौलुसे जो मारी ना दैन, ताहू तिकर अहां कुच्छ चखन भी तां अहां जो हाय । ¹⁵ इसतांई हुण महासभा सौगी सपाईयां दे सरदारे जो समझा कि तिसियो तुहां अल्ल लैई ओन, मना कि तुहां तिसदे बारे च ठीक जांच करणां चाहंदा हन; कने अहां तिसदे पुज्जणे ते पैहलें ई मारणे तांई त्यार रैहणां ।"

¹⁶ पौलुसे दे भाणजे सुणेया कि सैह इसियो मारणे दे चक्करे च हन तां गढे च जाई करी पौलुसे जो खबर दिती । ¹⁷ पौलुसें सूबेदारां ते इक्की सूबेदारे जो

अप्पु अल्ल सदी करी ग्लाय, “इस जुआने जो सपाईयां दे सरदार अल्ल लैई जा, एह तिस नैं कुच्छ ग्लायानां चाहंदा ऐ ।” 18 इसताई तिन्हीं तिसियो सपाईयां दे सरदार अल्ल लैई गैआ कने ग्लायानां लग्गा, “कैदी पौलुसें मिन्जो सदी करी विणती किती कि एह जुआन सपाईयां दे सरदार नैं कुच्छ ग्लायानां चाहंदा ऐ; इसियो तिस अल्ल लैई जा ।” 19 सपाईयां दे सरदार तिसदा हत्थ पकड़ी करी कने लग्ग नैं करी पूछ्या, “तू मिन्जो नैं क्या ग्लायानां चाहंदा ऐ ।” 20 तिन्हीं ग्लाय, “यहूदियां साजस रचियो ऐ कि तिज्जो नैं विणती करी नैं कि कल पौलुसे जो महासभा चअणन, मना कि सैह तिसियो खरे कित्ते परखणां चाहंदे हन । 21 अपर तिन्हां दी मत सुणदा, कजोकि तिन्हां च चालियां ते जादा माणु तिसियो मारणे दे चक्करे च हन, जिन्हां एह ठाणी लैआ कि जाहू तिकर सैह पौलुसे जो मारी नी दैन, ताहू तिकर ना तिन्हां खाणां ना पीणां । कने हुण सैह त्यार हन कने तेरे वचने दा इतजार करा दे हन ।” 22 सैह ताहू सपाईयां दे सरदार जुआने जो एह हुक्म दैई करी घल्ली दित्ता, “कुस नैं मत ग्लंदा कि तैं मिन्जो एह ग्लंदा दस्सियां हन ।”

पौलुसे जो फेलिक्स हाकमे अल्ल घल्लणां

23 ताहू तिन्हीं दू सूबेदारां जो सदी करी ग्लाय, “दो सौ सैनिक जो, सत्तर घुडसवारां जो, कने दो सौ भाले आळ्यां जो, आधिया राती कैसरिया जो जाणे तांई त्यार करी रखेया । 24 कने पौलुसे दी सवारिया तांई घोडे तैयार रखा, कि तिसियो फेलिक्स हाकमे अल्ल सम्भाली करी पज्जाई दैन ।” 25 तिन्हीं इस तरांही दी चिट्ठी भी लिखी, 26 “महामहिम फेलिक्स हाकमे जो क्रौडियुस लूसियासे दा नमस्कार । 27 इस माणुये जो यहूदियां पकड़ी करी मारणां चाया, अपर जाहू मिन्जो पता लगा कि सैह रोमी ऐ, तां सपाईयां लैई करी छुडवाई अंदा । 28 मै जाणदा था कि सैह इस पर कुस बजाह ते दोष लगा करदे हन, इसताई तिसियो तिन्हां दिया महासभा च लैई गैआ । 29 ताहू मै जाणी गैआ कि सैह अपने कानूनं दे विवादा दे बारे च इस पर दोष लग्गा दे हन, अपर मार जाणे या बन्नी करी रखणे आळा तिस च कोई दोष नी । 30 जाहू मिन्जो दस्सेया कि इस माणु जो मारणे दे चक्करे हन, तां मै इकदम तिज्जो अल्ल घल्ली दित्ता; कने दोष लगाणे आळ्यां जो भी हुक्म दित्ता कि तेरे सामणे तिस पर दोष लगान ।” 31 तां तिन्हां सैनिकां जो हुक्म दित्या था, तिआं ई पौलुसे जो रातों रात लैई करी अन्तिपत्रिस सैहरे च आये । 32 दूये दिने सैह सवार तिसियो तित्थु छड्डी करी अप्पु गढे जो वापस आई गै । 33 तिन्हां कैसरिया च पुज्जी करी हाकमे जो चिट्ठी दित्ती; कने पौलुसे जो भी तिसदे सामणे खरेडी दित्ता । 34 तिन्हीं चिट्ठिया पढीकरी पूछेया, “एह कुस देशे दा ऐ ।” 35 कने जाहू पता लग्गा कि एह किलिकिया दा ऐ तां तिस नैं ग्लाय, “जाहू तिज्जो पर दोष लगाणे आळे ओणे, तां मै तेरा फैसला करणां ।” कने तिन्हीं तिसियो हेरोदेसे दे किले च पैहरे च रखणे दा हुक्म दित्ता ।

फेलिक्स हाकमे दे सामणे पौलुस

24 पंजा दिना बाद हनन्याह महायाजक कई स्याणे कने तिरतुल्लुस नांये दे इक्की वकीले जो सौगी लैई करी आया तिन्हां हाकमे दे सामणे पौलुसे पर दोष लगाई नैं ग्लायानां लग्गा । 2 जाहू सैह सदेया तां तिरतुल्लुस तिस पर दोष लगाई करी ग्लायानां लग्गा, हे महामहिम फेलिक्स, तेरिया बजाह ते अहां च बडे कुशल रँहदे हन कने तेरे प्रबन्धे नैं इसा जातिआ तांई कई बुराईयां खत्म होदियां जांदियां हन । 3 इसियो अहां हर जगाह कने हर तरांही दे धन्यवादे सौगी मनदे हन । 4 अपर इसताई कि मै तिज्जो होर दुख नी दैणां चाहंदा, मै तिज्जो नैं विणती करदा ऐ कि कृपा करी नैं मेरियां इक्क दो ग्लंदां सुणी लै । 5 कजोकि अहां इस माणुये जो उपद्रवी कने संसारे दे सारे यहूदियां च बलवा करणे आळा, कने नासरी दे कुपन्थ दा मुखिया मनया ऐ । 6 इन्हीं मंदरे जो अशुद्ध करणां चाया, अपर अहां तिसियो पकड़ी लैआ । [अहां तिसियो अपने कानूने मताबक सज्जा दित्तियो होंदी; 7 अपर सपाईयां दे अधिकारिये लूसियासें जबरदस्ती अहां दे हत्थे ते खोई लैआ, 8 कने मुकदमे तांई तेरे सामणे ओणे दा हुक्म दित्ता ।] इन्हां सारियां ग्लंदां जो जिन्हां दे बारे च अहां तिस पर दोष लगांदे हन, तू अप्पु ई तिसियो परखी करी जाणी लैगा । 9 यहूदियां भी तिसदा साथ दैई करी ग्लाय, एह सब ग्लंदां सच हन ।

पौलुसे दा बचाव

10 जाहू हाकमे पौलुसे जो ग्लाये दा इशारा कित्ता, तां तिन्हीं जबाब दित्ता, “मैं एह जाणी करी कि तू मते सालां ते इसा जातिआ दा न्याय करा दा ऐ, खुशिया नैं अपनां बचाव पेश करदा ऐ । 11 तू अप्पु जाणी सकदा ऐ कि जाहू ते मै यरुशलमे च आराधना करणां आया, मिन्जो बारा दिन ते जादा नी होये हन । 12 तिन्हां ना मिन्जो मंदरे च ना आराधनालय च, ना सैहरे च कुसी सौगी बैहसदे या भीड लगांदे दिख्या; 13 कने ना तां सैह तिन्हां ग्लंदां जो, जिन्हां दा सैह मिन्जो पर दोष लगांदे हन, तिज्जो सामणे सच साबित करी सकदे हन । 14 अपर मै तेरे सामणे एह मनी लैदा ऐ कि जिस धर्मे दे रस्ते जो सैह अधर्म दा रस्ता ग्लंदा ऐ, तिसा रीतिया पर मै अपने पितरां दे परमात्में दी सेवा करदा ऐ, कने जेह्दियां ग्लंदां कानून कने भविष्यवक्ता दियां कताबा च लिखियां हन, तिन्हां सबना पर वसुआस करदा ऐ । 15 कने परमात्में ते आशा रखदा ऐ, कि जेह्दी सैह अप्पु भी रखदे हन, कि धर्मियां कने अधर्मियां दूनी दा जिंदा होणां हुंगा । 16 इसते मै अप्पु भी कोशश करदा ऐ कि परमात्में दे, कने माणुआं दे पाससे ते मेरा विवेक हमेशा बेकसूर रँह । 17 मतेआं सालां बाद मै अपनेयां लोकां जो दान दैणां, कने भेट चढ़ाणां आया था । 18 तिन्हां मिन्जो मंदरे च खरिया हालता च, बगैर भीडा सौगी, कने बगैर दंगा करदे होये भेट चढ़ांदा दिख्या, हॉ आसिया दे कई यहूदी थे तिन्हां जो ठीक था 19 कि जे मेरे वरोधे च तिन्हां अल्ल कोई ग्लं होये तां ऐत्थू तेरे सामणे आईकरी मिन्जो पर दोष लगांदे । 20 या एह अप्पु ई दस्सन कि जाहू मै महासभा दे सामणे खडौतेया था, तां तिन्हां मिन्जो च कुण देया अपराध पाया ।” 21 इसा इक्की ग्लंदा जो छड्डी जेह्दी मै तिन्हां बीच खडौई करी जोरे नैं ग्लायीये थी, “मरेयां दे जिंदे होणे दे बारे च अज्ज मेरा तुहां दे सामणे मेरा फैसला होआ दा ऐ ।” 22 फेलिक्स जेह्दा इस पन्थे दियां ग्लंदां ठीक ठीक जाणदा था, तिन्हां जेह्दा एह गलाई करी टाळी दित्ता, “जाहू सपाईयां दा सरदार लूसियास आंगा, तां तुहां दियां ग्लंदां दा फैसला करणां ।” 23 कने सूबेदारे जो हुक्म दित्ता कि पौलुस जो थोडी छूट दैई करी रखवाळी करणां, कने तिस देयां साथियां च कुसी जो भी सेवा करणे ते मत रोकणा ।

फेलिक्स कने दुसिल्ला दे सामणे पौलुस

24 कुच्छ दिना बाद फेलिक्स अपणिया लाडिया दुसिल्ला जो, जेह्दी यहूदनी थी, सौगी लैई करी आया कने पौलुसे जो सदवाई करी तिसियो वसुआसे दे बारे च जेह्दा प्रभु यीशु पर ऐ, तिसते सुणां । 25 जाहू सैह धर्म कने शांति, कने ओणे आळे न्याय दी चर्चा करा दा था, तां फेलिक्स डरी करी जबाब दित्ता, “हुण तां जा; मौका पाईकरी मै तिज्जो भिरी सदगा ।” 26 तिसियो पौलुसे ते कुच्छ पैसे मिलणे दी उम्मीद थी, इसताई होर भी सदी सदी करी तिस नैं ग्लंदां करा करदा था । 27 अपर जाहू दो साल होई गै तां पुरकियुस फेस्तुत, फेलिक्स दी जगाह पर आया; कने फेलिक्स यहूदियां जो खुश करणे दी इच्छा ते पौलुसे जो जेला च ई रेहणां दित्ता ।

पौलुसे दा सम्राट दी दुहाई दैणां

25 फेस्तुत तिस प्रदेशे च पुज्जणे दे त्रीं दिना बाद कैसरिया ते यरुशलमे जो गैआ । 2 ताहू प्रधान याजकां कने यहूदियां देयां खास लोका तिसदे सामणे पौलुसे पर दोष लगाये; 3 कने तिस नैं विणती किती कि सैह पौलुसे जो यरुशलमे घल्ली करी तिन्हां दा पक्ष लै, कजोकि सैह रस्ते च ई तिसियो मारणे दे चकरे च थे । 4 फेस्तुते जबाब दित्ता, “पौलुस कैसरिया च पैहरे च ऐ, कने मै अप्पु तित्थु तौळी जाणे आळा ऐ ।” 5 भिरी ग्लाय, “तुहां च जेह्दे अधिकार रखदे हन सैह सौगी चलन, कने जे इन्हीं माणुये कुछ बुरा कम्म कित्या ऐ तां तिस पर दोष लगान ।”

6 तिन्हां सौगी कोई अठ दस दिन रँई करी सैह कैसरिया चली गैआ; कने दूये दिने न्याय आसणे पर बैई करी पौलुसे जो अणने दा हुक्म दित्ता । 7 जाहू सैह आया तां जेह्दे यहूदी यरुशलमे ते आयो थे, तिन्हां अक्खें बक्खें खडौई करी तिस बडे गम्भीर दोष लगाये, जिन्हां दा सबूत सैह नी दैई सकदे थे । 8 अपर पौलुसें जबाब दित्ता, “मैं ना तां यहूदियां दी व्यवस्था दे ना मंदरे दे, कने ना ई कैसरे वरखलाफ कोई अपराध कित्ता ऐ ।” 9 ताहू फेस्तुसें यहूदियां जो खुश करणे दिया इच्छा ते पौलुसे नैं ग्लाय, “क्या तू चाहंदा ऐ

कि यरुशलमे जो जान; कने तित्थु मेरे सामणे तेरा एह मकदमा तय कित्ता जां ।" 10 पौलुसें ग्लाय, "मैं कैसरे दे न्याय आसणे दे सामणे खडौंतेया ऐ; मेरे मकदमे दा ऐत्थी ई फैसला होणां चाइदा । जिआं तू अच्छे तरीके नैं जाणदा ऐ, यहूदियां दा मैं कुच्छ भी अपराध नी कित्ता । 11 जे मैं अपराधी ऐ कने मारणे आळा कोई कम्म कित्तेया ऐ, तां मरणे ते नी मुकरदा; अपर जिन्हां गल्लां दा एह मिन्जो पर दोष लगांदा ऐ, जे तिन्हां च कोई भी गल्ल सच नी होयें, तां कोई मिन्जो तिन्हां दे हुआले नी करी सकदा । 12 ताहू फेस्तुसें मंत्रियां दी सभा सौगी गल्लां करी नैं जबाब दित्ता, "तैं कैसरे दी दुहाई दित्ती ऐ, तू कैसरे अल्ल ई जांगा ।"

राजा अग्रिप्पा दे सामणे पौलुस

13 कुच्छ दिना बाद राजा अग्रिप्पा कने बिरनीके फेस्तुस नैं मिलणां कैसरिया सैहरे च आये । 14 तिन्हां बड़े दिन तित्थु रैहणे दे बाद फेस्तुसें पौलुसे दे बारे च राजे जो दस्सेया, "इक्क माणु ऐ, जिसियो फेलिक्स केदी बणाई करी छड्डी गैआ ऐ । 15 जाहू मैं यरुशलमे च था, तां प्रधान याजक कने यहूदियां दे स्याणेयां तिसदी कारवाई कित्ती, कने सोचेया कि तिसियो सज्जा दा हुक्म दित्ता जां । 16 अपर मैं तिन्हां जो जबाब दित्ता कि रोमी दी एह रीति नी ऐ कि कुसी माणुये जो सज्जा ताई हुआले करी दैन, जाहू तिकर दोषी जो अपणे दोष लगाणे आळेयां दे सामणे खडौंई करी दोष दे जबाब दैणे दा मौका ना मिलें । 17 कने जाहू सैह ऐत्थु किट्टे होये, तां मैं कुच्छ देर नी कित्ती, अपर दूये ई दिने न्याय आसणे पर बैई करी तिस माणुये जो अणने दा हुक्म दित्ता । 18 जाहू तिस पर दोष लगाणे आळे खडौंई गै, तां तिन्हां दियां अनुचित गल्लां दा आरोप नी लगाया, जिआं मैं समझदा था । 19 अपर सैह अपणे मत दे कने यीशु नां दे कुस्की माणुये दे बारे च, जेहडा मरी गैआ था कने पौलुस तिसियो जिंदा दस्सदा था, बैहसदे थे । 20 मैं उलझणां च था कि इन्हां गल्लां दा पता किआं लगां ।" इसताईं मैं तिसते पूछ्या, 'क्या तू यरुशलमे जाणां कि तित्थु इन्हां गल्लां फैसला होयें ।' 21 अपर जाहू पौलुसें दुहाई दित्ती कि तिसदे मुकदमे दा फैसला महाराजाधिराजे अल्ल होयें, तां मैं हुक्म दित्ता कि जाहू तिकर तिसियो कैसरे अल्ल ना घल्लें, तिसियो हिरासत च रखेया जां ।" 22 ताहू अग्रिप्पा राजा फेस्तुसे नैं ग्लणां लग्गा, "मैं भी तिस माणुये दी सुणना चाहंदा ऐ ।" तिन्हीं ग्लाय, "तैं कल सुणी लैणां ।" 23 अपर दूयें दिने जाहू राजा अग्रिप्पा कने बिरनिके बड़ा डोल उमाका करी नैं आये कने सपाईयां दे सरदारं कने सैहरे देयां खास लोकां सौगी दरबारे पर पुजे । ताहू फेस्तुसें हुक्म दित्ता, कने पौलुसे जो लैई ओं । 24 फेस्तुस ग्लणां लग्गा, "हे राजा अग्रिप्पा, कने हे सारे माणुओ जेहडे ऐत्थु मिन्जो सौगी हन, तुहां इस माणुये जो दिखा दे हन, जिस दे बारे च सारेयां यहूदियां यरुशलमे च भी कने ऐत्थु भी जोरे - जोरे नैं डडी करी मिन्जो नैं विणती कित्ती कि इसदा जिंदा रैहणां ठीक नी । 25 अपर मैं जाणी लैआ कि तिन्हीं देदेया कुच्छ नी कित्ता कि मारी दिता जां; कने जाहू तिन्हीं अप्पु ई महाराजाधिराज दी दुहाई दित्ती तां मैं तिसियो घल्लणे दा वचार कित्ता । 26 मैं तिसदे बारे च कोई पक्की गल्ल नी पाई कि अपणे मालक अल्ल लिखी घल्लें । इसताईं मैं तिसियो तुहां सामणे कने खास करी नैं हे राजा अग्रिप्पा, तेरे सामणे लंदेया ऐ कि परखणे ते बाद मिन्जो कुच्छ लिखणे जो मिले । 27 कजोकि कैदिये जो घल्लणां कने जेहडे दोष तिस पर लगाये हन, तिन्हां जो नी दस्सणा, मिन्जो बेकार लग्गा दा ऐ ।"

राजा अग्रिप्पा दे सामणे पौलुसे दा स्पष्टीकरण

26 राजा अग्रिप्पा पौलुसे नैं ग्लणां लग्गा, "तिज्जो अपणे बारे च ग्लणे दा मौका ऐ ।" ताहू पौलुसें हत्थ गांह करी नैं जबाब दैणां लग्गा, "हे राजा अग्रिप्पा, जितणियां गल्लां दा यहूदी मिन्जो पर दोष लगांदा हन, अज्ज तिज्जो सामणे तिन्हां दा जबाब दैणे ताईं मैं अपणे जो धन समझदा ऐ, 3 खास करी नैं इसताईं कि तू यहूदियां दे सब वर्तावां कने झगड़ेयां जो जाणदा ऐ । इसताईं मैं विणती करदा ऐ, धीरजे नैं मेरी सुण ।

4 "मेरा चाल -चलण शुरु ते ई मेरिया जातिआ च कने यरुशलमे च कदेया था एह सारे यहूदी जाणदे हन । 5 जे सैह गवाही दैणां चाह, तां शुरु ते ई मिन्जो पणछेणदे हन कि मैं फरीसी होई करी अपणे धर्म दे सबते खरे पन्थ दे मताबक चलेया । 6 कने सब तिसा प्रतिज्ञा च आशा दिया बजाह जेहडी परमात्मैं अहां दे पितरां नैं कित्तियो थी, मिन्जो पर मकदमा चला करदा ऐ ।

7 तिसा प्रतिज्ञा दे पूरे होणे दी आश लगायो, अहां दे बारां गोत्र अपणे सारे मने नैं रात दिन परमात्मैं दी सेवा करदे आये हन । हे राजा, इसा ई आशा दे बारे च यहूदी मिन्जो पर दोष लगांदा हन । 8 जाहू कि परमात्मैं मरेयां जो जिंदा करदा ऐ, ताहू तुहां अल्ल एह गल्ल कजो वसुआसे जोग्गी नी समझी जांदी ।

9 "मैं भी सुणेया था कि यीशु नासरिये दे नांये दे विरोध च मिन्जो बड़ा कुच्छ करणां चाइदा । 10 कने मैं यरुशलमे च एह ई कित्ता; कने प्रधान याजकां ते अधिकार पाईकरी मतेआं पवित्र लोकां जो जेला च पाया, कने जाहू सैह मारी दित्ते जांदे थे तां मैं भी तिन्हां दे वरोधे च अपणी सम्पति दिंदा था । 11 हर आराधनालय च मैं तिन्हां जो ताड़ना दैई दैई करी यीशुये दी निंदा करवांदा था, ऐत्थु तिकर कि गुस्से दिया बजाह ते इतणा पागल होई गैआ कि दूयेयां सैहरां च जाई करी भी तिन्हां जो सतांदा था ।

अपणे मन बदलणे दा वखान

(चेलयां दे कम्म 9:1-19; 22:6-16)

12 "इस सफरे च जाहू मैं प्रधान याजका ते आदेश पत्र लैई करी दमिश्के जो जा दा था; 13 तां हे राजा, रस्ते च दपेरा दे बग्त मैं अम्बरे च सूरजे दिया रौशनी ते भी तेज इक्क जोत, अपणे सौगी चलणे आळेयां दे चौनी बकखेयां चमकदी दिखी । 14 जाहू अहां सारे जमीना पर पैई गै, तां मैं इब्रानी भाषा च, मिन्जो नैं एह ग्लंदा होये इक्क उआअ सुणी, 'हे शाऊल, 'हे शाऊल, तू मिन्जो कजो सतांदा ऐ, पैनी जगाह पर लत मरणां तिज्जो ताई ओखा ऐ ।' 15 मैं ग्लाय, 'हे प्रभु, तू कुण ऐ?' प्रभुयें ग्लाय, 'मैं यीशु ऐ, जिसियो तू सतांदा ऐ । 16 अपर तू उठ, अपणेयां पैरां पर खडौं; कजोकि मैं तिज्जो इसताईं दर्शण दित्ता ऐ कि तिज्जो तिन्हां गल्लां दा भी सेवक कने गवाह ठेहरान, जेहिड्यां ते दिखियां हन, कने तिन्हां दा भी जिन्हां ताईं मैं तिज्जो दर्शण दैणां । 17 कने मैं तिज्जो तेरेयां लोकां ते कने गैर - यहूदियां ते बचांदा रैहणा, जिन्हां अल्ल मैं हुण तिज्जो इसताईं घल्लदा ऐ । 18 कि तू तिन्हां दियां अंखी खोलें तां सैह नैहरे ते जोतिया दे पाससे, कने सैतान दे अधिकारे ते परमात्मैं पाससें फिरन; कि पापां दी माफी कने तिन्हां लोकां सौगी जेहडे मिन्जो पर वसुआस करणे ते पवित्र कित्तेयो हन, मीरास पान ।'

अपणे कम्मां दा बखान

19 "कने हे राजा अग्रिप्पा, मैं तिस सुअर्गिय दर्शने दी गल्ल नी टाळी, 20 अपर पैहले दमिश्के दे, भिरी यरुशलमे दे, कने ताहू यहूदिया दे सारे देसां दे रैहणे आळेयां जो, कने गैर - यहूदियां जो समझांदा रैहंआ, कि मने बदला कने परमात्मैं पाससें फिरा कने मन फिराव जोग्गा कम्म करा । 21 इन्हां गल्लां दिया बजाह ते यहूदी मिन्जो पकडी नैं मंदरे च मारणे चकरे च थे । 22 अपर परमात्मैं दिया बजाह ते मैं अज्जे तिकर जिंदा ऐ कने छोटे बडेयां सबना सामणे गवाही दिंदा ऐ, कने तिन्हां गल्लां जो छड्डी करी होर कुच्छ नी ग्लंदा जेहिड्यां भविष्यवक्तां कने मुसे भी ग्लायियां कि होणे आळियां हन, 23 कि मसीह जो दुख भोगणा कने सैह सबना ते पैहले मरेयां च जिंदा होई करी, अहां देयां लोकां कने गैर - यहूदियां च जोतिया दा प्रचार करगा ।"

24 जाहू सैह इस तरीके नैं जबाब देया दा था, तां फेस्तुसे जोरे नैं ग्लणां लग्गा, "हे पौलुस, तू पागल ऐ । मते ज्ञाने तिज्जो पागल करी दित्ता ऐ ।" 25 अपर पौलुस ग्लणां लग्गा, "हे महामहिम फेस्तुस, मैं पागल नी, अपर सच्चाईया दियां कने अक्का दियां गल्लां ग्ला दा ऐ । 26 राजा भी जिसदे सामणे नैं निडर होई करी ग्ला दा ऐ, एह गल्लां जाणदा ऐ; कने मिन्जो वसुआस ऐ जे इन्हां गल्लां च कोई तिसते छुपियो नी, कजोकि एह घटना कुसी कोणे च नी होई । 27 हे राजा अग्रिप्पा, क्या तू भविष्यवक्तां दा वसुआस करदा ऐ, हां, मैं जाणदा ऐ कि तू वसुआस करदा ऐ ।" 28 ताहू राजा अग्रिप्पा पौलुसे नैं ग्लणां लग्गा, "तू थोड़ा ई समझाणे ते मिन्जो मसीह बणाणा चाहंदा ऐ ।" 29 पौलुस ग्लणां लग्गा, "परमात्मैं नैं मेरी प्रार्थना ऐ कि क्या थोड़े च क्या मते च, बस तू ई नी जितणे लोक अज्ज मेरियां गल्लां सुणां दे हन, इन्हां बंधना जो छड्डी करी सैह मिन्जो साइआं होई जान ।" 30 ताहू राजा कने हाकम बिरनीके कने तिन्हां सौगी बैठणे आळे उठी खडौंते; 31 कने लग्ग जाईकरी अप्पु च ग्लणां लगे, "एह माणु तां एह देया कुच्छ नी करदा, जेहडा मौती दी सज्जा या जेला च पाणे जोग्गा होयें ।" 32 अग्रिप्पें फेस्तुसे नैं ग्लाय, "जे एह माणु कैसरे दी दुहाई नी दिंदा, तां छूटी सकदा था ।"

पौलुसे दी रोम - यात्रा : क्रेते तिकर

27 जाहू पक्का होई गैआ कि अहां चाहजे च इटली जान, तां तिन्हीं पौलुस कने कुच्छ होरनी कैदियां जो भी युलियुस नाये दे औगैस्तुत देयां सपाईयां दे इक्की सूबेदारें दे हुआले करी दित्ता । 2 अग्रमुतियुम दे इक्की चाहजे पर जेहड़ा आसिया दी जगाह पर जाणे आळा था, चढ़ी करी अहां तिसियो चलाई पाया, कने अरिस्तार्खुस नांये दे थिस्सलुनीके दा इक्क मकिदुनिया अहां सौगी था । 3 दूये दिने अहां सैदा च तम्बू पाया, कने युलियुस पौलुसे पर कृपा करी नै तिसियो तिसदे साथियां अल्ल जाणां दित्ता कि तिसदा आदर कित्ता जां । 4 तित्थु ते चाहजे चलाई करी हौआ पुड्डी होणे दिया बजाह ते अहां साइग्रसे दी आड च होई करी चली गै; 5 कने किलिकिया कने पंफुलिया अल्ल समुंदरे च होई करी लूसिया दे मूरा च पुजे । 6 तित्थु सूबेदारें जो सिकन्दरिया दा इक्क चाहज इटलीया जो जांदा मिला, कने तिन्हीं अहां जो तिस पर चढ़ाई लैआ । 7 जाहू अहां मतेआं दिना तिकर होळे -होळे चली करी मुशकला नै कनिदुसे सैहरे सामणे पुजे, तां इसताई कि हौआ अहां जो गांह नी जाणां दै दी थी, तां अहां सलमोने सामणे ते होई करी क्रेते दिया आडा च चले; 8 कने तिस कंडे कंडे मुशकला नै चली करी 'शुभलंगरबारी' नांये दिया इक्की जगाह पुजे, जित्थु ते लसया सैहर बखरें था । 9 जाहू मते दिन होई गै कने जलयात्रा च जोखम इसताई हुंदा था कि व्रते दे दिन होई गैयो थे । अपर पौलुसें तिन्हां जो एह ग्लाई करी समझाया, 10 "हे सज्जनो, मिन्जो इआं लगदा ऐ कि इसा यात्रा च मुसीबत कने बड़ा नकसान, ना सिर्फ माले कने चाहजे दा अपर अहां देयां प्राणा दा भी होणे आळा ऐ ।" 11 अपर सूबेदारें पौलुसे दियां गल्लां जो कप्तान कने चाहजे दे मालके दियां गल्लां जो बधी करी मनेया । 12 सैह बंदरगाह स्याळे दे मौसमे कटणे तांई ठीक नी था, इसताई मतेआं दा वचार था कि चाहजे जो तित्थु ते चलाई करी जे कुस भी तरीके नै होई सकें तां फिनिक्स पुज्जी करी स्याळे कटन । एह तां क्रेत दा इक्क बन्दरगाह ऐ जेहड़ा दक्षिण-पश्चिम कने उतर पश्चमे पाससे खुलदा ऐ ।

समुंदरे च तूफान

13 जाहू थोड़ी-थोड़ी दक्षिणी हौआ चलणां लगी, तां एह सोचेया कि अहां दा मकसद पूरा होई गैआ, तम्बू चुकेया कने क्रेते कंडे कंडे चाहजे चलाणां लगे । 14 अपर थोड़ीया देरा बाद जमीना दे पाससे ते इक्क बड़ा तफान चलेया, जेहड़ा 'युरकुलिन, नांये ते जाणेयां जांदा ऐ । 15 जाहू तफान चाहजे नै टकराया तां सैह तिस सामणे टिकी नी सकेया, अपर अहां तिसियो रुडणां दित्ता कने इआं ई रुडदे चली गै । 16 ताहू कौदा नांये दे इक्की लोके दे टापूये दिया आडा च रुडदे -रुडदे अहां बडिया मुशकला नै किस्तियां जो वशे च करी सके । 17 भिरी चाहजे चलाणे आळ्यां किस्तियां चुकणे बाद तरीका लगाई नै चाहजे रस्सेयां नै लपेटी करी थलै ते बन्नी दित्ता, कने सुरतिस दे उथले पाणिये च फंसी नी जान इस डरे दे मारे तरपाल कने समान लौआई लैआ कने चाहज रुडणा दित्ता । 18 जाहू अहां तफाने नै बडे पळसेटे कने धक्के खादे, तां दूये दिने सैह चाहजे दे माले फेकणां लगे; 19 कने त्रीये दिने तिन्हां अपणेयां हत्थां नै चाहजे दा सारा माल सट्टी दित्ता । 20 जाहू मतेआं दिना तिकर ना सूरज, ना तारे दुस्से कने बड़ा तफान चलदा रहैआ, तां अन्त च अहां दे बचणे दी सारी उम्मीद खत्म होई गैई । 21 जाहू सैह मते दिन तिकर भूखे रहै तां पौलुस तिन्हां बिच खडौई नै ग्लाणां लग्गा, "हे लोको, तुहां जो चाइदा था कि तुहां मेरी गल्ल सुणी करी क्रेते ते ना चाहज खोलदे कने ना एह मुसीबत ओंदी, कने ना ई एह नकसान हुंदा । 22 अपर हुण मैं तुहां जो समझांदा ऐ कि हौंसला रखा, कजोकि तुहां च कुसी दिया जात्री जो नकसान नी होणां अपर नकसान तां चाहजे दा । 23 कजोकि परमात्मां जिस दा मैं ऐ, कने जिसदी सेवा करदा ऐ तिसदे सुअर्गे दूतें अज्ज राती मिन्जो नै आईकरी ग्लाय, 24 हे पौलुस, मत डर! तिज्जो कैसरें सामणे खडौणां जरूरी ऐ । दिख, परमात्में सबना जो जेहड़े तिज्जो सौगी सफर करा दे हन, तिन्हां जो तिज्जो दित्ता ऐ ।" 25 इसताई, हे सज्जनो, हौंसला रखा; कजोकि मैं परमात्में पर वसुआस करदा ऐ, कि जिआं मिन्जो नै ग्लाय ऐ, तिआं ई होणां । 26 अपर अहां जो कुसी टापूये पर जाई रुकणां होणां ।"

चाहजे दा टूटणां

27 जाहू चौदमी रात आई, कने अहां अद्रिया समुंदरे च भटकदे फिरा करदे थे, तां आधिया राती दे मल्लाह जो चलाणे पता लग्गा कि अहां कुस्की देश दे बखरें पुज्जणे आळे हन । 28 ताहू समुंदरे दी गहराई लैणे तांई तिन्हां बीह पुरसा डुगा पाया, कने जरा होर गांह जाई करी भिरी गहराई नापी तां समंदर पन्द्रह पुरसा डुगा । 29 ताहू तिन्हां पथरिलिया जगाह च टकराणे दे डरे ते तिन्हां चाहजे दे पचांह आळे हिस्से चार तम्बू पाये, कने भ्याग होणे दी कामना करदे रहै । 30 अपर जाहू मल्लाह चाहजे ते नठणा चाहंदे थे, कने गलही ते तम्बूये पाणे दे भाने किस्ती समुंदरे च लौआई दित्ती; 31 तां पौलुस सूबेदारें नै कने सैनिकां नै ग्लाणां लग्गा, "जे एह चाहजे पर नी रहै, तां तुहां भी नी बची सकदे ।" 32 ताहू सैनिकां रस्से कटी करी किस्ती सट्टी दित्ती । 33 जाहू भ्याग होणे आळी थी, ताहू पौलुसें एह ग्लाई करी, सारेयां जो खाणां-खाणे तांई समझाया, "अज्ज चौदा दिन होये कि तुहां आस दिखदे-दिखदे भूखे रहै हन, कने कुच्छ नी खादा । 34 इसताई तुहां जो समझांदा ऐ कि थोड़ा खाई लैआ, जिसते तुहां दा बचाव होयें; कजोकि तुहां च कुसी दे मुँडे दा बाळ भी बांका नी होणा ।" 35 एह ग्लाई करी रोटी लैई कने तिन्हीं परमात्में दा धन्यावाद कित्ता कने तोड़ी करी खाणां लगे । 36 ताहू तिन्हां सारेयां हौंसला रखी नै खाणां-खाणां लगे । 37 अहां सब मिली करी चाहजे च दो सौ छियत्र माणु थे । 38 जाहू सैह खाणां खाई करी रज्जी गै, तां कणकां जो समुंदरे च सट्टी करी चाहजे जो हल्का करणां लगे । 39 जाहू भ्याग होई तां तिन्हां तिस देशे जो नी पणछेणया, अपर इक्क खाडी दिखी जिसादा कंडा चौरस था, कने सोचेया कि जे होई सके तां इस पर ई चाहजे जो रोकन । 40 ताहू तिन्हां तम्बूआं जो खोली करी समुंदरे च छड्डी दित्ता कने तिस ई बत पतवारां दे सारें रस्से खोली दित्ते, कने हौआ दे सामणे अगला पाल चढ़ाई करी कंडे अल्ल चली गै । 41 अपर दूँ समंदरां दे मिलणे दी जगाह पकडी करी तिन्हां चाहजे जो रोकेया, कने गलही जो धक्का लग्गा कनेपैई गई कने टळी नी सकी; अपर पचांह दा हिस्सा जोरदार लेहरां नै टूटणा लग्गा । 42 ताहू सैनिकां दा एह वचार होया कि कैदियां जो मारी दैन, एह ना होयें कि कोई तैरी करी नठी नी जां । 43 अपर सूबेदारें पौलुसे जो बचाणे दिया इच्छा नै तिन्हां जो ऐदेया करणे ते रोकेया कने एह ग्लाय, कि जेहड़े तैरी सकदे हन, पैहले कूदी करी कंडे पर चली जान; 44 कने बाकि कोई फटेयां पर, कने कोई चाहजे दियां होरनी चीज्रां दे सांहेर निकळी जान । इस तरीके नै सारे बची गै ।

माल्टा टापू च पौलुस

28 जाहू अहां बची गै, तां एह पता लग्गा कि एह टापू माल्टा नांये ते जाणेया जांदा ऐ । 2 तित्थु दे माणुआं अहां पर नोखी कृपा किस्ती; कजोकि बरखा होणे दिया बजाह ते जादा ठण्ड थी, इसताई तिन्हां अग्ग बाळी करी अहां जो ठेहराया । 3 जाहू पौलुसें लकडियां दी उंदळ बटोळी करी अग्गी पर रखी, तां इक्क सर्प लुकी करी निकळेया कने तिसदे हत्थे नै लटकी गैआ । 4 जाहू तिन्हां निवासियां सर्प जो तिसदे हत्थे च लिपटेया दिख्या, तां अप्पु च ग्लाणां लगे, "सच्ची ते एह माणु हत्यारा ऐ कि जे समुंदरे ते बची गैआ, तमी न्याय इसियो जिंदा नी रहणां दित्ता ।" 5 ताहू तिन्हीं सर्प जो अग्गी च झाडी दित्ता, कने तिसियो कुच्छ नी होया । 6 अपर सैह एह दिखा करदे थे कि काहू एह सूजी जांगा या कने काहू पैई करी मरी जांगा, अपर जाहू सैह बडी देर तिकर दिखदे रहै कने दिख्या कि तिसियो कुच्छ भी नी होया, तां अपणी सोच बदली करी ग्लाणां लगे, "एह तां कोई देवता ऐ ।" 7 तिसा जगाह दी अक्खे बक्खे दी जमीन टापूये दे प्रधान पुबलियुसे दी थी । तिन्हीं अहां जो अपणे घरें अणी करी त्रै दिन मित्र चारे दी सेवा किस्ती । 8 पुबलियुस दा बुडा बखार कने आँव लहू दा रोगी था । अपर पौलुसें तिसदे घरें जाई करी प्रार्थना किस्ती कने तिस पर हत्थ रखी करी तिसियो खरा कित्ता । 9 जाहू इआं होया तां तिस दीपे दे बाकि बमार आये कने खरे कित्ते । 10 तिन्हां अहां दा बड़ा आदर कित्ता, कने जाहू अहां चलणां लगे तां तिन्हां जेहड़ा कुच्छ अहां तांई जरूरी था, चाहजे पर रखी दित्ता ।

माल्टा टापू ते रोम दी तरफ

11 त्रीं मीहियां बाद अहां सिकन्दरिया दे इक्की चाहजे पर चली पै, जेहड़ा तिस दीपे पर ठंडी च रुकेया था, चाहजे आळे गांह दे हिस्से पर दियुसकूरी दा नशाण था । 12 सुरकुसा च तम्बू पाई करी अहां त्रै दिन रुकी रहै । 13 तित्थु ते अहां घूमो करी रेगियुमे सैहरे च पुजे; तां अगले दिने दक्षिणी हौआ चली पैई, ताहू अहां दूये दिने पुतियुली सैहरे च आये । 14 तित्थु अहां जो भाऊ मिले, कने तिन्हां दे ग्लाणे पर अहां तिन्हां अल्ल सत दिन रहै; कने इस तरीके नैं अहां रोम सैहरे जो चली पै । 15 तित्थु ते अहां दा भाऊ समाचार सुणी करी अप्पियुस दे चौक कने त्रै कोस दूर अहां सौगी मिलणां चली आये, जिन्हां जो दिखी करी पौलुसें परमात्में दा धन्यवाद किन्ता कने हौंसला रखेया । 16 जाहू अहां रोम सैहरे च पुजे, तां पौलुसें जो इक्की सैनिके सौगी जेहड़ा तिसदी रखवाळी करदा था, किल्ले रहणे दा हुक्म मिली गैआ ।

रोम च पौलुस

17 त्रीं दिना बाद तिन्हीं यहूदियां देयां खास लोका जो सदेया, कने जाहू सैह किट्टे होये तां तिन्हां नैं ग्लाणां लग्गा, "हे भाऊओ, मैं अपणेयां लोका दे या पितरां दे वर्ताव दे वरोध च कुच्छ भी नी किता, तमी कैदी बणाई करी यरुशलेमे ते रोमियां दे हुआले करी दिन्ता गैआ । 18 तिन्हां मिन्जो परखी करी छड्डी दैणां चाया, कजोकि मिन्जो मारणे आळा कोई दोष नी था । 19 अपर जाहू यहूदी इस विरोध च ग्लाणां लग्गे, तां मिन्जो कैसरे दी दुहाई दैणां पैई : एह नी कि मिन्जो अपणेयां लोका पर कोई दोष लगाणा था । 20 इसताई मैं तिज्जो सदेया ऐ कि तिज्जो नैं मिलें कने गल्ल बात करे; कजोकि इस्त्राएल दिया उम्मीदा ताई मैं इसा जंजीरां नैं जकड़ेया ऐ ।" 21 तिन्हां तिस नैं ग्लाया, "ना

अहां जो तेरे बारे च यहूदियां ते चिठियां मिलियां, कने ना भाऊआं च कुणी आई करी तेरे बारे च कुच्छ दस्सेया कने ना बुरा ग्लाया । 22 अपर तेरी सोच क्या ऐ, सैई अहां तिज्जो ते सुणना चाहंदे हन, कजोकि अहां जाणदे हन कि हर जगाह इस मते दे विरोधे च लोक गल्लां करदे हन ।

23 ताहू तिन्हां तिस ताई इक्क दिन रखेया, कने बड़े भारी लोक तिस अल्ल किट्टे होये, कने सैह परमात्में दे राजे दी गवाही दिंदा, कने मूसा दी व्यवस्था कने भविष्यवक्तां दियां कताबां ते यीशु दे बारे च समझाई समझाईकरी भ्यागा ते लैई करी संजा तिकर सणादा रहैआ । 24 ताहू कुच्छना माणुआं तिसदिया गल्ला जो मनी लैआ, कने कुच्छना वसुआस नी किन्ता । 25 जाहू सैह अप्पु च इक्क मत नी होये, तां पौलुसें दिया इसा गल्ला ग्लाणे पर चली गै, "पवित्र आत्मां यशायाह भविष्यवक्तां दे दुआरा तुहां दे पितरां नैं ठीक ई ग्लाया, 26 'जाईकरी इन्हां लोकां नैं ग्ला, कि सुणगे तां रहणां, अपर नी समझणां, कने दिखगे तां रहणां, अपर जाणना नी ऐ;

27 कजोकि इन्हां लोका दा मन मोटा कने तिन्हां दे कनं भारी होई गैयो, कने तिन्हां अपणियां अंखी बंद करी लियां हन, एह नी होये कि सैह कदी अंखी नैं दिखन कने कनां नैं सुणन कने मने नैं समझन कने भिरी, मैं तिन्हां जो खरा करे ।"

28 कने तुहां जाणन कि परमात्में दे इस उद्दारे दी कथा गैर - यहूदियां अल्ल घल्ली ऐ, कने तिन्हां सुणना ।" 29 जाहू तिन्हीं एह ग्लाया तां यहूदी अप्पु च बड़ी बैहस करणां लग्गे कने तित्थु ते चली गै । 30 सैह पूरे दो साल अपणे किराये दे घरे च रहैआ, 31 कने जेहड़े तिस अल्ल ओंदे थे, तिन्हां सबना नैं मिलदा रहैआ कने बिना रोका -टोका बड़ी हिम्मत रखी करी परमात्में दे राजे दा प्रचार करदा कने प्रभु यीशु मसीह दियां गल्लां सखांदा रहैआ ।

रोमियो

भूमिका

रोमियों दे नां पौलुस चले दी पत्री दा मकसद था रोम च कलेसिया दी यात्रा ताई रस्ता तयार करणां, जिसदी योजना पौलुसें बणाई थी। तिसदी योजना थी कि कुछ बग़त तिकर सैह तित्थु दे मसिहियां दे बिच कम्म करें, भिरी तिन्हां दी मददता ते स्पेन तिकर जां। मसीही वसुआस दे अपणे ज्ञान कने मसीहियां दी जिन्दगियां च इसदे व्यावहारिक समावेश जो समझाणे ताई पौलुसें एह चिट्ठी लिखी। इसा कताबा च अहां जो पौलुसे दे संदेश दा सबते पूर्ण विवरण मिलदा ऐ।

रोम दी कलेसिया दे लोकां दा सुआगत करणे कने तिन्हां ताई अपणी प्रार्थनाओं दे बारे च दस्सणे बाद, पौलुस इस चिट्ठी दे मूल विषय दा वखान करदा ऐ : "कजोकि इस च (सुसमाचार च) परमात्में दी धार्मिकता वसुआसे ते कने वसुआसे ताई प्रगट होंदी ऐ" (1: 17) पौलुस गांह इस मूल विषय जो विस्तार ते समझांदा ऐ। पूरी माणु जाति, यहूदी कने अन्यजाति दोयो ई, जो परमात्में सौगी मेल मिलाप करणे दी जरूरत ऐ, कजोकि सारे समान रूप ते पाप दे हक़ च हन। यीशु मसीह च वसुआसे दिया बजाह ते ई लोकां दा परमात्में सौगी मेल मिलाप हुंदा ऐ। भिरी पौलुस मसीह सौगी नौई जिन्दगिया दा वखान करदा ऐ जेहड़ा परमात्में सौगी इस नौये रिश्ते दा परणांम हुंदा ऐ। वसुआसी दा परमात्में सौगी मेल मिलाप हुंदा ऐ कने परमात्मां दा आत्मां पाप कने मौत दे हक़ ते तिसियो अजाद करी दिंदा ऐ। पाठ 5 - 8 च पौलुस वसुआसी दी जिन्दगिया च परमात्में दी व्यवस्था दा मकसद कने परमात्में दे आत्मां दी सामर्थ पर भी विचार विमर्श करदा ऐ। भिरी चले इस सबाल ते जूझदा ऐ कि पूरी माणु जाति ताई परमात्में दी योजना च यहूदी कने गैर - यहूदी किआं ठीक ठीक बँदे हन। सैह इस निष्कर्ष पर पुज्जदा ऐ कि यहूदियां दिया बजाह ते यीशु मसीह जो अस्वकार करणां भी परमात्में दी इसा योजना दा इक़ हिस्सा ऐ जेहड़ी पूरी माणु जाति जो यीशु मसीह च परमात्में दे अनुग्रह दी सीमा च लैयोणे ताई बणाई ऐ, कने तिसदा वसुआस ऐ कि यहूदी सदा यीशु दा मना नी करदे रँहणे। कने मैं पौलुस लिखदा ऐ कि मसीही जिन्दगी किआं जीणी चाइदी, खास कर दूयेयां सौगी प्यार दा रिश्ता रखदे होये। सैह इन्हां खास चीजां जो परमात्में दी सेवा, राज़ कने इक्की दूये दे प्रति मसीहियां दा कम्म, कने विवेक जो सबालां दे रूप च लँदा ऐ। सैह पत्र दा समापन व्यक्ति गत संदेशां कने परमात्में दी स्तुति सौगी करदा ऐ।

रूप-रेखा

भूमिका कने मूल विषय 1: 1- 17

माणु दे उद्धार दी जरूरत 1: 18 --- 3:20

उद्धार दे परमात्में दा रस्ता 3: 21 --- 3: 20

मसीह च नौई जिन्दगी 5: 1 --- 8: 39

परमात्में दी योजना च इस्पाएल 9: 1 --- 11: 36

मसीही आचार - व्यवहार (चाल चलन) 12: 1 --- 15: 13

उपसंहार कने व्यक्तिगत सुआगत 15: 14 --- 16: 27

नमस्कार

- 1 पौलुसे दे पास्से ते जेहड़ा यीशु मसीह दा दास ऐ, कने चेला होणे ताई सदेया, कने परमात्में दे तिस सुसमाचारे ताई लग्ग किता गैआ ऐ,
- 2 जिसदी तिन्हीं पैहले ते ई अपणे भविष्यवक्तां दिया बजाह ते पवित्रशास्त्रे च,
- 3 अपणे पुत्र अहां दे प्रभु यीशु मसीह दे बारे च प्रतिज्ञा किती थी, सैह शरीर दे भाव ते तां दाऊदे दे वंशे ते पैदा होया। 4 कने पवित्रता दी आत्मां दे भाव ते मरेयां च जिंदे होणे दिया बजाह ते सामर्थी सौगी परमात्में दा पुत्र ठेहरया ऐ। 5 तिसदिया बजाह ते अहां जो अनुग्रह कने प्रेरिताई मिली कि तिसदे नांये दिया बजाह ते सारी जातिआं दे लोक वसुआस करी मैं तिसदी मनण,
- 6 जिन्हां च तुहां भी यीशु मसीह दे होणे ताई सदेयो हन।

धन्यावाद दी प्रार्थना

7 तिन्हां सारेयां दे नां जेहड़े रोम च परमात्में दे प्यारे हन कने पवित्र होणे ताई सदेयो हन अहां दे पिता परमात्मां कने प्रभु यीशु मसीह दे पास्से ते तुहां जो अनुग्रह कने शांति मिलदी रँह।

8 पैहले मैं तुहां सारेयां ताई यीशु मसीह दिया बजाह ते अपणे परमात्में दा धन्यावाद करदा, कजोकि तुहां दे वसुआसे दी चर्चा संसारे च होआ दी ऐ।

9 परमात्मां जिसदी सेवा मैं अपणिया आत्मां ते तिसदे पुत्रे दे सुसमाचार दे बारे च करदा, सैई मेरा गवाह ऐ कि मैं तुहां किआं पल्लें पल्लें याद करदा रँहदा, 10 कने हर रोज अपणी प्रार्थनाआं च विणती करदा ऐ कि कुस तरीके मैं हुण तुहां अल्ल ओणे दी मेरी यात्रा परमात्में दी इच्छा ते सफल होयें। 11 कजोकि

मैं तुहां नें मिलणे दी लालसा करदा कि मैं तुहां जो कोई आत्मिक वरदाने दें जिसते तुहां पक़े होई जान; 12 मतलब एह कि जाह्लू मैं तुहां दे बिच होयें तां अहां तिस वसुआसे दिया बजाह ते जेहड़ा मिन्जो च कने तुहां च ऐ, इक्की दूये जो हौंसला दें। 13 हे भाऊओ, मैं नी चाहंदा कि तुहां इसते अनजाण रँहओ कि मैं बार बार तुहां अल्ल ओणा चाया, कि जिआं मिन्जो दूई बरी भी गैर - यहूदियां च फळ मिलेया, तिआं ई तुहां च भी मिले, अपर अल्ली तिकर रोकेया था। 14 मैं यूनानियां कने अन्यभासियां दा, कने अकूमंदा कने वेअक्रेयां दा कर्जदार ऐ। 15 कने मैं तुहां जो भी जेहड़े रोम च रँहदे हन, सुसमाचार सनाणे जो पूरे तयार हन।

सुसमाचार दी सामर्थ

16 कजोकि मैं सुसमाचार ते नी लाजांदा, इसताई कि सैह हर इक़ वसुआस करणे आळ्यां ताई, पैहले तां यहूदी भिरी यूनानियां ताई, उद्धार दे निमित परमात्में दी सामर्थ ऐ। 17 कजोकि तिस च परमात्में दी धर्मिकता वसुआसे ते कने वसुआस ताई प्रकट होंदी ऐ; जिआं लिख्या ऐ, "वसुआसे ते धर्मो जण जिंदा रँहमा।"

माणु जाति दा पाप

18 परमात्में दा गुस्सा तां तिन्हां लोकां दी सारी अभक्ति कने अधर्म पर सुअर्गे ते प्रकट हुंदा ऐ, जेहड़े सच जो अधर्म नें दबाई रखदे हन। 19 इसताई कि परमात्में दे बारे दा ज्ञान तिन्हां मनां च प्रकट ऐ, कजोकि परमात्में तिन्हां पर प्रकट किता ऐ। 20 तिसदे अण दिक्खे गुण, तिसदी सनातन सामर्थ कने

परमात्म, संसारे दी सृष्टि दे बरते ते तिसदे कम्मां दिया बजाह ते दिखणे च ओंदे हन, ऐत्थू तिकर कि सैह माफ करणे आळा ऐ । 21 इसा बजाह ते कि परमात्म जो जाणने पर भी तिन्हां परमात्म जो ग्मी बड़ाई कने धन्यावाद नी कित्ता, अपर बेकार च वचार करणां लगे, ऐत्थू तिकर कि तिन्हां दा वेअक्का मन नैहरा होईया । 22 सैह अपणे आप्पे जो अक्कमंद बणाई नैं मूर्ख बणी गैयो, 23 कने जेदे परमात्म दी महिमा जो नाशवान माणु, कने पछिया, कने चिद्धियां, कने रेंगणे आळे जन्तुआं दी मिलदी जुलदी मूरता च बदली दैआ ।

24 इसा बजाह ते परमात्म तिन्हां जो तिन्हां दे मना दियां इच्छां दे मताबक अशुद्धता ताई छड्डी दिता कि सैह अप्पु च अपणे शरीरां दा अपमान करन । 25 कजोकि तिन्हां परमात्म दी सचाईया जो बदली नैं झूठ बणाई दित्या, कने सृष्टिया दी भक्ति कने सेवा किती, ना कि तिस सृजनहार दी जेहड़ा सदा धन ऐ! आमीन । 26 इसताई परमात्म तुहां जो नीच कामना दे वशे च छड्डी दिता; ऐत्थू तिकर कि तिसदिया जणांसा भी सवाभिक वताव जो तिसते जेहड़ा सभाव दे विरुद्ध ऐ, बदली दिता । 27 तिआं ई मरद भी जणांसा सौगी सवाभिक वताव छड्डी नैं अप्पु च कामातुर होई नैं जळणा लगे, कने मरदां मरदां सौगी साफ कम्म करी नैं अपणे भ्रम दा ठीक फळ पाया ।

28 जाहू तिन्हां परमात्म जो पणछैणना नी चाया, तां परमात्म भी तिन्हां जो तिन्हां दे निक्कमे मना पर छड्डी दिता कि सैह अनुचित कम्म करन । 29 इसताई सैह सारे तरांहे दे अधर्म, कने दुष्टता कने लालच, कने बैरभाव नैं भरौई गै; कने डाह, कने हत्या, कने झगडे, कने छल, कने ईर्ष्या नैं भरपूर होई गै, कने चुगलखोर, 30 बदनाम करणेआळे, परमात्म नैं घृणां करणे आळे, दूयेयां दा अपमान करणे आळे, कम्पंडी, डींगमार, बुरिआं बुरिआं गलां बनाणे आळे, माऊ बुडे दा हुक्म नी मनणे आळे, 31 वेअक्के, वसुआसघाती, मायारहित कने निर्दयी होई गै । 32 सैह तां परमात्म दी एह विधि जाणदे हन कि देहय देहय कम्म करणे आळे मौता दी सजा दे जोगे हन, तमी ना सिर्फ अप्पु ई देहय कम्म करदे हन अपर करणे आळेयां ते खुश भी होंदे हन ।

परमात्म दा न्याय

2 हे दोष लगाणे आळेयो, तू कोई कजो नी होयें, तू माफ करणे आळा ऐ; कजोकि जिसा गलां च तू दूये पर दोष लगांदा ऐ तिसा गलां च अपणे आप्पे जो भी दोषी ठेहरांदा ऐ, इसताई कि तू जेहड़ा दोष लगांदा ऐ अप्पु ई सैह कम्म करदा ऐ । 2 अहां जाणदे हन कि देहय देहय कम्म करणे आळेयां पर परमात्म दे पास्से ते ठीक ठीक सजा दा हुक्म हुंदा ऐ । 3 हे माणु, तू जेहड़ा देहय देहय कम्म करणे आळेयां पर दोष लगांदा ऐ कने अप्पु सैह ई कम्म करदा ऐ; क्या एह समझदा ऐ कि तू परमात्म दिया सजा दे हुक्म ते बची जांगा? 4 क्या तू तिसदी कृपा, कने सहन शीलता, कने धीरजरूपी धन दौलता जो तुच्छ जाणदा ऐ? क्या एह नी समझदा कि परमात्म दी कृपा तिजो मन फिराव जो सखांदा ऐ? 5 अपर तू अपणी कठोरता कने हठीले मन दिया बजाह ते तिसदे गुस्से दे दिन ताई, जिस च परमात्म दा सच्चा न्याय प्रकट हुंगा, अपणे ताई गुस्सा कमा दा ऐ । 6 सैह हर इक्की जो तिसदे कम्मां दे मताबक बदला दिगा; 7 जेहड़े सुकर्म च स्थिर रैई नैं महिमा, कने आदर, कने अमरता दी तोपा च हन, तिन्हां जो सैह सदा दी जिन्दगी दिगा; 8 अपर जेहड़े विवादी हन कने सच जो नी मनदे अपर अधर्म जो मनदे हन, तिन्हां पर गुस्सा कने कोप पोंगा । 9 कने क्लेश कने मुसीबत हर इक्की माणुये दे प्राणा पर जेहड़ा बुरा करदा ऐ तिस पर ओगा, पैहले यहूदिये पर भिरी यूनानिये पर; 10 अपर महिमा कने आदर कने कल्याण हर इक्की जो मिलगा, जेहड़ा खरा करदा ऐ, पैहले यहूदिये जो भिरी यूनानिये जो । 11 कजोकि परमात्मां कुसी दी तरफदारी नी करदा ।

12 इसताई जिन्हां बगैर व्यवस्था पाये पाप किता, सैह बगैर व्यवस्था दे खत्म भी होंगे; कने जिन्हां व्यवस्था पाई नैं पाप किता, तिन्हां दी सजा व्यवस्था दे मताबक होंगी; 13 (कजोकि परमात्म दे ऐत्थू व्यवस्था दे सुणने आळे धर्मी नी, अपर व्यवस्था पर चलणे आळे धर्मी ठेहराये जागे । 14 भिरी जाहू होरनी जाति दे लोक जिन्हां अल्ल व्यवस्था नी, सभाव ते ईई व्यवस्था दी गलां पर चलदे हन, तां व्यवस्था तिन्हां अल्ल नी होंगे पर भी सैह अपणे ताई अप्पु ई व्यवस्था ऐ । 15 सैह व्यवस्था दी गलां अपणे अपणे मने च लिखिया होईयां दस्सदे हन कने तिन्हां दा विवेक भी गवाही दिंदा ऐ, कने तिन्हां दे वचार परस्पर दोष लगांदा या तिन्हां जो बेकसूर ठेहरांदा हन;)

16 जिस दिन परमात्म मेरे सुसमाचारे मताबक यीशु मसीह दिया बजाह ते माणुआं दी गुप्त गलां दा न्याय करगा ।

यहूदी कने व्यवस्था

17 जे तू यहूदी नांये ते जाणयां जांदा ऐ, कने व्यवस्था पर भरोसा रखदा ऐ, कने परमात्म दे बारे च कम्पंड करदा ऐ, 18 कने तिसदी इच्छा जाणदा कने व्यवस्था दी शिक्षा पाई नैं उतम गलां जो प्यारा जाणदा ऐ; 19 कने अपणे पर भरोसा रखदा ऐ कि मैं अन्नेयां दा अगुआ, कने नैहरे च पैआं दी जोती, 20 कने अक्कमंदा जो सखाणे आळा, कने जागतां दा अध्यापक ऐ; कने ज्ञान, कने सच दा नमूना, जेहड़ा व्यवस्था च ऐ, मिन्जो मिलेया ऐ । 21 क्या तू जेहड़ा दूयां जो सखांदा ऐ, अपणे आप्पे जो नी सखांदा? क्या तू जेहड़ा चोरी करदा ऐ? 22 तू जेहड़ा ग्लांदा ऐ, "व्यभिचार ना करणां, "क्या अप्पु ई व्यभिचार करदा ऐ? तू जेहड़ा मूरतां ते नफरत करदा ऐ, क्या अप्पु ई मदरां जो लूटदा ऐ? 23 तू जेहड़ा व्यवस्था दे बारे च कम्पंड करदा ऐ, क्या व्यवस्था नी मनी करी परमात्म दा अपमान करदा ऐ? 24 "कजोकि तुहां दिया बजाह ते गैर - यहूदियां च परमात्म दे नांये दी निंदा किती जांदा ऐ, "जिआं लिख्या भी ऐ ।

25 जे तू व्यवस्था पर चलें तां खतणे ते फायदा तां ऐ, अपर जे तू व्यवस्था जो नी मने तां तेरा खतणां बगैर खतणां दी हालत दस्स । 26 इसताई अगर खतनारहित माणु व्यवस्था दी विधियां जो मना करें, तां क्या तिसदे बिन खतणां दी हालत खतणे दे बराबर नी गिणी जांगी? 27 कने जेहड़ा माणु शारीरक रुपे ते बिन खतणां रैहआ जे सैह व्यवस्था जो पूरा करें, तां क्या तिजो जेहड़ा लेख पाणे कने खतणां किन्ते जाणे पर भी व्यवस्था जो मना नी करदा ऐ, दोषी नी ठेहरांगा? 28 कजोकि यहूदी सैह नी जेहड़ा प्रकट च यहूदी हन; कने ना सैह खतणां ऐ जेहड़ा प्रकट च ऐ कने शरीरे च ऐ । 29 अपर यहूदी सैई ऐ जेहड़ा मने च ऐ; कने खतणां सैई ऐ जेहड़ा दिले दा कने आत्मां च ऐ, ना कि लेखे दा : देहय दी प्रशंशा माणुआं दे पास्से ते नी, अपर परमात्म ते होंदी ऐ ।

3 कने यहूदी दी क्या लड़ाई या खतणे दा क्या फायदा? 2 हर तरांहे ते बड़ा कुच्छ । पैहले तां एह कि परमात्म दे वचन तिन्हां जो सोंपें । 3 जे कुच्छ वसुआसघाती निकले भी तां क्या होया? क्या तिन्हां वसुआसघाती हाणे ते परमात्म दी सचाई बेकार ठेहरदी? 4 कदीभी नी! अपर परमात्मां सच्चा कने हर इक्क माणु झूठा ठेहरे, जिआं लिख्या ऐ,

"जिसते तू अपणियां गलां च धर्मी ठेहरे कने न्याय करदे बग्त तू जय पां ।" 5 इसताई जे अहां दा अधर्म परमात्म दी धार्मिकता ठेहराई दिंदा ऐ, तां अहां क्या ग्लान? क्या एह कि परमात्मां जेहड़ा गुस्सा करदा ऐ अन्यायी ऐ? (एह तां मैं माणु दी रीतिया पर ग्लांदा ऐ) । 6 कदीभी नी! नी तां परमात्म किआं संसारे दा न्याय करगा? 7 जे मेरे झूठ दिया बजाह ते परमात्म दी सचाई तिसदी महिमा ताई, जादा करी नैं प्रकट होई तां भिरी कजो पापियां साइआं मैं सजा दे जोगा ठेहराया जांदा ऐ? 8 "अहां कजो बुराई ना करन कि भलाई निकले?" जिआं अहां पर ऐही दोष लगाया भी जांदा ऐ, कने कुच्छ ग्लांदा हन कि इन्हां दा ऐही गलां ऐ । अपर देहयां दा दोषी ठेहराणा ठीक ऐ ।

कोई धर्मी नी

9 तां भिरी क्या होया? क्या अहां तिन्हां ते खरे हन? कदी नी; कजोकि अहां यहूदियां कने यूनानियां दूनी पर एह दोष लगाई चुके हन कि सैह सारे दे सारे पापे दे वशे च ऐ । 10 जिआं लिख्या ऐ :

"कोई धर्मी नी, इक्क भी नी ।

11 कोई समझदार नी; कोई परमात्म जो तोपणे आळा नी ।

12 सारे भटकी गै हन, सारे दे सारे निक्कमे बणी गैयो हन ; कोई भलाई करणे आळा नी, इक्क भी नी ।

13 तिन्हां दा गळा खुलियो कन्न ऐ, तिन्हां अपणियां जीभां ते छल किता ऐ, तिन्हां दे लबड़ा पर सरपां दा जैहर ऐ ।

14 तिन्हां दा मुँ श्रापे कने कड़वाहटा नैं भरौया ऐ ।

15 तिन्हां दे पैर खून बहाणे जो फुर्तीले हन ,

16 तिन्हां दे रस्तेया च नाश कने सताव ऐ,

17 तिन्हां कुशल दा रस्ता नी जाणेया ।

18 तिन्हां दियां अंखी दे सामणे परमात्म दा डर नी ।"

19 अहां जाणदे हन कि व्यवस्था जेहड़ा कुच्छ ग्लांदी ऐ तिन्हां नें ग्लांदी ऐ, जेहड़ा व्यवस्था दे अधीन ऐ; इसताई कि हर इक्क मुँ बंद कित्ता जां कने सारा संसार परमात्में दिया सज्जा दे जोग्गा ठेहरें; 20 कजोकि व्यवस्था दे कम्मां ते कोई माणु तिस सामणे धर्मी नी ठेहरगा, इसताई कि व्यवस्था दिया बजाह ते पापे दी पणछेण होदी ऐ ।

वसुआसे दिया बजाह ते धार्मिकता

21 अपर हुण व्यवस्था ते लग्न परमात्में दी सैह धार्मिकता प्रकट होई ऐ, जिसदी गवाही व्यवस्था कने भविष्यवक्ता दिंदे हन, 22 जे परमात्में दी सैह धार्मिकता जेहड़ा यीशु मसीह पर वसुआस करणे ते सारे वसुआस करणे आळ्यां ताई ऐ । कजोकि कुच्छ भेद नी; 23 इसताई कि सारेयां पाप कित्या ऐ कने परमात्में दी महिमा ते रहित हन, 24 अपर तिसदे अनुग्रह ते तिस छुटकारे दिया बजाह ते जेहड़ा मसीह यीशु च ऐ, मुफते च धर्मी ठेहराये जांदे हन । 25 तिसियो परमात्में तिसदे खून दिया बजाह ते इक्क देहया प्रायश्चित ठेहराया, जेहड़ा वसुआस करणे ते कार्यकारी हुंदा ऐ, कि जेहड़ा पाप पैहले कित्ते गै कने जिन्हां पर परमात्में अपणी सेहणशीलता दिया बजाह ते ध्यान दित्ता । तिन्हां दे बारे च सैह अपणी धार्मिकता प्रकट करन । 26 अपर इसी बग्त तिसदी धार्मिकता प्रकट होयें कि जिसते सैह अप्पु ई धर्मी ठेहरन, कने जेहड़ा यीशु पर वसुआस करे तिसदा भी धर्मी ठेहराणे आळा होयें । 27 तां कमंड करणां कुत्थू रैहूआ? तिसदी तां जगाह ई नी । कुण देहई व्यवस्था दिया बजाह ते? क्या कर्मा दी व्यवस्था ते? नी, अपर वसुआसे दिया व्यवस्था दिया बजाह ते । 28 इसताई अहां इस नतीजे पर पुज्जदे हन कि माणु व्यवस्था दे कम्मां ते लग्न ई, वसुआसे दिया बजाह ते धर्मी ठेहरांदा ऐ । 29 क्या परमात्में सिर्फ यहूदियां दा ई ऐ? क्या गैर - यहूदियां दा नी? हाँ, गैर - यहूदियां दा भी ऐ । 30 कजोकि इक्को ई परमात्मां ऐ, जेहड़ा खतणां आळ्यां जो वसुआसे ते कने खतणांरहितां जो भी वसुआसे दिया बजाह ते धर्मी ठेहरांदा । 31 तां क्या व्यवस्था जो वसुआसे दिया बजाह ते बेकार ठेहरांदे हन : कदीभी नी ! अपर व्यवस्था जो पक्का करदे हन ।

अब्राहमे दा उदारण

4 इसताई अहां क्या ग्लान अहां दे शारीरिक पिता अब्राहम जो क्या मिलेया? 2 कजोकि जे अब्राहम कम्मां ते धर्मी ठेहराया जांदा, तां तिसियो कमंड करणे दी जगाह होदी, अपर परमात्में नैडे नी । 3 पवित्रशास्त्र क्या ग्लांदा ऐ? एह कि “अब्राहमं परमात्में पर वसुआस कित्ता, कने एह तिस ताई धार्मिकता गिणां गैआ । 4 कम्म करणे आळे दी दिहाडी दैणां दान नी, अपर हक्क समझा जांदा ऐ । 5 अपर जेहड़ा कम्म नी करदा अपर भक्तिहीन दे धर्मी ठेहराणे आळे पर वसुआस करदा ऐ, तिसदा वसुआस तिस ताई धार्मिकता गिणां जांदा ऐ । 6 जिसियो वसुआस बिणा कर्मा दे धर्मी ठेहराया ऐ, तिसियो दाऊद भी धन ग्लांदा ऐ, 7 “धन ऐ सैह जिन्हां अधर्म माफ होये, कने जिन्हां दे पाप ढके गै । 8 धन ऐ सैह माणु जिसियो परमात्में पापी नी ठेहराये ।”

9 तां एह धन वचन, क्या खतणां आळ्यां ई ताई ऐ या खतणांरहितां ताई भी? अहां एह ग्लांदा हन, “अब्राहम ताई तिसदा वसुआस धार्मिकता गिणां गैआ ।” 10 तां सैह किआं गिणां गैआ? खतणे दी हालता च या बगैर खतणे दी हालता च? खतणे दी हालता च नी अपर बगैर खतणे दी हालता च । 11 तिन्हीं खतणे दा नशाण पाया कि तिस वसुआसे दी धार्मिकता पर छाप होई जां जेहड़ा तिन्हीं बगैर खतणे दी हालता च रखेया था, जिसते सैह तिन्हां सारे दा पिता ठेहरे जेहड़े बगैर खतणे दी हालता च वसुआस करदे हन तांकि सैह भी धर्मी ठेहरन; 12 कने तिन्हां खतणां कित्ते होये हन, अपर अहां दे पिता अब्राहम दे तिस वसुआसे दी लीका पर भी चलदे हन जेहड़ा तिन्हां बगैर खतणे दी हालता च कित्या था । कने तिन्हां खतणां कित्ते होये हन, अपर अहां दे पिता अब्राहम दे तिस वसुआसे दी लीका पर भी चलदे हन, जेहड़ा तिन्हीं बगैर खतणे दी हालता च कित्या था ।

वसुआसे दिया बजाह ते प्रतिज्ञा दा मिलणां

13 कजोकि एह प्रतिज्ञा कि सैह संसारे दा वारस हुंगा । ना अब्राहम जो ना तिसदे वंशे जो व्यवस्था दिया बजाह ते दित्ती गैई थी, अपर वसुआसे दी

धार्मिकता दिया बजाह ते मिली । 14 कजोकि जे व्यवस्था आळे वारस हन, तां वसुआस बेकार कने प्रतिज्ञा बेकार ठेहरी । 15 व्यवस्था तां गुस्सा पैदा करदी ऐ, कने जित्थू व्यवस्था नी औत्थू तिसदी रोक टोक भी नी ।

16 इसा बजाह ते प्रतिज्ञा वसुआसे पर आधारित ऐ कि अनुग्रह दी रीति पर होयें । कि सैह तिसदे सारे वंशजा ताई पक्के होन, ना कि सिर्फ तिस ताई व्यवस्था आळा ऐ अपर तिस ताई भी जेहड़ा अब्राहमे साइआं वसुआसे आळे हन; सैई तां अहां सारेयां दा पिता ऐ, 17 जिआं लिख्या ऐ, “मैई तिजो मतिआं जातिआं दा पिता ठेहराया ऐ” तिस परमात्में सामणे जिस पर तिन्हीं वसुआस कित्ता, कने जेहड़ा मरेयां जो जिंदा करदा ऐ, कने जेहिडयां गल्लां हन ई नी तिन्हां दा नां देहया लेंदा ऐ कि मना सैह ऐ । 18 तिन्हीं निराशा च भी आशा रखी नें वसुआस कित्ता, इसताई कि तिस वचने दे मलाबक कि “तेरा वंश देहया हुंगा,” सैह मतिआं जातिआं दा पिता होयें । 19 सैह जेहड़ा सौं साले दा था, अपणे मरेयो शरीर ते कने सारा दे गर्भ मरियो देहई हालत जाणी नें भी वसुआसे च कमजोर नी होया, 20 कने ना वेवसुआसी होई नें परमात्में दी प्रतिज्ञा पर शक कित्ता, अपर वसुआसे च पक्के होई नें परमात्में दी महिमा कित्ती, 21 कने पक्का जाणां कि जिस गल्ल दी तिन्हीं प्रतिज्ञा दित्ती ऐ, सैह तिसियो पूरा करणे च भी सामर्थी ऐ । 22 इसा बजाह ते एह तिस ताई धार्मिकता गिणां गैआ । 23 कने एह वचन, “वसुआस तिस ताई धार्मिकता गिणां गैआ,” ना सिर्फ तिस ताई लिख्या, 24 अपर अहां ताई भी जिन्हां ताई वसुआस धार्मिकता गिणां जांगा, अपर अहां ताई जेहड़े तिस पर वसुआस करदे हन जिन्हां च अहां दे प्रभु यीशु जो मरेयां च जिंदा कित्या । 25 सैह अहां दे अपराधां ताई पकडुआया, कने अहां दे धर्मी ठेहरणे ताई जिंदा कित्या भी गैआ ।

परमात्में नें मेल

5 जाहू अहां वसुआस ते धर्मी ठेहरन, तां अपणे प्रभु यीशु मसीह दिया बजाह ते परमात्में सौगी मेल रखन, 2 जिसदिया बजाह ते वसुआसे दिया बजाह ते तिस अनुग्रह तिकर जिस च अहां बणेयां हन, म्हारी पाँच भी होई, कने परमात्में दी महिमा दी आशा पर कमंड करे । 3 सिर्फ ऐही नी, अपर अहां सतावां च भी कमंड करन, एह जाणी नें कि सताव ते धीरज, 4 कने धीरज ते खरा निकलणा, कने खरे निकलणे ते आशा पैदा होंदी ऐ; 5 कने आशा ते सर्मा नी होंदी, कजोकि पवित्र आत्मां जेहड़ा अहां जो दित्या ऐ तिसदिया बजाह ते परमात्में दा प्यार अहां दे मने च पाया ऐ ।

6 कजोकि जाहू अहां कमजोर थे, तां मसीह ठीक बगते पर भक्तिहीनां ताई मरेया । 7 कुसी धर्मी माणु ताई कोई मरे, एह तां अजीब गल्ल ऐ; अपर होई सकदा ऐ कुसी खरे माणुये ताई कोई मरणे दी भी हिम्मत करे । 8 अपर परमात्में अहां पर अपणे प्यार दी भलाई इस तरीके नें प्रकट करदा ऐ कि जाहू अहां पापी थे तमी मसीह अहां ताई मरेया । 9 जाहू कि हुण तिसदे खून दिया बजाह ते धर्मी ठेहरे, तां तिसदिया बजाह ते परमात्में दे गुस्से ते कजो नी बचगे? 10 कजोकि बैरी होणे दी हालता च तिसदे पुत्रे दिया मौता दिया बजाह ते अहां दा मेल परमात्में सौगी होया, तां भिरी मेल होई जाणे पर तिसदिया जिन्दगिया दिया बजाह ते अहां उद्धार कजो नी पांगे? 11 सिर्फ ऐही नी, अपर अहां अपणे प्रभु यीशु मसीह दिया बजाह ते, जिसदिया बजाह ते अहां दा मेल होया ऐ, परमात्में च खुश होंदे हन ।

आदमे दिया बजाह ते मौत - मसीह दिया बजाह ते जिन्दगी

12 इसताई जिआं इक्की माणुये दिया बजाह ते पाप संसारे च आया, कने पापे ते मौत आई, कने इस तरीके नें मौत सारे माणुआं च फैली गैई, कजोकि सारेयां पाप कित्ता । 13 व्यवस्था दे दित्ते जाणे तिकर पाप संसार च तां था, अपर जित्थू व्यवस्था नी औत्थू पाप गिणा नी जांदा । 14 आदमे ते लेई नें मूसा तिकर मौता तिन्हां सबना लोकां पर भी राज कित्ता, मौत तिन्हां पर भी हावी जिन्हां पाप नी कितेया था जिआं आदमे पर, आदम भी तिआं ई था जिआं सैह जेहड़ा ओणे आळा था, ।

15 अपर जिदेयी अपराध दी हालत ऐ, तिदेयी अनुग्रह दे वरदान दी नी, कजोकि जाहू इक्की माणुये दे अपराधे ते मत्ते लोक मरे, तां परमात्में दा अनुग्रह कने तिसदा जेहड़ा दान इक्की माणुये दे, मतलब यीशु मसीह दे अनुग्रह ते होया मतेआं लोकां पर जरूर अधिकाईया नें होया । 16 जिआं इक्की

माणुये दे पाप करणे दा फळ होया, तिआं ई दाने दी हालत नी, कजोकि इक्की दिया बजाह ते सजा दा हुक्मे दा फैसला होया, अपर मतेआं अपराधां दिया बजाह ते देहया वरदान पैदा होया कि लोक धर्मी ठेहरे । 17 कजोकि जाहू इक्की माणुये दे अपराधे दिया बजाह ते मौता तिस इक्की दिया बजाह ते राज़ किता, तां जेहडे लोक अनुग्रह कने धर्मरूपी वरदान मता सारा पां दे हन सैह इक्की माणुये दे, मतलब यीशु मसीह दिया बजाह ते जरूर सदा दी जिन्दगिया च राज़ करणे ।

18 इसताई जिआं इक्क अपराध सारेयां माणुआं ताई सजा दे हुक्मे दी बजाह ते होया, तिआं ई इक्क धर्मे दा कम्म भी सारेयां माणुआं ताई जिन्दगिया दे निमित्त धर्मी ठहराये जाणे दी बजाह होया । 19 कजोकि जिआं इक्की माणुये दे हुक्म ना मनणे ते मत्ते लोक पापी ठेहरे, तिआं ई इक्की माणुये दे हुक्म मनणे ते मत्ते लोक धर्मी ठेहरे । 20 व्यवस्था बिच आई गैई कि अपराध मत्ते हन, अपर जित्थू पाप जादा होया तित्थू अनुग्रह इसते भी बड़ा जादा होया, 21 कि जिआं पापें मौत फैलां दे फैलां दे राज़ किता, तिआं ई अहां दे प्रभु यीशु मसीह दिया बजाह ते अनुग्रह भी सदा दी जिन्दगिया ताई ठेहरां दे होये राज़ करें ।

पापे ताई मृतक : मसीह च जिंदे

6 तां अहां क्या ग्लान? क्या अहां पाप करदे रैह कि अनुग्रह मता होयें? 2 कदीभी नी! अहां जाहू पाप ताई मरी गै तां भिरी गांह जो तिस च किआं जिन्दगी कटये? 3 क्या तुहां नी जाणदे कि अहां सारेयां जिन्हां मसीह यीशु दा बपतिस्मा लैआ, तिसदिया मौता दा बपतिस्मा लैआ । 4 कने तिसा मौता दा बपतिस्मा पाणे ते अहां तिस सौगी दबूयो, तांकि जिआं मसीह पिता दी महिमा दिया बजाह ते मरेयां ते जिंदा होईया, तिआं ई अहां भी नौईयां जिन्दगिया दी चाल चलन ।

5 कजोकि जाहू अहां तिसदी मौता दी समानता च तिस सौगी रैह, तां पक्का तिसदे जिंदे होणे दी समानता च भी रैहणे । 6 अहां जाणदे हन कि अहां दा पराणा माणु दा रूप तिस सौगी सुलिया पर टूंगया तांकि पाप दा शरीर बेकार होई जां, कने अहां गांह जो पापे दे दासे दे रूपे च नी रैह । 7 कजोकि जेहड़ा मरिया, सैह पापे ते छूटी नै धर्मी ठेहरया । 8 इसताई जे अहां मसीह सौगी मरिये, तां अहां दा वसुआस एह ऐ कि तिस सौगी जींगे भी । 9 कजोकि एह जाणदे हन कि मसीह मरेयां ते जिंदा होई नै भिरी मरगा नी; तिस पर भिरी मौत दी प्रभुता नी होंगी । 10 कजोकि सैह जेहड़ा मरिया तां पापे ताई इक्क बरी मरिया; अपर जेहड़ा जिंदा ऐ तां परमात्में ताई जिंदा ऐ । 11 इआं ई तुहां भी अप्पु जो पापे ताई तां मारा; अपर परमात्में ताई मसीह यीशु च जिंदा ऐ समझा । 12 इसताई पाप तुहां नाशवान शरीरे च राज़ ना करे, कि तुहां तिसदियां इच्छां दे अधीन रैहआ; 13 कने ना अपणे अंगा जो अधर्म दे हत्थयार होणे ताई पाप जो सौपा, अपर अप्पु जो मरेयां ते जिंदा होया जाणी नै परमात्में यों सौपा, कने अपणे अंगा जो धर्म दे हत्थयार होणे ताई परमात्में जो सौपा । 14 ताहू तुहां पर पाप दी प्रभुता नी होंगी, कजोकि तुहां व्यवस्था दे अधीन नी अपर अनुग्रह दे अधीन हन ।

धार्मिकता दे दास

15 तां क्या होया? क्या अहां इसताई पाप करन कि अहां व्यवस्था दे अधीन हन? कदीभी नी! 16 क्या तुहां नी जाणदे कि जिस दा हुक्म मनणे ताई तुहां अप्पु जो दासां साइआं सौपी दिंदे हन तिसदे दास हन चाये पापे दे, जिसदा अन्त मौत ऐ, चाये आज्ञाकारिता दे, जिसदा अन्त धार्मिकता ऐ? 17 अपर परमात्में दा धन्यावाद हो कि तुहां जेहड़ा पापे दे दास थे हुण मने ते तिसा शिक्षा जो मनणे आळे होई गै, जिसदे सांचे च ढालेयो थे, 18 कने तुहां जो पापां ते छुटकारा मिली गैआ कने तुहां धार्मिकता दे दास बणी गैयो हन । 19 मैं तुहां दिया शारिरीक कमजोरिया दिया बजाह ते माणुआं दी रीतिया पर ग्लांदा । जिआं तुहां अपणे अंगा जो कुकर्म ताई अशुद्धता कने कुकर्म दे दास बणाई नै सौपया था, तिआं ई हुण अपणे अंगा जो पवित्रता ताई धार्मिकता दे दास बणाई नै सौपी देया ।

20 जाहू तुहां पापे दे दास थे, तां धार्मिकता दे पाससे ते अजाद थे । 21 कने जिन्हां ग्लां ते हुण तुहां शर्मिंदा होंदे हन, तिन्हां ते तिस बत तुहां क्या फळ पां दे थे? कजोकि इन्हां दा अन्त तां मौत ऐ । 22 अपर हुण पापे ते अजाद होई नै कने परमात्में दे दास बणी नै तुहां जो फळ मिलेया जिसते पवित्रता हासल

होंदी ऐ: कने तिसदा अन्त सदा दी जिन्दगी ऐ । 23 कजोकि पापे दी दिहाड़ी तां मौत ऐ, अपर परमात्में दा वरदान अहां दे प्रभु मसीह यीशु च सदा दी जिन्दगी ऐ ।

शादीशुदा जिन्दगी दा उदारण

7 हे भाऊओ, क्या तुहां नी जाणदे मैं व्यवस्था दे जाणने आळ्यां नै ग्लांदा कि जाहू तिकर माणु जिंदा रैहदा ऐ, ताहू तिकर तिस पर व्यवस्था दी प्रभुता रैहदी ऐ? 2 कजोकि व्याई जणांस व्यवस्था दे मताबक अपणे लाडे दे जीते जी तिस नै बनूई ऐ, अपर जे लाड़ा मरी जां, तां सैह लाडे दी व्यवस्था ते छूटी गैई । 3 इसताई जे लाडे दे जीते जी सैह कुसी दूये मरद दी होई जां, तां व्यभिचारिणी केहलांगी, अपर जे लाड़ा मरी जा, तां सैह तिसा व्यवस्था ते छूटी गैई, ऐत्थू तिकर कि जे कुसी दूये मरद दी होई जां तमी व्यभिचारिणी नी होंगी । 4 तिआं ई हे मेरे भाऊओ, तुहां भी मसीह दी शरीरे दिया बजाह ते व्यवस्था ताई मरे होये बणी गैयो, कि तिस दूये दे होई जा, जेहड़ा मरेयां ते जिंदा होईया, तांकि अहां परमात्में ताई फळ लैयोन । 5 कजोकि जाहू अहां शारीरिक थे, तां पापां दियां इच्छां जेहिडयां व्यवस्था दिया बजाह ते थियां, मौत दा फळ पैदा करणे ताई अहां दे अंगा च कम्म करदी थी । 6 अपर जिसदे बंधने च अहां थे तिस ताई मरी नै, हुण व्यवस्था ते इआं छूटी गै, कि लेख दी पराणी रीतिया पर नी, अपर आत्मा दी नौई रीतिया पर सेवा करदे हन ।

व्यवस्था कने पाप

7 तां अहां क्या ग्लान? क्या व्यवस्था पाप ऐ? कदीभी नी! अपर बगैर व्यवस्था दे मैं पापे जो नी पणछेणदा : व्यवस्था जे नी ग्लांदा, कि लालच मत करा तां मैं लालचे जो नी जाणदा । 8 अपर पापें मौका पाई नै हुक्मे दिया बजाह ते मिन्जो च सब तरांह दा लालच पैदा कित्या, कजोकि बगैर व्यवस्था पाप मुर्दा ऐ । 9 मैं तां व्यवस्था बगैर पैहले जिंदा था, अपर जाहू हुक्म आया, तां पाप जी गैआ, कने मैं मरी गैआ । 10 कने सैई हुक्म जेहड़ा जिन्दगिया ताई था, मेरे ताई मौता दी बजाह ठेहरया । 11 कजोकि पापें मौका पाई नै हुक्मे दिया बजाह ते मिन्जो बेहकाया, कने तिसदिया बजाह ते मिन्जो मारी भी दिता ।

12 इसताई व्यवस्था पवित्र ऐ, कने हुक्म भी ठीक कने खरा ऐ । 13 तां क्या सैह जेहड़ा खरा था, मेरे ताई मौत ठेहरी? कदीभी नी! अपर पाप तिसा छैल चीजां दियां बजाह ते मेरे ताई मौत पैदा करणे आळा होया कि तिसदा पाप हाणां प्रकट होयें, कने हुक्म दिया बजाह ते पाप बड़ा ई पापमय ठेहरया ।

माणुये दा अन्तर्द्वन्द्व

14 अहां जाणदे हन कि व्यवस्था तां आत्मिक ऐ, अपर मैं शारीरिक कने पापे दे हत्थ बिकेया होया ऐ । 15 जेहड़ा मैं करदा तिसियो नी जाणदा; कजोकि जेहड़ा मैं चाहंदा सैह नी करा करदा, अपर जिसते मिन्जो गुस्सा हुंदा ऐ सैई करदा ऐ । 16 जे जेहड़ा मैं नी चाहंदा सैई करदा ऐ, तां मैं मनी लैंदा कि व्यवस्था खरी ऐ । 17 तां ऐदेई हालता च तिसदा करणे आळा मैं नी, अपर पाप ऐ जेहड़ा मिन्जो च बसेया ऐ । 18 कजोकि मैं जाणदा कि मिन्जो च मतलब मेरे शरीर च कोई छैल चीज बास नी करदी । इच्छा तां मिन्जो च ऐ, अपर खरे कम्म मिन्जो ते बणी नी पोंदे । 19 कजोकि जिस खरे कम्म दी मैं इच्छा करदा, सैह तां नी करदा, अपर जिसा बुराईया दी इच्छा नी करदा, सैही करा करदा ऐ । 20 कने जे मैं सैई करदा जिसदी इच्छा नी करदा, तां तिसदा करणे आळा मैं नी रैहआ, अपर पाप जेहड़ा मिन्जो च बसेया ऐ ।

21 इआं ई मैं एह व्यवस्था पांदा कि जाहू भलाई करणे दी इच्छा करदा, तां बुराई मेरे अल्ल ओंदी ऐ । 22 कजोकि मैं अंदरूनी माणुत्व ते तां परमात्में दिया व्यवस्था ते बड़ा खुश रैहदा । 23 अपर मिन्जो अपणे अंगा च दूये तरांह दी व्यवस्था दुस्सदी ऐ, जेहड़ी मेरी अक्का दिया व्यवस्था नै लडदी ऐ कने मिन्जो पाप दी व्यवस्था दे बंधने च पांटी ऐ जेहड़ी मेरे अंगा च ऐ । 24 मैं किआं अभागा माणु ऐ ! मिन्जो इसा मौता दिया देहा ते कुण छड़ांगा? 25 मैं अपणे प्रभु यीशु मसीह दिया बजाह ते परमात्में दा धन्यावाद करदा; इसताई मैं अप्पु अक्का नै पाप दी व्यवस्था दा, अपर शरीरे ते पापे दी व्यवस्था दा सेवन करदा ऐ ।

पवित्र आत्मां दिया बजाह ते जिन्दगी

8 हुण जेहड़ा मसीह यीशु च ऐ, तिन्हां पर सज़ा दा हुक्म नी । [कजोकि सैह शरीरे मताबक नी अपर आत्मां मताबक चलदे हन ।] 2 कजोकि जिन्दगी दी आत्मां दी व्यवस्था नै मसीह यीशु च मिन्जो पापे दी कने मौता दी व्यवस्था ते अजाद करी दिता । 3 कजोकि जेहड़ा कम्म व्यवस्था शरीरे दिया बजाह ते कमजोर होई नै नी करी सकेया, तिस जो परमात्मं किन्ता, मतलब अपने ई पुत्रे जो पापमय शरीरे दी समानता च कने पापबलि होणे ताई घल्ली नै, शरीरे च पापे पर सज़ा दा हुक्म दिता । 4 इसताई कि व्यवस्था दी विधि अहां च जेहड़ा शरीरे मताबक नी अपर आत्मां मताबक चलदा ऐ, पूरी किन्ती जां । 5 कजोकि शारीरिक माणु शरीर दी गल्लां पर मन लगांदे हन; अपर आध्यत्मिक आत्मां दी गल्लां पर मन लगांदे हन । 6 शरीर पर मन लगाणा तां मौत ऐ, अपर आत्मां पर मन लगाणा जिन्दगी कने शांति ऐ; 7 कजोकि शरीरे पर मन लगाणा तां परमात्मं नै बैर रखणां ऐ, कजोकि ना तां परमात्मं दिया व्यवस्था दे अधीन हन कने नी होई सकदा ऐ; 8 कने जेहड़ा शारीरिक हालता च ऐ, सैह परमात्मं जो खुश नी करी सकदे ।

9 अपर जाहू कि परमात्मं दा आत्मां तुहां च बसदा ऐ, तां तुहां शारीरिक हालता च नी अपर आत्मिक हालता च हन। जे कुसी च मसीह दा आत्मां नी तां सैह तिसदा जण नी । 10 जे मसीह तुहां च ऐ, तां देह पापे दिया बजाह ते मरियो ऐ; अपर आत्मां धार्मिकता दिया बजाह ते जिंदा ऐ । 11 जे तिस दा आत्मां जिन्हीं यीशु जो मरेयां च जिंदा कित्या, तुहां च बसेया ऐ; तां जिन्हीं मसीह जो मरेयां च जिंदा कित्या, सैह तुहां दी नश्वर देहां जो भी अपनी आत्मां दिया बजाह ते जेहड़ा तुहां च बसेया ऐ, जिंदा करगा ।

12 इसताई हे भाऊओ, अहां शरीर दे कर्जदार नी कि शरीरे दे मताबक दिन कटन, 13 कजोकि जे तुहां शरीर दे मताबक दिन कटणे तां मरगे; जे आत्मां ते देह दियां इच्छां जो मारगे तां जिंदा रँहगे । 14 इसताई कि जितणे लोक परमात्मं दिया आत्मां दे चलाये चलदे हन, सैह ई परमात्मं दे पुत्र हन । 15 कजोकि तुहां जो दासत्व दी आत्मां नी मिली कि भिरी डरेयो हन, अपर लेपालकपन दी आत्मां मिलियो ऐ, जिसते अहां हे अब्बा, हे पिता ग्लाई नै पुकारदे हन । 16 आत्मां अप्पु ई म्हारी आत्मां सौगी गवाही दिंदा ऐ, कि अहां परमात्मं दी औलाद हन; 17 कने जे औलाद ऐ तां वारस भी, अपर परमात्मं दे वारस कने मसीह दे संगी वारस हन, कि जाहू अहां तिस सौगी दुख उठान तां तिस सौगी महिमा पान,

भविष्य च प्रकट होणे आळी महिमा

18 कजोकि मैं समझदा कि इस बगते दे दुख कने क्लेश तिसा महिमा दे सामणे, जेहड़ा अहां पर प्रकट होणे आळी ऐ, कुच्छ भी नी ऐ । 19 कजोकि सृष्टि बड़ी आशाभरी नजरं नै परमात्मं दे पुत्रा दे प्रकट होणे दे इंतजार च हन । 20 कजोकि सृष्टि अपनी इच्छा ते नी अपर अधीन करणे आळे दे पाससे ते, व्यवस्था दे अधीन इसा आशा नै दिन्ती गैई, 21 कि सृष्टि भी अप्पु ई विनाश दे दासत्व ते छूटकारा पाई नै, परमात्मं दी औलादा दी महिमा दी अजादी हासल करणी । 22 कजोकि अहां जाणदे हन कि सारी सृष्टि अली तिकर मिली नै केहरां दी कने पीड़ां च पैइयो तडफदी ऐ; 23 कने केवल सैई नी अपर अहां भी जिन्हां अल्ल आत्मां दा पैहला फळ ऐ, अप्पु ई अपने च केहरां दे हन; कने लेपालक होणे दी, अपर अपने शरीरे दे छूटकारे दा इंतजार करदे हन । 24 इसा उम्मीदा सौगी अहां दा उद्धार होया ऐ; अपर जिस चीज़ा दी उम्मीद किन्ती जांदी ऐ, जाहलू सैह दिखणे च ओंये तां भिरी उम्मीद कुत्थू रैई? कजोकि जिस चीज़ा जो कोई दिखा दा ऐ तिसा दी उम्मीद क्या करणी? 25 अपर जिसा चीज़ा जो अहां नी दिखदे, जे तिसा दी आशा रखदे हन, तां धीरज नै तिसदा इंतजार भी करदे हन ।

26 इसी तरीके नै आत्मां भी म्हारी कमजोरिया च मदद करदा ऐ : कजोकि अहां नी जाणदे कि प्रार्थना कुस तरीके नै करणां चाइदी, अपर आत्मां अप्पु ई ऐदेई आहें भरी भरी नै, जेहड़ा बयाने ते बाहर ऐ, अहां ताई विणती करदा ऐ; 27 कने दिलां जो जाचणे आळा जाणदा ऐ कि आत्मां दी मनसा क्या ऐ? कजोकि सैह पवित्र लोकां ताई परमात्मं दी इच्छा दे मताबक विणती करदा ऐ ।

28 अहां जाणदे हन कि जेहड़े लोक परमात्मं नै प्यार रखदे हन, तिन्हां ताई सारियां गल्लां मिली नै भलाई ई पैदा करदे हन; मतलब तिन्हां ई ताई जेहड़े तिसदिया इच्छा दे मताबक सदेयो हन । 29 कजोकि जिन्हां जो तिन्हीं पैहले ते जाणी लैआ ऐ तिन्हां जो पैहले ते ठेहराया भी ऐ कि तिसदे पुत्रे दे स्वरूप च हन, तांकि सैह मत्ते भाईयां च पैहलौठा ठेहरें । 30 भिरी जिन्हां जो तिन्हीं पैहले ते ठेहराया तिन्हां जो सदेया भी; कने जिन्हां जो धर्मी ठेहराया, तिन्हां जो महिमा भी दिन्ती ऐ ।

परमात्मं दा प्यार

31 कने अहां इन्हां गल्लां दे बारे च क्या ग्लान? जे परमात्मां अहां दे पाससे ऐ, तां अहां दा विरोधी कुण होई सकदा ऐ? 32 जिन्हीं अपने सक्के पुत्रे जो भी नी रक्खी छडेया, अपर तिसियो अहां सारेयां ताई दैई दिता, सैह तिस सौगी अहां जो कने सब कुच्छ कजो नी दिंगा? 33 परमात्मं दे चुणेयां पर दोष कुण लगांगा? परमात्मां ई ऐ जेहड़ा तिन्हां जो धर्मी ठेहराणे आळा ऐ । 34 भिरी कुण ऐ जेहड़ा सज़ा दा हुक्म दिंगा? मसीह ई ऐ जेहड़ा मरी गैआ अपर मुड़देयां ते जिंदा भी होइया, कने परमात्मं दे सज़े बक्खे ऐ, कने अहां ताई मिनतां भी करदा ऐ । 35 कुण अहां जो मसीह दे प्यारे ते लग्न करगा? क्या क्लेश, या मुसीबत, या उपद्रव, या अकाल, या नंगाई, या जोखिम, या तलवार?

36 जिआं लिख्या ऐ, “तिजो ताई अहां दिन भर खून करदे जांदे हन; अहां बध होणे आळी भेडां साइआं गिणेयो हन ।”

37 अपर इन्हां सारियां गल्लां च अहां तिसदिया बजाह ते जिन्हीं अहां नै प्यार कित्या ऐ, जयवंत ते भी बधी नै ऐ । 38 कजोकि मैं पक्का जाणदा कि ना मौत, ना जिन्दगी, ना सुअर्गदूत, ना प्रार्थनाये, ना वर्तमान, ना भविष्य, ना सामर्थ, ना उंचाई, 39 ना गेहराई कने ना कोई होर सृष्टि अहां जो परमात्मं दे प्यारे ते जेहड़ा अहां दे प्रभु मसीह यीशु च ऐ, लग्न करी सकगी ।

परमात्मं दे कने तिसदे चुणेयो लोक

9 मैं मसीह च सच ग्लांदा, मैं झूठ नी ग्ला दा कने मेरा विवेक भी पवित्र आत्मां च गवाही दिंदा ऐ । 2 कि मिन्जो बड़ा शोक ऐ, कने मेरा मन सदा दुखी रँहदा ऐ, 3 कजोकि मैं ऐत्थू तिकर चाहंदा था कि अपने भाऊआं ताई जेहड़ा शरीरे दे भाव ते मेरे रिश्तेदार हन, अप्पु ई मसीह शापित होई जांदा । 4 सैह इस्त्राएली ऐ, कने लेपालकपन दा हक्क कने महिमा कने वायदे कने व्यवस्था कने भक्तियां कने प्रतिज्ञायें तिन्हां दियां हन । 5 पुरखे भी तिन्हां ई हन, कने मसीह बिन शरीर दे भाव ते तिन्हां ई ते होया । सबना दे उपर परम परमात्मां जुगा जुग धन ऐ । आमीन ।

6 अपर एह नी कि परमात्मं दा वचन टली गैआ, इसताई कि जेहड़े इस्त्राएल दे वंश हन, सैह सारे इस्त्राएली नी; 7 कने ना अब्राहम दे वंश होणे दिया बजाह ते सारे तिसदी औलाद होन, अपर (लिख्या ऐ) “इसहाक ते ई तेरा वंश हुंगा ।” 8 मतलब शरीरे दी औलाद परमात्मं दी औलाद नी, अपर प्रतिज्ञा दी औलाद वंश गिणेयो जांदे हन । 9 कजोकि प्रतिज्ञा दा वचन एह ऐ : मैं इस बगते दे मताबक ओंगा, कने सारा दा पुत्र हुंगा ।” 10 कने सिर्फ ऐही नी, अपर जाहू रिबका भी इक्की ते मतलब अहां दे बुड़े इसहाके ते गर्भवती थी, 11 कने अली तिकर ना तां जागत जन्मेयो थे, कने ना तिन्हां कुच्छ खरा या बुरा किन्ता था; इसताई कि परमात्मं दी मनसा जेहड़ा तिस दे चुणी लैणे दे मताबक ऐ, कर्मा दिया बजाह ते नी अपर सदेणे आळे दिया बजाह ते ऐ, बणी रँह : 12 तिन्हीं ग्लाय़ा, “जेठा लोके दा दास हुंगा ।” 13 जिआं लिख्या ऐ, “मैं याकूबे नै प्यार कित्या, अपर एसावे जो प्यारा नी जाणेया ।”

14 इसताई अहां क्या ग्लान? क्या परमात्मं दे ऐत्थू अन्याय ऐ? कदीभी नी । 15 कजोकि सैह मूसा नै ग्लांदा ऐ,

“मैं जिस कुसी पर दया करणां चां तिस पर दया करगा, कने जिस कुस पर कृपा करणां चां तिस पर कृपा करगा ।”

16 कने एह ना तां चाहणे आळे दी, ना दौड़णे आळे दी अपर दया करणे आळे परमात्मं दी गल्ल ऐ । 17 कजोकि पवित्रशास्त्रे च फिरौने नै ग्लाय़ा गैआ, “मैं तिजो इसताई खरेडया ऐ कि तिजो च अपनी सामर्थी दिक्खां, कने मेरे नांये दा प्रचार सारिया धरतिया पर होयें ।” 18 इसताई सैह जिस पर चाहंदा ऐ तिस पर दया करदा ऐ, कने जिसियो चाहंदा ऐ तिसियो कठोर करी दिंदा ऐ ।

परमात्में दा गुस्सा कने तिसदी दया

19 कने तू मिन्जो नें ग्लांगा, "सैह भिरी कजो दोष लगांदा ऐ? कुण तिसदिया इच्छा दा सामणां करदा ऐ? 20 हे माणु, खरा तू कुण ऐ जेहड़ा परमात्में दा सामणां करदा ऐ? क्या दबीयो होई चौज दबणे आळे नें ग्लाई सकदी ऐ, "तैं मिन्जो ऐदेया कजो बणांया ऐ?" 21 क्या कुमाहर जो चिक्का पर हक्क नी कि इक्की ई लोंदे ते इक्क पांडा आदरे तांई, कने द्ये जो अपमाने तांई बणांये? 22 तां इस च कुण देहई चमत्कार दी गल्ल ऐ कि परमात्में अपणां गुस्सा दस्सणे कने अपणी सामर्थ प्रकट करणे दी इच्छा ते गुस्से दे पांडेयां दी, जेहड़े विनाश तांई त्यार कित्ते गैयो थे, बडे धीरज ते ठीक; 23 कने दया दे पांडे पर, जिन्हां जो तिन्हीं महिमा तांई पैहले ते त्यार कित्या, अपणी महिमा दे धन जो प्रकट करणे दी इच्छा कित्ती? 24 मतलब अहां पर जिन्हां जो तिन्हीं ना सिर्फ यहूदियां च, अपर गैर - यहूदियां ते भी सदया । 25 जिआं सैह होशे दिया कताबा च भी ग्लांदा ऐ,

"जेहड़ी मेरी प्रजा नी थी, तिन्हां जो मैं अपणी प्रजा ग्लांगा; कने जेहड़ी प्यारी नी थी, तिसायो प्यारी ग्लांगा ।

26 कने देहया हुंगा कि जिस जगाह च तिन्हां एह ग्लायो था कि तुहां मेरी प्रजा नी हन, तिसा जगाह सैह जिंदे परमात्में दी औलादा दे नांये ते जाणे जांगे ।"

27 कने यशायाह इस्राएले दे बारे च डडी नें ग्लांदा ऐ, "चां इस्राएले दी औलांदा दी गिणती समुंदरे दिय रेता बराबर होयें, तमी तिन्हां च थोड़े ई बचगे ।

28 कजोकि प्रभु अपणां वचन धरती पर पूरा करी नें, धार्मिकता ते तौळी तिसियो सिद्ध करगा ।"

29 जिआं यशायाहें पैहले भी ग्लायो था, "जे सेनाओं दा प्रभु अहां तांई कुच्छ वंश नी छडदा, तां अहां सदोमे साइआं होई जांदे, कने अमोरा दे सदृश ठेहरदे ।"

इस्राएले दा वेवसुआस

30 कने अहां क्या ग्लान? एह कि गैर - यहूदियां नें जेहड़े धार्मिकता दी तोप नी करदे थे, धार्मिकता हासल कित्ती मतलब तिसा धार्मिकता जो जेहड़ी वसुआसे ते ऐ; 31 अपर इस्राएली जेहड़े धर्म दी व्यवस्था दी तोप करदे थे तिसा व्यवस्था तक नी पुजे । 32 कुस तांई? इसतांई कि सैह वसुआसे ते नी, अपर मना कर्मा ते तिसदी तोप करदे । तिन्हां तिस ठोकरा दे पत्थरे पर ठोकर खादी,

33 जिआं लिख्या ऐ, "दिक्खा, मैं सिघ्योन च इक्क ठोकर लगणे दा पत्थर, कने ठोकर खाणे दा सप्पड़ रखदा ऐ, कने जेहड़ा तिस पर वसुआस करगा सैह शर्मिदा नी हुंगा ।

10 हे भाऊओ, मेरे दिले दी इच्छां कने तिन्हां तांई परमात्में नें मेरी प्रार्थना ऐ कि सैह उद्धार पां । 2 कजोकि मैं तिन्हां दी गवाही दिंदा कि तिन्हां जो परमात्में तांई धुन रेंहदी ऐ अपर अक्कमंदा सौगी नी । 3 कजोकि सैह परमात्में दी धार्मिकता ते अनजाण होई नें कने अपणी धार्मिकता स्थापित करणे दा प्रयास करी नें, परमात्में दी धार्मिकता दे अधीन नी होये । 4 कजोकि हर इक्क वसुआस दे निमित्त मसीह व्यवस्था दा अन्त ऐ ।

उद्धार सबना तांई

5 कजोकि मूसें एह लिख्या ऐ कि जेहड़ा माणु तिसा धार्मिकता पर जेहड़ा व्यवस्था ते ऐ, चलदा ऐ, सैई तिसा ते जिंदा रेंह्या । 6 अपर जेहड़ी धार्मिकता वसुआसे ते ऐ, सैह इआं ग्लांदा ऐ, "तू अपणे दिले च एह ना ग्लाणां कि सुअर्गे पर कुण चढ़गा?" (मललब मसीह जो लौआणे तांई,) 7 या "अधोलोक च कुण लौंगा?" (मतलब मसीह जो मरेयां ते जिंदा करी नें उपर लैयोणे तांई) 8 अपर सैह क्या ग्लांदा ऐ? एह कि "वचन तेरे नैडे ऐ, तेरे मुँमे च कने तेरे दिले च ऐ," एह सैई वसुआसे दा वचन ऐ, जेहड़ा अहां प्रचार करदे हन, 9 कि जे तू अपणे मुँमे ते यीशु जो प्रभु जाणी नें अंगीकार करे, कने अपणे दिले ते वसुआस करे कि परमात्में तिसियो मरेयां ते जिंदा कित्या, तां तू पक्का उद्धार पांगा ।

10 कजोकि धार्मिकता तांई दिले ते वसुआस कित्ता जांदा ऐ, कने उद्धार तांई मुँमे ते अंगीकार कित्ता जांदा ऐ । 11 कजोकि पवित्रशास्त्र एह ग्लांदा ऐ,

"जेहड़ा कोई तिस पर वसुआस करगा सैह शर्मिदा नी हुंगा । 12 यहूदियां कने यूनानियां च कुच्छ भेद नी इसतांई कि सैह सबना दा प्रभु ऐ कने अपणे सारे ना लैणे आळ्यां तांई उद्धार ऐ । 13 कजोकि, "जेहड़ा कोई प्रभु दा नां लैगा सैह उद्धार पांगा ।"

14 जिस पर तिन्हां वसुआस नी कित्ता, सैह तिसदा नांअ किआं लैन? कने जिसदे बारे सुणोया नी तिस पर किआं वसुआस करन? कने प्रचारक बगैर किआं सुणन? 15 कने जे घल्ले नी जान, तां किआं प्रचार करन? जिआं लिख्या ऐ, "तिन्हां दे पैर क्या ई सुहावणे हन, जेहड़ा खरियां गल्लां दा सुसमाचार सणांदे हन ।" 16 अपर सारेयां तिस सुसमाचारे पर कनं नी लगाया : यशायाह ग्लांदा ऐ, "हे प्रभु कुणी अहां दे समाचारे पर वसुआस कित्ता ऐ?" 17 कने वसुआस सुणने ते कने सुणना मसीह दे वचन ते हुंदा ऐ ।

18 अपर मैं ग्लांदा, क्या तिन्हां नी सुणोया? सुणोया तां जरूर ऐ; कजोकि लिख्या ऐ, "तिन्हां दे स्वर सारिया धरती पर, कने तिन्हां दे वचन संसारे उस बन्ने तिकर पुजौ गै हन ।"

19 मैं भिरी ग्लांदा, क्या इस्राएली नी जाणदे थे? पैहले तां मूसा ग्लांदा ऐ, "मैं तिन्हां दिया बजाह ते जेहड़ी जाति नी, तुहां दे दिले च जळन पैदा करगा; मैं इक्क मूढ जातिआ दिया बजाह ते तुहां जो रिस दिलांगा ।"

20 भिरी यशायाह बडे हियाव दे सौगी ग्लांदा ऐ, "जेहड़े मिन्जो नी तोपदे थे, तिन्हां मिन्जो पाई लैआ; कने जेहड़े पूछदे भी नी थे, तिन्हां पर मैं प्रकट होई गैआ ।"

21 अपर इस्राएले दे बारे च सैह एह जाति ग्लांदा ऐ, "मैं सारा दिन अपणे हत्थे इक्क हुकम नी मनणे आळी कने विवाद करणे आळी प्रजा दे पाससे पसारे रेंह्या ।"

इस्राएले पर परमात्में दी दया

11 इसतांई मैं ग्लांदा, क्या परमात्में अपणी प्रजा जो त्यागी दित्ता? कदीभी नी! मैं भी तां इस्राएली ऐ; अब्राहम दे वंश कने बिन्यामीन दे गोत्र ते ऐ । 2 परमात्में अपणी तिसा प्रजा जो नी त्याग्या, जिसायो तिन्हीं पैहले ते ई जाणेया । क्या तुहां नी जाणदे कि पवित्रशास्त्र एलिय्याह दे बारे च क्या ग्लांदा ऐ, कि सैह इस्राएल दे वरखलाफे च परमात्में नें विणती करदा ऐ? 3 "हे प्रभु, तिन्हां तेरे भविष्यवक्तां जो मारी दित्ता, कने तेरी वेदियां जो ढाई दित्ता ऐ; कने मैं ई किल्ला बचेया ऐ, कने सैह मेरिया जान्नी दे भी खोजी हन । 4 अपर परमात्में ते तिसियो क्या जबाब मिला, "मैं अपणे तांई सत हजार मर्द रखी छडेयो हन, जिन्हां बाअले गांह गोडे नी टेके हन । 5 ठीक इसा रीतिया नें इस बग्त भी, अनुग्रह नें चुणोयो कुच्छ लोक बाकी हन । 6 जे एह अनुग्रह ते होया ऐ, तां भिरी कर्मा ते नी; नी तां अनुग्रह भिरी अनुग्रह नी रेंह्या ।

7 इसतांई परणाम क्या होया, एह कि इस्राएली जिसदी तोपा च थे, सैह तिन्हां नी मिलेया; पर चुणेयां जो मिलेया, कने बाकि लोक कठोर कित्ते गै ।

8 जिआं लिख्या ऐ, "परमात्में तिन्हां जो अज्ज दे दिन तिकर बड़ीया निदरां च पाई दित्या ऐ, कने ऐदेई अंखी दित्तियां जेहड़े नी दिखन कने ऐदेय कनं जेहड़े ना सुणन ।"

9 कने दाऊद ग्लांदा ऐ, "तिन्हां दा खाणां तिन्हां तांई जाळ कने फंदा, कने ठोकर कने सज्जा दी बजाह होई जां ।

10 तिन्हां दियां अंखी पर नैहरा छाई गैआ तांकि ना दिखन, कने तू सदा तिन्हां दी पीठी जो झुकाई रख ।"

11 कने मैं ग्लांदा क्या तिन्हां इसतांई ठोकर खादी कि पेई गै, कदीभी नी! अपर तिन्हां दे पोणे दी बजाह गैर - यहूदियां जो उद्धार मिलेया, कि तिन्हां जो जळण होयें । 12 इसतांई जे तिन्हां दा पोणा संसारे तांई धन कने तिन्हां दी कमी गैर - यहूदियां तांई योजना दी बजाह होई, तां तिन्हां दी भरपूरिया ते क्या कुच्छ नी हुंगा ।

गैर - यहूदियां दा उद्धार : कने कलम लगाणे दा उदारण

13 मैं तुहां गैर - यहूदियां नें एह गल्लां ग्लांदा । जाहू कि मैं गैर - यहूदियां तांई चेला ऐ तां मैं अपणी सेवा दी बड़ाई करदा ऐ । 14 तांकि कुस तरीके नें मैं अपणे रिश्तेदारां च जळण पैदा करवाई नें तिन्हां च कई इक्की दा उद्धार करां । 15 कजोकि जाहू तिन्हां दा त्याग दित्ता जाणां संसार दे मिलाप दी बजाह होई, तां क्या तिन्हां दा ग्रहण कित्ता जाणां मरेयां ते जिंदे होणे दे बराबर नी

हुंगा । 16 जाहू भेंट दा पैहला पेड़ा पवित्र ठेहरया, तां पूरा गुन्या होया आटा भी पवित्र ऐ; कने जाहू जड़ पवित्र ठेहरी, तां डालियां भी देहई ई ऐ ।

17 अपर जे कुछ डालियां तोड़ी दित्तियां, कने तू बणे दा जैतून होई नैं तिन्हां च साटा गैआ, कने जैतून दी जड़ा दी चिकनाई दा भागी होया, 18 तां डालियां पर कर्मंड ना करणां; कने जे तू कर्मंड करे तां जाणी रख कि तू जड़ा जो नी अपर जड़ तिज्रो सभालदी ऐ । 19 भिरी तू ग्लांगा, “डालियां इसताई तोड़ियां कि मैं साटा जां ।” 20 ठीक ऐ, सैह तां वेवसुआसे दिया बजाह ते तोड़ी, अपर तू वसुआस नैं बणियां रेंहदा ऐ इसताई कर्मंडी मत हो, अपर डर रख 21 कजोकि जाहू परमात्मैं सभाविक डालियां जो नी छडेया तां तिज्रो भी नी छडेया । 22 इसताई परमात्मैं दी कृपा कने कड़ाई जो दिक्ख! जेहड़ा पैई गे तिन्हां पर कड़ाई, अपर तिज्रो पर कृपा, जे तू तिस बणियां रेंह, नी तां तू भी बडेया जांगा । 23 सैह भी जे वेवसुआसे च नी रेंह, तां साटे जांगे; कजोकि परमात्मा तिन्हां जो भिरी ऐ सकदा ऐ । 24 कजोकि जे तू तिस जैतून ते, जेहड़ा सभावे ते जंगली ऐ, बडेया गेया कने सभाव दे बरखलाफ खरे जैतूने च साटेया गैआ, तां एह जेहड़ियां सुभाविक डालियां हन, अपणे ई जैतूने च कजो नी साटे जांगे ।

25 हे भाऊओ, कुत्की देहया ना होयें कि तुहां अप्पु जो अक्कमंद समझी लैआ; इसताई मैं नी चाहंदा कि तुहां इस भेदे ते अनजाण रेंहआ कि जाहू तिकर होर जातिआं पूरे तरीके नैं प्रवेश नी कर लैन, ताहू तिकर इस्राएले दा इक्क हिस्सा ऐदेया कठोर रेंहगा । 26 कने इस तरीके नैं सारा इस्राएले उद्धार पाणां । जिआं लिख्या ऐ, “छडाणे आळे सिप्योने ते ओणां, कने अभक्ति जो याकूबे ते दूर करगा; 27 कने तिन्हां सौगी मेरी ऐही गल्ल होंगी, जाहू कि मैं तिन्हां दे पापां जो दूर करी दिंगा ।” 28 सुसमाचार दे भाव ते तां तुहां ताई सैह परमात्मैं दे बैरी हन, अपर चुणी लैणे दे भाव ते तां सैह पितरां दिया बजाह ते प्यारे हन । 29 कजोकि परमात्मैं दे वरदान कने बुलाहट अटल ऐ । 30 कजोकि जिआं तुहां पैहले परमात्मैं दा हुक्म नी मनेया, अपर हुण तिन्हां दे हुक्म नी मनणे ते तुहां पर दया होई; 31 तिआं ई तिन्हां भी हुण हुक्म नी मनेया, कि तुहां पर जेहड़ी दया होंदी ऐ इसते तिन्हां पर दया होयें । 32 कजोकि परमात्मैं सबना जो हुक्म उल्लघन दा बंदी बणाई नैं रखेया, तांकि सैह सारेयां पर दया करे ।

परमात्मैं दी स्तुति

33 आहा! परमात्मैं दा धन कने अक्क कने ज्ञान क्या ई गंभीर ऐ! तिस दे वचार किआं अथाह, कने तिसदे रस्ते किआं अगम हन !

34 “प्रभु दी अक्का जो कुणी जाणेया, या तिसदा मंत्री कुण होया ।

35 या कुणी पैहले तिसियो कुछ दित्ता ऐ जिसदा बदला तिसियो दित्ता जां ।”

36 कजोकि तिस दे पास्से ते, कने तिसदिया बजाह ते कने तिस ताई सब कुछ ऐ । तिसदी महिमा जुगा जुग होंदी रेंह आमीन ।

परमात्मैं दी सेवा दी जिन्दगी

12 इसताई हे भाऊओ, मैं तुहां नैं परमात्मैं दी दया याद दिलाई नैं विणती करदा कि अपणे शरीरां जो जिंदा, कने पवित्र, कने परमात्मैं जो भावदा होया बलिदान करी नैं चढ़ा । ऐही तुहां दी आत्मिक सेवा ऐ । 2 इस संसार दे सदृश बणां; अपर तुहां दे मन दे नौये होई जाणे ते तुहां दा चाल चलन भी बदलदा जां, जिसते तुहां परमात्मैं दी खरी, कने भादी, कने सिद्ध इच्छा अनुभव नैं पता करदे रेंहआ ।

3 कजोकि मैं तिस अनुग्रह दिया बजाह जेहड़ा मिन्जो मिलेया ऐ, तुहां च हर इक्की नैं ग्लांदा कि जिआ समझणा चाइदा तिसते बधी नैं कोई भी अप्पु जो नी समझें; अपर जिआं परमात्मैं हर इक्की जो वसुआस परणाम दे मताबक बंडी दित्ता ऐ, तिआं ई सुबुद्धि दे सौगी अपणे जो समझन । 4 कजोकि जिआं अहां दे इक्की शरीरे च मते अंग हन, कने सारे अंगा दा इक्क ई देहया कम्म नी; 5 तिआं ई अहां जो जेहडे मते हन, मसीह च इक दूये दे अंग हन । 6 जाहू कि तिस अनुग्रह दे मताबक जेहड़ा अहां जो दित्या ऐ, अहां जो लग्ग लग्ग बरदान मिलेयो, तां तिसियो भविष्यवाणी दा दान मिलेया होयें, सैह वसुआस दे परणाम दे मताबक भविष्यवाणी करे; 7 जे सेवा करणे दा दान मिलेया होयें, तां सेवा च लग्गा रेंह; जे कोई सखाणे आळा होयें, तां सखाणे च लग्गा रेंह;

8 जेहड़ा उपदेशक होयें, सैह शिक्षा दैणे च लग्गा रेंह; दान दैणे आळा उदारता नैं दें; जेहड़ा अगुआई करे, सैह खुशिया नैं करे, जेहड़ा दया करे, सैह खुशी नैं करे ।

9 प्यार निष्कपट होयें; बुराईया ते नफरत करा; भलाईया च लग्गे रेंहआ ।

10 भाईचारे दे प्यार ते इक दूये नैं स्नेह रखा; परस्पर आदर करणे च इक्की दूये नैं बधी चला । 11 कोशश करणे च आलसी मत होआ; आत्मिक उन्माद च भरी रेंहआ; प्रभु दी सेवा करदे रेंहआ । 12 आशा च खुश रेंहआ; सताव च पक्के रेंहआ; प्रार्थना च हर रोज लग्गी रेंहआ । 13 पवित्र लोकां जो जेहड़ा कुछ जरूरी होयें, तिस च तिन्हां दी मदद करा; पहुनाई करणे च लग्गे रेंहआ ।

14 अपणे सताणे आळ्यां जो आशीर्वाद देया; आशीर्वाद देहया सराफ मत दैआ । 15 खुशी मनाणे आळ्यां सौगी खुश रेंहआ, कने रोणे आळ्यां सौगी रोआ । 16 अप्पु च इक्क देहया मन रखा; कर्मंडी मत होआ, अपर दीनां सौगी संगती रखा; अपणियां नजरा च अक्कमद मत होआ । 17 बुराईया दे बदले कुसी नैं बुराई मत करा; जेहड़ियां गल्लां सारेयां लोकां अल्ल खरियां हन, तिन्हां दी चिंता करा करा । 18 जित्थू तिकर होई सके, तुहां भरसक सारेयां माणुआं सौगी मेल मिलाप रखा । 19 हे प्यारेयो, बदला मत लेंदे, अपर परमात्मैं दे गुस्से जो मौका दैआ, कजोकि लिख्या ऐ, “बदला लैणां मेरा कम्म ऐ, प्रभु ग्लांदा ऐ मैं ई बदला दिंगा ।” 20 अपर “जे तेरा बैरी भूखा होयें तां तिसियो खाणां खुआ, जे प्यासा होयें तां तिसियो पाणी पिया; कजोकि ऐदेया करणे ते तू तिसदे मुँडेपर अग्गी दे गारूयां दा ढेर लग्गा । 21 बुराईया ते मत हारा, अपर भलाईया ते बुराइया जो जीती लैआ ।

राज दे प्रति कर्तव्य

13 हर इक्क माणु शासकीय अधिकारियां दे अधीन रेंह, कजोकि कोई हक्क ऐदेया नी जेहड़ा परमात्मैं दे पास्से ते ना होयें; कने जेहड़ा हक्क ऐ, सैह परमात्मैं दे ठेहराये होये हन । 2 इसताई जेहड़ा कोई हक्क दा विरोध करदा ऐ, सैह परमात्मैं दी विधिया दा सामणां करदा ऐ, कने सामणां करणे आळे सज्जा पांगे । 3 कजोकि हाकम खरे कम्म दे नी, अपर बुरे कम्मे ताई डर दी बजाह ऐ; जे तू हाकम ते निडर रेंहणां चाहंदा ऐ, तां खरा कम्म कर, कने तिसदे पास्से ते सराहणा होंगी; 4 कजोकि सैह तेरिया भलाईया ताई परमात्मैं दा सेवक ऐ । अपर जे तू बुराई करे, तां डरा, कजोकि सैह तलवार बेकार लियो होये नी; कने परमात्मैं दा सेवक ऐ कि तिसदे गुस्से दे मताबक बुरे कम्म करणे आळे जो सज्जा दें । 5 इसताई अधीन रेंहणां ना सिर्फ तिस गुस्से दे डर ते जरूरी ऐ, अपर विवेक भी ऐही गवाही दिंदा ऐ । 6 इसताई करी भी देया कजोकि शासन करणे आळे परमात्मैं दे सेवक हन कने सदा इसी कम्मे च लग्गे रेंहदे हन । 7 इसताई हर इक्क दा हक्क चुकाया करा; तिसियो कर चाइदा तिसियो कर देया; तिसियो ब्याज चाइदा, तिसियो ब्याज देया; जिसते डरणां चाइदा, तिसते डरा; जिसदा आदर करणां चाइदा, तिसदा आदर करा ।

इक्की - दूये दे प्रति कर्तव्य

8 अप्पु च प्यारे जो छड्डी कने कुसा गल्ला च कुसी दे कर्जदार मत होआ; कजोकि जेहड़ा दूये नैं प्यार रखदा ऐ, तिन्हीं व्यवस्था पूरी किती ऐ । 9 कजोकि एह कि “व्यभिचार नी करणा, खून नी करणा, चोरी नी करणा, लालच नी करणा,” कने इन्हां जो छड्डी नैं होर कोई भी हुक्म होयें तां सारेयां सारांस इसा गल्ला च पाया जांदा ऐ, अपणे प्डेसिये नैं अपणे साइआं प्यार रख ।” 10 प्यार प्डेसिये नैं कुछ बुराई नी करदा, इसताई प्यार रखणां व्यवस्था जो पूरा करणां ऐ ।

11 बगते जो पणछैणी नैं ऐदेया ई करा, इसताई कि हुण तुहां ताई निदरां च जागणे दा बग्त आई रेंहआ ऐ; कजोकि जिस बग्त अहां वसुआस किता था, तिस बगते दे वचारां ते हुण अहां दा उद्धार नैडे ऐ । 12 रात बड़ी होईयो ऐ, कने दिन निकळणे पर ऐ; इसताई अहां नैहरे दे कम्मां जो छड्डी नैं जोतिया दे हत्थयार बन्नी लैन । 13 जिआं दिन जो शोभा दिंदा ऐ, तिआं ई अहां सीधी चाल चलन, ना कि लीला क्रीड़ा कने पियक्कडपण च, ना व्यभिचार कने लुचपण च, कने ना झगडे कने डह च । 14 अपर प्रभु यीशु मसीह जो पैहनी लैआ, कने शरीरे दी इच्छां जो पूरा करणे दा उपाय मत करा ।

अपणे भाऊये पर दोष मत लगा

14 जेहड़ा वसुआसे च कमजोर ऐ, तिसियो अपणियां संगतिया च लैई लैआ, अपर तिसदी शंका पर झगड़ा करणे ताई नी । ² इक्क जो वसुआस ऐ कि सारा कुच्छ खाणां ठीक ऐ, अपर जेहड़ा वसुआसे च कमजोर ऐ सैह साग पात ई खादा ऐ । ³ खाणेआळा ना खाणेआळे जो तुच्छ ना जाणे, कने ना खाणेआळा खाणेआळे पर दोस नी लग्गां कजोकि परमात्मै तिसियो ग्रहण कित्ता ऐ । ⁴ तू कुण ऐ जेहड़ा दूये दे सेवक पर दोष लगांदा ऐ, तिसदा पक्का रहणां या पैई जाणां तिसदे मालके नै ई रिशते रखदा ऐ; अपर सैह पक्का ई करी दित्ता जांगा । कजोकि प्रभु तिसियो पक्का रखी सकदा ऐ । ⁵ कोई तां इक्की दिने जो दूये ते बधीकरी मनदा ऐ, कने कोई सारे दिना जो इक्क साइआं मनदा ऐ । हर इक्क अपणे ई मने च पक्का करी लें । ⁶ जेहड़ा कुसी दिन जो मनदा ऐ, सैह प्रभु ताई मनदा ऐ । जेहड़ा खांदा ऐ, सैह प्रभु ताई खांदा ऐ, कजोकि सैह परमात्मै दा धन्यावाद करदा ऐ, कने जेहड़ा नी खांदा, सैह प्रभु ताई नी खांदा कने परमात्मै दा धन्यावाद करदा ऐ । ⁷ कजोकि अहां ते ना तां कोई अपणे ताई जिदां ऐ कने ना कोई अपणे ताई मरदा ऐ । ⁸ जे अहां जिंदे हन, तां प्रभु ताई जिंदे हन; कने जे मरदे हन, तां प्रभु ताई मरदे हन; जे अहां जीन या मरन, अहां प्रभु दे ई हन । ⁹ कजोकि मसीह इसताई मरया कने जिंदा भी होई गैआ कि सैह मरयां कने जिंदयां दूनी दा प्रभु होयें । ¹⁰ तू अपणे भाऊये पर कजो दोष लगांदा ऐ, या तू भिरी कजो अपणे भाऊये जो तुच्छ जाणदा ऐ, अहां सारे दे सारे परमात्मै दे न्याय सिंहासणे दे सामणे खड़े होंगे । ¹¹ कजोकि लिख्या ऐ, “प्रभु ग्लांदा ऐ, मेरिया जिन्दगिया दी संगंध कि हर इक्क गोडा मेरे सामणे टिकगा, कने हर इक्क जीभ परमात्मै जो अंगीकार करगी ।” ¹² इसताई अहां च हर इक्क परमात्मै जो अपणां अपणां लेखा दिंगा ।

अपणे भाऊये दी हार दी बजाह मत बणा

¹³ कने गांह जो अहां इक्की दूये पर दोष ना लगान, अपर तुहां एह ठाणी लैआ कि कोई अपणे भाऊये सामणे ठेस या ठोकर खाणे दी बजाह ना रख । ¹⁴ मैं जाणदा, कने प्रभु यीशु च मिन्जो पक्का होया ऐ कि कोई चीज अप्पु ते अशुद्ध नी, अपर जेहड़ा तिसा जो अशुद्ध समझदा ऐ सैह तिस ताई अशुद्ध ऐ । ¹⁵ जे तेरा भाऊ तेरे खाणे दिया बजाह ते उदास हुंदा ऐ, तां भिरी तू प्यारे दी रीतिया नै नी चलदा; जिस ताई मसीह मरया, तिसियो तू अपणे खाणे दिया बजाह ते नाश ना कर । ¹⁶ कने तुहां ताई जेहड़ा खरा खाणे तिसदी निंदा नी होयें । ¹⁷ कजोकि परमात्मै दा राज्य खाणां पीणा नी, अपर धर्म कने मेल मिलाप कने सैह खुशी ऐ जेहड़ा पवित्र आत्मां ते हुंदा ऐ । ¹⁸ जेहड़ा कोई इस रीतिया ते मसीह दी सेवा करदा ऐ, सैह परमात्मै जो भांदा ऐ कने माणुआं च ग्रहण लायक ठेहरदा ऐ । ¹⁹ इसताई अहां तिन्हां गलां च लगी रह्य जिन्हां नै मेल मिलाप कने इक्की दूये दा सुधार होयें । ²⁰ खाणे ताई परमात्मै दा कम्म मत बगाड सब कुच्छ शुद्ध तां ऐ, अपर तिस माणुयें ताई बुरा ऐ जिसजो तिस दे खाणे ते ठोकर लगदी ऐ । ²¹ खरा तां एह ऐ कि तू ना मांस खां कने ना अंगूरा दा रस पीयें, ना कुच्छ ऐदेया करें जिसते तेरा भाऊ ठोकर खां । ²² तेरा जेहड़ा वसुआस होयें, तिसियो परमात्मै सामणे अपणे ई मने च रख । धन ऐ सैह जेहड़ा तिसा गलां च, जिसायो सैह ठीक समझदा ऐ, अपणे आप्पे जो दोषी नी ठेहरदा । ²³ अपर जेहड़ा शक करी नै खांदा ऐ सैह सजा दे लायक ठेहरी चुकेया, कजोकि सैह वसुआसे नै नी खांदा; कने जेहड़ा कुच्छ वसुआसे ते नी, सैह पाप ऐ ।

दूयेयां दी उन्नति करा

15 कने अहां ताकतवरां जो चाइदा कि कमजोरयां दी कमजोरियां जो सेहन, ना कि अपणे आप्पे जो खुश करन । ² अहां च हर इक्क अपणे प्देसिये जो तिसदी भलाई ताई खुश करन कि तिसदी उन्नति होयें । ³ कजोकि मसीह अपणे आप्पे जो खुश नी कित्ता, अपर जिआं लिख्या ऐ, “तेरे निन्दकां दी निंदा मिन्जो पर आई पैई ।” ⁴ जितणियां गलां पैहले ते लिख्यां, सैह म्हारी ई शिक्षा ताई लिख्यां हन कि अहां धीरज कने पवित्रशास्त्र दे प्रोत्साहने दिया बजाह ते आशा रखन । ⁵ धीरज कने शांति दा दाता परमात्मै तुहां जो एह वरदान दें कि मसीह यीशु दे मताबक अप्पु च इक्क

मन रहूआ । ⁶ तांकि तुहां इक्क मन कने इक्की उआजा च अहां दे प्रभु यीशु मसीह दे पिता परमात्मै दी स्तुति करा ।

सबना ताई सुसमाचार

⁷ इसताई, जिआं मसीह परमात्मै दी महिमा ताई तुहां जो ग्रहण कित्ता ऐ, तिआं ई तुहां भी इक्की दूये जो ग्रहण करा । ⁸ इसताई मैं ग्लांदा कि जेहड़ी प्रतिज्ञायें पितरां जो दित्तियां थी तिन्हां जो पक्का करणे ताई मसीह, परमात्मै दी सचाईया दा सबूत दैणे ताई, खतणां किन्तेयो लोकां दा सेवक बणां; ⁹ कने होर जातिआं भी दया दिया बजाह ते परमात्मै दी स्तुति करन; जिआं लिख्या ऐ, “इसताई मैं जाति जाति च तेरा धन्यावाद करगा, कने तेरे नांये दे भजन गांगा ।” ¹⁰ भिरी ग्लाय ऐ, “हे जाति जाति दे सारे लोको तिसदिया प्रजा सौगी खुशी मनाआ ।” ¹¹ कने भिरी “हे जाति जाति दे सारे लोको, प्रभु दी स्तुति करा; कने हे राजे दे सारे लोको तिसियो सराहा ।” ¹² कने भिरी यशयाह ग्लांदा ऐ, “यिशै दी इक्क जड प्रकट होणी, कने गैर - यहूदियां दा हाकम होणे ताई इक्क उठगा, तिस पर होर जातिआं उम्मीद रखणी ऐ ।” ¹³ परमात्मां जेहड़ा आशा दा दाता ऐ तुहां जो वसुआस करणे च सारी तरांह दी खुशी कने शांति ते परिपूर्ण करें, कि पवित्र आत्मां दी सामर्थी ते तुहां दी आशा बधदी जां ।

हिम्मता नै लिखणे दी बजाह

¹⁴ हे मेरे भाऊओ, मैं अप्पु तुहां दे बारे च पक्का जाणदा कि तुहां भी अप्पु ई भलाईया नै भरे कने ईश्वरीय ज्ञाने नै भरपूर होये, कने इक्की दूये जो चिताई सकदे हन । ¹⁵ तमी मैं कुत्थी कुत्थी याद दिलाणे ताई तुहां जो जेहड़ा बड़ी हिम्मत करी नै लिख्या । एह तिस अनुग्रह दिया बजाह ते होया जेहड़ा परमात्मै मिन्जो दित्ता ऐ, ¹⁶ कि मैं गैर - यहूदियां ताई मसीह यीशु दा सेवक होई नै परमात्मै दे सुसमाचारे दी सेवा याजके साइआं करें, जिसते गैर - यहूदियां दा मना चढ़ाया जाणा, पवित्र आत्मां ते पवित्र बणी नै ग्रहण कित्ता जां, ¹⁷ इसताई तिन्हां गलां दे बारे च जेहड़ा परमात्मै मैं सम्बध रखदी ऐ, मैं मसीह यीशु च बढाई करी सकदा ऐ । ¹⁸ कजोकि तिन्हां गलां जो छड्डी मिन्जो कुसी गलां दे बारे च ग्लाणे दी हिम्मत नी, जेहड़ा मसीह गैर - यहूदियां दी अधीनता ताई वचन, कने कर्म, ¹⁹ कने चमत्कारां, कने अदभुत कम्मा दी सामर्थी ते, कने पवित्र आत्मां दी सामर्थी सौगी मेरिया बजाह ते किन्ते; ऐत्थू तिकर कि मैं यरूशलेम ते लैई नै चौनी पास्सेयां इल्लुरिकुम तिकर मसीह दे सुसमाचारे दा पूरा पूरा प्रचार कित्ता । ²⁰ मेरे मने दी उमग एह ऐ कि जित्थू जित्थू मसीह दा नां नी लैआ ऐ, तित्थू सुसमाचार सणां इआं ना होयें कि दूये दी नीआं पर घर बणां । ²¹ अपर जिआं लिख्या ऐ, तिआं ई होयें, “जिन्हां जो तिसदा सुसमाचार नी पुज्या, सैह ई दिखणे कने जिन्हां नै नी सुणेया सैह ई समझणे ।”

रोम यात्रा दी पौलुस दी योजना

²² इसताई मैं तुहां अल्ल ओणे ते बार बार रूकी रहूआ । ²³ अपर हुण इन्हां देशां च मेरे कम्मा ताई जगाह नी रैई, कने मते सालां ते मिन्जो तुहां अल्ल ओणे दी लालसा ऐ । ²⁴ इसताई जाहू मैं स्पेन जो जांगा तां तुहां अल्ल हुंदा जांगा, कजोकि मिन्जो आशा ऐ कि तिसा यात्रा च तुहां नै भेंट होंगी, कने जाहू तुहां दियां संगतिया ते मेरा जी कुच्छ भरी जां तां तुहां मिन्जो कुच्छ दूर गांह पज्राई दिनेयां । ²⁵ अपर हुण तां मैं पवित्र लोकां दी सेवा करणे ताई यरूशलेमं जो चलेया ऐ । ²⁶ कजोकि मकिदुनिया कने अख्या दे लोकां जो एह खरा लग्गा कि यरूशलेम दे पवित्र लोकां च गरीबां ताई कुच्छ चंदा देन । ²⁷ तिन्हां जो खरा तां लग्गा, अपर सैह कर्जदार भी हन, कजोकि अगर होर जातिआं तिन्हां दियां आत्मिक गलां च भागी हों, तां तिन्हां जो भी ठीक ऐ कि शारीरिक गलां च तिन्हां दी सेवा करन । ²⁸ इसताई मैं एह कम्म पूरा करी नै कने तिन्हां जो एह चंदा सौपी नै तुहां अल्ल हुंदा होया स्पेन जो जांगा । ²⁹ कने मैं जाणदा कि जाहू मैं तुहां अल्ल ओणां, तां मसीह दे पूरे आशीवदि सौगी ओणां । ³⁰ हे भाऊओ, अहां दे प्रभु यीशु मसीह दे कने पवित्र आत्मां दे प्यार

दी याद दिलाई नैं मैं तुहां नैं विणती करदा, कि मेरे तांई परमात्में नैं प्रार्थना करणे च मिन्जो सौगी मिली नैं लौलीन रहैआ, ³¹ कि मैं यहूदिया दे वेवसुआसियां ते बचा रहै, कने मेरी सैह सेवा जेहड़ी यरूशलेम तांई ऐ, पवित्र लोकां जो भान; ³² कने मैं परमात्में दी इच्छा ते तुहां अल्ल खुशिया सौगी आई नैं तुहां सौगी अराम पां । ³³ शांति दा परमात्मां तुहां तुहां सबना सौगी रहै ।

खुद दा नमस्कार

16 मैं तुहां नैं फीबे तांई जेहड़ी म्हारी बैहण कने किन्खिया दी कलेसिया दी सेविका ऐ, विणती करदा, ² कि तुहां, जिआं कि पवित्र लोकां जो चाइदा, तिसियो प्रभु च ग्रहण करा; कने जिस कुसी गल्ला च तिस जो तुहां दी जरूरत होयें, तिसदी मदद करा, कजोकि सैह भी मतेआं दी अपर मेरी भी उपकार करणे आळी रहै ऐ ।

³ प्रिस्का कने अक्विला जो जेहड़ा मसीह यीशु च मेरे सेहकर्मी ऐ, नमस्कार । ⁴ तिन्हां मेरे प्राणां तांई अपणी ई जिन्दगी जोखिम च पाई दित्तियो थी; कने सिर्फ मैं ई नी, अपर गैर - यहूदियां दी सारी कलेसियायें भी तिन्हां दा धन्यावाद करदियां हन । ⁵ तिसा कलेसिया जो भी नमस्कार जेहड़ी तिन्हां दे घरे च ऐ । मेरे प्यारे इपैनिटुस जो, जेहड़ा मसीह तांई आसिया दा पैहला फळ ऐ, नमस्कार । ⁶ मरियमा जो, जिन्हीं तुहां तांई बड़ी मेहणत किती, नमस्कार । ⁷ अन्ड्रुनीकुस कने यूनियासे जो जेहड़े मेरे रिश्तेदार हन, कने मेरे सौगी कैद होएयो थे कने चेलयां च नामी हन, कने मिन्जो ते पैहले मसीही होएयो थे, नमस्कार । ⁸ अम्पलियातुसे जो, जेहड़ा प्रभु च मेरा प्यारा ऐ, नमस्कार । ⁹ उरबानुसे जो, जेहड़ा मसीह च अहां दा सेहकर्मी ऐ, कने मेरे प्यारे इस्तखुस जो नमस्कार । ¹⁰ अपिल्लेस जो जेहड़ा मसीह च खरा निकळेया, नमस्कार । अरिस्तुबुलुस दे घराणे जो नमस्कार । ¹¹ मेरे रिश्तेदार हेरोदियोन जो नमस्कार । नरकिस्सुस दे घराणे दे जेहड़े लोक प्रभु च हन, तिन्हां जो नमस्कार । ¹² त्रूफेना कने त्रूफोसा जो जेहड़ियां प्रभु च मेहणत करदियां हन, नमस्कार । प्यारे पिरसिस जो, जिन्हीं प्रभु च बड़ी मेहणत कितियो, नमस्कार । ¹³ रुफुस जो जेहड़ा प्रभु च चुणेया ऐ कने तिसदिया माऊ जो, जेहड़ी मेरी भी मां ऐ, दूनी जो नमस्कार । ¹⁴ असंक्रितुस कने फिलगोन कने हिर्मेसे दे पत्रुबास कने हिर्मास कने तिन्हां सौगी दे भाऊआं जो

नमस्कार । ¹⁵ फिलुलुगुस कने यूलिया कने नेर्युस कने तिसदी बैहण, कने उलुम्पास कने तिन्हां सौगी दे सारे पवित्र लोकां जो नमस्कार । ¹⁶ अप्पु च पवित्र पुक्के नैं नमस्कार करा । तुहां जो मसीह दी सारी कलेसियाएं दे पास्से ते नमस्कार ।

आखरी निर्देश

¹⁷ हुण हे भाऊओ, मैं तुहां नैं विणती करदा कि जेहड़े लोक तिसा शिक्षा दे विपरीत, जेहड़ी तुहां नैं पाई ऐ, फूट पाणे कने ठोकर खलाणे दी बजाह होंदे हन, तिन्हां जो ताड़ी लैआ करा कने तिन्हां ते दूर रहैआ । ¹⁸ कजोकि ऐदेय लोक अहां दे प्रभु मसीह दी नी, अपर अपणे पेटे दी सेवा करदे हन; कने चिकणी चुपड़ी गल्लां ते सीधे सादे मने दे लोकां जो बेहकाई दिंदे हन । ¹⁹ तुहां दे हुक्म मनणे दी चर्चा सारेयां लोकां च फैली गैई ऐ, इसतांई मैं तुहां दे बारे च खुशी मनांदा, अपर मैं एह चाहंदा कि तुहां भलाईया तांई अक्कमंद पर बुराईया तांई भोले बणी रहैआ । ²⁰ शांति दा परमात्मां सैताने जो तुहां दे पैरां ते तौळी कुचलवाई दिंगा । अहां दे प्रभु यीशु मसीह दा अनुग्रह तुहां पर हुंदा रहै ।

²¹ मेरे सेहकर्मी तीमुथियुस दा, कने मेरे रिश्तेदारां लूकियुस कने यासोन कने सोसिपत्रुस दे तुहां जो नमस्कार । ²² मिन्जो पत्री लिखणे आळे तिरतियुस दा, प्रभु च तुहां जो नमस्कार । ²³ गयुस जेहड़ा मेरी कने कलेसिया दी पहुनाई करणे आळा ऐ, तिसदा तुहां जो नमस्कार । ²⁴ इरास्तुस जेहड़ा सैहरे दा भंडारी ऐ, कने भाऊ क्वारतुस दा तुहां जो नमस्कार ।

परमात्में दी स्तुति

²⁵ हुण जेहड़ा तुहां जो मेरे सुसमाचार मतलब यीशु मसीह दे संदेश दे प्रचार मताबक पक्का करी सकदा ऐ, तिस भेदे दे प्रकाश दे मताबक जेहड़ा सनातन ते छूपी रहैआ । ²⁶ अपर हुण प्रकट होई नैं सनातन परमात्में दे हुक्मे च भविष्यवक्ताआं दी कताबां दियां बजाह ते सारी जातिआं जो दस्सया ऐ कि वसुआसे नैं हुक्म मनणे आळे होई जान, ²⁷ तिस इक्क मात्र अक्कमंद परमात्में दी यीशु मसीह दिया बजाह ते जुगा जुग महिमा होंदी रहै । आमीन ।

1 कुरिन्थियों

भूमिका

पौलुसं कुरिन्थुस सैहरे च कलेसिया दी स्थापना किती थी । तिस च मसीही जिन्दगी कने वसुआस सम्बन्धी मतिआं मुसीबतां पैदा होई । तिन्हां मुसीबतां दे समाधान ताई कुरिन्थियों नांये पर पौलुस चले दी पैहली पत्री लिखियो थी । तिस बग्त कुरिन्थुस यूनान दा इक्क अन्तराष्ट्रीय सैहर था । जेहड़ा रोमी सम्राज्य दे अखाया प्रान्त दी राजधानी था । सैह अपनी वपार सम्पन्नता, वैभवशाली संस्कृति कने विविध धर्मां ताई चिन्ता दे विषय थे । अपर सैह अपनी व्यापक अनैतिकता, यौन कने व्याह कने विवेक दे बारे च सवाल, क्लेशिया प्रबन्ध, पवित्र आत्मां दे दान, कने दुआरा जिंदा होणां । पौलुस अपनी गहन अन्तर्दृष्टियां नै एह दस्सदा ऐ कि सुसमाचार दे दुआरा इन्हां सवालां दा समाधान किआं होई सकदा ऐ । पाठ 13 च पौलुस दस्सदा ऐ कि परमात्मं दे लोकां जो मिलेयो वरदानां च सबते उत्तम वरदान प्यार ऐ । एह इसा कताबा दा सबते प्रसिद्ध पाठ ऐ ।

रूप-रेखा

भूमिका कने मूल विषय 1: 1- 9

कलेसिया च दलबन्दी 1: 10 --- 4: 21

नैतिकता कने परिवारिक जिन्दगी 5: 1 --- 7: 40

मसीही कने मूर्तिपूजा 8: 1 --- 11: 1

कलेसियाई जिन्दगी कने आराधना 11: 2 --- 14: 40

मसीह यीशु कने वसुआसियां दा दुआरा ते जिंदा होणां 15: 1- 58

यहूदिया दे मसीहियां ताई दान 16: 1- 4

व्यक्तिगत विषय कने उपसंहार 16: 5- 24

नमस्कार

1 पौलुस दे पास्से ते जेहड़ा परमात्मं दी इच्छा ते यीशु मसीह दा चेला होणे ताई सदेया गैआ कने भाऊ सोस्थिनेस दे पास्से ते, 2 परमात्मं दी तिसा कलेसिया दे नांअ जेहड़े कुरिन्थुस ते हन, अपर तिन्हां दे नां जेहड़े मसीह यीशु च पवित्र किन्ते गै, कने पवित्र होणे ताई सदेयो गैयो हन; कने तिन्हां सारेयां दे नां भी जेहड़े हर जगह अहां दे कने अपणे प्रभु यीशु मसीह दे नां नै प्रार्थना करदे हन ।

3 अहां दे पिता परमात्मां कने प्रभु यीशु मसीह दे पास्से ते तुहां जो होर शांति मिलदी रँह ।

मसीह च आशीर्ष

4 मैं तुहां दे बारे च अपणे परमात्मं दा धन्यावाद सदा करदा ऐ, इसतांई कि परमात्मं दा एह अनुग्रह तुहां पर मसीह यीशु च होया । 5 कि तिस च होई नै तुहां हर गला च, अपर सारे वचन कने सारे ज्ञान च धनी किन्ते गै ---- 6 कि मसीह दी गवाही तुहां च पक्की निकळी ---- 7 ऐत्थु तिकर कि कुसी वरदान च तुहां जो कमी नी, कने तुहां अहां दे प्रभु यीशु मसीह दे प्रकट होणे दा इंतजार करदे रँहदे हन । 8 सैह तुहां जो आखरी तिकर पक्का भी करगा कि तुहां अहां दे प्रभु यीशु मसीह दे दिने बेकसूर ठेहरा । 9 परमात्मां सच्चा ऐ, जिन्हीं तुहां जो अपणे पुत्र अहां दे प्रभु यीशु मसीह जो संगतिया च सदेया ऐ ।

10 हे भाऊओ, मैं तुहां नै अहां दे प्रभु यीशु मसीह दे नांये नै विणती करदा ऐ कि तुहां सारे इक्क ई गल्ल ग्ला, कने तुहां च बैर ना पोयें, अपर इक्क ई मन कने इक्क मत होई नै मिली रँहआ । 11 कजोकि हे मेरे भाऊओ, खलोये दे परवारे दे लोकां मिन्जो तुहां दे बारे च दसेया कि तुहां च झगडे होआ करदे हन । 12 मेरे ग्लाणे दा मतलब एह ऐ कि तुहां च कोई तां अपणे आप्पे जो "पौलुसे दा," कोई "अपुल्लोसे दा," कोई "केफा दा" तां कोई "मसीह दा" ग्लांदा ऐ । 13 क्या मसीह बंडूईया, क्या पौलुस तुहां ताई सूलिया पर दूंगेया, या तुहां जो पौलुसे दे नांये पर बपतिस्मा मिलेया । 14 मैं परमात्मं दा धन्यावाद ऐ कि क्रिस्पुस कने गयुस जो छड्डी मैं तुहां च कुसी जो भी बपतिस्मा नी दिता । 15 कुत्थी इआं ना होयें कि कोई ग्लां कि तुहां जो मेरे नांये पर बपतिस्मा मिलेया । 16 कने हाँ, मैं स्तिफनास दे परवारे जो भी

बपतिस्मा दिता; इन्हां जो छड्डी मैं नी जाणदा कि मैं होर कुसी जो बपतिस्मा दिता । 17 कजोकि मसीह नै मिन्जो बपतिस्मा दैणे जो नी, अपर सुसमाचार सणाणे ताई घल्लया ऐ, कने एह भी शब्दां दे ज्ञान मताबक नी, इआं ना होयें कि मसीह दी सूली बेकार ठेहरे ।

मसीह परमात्मं दा ज्ञान कने सामर्थ ऐ

18 कजोकि सूलिया दी काहणी नाश होणे आळेयां ताई मूर्खता ऐ, अपर अहां उद्धार पाणे आळेयां ताई परमात्मं दी सामर्थ ऐ । 19 कजोकि लिख्या ऐ, "मैं अक्कमंदा दिया अक्का जो नाश करगा, कने समझदारां दी समझा जो तुच्छ करी दिंगा ।"

20 कुत्थु रँहआ अक्कमंद, कतांह रँहआ शास्त्री, कतांह रँहआ इस संसारे दा विवादी, क्या परमात्मं संसारे दे ज्ञाने जो मूर्खता नी ठेहराया । 21 कजोकि जाहू परमात्मं ज्ञान मताबक संसारे ज्ञाने ते परमात्मं जो नी जाणेया, तां परमात्मं जो एह खरा कि इस प्रचार दी मूर्खता दिया बजाह ते वसुआस करणे आळेयां जो उद्धार दें । 22 यहूदी तां नशाण चाहंदे हन, कने यूनानी ज्ञाने दी तोपा च हन, 23 अपर अहां ता तिसा सूलिया पर दूंगेयो होये मसीह दा प्रचार करदे हन, जेहड़ा यहूदियां ताई ठोकर दी बजाह कने गैर - यहूदियां ताई मूर्खता ऐ; 24 अपर जेहड़े सदेयो हन, क्या यहूदी क्या यूनानी, तिन्हां अल्ल मसीह परमात्मं दी सामर्थ कने परमात्मं दा ज्ञान ऐ । 25 कजोकि परमात्मं दी मूर्खता माणु दे ज्ञाने ते भी ज्ञानवान ऐ, कने परमात्मं दी कमजोरी माणु दे जोरे ते बड़ी बलवान ऐ ।

26 हे भाऊओ अपणे सद्दे जाणे दे बारे तां सोचा कि ना शरीरे मताबक बडे ज्ञानवान, कने ना बडे सामर्थी, कने ना बडे कुलीन सदेयो हन । 27 अपर परमात्मं संसारे दे मूर्खां जो चुणी लैआ ऐ कि ज्ञानवानां जो शर्मिदा करन, कने परमात्मां संसारे दे कमजोरेयां जो चुणी लैआ ऐ कि ताकतवरां जो शर्मिदा करन; 28 कने परमात्मं संसारे दे नीचेयां कने गिरेयां जो, अपर जेहड़े गिणतियां च भी नी हन तिन्हां जो भी चुणी लैआ कि जेहड़े हन तिन्हां जो बेकार ठेहरान । 29 तांकि कोई माणु परमात्मं दे सामणे कमंड ना करी पां । 30 अपर तिसदे पास्से ते तुहां मसीह यीशु च हन, जेहड़े परमात्मं दे पास्से ते अहां ताई ज्ञान ठेहरेया, मतलब धर्म, कने पवित्रता कने छुटकारा; 31 तांकि जिआं लिख्या ऐ, तिआं ई होयें, जेहड़े कमंड करन सैह प्रभु च कमंड करन ।

कूसित मसीह दे बारे च संदेश

2 हे भाऊओ, जाहू मैं परमात्मं दा भेद सणांदा सणांदा तुहां अल्ल आया, तां शब्दां या ज्ञाने दी उत्तमता दे सौगी नी आया । 2 कजोकि मैं एह ठाणी लैआ था कि तुहां बिच यीशु मसीह अपर सूलिया पर टूंगेयो होये मसीह जो छड्डी होर कुसी भी गल्ला जो नी जाणे । 3 मैं कमजोरियां कने डरे सौगी कने बड़ा थरथरांदा होया तुहां सौगी रैहूआ; 4 कने मेरे वचन, कने मेरे प्रचारे च ज्ञाने दी लुभाणे आळियां गल्लां नी, अपर आत्मां कने सामर्थी दा सबूत था, 5 इसताई कि तुहां दा वसुआस माणुआं दे ज्ञान पर नी, अपर परमात्मं दी सामर्थी पर निर्भर हन ।

परमात्मं दा ज्ञान

6 भिरी भी सिद्ध लोकां च अहां ज्ञान सणांदा हन; अपर इस संसार दा कने इस संसार दे नाश होणे आळे हाकमां दा ज्ञान नी ऐ, 7 अपर अहां परमात्मं दे सैह गुप्त ज्ञान, भेदे दी रीतिया पर दस्सदे हन, जिसियो परमात्मं सनातन ते म्हाारी महिमा ताई ठेहराया । 8 जिसियो इस संसारे दे हाकमां च कुणी नी जाणेया, कजोकि जे सैह जाणदे तां तेजोमय प्रभु जो सूलिया पर नी टूंगे । 9 अपर जिआं लिख्या ऐ,

“जेहड्डी गल्लां अंखी नैं नी दिखियां कनां नैं नी सुणियां, कने जेहिड्यां गल्लां माणु दे चित च नी चढियां, सैह ई हन जेहिड्यां परमात्मं अप्पु नैं प्यार रखणे आळ्यां ताई त्यार कितियां हन ।”

10 अपर परमात्मं तिन्हां जो अपणियां आत्मां दिया बजाह ते अहां पर प्रकट कित्ता, कजोकि आत्मां सारियां गल्लां, अपर परमात्मं दियां गूढ गल्लां भी जांचदा ऐ । 11 माणुआं च कुण कुसी माणु दियां गल्लां जाणदा ऐ, सिर्फ माणु दी आत्मां जेहड्डी तिस च ऐ, तिआं ई परमात्मं दियां गल्लां भी कोई नी जाणदा, सिर्फ परमात्मं दी आत्मां । 12 अपर अहां संसारे दी आत्मां नी, अपर सैह आत्मां पाईयो ऐ जेहड्डी परमात्मं दे पास्से ते ऐ कि अहां तिन्हां गल्लां जो जाणन जेहिड्यां परमात्मं अहां जो दितियां हन, 13 जिन्हां जो अहां माणुआं दे ज्ञाने दी सखाईयां गल्लां च नी, अपर आत्मां दी सखाई होई गल्लां च, आत्मिक गल्ल आत्मिक गल्लां नैं मिलाई मिलाई नैं सणांदा हन । 14 अपर शारीरिक माणु परमात्मं दी आत्मां दी गल्लां ग्रहण नी करदा, कजोकि सैह तिसदिया नजरा च मूर्खता दियां गल्लां हन, कने ना सैह तिन्हां जो जाणी सकदा ऐ कजोकि तिन्हां दी जांच आत्मिक रीतिया नैं होंदी ऐ । 15 आत्मिक माणु सब कुच्छ जांचदा ऐ, अपर सैह अप्पु कुसी नैं परखेया नी जांदा । 16 “कजोकि प्रभु दा मन कुणी जाणेया ऐ कि तिसियो सखान?” अपर अहां च मसीह दा मन ऐ ।

कलेसिया च गुटबन्दी दी निंदा

3 हे भाऊओ, मैं तुहां नैं इस तरीके नैं गल्लां नी करी सकेया जिआं आत्मिक लोकां नैं, अपर जिआं शारीरिक लोकां नैं, कने तिन्हां नैं जेहडे मसीह च बच्चे हन । 2 मैं तुहां जो दूद पियाया, अन्न नी खलाया; कजोकि तुहां तिसियो नी खाई सकदे थे; अपर अल्ली तिकर भी नी खाई सकदे हन, 3 कजोकि अल्ली तिकर शारीरिक हन । इसताई कि जाहू तुहां च डाह कने झगडा ऐ, तां क्या तुहां शारीरिक नी, कने क्या माणु दी रीतिया पर नी चलदे । 4 कजोकि जाहू इक्क ग्लांदा ऐ, “मैं पौलुसे दा ऐ, कने दूआ, “मैं अपुलोसे दा ऐ, तां क्या तुहां माणु नी ।

5 अपुलोस क्या ऐ, कने पौलुस क्या ऐ, सिर्फ सेवक, जिन्हां दिया बजाह ते तुहां वसुआस कित्ता, जिआं हर इक्की जो प्रभुयें दित्या । 6 मैं लगाया, अपुलोसे सींचया, अपर परमात्मं बधाया । 7 इसताई ना तां लगाणे आळा कुच्छ ऐ कने नी सींचणे आळा, अपर परमात्मां ई सब कुच्छ ऐ जेहडा बधाणेआळा ऐ । 8 लगाणेआळा कने सींचणेआळा दोयो इक्क हन; अपर हर इक्क माणु अपणियां ई मेहणता मताबक अपणी ई दिहाडी पांगा । 9 कजोकि अहां परमात्मं दे कम्मे करणे आळे हन; तुहां परमात्मं दी खेती कने परमात्मं दी रचनां हन । 10 परमात्मं दे तिस अनुग्रह मताबक जेहडा मिन्जो दित्या, मैं अक्कमंद राजमिस्त्री साइआं नीई पाई, कने दूआ तिस पर रद्दा रखदा ऐ । अपर हर इक्क माणु चुकना रैहू कि सैह तिस पर किआं रद्दा रखदा ऐ । 11 कजोकि तिसा नीआं जो छड्डी जेहडी पैइयो ऐ, कने सैह यीशु मसीह ऐ,

कोई दई नीई पाई नी सकदा । 12 जे कोई इसा नीआं पर सोना या चांदी या कीमती पत्थर या लकड़ी या घाह या फूस दा रद्दा रखे, 13 तां हर इक्क दा कम्म प्रकट होई जांगा; कजोकि सैह दिन तिसियो दस्सगा, इसताई कि अग्गी सौगी प्रकट हुंगा कने सैह अग्ग हर इक्की दा कम्म परखगी कि किआं नी । 14 जिसदा कम्म तिस पर बणेयां होया पक्का रैहूगा, सैह दिहाडी पांगा । 15 जे कुसी दा कम्म जळी जांगा, तां सैह घाटा पांगा; अपर सैह अप्पु जाहू बची जांगा अपर जळदे जळदे । 16 क्या तुहां नी जाणदे कि तुहां परमात्मं दे मंदरे हन, कने परमात्मं दी आत्मां तुहां च वास करदी ऐ । 17 जे कोई परमात्मं दे मंदरे जो नाश करगा तां परमात्मां तिसियो नाश करगा; कजोकि परमात्मं दा मंदर पवित्र ऐ, कने सैह तुहां हन ।

18 कोई अपने आप्पे जो धोखा ना दें । जे तुहां च कोई इस संसारे च अपने आप्पे जो ज्ञानी समझे, तां मूर्ख बणे कि ज्ञानी होई जा । 19 कजोकि इस संसार दा ज्ञान परमात्मं अल्ल मूर्खता ऐ, जिआं लिख्या ऐ, “सैह ज्ञानियां जो तिन्हां दी चलाकिया च फसाई दिंदा ऐ, 20 कने भिरी, “प्रभु ज्ञानियां दे वचारां जो जाणदा ऐ कि सैह बेकार हन । 21 इसताई माणुआं पर कोई कमंड ना करें, कजोकि सब कुच्छ तुहां दा ऐ: 22 क्या पौलुस क्या अपुलोस, क्या कैफा, क्या संसार, क्या जिन्दगी, क्या मरण, क्या वर्तमान, क्या भविष्य, सब कुच्छ तुहां दा ऐ, 23 कने तुहां मसीह दे हन कने मसीह परमात्मं दा ऐ ।

मसीह दे चेले

4 माणु अहां जो मसीह दे सेवक कने परमात्मं दे भेदां दे भंडारी समझन । 2 भिरी ऐत्थू भंडारिये च एह गल्ल दिक्खी जांदी ऐ कि सैह वसुआसे जोगा होयें । 3 अपर मेरी नजरा च एह बड़ी छोटी गल्ल ऐ कि तुहां या माणुआं दा कोई न्यायी मिन्जो परखें, अपर मैं अप्पु अपने आप्पे जो नी परखदा । 4 कजोकि मेरा मन मिन्जो कुसी गल्ला च दोषी नी ठेहरांदा, अपर इसते मैं बेकसूर नी ठेहरांदा, कजोकि मिन्जो परखणे आळा प्रभु ऐ । 5 इसताई जाहू तिकर प्रभु नी ओयें, बगते ते पैहलें कुसी गल्ला दा न्याय मत करा । औत्थू नैहरे दिया छूपियां गल्लां जोतिया च दस्सगा, कने मनां दे अभिप्रायां जो प्रकट करगा, ताहू परमात्मं दे पास्से ते हर इक्की दी प्रशंसा होंगी ।

6 हे भाऊओ, मैं इन्हां गल्लां च तुहां ताई अपणी कने अपुलोस दी चर्चा उदारण दी रीतिया पर दित्ती ऐ, इसताई कि तुहां अहां दे दुआरा एह सीखा कि लिख्यो ते गांह नी बधणा, कने इक्की दे पक्षे च कने दूये दे वरखलाफ च गर्व नी करणां । 7 कजोकि तिजो च कने दूये च कुण भेद करदा ऐ, कने तिजो अल्ल क्या ऐ जेहडा तैं (दूये ते) नी पाया? कने जाहू कि तैं (दूये ते) पाया ऐ, तां देहया कमंड कजो करदा ऐ कि मना नी पाया?

8 तुहां तां मगन होई चुकेयो, तुहां मीर होई चुकेयो, तुहां अहां दे बगैर राज कित्ता; अपर खरा हुंदा कि तुहां राज करदे कि अहां भी तुहां सौगी राज करदे । 9 मेरी समझा च परमात्मं अहां चेलयां जो सारेयां दे बाच तिन्हां लोकां साइआं ठेहराया ऐ, जिन्हां दी मौता दा हुक्म होई चुकेया होयें; कजोकि अहां संसार कने सुअर्गदूतां कने माणुआं ताई इक्क तमाशा ठेहरेयो हन । 10 अहां मसीह ताई मूर्ख हन, अपर तुहा मसीह च अक्कमंद होआ; अहां कमजोर ऐ, अपर तुहां ताकतवर होआ । तुहां आदर पांदे हन, अपर अहां दा अपमान हुंदा ऐ । 11 अहां इस बगते तिकर भूखे प्यासे कने नंगे हन, कने मुक्के खांदे हन कने मारे मारे फिरदे हन; 12 कने अपने ही हत्थां नैं कम्म करी नैं मेहणत करदे हन । लोक अहां जो बुरा ग्लांदा हन, अहां आशीर्वाद दिंदे हन, सैह सतांदे हन, अहां सेहंदे हन । 13 सैह बदनाम करदे हन, अहां विणती करदे हन । अहां अज्जे तिकर संसारे दा कूडा कने सारियां चीज्जां दी खुरचणे साइआं ठेहरे हन ।

चतौनी

14 तुहां जो शर्मिंदा करणे ताई एह गल्लां नी लिखदा, अपर अपणां प्यारा जागत जाणी नैं तुहां जो चितांदा ऐ । 15 कजोकि जे मसीह च तुहां सखाणे आळे दस हजार भी होंदे, तमी तुहां दे पिता बडेयां ते नी; इसताई कि मसीह यीशु च सुसमाचारे दिया बजाह ते मैं तुहां दा पिता होया । 16 इसताई मैं तुहां नैं विणती करदा कि मेरे साइआं चाल चला । 17 इसताई मैं तमीथियुस जो जेहडा प्रभु च मेरा प्यारा कने वसुआसे जोगा पुतर ऐ, तुहां अल्ल घल्लया ऐ । सैह तुहां जो मसीह च मेरा चरित्र याद करांगा, जिआं कि मैं हर इक्क जगाह हर

इक्की कलेसिया च शिक्षा दिंदा । 18 कुच्छ तां ऐदेय फूली गैयो हन, मना में तुहां अल्ल ओणे आळा नी । 19 अपर प्रभुयें चाया तां में तुहां अल्ल तौळी ई ओंगा, कने तिन्हां फूलेयां दी गल्लां जो नी, अपर तिन्हां दी सामर्थी जो जाणी लेंगा । 20 कजोकि परमात्में दा राज्ज गल्लां च नी अपर सामर्थी च ऐ । 21 तुहां क्या चाहंदे हन, क्या मैं छडी लैई नैं तुहां अल्ल ओयें, या प्यार कने नम्रता दी आत्मां सौगी ।

कलेसिया च दुराचार

5 ऐत्थू तिकर सुणने च ओंदा ऐ कि तुहां च व्यभिचार हुंदा ऐ, अपर देहया व्यभिचार जेहडा गेर - यहुदियां च भी नी हुंदा कि इक्क माणु अपणे बुडे दी लाडिया जो रखदा ऐ । 2 कने तुहां शोक तां नी करदे, जिसते ऐदेया कम्म करणे आळा तुहां दे बिचे ते कडेया जांदा, अपर कंमंड करदे हन । 3 मैं तां शरीर दे भाव ते दूर था, अपर आत्मां दे भाव ते तुहां सौगी होई नैं माना उपस्थित दी हालत ऐदेय कम्म करणे आळे दे बारे च एह हुक्म दैई चुकेया ऐ । 4 कि जाहू तुहां कने मेरी आत्मां, अहां दे प्रभु यीशु दी सामर्थी सौगी किट्टे हन, तां ऐदेया माणु अहां दे प्रभु यीशु दे नांये ते । 5 शरीर दे विनाश ताई सैताने दे हुआले किता जां, तांकि तिसदी आत्मां प्रभु यीशु दे दिनें उद्धार पां ।

6 तुहां जो कंमंड करणां खरा नी; क्या तुहां नी जाणदे कि थोडा देहया खमीर पूरे गुन्नेयो आटे जो खमीर करी दिंदा ऐ । 7 पराणे खमीरे जो कड्डी नैं अपणे आप्पे जो शुद्ध करा कि नौआं गुन्नेया आटा बणी जां: तांकि तुहां बगैर खमीरे दे हन । कजोकि अहां दा भी फसह, जेहडा मसीह ऐ, बलिदान होया ऐ । 8 इसताई ओआ, अहां तौआरे च खुशी मनान, नी तां पराणे खमीरे ते कने ना बुराईया ते कने दुष्टता दे खमीर ते, अपर सीधाईया कने सचाईया दी बगैर खमीरे दिया रोतिया नैं ।

9 मैं अपणियां चिट्टिया च तुहां जो लिख्या ऐ कि व्यभिचारियां दी संगती मत करदे । 10 एह नी कि तुहां बिल्कुल इस संसार दे व्यभिचारियां या लोभियां, या नैहरा करणेआळेयां, या मूर्तिपूजकां दी संगती मत करा; कजोकि इसा हालता च तां तुहां जो संसारे ते निकळी जाणां ई पोंगा । 11 अपर मेरा ग्लाणां एह ऐ कि जे कोई भाऊ केहलाई नैं, व्यभिचारी, या लोभी, या मूर्तिपूजक, या गाली दैणे आळा, या पियक्कड, या नैहरा करणे आळा होयें, तां तिसदी संगती मत करदे; अपर ऐदेय माणुये सौगी खाणां भी मत खा । 12 कजोकि मिन्जो बाहर आळेयां दा न्याय करणे ते क्या कम्म, क्या तुहां अंदरे आळेयां दा न्याय नी करदे, 13 अपर बाहर आळेयां दा न्याय परमात्मां नी करदा ऐ । इसताई तिस कुकर्मिये जो अपणे बिचे ते कड्डी दैआ ।

मसीहियां च मुकदमेबाजी

6 क्या तुहां च कुसी जो एह हिम्मत ऐ कि जाहू दूये सौगी झगडा होयें, तां फैसले ताई अधर्मियां अल्ल जान कने पवित्र लोकां अल्ल नी जान, 2 क्या तुहां नी जाणदे कि पवित्र लोक संसार दा न्याय करणे, इसताई जाहू तुहां जो संसारे दा न्याय करणां ऐ, तां क्या तुहां छोटे ते छोटेयां झगड्यां दा भी फैसला करणे जोगे नी । 3 क्या तुहां नी जाणदे कि अहां सुअर्गदूतां दा न्याय करणे, तां क्या सांसारिक गल्लां दा फैसला ना करन । 4 जे तुहां जो सांसारिक गल्लां दा फैसला करणां होयें, तां क्या तिन्हां ई जो बैठां जेहडे कलेसिया च कुच्छ नी समझे जांदे हन । 5 मैं तुहां जो शर्मिंदा करणे ताई एह ग्लांदा । क्या सचमुच तुहां च इक्क भी अक्कमंद नी मिलदा, जेहडा अपणे भाऊआं दा फैसला करी सकें । 6 तुहां च भाऊ भाऊ च मुकदमा हुंदा ऐ, कने सैह भी वेवसुआसियां सामणे ।

7 अपर सचमुच तुहां च बडा दोष तां एह ऐ कि अप्पु च मुकदमा करदे हन । अन्याय कजो नी सेहंदे, अपणां घाटा कजो नी सेहंदे । 8 अपर तुहां तां अप्पु अन्याय करदे कने घाटा पहुचांदे हन, कने सैह भी भाऊआं जो । 9 क्या तुहां नी जाणदे कि अन्यायी लोक परमात्में दे राज्ज दे वारस नी होंगे, धोखा ना खा; ना वेश्यगामी, ना मूर्तिपूजक, ना परस्त्रीगामी, ना लुचे, ना मरदगामी, 10 ना चोर, ना लोभी, ना पियक्कड, ना गाली दैणे आळा, ना नैहरा करणे आळा परमात्में दे राज्ज दे वारस होंगे । 11 कने तुहां च कितणे ऐदेय ई थे, अपर तुहां प्रभु यीशु मसीह दे नांये ते कने अहां दे परमात्में दी आत्मां ते धोत्ते गैयो कने पवित्र होये कने धर्मी ठेहे ।

शरीर परमात्में दी महिमा ताई

12 सारियां चीज्जां मेरे ताई ठीक हन, अपर सारियां चीज्जां फायदे दी नी; सारियां चीज्जां मेरे ताई ठीक हन, अपर मैं कुसी गला दे अधीन नी हुंगा । 13 खाणां पेटे ताई, कने पेट खाणे ताई ऐ, अपर परमात्में इस जो कने तिस जो दूनी जो खत्म करगा । अपर देह व्यभिचारे ताई नी, अपर प्रभु ताई ऐ, कने प्रभु देह ताई ऐ । 14 परमात्में अपणियां सामर्थी ते प्रभु जो जिंदा कित्या, कने अहां जो भी जिंदा करगा । 15 क्या तुहां नी जाणदे कि तुहां दी देह मसीह दे अंगा लैई नैं तिन्हां जो वेश्या दे अंग बणां, कदीभी नी । 16 क्या तुहां नी जाणदे कि जेहडा कोई वेश्या नैं संगती करदा ऐ, सैह तिसा सौगी इक्क तन होई जांदा ऐ, कजोकि लिख्या ऐ, सैह दोनां इक्क तन होंगे । 17 कने जेहडा प्रभु दी संगती च रैहंदा ऐ, सैह तिस सौगी आत्मां होई जांदा ऐ । 18 व्यभिचारे ते बची रैहंदा । जितणे होर पाप माणु करदा ऐ सैह देह दे वरखलाफ पाप करदा ऐ । 19 क्या तुहां नी जाणदे कि तुहां दी देह पवित्र आत्मां दा मंदर ऐ, जेहडा तुहां च बसेया होया ऐ कने तुहां जो परमात्में दे पाससे ते मिलेया ऐ; कने तुहां अपणे नी हन, 20 कजोकि दाम दैई करी मूले लैयो हन, इसताई अपणे शरीरे दिया बजाह ते परमात्में दी महिमा करा ।

व्याह ते सम्बन्धित सबाल

7 तिन्हां गल्लां दे बारे च जेहडियां तुहां लिख्यां, एह खरा ऐ कि मरद जणांसा जो ना छूयें । 2 अपर व्यभिचारे दे डरे ते हर इक्क मरद दी लाडी, कने हर इक्क जणांसा दा लाडा होयें । 3 लाडा अपणी लाडिया दा हक्क पूरा करे; कने तिआं ई लाडी भी अपणे लाडे दा । 4 लाडिया जो अपणी देह पर हक्क नी अपर तिस दे लाडे दा हक्क ऐ; तिआं ई लाडे जो भी अपणियां देही पर हक्क नी, अपर लाडिया दा ऐ । 5 तुहां इक्की दूये ते लग्न मत रैहंदा; अपर सिर्फ कुच्छ बरते तिकर अप्पु च समझौता करी लैआ कि प्रार्थना ताई छुट्टी मिले, कने भिरी इक्की सौगी रैहंदा, इआं ना होयें कि तुहां दे असंयम दिया बजाह ते सैतान तुहां जो परखे । 6 अपर मैं जेहडा एह ग्लांदा सैह अनुचित ऐ ना कि हुक्म । 7 मैं एह चाहंदा कि जिआं मैं ऐ, तिआं ई सारे माणु होन, अपर हर इक्की जो परमात्में दे पाससे ते खास खास वरदान मिलेयो; कुसी जो कुसी प्रकार दा, कने कुसी जो कुसी होर प्रकार दा ।

8 अपर मैं कुआरियां कने विधवाआं दे बारे च ग्लांदा कि तिन्हां ताई ऐदेया रैहणां खरा ऐ, जिआं मैं ऐ । 9 अपर जे सैह संयम नी करी सकन, तां व्याह करन; कजोकि व्याह करणां कामातुर रैहणे ते खरा ऐ ।

10 जिन्हां दा व्याह होई गैआ, तिन्हां जो मैं नी, अपर प्रभु हुक्म दिंदा ऐ कि लाडी अपणे लाडे ते लग्न ना होयें- 11 कने जे लग्न भी होई जां, तां बगैर दूआ व्याह किचे रैहंदा; या अपणे लाडे नैं भिरी मेल करी लें - कने ना लाडा अपणियां लाडीया जो छड्डें ।

12 दूयेयां सौगी प्रभु नी, अपर मैं ई ग्लांदा, जे कुसी भाऊये दी लाडी वसुआस नी रखदी होयें कने तिस सौगी रैहंते ते खुश ऐ: सैह तिसियो ना छड्डें । 13 जिसा जणांसा दा लाडा वसुआस नी रखदा होयें कने तिस सौगी रैहणे ते खुश ऐ: सैह लाडे जो ना छड्डें । 14 कजोकि ऐदेया लाडा जेहडा वसुआस नी रखदा ऐ, सैह अपणियां लाडिया दिया बजाह ते पवित्र ठेहरांदा ऐ; कने ऐदेई लाडी जेहडी वसुआस नी रखदी, लाडे दिया बजाह ते पवित्र ठेहरांदा ऐ; नी तां तुहां दे बाल बच्चे अशुद्ध होंदे, अपर हुण तां पवित्र हन । 15 अपर जेहडा मरद वसुआस नी रखदा, जे सैह लग्न होयें तां लग्न होणां दैआ, ऐदेई हालता च कोई भाऊ बैहण बंधने च नी । परमात्में अहां जो मेलमिलाप ताई सदेया ऐ । 16 कजोकि हे जणांस, तू क्या जाणदी ऐ कि तू अपणे लाडे दा उद्धार कराई लेंगी, कने हे मरद, तू क्या जाणदा ऐ कि अपणियां लाडीया दा उद्धार कराई लेंगी ।

परमात्में दी बुलाहटा मताबक चला

17 जिआं प्रभु हर इक्क जो बंडेया ऐ, कने जिआं परमात्में हर इक्की जो सदेया ऐ, तिआं ई सैह चलन । मैं सारियां कलेसियां च ऐदेया ई ठेहरांदा ऐ । 18 जेहडा खतणां कित्या सदेया हो, सैह खतणांरहित ना बणे । जेहडा खतणांरहित सदेया हो, सैह खतणां नी करां । 19 ना खतणां कुच्छ ऐ कने ना खतणांरहित, अपर परमात्में दा हुक्मां जा मनणा ई सब कुच्छ ऐ । 20 हर इक्क

जण जिसा हालता च सदेया होयें, तिसा च रँह । 21 जे तू दासे दिया हालता च सदेया होयें तां चिंता मत कर; अपर जे तू अजाद होई सके, तां ऐदेया ई कम्म कर । 22 कजोकि जेहड़ा दासे दिया हालता च प्रभु च सदेया ऐ, सैह प्रभु दा अजाद कित्या ऐ । तिआं ई जेहड़ा अजादिया दी हालता च सदेया ऐ, सैह मसीह दा दास ऐ । 23 तुहां दाम दैई नैं मूलें लैयो हन; माणुआं दे दास मत बणां । 24 हे भाईयो, जेहड़ा कोई जिसा हालता च सदेया होयें, सैह तिस च परमात्मैं सौगी रँह ।

कुआरियां कने विधवायें

25 कुआरियां दे बारे च प्रभु दा कोई हुक्म नी मिलेया, अपर वसुआसे जोग्गा होणे ताई जिआं दया प्रभुयें मिन्जो पर किस्ती ऐ. तिस दे मताबक सम्पति दिंदा । 26 मेरी समझा च एह खरा ऐ कि अजकल क्लेश दिया बजाह ते, माणु जिआं ऐ तिआं ई रँह । 27 जे तेरी लाड़ी ऐ, तां तिसा ते लग्न होणे दा प्रयास मत कर; कने जे तेरी लाड़ी नी, तां लाड़ी दी तोप मत कर । 28 अपर जे तू व्याह भी करें, तां पाप नी; कने जे कुआंरी व्याइयो तां कोई पाप नी । अपर ऐदेयां जो शारीरिक दुख हुंगा, कने में बचाणा चाहंदा । 29 हे भाईयो, मैं एह ग्लांदा कि बत घट किता गैआ, इसताई चाइदा कि जिन्हां दी लाड़ी होयें, सैह ऐदेय होन मना तिन्हां दी लाड़ी नी; 30 कने रोणे आळे ऐदेय होन, मना रोंदे नी; कने खुशी करणे आळे ऐदेय होन, मना खुशी नी करदे; कने मूलें लैणे आळे ऐदेय होन मना तिन्हां अल्ल कुच्छ ऐ ई नी । 31 कने इस संसारे सौगी व्यवहार करणयाले ऐदेय होन, कि संसारे दे ई ना होई लें; कजोकि इस संसारे दी रीतिया कने व्यवहार बदलदे जांदे हन ।

32 मैं एह चाहंदा कि तुहां जो चिंता ना होयें । कुआरा मरद प्रभु दी गल्लां दी चिंता च रँहदा कि प्रभु जो किआं खुश रखन । 33 अपर कुआरा माणु संसारे दियां गल्लां दी चिंता च रँहदा ऐ कि अपणियां लाडिया जो कुस तरीके नैं खुश रखें । 34 शादी शुदा कने कुआरे च भी फर्क ऐ, कुआंरी प्रभु दी चिंता च रँहदी ऐ कि सैह शरीरे च कने आत्मां दुनी च पवित्र होयें, अपर शादी शुदा आळी संसारे दी चिंता च रँहदी ऐ कि अपणे लाडे जो खुश रखें । 35 मैं एह गल्ल तुहां दे फायदे ताई ग्लांदा, ना कि तुहां जो फसाणे ताई, अपर इसताई कि जिआं शोभा दिंदा ऐ तिआं ई किता जां, कि तुहां इक्क चित होई नैं प्रभु दी सेवा च लग्गी रँहआ ।

36 जे कोई एह समझें कि मैं अपणियां तिसा कुआंरिया दा हक्क मारा दा ऐ, जिसा दी जुआनी ढला दी ऐ, कने जरूरत भी होयें, तां जिआं चां तिआं करें, इस च पाप नी, सैह तिसा दा व्याह होणां दैआ । 37 अपर जेहड़ा मन च पक्का रँहदा ऐ, कने तिस जो जरूरत ना होयें, अपर अपणियां इच्छा पर हक्क रखदा होयें, कने अपणे मने च एह गल्ल ठाणी लैई होयें कि सैह कुआंरी कुडिया जो कुआंरी रखगा, सैह खरा करदा ऐ । 38 इसताई जेहड़ा अपणियां कुआंरिया दा व्याह करी दिंदा ऐ, सैह खरा करदा ऐ, कने जेहड़ा व्याह नी करी दिंदा, सैह होर भी खरा करदा ऐ ।

39 जाहू तिकर कुसी जणांसा दा लाड़ा जिंदा रँहदा ऐ, ताहू तिकर सैह बचूइयो ऐ: अपर जे तिसा दा लाड़ा मरी जां तां जिस नैं चां व्याह करी सकदी ऐ, अपर सिर्फ प्रभु च । 40 अपर जिदेयी ऐ जे तिदेयी रँह, तां मेरे वचारे च होर भी धन ऐ; कने मैं समझदा कि परमात्मैं दी आत्मां मिन्जो च भी ऐ ।

मूर्तियां जो चढाया गैआ खाणां

8 हुण मूर्तियां साइआं बलि दित्तियां होईयां चीज्जां दे बारे च अहां जाणदे हन कि अहां सारेयां जो ज्ञान ऐ । ज्ञान कमंड पैदा करदा ऐ, अपर प्यार नैं तरक्की होंदी ऐ । 2 जे कोई समझे कि मैं कुच्छ जाणदा, तां जिआं जाणना चाइदा तिआं अल्ली तिकर नी जाणदा । 3 अपर जे कोई परमात्मैं नैं प्यार रखदा ऐ, तां परमात्मां तिसियो पणछैणदा ऐ ।

4 कने मूर्तियां सामणे बलि दित्तियां होईयां चीज्जां खाणे दे बारे च अहां जाणदे हन कि मूर्ति संसारे च कोई चीज्जा नी, कने इक्की जो छड्डी होर कोई परमात्मां नी । 5 जे अम्बरे च कने धरतिया पर बडे ईश्वर केहलांदे हन - जिआं कि बडे ईश्वर कने बडे प्रभु ऐ --- 6 तमी अहां ताई तां इक्क ई परमात्मां ऐ, मतलब पिता जिस दे पाससे ते सारियां चीज्जां हन, कने अहां तिस ताई हन । कने इक्क ई प्रभु ऐ, मतलब यीशु मसीह जिसदिया बजाह ते सारियां चीज्जां होईयां, कने अहां भी तिसदिया बजाह ते हन ।

7 अपर सारे जो एह ज्ञान नी, अपर कुच्छ तां अल्ली तिकर मूर्ति जो कुच्छ समझणे दिया बजाह ते मूर्तियां सामणे बलि दित्तियां होईयां चीज्जां जो कुच्छ समझी करी खांदे हन, कने तिन्हां दा विवेक कमजोर होणे दिया बजाह ते अशुद्ध होई जांदा ऐ । 8 खाणां अहां जो परमात्मैं अल्ल नी पुज्जांदा । जे अहां नी खान तां म्हारी कुच्छ कमी नी, कने जे खान तां कुच्छ फायदा नी । 9 अपर चुकनै! ऐदेया ना होयें कि तुहां दी एह अजादी कुत्की कमजोरां ताई ठोकरा दी बजाह होई जां । 10 कजोकि जे कोई तिज्जो ज्ञानिये जो मूर्ति दे मंदर च खाणां खांदे दिक्खे कने सैह कमजोर जण हन, तां क्या तिसदे विवेके जो मूर्तियां सामणे बलि दित्तियां होई चीज्जां खाणे दी हिम्मत ना होई जांगी । 11 इस तरीके नैं तेरे ज्ञान दिया बजाह ते सैह कमजोर भाऊ जिस ताई मसीह मरेया, नाश होई जांगा । 12 इस तराह भाऊआं दे खिलाफ अपराध करणे ते कने तिन्हां दे कमजोर विवेके जो चोट पुज्जाणे ते, तुहां मसीह दे वरखलाफ अपराध करदे हन । 13 इसा बजाह ते जे खाणां मेरे भाऊये जो ठोकर खुआं, इआं ना होयें कि मैं अपणे भाऊये ताई ठोकरा दी बजाह बणें ।

चले दे हक्क कने कर्तव्य

9 क्या मैं अजाद नी, क्या मैं चेला नी, क्या मैं यीशु जो जेहड़ा अहां दा प्रभु ऐ, नी दिख्या, क्या तुहां प्रभु च मेरे बणांयो नी हन । 2 जे मैं दूयेयां ताई चेला नी, तमी तुहां ताई ता ऐ; कजोकि तुहां प्रभु च मेरी प्रेरिताई पर छाप हन ।

3 जेहड़ा मिन्जो जांचदे हन, तिन्हां ताई ऐही मेरा जबाब ऐ । 4 क्या अहां जो खाणे पीणे दा हक्क नी । 5 क्या अहां जो एह हक्क नी, कि कुसी मसीही बैहणा सौगी व्याह करी नैं तिस ताई फिरें, जिआं होर चेला कने प्रभु दे भाऊ कने कैफा करदे हन । 6 या सिर्फ मिन्जो कने बरनबास जो ई हक्क नी कि कमाई करणां छड्डे । 7 कुण कदी अपणी गिरह नैं खाई नैं सपाई दा कम्म करदा ऐ, कुण अंगूरा दा बाग लगाई नैं तिसदा फळ नी खांदा, कुण भेडां दी रखवाली करी नैं तिन्हां दा दूद नी पींदा ।

8 क्या मैं एह गल्लां माणु दी रीतिया पर ग्लांदा ऐ । 9 क्या व्यवस्था भी ऐही नी ग्लांदी, कजोकि मूसा दी व्यवस्था च लिख्या ऐ, बांदे बग्त चलदे दांदे (बळदे) दा मुँ नी बन्नणां । 10 क्या परमात्मैं दांदा (बळदां) दी चिंता करदा ऐ । 10 या खास करी नैं अहां ताई ग्लांदा ऐ । हाँ, अहां ताई ई लिख्या, कजोकि ठीक ऐ कि जोतणे आळा उम्मीदा सौगी जोतदा रँहआ कने बाणे आळा भागी होणे दी उम्मीदा नैं बांदा रँहआ । 11 जे जाहू कि अहां तुहां ताई आत्मिक चीज्जां बाईयां, तां क्या एह कोई बडी गल्ल ऐ कि तुहां दी शारीरिक चीज्जां दी फसल कटन । 12 जाहू दूयेयां दा तुहां पर एह हक्क ऐ, तां क्या अहां दा इसते जादा नी हुंगा, अपर अहां एह हक्क कम्म च नी लैयो; अपर सब कुच्छ झेलदे हन कि म्हारिया बजाह ते मसीह दे सुसमाचार च कुच्छ रुकावट नी होयें । 13 क्या तुहां नी जाणदे कि जेहड़े मंदरे च सेवा करदे हन, सैह मंदरे च खांदे हन; कने जेहड़ी वेदी दी सेवा करदे हन, सैह वेदी सौगी भागी होंदे हन । 14 इस तरीके नैं प्रभुयें भी ठेहराया कि जेहड़े लोक सुसमाचार सणांदे हन, तिन्हां दी तणखाह सुसमाचारे ते होयें ।

15 अपर मैं इन्हां ते कोई भी गल्ल कम्मे नी ओंदी, कने मैं एह गल्लां इसताई नी लिखियां कि मेरे ताई ऐदेया किता जां, कजोकि इसते तां मेरा मरणां ई खरा ऐ कि कोई मेरे कमंडे जो बेकार ठेहराये । 16 जे मैं सुसमाचार सणां, तां मिन्जो ताई कुच्छ कमंड दी गल्ल नी; कजोकि एह तां मिन्जो ताई जरूरी ऐ । जे मैं सुसमाचार नी सणां, तां मिन्जो पर हाय । 17 कजोकि जे अपणी इच्छा ते एह करदा तां दिहाड़ी मिन्जो मिलदी ऐ, कने जे अपणी इच्छा ते नी करदा तमी भंडारीपण मिन्जो सौपेया ऐ । 18 तां मेरी कुण देहई दिहाड़ी ऐ, एह कि सुसमाचार सणाने च मैं मसीह दा सुसमाचार सेत मंत करी दें, ऐत्थु तिकर कि सुसमाचार च जेहड़ा मेरा हक्क ऐ तिसजो भी मैं पूरिया रीतिया नैं कम्म च नी लैयोयें ।

19 कजोकि सबना ते अजाद होणे पर भी मैं अपणे आप्पे जो सारेयां दा दास बणाई दित्या ऐ कि जादा लोकां जो खीजी लैई ओयें । 20 मैं यहूदियां ताई यहूदी बणेयां कि यहूदियां जो खीजी लैई ओयें । जेहड़े लोक व्यवस्था दे अधीन हन तिन्हां ताई मैं व्यवस्था दे अधीन नी होणे पर भी व्यवस्था दे अधीन बणेयां कि तिन्हां जो जेहड़े व्यवस्था दे अधीन हन खीजी लैई ओयें । 21 व्यवस्थाहीनां ताई मैं जेहड़े परमात्मैं दी व्यवस्था ते हीन नी अपर मसीह दी व्यवस्था दे अधीन हन --- व्यवस्थाहीन साइआं बणेयां कि व्यवस्थाहीनां

जो खींजी लैई ओयें । 22 मैं कमजोरां ताई कमजोर बणेयां कि कमजोरेयां जो खींजी लैई ओयें । मैं सारे माणुआं ताई सब कुच्छ बणेयां कि कुसी ना कुसी रीतिया नैं कुसी इक्की दा उद्धार करां । 23 मैं एह सब कुच्छ सुसमाचारे ताई करदा कि होरनी सौगी तिसदा भागी होई जां ।

मसीही दौड़

24 क्या तुहां नी जाणदे कि दौड़ च दौड़दे सारे ई हन, अपर इनाम इक्क ई लैई जांदा ऐ, तुहां तिआं ई दौड़ा कि जीता । 25 हर इक्क पहलवाण सब तरां ह दा संयम करदा ऐ; सैह तां इक्क मुरझाणे आळे मुकुटे जो पाणे ताई एह सारा करदे ऐ, अपर अहां तां तिस मुकुटे ताई करदे हन जेहड़ा मुरझांदा नी । 26 इसताई मैं तां इसा रीतिया नैं दौड़दा, अपर लक्ष्यहीन नी; मैं भी इस तरीके नैं मुक्केयां नैं लड़दा, अपर तिस सड़आं नी जेहड़ा हौआ पीटदा होया लड़दा ऐ । 27 अपर मैं अपणियां देही जो मारदा कूटदा कने वशे च करी लेंदा, देहया ना होयें कि होरना जो प्रचार करी नैं मैं अप्पु ई कुस तरीके ते निकम्मा ठेहरें ।

इस्त्राएले दे इतिहासे च चतौनी

10 हे भाऊओ, मैं नी चाहंदा कि तुहां इसा गला ते अनजाण रैहआ कि अहां दे सारे पढ़दादे बदळे थलें थे, कने सारे दे सारे समंदर दे बिचे ते पार होई गै; 2 कने सारेयां बदळे च कने समुंदरे च, मूसा दा बपतिस्मा लैआ; 3 कने सारेयां इक्क ई आत्मिक खाणां खादा; 4 कने सारेयां इक्क ई आत्मिक पाणी पीता, कजोकि सैह तिसा आत्मिक चट्टानां नैं पींदे थे जेहड़ी तिन्हां सौगी सौगी चलदी थी, कने सैह चट्टान मसीह था । 5 अपर परमात्मां तिन्हां च मतेआं ते खुश नी होया, इसताई सैह बणे च ढेर होई गै ।

6 एह गलां अहां ताई उदारण ठेहरियां, कि जिआं तिन्हां लालच कित्ता, तिआं अहां बुरीयां चीझां दा लालच ना करन; 7 कने ना तुहां मूर्तिपूजक बणां, जिआं कि तिन्हां च कितणे बणी गैयो थे, जिआं लिख्या ऐ, "लोक खाणां पीणां बैठे, कने खेलणां कूदणां लगे ।" 8 कने ना अहां व्यभिचार करन, जिआं तिन्हां च कितणेयां कित्ता; कने इक्क दिन च त्रैई हजार मरी गै । 9 कने ना अहां प्रभु जो परखन, जिआं तिन्हां च कितणेयां कित्ता, कने सरपां दिया बजाह ते नाश किते गै । 10 कने ना तुहां कुड़कुड़ाआ, जिस तरीके नैं तिन्हां च कितणे कुड़कुड़ाये कने नाश करणे आळे दिया बजाह ते नाश किते गै । 11 अपर एह सारियां गलां, जेहड़ियां तिन्हां पर पैईयां, उदारणे दी रीति पर थी; कने सैह म्हारी चेतावणी ताई जेहड़े संसारे दे आखरी बते च रैहदे हन लिखियां हन । 12 इसताई जेहड़ा समझदा ऐ, मैं पक्का ऐ, "सैह चौकस रैह कि कुत्थी पैई ना जां । 13 तुहां कुसी ऐदेई परीक्षा च नी पै, जेहड़ी माणुये दे सेहणे ते बाहर ऐ । परमात्मां सच्चा ऐ कने सैह तुहां जो सामर्थ ते बाहर परीक्षा च नी पौणा दिंगा, अपर परीक्षा सौगी निकास भी करगा कि तुहां सेही सका ।

मूर्ति पूजा दे वरखलाफ चतौनी

14 इसा बजाह ते, हे मेरे प्यारेयो, मूर्तिपूजा ते बची रैहआ । 15 मैं अक्कमंद जाणी नैं तुहां नैं ग्लांदा ऐ, जेहड़ा मैं ग्लांदा, तिसियो तुहां परखा । 16 सैह धन्यावाद दा कटोरा, जिस पर अहां धन्यावाद करदे हन; क्या मसीह दे खूने दी सेहभागिता नी । 17 इसताई कि इक्क ई रोटी ऐ तां अहां भी जेहड़े मत्ते हन, इक देह हन: कजोकि अहां सारे तिसा इक्का रोटिया च भागी होंदे हन । 18 जेहड़े शरीरे दे भाव ते इस्त्राएली हन, तिन्हां जो दिक्खा: क्या बलिदानां दे खाणे आळे वेदिया दे सेहभागी नी? 19 भिरी मैं क्या ग्लांदा, क्या एह कि मूर्तिया पर चढ़ाया बलिदान कुच्छ ऐ, या मूर्ति कुच्छ ऐ । 20 नी, अपर एह कि होर जातिआं जेहड़ा बलिदान करदियां हन; सैह परमात्में ताई नी अपर दुष्टआत्मां ताई बलिदान करदे हन कने मैं नी चाहंदा कि तुहां दुष्टआत्मां दे सेहभागी होन । 21 तुहां प्रभु दे कटोरे कने दुष्टआत्मां दे कटोरे दूनी च नी पी सकदे । तुहां प्रभु दी मेज कने दुष्टआत्मां दी मेज दूनी दे साझी नी होई सकदे । 22 क्या अहां प्रभु जो गुस्सा दिलांदे हन, क्या अहां तिसते ताकतवर हन ।

सारा कुच्छ परमात्में दी महिमा ताई

23 सारियां चीझां मिन्जो ताई ठीक तां हन, अपर सारियां फायदे दियां नी सारियां चीझां मिन्जो ताई ठीक तां हन, अपर सारियां चीझां ते तरक्की नी । 24 कोई अपणी ई भलाईया जो नी, अपर दूयेयां दी भलाईया जो तोपा । 25 जेहड़ा कुच्छ कसाइआं दे ऐत्थु बिकदा ऐ, सैह खाआ कने विवेके दिया बजाह ते कुच्छ ना पूछा । 26 कजोकि धरती कने तिसदी भरपूरी प्रभु दी ऐ । 27 जे वेवसुआसियां च कोई तुहां जो न्यौता दें, कने तुहां जाणना चाया, तां जेहड़ा कुच्छ तुहां दे सामणे रखेया जां तिन्थु खाआ; होर बजाह कुच्छ ना पूछा । 28 अपर जे कोई तुहां नैं ग्लां, "एह ता मूर्तिया जो बलि दित्ती होई चीझ ऐ, "तां तिस दस्सणे आळे दिया बजाह ते कने विवेक दिया बजाह ते मत खाआ । 29 मेरा मतलब तेरा विवेक नी, अपर तिस दूये दा । खरा, मेरी अजादी दूये दे वचारे ते कजो परखी जां । 30 जे मैं धन्यावाद करी नैं साझी हुंदा ऐ, तां जिस पर मैं धन्यावाद करदा ऐ तिस दिया बजाह ते मेरी बदनामी कजो होंदी ऐ ।"

31 इसताई तुहां चाहे खाआ, चाहे पीया चाहे जेहड़ा कुच्छ करा, सभी कुच्छ परमात्में दी महिमा ताई करा । 32 तुहां ना यहूदियां, ना यूनानियां कने ना परमात्में दी कलेसिया ताई ठोकरा दी बजाह बणां । 33 जिआं मैं भी सारियां गलां च सबना जो खुश रखदा ऐ, कने अपणां नी अपर मतेआं दा फायदा तोपदा ऐ कि सैह उद्धार पान ।

11 तुहां मेरी चाल चला जिआं मैं मसीह दी चाल चलदा ऐ ।

अराधना च सर टकणां

2 हे भाऊओ, मैं तुहां जो सराहंदा कि सारियां गलां च तुहां मिन्जो याद करदे हन; कने जेहड़े रुआज तुहां जो सौंपेयो हन, तिन्हां दा पालण करदे हन । 3 अपर मैं चाहंदा ऐ कि तुहां एह जाणी लैआ कि हर इक्क मरदे दा मुँड मसीह ऐ, कने जणांसा दा मुँड मरद ऐ, कने मसीह दा मुँड परमात्मां ऐ । 4 जेहड़ा मरद मुँडे ढकी नैं प्रार्थना या भविष्यवाणी करदा ऐ, सैह अपणे मुँडे दा अपमान करदा ऐ । 5 अपर जेहड़ी जणांस नगे मुँडे प्रार्थना या भविष्यवाणी करदी ऐ, सैह अपणे मुँडे दा अपमान करदी ऐ, कजोकि सैह गंजी होणे दे बराबर ऐ । 6 जे जणांस चादरुये ना उठे तां बालां भी कटाई लें; जे जणांसा ताई बाल काटणा या गंजा होणां समां दी गल ऐ, तां चादर उठे । 7 हॉ मरदे दा अपणां मुँड ढकणा ठीक नी; कजोकि सैह परमात्में दा रूप कने महिमा ऐ; अपर जणांस मरदे दी महिमा ऐ । 8 कजोकि मरद जणांसा ते नी होया, अपर जणांस मरदे ते होई ऐ; 9 कने मरद जणांसा ताई नी बणांया, अपर जणांस मरदे ताई बणांईयो ऐ । 10 इसताई सुअर्गदूतां दिया बजाह ते जणांसा जो ठीक ऐ कि हक्क अपणे मुँडे पर रखे । 11 तमी प्रभु च ना तां जणांसा बगैर मरद, कने ना मरदे बगैर जणांस ऐ । 12 कजोकि जिआं जणांस मरदे ते ऐ, तिआं मरद जणांसा ते ऐ; अपर सारियां चीझां परमात्में ते हन । 13 तुहां अप्पु ई वचार करा, क्या जणांसा जो नगे मुँडे परमात्में नैं प्रार्थना करणां शोभा दिंदा ऐ । 14 क्या सुभाविक तरीके नैं भी तुहां नी जाणदे कि जे मरद लम्बे बाल रखें, तां तिस ताई अपमान ऐ । 15 अपर जे जणांस लम्बे बाल तिसा जो उदणे ताई दित्तेयो हन । 16 अपर जे कोई झगड़ा करणां चां, तां एह जाणी लैआ कि ना म्हारी कने ना परमात्में दी कलेसिया दी ऐदेई रीति ऐ ।

प्रभु भोज दे बारे च

(मत्ती 26 : 26-29 मरकुस 14 : 22-25 लूका 22 : 14-20)

17 अपर एह हुक्म दिंदे होये मैं तुहां जो नी सहारदा, इसताई कि तुहां दे किट्टे होणे ते भलाई नी, अपर घाटा हुंदा ऐ । 18 कजोकि पैहलें तां मैं एह सुणदा, कि जाहू तुहां कलेसिया च किट्टे होंदे हन तां तुहां च बैर हुंदा ऐ, कने मैं इस पर कुच्छ कुच्छ वसुआस भी करदा ऐ । 19 कजोकि दलबंदी भी तुहां च जरूर होंगी, इसताई कि जेहड़े लोक तुहां च खरे हन सैह प्रकट होई जान । 20 कने तुहां जेहड़े इक्की जगाह च किट्टे होंदे हन तां एह प्रभु भोज खाणे ताई नी, 21 कजोकि खाणे दे बग्त इक्की दूये नैं पैहलें अपणां भोज खाई लेदा ऐ, इस तरां कोई तां भूखा रैहदा ऐ कने कोई मतवाला होई जांदा ऐ । 22 क्या खाणे पीणे ताई तुहां दे घरे नी, या परमात्में दी कलेसिया जो तुच्छ जाणदे हन, कने जिन्हां अल नी ऐ तिन्हां जो शर्मिदा करदे हन, मैं तुहां नैं क्या ग्लां, क्या इसा

गल्ला च तुहां दी तारीफ करे? नी, मैं तारीफ नी करदा । 23 कजोकि एह गल्ल मिन्जो प्रभु ते पुज्जी, कने मैं तुहां जो भी पज्जाई दिक्ती कि प्रभु यीशुयें जिसा राती सैह पकडुआया गैआ, रोटी लैयी, 24 कने धन्यावाद करी मैं तिसायो तोड़ेया कने ग्लाय, "एह मेरी देह ऐ, जेहड़ी तुहां ताई ऐ, मेरी याद ताई ऐही करा करा ।" 25 इस तरीके नैं तिन्हीं बियारी दे पचाह ते कटोरा भी लैआ कने ग्लाय, "एह कटोरा मेरे खून च नौआं वादा ऐ: जाहू कदी भी पीआ, तां मेरी याद ताई ऐही करा करा ।" 26 कजोकि जाहू कदी तुहां एह रोटी खांदे कने इस कटोरे च पींदे हन, तां प्रभु दी मौता जो जाहू तिकर सैह नी ओये, प्रचार करदे हन । 27 इसताई जेहड़ा कोई गलत तरीके नैं प्रभु दी रोटी खां तिस कटोरे च पीये, सैह प्रभु दी देही कने खून दे अपराधी ठेहरगा । 28 इसताई माणु अपणे आप्पे जो जांची ले कने इस तरीके नैं इसा रोटिया च खां, कने इस कटोरे च पीये । 29 कजोकि जेहड़ा खांदे पींदे बगत प्रभु दी देही जो नी पणछेणे, सैह इस खाणे पीणे ते अपणे सज्जा लांदा ऐ । 30 इसा बजाह ते तुहां च मत्ते कमजोर कने रोगी हन, कने मत्ते सोई भी गै । 31 जे अहां अपणे आप्पे जो जांचदे तां सज्जा नी पांदे । 32 अपर प्रभु अहां जो सज्जा देई नैं म्हारी ताडणां करदा, इसताई कि अहां संसारे सौगी दोषी ना ठेहरन । 33 इसताई, हे मेरे भाऊओ, जाहू तुहां खाणे ताई इक्की दूये ताई ठेहरा करा । 34 जे कोई भूखा होयें तां अपणे घरे च खाई लें, जिसते तुहां दा कड्डा होणां सज्जा दी बजाह ना होयें । बाकि गल्लां जो मैं आई नैं ठीक करगा ।

आत्मिक वरदान

12 हे भाऊओ, मैं नी चाहंदा कि तुहां आत्मिक वरदानां ते अनजान रहूआ । 2 तुहां जाणदे हन कि जाहू तुहां होर जातिआं थियां, तां गूंगी मूर्तियां दे पचाह जिआं चलांदे थे, तिआं चलदे थे । 3 इसताई मैं तुहां जो चैतावणी दिंदा कि जेहड़ा कोई परमात्मं दी आत्मां दी अगुआईया नैं ग्लांदा ऐ, सैह नी ग्लांदा कि यीशु श्रापित ऐ; कने ना कोई पवित्र आत्मां दे बगैर ग्लाई सकदा ऐ कि यीशु प्रभु ऐ ।

4 वरदान तां कई तरांहे दे हन, अपर आत्मां इक्को ई ऐ; 5 कने सेवा भी कई तरांहे दियां हन, अपर प्रभु इक्को ई ऐ; 6 कने प्रभावशाली कम्म कई तरांहे दे हन, अपर परमात्मां इक्को ई ऐ, जेहड़ा सारेयां च हर तरांहे दा प्रभाव पैदा करदा ऐ । 7 अपर सारेयां जो फायदा पज्जाणे ताई हर इक्की जो आत्मां दी लौ दिंदा जांदा ऐ । 8 कजोकि इक्की जो आत्मां दिया बजाह ते अक्का दियां गल्लां दिक्तियां जादियां हन, कने दूयेयां जो तिसा आत्मां मताबक ज्ञाने दी गल्लां । 9 कुसी जो तिसा आत्मां नैं वसुआस कने कुसी जो तिसा इक्की आत्मां नैं चंगा करणे दा वरदान दिक्ता जांदा ऐ । 10 भिरी कुसी जो सामर्थी दे कम्म करणे दी शक्ति, कने कुसी जो भविष्यवाणी किक्ती, कने कुसी जो आत्मां दी परख, कने कुसी जो कई तरांहे दी भासा, कने कुसी जो भासा दा मतलब दस्सणा । 11 अपर एह सारे प्रभावशाली कम्म सैई हन इक्क आत्मां करांदा ऐ, कने जिसियो जेहड़ा चाहंदा ऐ सैह बंडी दिंदा ऐ ।

शरीर इक्क : अंग मते

12 कजोकि जिस तरांहे शरीर तां इक्क ऐ कने तिसा दे अंग मते हन, कने तिस इक्की शरीरे दे सारे अंग मते होणे पर भी सारे मिली नैं इक्क ई देह हन, तिस तरांहे मसीह भी ऐ । 13 कजोकि अहां सारेयां क्या यहूदी हन क्या यूनानी, क्या दास हन क्या अजाद, इक्की ई आत्मां दिया बजाह ते इक्क शरीर होणे ताई बपतिस्मा लैआ, कने अहां सारेयां जो इक्को ई आत्मां पिलाया ऐ । 14 इसताई कि शरीरे च इक्क ई अंग नी अपर मते हन । 15 जे पैर ग्लान, "मैं हत्थ नी, इसताई शरीरे दा नी," तां क्या सैह इसा बजाह ते शरीरे दा नी । 16 कने जे कनं ग्लान, "मैं अंख नी, इसताई शरीरे दा नी," तां क्या सैह इसा बजाह ते शरीरे दा नी । 17 जे सारी देह अंख ई होंदी तां सुणना कतांहे होंदा, जे सारी देह कनं ई होंदी तां सिंघणा कतांहे हुंदा ।" 18 अपर सचमुच परमात्मां अंगा जो अपणी इच्छा मताबक इक्क इक्क करी नैं शरीरे च रखेया ऐ । 19 जे सैह सारे इक्क ई अंग होंदे, तां शरीर कतांहे हुंदा ।" 20 अपर हुण अंग तां मते हन, अपर शरीर इक्क ई ऐ ।" 21 अंख हत्थे नैं नी ग्लाई सकदी, "मिन्जो तेरी जरूरत नी," कने ना मुंड पैरां नैं ग्लाई सकदा ऐ, "मिन्जो तुहां दी जरूरत नी ।" 22 अपर शरीरे दे सैह अंग जेहड़े दूयेयां ते कमजोर लगदे हन, बड़े ई जरूरी हन; 23 कने शरीरे दे जिन्हां दे अंगा जो अहां आदरे दे जोग्गा नी

समझदे तिन्हां ई जो अहां जादा आदर दिंदे हन; कने अहां दे शोभाहीन अंग होर भी बड़े शोभायमान होई जांदे हन । 24 भिरी भी अहां दे शोभायमान अंगा जो इसदी जरूरत नी । अपर परमात्मं शरीरे जो ऐदेया बणाई दिक्ता ऐ कि जिस अंगे जो आदर दी कमी थी तिस जो होर भी जादा आदर मिलें । 25 तांकि देह च बैर ना पोयें, अपर अंग इक्की दूये दी बराबर चिंता करन । 26 इसताई जे इक्क अंग दुख पांदा ऐ, तां सारे अंग तिस सौगी दुख पांदे हन; कने जे इक्की अंगे दी बड़ाई होंदी ऐ, तां तिस सौगी सारे अंग खुशी मनांदे हन ।

27 इस तरांहे तुहां सारे मिली नैं मसीह दा शरीर हन, कने लग लग तिसदे अंग हन; 28 कने परमात्मं कलेसिया च लग लग माणु नियुक्त किक्तेयो हन, "पैह्ला चेला, दूये भविष्यवक्ता, त्रीये अध्यापक, भिरी सामर्थी कम्म करणे आळे, भिरी चंगा करणे आळे, कने उपकार करणे आळे, कने प्रबंध करणे आळे, कने कई तरांहे दी भासा बोलणे आळे । 29 क्या सारे चले हन, क्या सारे भविष्यवक्ता हन, क्या सारे अध्यापक हन, क्या सारे सामर्थी दे कम्म करणे आळे हन । 30 क्या सारेयां जो चंगा करणे दा वरदान मिलेया ऐ, क्या सारी तरांहे दी भासा ग्लांदे हन, 31 क्या सारे अनुवाद करदे हन, तुहां मते ते मते वरदानां दी धुना च रहूआ ।

अपर मैं तुहां जो भी सारे ते उत्तम रस्ता दस्सदा ऐ ।

प्यार - सबते उत्तम रस्ता

13 जे मैं माणुआं कने सुअर्गदूतां दी बोलियां ग्लां कने प्यार ना रखें, तां मैं ठणठणादा होया पीतल, कने झंझणां दी होई झांझर ऐ । 2 कने जे मैं भविष्यवाणी करी सकें, कने सारे भेदां कने सारे तरांहे दे ज्ञाने जो समझें कने मिन्जो ऐत्थू तिकर पूरा वसुआस होयें कि मैं प्हाडां जो हटाई दें, अपर प्यार ना रखें, तां मैं कुछ भी नी । 3 जे मैं अपणी पूरी सम्पति गरीबां जो खुआई दें, या अपणे शरीरे जळाणे ताई देई दें, कने प्यार ना रखें, तां मिन्जो कुच्छ भी फायदा नी । 4 प्यार धीरजवंत ऐ कने कुपालु ऐ: प्यार डाह नी करदा; प्यार अपणी बड़ाई नी करदा, कने फूलदा नी, 5 सैह अनरीति नी चलदा, सैह अपणी भलाई नी चाहंदा, झुंझलांदा नी, बुरा नी मनदा । 6 कुकर्म ते खुश नी हुंदा अपर सचाईया ते खुश हुंदा ऐ । 7 सैह सारियां गल्लां झेली लैंदा ऐ, सारियां गल्लां दा वसुआस करदा ऐ, सारियां गल्लां दी आशा रखदा ऐ, सारियां गल्लां च सबर रखदा ऐ ।

8 प्यार कदी टलदा नी; भविष्यवाणियां होन, तां मुक्की जांगी; भासां होन, तां जांटी रेंहगी; ज्ञान होयें, तां मिटी जांगा । 9 कजोकि अहां दा ज्ञान अधूरा ऐ, कने म्हारी भविष्यवाणी अधूरी; 10 अपर जाहू सर्वसिद्ध आंगा, तां अधूरा मिटी जांगा । 11 जाहू सैह जागत था, तां मैं जागतां साइआं ग्लांदा था, जागतां दा ऐदेया मन था, जागतां दी ऐदेई समझ थी; अपर जाहू सयाणा होईया तां जागतां दी गल्लां छड्डी दिक्ती । 12 हुण अहां जो शीशे च तुदंला दिखाई दिंदा ऐ, अपर तिस बगत आमणे सामणे दिखगे, इस बगत मेरा ज्ञान अधूरा ऐ, अपर तिस बगत ऐदेई पूरी रीतिया नैं पणछेणगा, जिआं मैं पणछेणेया गैआ ऐ । 13 अपर हुण वसुआस, आशा, प्यार एह तीनों स्थायी हन, अपर इन्हां च सबना ते बडा प्यार ऐ ।

भविष्यवाणी कने होर होर भाषायें

14 प्यार दा अनुकरण करा, कने आत्मिक वरदानां दियां धुना च रहूआ, खास करी नैं एह कि भविष्यवाणी करा । 2 कजोकि जेहड़ा होरनी भासा च गल्लां करदा ऐ सैह माणुआं नैं नी अपर परमात्मं नैं गल्लां करदा ऐ; इसताई कि तिसदियां गल्लां कोई नी समझदा, कजोकि सैह भेदे दियां गल्लां आत्मां च होई नैं ग्लांदा । 3 अपर जेहड़ा भविष्यवाणी करदा ऐ, सैह माणुआं नैं तरक्की कने शिक्षा कने शांति दियां गल्लां ग्लांदा ऐ । 4 जेहड़ा होरनी भासा च गल्लां करदा ऐ, सैह अपणी ई तरक्की करदा ऐ; अपर जेहड़ा भविष्यवाणी करदा ऐ, सैह कलेसिया दी तरक्की करदा ऐ । 5 मैं चाहंदा ऐ कि कि तुहां सारे होरनी भासा च गल्लां करा पर इसते जादा एह चाहंदा ऐ कि भविष्यवाणी करा: कजोकि जे होर बोली ग्लाणे आळी कलेसिया दी तरक्किया ताई अनुवाद ना करा तां भविष्यवाणी करणे आळा तिसते बधी नैं ऐ । 6 इसताई हे भाऊओ, जे मैं तुहां अल्ल आई नैं होर भासा च गल्लां करें, कने लौई दा ज्ञान या भविष्यवाणी या शिक्षा दियां गल्लां तुहां नैं ग्लां, तां मिन्जो ते तुहां जो क्या

फायदा हुंगा? 7 इस तरांह जे नरजीव चीज भी जिन्हां च उआज निकलदी ऐ, जिआं बंसरी या बीण, जे तिन्हां दे स्वरं च भेद ना होयें तां जेहड़ा फूकेया या बजाया जांदा ऐ, सैह किआं पणछेणां जांगा । 8 कने जे तुरही दी उआज साफ ना होयें, तां कुण लड़ाईया ताई तयारी करगा । 9 ऐदेय ई तुहां भी जे जीभा नैं साफ साफ गलां ना ग्लान, तां जेहड़ा कुच्छ गलाया जांदा ऐ सैह किआं समझेया जांगा, तुहां तां हीआ नैं गलां करणे आळे होंगे । 10 संसारे च कितणे ई तरांह दी भाषा कजो ना होन, अपर तिन्हां च कोई भी बगैर मतलब दी नी होगी । 11 इसताई जे मैं कुसी भासा दा मतलब नी समझे, तां ग्लाणे आळे दी नजरा च परदेशी हुंगा कने ग्लाणे आळा मेरी नजरा च परदेशी हुंगा । 12 इसताई तुहां भी जाहू आत्मिक वरदानां दी धुना च हन, तां देहई कोशश करा कि तुहां दे वरदानां दी तरकियां नैं कलेसिया दी तरक्री होयें । 13 इसा बजाह ते जेहड़ा होर भासा ग्लां, सैह प्रार्थना करे कि तिसदा अनुवाद भी करी सकें । 14 इसताई जे मैं होरनी भासा च प्रार्थना करे तां मेरी आत्मां प्रार्थना करदी ऐ अपर मेरी अक्ल कम्म नी दिंदी । 15 कने क्या करणां चाइदा, मैं आत्मां नैं भी प्रार्थना करगा, कने अक्ला नैं भी प्रार्थना करगा; मैं आत्मां नैं गांगा, कने अक्ला नैं भी गांगा । 16 नी तां जे तू आत्मां ते ई धन्यावाद करगा, तां भिरी अज्ञानी तेरे धन्यावादे पर आमीन किआं ग्लां, कजोकि सैह तां नी जाणदा कि तू क्या ग्लादा ऐ । 17 तू तां भली भांति धन्यावाद करदा ऐ, अपर दूये दी तरक्री नी होंदी । 18 मैं अपणे परमात्मं दा धन्यावाद करदा ऐ, कि मैं तुहां सारेयां ते जादा होरनी भासा ग्लांदा ऐ । 19 अपर कलेसिया च होरनी भासा च दस हजार गलां ग्लाणे ते एह मिन्जो होर नी खरा जाणी पाया ऐ, कि दूयेयां जो सखाणे ताई अक्ला नैं पंज ई गलां ग्लान । 20 हे भाऊओ, तुहां समझा च जागत मत बणां बुराईया च तां जागत रैहआ, अपर समझा च सयाणे बणां । 21 व्यवस्था च लिख्या ऐ कि प्रभु ग्लांदा ऐ, "मैं अपरिचित भासा ग्लाणे आळेंयां दिया बजाह ते कने पराये मुँमे दिया बजाह ते इन्हां लोकां नैं गलां करगा तमी सैह मेरी नी सुणगे ।" 22 इसताई होर भासायें वसुआसियां ताई नी, वेवसुआसियां ताई नशाण ऐ, कने भविष्यवाणी वेवसुआसियां ताई नी वसुआसियां ताई नशाण ऐ । 23 जे कलेसिया इक्की जगाह पर किट्टी होई, कने सारे दे सारे होर भासायें ग्लान, कने बाहरे आळे या वेवसुआसी लोक अंदर आई जान तां क्या सैह तुहां जो पागल नी ग्लांगे । 24 अपर जे सारे भविष्यवाणी करणां लग्गे, कने कोई वेवसुआसी या बाहरे आळा माणु अंदर आई जां, तां सारे तिसियां दोषी ठेहराई दिंगे कने परखगे; 25 कने तिसदे मने दे भेद प्रकट होई जांगे कने ताहू सैह मुँमे भार पैई नैं परमात्मं जो प्रणांम करगा, कने मनी लेंगा कि सचमुच परमात्मां तुहां दे बिच ऐ ।

भक्ति च अनुशासन

26 इसताई हे भाऊओ, क्या करणां चाइदा, जाहू तुहां किट्टे होंदे हन, तां हर इक्की दे मने च भजन या शिक्षा या होर भासा या लौ या होरनी भासा दा मतलब दस्सणा चाइदा ऐ । सारा कुच्छ आत्मिक बढ़ौतरी ताई होंणां चाइदा । 27 जे होरनी भासा च गलां करणियां हन तां दो या मत्ते हन तां तीन जण बारी बारी च ग्लान, कने इक्क माणु अनुवाद करे । 28 अपर जे अनुवाद करणे आळा ना होयें, तां होर भासा बोलणे आळा कलेसिया च शांत रैह, कने अपणे मने च कने परमात्मं नैं गलां करे । 29 भविष्यवक्तां च दो या तीन ग्लान, कने बाकि लोक तिन्हां दे वचना जो परखन । 30 अपर जे दूये पर जेहड़ा बैठया ऐ, कुच्छ ईश्वरीय लौ होयें तां पैहला चुप होई जां । 31 कजोकि तुहां सारे इक्क इक्क करी नैं भविष्यवाणी करी सकदे हन, तांकि सारे सिखन कने सारे शांति पांन । 32 कने भविष्यवक्तां दी आत्मां भविष्यवक्तां दे वशे च हन । 33 कजोकि परमात्मां गडबडी दा नी, अपर शांति दा परमात्मां ऐ ।

जिआं कि पवित्र लोकां दी सारी कलेसियां च ऐ । 34 जणांसा कलेसिया दी सभा च चुप रैह, कजोकि तिन्हां जो गलां करणे दा हुक्म नी, अपर अधीन रैहणां हुक्म ऐ, जिआं व्यवस्था च लिख्या भी ऐ । 35 जे सैह कुच्छ सीखणा चान, तां घरे च अपणे अपणे लाडे ते पूछन, कजोकि जणांसा दा कलेसिया च गलां करणां शर्मिंदगी दी गल्ल ऐ । 36 क्या परमात्मं दा वचन तुहां च निकळैया ऐ, या सिर्फ तुहां ई तिकर पुज्या ऐ । 37 जे कोई माणु अपणे आप्पे जो भविष्यवक्ता या आत्मिक जण समझे, तां एह जाणी लेआ कि जेहिङियां गलां तुहां जो लिखदा ऐ, सैह प्रभु दे हुक्म हन । 38 अपर जे कोई एह ना मन्ने, तां तिसियो भी ना मन्ने । 39 कने हे भाऊओ, भविष्यवाणी करणे दी धुना च

रैहआ कने होरनी भासा ग्लाणे ते मना मत करा; 40 अपर सारियां गलां शालीनता कने व्यवस्थित रुपे नैं कित्तियां जान ।

मसीह दा दुवारा जिंदा होणां

15 हे भाऊओ, हुण मैं तुहां जो सैही सुसमाचार दस्सदा ऐ जेहड़ा पैहलें सुणी चुकेयो हन जिसियो तुहां अंगीकार भी कित्या था कने जिस च तुहां पक्के भी हन । 2 तिसदिया बजाह ते तुहां दा उद्धार भी हुंदा ऐ, जे तिस सुसमाचारे जो जेहड़ा मैं तुहां जो सुणांया था याद रखदे हन; नी तां तुहां दा वसुआस करणां बेकार होया ।

3 इसा बजाह मैं सबना ते पैहलें तुहां जो सैई गल्ल दस्सी दिती, जेहड़ी मिन्जो दस्सियो थी कि पवित्रशास्त्रे दे वचने मताबक यीशु मसीह अहां दे पापां ताई मरी गैआ, 4 कने दबेया गैआ, कने पवित्रशास्त्रे मताबक त्रीयें दिने जिंदा भी होईया, 5 कने कैफा जो ताहू बारांह जो दुस्सया था । 6 भिरी सैह पंज सौ ते जादा भाऊआं जो इक्क सौगी दुस्सया था, जिन्हां च मते अल्ली तिकर जिंदे हन अपर कुच्छ मरी गैयो हन । 7 भिरी सैह याकूबे जो दुस्सया तां सब चेलयां जो दुस्सा । 8 सबना दे बाच मिन्जो जो भी दुस्सया था, जेहड़ा मना अधूरे दिनां च जम्मेया ऐ । 9 कजोकि मैं चेलयां च सबना ते छोट ऐ, अपर चेला केहलाणे जोगा भी नी कजोकि मैं परमात्मं दी कलेसिया जो सताया था । 10 अपर मैं जेहड़ा कुच्छ भी ऐ, परमात्मं दे अनुग्रह नैं ऐ । तिसदा अनुग्रह जेहड़ा मिन्जो पर होया, सैह बेकार नी होया; अपर मैं तिन्हां सारेयां ते बधी नैं मेहणत भी किती: तमी एह मेरे पाससे ते नी होया अपर परमात्मं दे अनुग्रह नैं जेहड़ा मिन्जो पर था । 11 इसताई चां मैं ऐ, चां सैह हन, अहां ऐही प्रचार करदे हन, कने इसी पर तुहां वसुआस भी किता ।

अहां दा दुवारा जिंदा होणां

12 इसताई जाहू कि मसीह दा एह प्रचार किता जांदा ऐ कि सैह मरेयां ते जिंदा होया, तां तुहां च कितणे किआं ग्लांदे हन कि मरेयां दिया बजाह ते जिन्दगी ऐ ई नी । 13 जे मरेयां दिया बजाह ते जिन्दगी ऐ ई नी, तां मसीह भी जिंदा नी होया; 14 कने जे मसीह जिंदा नी होया, तां अहां दा प्रचार करणां भी बेकार ऐ, कने तुहां दा वसुआस भी बेकार ऐ । 15 अपर अहां परमात्मं दे झूठे गवाह ठेहरन; कजोकि अहां परमात्मं दे बारे च एह गवाही दिती कि तिन्हीं मसीह जो जिंदा करी दिता, कने जिंदा नी कित्या जे मरेयो जिंदे होंदे । 16 कने जे मुडदे नी जिंदे होंदे, तां मसीह भी जिंदा नी होया, । 17 कने जे मसीह जिंदा नी होया, तां तुहां दा वसुआस बेकार ऐ, कने तुहां अल्ली तिकर अपणे पापां च फसेयो हन । 18 अपर जेहड़े मसीह च सोई गैयो हन, सैह भी नाश होये । 19 जे अहां सिर्फ इसा जिन्दगीया च मसीह नैं आशा रखदे हन तां अहां सारे माणुआं ते जादा अभागे हन । 20 अपर सचमुच मसीह मुडदेयां च जिंदा होईया ऐ, कने जेहड़े सोई गैयो हन तिन्हां च सैह पैहला फळ होया । 21 कजोकि जाहू माणुये दिया बजाह ते मौत आई, तां माणुये दुआरा मरेयां दिया बजाह ते जिन्दगी भी आई । 22 कने जिआं आदम च सारे मरदे हन, तिआं ई मसीह च सारे जिंदे कित्ते जांगे, 23 अपर हर इक्क अपणी अपणी बारिया नैं: पैहला फळ मसीह, भिरी मसीह ओणे पर तिसदे लोक । 24 इसदे बाद अंत हुंगा । तिस बग्त सैह सारी प्रधानता, कने सारा हक्क, कने सामर्थी दा अंत करी नैं राजे जो परमात्मां पिता दे हत्थ च सौंपी दिंगा । 25 कजोकि जाहू तिकर सैह अपणे बैरियां जो अपणे पैरां थलें ना लैई ओंयें, ताहू तिकर तिसदा राज करणां जरूर ऐ । 26 सबना ते आखरी बैरी जेहड़ा खत्म किता जांगा, सैह मौता ऐ । 27 कजोकि परमात्मं सब कुच्छ तिसदेयां पैरां थलें करी दिता ऐ, अपर जाहू सैह ग्लांदा ऐ कि सब कुच्छ तिसदे अधीन करी दित्या ऐ तां प्रत्यक्ष ऐ कि जिन्हीं सब कुच्छ तिसदे अधीन करी दिता, सैह अप्पु लग्न रैहआ । 28 कने जाहू सब कुच्छ तिसदे अधीन होई जांगा, तां पुतर अप्पु भी तिसदे अधीन होई जांगा, जिन्हीं सब कुच्छ तिसदे अधीन करी दित्या, तांकि सारेयां च परमात्मां ई सब कुच्छ होयें ।

29 नी तां जेहड़े लोक मरेयां ताई बपतिस्मा लेंदे हन सैह क्या करणे । जे मुडदे जिंदे होंदे ई नी तां भिरी कजो तिन्हां ताई बपतिस्मा लेंदे हन । 30 कने अहां भी कजो हर बग्त जोखिमा च पैयो रैहदे हन । 31 हे भाऊओ, मिन्जो तिस कमांड दी कसम जेहड़ा अहां दे मसीह यीशु च मैं तुहां दे बारे च करदा ऐ कि मैं हर रोज मरदा ऐ । 32 जे मैं माणु दी रीतिया पर इफिसुस च बणे दे

डंगरा नैं लड़ेया तां मिन्जो क्या फायदा होया, जे मुडदे जिंदे कित्ते नी जांगे, "तां ओआ, खान पीन, कजोकि कल तां मरी ई जांगे ।" 33 धोखा मत खांदे, "बुरी संगती खरे चरित्र जो बिगाड़ी दिंदी ऐ ।" 34 धर्म तांई जागी पौया कने पाप मत करा; कजोकि कुच्छ ऐदेय हन जेहडे परमात्मैं जो नी जाणदे । मैं तुहां जो शर्मिदा करणे तांई एह ग्लांदा ऐ ।

दुवारा जिंदे होणे दा शरीर

35 हुण कोई एह ग्लांदा, "मुडदे कुस तरीके नैं जिंदे होंदे हन, कने कदेये शरीरें सौगी ओंदे हन ।" 36 हे वेअक्क्या! जेहडा कुच्छ तू बांदा ऐ, जाहू तिकर सैह नी मरें जिंदा कित्ता नी जांदा । 37 कने जेहडा तू बांदा ऐ, एह सैह शरीर नी जेहडा पैदा होणे आळा ऐ, अपर निरा दाणा ऐ, चा कणका दा चां कुसी होर अनाजे दा । 38 अपर परमात्मैं अपणियां इच्छा मताबक तिसियो शरीर दिंदा ऐ, कने हर इक्क बीई तिसदी खास देह ऐ । 39 सारा शरीर इक्क बराबर नी: माणुआं दा शरीर होर ऐ, डंगरा दा शरीर होर ऐ, पंछियां दा शरीर होर ऐ; मच्छियां दा शरीर होर ऐ । 40 सुअर्गीय शरीर ऐ; कने पार्थिव शरीर भी ऐ । अपर सुअर्गीय शरीरां दा तेज होर ऐ, कने पार्थिवे दा होर । 41 सूरजे दा तेज होर ऐ, चन्द्रमे दा तेज होर ऐ, कने तारेयां दा तेज होर ऐ, (कजोकि इक्क तारे दे दूये तारे दे तेजे च फर्क ऐ)

42 मुडदेयां दा जिंदा होणां भी ऐदेया ई ऐ । शरीर नाशवाण हालता च बाया जांदा ऐ कने अविनाशी रुपे च जिंदा हुंदा ऐ । 43 सैह अपमाने सौगी बाया जांदा ऐ, कने तेजे सौगी जिंदा हुंदा ऐ; कमजोरिया सौगी बाया जांदा ऐ, कने सामर्थी सौगी जिंदा हुंदा ऐ । 44 सभाविक शरीर बाया जांदा ऐ, कने अत्मिक शरीर जिंदा हुंदा ऐ: जाहू कि सभाविक शरीर ऐ, तां आत्मिक शरीर भी ऐ । 45 देहया ई लिख्या भी ऐ, कि पैहला माणु मतलब आदम जिंदा माणु बणेया" कने आखरी आदम जीवणदायक आत्मा बणेया । 46 ताहू पैहले आत्मिक नी था अपर सभाविक था, इसदे बाच आत्मिक होया । 47 पैहला माणु धरतिया ते मतलब चिक्का दा था; दुआ माणु सुअर्गीय ऐ । 48 जिआं सैह चिक्का दा था, तिआं ई सैह भी हन जेहडे चिक्का दे हन; कने जिआं सैह सुअर्गीय ऐ, तिआं ई सैह भी हन जेहडे सुअर्गीय हन । 49 कने जिआं अहां तिसदा रूप धारण कित्ता जेहडा चिक्का दा था तिआं ई तिस सुअर्गीय दा रूप भी धारण करगे ।

50 हे भाऊओ, मैं एह ग्लांदा कि मांस कने खून परमात्मैं दे राजे दे अधिकारी नी होई सकदे हन, कने ना नाशवाण अविनाशी दा अधिकारी होई सकदा ऐ । 51 दिक्खा, मैं तुहां नैं भेडां दियां गलां ग्लांदा ऐ अहां सारे नी सोंगे, अपर सारे बदली जांगे, 52 कने एह पल भर च, पलक झपकदे ई आखरी तुरही फूकदे ई होंगे । कजोकि तुरही फूकी जांगी कने मुडदे अविनाशी हालता च उठायें जांगे, कने अहां बदली जांगे । 53 कजोकि जरूरी ऐ कि एह नाशवाण देह अविनाश जो पैहनी लैन । 54 कने जाहू सैह नाशवाण अविनाश जो पैहणी लेंगा, ताहू सैह वचन जेहडा लिख्या ऐ पूरा होई जांगा:

"जय नैं मौता जो निगली लैआ ।

55 हे मौत, तेरी जय कुत्थू रैई, हे मौत, तेरा डंक कुत्थू रैहआ ।

56 मौत दा डंक पाप ऐ, कने पापे दा जोर व्यवस्था ऐ । 57 अपर परमात्मैं दा धन्यावाद होयें, जेहडा अहां दे प्रभु यीशु मसीह दिया बजाह ते अहां जो जयवंत करदा ऐ । 58 इसताई हे मेरे प्यारे भाऊयो, पक्के कने अटल रैहआ, कने प्रभु दे कम्मे च हमेशा बढ़दे जा, कजोकि एह जाणदे हन कि तुहां दी मेहनत प्रभु च बेकार नी ।

वसुआसियां तांई दान

16 हुण तिस चंदे दे बारे च जेहडा पवित्र लोकां तांई कित्या जांदा ऐ, जिआं हुक्म मैं गलातिया दी कलेसियां जो दित्या तिआं ई तुहां भी करा । 2 हफते दे पैहले दिन तुहां च हर इक्क अपणी आमदनिया मताबक अप्पु अल्ल कुच्छ रखी छडा करा कि मेरे ओणे पर चंदा लेणा नी पोयें । 3 कने जाहू मैं आंगा, तां जिन्हां जो तुहां चाहंगे तिन्हां जो मैं चिट्टियां दैई नैं घल्ली दिंगा कि तुहां दा दान यरुशलमे च पज्जाई दें । 4 जे मेरा भी जाणां पक्का होया, तां सैह मिन्जो सौगी जांगे ।

पौलुसे दी यात्रा दा प्रोग्राम

5 मैं मकिदुनिया ते होई नैं तुहां अल्ल आंगा कजोकि मिन्जो मकिदुनिया होई नैं जाणां ई ऐ । 6 अपर पक्का ऐ तुहां दे ऐत्थी ई रुकी जां कने ठंडी दा मौसम ऐत्थू कटें, ताहू जिस पाससे मेरा जाणां होयें तिस पाससे तुहां मिन्जो पज्जाई देंगा । 7 कजोकि मैं हुण रस्ते च तुहां नैं मिलणां नी चाहंदा; अपर मिन्जो आशा ऐ कि जे प्रभु चां तां कुच्छ बगते तिकर तुहां सौगी रैहंगा, 8 अपर मैं पिन्तेकुस्त तिकर इफिसुस च रैहंगा, 9 कजोकि मेरे तांई औत्थू इक्क बडा कने उपयोगी दुरआजा खुलेया ऐ, कने विरोधी मते हन ।

10 जे तीमुथियुस आई जां, तां दिखनेयों कि सैह तुहां दे ऐत्थू निडर रैह; कजोकि सैह मिन्जो साइआं प्रभु दा कम्म करदा ऐ । 11 इसताई कोई तिसियो तुच्छ नी जाणे, अपर तिसियो कुशल नैं इस पाससे पज्जाई दिनेयों कि मिन्जो अल्ल आई जां; कजोकि मैं तिसदा इंतजार करा दा ऐ कि सैह भाऊआं सौगी ओयें । 12 भाऊ अपुल्लोसे नैं मैं बड़ी विणती किन्ती ऐ कि तुहां अल्ल भाऊआं सौगी जां; अपर तिन्हीं इस बगते जाणे दी कुच्छ भी इच्छा नी किन्ती, अपर जाहू मौका मिलगा ताहू आई जांगा ।

आखरी आदेश कने नमस्कार

13 जागदे रैहआ, वसुआसे च पक्के रैहआ, पुरुषोर्थ करा, ताकतवर होआ । 14 जेहडा कुच्छ करदे हन प्यारे नैं करा ।

15 हे भाऊओ, तुहां स्तिफनास दे परवारे जो जाणदे हन कि सैह अखया दे पैहले फळ हन, कने पवित्र लोकां दी सेवा तांई त्यार रैहदे हन । 16 इसताई मैं तुहां नैं विणती करदा ऐ कि ऐदेयां दे अधीन रैहआ, अपर हर इक्की दे जेहडे इस कम्मे च मेहनती कने कम्म करणे आळें हन । 17 मैं स्तिफनास कने फूरतूनातुस कने अखइकुस दे ओणे ते खुश ऐ, कजोकि तिन्हां नैं तुहां दिया कमिया जो पूरा कित्ता ऐ । 18 तिन्हां नैं मेरी कने तुहां दिया आत्मा जो चैन दित्ता ऐ, इसताई ऐदेयां जो मना ।

19 आसिया दी कलेसियां दे पाससे ते तुहां जो नमस्कार; अकिव्ला कने प्रिसका दा कने तिन्हां दे घरे दी कलेसिया दा भी तुहां जो प्रभु च बडा बडा नमस्कार! 20 सारे भाऊआं दा तुहां जो नमस्कार । पवित्र पुक्के च अप्पु च नमस्कार करा ।

21 मिन्जो पौलुसे दा अपणे हत्थे दा लिख्या नमस्कार । 22 जे कोई प्रभु नैं प्यार ना रखें तां सैह शापित होयें । हे अहां दे प्रभु, आ! 23 प्रभु यीशु दा अनुग्रह तुहां पर हुंदा रैह । 24 मेरा प्यार मसीह यीशु च तुहां सबना सौगी रैह । आमीन ।

2 कुरिन्थियों

भूमिका

कुरिन्थियों नांये पर पौलुस चले दी दूई पत्री पौलुस कने कुरिन्थुस दी कलेसिया दे बीच कड़े रिश्तेयां दे दुआरा लिखियो थी । कलेसिया दे कुछ सदस्यां पौलुस दे वरखलाफ साफ तौर पर गम्भीर आरोप लगाये थे, अपर मेल मिलाप दी अपणी गैहरी लालसा जो दस्सदा ऐ, कने जाहू इआं होई जांदा ऐ तां सैह अपणी बड़ी सारी खुशी भी प्रगट करदा ऐ ।

इसा पत्रिया दे पैहले हिस्से च पौलुस कुरिन्थुस दी कलेसिया सौगी अपणे रिश्तेयां पर वचार करदा ऐ, कने तिन्हां जो समझांदा ऐ कि तिन्हीं कजो कलेसिया च अपमान कने विरोध करणे साइयां कठोर वताव किता, कने भिरी अपणी खुशी जो प्रगट करदा ऐ कि तिसदी कठोरता दा परणाम पश्चाताप कने मेल मिलाप होया । ताहू सैह कलेसिया ते, यहूदिया दे गरीब मसीहियां तांई उद्धारतापूर्वक दान दैणे दा आग्रह किता । आखरी दे पाठां च पौलुस कुरिन्थुस दे कुछ लोकां दे वरखलाफ अपणी सेवकाई दा समर्थन करदा ऐ जिन्हां अप्पु ई अपणे अप्पे जो चले होणे दा दर्जा दैई दित्या था, जाहू कि पौलुसे पर झूठा चेला होणे दा आरोप लगा करदे थे ।

रूप-रेखा

भूमिका कने मूल विषय 1: 1- 11

पौलुस कने कुरिन्थुस दी कलेसिया 1: 12 --- 7:16

यहूदिया दे मसीहियां तांई दान 8: 1 --- 9: 15

पौलुस दिया बजाह ते चले दे रूप च अपणे हक दा समर्थन 10: 1 --- 13: 10

उपसंहार 13: 11- 14

नमस्कार

1 पौलुस दे पास्से ते जेहड़ा परमात्मं दी इच्छा ते मसीह यीशु दा चेला ऐ, कने भाऊ तीमुथियुस दे पास्से ते परमात्मं दी तिसा कलेसिया दे नां, जेहड़े कुरिन्थुस च हन, कने सारे अख्या दे सारे पवित्र लोकां दे नां
2 अहां दे पिता परमात्मां कने प्रभु यीशु मसीह दे तरफा ते तुहां जो अनुग्रह कने शांति मिलदी रहै ।

परमात्मं दा धन्यावाद करणां

3 अहां दे प्रभु यीशु मसीह दे परमात्मं दा कने पिता दा धन्यावाद होयें, जेहड़ा दया दा पिता कने सब तरांह दी शांति दा परमात्मां ऐ । 4 सैह अहां दे सारे क्लेशां च शांति दिंदा ऐ; तांकि अहां तिसा शांति दिया बजाह ते जेहड़ा परमात्मां अहां जो दिंदा ऐ, तिन्हां जो भी शांति दैई सकन जेहड़ा कुस तरांह दे क्लेश च होयें । 5 कजोकि जिआं मसीह दे दुखां च अहां जादा साझी होंदे हन, तिआं ई अहां शांति च भी मसीह दिया बजाह ते जादा साझी होंदे हन । 6 जे अहां क्लेश पांदे हन, तां एह तुहां दी शांति कने उद्दारे तांई ऐ; कनेजे शांति पांदे हन, तां एह तुहां दी शांति तांई ऐ; जिसदे प्रभाव ते तुहां धीरजे सौगी तिन्हां क्लेशां जो झेली लेंदे हन, जिन्हां जो अहां भी झेलदे हन । 7 म्हारी आशा तुहां दे बारे च पक्की ऐ, कजोकि अहां जाणदे हन कि तुहां जिआं अहां दे दुखां च, तिआं ई शांति च भी साझी होया ।

8 हे भाऊओ, अहां नी चाहंदे कि तुहां अहां दे तिस क्लेशे ते अनजान रहूआ जेहड़ा आसिया च अहां पर पैआ ; अहां देहय भारी बोझे नैं दबूयो थे, जेहड़ा म्हारी सामर्थी ते बाहर था, ऐत्थू तिकर कि अहां जिन्दगिया ते भी हत्थ धोई बैठेयो थे । 9 अपर अहां अपणे मने च समझी लैआ था कि अहां पर मौती दा हुक्म होई चुकेया ऐ, तांकि अहां अपणे पर भरोसा नी रखन अपर परमात्मं दा जेहड़ा मरयां ते जिदा करदा ऐ । 10 तिन्हीं अहां जो मौत दे देहय बडे संकटे ते बचाया, कने बचांगा; कने तिस पर म्हारी एह आशा ऐ कि सैह गांभ भी बचांदा रहैगा । 11 तुहां भी मिली नैं प्रार्थना दिया बजाह ते म्हारी मदद करगे कि जेहड़ा वरदान मतेआं दिया बजाह ते अहां जो मिलेया, तिसदिया बजाह ते मते लोक म्हारी तरफा ते धन्यावाद करन

पौलुसे दी यात्रा च कने योजना च बदलाव

12 कजोकि अहां अपणे विवेक दी इसा गवाहिया पर कमंड करदे हन, कि संसारे च कने खास करी नैं तुहां बिच, अहां दा चरित्र परमात्मं जोगी देहई पवित्रता कने सचाईया सौगी था, जेहड़ा शरीरक ज्ञान ते नी अपर परमात्मं दे अनुग्रह सौगी था । 13 अहां तुहां जो होर कुछ नी लिखदे, सिर्फ सैह जेहड़ा तुहां पढ़दे या मनदे हन, कने मिन्जो आशा ऐ कि अंत तिकर भी मनदे रहैगे । 14 जिआं तुहां च कितणेयां मनी लैआ कि अहां तुहां दे कमंडे दी बजाह हन, तिआं ई तुहां भी प्रभु यीशु दे दिन अहां तांई कमंडे दी बजाह ठेहरगे ।

15 इसी भरोसे नैं मैं चाहंदा था कि पैहले तुहां अल्ल ओयें कि तुहां जो इक्क होर दान मिलें; 16 कने तुहां अल्ल ते होई नैं मकिदुनिया जो जां, कने भिरी मकिदुनिया ते तुहां अल्ल ओयें; कने तुहां मिन्जो यहूदिया दी तरफा ते कुछ दूर तिकर पुजाया । 17 इसतांई मैं एह इच्छा कित्तियो थी तां क्या मैं चंचलता दरस्सी? या जेहड़ा करणां चाहंदा क्या शरीरे दे मताबक करणां कि मैं गल्ला च "हाँ", "हाँ भी करे कने ना ना भी करे? 18 परमात्मां सच्चा गवाह ऐ कि अहां दे तिस वचने च जेहड़ा तुहां गलाया "हाँ" कने "ना" दोयो नी पाये जांदे ।

19 कजोकि परमात्मं दा पुत्तर यीशु मसीह जिसदा म्हारिया बजाह ते मतलब मेरे कने सिलवानुस कने तीमुथियुसे दिया बजाह ते तुहां बिच भी प्रचार होया, तिन्हां च 'हाँ' ई 'हाँ' होई । 20 कजोकि परमात्मं दी जितणी प्रतिज्ञायें हन, सैह सारी तिस च 'हाँ' दे सौगी हन । इसतांई तिसदिया बजाह ते आमीन भी होई कि म्हारिया बजाह ते परमात्मं दी महिमा होयें । 21 कने जेहड़ा अहां जो तुहां सौगी मसीह च पक्का करदा ऐ, कने जिन्हीं अहां दा अभिषेक किता सैई परमात्मां ऐ, 22 जिन्हीं अहां पर छाप भी लगाई दिती ऐ कने बयाने च आत्मां जो अहां दे मनां च दिता ।

23 मैं परमात्मं जो गवाह करी नैं ग्लांदा कि मैं अल्ली तिकर कुरिन्थुस च इसतांई नी आया, कि मिन्जो तुहां पर तरस ओंदा था । 24 एह नी कि अहां वसुआसे दे बारे च तुहां पर प्रभुता जताणा चाहंदे हन; अपर तुहां दिया खुशिया च सहायक हन कजोकि तुहां वसुआसे ते ई पक्के रहंदे हन ।

2 मैं अपणे मने च ऐही ठाणी लैआ था कि भिरी तुहां जो उदास करणां नी ओयें । 2 कजोकि जे मैं तुहां जो उदास करे, तां मिन्जो खुशी दैणे आळा कुण हुंगा, सिर्फ सैई जिसियो मैं उदास किता? 3 कने मैं ऐही गल्ल तुहां जो इसतांई लिखियो कि कुत्थी इआं ना कि मेरे ओणे पर, जिन्हां ते मिन्जो

खुशी मिलना चाइदी मैं तिन्हां ते उदास होयें; कजोकि मिन्जो मेरी खुशी ऐ, सैई तुहां सारेयां दा भी ऐ । 4 बड़े भरी क्लेश कने मने दे कष्टे मैं बड़ा सैई सैई करी तुहां जो लिख्या था, इसताई नी कि तुहां तिस बड़े प्यारे जो जाणी लैआ, जेहड़ा मिन्जो तुहां नै ऐ ।

अपराधिये जो माफी

5 जे कुणी उदास किता ऐ, तां मिन्जो ई नी अपर (कि तिस सौगी बड़ी सकतेयाई ना बरतें) कुच्छ कुच्छ तुहां सारेयां जो भी उदास किता ऐ । 6 ऐदेय माणुआं ताई एह सजा जेहड़ा भाऊआं च मतेआं दिक्ती, मते हन । 7 इसताई इसते खरा एह ऐ कि तिसदा अपराध माफ करा कने शांति दैआ, इआं ना होयें कि देहया माणु बड़ी उदासिया च डूबी जां । 8 इसा बजाह ते मैं तुहां नै विणती करदा कि तिस जो अपणे प्यारे दा सबूत दैआ । 9 कजोकि मैं इसताई भी लिख्या था कि तुहां जो परखी लें कि तुहां मेरी सारियां गल्लां मनणे ताई त्यार हन कि नी । 10 जिसदा तुहां कुच्छ माफ करदे हन तिसियो मैं भी माफ करदा, कजोकि मैं भी जेहड़ा कुच्छ माफ किता ऐ, जे किता होयें, तां तुहां दिया बजाह ते मसीह दी जगाह च होई नै माफ किता ऐ । 11 कि सैताने दा अहां पर दांव नी चलें, कजोकि अहां तिसदियां योजनां ते अणजान नी हन ।

त्रोआसे च पौलुसे दी चिंता

12 जाहू मैं मसीह दा सुसमाचार सणांणे जो त्रोआसे च आया, कने प्रभुयें मिन्जो ताई इक्क दुरआजा खोली दिता, 13 तां मेरे मने जो चैन नी मिलेया, इसताई कि मैं अपणे भाऊये तीतुसे जो नी पाया; इसताई तिन्हां ते विदा होई नै मैं मकिदुनिया जो चलिया ।

मसीह च जीत दा तौआर

14 अपर परमात्मं दा धन्यावाद होयें जेहड़ा मसीह च सदा अहां जो जय दे उत्सवे च लैई फिरदा, कने अपणे ज्ञाने दी सुगंध म्हारिया बजाह ते हर जगाह फैलांदा ऐ । 15 कजोकि अहां परमात्मं दे नैडे उद्धार पाणेआळ्यां कने नाश होणेआळ्यां दूनी ताई मसीह दी सुगंध ऐ । 16 कुच्छना ताई तां मरणे दे निमित मौता दी गंध, कने कितणेयां ताई जिन्दगी निमित जिन्दगी दी सुगंध । खरा इन्हां गल्लां जोग्गा कुण ऐ? 17 कजोकि अहां तिन्हां मतेआं साइआं नी जेहड़े परमात्मं दे वचने च मिलावट करदे हन; अपर मने दी सचाईया ते कने परमात्मं दी तरफा ते परमात्मं जो सामणे समझी नै मसीह च ग्लां दे हन ।

नौये वादे दे सेवक

3 क्या अहां भिरी अपणी बड़ाई करणां लग्गे? या अहां होरनी लोकां साइआं सिफारिस किन्ती पत्रियां तुहां अल्ल लैयोणियां या तुहां ते लैणियां हन? 2 म्हारी पत्री तुहां ई हन, जेहड़ी अहां दे मनां पर लिखियो ऐ कने तिसियो सारे माणु पणछेणदे कने पढ़दे हन । 3 एह प्रकट ऐ कि तुहां मसीह दी पत्री हन, जिसा जो अहां सेवकां साइआं लिख्या, कने जेहड़ी स्याईया नै नी अपर जिं दे परमात्मं दी आत्मां नै, पत्थरे दी स्लेटा पर नी, अपर मने दी मांस रूपी पटियां पर लिखियो ऐ ।

4 अहां मसीह दिया बजाह ते परमात्मं पर ऐदेया ई भरोसा रखदे हन । 5 एह नी कि अहां अपणे आप्पे ते इस जोग्गे हन कि अपणी तरफा ते कूसा गल्ला दा वचार करी सकन, म्हारी काबलियत परमात्मं दी तरफा ते ऐ, 6 जिन्हीं अहां जो नौये वादे दे सेवक होणे जोग्गा भी किता, शब्द ते सेवक नी अपर आत्मां दै; कजोकि शब्द मारदा ऐ, अपर आत्मां जिंदा करदा ऐ ।

7 जे मौता दा सैह वादा जिसदे अखर पत्थरां पर खोदेयो थे, ऐत्थू तिकर तेजोमय होई कि मूसा दे मुंमं दे तेजे दिया बजाह ते जेहड़ा घटदा भी जांदा था, इस्राएली तिसदे मुंमं पर नजर नी करी सकदे थे, 8 तां आत्मां दा वादा होर भी तेजोमय कजो नी हुंगा? 9 कजोकि जाहू दोषी ठेहराणे आळा वादा तेजोमय था, तां धर्मी ठेहराणे आळा वादा होर भी तेजोमय कजो नी हुंगा? 10 कने जेहड़ा तेजोमय था, सैह भी तिस तेजे दिया बजाह ते जेहड़ा तिसते बधी नै तेजोमय था, कुच्छ तेजोमय नी ठेहरया । 11 कजोकि जाहू सैह घटदा जांदा था तेजोमय था, तां सैह जेहड़ा पक्का रैहगा होर भी तेजोमय कजो नी हुंगा?

12 इसताई ऐदेई आशा रखी नै अहां हिम्मत नै ग्लां दे हन, 13 कने मूसे साइआं नी, जिन्हीं अपणे मुंमं पर पड़दा लगाया था तांकि इस्राएली तिस घटणेआळे तेजे दे अन्त जो ना दिखन । 14 अपर तिन्हां दे मन कठोर होईये हन, कजोकि अज्र तिकर पराणा नियम पढ़दे बग्त तिन्हां दे मनां पर सैई पड़दा रैहदा ऐ, अपर सैह मसीह च उठी जांदा ऐ । 15 अज्र तिकर जाहू कदी मूसा दी कताब पढ़ी जांदा ऐ, तां तिन्हां दे दिलां च पड़दा पैआ रैहदा ऐ । 16 अपर जाहू कदी तिन्हां दा मन प्रभु दे पास्से फिरगा, ताहू सैह पड़दा उठी जांगा । 17 प्रभु तां आत्मां ऐ कने जित्थू कुत्थी प्रभु दा आत्मां ऐ औत्थू अजादी ऐ । 18 अपर जाहू अहां सारे उघड़े चेहरे नै प्रभु दा प्रताप इस तरां ह प्रकट हुंदा ऐ, अहां तिसी तेजस्वी रूपे च अंश अंश करी नै बदलदे जां दे हन ।

चिक्का दे पाडेयां च धन दौलत

4 इसताई जाहू अहां पर देहई दया होई कि अहां जो एह सेवा मिली, तां अहां हिम्मत नी छडदे । 2 अपर अहां सर्मा दे गुप्त कम्मां जो छड्डी दित्या, कने ना चतुराईया नै चलदे, कने ना परमात्मं दे वचने च मिलावट करदे हन; अपर सच जो प्रकट करी नै परमात्मं सामणे हर इक्की माणुये दे दिमागे च अपणी भलाई बैठां दे हन । 3 अपर जे अहां दे सुसमाचारे पर पड़दा पैआ ऐ, तां एह नाश होणे आळ्यां ताई पैआ ऐ । 4 कने तिन्हां वेवसुआसियां ताई, जिन्हां दी अक्क इस संसारे दे ईश्वरं अणी करी दिक्ती ऐ, तांकि मसीह जेहड़ा परमात्मं दा प्रतिरूप ऐ, तिसदे तेजोमय सुसमाचार दा प्रकाश तिन्हां पर ना चमके । 5 कजोकि अहां अप्पु जो नी, अपर मसीह यीशु जो प्रचार करदे हन कि सैह प्रभु ऐ; कने अपणे बारे च एह ग्लां दे हन कि अहां यीशु दिया बजाह ते तुहां दे सेवक हन । 6 इसताई कि परमात्मां ई ऐ, जिन्हीं ग्लाय, "नैहरे च जोती चमके," कने सैई अहां दे मनां च चमके कि परमात्मं दी महिमा दी पणछेण किन्ती जोती यीशु मसीह दे चेहरे ते प्रकाशमान होयें ।

7 अपर अहां अल्ल सैह धन दौलत चिक्का दे पाडेयां च रखियो ऐ कि एह असीम सामर्थ म्हारिया तरफा ते नी, अपर परमात्मं दी तरफा ते ठेहरें । 8 अहां चौनी पास्से ते क्लेश तां भोगदे हन, अपर संकटे च नी पौंदे; घबरायो तां हन, निराश नी होंदे; 9 सताये तां जां दे हन, अपर त्यागे नी जां दे; गिराये तां जां दे हन, अपर खत्म नी होंदे । 10 अहां यीशु दी मौता जो अपणे शरीरे च हर बग्त लैई फिरदे हन कि यीशु दी जिन्दगी भी अहां दे शरीरे च प्रकट होयें । 11 कजोकि अहां जिं दे जी हमेशा यीशु दिया बजाह ते मौती दे हुआले करी दित्ते जां दे हन कि यीशु दी जिन्दगी भी अहां दे मरेयो शरीरे च प्रकट होयें । 12 इस तरां हन मौत तां अहां पर प्रभाव पांदा ऐ कने जिन्दगी तुहां पर ।

13 इसताई कि अहां च सैई वसुआसे दी आत्मां ऐ, जिसदे बारे च लिख्या ऐ, मैं वसुआस किता, इसताई मैं ग्लाय । "अहां भी वसुआस करदे हन, इसताई ग्लां दे हन । 14 कजोकि अहां जाणदे हन कि जिन्हीं प्रभु यीशु जो जिंदा कित्या, सैई अहां जो भी यीशु च भागी जाणी नै जिंदा करगा, कने तुहां सौगी अप्पु सामणे पेश करगा । 15 कजोकि सारी चीज्जां तुहां ताई हन, तांकि अनुग्रह मतेआं दिया बजाह ते जादा होई नै परमात्मं दी महिमा ताई धन्यावाद भी बधान । 16 इसताई अहां हिम्मत नी छडदे; जे अहां दा बाहरे दा माणु रूप खत्म हुंदा जांदा ऐ, तमी अहां दा अंदरुनी माणु दा रूप हर रोज नौआं हुंदा जांदा ऐ । 17 कजोकि अहां दा पल भर दा हल्का देया क्लेश अहां ताई बड़ा ई मेहत्वपूर्ण कने सदा दी महिमा पैदा करदा जांदा ऐ; 18 कने अहां तां दिखियां चीज्जां जो नी अपर नी दिखियां चीज्जां जो दिखदे रैहदे हन; कजोकि दिखियां चीज्जां थोड़े ई दिना दियां हन, अपर नी दिखियां चीज्जां हमेशा बणी रैहदियां हन ।

अहां दा सुअर्गीय घर

5 कजोकि अहां जाणदे हन कि जाहू अहां दा धरती पर डेरा सरीखा घर ढाया जांगा, तां अहां जो परमात्मं दी तरफा ते सुअर्ग पर इक्क देहया घर मिलगा जेहड़ा हत्थां नै बणया घर नी, अपर सदा स्थिर रेहणेआळा ऐ । 2 इस च तां केहरां दे कने बड़ी लालसा रखदे हन कि अपणे सुअर्गीय घरे जो पैहनी लैआ 3 कि इसदे पैणणे ते अहां नंगे नी पाये जान । 4 कने अहां इस डेरे च रैहदे रैहदे इस बोझे नै दबूयो केहरां दे रैहदे हन, कजोकि अहां उतारणां नी अपर होर पैहणगा चाहं दे हन, तांकि सैह जेहड़े मरेयो हन जिन्दगिया च डूबी

जान । 5 जिन्हीं अहां जो इसा गल्ला ताई त्यार कित्ता ऐ सैह परमात्मां ऐ, जिन्हीं अहां जो ब्याने च आत्मां भी दित्या ऐ ।

6 अहां सदा हौंसला बणाई रखदे हन, कने एह जाणदे हन कि जाहू तिकर अहां शरीरे च रँहदे हन ताहू तिकर प्रभु ते लग्न हन । 7 कजोकि अहां रुपे जो दिक्खी नैं नी, अपर वसुआसे नैं चलदे हन । 8 इसताई अहां हौंसला बणाई रखदे हन, कने शरीरे ते लग्न होई नैं प्रभु सौगी रहणां होर भी उत्तम समझदे हन । 9 इसा बजाह ते अहां दे मने दी आशा एह ऐ कि चान सौगी रह्न चान लग्न रह्न, अपर अहां तिसियो पंसद ओंदे रह्न । 10 कजोकि जरूरी ऐ कि अहां सारेयां दा हाल मसीह दे न्याय आसणे सामणे खुली जां, कि एह इक्क माणु अपणे अपणे खरे बुरे कम्मां दा बदला जेहडे तिन्हीं शरीरे दिया बजाह ते कित्ते होन ।

परमात्में नैं मेल - मिलाप

11 इसताई प्रभु दा डर मनी करी अहां लोकां जो समझांदे हन; अपर परमात्में पर अहां दा हाल प्रकट ऐ, कने मेरी आशा एह ऐ कि तुहां दे अंतर आत्मां पर भी प्रकट हुंगा । 12 अहां भिरी भी अपनी महिमा तुहां सामणे नी करदे, अपर अहां अपणे बारे च तुहां जो कमंड करणे दा मौका दिंदे हन कि तुहां तिन्हां जो जबाब दैई सकन, जेहड़ा मने पर नी अपर दिखावटी गल्लां पर कमंड करदे हन । 13 जे अहां अपणे आप्पे ते बाहर हन तां परमात्में ताई, कने जे शांत मन हन तां तुहां ताई हन । 14 कजोकि मसीह दा प्यार अहां जो मजबूर करी दिंदा ऐ; इसताई कि अहां एह समझदे हन कि जाहू इक्क सबना ताई मरेया तां सब मरी गैयो । 15 कजोकि सैह सबना लोकां ताई मरेया कजोकि जेहडे लोक जिंदे हन, सैह गांहा बासती अपणे ताई नी जीयें अपर तिस ताई जेहड़ा तिन्हां ताई मरेया कने भिरी जिंदा होई गैआ ।

मसीह च नौई सृष्टि

16 कने हुण ते अहां कुसी जो शरीरे मताबक नी समझणे । जे अहां मसीह जो भी शरीरे मताबक जाणेयां था, तमी हुण ते तिस जो इआं नी जाणणे । 17 इसताई जे कोई मसीह च ऐ तां सैह नौई सृष्टि ऐ : पराणियां गल्ला बीती गैइआं हन, दिक्खा, सारियां गल्लां नौईयां होई गैइआं । 18 एह सारियां गल्लां परमात्में दी तरफा ते हन, जिन्हीं मसीह दिया बजाह ते अप्पु सौगी अहां दा मेल मिलाप करी लैआ कने मेल मिलापे दी सेवा अहां जो सौपी दित्तियो ऐ । 19 परमात्में मसीह च होई नैं अपणे सौगी संसारे दा मेल मिलाप करी लैआ, कने अपराधां दा दोष तिन्हां पर नी लगाया, कने तिन्हीं मेल मिलापे दा वचन अहां जो सौपी दित्या ऐ । 20 इसताई, अहां मसीह दे राजदूत हन, मना परमात्में अहां दे दुआरा विणती करा दा ऐ । अहां मसीह दी तरफा ते विणती करदे हन कि परमात्में सौगी मेल मिलाप करी लैआ । 21 जेहड़ा पापे ते अनजान था, तिस जो तिन्हीं अहां ताई पाप ठेहराया कि अहां तिस च होई नैं परमात्में दी धार्मिकता बणी जान ।

6 अहां जेहडे परमात्में दे कम्मे च सौगी सौगी करणे दे नाते च अहां तुहां लोकां जो समझांदे हन कि तिसदा अनुग्रह जेहड़ा तुहां पर होया, तिसियो बेकार मत जाणां दैआ । 2 कजोकि सैह तां ग्लांदा ऐ, 'अपणी खुशिया दे बग्त में तेरी सुणी लैई, कने उद्धार करणे आळे दिने में तेरी मदद कित्ती ।'

दिखा, हुण सैह खुशिया दा बग्त ऐ; दिखा हुण सैह उद्धार करणे आळे दिन ऐ । 3 अहां कुसी भी गल्ला च ठोकर खाणे दा कोई भी मौका नी दिंदे तांकि म्हारी सेवा पर कोई दोष नी ओर्यें । 4 अपर हर गल्ला नैं परमात्में दे सेवकां साइआं अपणे सद्गुणां जो प्रकट करदे हन, बड़े धैर्य नैं, क्लेशां नैं, दरिद्रता नैं, संकटा नैं, 5 कोडे खाणे नैं, कैद होणे नैं, हुल्लड़ां नैं, मेहणता नैं जाणदे रहणे नैं, व्रत करणे नैं, 6 पवित्रता नैं, ज्ञान नैं, धीरज नैं, कृपालुता नैं, पवित्र आत्मां नैं, 7 सच्चे प्यारे नैं, सत्य दे वचने नैं, परमात्में दी सामर्थी नैं, धार्मिकता दे ह्त्थयारां नैं जेहडे सच्चे खबे ह्त्थां च हन । 8 अहां आदर कने निरादर दे बीच वेइजितिया कने इज्रता च अपणे आप्पे जो पेश करदे रँहदे हन तमी उग समझेया जांदा ऐ; 9 अणजाणां साइआं हन, तमी जाणदे हन; मरेयां साइआं हन कने दिखा जिंदे हन; मार खाणेआळ्यां दे साइआं हन अपर जान्नी ते मारे नी जांदे; 10 शोक करणे आळ्यां साइआं हन, अपर हमेशा खुशी मनादे हन;

गरीबां साइआं हन, अपर मतेआं जो मीर बणाई दिंदे हन; ऐदेय हन जिआं अहां अल्ल कुच्छ नी तमी सब कुच्छ रखदे हन ।

11 हे कुरिन्थियों, अहां खुली के तुहां नैं गल्लां कितिआं हन, अहां दा मन तुहां दी तरफा खुलया ऐ । 12 तुहां ताई अहां दे मने च कोई बैर नी, अपर तुहां दे ई मनां च बैर ऐ । 13 अपर अपणे बच्चे जाणी नैं तुहां नैं ग्लांदा कि तुहां भी तिसदे बदले च अपणे मने खोली दैआ ।

अम्बरे दे जुंगले च मत जुआ

14 वेवसुवासियां सौगी अम्बरे जो जुंगले च मत जोता, कजोकि धार्मिकता कने अधमें दा क्या मेल जोल? या जोतिया दी कने नैहरे दी क्या संगति? 15 कने मसीह दा सैताने सौगी क्या लगाव? या वसुआसिये सौगी वेवसुआसी दा क्या नाता? 16 कने मूर्तियां सौगी परमात्में दे मंदरे दा क्या रिश्ता? कजोकि अहां तां जिंदे परमात्में दे मंदर हन; जिआं परमात्में ग्लायया ऐ,

"मैं तिन्हां च बसगा कने तिन्हां च चला फिरगा; कने मैं तिन्हां दा परमात्मां हुंगा कने सैह मेरे लोक होंगे ।"

"मैं तिन्हां च बसगा कने तिन्हां च चला फिरगा; कने मैं तिन्हां दा परमात्मां हुंगा कने सैह मेरे लोक होंगे ।"

17 इसताई प्रभु ग्लांदा ऐ, "तिन्हां दे बिचे ते निकळा कने लग्न रहूआ; कने बुरिया चीज्जां जो मत छूआ, तां मैं तुहां जो ग्रहण करगा;

18 कने मैं तुहां दा पिता हुंगा, कने तुहां मेरे पुत्र कने कुड़ियां होंगे । एह सर्वशक्तिमान प्रभु परमात्में दा वचन ऐ ।"

7 कने हे प्यारे भाऊओ, जाहू कि एह प्रतिज्ञायें अहां जो मिलियां हन, तां ओआ, अहां अपणे आप्पे जो शरीर कने आत्मां दी सारी मलिनता ते शुद्ध करन, कने परमात्में दा डर रखदे होये पवित्रता जो सिद्ध करन ।

पौलुसे दी खुशी

2 अहां जो अपणे मने च जगाह दैआ । अहां ना कुसी सौगी अन्याय कित्ता, ना कुसी जो बिगाड़या, कने ना कुसी जो ठगेया । 3 मैं तुहां जो दोषी ठेहराणे ताई एह नी ग्लांदा । कजोकि मैं पैहलें ई ग्लाई दित्या कि तुहां अहां दे मने च इआं बसी गैयो कि अहां तुहां सौगी मरणे जीणे ताई त्यार हन । 4 मैं तुहां नैं बड़ी हिम्मत करी नैं ग्लांदा, मिन्जो तुहां पर बड़ा कमंड ऐ; मैं शांतिया नैं भरौईया अपणे सारे क्लेशे च मैं खुशिया नैं अति भरपूर रँहदा ।

5 कजोकि जाहू अहां मकिदुनिया च आये, हुण भी अहां दे शरीरे जो चैन नी मिलेया, अपर अहां चौनी पारसेयां ते क्लेश पादे थे; बाहर लड़ाईयां थियां, अंदर डरावणी गल्लां थियां । 6 तमी दीनां जो शांति दैणे आळा परमात्में तीतुस दे ओणे ते अहां जो शांति दित्ती; 7 कने ना सिर्फ तिसदे ओणे ते अपर तिसदी तिसा शांतिया ते भी, जेहड़ी तिसियो तुहां दे पारसे ते मिलियो थी । तिन्हीं तुहां दी लालसा, तुहां दे दुख कने मिन्जो ताई तुहां दी मेहणता दी खबर अहां जो सणाई, जिसते मिन्जो होर भी खुशी होई । 8 कजोकि मैं अपनी चिडिया नैं तुहां जो दुख दित्ता, अपर तिसाते पछतांदा नी जिआं कि पैहले पछतांदा था, कजोकि मैं दिखदा कि तिसा चिडिया नैं तुहां जो दुख तां होया अपर सैह थोड़िया देरा ताई था । 9 हुण मैं खुश ऐ पर इसताई नी कि तुहां जो दुख दित्ता ऐ, अपर इसताई कि तुहां तिस दुख दिया बजाह ते मन फिराया, कजोकि तुहां दा दुख परमात्में दी इच्छा दे मताबक था कि म्हारी तरफा ते तुहां जो कुसी भी गल्ला च नकसान नी होयें । 10 कजोकि परमात्मां भक्तिया दा दुख देहया पश्चाताप पैदा करदा ऐ जिसदा परणाम उद्धार ऐ कने भिरी तिसते पछताणा नी पोंदा । अपर संसारे दा दुख मौत पैदा करदा ऐ । 11 कने दिखा, इसा गल्ला ते कि तुहां जो परमात्में दी भक्तिया दा दुख होया तुहां च कितणा उत्साह कने प्रत्युतर कने रिस, कने डर, कने लालसा, कने मेहणत कने सज्जा दैणे दा वचार पैदा होया? तुहां सब तरांहे ते एह सिद्ध करी दिखाया कि तुहां इसा गल्ला च बेकसूर होन । 12 भिरी मैं जेहड़ा तुहां अल्ल लिख्या था, सैह ना तां तिसदिया बजाह ते लिख्या जिन्हीं अन्याय कित्या कने ना तिसदिया बजाह ते जिस पर अन्याय कित्या, अपर इसताई कि तुहां दा उत्साह जेहड़ा अहां ताई ऐ, सैह परमात्में सामणे तुहां पर प्रकट होई जां । 13 इसताई अहां जो शांति मिली ।

म्हारी इसा शांतिया सौगी तीतुस दी खुशिया दिया बजाह ते होर भी खुशी होई कजोकि तिसदा मन जेहड़ा तुहां सबना दिया बजाह ते हरा भरा होई

गैआ ऐ । 14 कजोकि जे मैं तिसदे सामणे तुहां दे बारे च कुच्छ कमंड दस्सेया, तां शर्मिदा नी होया, अपर जिआं अहां तुहां नैं सारियां गल्लां सच सच ग्लाई दित्तियां थियां, तिआं ई अहां दा कमंड दस्सणा तीतुसे सामणे भी सच निकळेया । 15 जाहू तिसियो तुहां सारेयां दे आज्ञाकारी होणे दी याद आंदी कि किआं तुहां ते उरदे कने कमदे होये तिस नैं मिले; तां तिसदा प्यार तुहां दी तरफ होर भी बधदा जांदा ऐ । 16 मैं खुश ऐ कजोकि मिन्जो हर गल्ला च तुहां पर पूरा भरोसा ऐ ।

अनुग्रह से दान दैणां

8 हुण हे भाइयो, अहां तुहां जो परमात्मं दे तिस अनुग्रह दी खबर दिंदे हन जेहडे मकिदुनिया दी कलेसियां पर होया ऐ । 2 कि क्लेशे दी बड़ी परीक्षा च तिन्हां दे बड़ी खुशी कने भारी कंगालपने च तिन्हां दी उदारता बड़ी बधी गई । 3 तिन्हां दे बारे च मेरी एह गवाही ऐ कि तिन्हां जितणा दैई सकदे थे दित्ता इतणा ई नी अपर अपने सामर्थं ते भी जादा मन भरी नैं दित्ता । 4 कने इस दाने च कने पवित्र लोकां दी सेवा च भागी होणे दे अनुग्रह दे बारे च, अहां बार बार बड़ी विणती किती, 5 कने जिआं अहां आशा कित्तियो थी, तिआं ई नी अपर तिन्हां प्रभु जो भिरी परमात्मं दी इच्छा ते अहां जो भी अपने आप्पे जो दैई दित्ता । 6 इसताई अहां तीतुसे जो समझाया कि जिआं तिन्हीं पैहले शरू कित्ता था, तिआं ई तुहां बिच इस दाने दे कम्मे जो पूरा भी करी लैन । 7 इसताई जिआं तुहां हर गल्ला च मतलब वसुआसे, वचन, ज्ञान कने सब तरांह दी कोशशां च, कने तिस प्यारे च जेहड़ा अहां रखदे हन, बधदे जांदे हन, तिआं ई इस दाने दे कम्मे च बधदे जाआ । 8 मैं हुकमे दी रीतिया पर तां नी, अपर दूयेयां दे उत्साह ते तुहां दे प्यारे दी सचाईया जो परखणे ताई ग्लांदा ऐ । 9 तुहां अहां दे प्रभु मसीह दा अनुग्रह जाणदे हन कि सैह मीर होई नैं भी तुहां ताई कंगाल बणी गैआ, तांकि तिसदे कंगाल होई जाणे ते तुहां मीर होई जान । 10 इसा गल्ला च मेरी सलाह ऐही ऐ : एह तुहां ताई खरा ऐ, जेहड़ा इक्क साल ते नी तां सिर्फ इस कम्मे जो करणे च भी कने इसा गल्ला दे चाहणे च भी गांह थे, 11 इसताई हुण एह कम्म पूरा करा कि जिआं इच्छा करणे च त्यार थे, तिआं ई अपणी अपणी रकमां दे मताबक पूरा भी करा । 12 कजोकि जे मने दी त्यारी होयें तां दान तिसदे मताबक ग्रहण भी हुंदा ऐ जेहड़ा तिस अल्ल ऐ, ना कि तिसदे मताबक जेहड़ा तिस अल्ल नी । 13 एह नी कि दूयेयां जो चैन कने तुहां जो क्लेश मिलें, 14 अपर बराबरी दे वचार ते इस बतल तुहां दा फायदा तिन्हां दे घाटे च कम्म ओयें, तांकि तिन्हां दा फायदा भी तुहां दे घाटे च कम्म ओयें कि बराबरी होई जां । 15 जिआं लिख्या ऐ, 'जिन्हीं मता बटीणेया तिसदा कुच्छ जादा नी निकळेया, कने जिन्हीं थोड़ा बटीणेया तिसदा कुच्छ घट नी निकळेया ।'

तीतुस कने तिस सौगी कम्म करणे आळे

16 परमात्मं दा धन्यावाद होयें, जिन्हीं तुहां ताई सैई उत्साह तीतुसे दे मने च पाई दित्ता ऐ । 17 कि तिन्हीं अहां दा समझाणा मनी लैआ बड़ी उत्साही होई नैं सैह अपणी इच्छा नैं तुहां अल्ल गैआ ऐ । 18 अहां तिस सौगी तिस भाऊये जो भी घल्लया ऐ जिसदा नां सुसमाचारे दे बारे च सारी कलेसिया च फैलया ऐ; 19 कने इतणां ई नी, अपर सैह कलेसिया दिया बजाह ते ठेहराया भी गैआ कि इस दाने दे कम्म ताई अहां सौगी जां । अहां एह सेवा इसताई करदे हन कि प्रभु दी महिमा कने अहां दे मने दी त्यारी प्रकट होई जां । 20 अहां इसा गल्ला च चौकस रँहदे हन कि इसा उदारता दे कम्मे दे बारे च जिसदी सेवा अहां करदे हन, कोई अहां पर दोष नी लगाई पां । 21 कजोकि जेहड़ी गल्लां सिर्फ प्रभुये अल्ल नी, अपर माणुआं अल्ल भी खरियां हन अहां तिन्हां दी चिंता करदे हन । 22 अहां तिस सौगी अपने भाऊये जो भी घल्लया ऐ, जिसियो अहां बार बार परखणे दियां मतिआं गल्लां च उत्साह पाया ऐ; अपर हुण तुहां पर तिसियो बड़ा भरोसा ऐ, इसा बजाह ते सैह होर भी जादा उत्साही हन । 23 जे कोई तीतुस दे बारे च पूछें, तां सैह मेरा दोस्त कने तुहां ताई सेहकर्मि ऐ; कने जे अहां दे भाऊआं दे बारे च पूछे, तां सैह कलेसियां दे घल्लेयो कने मसीह दी महिमा हन । 24 अपणां प्यार कने अहां दा सैह कमंड जेहड़ा तुहां दे बारे च ऐ कलेसियां दे सामणे सिद्ध करी नैं तिन्हां जो दस्सा ।

साथी - मसीहियां ताई मदत

9 हुण तिसा सेवा दे बारे च जेहडे पवित्र लोकां ताई किती जांदी ऐ, मिन्जो तुहां जो लिखणा जरूरी नी । 2 कजोकी मैं तुहां दे मने दी त्यारियां जो जाणदा ऐ, जिसदिया बजाह ते मैं तुहां दे बारे च मकिदुनियावासियां सामणे कमंड दस्सदा ऐ कि अखया दे लोक इक्क साल ते त्यार होयेयो हन, कने तुहां दा उत्साहें होर मतेआं जो भी उभारया ऐ । 3 अपर मैं भाऊआं जो इसताई घल्लया ऐ कि अहां जेहड़ा कमंड तुहां दे बारे च दस्सया, सैह इसा गल्ला च बेकार नी ठेहरेया; अपर जिआं मैं गलाया तिआं ई तुहां त्यार रँहआ, 4 इआं ना होयें कि जे कोई मकिदुनियावासी मिन्जो सौगी ओयें कने तुहां जो त्यार नी पां, तां होई सकदा ऐ कि इस भरोसे दिया बजाह ते (एह नी ग्लांदा कि तुहां) शर्मिदा होन । 5 इसताई मैं भाऊआं नैं एह विणती करणां जरूरी समझा कि सैह पैहले ते तुहां अल्ल जान, कने तुहां दी उदारता दा फळ जिसदे बारे च पैहले ते वचन दित्ता था, त्यार करी रखन कि एह दबाबे नैं नी पर उदारता दे फळे साइआं त्यार होन ।

दान किआं दैणां चाइदा

6 अपर गल्ल एह ऐ : जेहड़ा थोड़ा बांदा ऐ, सैह थोड़ा बडगा भी; जेहड़ा मता बांदा ऐ सैह मता बडगा । 7 हर इक्क माणु जिआं मने च ठाणी लैं तिआं ई दान करें; ना कुद कुद के कने ना दबाबे नैं, कजोकि परमात्मां खुशिया नैं दैणे आळे नैं प्यार रखदा ऐ । 8 परमात्मां सब तरांह दा अनुग्रह तुहां जो मता सारा दैई सकदा ऐ जिसते हर गल्ला च कने हर बगत, सब कुच्छ, जेहड़ा तुहां जो जरूरी होयें, तुहां अल्ल रँह; कने हर इक खरे कम्मे ताई तुहां अल्ल बड़ा कुच्छ होयें । 9 जिआं लिख्या ऐ, "तिन्हीं रंगाडेया, तिन्हीं गरीबां जो दान दित्ता, तिसदा धर्म सदा बणी रँह्या ।"

10 जेहड़ा बाणे आळे जो बीई कने खाणे ताई रोटी दिंदा ऐ, सैह तुहां जो बीई दिंदा, कने तिसियो फळवन्त करणा, कने तुहां दे धर्मं दे फळां जो बढांगा । 11 तुहां हर इक्की गल्ला च सब तरांह दी उदारता ताई जेहड़ा म्हारिया बजाह ते परमात्मं दा धन्यावाद करवांदी ऐ, मीर किंते जान । 12 कजोकि इसा सेवा दे पूरा करणे ते ना सिर्फ पवित्र लोकां दी जरूरतां पूरियां होंदियां हन, अपर लोकां दी तरफा ते परमात्मं दा भी बड़ा धन्यावाद हुंदा ऐ । 13 कजोकि इसा सेवा जो प्रमाण स्वकार करी नैं सैह परमात्मं दी महिमा प्रकट करदे हन कि तुहां मसीह दे सुसमाचारे जो मनी नैं तिसदे अधीन रँहदे हन, कने तिन्हां दी कने सबना दी मदद करणे च उदारता प्रकट करदे रँहदे हन । 14 कने सैह तुहां ताई प्रार्थना करदे हन; कने इसताई कि तुहां पर परमात्मं दा बड़ा ई अनुग्रह ऐ, तुहां दी लालसा करदे रँहदे हन । 15 परमात्मं दा, तिसदे तिस दान ताई जेहड़ा वर्णन ते बाहर ऐ, धन्यावाद होयें ।

पौलुसे दा हक्क

10 मैं सैई पौलुस जेहड़ा तुहां सामणे दीन ऐ अपर पीठी पचांह तुहां दे पास्से हिम्मत करदा, तुहां जो मसीह दी नम्रता कने कोमलता दिया बजाह ते समझांदा । 2 मैं एह विणती करदा कि तुहां सामणे मिन्जो बहादुर होई नैं हिम्मत करणां नी पौयें, जिआं मैं कुच्छ लोकां पर जेहडे अहां जो शरीरे मताबक चलणे आळे समझदे हन, हिम्मत दस्सणे दा वचार करदा । 3 कजोकि जे अहां शरीरे च चलदे फिरदे हन, तमी शरीरे मताबक नी लडुदे । 4 कजोकि म्हारी लड़ाईया दे हत्थयार शरीरक नी, अपर गद्दां जो ढाई दैणे ताई परमात्मं दिया बजाह ते सामर्थी हन । 5 इसताई अहां कल्पनां दा कने हर इक्क उंचिया गल्ला दा, जेहड़ा परमात्मं दी पणछेण दे विरोध च उठदी ऐ, खंडन करदे हन; कने हर इक्क भावना जो कैद करी नैं मसीह दा आज्ञाकारी बणाई दिंदे हन, 6 कने त्यार रँहदे हन कि जाहू तुहां दे हुकमे दा पालन पूरा होई जां, तां हर तरांह दे हुकमे दा उल्लंघने जो देडित करन ।

7 तुहां तिन्हां दियां गल्ला जो दिखा, जेहड़ियां अंखी सामणे हन । जे कुसी जो अपने पर एह भरोसा होयें कि मैं मसीह दा ऐ, तां सैह एह भी जाणी लैं कि जिआं सैह मसीह दा ऐ तिआं ई अहां भी हन । 8 कजोकि जे मैं तिस हक्के दे बारे च होर भी कमंड दस्सें, जेहड़ा प्रभुये तुहां जो बिगाडणे ताई नी अपर बनाणे ताई अहां जो दित्ता ऐ, तां शर्मिदा नी हुंगा । 9 एह मैं इसताई ग्लांदा

कि चिड़ियां दिया बजाह ते तुहां जो डराणे आळा नी ठेहरें । 10 कजोकि सैह ग्लां दे हन, "तिसदी चिड़ियां तां गम्भीर कने प्रभावशाली हन; अपर जाहू सैह सामणे हुंदा ऐ, तां सैह शरीरे दा कमजोर कने बोल चाले च कमजोर ऐ पता लगी जादा ऐ ।" 11 जेहड़ा इआ ग्लांदा ऐ, सैह एह समझ रखें कि जिआं पीठी पचां चिड़ियां च अहां दे वचन हन, तिआं ई तुहां दे सामणे अहां दे कम्म भी होंगे । 12 कजोकि अहां जो एह हिम्मत नी कि अहां अपणे आप्पे जो तिन्हां देहयां सौगी गिणेया तिन्हां नैं अप्पु जो मिलान, जेहड़े अपणी प्रशंसा अप्पु करदे हन, कने अपणे आप्पे जो अप्पु च नाप तौल करी नैं इक्की दूये नैं समझोता करी नैं मूर्ख ठेहरदे हन ।

13 अहां तां सीमा ते बाहर कमंड कदी भी नी करणे, अपर तिसा सीमा तिकर जेहड़ी परमात्मैं अहां तांई ठेहराई दिती ऐ, कने तिस च तुहां भी आईयो हन, कने तिसदे मताबक कमंड भी करणे । 14 कजोकि अहां अपणी सीमा ते बाहर अपणे आप्पे जो बनणा नी चाहंदे, जिआं कि तुहां तिकर पुज्जणे दी हालता च नी होंदा, अपर मसीह दा सुसमाचार सणादे सणादे तुहां तिकर पुज्जी चुकेयो हन । 15 अहां सीमा ते बाहर दूयेयां दी मेहनत पर कमंड नी करदे; अपर अहां जो आशा नी कि जिआं जिआं तुहां दा वसुआस बढ़दा जांगा तिआं तिआं अहां अपणी सीमा मताबक तुहां दिया बजाह ते होर भी बढ़दे जांगे, 16 तांकि अहां तुहां दिया सीमा ते गाह बधी नैं सुसमाचार सणान, कने एह नी कि अहां दूयेयां दी सीमा दे अंदर बणेयो बणांये कम्मां पर कमंड करन । 17 अपर जेहड़ा कमंड करे, सैह प्रभु पर कमंड करे । 18 कजोकि जेहड़ा अपणी बढ़ाई करदा ऐ सैह नी, अपर जिसदी बढ़ाई प्रभु करदा ऐ, सैई ग्रहण कित्ता जांदा ऐ ।

पौलुस कने झूठे चले

11 जे तुहां मेरी थोड़ी देहई मूर्खता सेई लैंदे तां क्या ई खरा होंदा; हां मेरी सेई भी लैंआ । 2 कजोकि मैं तुहां दे बारे च ईश्वरीय धुन लगाई रखदा, इसतांई कि मैं इक्की मरदे नैं तुहां गल्ल लगाई ऐ कि तुहां जो पवित्र कुआंरिया साइआं मसीह दे हुआले करी दैन । 3 अपर मैं डरदा कि जिआं सपे अपणी चलाकिया नैं हव्वा जो भकाया, तिआं ई तुहां दे मन तिसा सीधाईया नैं कने पवित्रता नैं जेहड़ी मसीह सौगी होणी चाइदी, कुत्थी भ्रष्ट नी कित्ते जान । 4 जे कोई तुहां अल्ल आई नैं कुसी दूये यीशु दा प्रचार करे, जिसदा प्रचार अहां नी कित्ता; या कोई होर आत्मा तुहां जो मिले, जेहड़ी पैहले नी मिलियो थी; या होर कोई सुसमाचार सणां जिसियो तुहां पैहले नी मनेया था, तां तिसियो झेली लैंदे हन । 5 मैं तां समझांदा कि मैं कुसी गल्ला च बडे ते बडे चेलयां ते घट नी ऐ । 6 जे मैं बोल चाल च अनाडी ऐ । तमी ज्ञाने च नी । अहां इसियो हर गल्ला च सब तरांह ते तुहां तांई प्रकट कित्ता ऐ । 7 क्या इस च मैं कोई पाप कित्ता कि मैं तुहां परमात्मैं दा सुसमाचार मुफते च सणाया कने अपणे आप्पे जो नीचा कित्ता कि तुहां उंचे होई जा? 8 मैं होरनी कलेसियां जो लूटया अपर मैं तिन्हां ते दिहाड़ी लैंदे तांकि तुहां दी सेवा करे । 9 कने जाहू मैं तुहां सौगी था कने मिन्जो घाटा होया, तां मैं कुसी पर भार नी पाया कजोकि भाऊआं मकिदुनिया ते आई नैं मेरे घाटे जो पूरा कित्ता; कने मैं हर गल्ला च अपणे आप्पे जो तुहां पर बनणे ते रोकेया, कने रोकी रखगा । 10 जे मसीह दी सचाई मिन्जो च ऐ तां अखया देशे च कोई मिन्जो इस कमंड ते नी रोकगा । 11 कजो? क्या इसतांई कि मैं तुहां नैं प्यार नी रखदा? परमात्मां एह जाणदा ऐ कि मैं प्यार रखदा ऐ ।

12 अपर जेहड़ा मैं करदा ऐ, सैई करदा रेंह्या कि जेहड़े लोक चाल चलदे हन तिन्हां जो मैं चाल चलणां नी दैं, तांकि जिसा गल्ला च सैह कमंड करदे हन, तिसा च सैह अहां ई साइआं होये । 13 कजोकि देहय लोक झूठे चले, कने छले नैं कम्म करणे आळे, कने मसीह दे चेलयां दा रूप धरणे आळे हन । 14 एह कोई घबराणे दी गल्ल नी कजोकि सैतान अप्पु भी ज्योतिर्मय सुअंगदूते दा रूप धारण करदा ऐ । 15 इसतांई जे तिसदे सेवक भी धर्म दे सेवकां दा देहया रूप धरन, तां कोई बडी गल्ल नी, अपर तिन्हां दा अन्त तिन्हां दे कम्मां मताबक हुंगा ।

चले दे रूपे च पौलुसे दा दुखभोग

16 मैं भिरी ग्लांदा, कोई मिन्जो मूर्ख ना समझें; ना तां मूर्ख ई समझी नैं मेरी सेई लैंआ, तांकि थोड़ा देहया मैं भी कमंड करी सकन । 17 इस बेधड़क

कमंडे च जेहड़ा कुच्छ मैं ग्लांदा, सैह प्रभु दे हुक्मे मताबक नी अपर मना मूर्खता नैं ई ग्लांदा । 18 जाहू कि मते लोक शरीरे मताबक कमंड करदे हन, तां मैं भी कमंड करगा । 19 तुहां तां समझदा होई नैं खुशिया नैं मूर्खा दी सेई लैंदे हन । 20 कजोकि जाहू तुहां जो कोई दास बणाई लैंदा ऐ, या खाई जांदा ऐ, या फसाई लैं दा ऐ, या अपणे आप्पे जो बडा बणांदा ऐ, या तुहां दे मुंम पर थप्पड़ मारदा ऐ, तां तुहां सेई लैंदे हन । 21 मेरा ग्लाणां अपमाने दी रीतिया पर ऐ, मना अहां इसतांई कमजोर थे ।

अपर जिसा कुसा गल्ला च कोई हिम्मत करदा ऐ मैं मूर्खता नैं ग्लांदा तां मैं भी हिम्मत करदा । 22 क्या सैह ई इब्रानी ऐ? मैं भी ऐ । क्या सैह ई इस्राएली ऐ? मैं भी ऐ । क्या सैह ई अब्राहमे दे वंश हन? मैं भी ऐ । 23 क्या सैह ई मसीह दे सेवक हन मैं पागलां साइआं ग्लांदा ऐ, मैं तिन्हां ते बधी नैं ऐ! जादा मेहनत करणे च; बार बार कैद होणे च; कोड़े खाणे च; बार बार मौता दे जोखिमा च । 24 पंज बरी मैं ई यहूदियां दे हत्थे ते उन्ताली उन्ताली कोड़े खादे । 25 तीन बरी मैं ई बेंत खादा; इक्क बरी मिन्जो पर पत्थर मारे; तीन बरी चाहज, जिन्हां पर मैं चढ़या था, टूटी गै; इक्क रात कने दिन मैं समुंदरे च कटेया । 26 मैं बार बार यात्रां च; नदियां दे जोखिमां च; डाकूआं दे जोखिमां च; अपणे जाति आळेयां ते जोखिमां च; बणे दे जोखिमां च; समुंदरे दे जोखिमां च; झूठे भाऊआं दे बिच जोखिमां च रहूआ । 27 मेहनता कने कष्टे च; बार बार जागदे रहणे च; भूखा प्यासा च; बार बार व्रत करणे च; ठंडी च; उघड़े रहणे च; 28 कने होरनी गल्लां जो छडी नैं जिन्हां दा वर्णन मैं नी करदा, सारी कलेसियां दी चिंता हर रोज मिन्जो दबांदी ऐ । 29 कुसी दियां कमजोरियां नैं मैं कमजोर नी होंदा? कुसी दे ठोकर खाणे ते मेरा मन नी दुखदा?

30 जे कमंड करणां जरूरी ऐ, तां मैं अपणियां कमजोरियां दियां गल्लां पर कमंड करगा । 31 प्रभु यीशु दा परमात्मां कने पिता जेहड़ा सदा धन ऐ, जाणदा ऐ कि मैं झूठ नी गलांदा । 32 दमिश्क च अरितास राजे दी तरफा ते जेहड़ा हाकम था, तिन्हीं मिन्जो पकड़णे जो दमिश्कियां दे सैहरे पर पैहरा दिया था, 33 कने मैं टोकरे च खिड़कियां ते होई नैं शहरपनाह पर ते लौयाआ गैआ, कने तिसदे हत्थे ते बची निकळेया ।

पौलुसे दा दिव्य दर्शन कने कमजोरी

12 जे कमंड करणां मिन्जो तांई ठीक नी तमी करणां पोंदा ऐ; इसतांई मैं प्रभु दे दित्तयो दर्शना कने प्रकाशणा दी चर्चा करगा । 2 मैं मसीह च इक्की माणु जो जाणदा, चौदा साल पैहलें (मैं नी जाणदा बस परमात्मां जाणदा ऐ) शरीरे सौगी या बिना शरीरें त्रीये सुअर्ग च चुकी लैंआ गैआ था । 3 कने मैं जाणदा ऐ कि इस माणु जो (मैं नी जाणदा, बस परमात्मां जाणदा ऐ) बिना शरीरें या शरीरे सौगी 4 सुअर्ग लोक पर चुकी लैंआ गैआ, कने देहई गल्ल सुणी जेहड़ी ग्लाणे आळी नी; कने जिन्हां दे मुंम पर लाणा माणु जो ठीक नी । 5 देहयो माणु पर तां मैं कमंड करगा, अपर अपणे पर अपणियां कमजोरियां जो छड्डु, अपणे बारे च कमंड नी करगा । 6 कजोकि जे मैं कमंड करणां चां भी तां मूर्ख नी हुंगा, कजोकि सच ग्लांगा; तमी रुकी जांदा ऐ, इआं ना होयें कि जिआं कोई मिन्जो दिखदा ऐ या मिन्जो ते सुणदा ऐ, मिन्जो तिसते बधी नैं समझन । 7 इसतांई कि मैं प्रकाशणां दी बहुतायत ते फूली नी जां, मेरे शरीर च इक्क कंडा चुभाया, मतलब सैताने दे इक्क दत्ते कि मिन्जो कसून मारे तांकि मैं फूली नी जां । 8 इसदे बारे च मैं प्रभुये नैं तीन बरी विणती कित्ती कि मिन्जो ते दूर होई जा । 9 अपर तिन्हीं मिन्जो नैं गलाया, "मेरा अनुग्रह तेरे तांई बडा ऐ; कजोकि मेरी सामर्थी दी कमजोरिया च सिद्ध होई ऐ ।" इसतांई मैं बडी खुशिया नैं अपणी कमजोरियां पर कमंड करगा कि मसीह दी सामर्थी मिन्जो पर छों करदी रहू । 10 इसा बजाह ते मैं मसीह तांई कमजोरियां च, कने निंदा च, कने दरिद्रता च, कने उपद्रवां च, कने संकटा च खुश ऐ; कजोकि जाहू मैं कमजोर हुंदा ऐ, तमी ताकतवर हुंदा ।

कुरिन्थियों तांई पौलुसे दी चिंता

11 मैं मूर्ख तां बणेयां, अपर तुहां मिन्जो एह करणे तांई मजबूर कित्ता । तुहां जो तां मेरी तारीफ करणी चाइदी थी, कजोकि जे मैं कुच्छ भी नी, तमी तिन्हां बडे ते बडे चेलयां ते कुसा गल्ला च घट नी ऐ । 12 चले दे लखण भी तुहां बिच सब तरांह दे धीरज सौगी नशाणा, कने अद्भुत कम्मां, कने सामर्थी दे कम्मां च

दस्से मैं । 13 तुहां कुण देहई गल्ला च दूइआं कलेसियां ते घट थे, सिर्फ इस च कि मैं तुहां पर अपणां भार एह अन्याय माफ करा ।

14 दिखा, मैं त्री बरी तुहां अल्ल ओणे जो त्यार ऐ, कने मैं तुहां पर कोई भार नी रखगा, कजोकि मैं तुहां दी योजना जो नी अपर तुहां जो ई चाहंदा । कजोकि बचेयां जो माता पिता तांई धन बटीणना नी चाइदा, अपर माता पिता जो बचेयां तांई । 15 मैं तुहां दिया आत्मां तांई बडी खुशिया नैं खर्च करगा, अपर अप्पु भी खर्च होई जांगा । क्या जितणा बधी नैं मैं तुहां नैं प्यार रखदा, उतणां ई घटी करी तुहां मिन्जो नैं प्यार रखगे? 16 इआं होई सकदा ऐ कि मैं तुहां पर भार नी पाया, अपर चलाकिया नैं तुहां जो धोखा देई नैं फसाई लेआ । 17 खरा, जिन्हां जो मैं तुहां अल्ल घल्लया, क्या तिन्हां च कुस दिया बजाह ते मैं छल करी नैं तुहां ते कुच्छ लैई लेआ? 18 मैं तीतुसे जो समझाई नैं तिस सौगी तिस भाऊये जो घल्लया, तां क्या तीतुसे छल करी नैं तुहां ते कुच्छ लैआ? क्या अहां इक्को ई आत्मां दे चलाये नी चलन? क्या इक्को ई लौका पर ना चलन?

19 तुहां अल्ली तिकर समझी गेयो होंगे कि अहां तुहां सामणे जबाब दे दे हन । अहां तां परमात्मैं जो सामणे समझी करी मसीह च ग्लां दे हन, कने हे प्यारे भाऊओ, सारियां गल्लां तुहां दी तरकिया तांई ग्लां दे हन । 20 कजोकि मिन्जो डर ऐ, कुत्थी इआं ना होयें कि मैं आई नैं जिआं चाहंदा ऐ, तिआं तुहां जो नी पां; कने मिन्जो भी जिआं तुहां नी चाहंदा तिआं ई पां; कने तुहां च झगड़ा, डाह, गुस्सा, विरोध, ईर्ष्या, चुगली, कमंड कने बखेडे होन; 21 कने कुत्थी इआं ना होयें कि मेरा परमात्मां मेरे भिरी ते तुहां दे ऐत्थु ओणे पर मिन्जो पर दबाब पाये कने मिन्जो बडेयां तांई भिरी शोक करणां पाये, जिन्हां नैं पैहले पाप कित्या था कने गंदे कम्म कने व्यभिचार कने लुचपन ते, जेहड़ा तिन्हां कित्ता, मन नी फिराया ।

आखरी चतौनी

13 हुण त्री बरी मैं तुहां अल्ल ओंदा ऐ; दो या तीन गवाहां दे मुंमैं ते हर इक्क गल्ल ठेहराई जांगी । 2 जिआं मैं जाहू दूई बरी तुहां सौगी था

तिआं ई हुण दूर रेंहदे रेंहदे तिन्हां लोकां जिन्हां पैहले पाप कित्ता, कने होरनी सारे लोकां नैं हुण पैहले ते ग्लाई दिंदा ऐ कि जे मैं भिरी ओंगा तां नी छडगा, 3 कजोकि तुहां तां इसदा सबूत चाहंदा हन कि मसीह मिन्जो च ग्लांदा ऐ, जेहड़ा तुहां तांई कमजोर नी अपर तुहां च सामर्थी ऐ । 4 सैह कमजोरियां दिया बजाह ते सूलिया पर टूंगया तां गैआ तमी परमात्मैं दी सामर्थी नैं जिंदा ऐ । अहां भी तिस च कमजोर हन, अपर परमात्मां दी समर्था ते जेहड़ा तुहां तांई ऐ, तिस सौगी जींगे ।

5 अपणे आप्पे जो परखा कि वसुआसे च हन कि नी । अपणे आप्पे जो जांचा । क्या तुहां अपणे बारे च एह नी जाणदे कि यीशु मसीह तुहां च ऐ? नी तां तुहां जांचा च निकम्मे निकले हन । 6 अपर मेरी आशा ऐ कि तुहां जाणी लेंगे कि अहां निकम्मे नी । 7 अहां अपणे परमात्मैं नैं एह प्रार्थना करदे हन कि तुहां कोई बुराई ना करा, इसताई नी कि अहां खरे दिखी पॉन, अपर इसताई कि तुहां भलाई करा, चान अहां निकम्मे ठेहरे । 8 कजोकि अहां सचाईया दे विरोध च कुच्छ नी करी सकदे, पर सचाईया तांई करी सकदे हन । 9 जाहू अहां कमजोर हन कने तुहां ताकतवर हन, तां अहां खुश होंदे हन, कने एह प्रार्थना भी करदे हन कि तुहां सिद्ध होई जाआ । 10 इसा बजाह ते मैं तुहां दिया पीठी पचांह एह गल्ला लिखदा, कि पेश होई नैं मिन्जो तिस हक्के मताबक जिसियो प्रभुयें बिगाड़णे तांई नी अपर बनाणे तांई मिन्जो दिता ऐ, कडाई ते कुच्छ करणां नी पाँये ।

नमस्कार

11 कने हे भाऊओ खुश रहूआ; सिद्ध बणदे जा, हौंसला रखा; इक्को ई मन रखा मिली नैं रहूआ । कने प्यार कने शांति दा दाता परमात्मां तुहां सौगी हुंगा । 12 इक्की दूये जो पवित्र पुक्के नैं नमस्कार करा । 13 सारे पवित्र लोक तुहां जो नमस्कार ग्लां दे हन । 14 प्रभु यीशु मसीह दा अनुग्रह कने परमात्मैं दा प्यार कने पवित्र आत्मां दी सेहभागिता तुहां सबना सौगी होंदी रहू ।

गलातियों

भूमिका

जाहू यीशु मसीह दे सुसमाचारे दा प्रचार कने प्रसार गैर - यहूदी लोकां दे बीच होणां लग्गा, तां एह सवाल पैदा होया कि इक्क सच्चा मसीह होणे तांई इक्की माणुये जो मूसा दिया व्यवस्था दा पालन करणां जरूरी ऐ या नी । पौलुस एह तर्क पेश करदा ऐ कि एह जरूरी नी ऐ । सैह ग्लांदा ऐ कि वास्तव च मसीह च जिन्दगी दा इक्क सिर्फ ठोस आधार ऐ वसुआस । तिसदिया बजाह ते ई सारे लोकां दा परमात्म सौगी रिश्ता सुधरदा ऐ । अपर एशिया माइनर स्थित इक्क रोमी प्रान्त, ग्लातिया दी कलेसियां दे लोकां जो मूसा दी व्यवस्था दा पालन करणां भी जरूरी ऐ ।

ग्लातियां दे नांये पर पौलुस चले दी पत्री इसतांई लिखियो थी कि सैह लोक जेहडे गलत शिक्षा ते बेहकी गैयो थे, तिन्हां जो सच्चे वसुआस कने वर्ताव च वापस अंदेया जां । पौलुस इसा पत्रिया दी शुरुआत यीशु मसीह दा इक्क चेला होणे तांई अपणे हक्क दे समर्थने सौगी करदा ऐ । सैह इसा ग्ला पर जोर दिंदा ऐ कि इक्क चेला होणे तांई तिसदा सदेया जाणां परमात्म दे पाससे ते ऐ ना कि माणु दे हक्क ते; कने एह कि तिसदा मकसद खास कर गैर - यहूदियां च सुसमाचार प्रचार करणां था । भिरी सैह एह तर्क पेश करदा ऐ कि सिर्फ वसुआस दे दुआरा ई लोकां दा परमात्म सौगी रिश्ता सुधरदा ऐ । आखरी दे पाठां च पौलुस एह दस्सदा ऐ कि मसीह च वसुआस दे परणाम स्वरूप पैदा प्यार दिया बजाह ते ई मसीही सुवाभाविक रूप ते प्रवाभित होंदा ऐ ।

रूप-रेखा

भूमिका कने मूल विषय 1: 1- 10

चले दे रूपे च पौलुसे दा हक्क 1: 11 --- 2: 21

परमात्म दे अनुग्रह दा सुसमाचार 3: 1 --- 4: 31

मसीही अजादी कने उत्तरदायित्व 5: 1 --- 6: 10

उपसंहार 6: 11- 18

नमस्कार

1 पौलुस दे पाससे ते - जेहड़ा कि ना तां माणुआं दे पाससे ते कने ना माणुये दिया बजाह ते, अपर यीशु मसीह कने पिता परमात्म दिया बजाह ते जिन्हीं तिसजो मरेयां ते जिंदा कित्या, चेला ऐ --- 2 कने सारे भाऊआं दे पाससे ते जेहडे मिन्जो सौगी हन, गलातिया दी कलेसियां दे नांअ :

3 पिता परमात्म कने अहां दे प्रभु यीशु मसीह दे पाससे तुहां जो अनुग्रह कने शांति मिलदी रँह । 4 तिन्हीं अपणे आप्पे जो अहां दे पापां तांई देई दित्ता, तांकि अहां दे परमात्म दी कने पिता दी इच्छा दे मताबक अहां जो इस बरते दे बुरे संसारे ते छड्डां । 5 तिसदी स्तुति कने बड़ाई जुगा जुग होंदी रँह । आमीन ।

कोई दूआ सुसमाचार नी

6 मिन्जो हैरानी होंदी कि जिन्हीं तुहां जो मसीह दे अनुग्रह च सदेया तिस ते तुहां इतणी तौळी फिरी करी होरनी किस्मा दे सुसमाचारे बक्खें झुकी गै । 7 अपर सैह दूआ सुसमाचार ऐ ई नी : अपर गल्ल एह ऐ कि कितणे ऐदेय हन जेहडे तुहां जो डराई दिंदे हन, कने मसीह दे सुसमाचारे जो बिगाड़णा चाहंदे हन । 8 अपर जे अहां, या सुअर्ग ते कोई दूत भी तिस सुसमाचारे जो छड्डी करी जेहड़ा अहां जो सणाया ऐ, कोई होर सुसमाचार तुहां जो सणां, तां सैह श्रापित ऐ । 9 जिआं अहां पैहले ग्लाई बैठेयो हन, तिआं ई मैं हुण भिरी ग्लांदा कि तिस सुसमाचार जो छड्डी करी जिसियो तुहां मनेया ऐ, जे कोई होर सुसमाचार सणादा ऐ, तां श्रापित ऐ ।

10 जे हुण मैं अज्जे तिकर माणुआं जो खुश करदा रँहदा? तां मसीह दास नी हुंदा ।

पौलुस किआं चेला बणेयां

11 हे भाऊओ, मैं तुहां जो दस्सी दिंदा कि जेहड़ा सुसमाचार मैं सणाया ऐ, सैह माणुये दा नीयें । 12 कजोकि सैह मिन्जो माणुये दे पाससे ते नी पुज्या, कने ना मिन्जो सखाया, अपर यीशु मसीह दे तेजे ते मिलेया । 13 यहूदी मत च जेहड़ा पैहले च मेरा चाल चलण था तिसदे बारे च तुहां सुणी चुकेयो हन

कि मैं परमात्म दी कलेसिया जो बड़ा सतांदा कने नाश करदा था । 14 कने अपणे मते सारे जाति भाऊआं ते जेहडे मेरिया उमरा दे थे. यहूदी मत च जादा बढदा जांदा था कने अपणे पितरां दे रीति रुआजां तांई बड़ा उतेजित था । 15 अपर परमात्म दी, जिन्हीं मेरिया माऊ दे पेटे ते ई मिन्जो ठेहराया कने अपणे अनुग्रह नैं सद्दी लैआ, 16 जाहू इच्छा होई कि मिन्जो च अपणे पुत्रे जो प्रकट करें कि मैं गैर - यहूदियां च तिसदा सुसमाचार सणां, तां ना मैं मासे ते कने ना खूने ते सलाह लैई, 17 कने ना यरुशलेमें जो तिन्हां अल्ल गैआ जेहडे मिन्जो ते पैहलें चले थे, अपर जितणी तौळी होई सकेया अरब जो चली गैआ कने भिरी औत्थु ते दमिश्क जो वापस आई गैआ ।

18 भिरी तीना सालां बाद मैं कैफा नैं मिलणे तांई यरुशलेमें जो गैआ, कने तिस अल्ल पन्दरां दिन रँहआ । 19 अपर प्रभुये दे भाऊये याकूब जो छड्डी करी मैं होर कुसी चले नैं नी मिलया । 20 जेहिड्यां ग्लां मैं तुहां जो लिखदा, दिखा, इन्हां परमात्म जो सामणे जाणी करी ग्लांदा, कि सैह झूठियां नी । 21 इसदे बाद मैं सीरिया कने किलिकिया दे देसां च आया । 22 अपर यहूदिया दी कलेसियां जेहिड्यां मसीह च थियां, मेरा मुँ कदी नी दिख्या था; 23 अपर ऐही सणा करदियां थियां कि जेहड़ा अहां जो पैहलें सतांदा था, सैह हुण तिसी वसुआसे दा सुसमाचार सणादा ऐ जिसियो पैहलें खत्म करदा था । 24 कने मेरे बारे च परमात्म दी महिमा करदी थी ।

होरनी चेलयां दिया बजाह ते पौलुसे दा आदर

2 चौदा सालां बाद मैं बरनबासे सौगी भिरी यरुशलेमें जो गैआ, कने तीतुसे जो भी सौगी लैई गैआ । 2 मेरा जाणां ईश्वरीय प्रकाशणे दे मताबक होया; जेहड़ा सुसमाचार मैं गैर - यहूदियां च प्रचार करदा ऐ, तिस जो मैं तिन्हां जो दस्सी दित्ता, अपर अकेले च तिन्हां जो जेहडे बडे समझे जांदे थे, तांकि इआं ना होयें कि मेरी इस बरते दी दौड़ धूप बेकार होयें । 3 अपर तीतुसे जो भी जेहड़ा मिन्जो सौगी था कने जेहडे यूनानी हन, खतणां करणे तांई भी मजबूर नी कित्ता । 4 एह तिन्हां झूठे भाऊआ दिया बजाह ते होया जेहडे चोरिया नैं घुसी आयेयो थे, कि तिसा अजादिया दा जेहड़ी यीशु मसीह च अहां मिलियो ऐ, भेद लैई करी अहां जो दास बणांन । 5 इक्क बरत भी तिन्हां दे अधीन होणां अहां नी मनेया, इसतांई कि सुसमाचार दी सचाई तुहां च बणी रँह । 6 भिरी जेहडे माणु कुच्छ समझे जांदे थे (सैह चाहे कदेय

भी थे मिन्जो इसते कुच्छ घट नी; परमात्मां कुस दा पक्षपात नी करदा) तिन्हां ते जेहडे कुच्छ समझे जां दे थे, मिन्जो भी कुच्छ हासल नी होया । 7 अपर इसदे उलट जाहू तिन्हां दिख्या कि जिआं खतणां कितेयो लोकां ताई सुसमाचार दा कम्म पतरसे जो दित्या, तिआं ई जिन्हां दा खतणां नी होया तिन्हां जो सुसमाचार सणाने ताई मिन्जो दित्या । 8 (कजोकि जिन्हीं पतरसे ते खतणां कितेयां च प्रेरिताई दे कम्म बडे प्रभाव सौगी करवाये, तिन्हीं मिन्जो ते भी कने गैर - यहूदियां च प्रभावशाली कम्म करवाये), 9 कने जाहू तिन्हां तिस अनुग्रह जो जेहडा मिन्जो मिलेया था जाणी लैआ, तां याकूब, कने कैफा, कने यहूना जेहडे कलेसिया दे खम्भे समझे जां दे थे, मिन्जो कने बरनबासे जो संगतिया दा खब्बा हत्थ दित्ता कि अहां गैर - यहूदियां अल्ल जान कने सैह खतणां कितेयां अल्ल; 10 सिर्फ एह ग्लाय़ा कि अहां गरीबां दी सुधि लैन, कने इसी कम्म जो करणे दी मैं अप्पु भी कोशश कर दा था ।

पौलुसे दिया बजाह ते पतरसे दा विरोध

11 अपर जाहू कैफा अन्ताकिया च आया, तां मैंई तिसदा सामणां कित्ता, कजोकि सैह दोषी ठेहरेया था । 12 इसताई कि याकूबे दे पाससे ते कुच्छ लोकां दे ओणे ते पैहलें सैह गैर - यहूदियां सौगी खा करदा था, अपर जाहू सैह आये तां खतणां दे कितेयो लोकां दे डरे दे मारे सैह पचां हटी गैआ कने कनारा करणां लग्गा । 13 तिस सौगी बाकि यहूदियां भी कपट कित्ता, ऐत्थू तिकर कि बरनबास भी तिसदे कपटे च पैई गैआ । 14 अपर जाहू मैं दिख्या कि सैह सुसमाचारे दी सचाईया पर सीधी चाल नी चलदे, तां मैं सारेयां दे सामणे कैफा नैं ग्लाय़ा, "जाहू तू यहूदी होई नैं गैर - यहूदियां साइआं चलदा ऐ कने यहूदियां साइआं नी तां तू गैर - यहूदियां जो यहूदियां साइआं चलणे जो कजो ग्लान्दा ऐ?"

वसुआसे दिया बजाह ते धर्मी ठेहरणां

15 अहां तां जन्म ते ई यहूदी हन, कने पापी गैर - यहूदियां ते नी । 16 तमी सैह जाणी करी कि माणु व्यवस्था दे कम्मां ते नी, अपर सिर्फ यीशु मसीह पर वसुआस करणे दिया बजाह ते धर्मी ठेहरदा ऐ, अहां अप्पु भी मसीह यीशु पर वसुआस कित्ता कि अहां व्यवस्था दे कम्मां ते नी, अपर मसीह दे वसुआस करणे ते धर्मी ठेहरे; इसताई कि व्यवस्था दे कम्मां ते कोई माणु धर्मी नी ठेहरगा । 17 अहां जेहडे मसीह च धर्मी ठेहरणा चाहं दे हन, जे अप्पु ई पापी निकळन तां क्या मसीह पापे दा सेवक ऐ? कदीभी नी! 18 कजोकि जेहडा कुच्छ मैं ढाई दित्ता जे तिस जो भिरी बणांदा ऐ, तां अपणे आप्पे जो अपराधी बणांदा ऐ । 19 मैं तां व्यवस्था दिया बजाह ते व्यवस्था ताई मरी गैआ कि परमात्मं ताई जीयें । 20 मैं मसीह सौगी सूलिया पर चढाया गैआ, हुण मैं जिंदा नी रहैआ, अपर मसीह मिन्जो च जिंदा ऐ; कने शरीरे च हुण जेहडा जिंदा ऐ तां सिर्फ तिस वसुआसे ते जिंदा ऐ जेहडा परमात्मं दे पुत्तरे पर ऐ, जिन्हीं मिन्जो नैं प्यार कित्ता कने मिन्जो ताई अपणे आप्पे जो दैई दित्ता । 21 मैं परमात्मं दे अनुग्रह हो बेकार नी ठेहरांदा, कजोकि जे व्यवस्था दिया बजाह ते धर्मिकता होंदी ऐ, तां मसीह दा मरणा बेकार हुंदा ।

व्यवस्था या वसुआस

3 हे बेअक्केयो गलातियों कुणी तुहां जो लालचे च फसाई लैआ ऐ? तुहां दियां तां मना अंखी सामणे यीशु मसीह सूलिया पर दस्सेया । 2 मैं तुहां ते मैं सिर्फ एह जाणना चाहंदा ऐ कि तुहां आत्मां जो, क्या व्यवस्था दे कम्मां ते या वसुआस दे समाचार ते पाया? 3 क्या तुहां ऐदेय बेअक्के हन कि आत्मां दी रीति पर शुरु करी नैं हुण शरीर दी रीतिया पर खत्म करणे । 4 क्या तुहां इतणां दुख इआं ई बेकार झेलया? अपर बिलकुल बेकार नी होया । 5 जेहडा तुहां जो आत्मां दान करदा कने तुहां च सामर्थी दे कम्म करदा ऐ, सैह क्या व्यवस्था दे कम्मां ते या सुसमाचार पर वसुआसे सौगी इआं करदा ऐ?

6 "अब्राहमें तां परमात्मं पर वसुआस कित्ता कने एह तिस ताई धर्मिकता गिणी गैई ।" 7 जे एह जाणी लैआ कि जेहडा वसुआस करणेआळे हन, सैह ई अब्राहमें दी औलाद हन । 8 कने पवित्रशास्त्रें पैहलें ते ई एह जाणी करी कि परमात्मं गैर - यहूदियां जो वसुआसे नैं धर्मी ठेहरंगा, पैहले ते ई अब्राहमें जो एह सुसमाचार सणाई दित्ता कि " तिजो च सारी जातिआं आशीष पांगियां ।"

9 इसताई जेहडे वसुआस करणेआळे हन, सैह वसुआसी अब्राहमें सौगी आशीष पां दे हन ।

10 इसताई जितणे लोक व्यवस्था दे कम्मां पर भरोसा रखदे हन, सैह सराफे दे अधीन हन, कजोकि लिख्या ऐ, जेहडा कोई व्यवस्था दी कताबा च लिख्यां सारियां गल्लां करणे च स्थिर नी रहंदा, सैह श्राफित ऐ ।" 11 अपर एह गल्ल प्रकट ऐ कि व्यवस्था दिया बजाह ते परमात्मं दे ऐत्थू कोई धर्मी नी ठेहरदा, कजोकि धर्मी माणु वसुआसे ते जिंदा रहंदा । 12 अपर व्यवस्था दे वसुआस नैं कोई सम्बध नी; कजोकि जेहडा तिन्हां जो मनगा सैह तिन्हां दिया बजाह ते जिंदा रहंदा ।" 13 मसीह जेहडा अहां तांई श्राफित बणेयां, अहां खरीदी करी व्यवस्था दे श्राफे ते छडाया, कजोकि लिख्या ऐ, जेहडा कोई काठ पर लटकाया जांदा ऐ सैह श्राफित ऐ ।" 14 एह इसताई होया कि अब्राहमें दी आशीष मसीह यीशु च गैर - यहूदियां तिकर पुज्जे, कने अहां वसुआसे दिया बजाह ते तिसा आत्मां जो हासल करन जिसदी प्रतिज्ञा होई ऐ ।

व्यवस्था कने वादा

15 हे भाऊओ, मैं माणु दी रीतिया पर ग्लान्दा ऐ; माणु दा वचन भी जेहडा पक्का होई जांदा ऐ, तां ना कोई तिसियो टालदा ऐ कने ना तिस च कुच्छ बधांदा ऐ । 16 जे प्रतिज्ञायें अब्राहमें जो कने तिसदे वंश जो दित्ती । सैह एह नी ग्लान्दा, "वंशा जो," जिआं मतेआं दे बारे च ग्लाय़ा; अपर जिआं इक्की दे बारे च कि "तेरे वंशा जो" कने सैह मसीह ऐ । 17 अपर मैं एह ग्लान्दा ऐ: जेहडा वादा परमात्मं पैहले ते पक्का कित्ता था, तिसजो व्यवस्था चार सौ तीई सालां दे बाद आई नैं नी टाली सकदी कि प्रतिज्ञा बेकार होन । 18 कजोकि जे मीरास व्यवस्था ते मिलियो ऐ तां भिरी प्रतिज्ञा ते नी, अपर परमात्मं अब्राहमें जो प्रतिज्ञा दिया बजाह ते दैई दित्तियो ऐ ।

19 ताहू भिरी व्यवस्था कजो दित्ती गैई? सैह तां अपराधां दिया बजाह ते बादे च दित्ती गैई कि तिस वंश दे ओणे तिकर रहं, जिस जो प्रतिज्ञा दित्ती गैयी; कने सैह सुअर्गदतां दिया बजाह ते इक्क मध्यस्थ दे हत्थ ठेहराई गैई । 20 मध्यस्थ तां इक्क नी होंदा, अपर परमात्मां इक्को ई ऐ ।

व्यवस्था दा मकसद

21 तां क्या व्यवस्था परमात्मं दी प्रतिज्ञाओं दे विरोध च ऐ? बिलकुल नी! कजोकि जे ऐदेई व्यवस्था दी जां दी जेहडा जिन्दगी दैई सकदी, तां सचमुच धार्मिकता व्यवस्था ते होंदी । 22 अपर पवित्रशास्त्रें सारे पापां दे अधीन करी दित्ता, तांकि सैह प्रतिज्ञा जिसदा आधार यीशु मसीह पर वसुआस करणां ऐ, वसुआस करणे आळेंयां तांई पूरी होई जां । 23 अपर वसुआसे दे ओणे ते पैहले व्यवस्था दी अधीनता च म्हारी रखवाळी होंदी थी, कने तिस वसुआस दे ओणे तिकर जेहडा प्रकट होणे आळा था, अहां तिस दे बंधने च रहै । 24 इसताई व्यवस्था मसीह तिकर पज्जाणे तांई अहां दा मास्टर बणी गैआ कि अहां वसुआसे ते धर्मी ठेहरन । 25 अपर जाहू वसुआस आई रहैआ, तां अहां हुण मास्टरां दे अधीन ना रहै । 26 कजोकि तुहां सारे तिस वसुआसे दिया बजाह ते जेहडा मसीह यीशु पर ऐ, परमात्मं दी औलाद हन । 27 कने तुहां च जितणेयां मसीह च बपतिस्मा लैआ ऐ तिन्हां मसीह जो पैहनी लैआ ऐ । 28 हुण ना कोई यहूदी रहैआ कने ना यूनानी, ना कोई दास ना अजाद ना कोई मरद ना जणास, कजोकि तुहां सारे मसीह यीशु च इक्क हन । 29 कने जे तुहां मसीह दे हन, तां अब्राहम दे वंश कने प्रतिज्ञा मताबक वारिस भी हन ।

4 मैं एह ग्लान्दा ऐ कि वारस जाहू तिकर जागत ऐ, जे सारी चीजां दा मालक ऐ, तमी तिस च कने दास च कोई फर्क नी । 2 अपर पिता दे ठेहराये होये बगते तिकर सम्भालणे आळे कने प्रबंध करणे आळे दे कंट्रोल च रहंदा ऐ । 3 तिआं ई अहां भी जाहू जागत थे, तां संसारे दी आधी शिक्षा दे वंशा च होई नैं दास बणेयां थे । 4 अपर जाहू बगत् पूरा होईया, तां परमात्मं अपणे पुत्तरे जो घल्लया जेहडा जणांसा ते जन्मेयां, कने व्यवस्था दे अधीन पैदा होया, 5 तांकि व्यवस्था दे अधीनां जो कीमत दैई करी छडाई लैआ, कने अहां जो गोद लैणे दा औधा मिलें । 6 कने तुहां जेहडे पुत्तर हन, इसताई परमात्मं अपणे पुत्तरे दी आत्मां जो, जेहडी हे अब्बा, हे पिता ग्लाय़ा करी पुकारदा ऐ, अहां दे मनां च घल्लियो ऐ । 7 इसताई तू हुण दास नी, अपर पुत्तर ऐ; कने जाहू पुत्तर होया, तां परमात्मं दिया बजाह ते वारस भी होया ।

गलातियों दे बारे च पौलुसे दी चिंता

8 पैहलें तां तुहां परमात्मं जो नी जाणी करी तिन्हां दे दास थे जेहड़ा सभावे ते परमात्मं नी, 9 अपर हुण तां तुहां परमात्मं जो पणछैणया लैआ अपर परमात्मं तुहां जो पणछैणया, तां तिन्हां कमजोर कने निकम्मी आधी शिक्षा दी गल्लां दे पास्से कजो फिरदे हन, जिन्हां दे तुहां दुबारा दास होणां चाहंदे हन? 10 तुहां दिनां कने मीहियां जो कने ठीक बगतां जो कने सालां जो मनदे हन । 11 मैं तुहां दे च उरदा, कुत्की इआं ना होयें कि जेहड़ी मेहनत मैं तुहां ताई किती ऐ सैह बेकार होयें ।

12 हे भाऊओ, मैं तुहां नैं विणती करदा ऐ, तुहां मिन्जो साइआं होई जा; कजोकि मैं भी तुहां साइआं होई गैआ ऐ; तुहां मेरा कुच्छ नी बिगाड़ेया । 13 अपर तुहां जाणदे हन कि पैहले पैहल मैं शरीरे दी कमजोरियां दिया बजाह ते तुहां जो सुसमाचार सणाया । 14 कने तुहां मेरी शारीरी हालता जो जेहड़ी तुहां दी परीक्षा दी बजाह थी, तुच्छ मत जाणां; ना तिसते घृणां किती; कने परमात्मं दे दत्त अपर अप्पु मसीह साइआं मिन्जो ग्रहण कित्ता । 15 तां सैह तुहां दी खुशी मनाणां कुत्थू गैआ? मैं तुहां दा गवाह ऐ कि जे होई सकदा तां तुहां अपणियां अंखी भी निकाली करी मिन्जो दैई दिंदे । 16 तां क्या तुहां नैं सच ग्लाणे दिया बजाह ते मैं तुहां दा बैरी बणी गैआ ऐ? 17 सैह तुहां जो साथी बनाणा तां चाहंदा ऐ, अपर खरे उदेश्य ते नी; अपर तुहां जो लग्न करणां चाहंदे हन कि तुहां तिन्हां जो दोस्त बणाई लैआ । 18 अपर एह भी ठीक ऐ कि खरियां गल्लां च हर बग्त साथी बनाणे दी कोशश किती जां, ना सिर्फ तिस बग्त कि जाहू मैं तुहां सौगी रेंहंदा ऐ । 19 हे मेरे जागतों, जाहू तुहां च मसीह दा रुप नी बणी जां, ताहू तिकर मैं तुहां ताई भिरी जच्चे साइआं पीडां झेलदे रेंहणां । 20 इच्छा तां एह होंदी ऐ कि हुण तुहां अल्ल आई नैं होर तरीके नैं ग्लां, कजोकि तुहां दे बारे च मैं उलझना च ऐ ।

सारा कने हाजिरा दा उदारण

21 तुहां जेहड़े व्यवस्था दे अधीन होणां चाहंदे हन, मिन्जो दस्सा, क्या तुहां व्यवस्था दी नी सुणदे? 22 एह लिख्या ऐ कि अब्राहमं दे दो पुत्तर होयें; इक्क दासिया ते कने इक्क अजाद जणांसा ते । 23 अपर जेहड़ा दासिया ते होया, सैह शारीरी रीतिया नैं जम्मेयां; कने जेहड़ा आजाद जणांसा ते होया, सैह प्रतिज्ञा मताबक जम्मेयां । 24 इन्हां गल्लां च उदारहण ऐ : एह जणांसा मना दो वादे हन, इक्क तां सीनै प्हाड़े दी जिसते दास ई पैदा होदे हन; कने सैह हाजिरा ऐ । 25 कने हाजिरा मनेया अरब दा सीनै प्हाड़ ऐ, कने अजे दा यरुशलैम तिसदे बराबर ऐ, कजोकि सैह अपणे जागतां सौगी दासत्व च ऐ । 26 अपर ऊपरे दा यरुशलैम आजाद ऐ, कने सैह म्हारी माँ ऐ । 27 कजोकि लिख्या ऐ,

“हे बाँझ, तू जेहड़ा नी जाणदी खुशी मना; तू जिसजो दर्दा नी होंदियां, गला खोली करी जय जयकार करन; कजोकि त्यागियो औलाद सुहागणां दिया औलादा ते भी जादा ऐ ।”

28 हे भाऊओ, अहां इसहाके साइआं प्रतिज्ञा दी औलाद हन । 29 कने जिआं तिस बग्त शरीरे मताबक पैदा होया आत्मां मताबक पैदा होये जो सतांदा था, तिआं ई हुण भी हुंदा ऐ । 30 अपर पवित्रशास्त्र क्या ग्लांदा ऐ? “दासिया जो कने तिसदे पुत्तरे जो कड्डी दै, कजोकि दासिया दा पुत्तर आजाद जणांसा दे पुत्तरे सौगी हक्कदार नी हुंगा ।” 31 इसताई हे भाऊओ, अहां दासिया दे नी हन अपर आजाद जणांसा दी औलाद हन ।

अजादिया जो सम्भाली करी रखा

5 मसीह नैं आजादिया ताई अहां जो आजाद कित्या ऐ; जे इस च बणी रेंहंदा, कने दासे दे जुंगले च भिरी ते मत जुता ।

2 दिखा, मैं पौलुस तुहां नैं ग्लांदा कि जे खतणां करांगे, तां मसीह ते तुहां जो कुच्छ फायदा नी हुंगा । 3 भिरी भी मैं हर इक्क खतणां कराणे आळे जो दस्सी दिंदा कि तिसियो सारी व्यवस्था मनणा पोंगी । 4 तुहां जेहड़ी व्यवस्था दिया बजाह ते धर्मी ठेहरना चाहंदे हन, मसीह ते लग्न कने अनुग्रह ते पैई गैयो हन । 5 कजोकि आत्मां दिया बजाह ते अहां वसुआस ते, उम्मीद कित्तियो धार्मिकता दी इंतजार करदे हन । 6 मसीह यीशु च ना खतणां कने ना खतणां किन्ते बगैर कुच्छ कम्म दा ऐ, अपर सिर्फ वसुआस, जेहड़ा प्यार दिया बजाह

ते प्रभाव पांदा ऐ । 7 तुहां तां भली भांति दौड़ करदे थे । हुण कुणी तुहां जो रोकी दिंता कि सच जो ना मना । 8 ऐदेई सीख तुहां दे सदणेआळे दे पास्से ते नी । 9 थोड़ा देहया खमीर सारे गुन्नेयो आटे जो खमीर बणाई दिंदा ऐ । 10 मैं प्रभु पर तुहां दे बारे च भरोसा रखदा कि तुहां दा कोई दूआ वचार नी हुंगा; अपर जेहड़ा तुहां जो उराई दिंदा ऐ, सैह कोई कजो नी सज्जा पांगा । 11 अपर हे भाऊओ, जे मैं हुण तक खतणां दा प्रचार करदा ऐ तां कजो हुण तिकर सताया जांदा ऐ? भिरी तां सूलिया दी ठोकर जांदी रैई । 12 खरा हुंदा कि जेहड़े तुहां जो डांवांडोल करदे हन, सैह अपणां अंग ई बड्डी फैंकदे ।

13 हे भाऊओ, तुहां आजाद होणे ताई सदयो गैयो हन; अपर इआं ना होयें कि एह आजादी शरीरी कम्मां ताई मौका बणे, अपर प्यारे नैं इक्की दूये दे दास बणां । 14 कजोकि सारी व्यवस्था इसा इक्की गल्ला च पूरी होई जांदी ऐ, “तू अपणे प्झोसिये नैं अपणे साइआं प्यार रख ।” 15 अपर जे तुहां इक्क दूये जो दंदे नैं कटदे कने फाड़दे हन, तां चुकनै रेंहंदा कि इक्की दूये दा सत्यानाश मत करा ।

पवित्र आत्मां दिया बजाह ते अगुआई

16 अपर मैं ग्लांदा, आत्मां मताबक चला तां शरीरे दी लालसा कुसी भी तरीके नैं पूरी नी करगे । 17 कजोकि शरीर आत्मां दे विरोध च कने आत्मां शरीर दे विरोध च लालसा करदा ऐ, कने एह इक्की दूये दे विरोधी हन, इसताई कि जेहड़ा तुहां करणां चाहंदे हन सैह ना करी पान । 18 कने जे तुहां आत्मां दे मताबक चलदे हन तां व्यवस्था दे अधीन नी रेंहं । 19 शरीरे दे कम्म तां प्रकट हन, अपर व्यभिचार, गंदे कम्म, लुचपण, 20 मूर्तिपूजा, टूणां, बैर, झगडा, ईर्ष्या, गुस्सा, विरोध, फूट, विधर्म, 21 डाह, मतवालापण, लीलाक्रीडा, कने इन्हां साइआं होर भी कम्म हन, इन्हां दे बारे च मैं तुहां नैं पैहलें दस्सी दिंदा जिआं पैहलें दस्सी भी दिंत्या, कि ऐदेय ऐदेय कम्म करणे आळे परमात्मं दे राजे दे वारस नी होंगे । 22 अपर आत्मां दा फळ प्यार, खुशी, शांति, शबर कृपा, भलाई, वसुआस, 23 नम्रता, कने संयम ऐ; ऐदेय ऐदेय कम्मां दे विरोध च कोई व्यवस्था नी । 24 कने जेहड़े मसीह यीशु दे हन, तिन्हां शरीर जो अपणी लालसा कने अभिलाषा सौगी सूलिया पर चढाई दिंत्या ऐ । 25 जे अहां आत्मां दिया बजाह ते जिंदा हन, तां आत्मां मताबक चलन भी । 26 अहां कमांडी होई नैं ना इक्की दूये जो छेड़न, कने ना इक्की दूये सौगी डाह करन ।

इक्की दूये दी मदत करा

6 हे भाऊओ, जे कोई माणु कुसी अपराधे च पकड़ेया भी जां तां तुहां जेहड़े आत्मिक हन, नम्रता सौगी ऐदेयां जो संभाला, कने अपणी भी चौकसी रखा कि तुहां भी परीक्षा च ना पौन । 2 तुहां इक्की दूये दा भार चुका, कने इस तरां मसीह दी व्यवस्था जो पूरिया करा । 3 कजोकि जे कोई कुच्छ ना होणे पर भी अपणे आप्पे जो कुच्छ समझदा ऐ, तां अपणे आप्पे जो धोखा दिंदा ऐ । 4 अपर हर इक्क अपणे ई कम्म जो जांची लें, तां दूये दे बारे च नी अपर अपणे ई बारे च तिसजो कमंड करणे दा मौका हुंगा । 5 कजोकि हर इक्क माणु अपणां ई भार चुकगा ।

6 जेहड़ा वचना दी शिक्षा पांदा ऐ, सैह सब खरियां चीज्जां च सखाणेआळे जो भागी करें । 7 धोखा मत खा; परमात्मं दा मजाक नी डुआया जांदा, कजोकि माणु जेहड़ा कुच्छ बांदा ऐ सैई कटगा । 8 कजोकि जेहड़ा अपणे शरीर ताई बांदा ऐ, सैह शरीरे दिया बजाह ते विनाशे दी कटणी कटगा; कने जेहड़ा आत्मां ताई बांदा ऐ, सैह आत्मां दिया बजाह ते सदा दी जिन्दगिया दी कटणी कटगा । 9 अहां खरे कम्म करणे च हिम्मत नी छडुन, कजोकि जे अहां ढीले ना होन तां ठीक बगते पर कटणी कटगे । 10 इसताई जित्थू तिकर मौका मिलें अहां सबना सौगी भलाई करन, खास करी नैं वसुआसी भाऊआं सौगी ।

आखरी चतौनी कने नमस्कार

11 दिखा, मैं किआं बडे बडे अखरां च तुहां जो अपणे हत्थे नैं लिख्या ऐ । 12 जेहड़े लोक शरीरी दिखावा चाहंदे हन सैह ई तुहां दा खतणां करवाणे ताई दबाव पांदा हन, सिर्फ इसताई कि सैह मसीह दी सूलिया दिया बजाह ते सताये नी जान । 13 कजोकि खतणां कराणे आळे अप्पु तां व्यवस्था पर नी

चलदे, अपर तुहां दा खतणां इसताईं करणां चाहंदे हन कि तुहां दी शरीरी हालता पर कमंड करन । ¹⁴ अपर इआं ना होयें कि मैं होर कुसी गल्ल दा कमंड करे, सिर्फ अहां दे प्रभु यीशु मसीह दे सूलिया दा, जिसदिया बजाह ते संसार मेरिया नजरां च कने में संसार दी नजरां च सूलिया पर चढ़ाया गैआ ऐ । ¹⁵ कजोकि ना खतणां कने बगैर खतणां ते कुच्छ ऐ, अपर नौईं सृष्टि ।

¹⁶ जितणे इस नियमे पर चलगे तिन्हां पर, कने परमात्में दे इस्राएले पर शांति कने दया होदी रेंह ।

¹⁷ गांह जो कोई मिन्जो दुख ना दें, कजोकि मैं यीशु दे दागां जो अपने शरीरे च लैईं फिरदा ऐ ।

¹⁸ हे भाऊओ, अहां दे प्रभु यीशु मसीह दा अनुग्रह तुहां दियां आत्मा सौगी रेंह । आमीन ।

इफिसियों

भूमिका

इफिसियों दे नांये पर पौलुस चले दी पत्रिया च सबते पैहलें दस्सया ऐ परमात्मं दी योजना ते "कि जेहड़ा कुच्छ सुअर्गे च ऐ कने जेहड़ा कुच्छ धरतिया पर ऐ, सैह सब कुच्छ मसीह च किड्डा करन" (1:10) एह परमात्मं दे लोकां च आग्रह भी ऐ कि सैह यीशु मसीह च इक्क होणे दिया बजाह ते माणु जाति एकता ताई, इस म्हान योजना दे मताबक जिन्दगी कट्टा करन ।

इफिसियों दे पैहले हिस्से च लेखक एकता दे बारे च गल्ल करदा ऐ; तिस रस्ते दे बारे दस्सदे होये जिसदिया बजाह ते पितें अपने लोकां जो चुणेयां ऐ, कि किआं यिसेहू मसीह दिया बजाह ते तिन्हां जो अपने पापां ते माफी हासल किती कने छडाये भी हन, कने किआं पवित्र आत्मा दिया बजाह ते परमात्मं दी म्हान प्रतिज्ञा जो पूरा होणे दा हाँसला दित्ता ऐ । दूये हिस्से च सैह पाठकां नें एदेई जिन्दगी जीणे दा आग्रह करदा ऐ कि मसीह च तिन्हां दी एकता तिन्हां ताई सामूहिक जिन्दगी दी सच्चाई बणी जां ।

मसीह नें जुडे परमात्मं दे लोकां इक्क होणे जो दस्सणे ताई कई उपमाओं इस्तेमाल कित्ता ऐ : कलेसिया इक्क देह साइयां ऐ, जिसा दा मुंड मसीह ऐ; या इक्क घरे साइयां ऐ जिसदे कुणे दे सिरे दा पत्थर मसीह ऐ; या इक्की लाडिया साइयां ऐ जिसा दा लाड़ा मसीह ऐ । मसीह च परमात्मं दे अनुग्रह दी धारणां ते प्रभावित लेखके दिया बजाह ते एह पत्री वचनां दे म्हान उचाईयां जो छूई लेंदी ऐ । हर इक्की गल्ला जो इस च मसीह दे प्यार, बलिदान, माफी, अनुग्रह कने सिद्धता दे प्रकाश च दिख्या ऐ ।

रूप-रेखा

भूमिका 1: 1, 2

मसीह कने कलेसिया 1: 3 --- 3: 21

मसीह च नौई जिन्दगी 4: 1 --- 6: 20

उपसंहार 6: 21- 24

1 पौलुस दे पास्से ते जेहड़ा परमात्मं दी इच्छा ते यीशु मसीह दा इक्क चेला ऐ, इफिसुस च रहणे आळे पवित्र कने यीशु च वसुआस करणे आळे लोकां दे नां :

² अहां दे पिता परमात्मं कने प्रभु यीशु मसीह दी तरफा ते तुहां जो अनुग्रह कने शांति मिलदी रहै ।

मसीह च आत्मिक आशीषें

³ अहां दे प्रभु यीशु मसीह दे परमात्मं कने पिता दा धन्यावाद होयें कि तिन्हीं अहां जो मसीह दे रूपे च सुअर्गीय जगाहां च हर तरां दे आत्मिक आशीर्वाद दित्ते हन । ⁴ जिआं तिन्हीं अहां जो संसारे दी रचना करणे ते पैहले ई तिस च चुणी लैआ । अहां तिसदे प्यारे च पवित्र कने वेकसूर होन ।

⁵ इसताई यीशु मसीह दिया बजाह ते अहां जो पुत्तरां दे रूपे च ग्रहण करणे ताई नियुक्त कित्ता ऐ, ऐही तिसदी इच्छा थी, ऐही जरूरत भी थी । ⁶ कि तिसदे तिस अनुग्रह दी महिमा दी स्तुति होयें, जिसियो तिन्हीं अहां जो तिस प्यारे च मुफ्ते च दित्ता । ⁷ तिसदिया बलिदानी मौता दिया बजाह ते अहां जो पापां ते छुटकारा, कने तिसदे अनुग्रह दिया बजाह ते अहां जो अहां दे गुनाहां दी माफी मिलदी ऐ, ⁸ जिसियो तिन्हीं सारे ज्ञान कने समझा समेत अहां पर मता सारा कित्ता । ⁹ कजोकि तिन्हीं अपणियां इच्छा दा भेद तिस खरे बगते मताबक अहां जो दस्सेया, जिसियो तिन्हीं अपने आप्पे च ठाणी लैआ था ।

¹⁰ कि बगतां दे पूरे होणे दा ऐदेया प्रबंध होयें कि जेहड़ा कुच्छ सुअर्गे च ऐ कने जेहड़ा कुच्छ धरतिया पर ऐ, सैह सब किच्छ मसीह च किड्डा करन ।

¹¹ सारियां गल्लां योजना कने परमात्मं दे फैसले मताबक किती जांदी ऐ । कने परमात्मं अपणियां खास जरूरता दिया बजाह ते अहां जो पैहले ते ई चुणी लैआ कि मसीह च मीरास बणने ताई चुणेया ऐ । ¹² कि अहां, जिन्हां नें पैहले ते मसीह पर आशा रखियो थी, तिसदी महिमा दी स्तुति दी बजाह होन ।

¹³ कने तिस च तुहां पर भी, जाहू तुहां सच दा वचन सुणेया जेहड़ा तुहां दे उद्धार दा सुसमाचार ऐ कने जिस पर तुहां वसुआस कित्ता, प्रतिज्ञा करदे होये पवित्र आत्मां दी मोहर लगी । ¹⁴ सैह तिसदे मूले लैयो होयां दे छुटकारेयां ताई म्हारी मीरास दा बयाना ऐ, कि तिसदिया महिमा दी स्तुति होयें ।

पौलुसे दी प्रार्थना

¹⁵ इसा बजाह ते, मैं भी तिस वसुआसे दा सुसमाचार सुणी नें जेहड़ा तुहां लोकां च प्रभु यीशु पर ऐ कने सारे पवित्र लोकां पर प्रकट ऐ, ¹⁶ तुहां ताई धन्यावाद करणां नी छडदा, कने अपणियां प्रार्थना च तुहां जो याद करा करदा ऐ । ¹⁷ कि अहां दे प्रभु यीशु मसीह दा परमात्मां जेहड़ा महिमा दा पिता ऐ, तुहां जो अपनी पणछेणां च ज्ञान कने लौ दी आत्मां दें, ¹⁸ कने तुहां दे मने दी अंखा जोतीर्मय होन कि तुहां जाणी लैआ कि तिसदी सदणे नें कदेयी आशा होंदी ऐ, कने पवित्र लोकां च तिसदिया मीरासा दी महिमा दा धन कदेया ऐ, ¹⁹ कने तिसदी सामर्थ अहां च जेहड़े वसुआस करदे हन, कितणी म्हान ऐ तिसदी ताकता दा प्रभावे दे तिस कम्मे मताबक । ²⁰ जेहड़ा तिन्हीं मसीह च कित्ता कि तिस जो मरेयां ते जिंदा करी नें सुअर्गीय जगांहा च अपने सज्जे पास्सं ²¹ सब तरां दी प्रधानता, कने हक्क, कने सामर्थ, कने प्रभुता दे, कने हर इक्की नांये ऊपर, जेहड़ा ना सिर्फ इस लोके च, अपर ओणेआळे लोके च भी लैई लैआ जांगा, ²² कने सब कुच्छ तिसदेयां पैरां थलै करी दित्ता; कने तिसियो सारियां चीज्जां पर शिरोमणि ठेहराई नें कलेसिया जो दैई दित्ता, ²³ एह तिसदा शरीर ऐ, कने तिसदी परिपूर्णता ऐ जेहड़ा सबना च सब कुच्छ पूरा करदा ऐ ।

मौता ते जिन्दगिया दे पास्सं

2 तिन्हीं तुहां जो भी जिंदा कित्ता, जेहड़ा अपने अपराधां कने पापां दिया बजाह ते मरेयो थे । ² जिन्हां च तुहां पैहले इस संसारे दी रीतिया पर, कने अम्बरे दे हक्के दे हाकम मतलब तिसा आत्मां मताबक चलदे थे, जेहड़े हुण भी हुक्म नी मनणेआळेयां च कम्म करदा ऐ । ³ इन्हां च अहां भी सारे दे सारे पैहले अपने शरीरे दी इच्छां च दिन बितांदे थे, कने शरीर कने मने दी इच्छां पूरियां करदे थे, कने होरनी लोकां साइआं सभाव ते ई गुस्से दी औलाद थे । ⁴ अपर परमात्मां जेहड़ा दया दा धनी ऐ, अपने तिस बडे प्यारे दिया बजाह ते जिसते तिन्हीं अहां नें प्यार कित्ता, ⁵ जाहू अहां अपराधां दिया बजाह ते मरेयो थे तां अहां जो मसीह सौगी जिंदा कित्ता (अनुग्रह ते ई तुहां दा उद्धार होया ऐ), ⁶ कने मसीह यीशु च तिस सौगी उठाया, कने

सुअर्गीय जगांहा च तिस सौगी बैठाया 7 कि सैह अपणी तिसा कृपा नैं जेहड़ी मसीह यीशु च अहां पर ऐ, ओणे आळे बग्ते च अपणे अनुग्रह दा असीम धन दस्सें । 8 कजोकि वसुआस दे दिया बजाह ते अनुग्रह ते ई तुहां दा उद्धार होया ऐ; कने एह तुहां दे पाससे ते नी अपर परमात्में दा दान ऐ, 9 कने ना कर्मा दिया बजाह ते देहया नी होयें कि कोई कमंड करे । 10 कजोकि अहां तिसदे बणांयो हन, कने मसीह यीशु च तिन्हां खरे कम्मां ताई सृजे गै हन जिन्हां जो परमात्में पैहले ते अहां दे करणे ताई त्यार कित्या ।

मसीह च इक्क

11 इसा बजाह ते याद करा कि तुहां शरीरक रीतिया नैं होर जाति हन (कने जेहड़े लोक शरीर च हत्थे दे किते होये खतणे ते खतणां आळे केहलांदे हन, सैह तुहां जो खतणांरहित ग्लांदे हन) 12 तुहां लोक तिस बग्त मसीह ते लग्ग, कने इस्राएल दी प्रजा दे पद ते लग्ग कितेयो, कने प्रतिज्ञा दे वादेयां च भागी नी थे । कने बिना उम्मीदा कने संसारे च परमात्में बगैर थे । 13 अपर हुण मसीह यीशु च तुहां जेहड़े पैहले दूर थे, मसीह दे खून दिया बजाह ते नैडे होईयो हन । 14 कजोकि सैई अहां दा मेल ऐ जिन्हीं दुनियां इक्क करी लैआ कने लग्ग करणेआळी कंदा जो जेहड़ी बिच थी ढाई दिता, 15 कने अपणे शरीरे च बैर मतलब सैह व्यवस्था जिसा दा हुक्म विधियां दी रीति पर था मिटाई दिता कि दूनी ते अपणे च इक्क नौआं माणु पैदा करी नैं मेल कराई दे, 16 कने सूलिया पर बैरे जो खत्म करी इसदिया बजाह ते दूनी जो इक्क देह बणाई नैं परमात्में नैं मिलान । 17 कने तिन्हीं आई नैं तुहां जो जेहड़े दूर थे कने तिन्हां जो जेहड़े नैडे थे दूनी जो मेल मिलाप दा सुसमाचार सणाया । 18 कजोकि तिसदिया बजाह ते अहां दूनी दी इक्क आत्मां च पिता अल्ल पहुंच होंदी ऐ । 19 इसताई तुहां हुण परदेसी कने मुसाफिर नी रैह, अपर पवित्र लोकां दे संगी स्वदेशी कने परमात्में दे परवारे दे होईये । 20 कने चेलयां कने भविष्यवक्तां दी नीआं पर, जिसदे कुणे दा पत्थर मसीह यीशु अप्पु ई हन, बणांयो हन । 21 जिस च सारी रचना इक्क साथ मिली नैं प्रभु च इक्क पवित्र मंदर बणदी जांदी ऐ, 22 जिस च तुहां भी आत्मां दिया बजाह ते परमात्में दी रैहणे दी जगाह होणे ताई इक्क साथ बणांये जांदे हन ।

गैर - यहूदियां च पौलुसे दी सेवा

3 इसा बजाह ते मैं पौलुस जेहड़े तुहां गैर - यहूदियां ताई मसीह यीशु दा कैदी ऐ --- 2 जे तुहां परमात्में दे तिस अनुग्रह दे प्रबन्ध दी खबर सुणियो ऐ, जेहड़ा तुहां ताई मिन्जो दिता गैआ, 3 एह कि सैह भेद मिन्जो पर प्रकाशण दिया बजाह ते प्रकट होया, जिआं मैं पैहले ई विस्तार च लिखी चुकेया, 4 जिसते तुहां पढी नैं जाणी सकदे हन कि मैं मसीह दा सैह भेद कताह तिकर समझांदा । 5 जेहड़े होरनी बग्तां च माणुआं दी औलाद जो एदेया नी दस्सेया था, जिआं कि आत्मां दिया बजाह ते हुण तिसदे पवित्र चेलयां कने भविष्यवक्तां पर प्रकट कित्ता गैआ ऐ । 6 एह कि मसीह यीशु च सुसमाचारे दिया बजाह ते गैर - यहूदियां दे लोक मीरास च साझी कने इक्को ई देह दे कने प्रतिज्ञा दे भागी हन ।

7 मैं परमात्में दे अनुग्रह दे तिस दाने मताबक, जेहड़ा तिसदिया सामर्थी दे प्रभावे मताबक मिन्जो दित्या ऐ, तिस सुसमाचारे दा सेवक बणेया । 8 मिन्जो पर जेहड़ा सारेयां लोकां च लोके ते भी लोक्का ऐ एह अनुग्रह होया कि मैं गैर - यहूदियां जो मसीह यीशु दा सैह सुसमाचार सणां जिसियो कि कोई नापी नी सकदा, 9 कने सारेयां पर एह गल्ल प्रकाशित करे कि तिस भेद दा प्रबन्ध क्या ऐ, जेहड़ा सारेयां दा सृजनहार परमात्में च शुरू ते गुप्त था । 10 तांकि हुण कलेसिया दिया बजाह ते, परमात्में दा लग्ग तरांहा दा ज्ञान तिन्हां प्रधानां कने अधिकारियां पर जेहड़ा सुअर्गीय जगांहा च ऐ, प्रकट कित्ता जां । 11 तिसा सनातन मनसा मताबक जेहड़ी तिन्हीं अहां दे प्रभु मसीह यीशु च कितियो थी । 12 जिस च अहां जो तिस पर वसुआस करणे दी हिम्मत कने भरोसे सौगी परमात्में दे नैडे ओणे दा हक्क ऐ । 13 इसताई मैं विणती करदा कि जेहड़ा सताव तुहां ताई मिन्जो हो दा ऐ, तिन्हां दिया बजाह ते हिम्मत मत छड्ढा, कजोकि तिन्हां च तुहां दी महिमा ऐ ।

मसीह दा प्यार

14 मैं इसा बजाह ते तिस पिता दे सामणे गोडे टेकदा, 15 जिसते सुअर्गे पर कने धरतिया पर, हर इक्क परवारे दा नां रखेया जांदा ऐ, 16 कि सैह अपणी महिमा दे धन दौलता मताबक तुहां जो एह दान दें कि तुहां तिसदिया आत्मां ते अपणे अंदरे दे माणुये च सामर्थ पाई नैं ताकतवर होई जा; 17 कने वसुआसे दिया बजाह ते मसीह तुहां दे मने च बसें कि तुहां प्यारे च जड़ पकड़ी नैं कने नीई पाई नैं, 18 सारे पवित्र लोकां सौगी भली भांति समझणे दी ताकत पा कि तिसदी चौड़ाई कने लम्बाई, कने उंचाई, कने गेहराई कितणी ऐ, 19 कने मसीह दे तिस प्यारे जो जाणी सका जेहड़ा ज्ञान ते परे ऐ कि तुहां परमात्मे दी सारी भरपूरी तिकर परिपूर्ण होई जा ।

20 हुण जेहड़ा एदेया सामर्थी ऐ कि म्हारी विणती कने समझा ते कुत्थी जादा कम्म करी सकदा ऐ, तिसा सामर्थी मताबक जेहड़ा अहां च कम्म करदा ऐ, 21 कलेसिया च कने मसीह यीशु च तिसदी महिमा पीढी ते पीढी तक जुगा जुग होंदी रैह । आमीन ।

मसीह दी देहा च एकता

4 इसताई मैं जेहड़ा प्रभु च कैदी ऐ तुहां नैं विणती करदा कि जिस पुकारा नैं तुहां सदेयो थे, तिस लायक चाल चला, 2 सारी दीनता कने नम्रता समेत, कने सबर करी नैं प्यार नैं इक्की दूये दी झेली लैआ; 3 कने मेल दे बंधने च आत्मां दी एकता रखणे दी कोशश करा । 4 इक्को ई देह ऐ, कने इक्को ई आत्मां; जिआं तुहां जो जेहड़े सदेयो थे अपणे सद्दे जाणे ते इक्को ई आशा ऐ । 5 इक्को ई प्रभु ऐ, इक्को ई वसुआस, इक्को ई बपतिस्मा, 6 कने सबना दा इक्क परमात्मां कने पिता ऐ, जेहड़ा सबना दे ऊपर कने सबना दे बिच च कने सबना च ऐ । 7 अपर अहां च हर इक्की जो मसीह दे दान दे परणाम मताबक अनुग्रह मिलेया ऐ । 8 इसताई सैह ग्लांदा ऐ :

“सैह उचिया जगाह पर चढेया कने कैदियां जो बन्नी लैईया, कने माणुआं जो दान दिन्ते ।”

9 (तिसदे चढणे ते, होर क्या पाया जांदा ऐ सिर्फ एह कि सैह धरती दी थलकी जगांहा च लुत्थेया भी था । 10 कने जेहड़ा लौई गैआ एह सैई ऐ जेहड़ा सारे अम्बरे ते ऊपर चढी भी गैआ कि सब कुछ परिपूर्ण करे) 11 तिन्हीं कुच्छना जो चले नियुक्त करी नैं, कने कुच्छना जो भविष्यवक्ता नियुक्त करी नैं, कने कुच्छना जो सुसमाचार सणाणे आळे नियुक्त करी नैं, कने कुच्छना जो रखवाळे कने शिक्षक नियुक्त करी नैं देई दिता, 12 जिसते पवित्र लोक सिद्ध होई जान कने सेवा दा कम्म कित्ता जां कने मसीह दी देह तरक्की पां, 13 जाहू तिकर कि अहां सारेयां दे सारे वसुआस कने परमात्में दे पुत्रे दी पणछेणां च इक्क नी होई जान कने इक्क सिद्ध माणु नी बणी जां कने मसीह दे पूरे डील डौल तिकर नी बधी जान । 14 कि अहां गांहा जो जागत नी रैह जेहड़े माणुआं दी उग विद्या कने चलाकिया नैं तिन्हां दे भ्रम दी योजनां दे कनेशिक्षा दे हर इक्क झोंके नैं उडदे जांदे कने रुआं परांहा घुमाये जांदे हन । 15 अपर प्यारे च सचाईया नैं चलदे होये सारियां गल्लां च तिस च जेहड़ा मुंड ऐ, मतलब मसीह च बधदे जान, 16 जिसदी सारी देह, हर इक्क जोड़ दी मददा ते इक्क सौगी मिली नैं कने इक्की दूये सौगी गठी नैं, तिस प्रभावे मताबक जेहड़े हर इक्क अंगे दे खरे खरे कम्म करणे दिया बजाह ते तिस च हुंदा ऐ, अपणे आप्पे जो बधांती ऐ कि सैह प्यार च तरक्की करदी जां ।

मसीह च नौई जिन्दगी

17 इसताई मैं एह ग्लांदा कने प्रभु च आग्रह करदा कि जिआं गैर - यहूदियां दे लोक अपणे मने दी अनर्थ रीतिया पर चलदे हन, तुहां अज्जे ते लैई करी भिरी इआं मत करा । 18 कजोकि तिन्हां दी अक्क भरिस्त होई गैइयो ऐ, कने तिसा अज्ञानता दिया बजाह ते जेहड़े तिन्हां च हन कने तिन्हां दे मने दी कठोरता दिया बजाह ते सैह परमात्में दी जिन्दगिया ते लग्ग कितेयो हन; 19 कने सैह सुन होई नैं लुचपण च लग्गी गैयो हन कि सब तरांहा दे गंदे कम्म लालसा नैं करा करन । 20 अपर तुहां मसीह दी देहई शिक्षा नी पाई । 21 अपर तुहां सचमुच तिसदी सुणी कने जिआं यीशु सत्य ऐ, तिस सखाये भी गै । 22 कि तुहां पचांहा दे चाल चलन दे पराणे माणुये दे रूपे जो जेहड़ी भकाणे आळियां इच्छां मताबक भ्रस्ट हुंदा जांदा ऐ, लौआई देआ । 23 कने अपणे

मने दे आत्मिक सभावे च नौये बणदे जा, 24 कने नौये माणुये दे रुपे जो पैहनी लैआ जेहडी परमात्मं दे अनुरूप सच दी धार्मिकता कने पवित्रता च बणाया गैआ ऐ ।

25 इसा बजाह ते झूठ ग्लाणां छड्डी हर इक्क अपणे प्देसिये नैं सच ग्ला, कजोकि अहां अप्पु च इक्की दूये दे अंग हन । 26 गुस्सा तां करा, अपर पाप मत करा; सूरज ढलणे तिकर तुहां दा गुस्सा नी रँहू । 27 कने ना सैताने जो मौका दैआ । 28 चोरी करणे आळा भिरी चोरी ना करे, अपर खरे कम्म करणे च अपणे हत्थां नैं मेहणत करे, इसताई कि जिसियो जरूरत होये तिसियो दैणे जो तिस अल्ल कुच्छ होये । 29 कोई गंदी गल्ल तुहां दे मुँमे ते ना निकले, अपर जरूरता मताबक सैई निकले जेहडी तरक्की ताई उतम होये, तांकि तिसते सुणने आळेयां पर अनुग्रह होये । 30 परमात्मं दी पवित्र आत्मां जो शोकिंत मत करा, जिसते तुहां पर छुटकारे दे दिन ताई मोहर दिती गैई ऐ । 31 सब तराह दी कड़वाहट, कने प्रकोप कने गुस्सा, कने कलह, कने निंदा, सारे बैरभाव समेत तुहां ते दूर कित्ता जा । 32 इक्की दूये पर दया, कने दयावान होन, कने जिआ परमात्मं मसीह च तुहां दे अपराध माफ कित्ते, तिआं ई तुहां भी इक्की दूये दे अपराध माफ करा ।

जोती दी औलाद बणां

5 इसताई प्यारे जागतां साइआं परमात्मं दे पचांह चलणे आळे बणां, 2 कने प्यारे च चला जिआं मसीह नैं भी तुहां नैं प्यार कित्ता, कने अहां ताई अपणे आप्पे जो सुखदायक सुगंधा ताई परमात्मं दे गांह भेंट करी नैं बलिदान करी दित्ता । 3 जिआं पवित्र लोकां जोगे हन, तिआं तुहां च व्यभिचार कने कुस भी तरांह दे बुरे कम्म या लालचे दी चर्चा ना होये; 4 कने ना निर्लज्जता, ना मूढता दी गल्लबात कित्ती, ना माजाके दी; कजोकि एह गल्लां शोभा नी दिदियां, अपर धन्यावाद ते ई सुणेयां जां । 5 कजोकि तुहां एह जाणदे हन कि कुस व्यभिचारी या, बुरे जण, या लालची माणु दी जेहडे मूर्ति पूजा दे बराबर हन, मसीह कने परमात्मं दे राजे च मीरास नी । 6 कोई तुहां जो बेकार दी गल्लां ते धोखा ना दें, कजोकि इन्हां कम्मां दिया बजाह ते परमात्मं दा गुस्सा हुक्म नी मनणे आळेयां पर भडकदा ऐ । 7 इसताई तुहां तिन्हां दे सेहभागी ना होन । 8 कजोकि तुहां तां पैहले नैहरा थे अपर हुण प्रभु च जोती हन, जोतिया दी औलादा साइआं चला 9 (कजोकि जोतिया दा फळ सब तरांह दी भलाई, कने धार्मिकता, कने सच ऐ) 10 कने एह परखा कि प्रभु जो क्या भांदा ऐ । 11 नैहरे दे बुरे कम्मां च सेहभागी मत होआ, अपर तिन्हां पर उलाहना दैआ । 12 कजोकि तिन्हां दे गुप्त कम्मां दी चर्चा भी सर्मा दी गल्ल ऐ । 13 अपर जितणे कम्मां पर उलाहना दिती जांदी ऐ सैह सब जोतिया नैं प्रकट होंदे हन, कजोकि जेहडा सब कुच्छ जो प्रकट करदा ऐ सैह जोती ऐ । 14 इसा बजाह ते सैह ग्लांदा ऐ

“हे सोणे आळे, जाग कने मुडदेयां ते जिंदा हो; तां मसीह दी जोती तिजो पर चमकगी ।”

15 इसताई ध्याने नैं दिखा, कि कदेई चाल चलदे हन वेअक्केयां साइआं नी अपर अक्कमंदा साइआं चला । 16 मौके जो कीमती समझा, कजोकि दिन बुरे हन । 17 इसा बजाह ते बेअकले ना होन पर ध्याने नैं समझा कि प्रभु दी इच्छा क्या ऐ । 18 अंगूरा दे रसे नैं मतवाळे मत बणां, कजोकि इसते लुचपण हुंदा ऐ, अपर आत्मां ते परिपूर्ण होंदे जा, 19 कने अप्पु च भजन कने स्तुतिगीत कने आत्मिक गीत गा करा, कने अपणे अपणे मने च प्रभु दे सामणे गांदे कने कीर्तन करदे रँहूआ । 20 कने सदा सारियां गल्लां ताई अहां दे प्रभु यीशु मसीह दे नांये ते परमात्मं पिता दा धन्यावाद करदे रँहूआ । 21 मसीह दे डरे ते इक्की दूये दे अधीन रँहूआ ।

लाडा कने लाडी

22 हे लाडियो, अपणे अपणे लाडे दे इआं अधीन रँहूआ जिआं प्रभु दे । 23 कजोकि लाडा लाडिया दा मुँड ऐ जिआं कि मसीह कलेसिया दा मुँड ऐ कने अप्पु ई देह दा उद्धारकर्ता ऐ । 24 अपर जिआं कलेसिया मसीह दे अधीन हन, तिआं ई लाडियां भी हर गल्ला च अपणे अपणे लाडे दे अधीन रँहू ।

25 हे लाडेयो, अपणियां अपणियां लाडिया नैं प्यार रखा जिआं मसीह भी कलेसिया नैं प्यार करी नैं अपणे आप्पे जो तिन्हां ताई दैई दित्ता । 26 कि

तिस वचने दे दिया बजाह ते पाणिये नैं साफ करी नैं पवित्र बणांन । 27 कने तिसियो इक्क एदेयी तेजस्वी कलेसिया बणाई नैं अपणे अल्ल खडी करन, जिसा च ना कलंक, ना झुरी, ना कोई होर देहई चीज होये अपर पवित्र कने बेकसूर होन । 28 इसी तराह ठीक ऐ कि लाडे अपणियां अपणियां लाडिया ने अपणी देही साइआं प्यार रखन । जेहडा अपणियां लाडिया नैं प्यार रखदा ऐ, सैह अपणे आप्पे नैं प्यार रखदा ऐ । 29 कजोकि कुणी कदी अपणे शरीरे नैं बैर नी रखेया अपर तिसदी देखभाल करदा ऐ, जिआं मसीह भी कलेसिया दे सौगी करदा ऐ । 30 इसताई कि अहां तिसदिया देही दे अंग हन ।

31 “इसा बजाह ते माणु अपणे माऊ बुडे जो छड्डी नैं अपणियां लाडिया सौगी रँहूआ कने सैह दौयो इक्क तन होंगे ।”

32 एह भेद तां बडा ऐ, अपर मैं ऐत्थू मसीह कने कलेसिया दे बारे च ग्लांदा । 33 अपर तुहां च हर इक्क अपणियां लाडिया नैं अपणे साइआं प्यार रखन, कने लाडी भी अपणे लाडे दा डर मने ।

माँ - पिता कने बच्चे

6 हे जागतो, प्रभु च अपणे माता पिता दे हुक्म मनणे आळे बणां, कजोकि एह ठीक ऐ । 2 अपणियां माऊ दा कने बुडे दा आदर कर (एह पैहला हुक्म ऐ जिस सौगी प्रतिज्ञा भी ऐ) 3 कि तेरा भला होये, कने तू धरतिया पर बडे भरी दिन जिंदा रँहू । 4 हे बच्चेआळेयो, अपणे बच्चेयां जो रिस मत दिला, अपर प्रभु दी शिक्षा कने चेतावणी दिंदे होये तिन्हां दी देखभाल करा ।

मालक कने दास

5 हे दासो, जेहडे लोक इस संसारे च तुहां दे मालक हन, अपणे मने दी सिधाईया ते डरदे कने कमदे होये, जिआं मसीह दी तिआं ई तिन्हां दा भी हुक्म मना । 6 माणुआं जो खुश करणेआळेयां साइआं दस्सणे ताई सेवा मत करा, अपर मसीह दे दासां साइआं मने ते परमात्मं दी इच्छा पर चला, 7 कने तिसा सेवा जो माणुआं दी नी अपर प्रभु दी जाणी नैं सच्चे मने नैं करा । 8 कजोकि तुहां जाणदे हन कि जेहडा कोई जिआं खरा कम्म करगा, चां दास होये चां अजाद, प्रभु ते तिआं ई पांगा । 9 हे मालको तुहां भी धमकियां दैणां छड्डी नैं तिन्हां सौगी तिआं ई वताव करा; कजोकि तुहां जाणदे हन कि तिन्हां दा कने तुहां दा दूनी दा मालक सुअर्गे च ऐ, कने सैह कुसी दा पक्ष नी लेंदे ।

आत्मिक लड़ाईया दे हत्थयार

10 इसताई प्रभु च कने तिसदिया ताकता दे प्रभावे च ताकतवर बणां । 11 परमात्मं दे सारे हत्थयार बन्नी लैआ कि तुहां सैताने दी चालां दे सामने खडे रँई सकन । 12 कजोकि अहां दा एह मल्लयुद्ध खून कने मांसे नैं नी अपर प्रधानां नैं, कने अधिकारियां नैं, कने इस संसारे दे नैहरे दे हाकमां नैं कने तिसा दुष्टता दी आत्मिक सेना ते ऐ जेहडी अम्बरे च ऐ । 13 इसताई परमात्मं दे सारे हत्थयार बन्नी लैआ कि तुहां बुरे दिना च सामणां करी सका, कने सब कुच्छ पूरा करी नैं पक्के रँई सकन । 14 इसताई सचाईया नैं अपणी कमर कसी नैं, कने धार्मिकता दी झिलम पैहणी नैं, 15 कने पैरां च मेल दे सुसमाचार दी तयारिया दे जूते पैहनी नैं; 16 कने इन्हां सारेयां सौगी वसुआसे दी ढाल लैई नैं पक्के रँहूआ जिसते तुहां तिस दुष्टे दे सारे जळदे होये तीरां जो बुझाई सकन । 17 कने उद्धार दे टोप, कने आत्मां दी तलवार, जेहडा परमात्मं दा वचन ऐ, लैई लैआ । 18 हर बग्त कने हर तरांह नैं आत्मां च प्रार्थना, कने विणती करदे रँहूआ, कने इसताई जागदे रँहूआ कि सारे पवित्र लोकां ताई लगातार विणती करा करा, 19 कने मिन्जो ताई भी मिन्जो ग्लाणे दे बग्त एदेया वचन दित्ता जां कि मैं हिम्मत सौगी सुसमाचारे दा भेद बताई सकं, 20 जिसदे ताई मैं संगला नैं जकडेया राजदूत ऐ; कने एह भी कि मैं तिसदे बारे च जिआं मिन्जो चाइदा हिम्मत नैं ग्लान ।

आखरी नमस्कार

21 तुखिकुस जेहडा प्यारा भाऊ कने प्रभु च वसुआसे जोगा सेवक ऐ, तुहां जो सारिया गल्लां दस्सगा कि तुहां भी मेरिया हालता जाणन कि मैं कदेया रँहूआ । 22 तिसियो मैं तुहां अल्ल इसताई घल्लया ऐ कि तुहां म्हारी हालता जो जाणन, कने सैह तुहां दे मना जो शांति दे ।

²³ परमात्मां पिता कने प्रभु यीशु मसीह दी तरफा ते भाऊआं जो शांति कने वसुआसे सौगी प्यार मिलें । ²⁴ जेहड़े अहां दे प्रभु यीशु मसीह नैं सच्चा प्यार रखदे हन, तिन्हें सबना पर अनुग्रह हुंदा रैंह ।

फिलिप्पियों

भूमिका

फिलिप्पियों दे नांये पर पौलुस चले दी पत्री यूरोप दी धरती पर स्थापित पैहली कलेसिया जो लिखियो थी, जिस दी स्थापना पौलुसं कित्तियो थी । सैह रोमी प्रान्त मकिदूनिया च स्थित थी । एह पत्री तिस बग्त लिखियो थी जाहू चले जेला थे, कने जाहू सैह होरनी मसीही कम्म करणे आळे सदस्यां दिया बजाह ते अपणे विरोध दिया बजाह ते परेशान कने फिलिप्पी दी कलेसिया च व्याप्त गलत शिक्षां ते दुखी था । भिरी भी एह पत्री इक्क खुशी कने निश्चय जो व्यक्त करदी ऐ जिसियो सिर्फ यीशु मसीह च पौलुस दे पक्के वसुआसे दिया बजाह ते ई समझाया जाई सकदा ऐ ।

इसा पत्रिया दी लिखणे दी बजाह थी फिलिप्पियों दे मसीहियां जो धन्यावाद देंगां, तिसा भंटा तांई जेहड़ी तिन्हां जो पौलुसे दिया जरूरता दे बग्त तिसियो घल्लियो थी । सैह इस मौके दा फायदा लैई करी तिन्हां जो होंसला देंगे तांई करदा ऐ, तांकि सैह तिसदी कने सौगी सौगी अप्पु अपणी सारी मुसीबतां दे बावजूद हिम्मत कने भरोसा रखें । सैह तिन्हां नैं निवेदन करदा ऐ कि सैह सुआर्थी इच्छां जो कने कमांड दे बदले यीशु मसीह नर्म सुवाभ जो अपनाये । सैह तिन्हां जो याद दिलांदा ऐ कि मसीह च तिन्हां दी जिन्दगी परमात्मं दे अनुग्रह दा इक्क दान ऐ जेहड़ा तिन्हां वसुआसे दिया बजाह ते पाया ऐ, ना कि यहूदी व्यवस्था दी विधियां दा पालन करणे दिया बजाह ते । सैह तिसा खुशिया कने शान्तिया दे आरे लिखदा ऐ जिसियो परमात्मं तिन्हां लोकां जो दिंदा ऐ जेहड़े मसीह सौगी एकता दी जिन्दगी जिं दे हन । मसीही वसुआस कने जिन्दगी च खुशी, निश्चय, एकता कने दृढ़ता पर जोर दिंदा देंगां इसा पत्रिया दी खास गल्ल ऐ । एह पत्री फिलिप्पियों दी कलेसिया दे प्रति पौलुसे दे गहरे प्यार जो प्रगत करदी ऐ ।

रूप-रेखा

भूमिका 1: 1- 11

पौलुसे दी व्यक्तिगत परिस्थितियाँ 1: 12- 23

मसीह च जिन्दगी 1: 27 --- 2: 18

तीमुथियुस कने इपफ्रदीतुस तांई योजनाये 2: 19-30

दुश्मणां कने खतरयां दे विरुद्ध चतौनी 3: 1 --- 4: 9

पौलुस कने तिसदे फिलिप्पी साथी 4: 10- 20

उपसंहार 4: 21- 23

1 मसीह यीशु दे दास पौलुस कने तीमुथियुसे दे पाससे ते, सारे पवित्र लोकां दे ना जेहड़े मसीह यीशु च होई नैं फिलिप्पी च रँहदे हन, अधिकारियां कने सेवकां सौगी ।

2 अहां दे पिता परमात्मं कने प्रभु यीशु मसीह दे पाससे ते तुहां जो अनुग्रह कने शांति मिलदी रँह ।

पौलुसे दी प्रार्थना कने धन्यावाद

3 मैं जाहू जाहू तुहां जो याद करदा, ताहू ताहू अपणे परमात्मं दा धन्यावाद करदा; 4 कने जाहू कदी मैं तुहां सारेयां तांई विणती करदा, तां सदा खुशिया नैं विणती करदा । 5 इसतांई कि तुहां पैहले दिन ते लैई नैं अज्जे तिकर सुसमाचार फैलाणे च मेरे सेहभागी रँह हन । 6 मिन्जो इसा गल्ला दा भरोसा ऐ कि जिन्हीं तुहां च खरा कम्म शुरू कित्ता ऐ, सैई तिस कम्मे जो यीशु मसीह दे दिन तक पूरा करगा । 7 ठीक ऐ कि मैं तुहां सारेयां तांई ऐदेया ई वचार करे, कजोकि तुहां मेरे मने च बसेयो हन, कने मेरिया कैदा च कने सुसमाचारे तांई जबाब कने प्रमाण देंगे च तुहां सारे मिन्जो सौगी अनुग्रह च साझी हन । 8 इस च परमात्मां मेरा गवाह ऐ कि मैं मसीह यीशु दी वसुआस करी नैं तुहां सारेयां दी लालसा करदा । 9 मैं एह प्रार्थना करदा कि तुहां दा प्यारे दा ज्ञान कने सब तरांह दे विवेके सौगी होर भी बधदा जां, 10 ऐत्थू तिकर कि तुहां म्हान ते म्हान गल्लां जो प्यारियां जाणां, कने मसीह दे दिन तक सबे बणी रँहआ, कने ठोकर मत खा; 11 कने तिसा धार्मिकता दे फळे नैं जेहड़ा यीशु मसीह दिया बजाह ते हुंदा ऐ, भरपूर होदे जा जिसते परमात्मं दी महिमा कने स्तुति होदी रँह ।

पौलुसे दिया कैदा ते सुसमाचारे दी उन्नति

12 हे भाऊओ, मैं चाहंदा कि तुहां एह जाणी लैआ कि मिन्जो पर जेहड़ा बितेया ऐ, तिस ते सुसमाचारे दी ई बढदी होई ऐ । 13 ऐत्थू तिकर कि कैसर दे राजभवेन दी सारिया पलटना च कने बाकि सारे लोकां च एह प्रकट होई

गैआ ऐ कि मैं मसीह तांई कैद ऐ ; 14 कने प्रभु च जेहड़े भाऊ हन, तिन्हां च अधिकांश मेरे कैद होणे दी बजाह नैं, दिल रखी नैं परमात्मं दा वचन वसुआस करी नैं सणाणे दी होर भी हिम्मत करदे हन । 15 कुच्छ तां डाह कने झगड़े दिया बजाह ते मसीह दा प्रचार करदे हन कने कुच्छ खरिया इच्छा नैं । 16 कुच्छना च तां एह जाणी करी कि मैं सुसमाचार तांई जबाब देंगे जो ठेहराया गैआ, प्यारे नैं प्रचार करदे हन । 17 कने कुच्छना तां सीधार्थिया नैं नी अपर विरोध नैं मसीह दी काहणी सणादे हन , एह सोची नैं कि मेरिया कैदा च मिन्जो तांई क्लेश पैदा करे । 18 तां क्या होया? सिर्फ एह कि हर तरांह ते, चाहे भाने नैं चाहे सचाईया नैं, मसीह दी काहणी सणाई जांदी ऐ, कने नैं इसते खुश ऐ कने खुश रँहगा भी ।

जिंदा रँहणां मसीह ऐ

19 कजोकि मैं जाणदा ऐ कि तुहां दिया विणतिया दिया बजाह ते, कने यीशु मसीह दिया आत्मां दे दाने दिया बजह ते, इसदा फळ मेरा उद्धार हुंगा । 20 मैं तां ऐही हार्दिक लालसा कने आशा रखदा कि मैं कुसा भी गल्ला ते शर्मिदा ना होये, अपर जिआं मैं पूरिया हिम्मत दिया बजाह ते मसीह दी बडाई मेरे शरीरे दिया बजाह ते सदा होदी रँह ऐ, तिआं ई हुण भी होये, 21 कजोकि मिन्जो तांई जिंदा रँहणां मसीह ऐ, कने मरी जाणां फायदा ऐ । 22 अपर जे शरीरे च जिंदा रँहणां ई मेरे कम्मे तांई फायदेमंद ऐ तां मैं नी जाणदा कि कुस जो चुणें । 23 कजोकि मैं दूनी दे बीच अधर च लटकेया ऐ; जी तां चाहदा ऐ कि कूच करी नैं मसीह अल्ल जाई रँह, कजोकि एह बडा खरा ऐ, 24 अपर शरीरे च रँहणां तुहां दिया बजाह ते होर भी जरूरी ऐ । 25 इसतांई कि मिन्जो इसदा भरोसा ऐ, कने मैं जाणदा कि मैं जिंदा रँहगा, अपर तुहां सारेयां दे सौगी रँहगा जिसते तुहां वसुआसे च पक्के होंदे जा कने तिस च खुश रँहआ; 26 कने जेहड़ा कमांड तुहां मेरे बारे च करदे हन, सैह मिन्जो भिरी तुहां अल्ल ओणे नैं मसीह यीशु च जादा बधी जां । 27 सिर्फ इतणां करा कि तुहां दा चाल चलण मसीह दे सुसमाचारे जोग्गा होये कि चां मैं आई नैं तुहां जो दिखे, चां ना भी ओये, तुहां

दे बारे च ऐही सुणें कि तुहां इक्को ई आत्मां च पक्के हन, कने इक्क मन होई नैं सुसमाचार दे वसुआसे ताई मेहणत करदे रँहदे हन, 28 कने कुसा गला च विरोधियां ते डर नी खांदे । एह तिन्हां ताई विनाश स्पष्ट नशाण ऐ, अपर तुहां ताई उद्धार दे कने एह परमात्मं दे पाससे ते ऐ । 29 कजोकि मसीह दिया बजाह ते तुहां पर एह अनुग्रह होया कि ना सिर्फ तिस पर वसुआस करा अपर तिस ताई दुख भी उठा; 30 कने तुहां तिआं ई मेहन त करणी ऐ, जिआं तुहां मिन्जो करदे दिख्या ऐ, कने हुण भी सुणदे हन कि मैं तिआं ई करदा ऐ ।

मसीह दी दीनता कने महानता

2 कने जे मसीह च कुच्छ शांति, कने प्यार ते हौंसला, कने आत्मां दी सेहभागिता, कने कुच्छ करुणा कने दया ऐ, 2 तां मेरी एह खुशी पूरी करा कि इक्क मन रहँहा, कने इक्क ई प्यार इक्क ई चित, कने इक्क ई मणसा रखा । 3 विरोध या झूठी बड़ाईया ताई कुच्छ मत करा, अपर दीनता नैं इक्की दूये जो अपणे ते अच्छा समझा । 4 हर इक्क अपणे ई हित दी नी, अपर दूयेयां दे हित दी भी चिंता करें । 5 जिआं मसीह यीशु दा सभाव था तिआं ई तुहां दा भी सभाव होयें;

6 जिन्हीं परमात्मं दे रूपे च होई नैं भी परमात्मं दे तुल्य होणे जो अपने वशे च रखणे दी चीज मत समझा ।

7 अपर अपणे आप्पे जो देहया जीरो करी दित्ता, कने दासे दा रूप धारण कित्ता, कने माणु दी समाणता च होई गैआ ।

8 कने माणु दे रूपे च प्रकट होई नैं अपणे आप्पे जो दीन कित्ता, कने ऐत्थू तिकर आज्ञाकारी रहँहा कि मौत हाँ, सुलिया दी मौत भी झेली लैई ।

9 इसा बजाह ते परमात्मं तिस जो अति म्हान भी कित्ता, कने तिस जो सैह नां दित्ता जेहड़ा सारे नां च श्रेष्ठ ऐ,

10 कि जेहड़ा सुअर्ग च कने धरतिया पर कने धरतिया थलै ऐ, सैह सारे यीशु दे नां पर गोडे टेकन;

11 कने परमात्मं पिता दी महिमा ताई हर इक्क जीभ अंगीकार करी लें कि यीशु मसीह ई प्रभु ऐ ।

संसारे च जोतिया साइआं चमका

12 इसताई हे मेरे प्यारयो, जिस तरांह तुहां सदा ते हुकम मनदे आयेयो हन, तिआं ई हुण भी ना सिर्फ मिन्जो सौगी रहँहदे होये अपर खास करी नैं हुण मेरे दूर रहँणे पर भी डरदे कने कमदे होये, अपणे अपणे उद्धार दे कम्म पूरा करदे जा; 13 कजोकि परमात्मां ई ऐ जिन्हीं अपणी इच्छा दे मताबक तुहां दे मने च इच्छा कने कम्म, दूनी गलां दा तिस पर असर करणे दा जोर पाया ऐ ।

14 सारा कम्म बगैर कुडकुड़ाये कने बगैर झगड़े दे करा करा, 15 ताकि तुहां बेकसूर कने भोले होई नैं टेडे कने हठीले लोकां दे बीच परमात्मं दे निष्कलक औलाद बणी रहँहा, जिन्हां बीच तुहां जिन्दगिया दा वचन लैई करी संसारे च जळदे दिव्यां साइआं दुस्सा दे हन । 16 कि मसीह दे दिन मिन्जो कम्मड करणे दी बजाह हो कि मेरा दौडणा कने ना मेरी मेहणत करणी बेकार होई । 17 जे मिन्जो तुहां वसुआस रूपी बलिदान कने सेवा सौगी अपणां खून बहाणां भी पौर्यें, तमी मैं खुश ऐ कने तुहां सबना सौगी खुशी मनांदा ऐ । 18 तिआं ई तुहां भी खुश होआ कने मिन्जो सौगी खुशी मणा ।

तीमुथियुस कने इपफुदीतुस

19 मिन्जो प्रभु च आशा ऐ कि मैं तीमुथियुस जो तुहां अल्ल तौळी घल्ला, ताकि तुहां दी हालत सुणी नैं मिन्जो शांति मिले । 20 कजोकि मिन्जो अल्ल देहय सभावे दा कोई नी जेहड़ा शुद्ध मने नैं तुहां दी चिंता करें । 21 कजोकि सारे अपणे सवार्थे दी तोपा च रहँहदे हन, ना कि यीशु मसीह दी । 22 अपर तिसियो तां तुहां परखेया कने जाणी भी लैआ ऐ कि जिआं पुतर बुड़े सौगी करदा ऐ, तिआं ई तिन्हीं सुसमाचार फैलाणे च मिन्जो सौगी मेहणत कित्ती । 23 इसताई मिन्जो आशा ऐ कि जिआं ई मिन्जो पता लगी जांगा कि मेरी क्या हालत होगी, तिआं ई मैं तिसियो ताहू ई घल्ली दिंगा । 24 कने मिन्जो प्रभु च भरोसा ऐ कि मैं अप्पु भी तौळी ओंगा ।

25 अपर मैं इपफुदीतुस जो जेहड़ा मेरा भाऊ कने सेहकर्मी कने संगी योद्धा कने तुहां दा दूत, कने जरूरी गलां च मेरी सेवा टहल करणे आळा ऐ, तुहां अल्ल घल्लां जरूरी समझेया । 26 कजोकि तिसदा मन तुहां सारेयां च लगेया

था, इसा बजाह ते सैह व्याकुल रहँहदा था कजोकि तुहां तिसदिया बमारिया दा हाल सुणेया था । 27 पक्का ई सैह बमार तां होई गैआ था ऐत्थू तिकर कि मरणे पर था, अपर परमात्मं तिस पर दया कित्ती, कने सिर्फ तिस पर नी अपर मिन्जो पर भी कि मिन्जो शोक पर शोक ना होयें । 28 इसताई मैं तिसियो घल्लणे दा होर भी प्रयास कित्ता कि तुहां तिस नैं मिली नैं खुश होई जा कने मेरा भी शोक घटी जाये । 29 इसताई तुहां प्रभु च तिस नैं बड़िया खुशिया सौगी मिलणां, कने ऐदेयां दा आदर करा करणां, 30 कजोकि सैह मसीह दे कम्म ताई अपणियां जान्नी जो खतरे च पाई नैं मौता नेडे आई गैआ था तांकि जेहड़ी घटी तुहां दे पाससे ते मेरी सेवा च होई तिसायो पूरा करें ।

सच्ची धार्मिकता

3 इसताई हे मेरे भाऊओ, प्रभु च खुश रहँहा । सैई गलां तुहां जो बार सुरक्षित हन । 2 कुतेयां ते चुकनै रहँहा, कने बुरे कम्म करणेआळ्यां ते सावधान रहँहा, कने काट कूट करणेआळ्यां ते चौकस रहँहा । 3 कजोकि खतणांआळे तां अहां ई हन जेहड़े परमात्मं दी आत्मां दी अगुआई ते भक्ति करदे हन, कने मसीह यीशु पर कम्मड करदे हन, कने शरीर पर भरोसा नी रखदे । 4 अपर मैं तां शरीर पर भी भरोसा रखी सकदा । जे कुसी होर जो शरीरे पर भरोसा रखणे दा वचार होयें, तां मैं तिस ते भी बधी करी रखी सकदा । 5 अठमे दिने मेरा खतणां होया, इस्राएल दे वंश कने बिन्यामीन दे गोत्रे दा ऐ; इब्रानियां दा इब्रानी; व्यवस्था दे बारे च जे ग्लान तां फरीसी । 6 जोशे दे बारे च जे ग्लान तां कलेसिया जो सताणेआळा; कने व्यवस्था दी धार्मिकता दे बारे च जे ग्लान तां बेकसूर था । 7 अपर जेहिड्यां जेहिड्यां गलां मेरे फायदे दियां थियां, तिन्हां ई जो मैं मसीह दिया बजाह ते नकसान समझी लैआ ऐ । 8 जे मैं अपणे प्रभु मसीह यीशु दी पैहचाणा दी उतमता दिया बजाह ते मैं सारियां गलां जो नकसान समझदा । जिसदिया बजाह ते मैं सारियां चीज्रां दी नकसान उठाया, कने तिन्हां जो कूड़ा समझदा, जिसते मैं मसीह जो हासल करें, 9 कने तिस च पाया जां; ना कि अपणी तिसा धार्मिकता दे सौगी, जेहड़ा व्यवस्था ते ऐ, जे तिसा धार्मिकता दे सौगी जेहड़ा मसीह पर वसुआस करणे दी बजाह ऐ कने परमात्मं दे पाससे ते वसुआस करणे पर मिलदी ऐ, 10 तांकि मैं तिस जो कने तिसदिया मौता पर जय पाणे दी सामर्था जो, कने तिस दे सौगी दुखां च साझी होणे दे मर्म जो जाणन, कने तिसदिया मौता दी समाणता जो हासल करन, 11 कि मैं कुसा भी रीतिया नैं मरेयां च जिदे होणे दे पद तक पुजें । 12 एह मतलब नी कि मैं पाई चुकेया ऐ, या सिद्ध होई चुकेया ऐ; अपर तिस पदार्थ जो पकड़णे ताई दौडदा चली जांदा, जिस ताई मसीह यीशुयें मिन्जो पकड़या था, 13 हे भाऊओ, मेरी भावणां एह नी कि मैं पकड़ी चुकेया; अपर सिर्फ इक्क इक्क कम्म करदा कि जेहिड्यां गलां पचांह रैई गैआं हन तिन्हां जो भूली करी, गांह दियां गलां दे पाससे बधदा होया, 14 नशाने दे पाससे दौडदा चली जांदा, तांकि सैह इनाम पां जिस ताई परमात्मं मिन्जो मसीह यीशु च उपर सदेया ऐ । 15 अहां च जितणे सिद्ध हन, ऐही वचार रखन, कने जे कुसा गला च तुहां दे पाससे ई वचार होयें तां परमात्मं तिसियो भी तुहां पर प्रकट करी दिंगा । 16 इसताई जित्थू तिकर अहां पुजें हन, तिस दे मताबक चलन ।

नशाणे बक्खें दौडणां

17 हे भाऊओ, तुहां सारे मिली नैं मेरे साइआं चाल चला, कने तिन्हां पैहचाण रखा जेहड़ा इसा रीतिया पर चलदे ऐ जिसदा उदारहण तुहां अहां च पांदे हन; 18 कजोकि मतिआं ऐदेईयां चालां चलदे हन, जिन्हां दी चर्चा मैं तुहां नैं बार बार कित्ती ऐ, कने अल्ली भी रोई रोई करी गलां कि सैह अपणी चाल चलण नैं मसीह दी सुलिया दे बैरी हन । 19 तिन्हां दा अंत विनाश ऐ, तिन्हां दा ईश्वर पेट ऐ, सैह अपणी लज्जा दी गलां पर कम्मड करदे हन, कने धरतिया दी चीज्रां पर मन लगाई रखदे हन । 20 अपर अहां दा स्वदेश सुअर्ग पर ऐ; कने अहां इक्क उद्धारकर्ता प्रभु यीशु मसीह दे औत्थू ते ओणे दा इंतजार करदे हन । 21 सैह अपणियां ताकता दे तिस प्रभावे दे मताबक जिसदिया बजाह ते सैह सारियां चीज्रां जो अपणे वशे च करी सकदा ऐ, अहां दे दीन हीन शरीरे दा रूप बदली नैं, अपणी महिमा दे शरीरे दे अनुकूल बनाई दिंगा ।

4 इसताई हे मेरे प्यारे भाऊओ, जिन्हां च मेरा जी लगेया रँहदा ऐ, जेहड़ी मेरी खुशी कने मुकुट होयें, हे प्यारे भाऊओ, प्रभु च इस तरां ह पक्के रँहआ ।

उपयोगी निर्देश

2 मैं यूओदिया जो भी समझदा कने सुन्तुरखे जो भी, कि सँह प्रभु च इक्क मन रँह । 3 हे सच्चे सेहकर्मो, मैं तिजो नै भी विणती करदा कि तू तिन्हां जणांसां दी मदद कर, कजोकि तिन्हां मिन्जो सौगी सुसमाचार फेलाणे च, क्लेमंस कने मेरे होरनी सेहकर्मियां समेत मेहनत किती, जिन्हां दे नां जिन्दगिया दी कताबां च लिख्यो हन ।

4 प्रभु च सदा खुश रँहआ; मैं भिरी ग्लांदा, खुश रँहआ । 5 तुहां दी कोमलता सारे माणुआं पर प्रकट होयें । प्रभु नैडें ऐ । 6 कुसा भी गल्ला दी चिंता मत करा; अपर हर इक्की गल्ला च तुहां दे निवेदन, प्रार्थना कने विणतिया दिया बजाह ते धन्यावाद सौगी परमात्मे सामणे हाजर कित्ते जान । 7 ताहू परमात्मे दी शांति, जेहड़ी सारिया समझा ते परां ह ऐ, तुहां दे दिलां कने वचारां जो मसीह यीशु च सुरक्षित रखगी । 8 इसताई हे भाऊओ, जेहिडयां जेहिडयां गल्लां सच हन, कने जेहिडयां जेहिडयां गल्लां आदरणीय हन, कने जेहिडयां जेहिडयां गल्लां ठीक हन, कने जेहिडयां जेहिडयां गल्लां पवित्र हन, कने जेहिडयां जेहिडयां गल्लां सुहावणियां हन, कने जेहिडयां जेहिडयां मनभावणियां हन, मतलब जेहिडयां भी सद्गुण कने तरीफां दी गल्लां हन तिन्हां पर ध्यान लग्गा करा । 9 जेहिडयां गल्लां तुहां मिन्जो ते सिखियां, कने स्वकार कितीयां, कने सुणियां कने मिन्जो च दिखियां, तिन्हां ई दा पालन करा करा, ताहू परमात्मे जेहड़ा शांति दा सोंता ऐ, तुहां सौगी रँहगा ।

दाने ताई धन्यावाद

10 मैं प्रभु च बड़ा खुश ऐ कि हुण इतणेयां दिनां दे बाद तुहां दी चिंता मेरे बारे च भिरी जागृत होई ऐ, पक्का तुहां जो शुरु च भी इस दा वचार था, अपर

तुहां जो मौका ना मिलेया । 11 एह नी कि मैं अपणियां कमियां दिया बजाह ते एह ग्लांदा ऐ; कजोकि मैं एह सिखया ऐ कि जिसा हालता च मैं ऐ; तिसा च संतोष करे । 12 मैं दीन होणां भी जाणदा ऐ कने बढ़णां भी जाणदा ऐ; हर इक्क गल्ल कने सारी हालतां च मैं मगन होणां भूखा रँहणां, कने बढ़णा घटनां सिखेया ऐ । 13 जेहड़ा मिन्जो सामर्थ दिंदा ऐ तिस च मैं सारा कुच्छ करी सकदा ।

14 तमी तुहां नैं खरा किन्ता कि मेरे क्लेशे च मेरे साझी होये । 15 हे फिलिप्पियो, तुहां अप्पु भी जाणदे हन कि सुसमाचार प्रचार दे शुरु च जाहू मैं मकिदुनिया ते विदा होया, तुहां जो छड्डी होर कुसा मंडलियां नैं लैणे दैणे दे बारे च मेरी मदद नी किती । 16 इस तरां ह जाहू मैं थिस्सलुनीके च था, ताहू भी तुहां मेरी कमी पूरी करणे ताई इक्क बरी क्या अपर दो बरी कुच्छ घल्लया था । 17 एह नी कि मैं दान चाहंदा अपर मैं ऐदेया फल चाहंदा जेहड़ा तुहां दे फायदे ताई बढ़दा जाये । 18 मिन्जो अल्ल सब कुच्छ ऐ, अपर मता सारा ऐ; जेहिडयां चीज्रां तुहां इपफ्रदीतुस दे हत्थे ते घल्लियां थियां तिन्हां जो पाई नैं मैं मगन होई गैआ, सँह तां सुखदायक मुश्क, स्वकार करणे जोग्गा बलिदान ऐ, जेहड़ा परमात्मे जो भांदा ऐ । 19 मेरा परमात्मां भी अपणे तिस धने दे मताबक जेहड़ा महिमा सौगी मसीह यीशु च ऐ, तुहां दी हर इक्क कमी पूरी करगा । 20 अहां दे परमात्मे कने पिता दी महिमा जुगा जुग होंदी रँह । आमीन ।

आखरी नमस्कार

21 हर इक्क पवित्र जण जो, जेहड़ा यीशु मसीह च ऐ, नमस्कार ग्ला । जेहड़े भाऊ मिन्जो सौगी हन, तुहां जो नमस्कार ग्लांदे हन । 22 सारे पवित्र लोक, खास करी नैं जेहड़े कैसर दे परवारे दे हन, तुहां जो नमस्कार ग्लांदे हन । 23 अहां दे प्रभु यीशु मसीह दा अनुग्रह तुहां दिया आत्मां सौगी रँह ।

कुलुस्सियों

भूमिका

कुलुस्सियों दे नांये पर पौलुस चले दी पत्री एशिया माइनर दे कुलुस्से नांये दे सैहरे दी कलेसिया जो लिखियो थी, जेहड़ा इफिसुस सैहरे दे शरू च स्थित था । इसा कलेसिया दी स्थापना पौलुसे नी कित्तियो थी, अपर एह तिस क्षेत्र च स्थित थी जिसा दा उत्तरदायित्व पौलू अपने कंधेयां पर अनुभव करदा था जिआं कि अहां पौलुसे जो रोमो सम्राज्य दे इक्क प्रान्त अखाया दी राजधानी इफिसुस ते मसीही सेवकां जो घल्लदे होये पादे हन । पौलुसे जो एह पता लगी गैआ था कि कुलुस्से दी कलेसिया च कुछ गलत शिक्षक थे जेहड़े इसा गल्ला पर जोर दिंदे थे कि परमात्में जो जाणने कने पूरी रीती नैं उद्धार हासल करणे ताई इक्क माणु जो कुछ खास आत्मिक प्रधानां कने अधिकारियां दी भक्ति करणां जरूरी था इसदे सौगी सौगी, एह शिक्षक ग्लां दे थे कि माणु जो कुछ खास धर्म - विधियां, जिआं खतना, जो मनणां कने खाणां कने होरनी गल्लां दे बारे च कठोर नियमां दा पालन करणां जरूरी ऐ । पौलुस इन्हां शिक्षां दा विरोध करणे ताई, सच्चे मसीही संदेशे सौगी एह पत्री लिखदा ऐ । तिसदे जबाबे दा मर्म एह ऐ कि यीशु मसीह पूरी रीती नैं उद्धार दैणे च समर्थ ऐ, कने एह भी कि एह होर वसुआस कने विधियां असल च माणु जो तिस ते दूर करी दिंदी ऐ । मसीह दिया बजाह ते ई परमात्में इसा सृष्टिया दी रचना किती, कने हुण तिसदिया बजाह ते ई सैह तिसियो अपने अल्ल वापस अणां दा ऐ । सिर्फ मसीह च ई संसारे दे उद्धार दी उम्मीद ऐ । पौलुस ताहू वसुआसियां दी जिन्दगी ताई इसा म्हान शिक्षा दा मतलब दस्सदा ऐ । एह ध्यान दैणे जोगी गल्ल ऐ कि तुखिकुस, जेहड़ा पौलुस दी एह पत्री कुलुस्से लैई गैआ था, कने सौगी उनेसिमुस भी था -- सैह गुलाम जिसदे पक्ष च पौलुसें फ्लेमां दी पत्री लिखियो थी ।

रूप-रेखा

भूमिका 1: 1- 8

मसीह दा सभाव कने कम्म 1: 9 --- 2: 19

मसीह च नौई जिन्दगी 2: 20 --- 4: 6

उपसंहार 4: 7- 18

नमस्कार

1 पौलुस दे पास्से ते, जेहड़ा परमात्में दी इच्छा ते मसीह यीशु दा चेला ऐ, कने भाऊ तीमुथियुस दे पास्से ते, 2 मसीह च तिन्हां पवित्र कने वसुआसी भाऊआं दे नां जेहड़े कुलुस्से च रँहदे हन : अहां दे पिता परमात्में दिया तरफा ते तुहां जो अनुग्रह कने शांति हासल होंदी रँह ।

धन्यावाद दी प्रार्थना

3 अहां तुहां ताई हर रोज प्रार्थना करी नैं अपने प्रभु यीशु मसीह दे पिता मतलब परमात्में दा धन्यावाद करदे हन , 4 कजोकि अहां सुणेया ऐ कि मसीह यीशु पर तुहां दा वसुआस ऐ, कने सारे पवित्र लोकां नैं तुहां प्यार रखदे हन; 5 तिसा आशा कित्तियो होई चीज्रा दिया बजाह ते जेहड़ीं तुहां ताई सुअर्गे च रखियो ऐ, जिसदी चर्चा तुहां तिस सुसमाचार दे सच्चे वचने च सुणी चुकेयो हन, 6 जेहड़ा तुहां अल्ल पुज्रा ऐ, कने जेहड़ा संसारे च भी फळ लैयोंदा कने फैलदा ऐ, तिआं ई जिस दिन ते तुहां तिस जो सुणेया कने सचाईया नैं परमात्में दा अनुग्रह पणछैणेया ऐ, तुहां च भी इआं ई करदा ऐ । 7 तिस दी शिक्षा तुहां अहां दे प्यारे भाऊ इपफ्रासे ते पाई, जेहड़ा अहां ताई मसीह दा वसुआसे जोगा सेवक ऐ । 8 तिन्हीं तुहां दे प्यारे जो जेहड़ा आत्मां च ऐ अहां पर प्रकट कित्ता ।

9 इसताई जिस दिन ते एह सुणेया ऐ, अहां भी तुहां ताई एह प्रार्थना कने विणती करणां नी छडदे कि तुहां सारे आत्मिक ज्ञान कने समझा समेत परमात्में दी इच्छा दी पणछैणां च सिद्ध होई जा, 10 तांकि तुहां दा चाल चलन प्रभु दे मताबक होयें, कने सैह सब तरांह ते खुश होयें कने तुहां च हर तरांह दे खरे कम्मां दा फळ लगें, कने तुहां परमात्में दी पणछैण च बधदे जा । 11 कने तिसदी महिमा दिया ताकता दे मताबक सब तरांह दी सामर्था नैं ताकतवर होंदे जा, ऐत्थू तिकर कि खुशिया सौगी हर तरांह ते धीरज कने सेहणशीलता दस्सी सका, 12 कने पिता दा धन्यावाद करदे रँहआ, जिन्हीं अहां जो इस जोगा बणांया कि जोती च पवित्र लोकां सौगी मीरास च भागीदार होन,

13 तिन्हीं अहां जो नैहरे दे वशे ते छड्डाई करी अपने प्यारे पुत्र दे राजे च दाखल कराया, 14 जिस च अहां जो छुटकारा मतलब पापां दी माफी मिलदी ऐ ।

मसीह दी महानता कने तिसदे कम्म

15 सैह तां नी दुस्सणे आळे परमात्में दा प्रतिरूप कने सारिया सृष्टिया च पैहिलौठा ऐ । 16 कजोकि तिस च सारी चीज्रां दी सृष्टि होई, चां सुअर्गे दी होयें चां धरती दी, दुस्सा करदी होयें या नी दुस्सा करदी होयें क्या सिहासण क्या प्रभुतायें, क्या प्रधानतायें, क्या हक्क, सारी चीज्रां तिसदिया बजाह ते कने तिस ताई बणांईयां हन । 17 सैई सारियां चीज्रां च पैहले हन, कने सारियां चीज्रां तिस च टिकी रँहदियां हन । 18 सैई शरीर, मतलब कलेसिया दा मुँड ऐ; सैई शुरु ऐ, कने मरेयां च जिंदे होणे आळ्यां च पैहला कि सारियां गल्लां च सैई प्रधान ठेहरेया । 19 कजोकि पिता दी खुशी इस च ऐ कि तिस च सारी परिपूर्णता वास करें, 20 ककने तिसदे सूलिया पर चलेयो रूने दिया बजाह ते मेलमिलाप करी नैं सारियां चीज्रां दा तिसदिया बजाह ते अप्पु सौगी मेल करी लै, चां सैह धरतीय दी होयें चां सुअर्गे दी ।

21 तुहां जेहड़े पैहले कड्डी दित्यो थे, कने बुरे कम्मां दिया बजाह ते मन दे बेरी थे; 22 कने तिन्हीं हुण शारीरिक देहा च मौती दी बजाह ते तुहां भी मेल मिलाप करी लैआ तांकि तुहां जो अपने सामणे पवित्र कने निष्कलंक, कने बेकसूर बणांई करी खडा करें । 23 जे तुहां वसुआसे दी नीआं पर टिकी रँह कने तिस सुसमाचार दी आशा जो जिसियो तुहां सुणेया ऐ ना छडन, जिसदा प्रचार अम्बरे दे थलै दिया सारिया सृष्टिया च कित्या ऐ, कने जिसदा मैं पौलुस सेवक ऐ

कलेसिया दा सेवक - पौलुस

24 हुण मैं तिन्हां दुखा दिया बजाह ते खुशी मनांदा ऐ, जेहड़ा तुहां ताई झेलदा ऐ कने मसीह दे क्लेशां दी कमी तिसदे शरीरे ताई, मतलब कलेसिया ताई, अपने शरीर च पूरी करदा ऐ; 25 जिसदा मैं परमात्में दे तिस प्रबंध दे मताबक सेवक ऐ जेहड़ा तुहां ताई मिन्जो दित्या ऐ, तांकि मैं परमात्में दे

वचना जो पूरा पूरा प्रचार करें। 26 मतलब तिस भेदे जो जेहड़ा बगतां कने पीढ़ियां ते गुप्त रहूआ, अपर हुण तिसदे तिन्हां पवित्र लोकां पर प्रकट होया ऐ। 27 जिन्हां पर परमात्मं प्रकट करणां चाया कि तिन्हां जो याद होयें कि गैर - यहूदियां च तिस भेदे दी महिमा दा मुल क्या ऐ, कने सैह एह ऐ कि मसीह जेहड़ा महिमा दी आशा ऐ तुहां च रहँदा ऐ। 28 जिसदा प्रचार करी नैं अहां हर इक्की माणुये जो दस्सी दिंदे हन कने सारे ज्ञान ते हर इक्की माणुये जो सखांदे हन, कि अहां हर इक्की माणुये जो मसीह च सिद्ध करी नैं खड़ा करन। 29 इसताई मैं तिसदिया शक्तिया दे मताबक जेहड़ी मिन्जो च सामर्था सौगी असर पांदी ऐ, तन मन लगाई नैं मेहणत करदा ऐ।

2 मैं चाहँदा ऐ कि तुहां जाणी लैन कि तुहां कने तिन्हां ताई जेहडे लौदीकिया च हन, कने तिन्हां सारेयां ताई जिन्हां नैं मेरा शारीरिक मुँ नी दिख्या, मैं कितणी मेहणत करदा ऐ, 2 ताकि तिन्हां दे मनां च शांति होयें कने सैह प्यार नैं अप्पु च गठे रहँदा, कने सैह पूरी समझा दा सारा धन लैई लैन, कने पिता परमात्मां दे भेदे जो मतलब मसीह जो पणछेणी लैआ। 3 जिस च अक्क कने ज्ञान दे सारा खजाना छिपेया ऐ। 4 एह मैं इसताई ग्ला करदा कि कोई माणु तुहां जो लोभ लालचे आळियां गल्लां नैं धोखा नी दें। 5 जे मैं शरीरे मताबक तुहां ते दूर ऐ, तमी आत्मिक भाव ते तुहां दे नैडें ऐ, कने तुहां दी बिधि मताबक चाल चलन कने तुहां दे वसुआसे दी, जेहड़ा कि मसीह च पक्का दिखी करी खुश हुंदा ऐ।

मसीह च जिन्दगी दी भरपूरी

6 कने जिआं तुहां मसीह यीशु जो प्रभु मनी करी ग्रहण करी लैआ ऐ, तिआं ई तिस च चलदे रहँदा, 7 कने तिस च जड़ पकड़दे कने बधदे भी जा; कने जिआं तुहां सखायेयो तिआं ई वसुआसे च पक्के होंदे जा, कने जादा ते जादा धन्यावाद करदे रहँदा।

8 चुकनै रहँदा कि कोई तुहां जो तिस तत्व ज्ञान कने व्यर्थ धोखे दिया बजाह ते शिकार ना करी लै, जेहड़ा माणुआं दे रीति रुआजां कने संसारे दी पराणी शिक्षा दे मताबक तां ऐ, अपर मसीह दे मताबक नी। 9 कजोकि तिस च ईश्वरत्व दी सारी परिपूर्णता सदेह वास करदी ऐ, 10 कने तुहां तिस च भरपूर होई गै हन जेहड़ा सारी प्रधानता दा कने हक्के दा शिरोमणि ऐ। 11 तिस च तुहां दा देहया खतणां होया कि जेहड़ा हत्थे नैं नी होँदा, मतलब मसीह दा खतणां, जिसते शारीरिक देह खोली दिती जांदी ऐ, 12 कने तिस सौगी बपतिस्मे लैई करी दबे गै हन कने तिस च परमात्मं दी सामर्था पर वसुआस करी नैं, जिन्हीं यीशु जो मरेयां ते जिंदा कित्या, तिस सौगी जिंदा भी होयें। 13 तिन्हीं तुहां जो भी, जेहड़े अपणे अपराधां कने अपणे शरीरे दी खतणारहित हालता च मरेयो थे, तिस सौगी जिंदा कित्यो, कने अहां दे सारे अपराधां जो माफ कित्या, 14 कने विधियां दा सैह लेखा जेहड़ा अहां दे नां पर कने अहां दे वरखलाफ च था, मिटाई दिता, कने तिसियो सूलिया पर मेखां नैं जड़ी करी सामणे ते हटाई दिता ऐ। 15 कने तिन्हीं प्रधानता कने अधिकारियां जो उपरे ते लौआई नैं तिन्हां दा खुल्लमखुला तमाशा बणाई दिता कने सूलिया दिया बजाह ते तिन्हां पर जय जयकार दी उआज सणाई।

16 इसताई खाणे पीणे या तौआर या नौये चन्द्रमे, या सब्ब दे बारे च तुहां दा कोई फैसला ना करें। 17 कजोकि एह सारियां ओणे आळियां गल्लां दी परछाई ऐ, अपर असली चीज्रां मसीह दियां हन। 18 कोई माणु तुहां जो माणु दी दीनता कने सुअर्गदतां दी पूजा कराई नैं तुहां दी दौड़ा दे इनामे ते वंचित ना करें। ऐदेया माणु दिखियां गल्लां च मन लगांदा ऐ कने अपणियां शारीरिक समझा पर बेकार फूलदा ऐ, 19 कने तिस शिरोमणि जो पकड़ी नी रखदा जिसते सारा शरीर जोड़ा कने पड़ेयां दिया बजाह ते पालण पोषण पाई नैं कने इक्क दूये नैं गठी करी, परमात्मं दे पास्से ते बधदे जांदे हन।

मसीह सौगी मरणां कने जीणां

20 जाहू कि तुहां यीशु मसीह सौगी संसार दी शुरु दी शिक्षा ताई मरी गैयो हन, तां भिरी कजो तिन्हां साइआं जेहडे संसारे च जिन्दगी बितांदे हन, तुहां ऐदेई विधियां दे वशे च कजो रहँदे हन। 21 कि एह ना छूणा, तिसियो ना चखणा, कने तिसियो हत्थ ना लगाणां? 22 (एह सारियां चीज्रां कम्मं च लांदे लांदे नाश होई जांगियां) कजोकि एह माणुआं दे हुक्मां कने शिक्षाआं दे

मताबक हन। 23 इन्हां विधियां च अपणिया इच्छा दे मताबक बणाईयो भक्ति दी रीति, कने आत्म हीनता, कने शारीरिक योगाभ्यास दे भाव नैं ज्ञान दा नां तां ऐ, अपर शरीरी लालचे जो रोकणे च इन्हां ते कुच्छ भी फायदा नी हुंदा।

3 कने जाहू तुहां मसीह दे सौगी जिंदा कित्ते हन, तां सुअर्गीय चीज्रां दी तोपा च रहँदा, जित्थू मसीह अज्र भी ऐ कने परमात्मं दे सज्जे बक्खें बैठया ऐ। 2 धरतियां दियां चीज्रां पर नी अपर सुअर्गीय चीज्रां पर ध्यान लगा। 3 कजोकि तुहां तां मरी गैयो थे कने तुहां दी जिन्दगी मसीह सौगी परमात्मं च छिपियो ऐ। 4 जाहू मसीह जेहड़ी म्हारी जिन्दगी ऐ, प्रकट होणां, ताहू तुहां भी तिस सौगी महिमा नैं प्रकट करणे हन।

पराणी जिन्दगी कने नौई जिन्दगी

5 इसताई अपणे तिन्हां अंगा जो मारी दैआ जेहडे धरतिया पर हन, जे व्यभिचार, अशुद्धता, दुष्कामना, बुरी लालसा कने लोभे जो जेहड़ा मूर्तिपूजा दे बराबर ऐ, 6 इन्हां ई दिया बजाह ते परमात्मं दा प्रकोप हुक्म ना मानणे आळेयां पर पौंदा ऐ। 7 कने तुहां भी, जाहू इन्हां बुराइआं च जिन्दगी बितांदे थे तां इन्हां साइआं ई जिन्दगी बितांदे थे। 8 अपर हुण तुहां भी इन्हां सारेयां जो, मतलब गुस्सा, रोष, बैरभाव, निंदा कने मुँमें ते गालियां बकणा इन्हां सबना जो छडी दैआ। 9 इक्की दूये नैं झूठ मत ग्ला, कजोकि तुहां पराणे माणुये जो तिसदे कम्मं सौगी खोली दित्या ऐ। 10 कने नौये माणुये जो पैहणी लैआ ऐ, जेहड़ा अपणे बणाणे आळे साइआं ज्ञान पाणे ताई नौआं बणदा जांदा ऐ। 11 तिस च ना तां यूनानी रहँदा ना यहूदी, ना खतणां ना खतणारहित, ना जंगली, ना स्कूती, ना दास कने ना अजाद सिर्फ मसीह सब कुच्छ कने सबना च ऐ। 12 इसताई परमात्मं दे चुणेयां साइआं जेहडे पवित्र कने प्यारे हन, बड़ी करुणा, कने भलाई, कने दीनता, कने नम्रता, कने सेहणशीलता धारण करा। 13 कने जे कुसी जो कुसी पर दोस लगाणे दी कोई बजाह होयें, तां इक्की दूये दी झेली लैआ कने इक्की दूये दे अपराधां जो माफ करा; जिआं प्रभुये तुहां दे अपराध माफ कित्ते, तिआं ई तुहां भी करा। 14 इन्हां सबना दे उपर प्यारे जो जेहड़ा सिद्धता दा पटका ऐ तिसियो बन्नी लैआ। 15 मसीह दी शांति जिस ताई तुहां सदैयो भी हन, तुहां दे मने च राज्र करें; कने तुहां धन्यावादी बणी रहँदा। 16 मसीह दे वचने जो अपणे मने च अधिकारे नैं बसणा दैआ, कने सिद्ध ज्ञाने सौगी इक्की दूये जो सखा कने चिता, कने अपणे अपणे मने च अनुग्रह सौगी परमात्मं ताई भजन कने स्तुतिगान कने आत्मिक गीत गा। 17 वचने च या कम्मे च जेहड़ा कुच्छ भी करा सब प्रभु यीशु दे नांये नैं करा, कने तिसदिया बजाह ते पिता परमात्मां दा धन्यावाद करा।

नौईआ जिन्दगिया दे परिवारिक नियम

18 हे लाडियो, जिआं प्रभु च ठीक एह ऐ, तिआं ई अपणे अपणे लाडे दा हुक्म मना। 19 हे लाडेयो, अपणियां अपणियां लाडियां नैं प्यार रखा, कने तिन्हां नैं कठोरता मत करा। 20 हे जगतों, सारियां गल्लां च अपणे अपणे माऊ बुडे दे हुक्मे दा पालण करा, कजोकि प्रभु इसते खुश हुंदा ऐ। 21 हे बच्चे आळेयो अपणे जागतां जो तंग मत करा, इआं ना होयें कि तिन्हां दी हिम्मत टूटी जां। 22 हे सेवको जेहडे शरीर दे मताबक तुहां दे मालक हन, सारियां गल्लां च तिन्हां दा हुक्म मना, माणुआं जो खुश करणे आळेयां साइआं दस्सणे ताई नी, अपर मने दी सीधाई कने परमात्मं दे डरे नैं। 23 जेहड़ा कुच्छ तुहां करदे हन, तिसियो तन मन नैं करा, एह समझी नैं कि माणुआं ताई नी अपर प्रभु ताई करदे हन; 24 कजोकि तुहां जाणदे हन कि तुहां जो इसदे बदले प्रभुये नैं मीरास मिलगी; तुहां प्रभु मसीह दी सेवा करदे हन। 25 कजोकि जेहड़ा बुरा करदा ऐ सैह अपणी बुराईया दा फळ पांगा, सुअर्गे च कुस दा पक्ष नी लैआ जांगा।

4 हे सुआमियो, अपणे अपणे दासां सौगी न्याय कने ठीक ठीक व्यवहार करा, एह समझी करी कि सुअर्गे च तुहां दा भी इक्को मालक ऐ।

कुच्छ व्यावहारिक सलाह

2 प्रार्थना च लगे रहँदा, कने धन्यावाद दे सौगी तिस च जागदे रहँदा, 3 कने इसदे सौगी सौगी अहां ताई भी प्रार्थना करदे रहँदा कि परमात्मं अहां ताई वचन सणाणे ताई इक्क ऐदेया दुरआजे खोल कि अहां मसीह दे तिस भेदे

दा वखान करी सकन जिसदिया बजाह ते में कैदा च ऐ, 4 कने तिसियो इआं प्रकट कर, जिआं मिन्जो च करणां ठीक ऐ ।

5 मौके जो कीमती समझी नैं बाहरे आळ्यां सौगी अक्कमंदियां नैं वर्ताव करा । 6 तुहां दा वचन सदा अनुग्रह सौगी कने खरा होयें कि तुहां जो हर माणुये जो ठीक रीतिया नैं जबाब दैणां आई जां ।

7 प्यारे भाऊ कने वसुआस जोगे सेवक, तुखियुस, जेहड़ा प्रभु च मेरे सौगी कम्म करणे आळा ऐ, मेरी सारियां गल्लां तुहां जो दस्सी दिंगा ।

8 तिसियो में तुहां अल्ल इसताईं घल्लया ऐ कि तुहां जो म्हारी हालत पता लगी जां कने सैह तुहां दे मनां जो शांति दें । 9 तिस सौगी में उनेसिमुसे जो भी घल्लया ऐ जेहड़ा वसुआसे जोगा कने प्यारा भाऊ कने तुहां दा अपणां ई ऐ; एह तुहां जो ऐत्थु दियां सारियां गल्लां दस्सी दिगे । 10 अरिस्तर्खुस, जेहड़ा मिन्जो सौगी कैदी ऐ, कने मरकुस जेहड़ा बरनबासे दा भाऊ लगदा ऐ (जिसदे बारे च तुहां हुक्म मिलेया था कि जे सैह तुहां अल्ल ओंये, तां तिस नैं अच्छी तरह वर्ताव करणां), 11 कने यीशु जेहड़ा यूस्तुस ग्लांदे हन, तुहां जो

नमस्कार ग्लांदा ऐ । खतणां कित्तियो लोकां च सिर्फ एह ई इक्क ऐ जेहड़ा परमात्में दे राजे ताईं मेरे सौगी कने शांति दी बजाह ऐ । 12 इपफ्रास जेहड़ा तुहां च ऐ कने मसीह यीशु दा दास ऐ, तुहां जो नमस्कार ग्लांदा ऐ कने सदा तुहां ताईं प्रार्थनां करणे दी कोशश करदा ऐ तांकि तुहां सिद्ध होई नैं पूरे वसुआसे सौगी परमात्में दी इच्छा पर टिकी रहूआ । 13 में तिसदा गवाह ऐ कि सैह तुहां ताईं कने लौदीकिया कने हियरापुलिस आळ्यां ताईं बड़ी मेहनत करदा रहँदा ऐ । 14 प्यारे वैघ लूका कने देमासे दा तुहां जो नमस्कार ।

15 लौदीकिया दे भाऊआं जो कने नुमफादे कने तिन्हां दे घरे दी कलेसिया जो नमस्कार ग्लाणां । 16 जाहू एह चीट्टी तुहां दे ऐत्थु पढी लैई जां तां इआं करणां कि लौदीकिया दी कलेसिया च भी पढी जां, कने सैह चिट्टी जेहड़ी लौदीकिया च आई तिसायो तुहां भी पढनेयों । 17 कने अखिप्पुसे नैं ग्लानेयों कि जेहड़ी सेवा प्रभु च तिजो दित्तियो ऐ, तिसायो ध्याने सौगी पूरी करनेयों ।

18 में पौलुसे अपणे हत्थे नैं लिखी नैं तुहां जो नमस्कार ग्लांदा । मेरियां जंजीरां जो याद रखनेयों । तुहां पर अनुग्रह हुंदा रहँ । आमीन ।

1 थिस्सलुनीकियों

भूमिका

रोमी सम्राज्य च मते प्रान्त थे तिन्हां च मकिदुनिया इक्क था कने थिस्सलुनीके सैहर तिसदी राजधानी था । फिलिप्पी सैहरे ते ओणे दे बाद पौलुसें ऐत्थू इक्क कलेसिया दी स्थापना किक्ती थी । ऐत्थू भी, तौळी ई तिन्हां यहूदियां दिया बजाह ते विरोध शुरू होई गैआ, जेहड़ा गैर - यहूदियां च पौलुस दे मसीही संदेश दे प्रसार दी सफलता ते जलदे थे, कजोकि सैह गैर - यहूदी यहूदी धर्म च रुचि रखदे थे । कने पौलुसे जो थिस्सलुनीके छडणां पैआ कने सैह बिरिया चली गैआ । बादे च, जाहू सैह कुरिन्थस पुज्जा, ताहू पौलुसे जो तिसदे सहकर्मी कने साथी तीमुथियुस दिया बजाह ते व्यक्तिगत रूप ते थिस्सलुनीके दी कलेसिया दी स्थिति दे बारे च समाचार हासल होया ।

एह समाचार पाणे दे बाद थिस्सलुनीकियों दे नांये पर पौलुस चले दी पैहली पत्री तित्थू दे मसीहियां जो उत्साहित करणे कने दुआरा ते आश्चस्त करणे तांई लिखी गैई । सैह तिन्हां दे वसुआसे कने प्यार दे बारे च समाचारे तांई धन्यावाद दिंदा ऐ । सैह तिन्हां जो अपणियां जिन्दगिया दी याद दिलांदा ऐ जेहड़ी तिन्हीं तिन्हां सौगी रेंहदे बिताइयो थी । ताहू सैह मसीह दे दुआरा जिंदा होणे ते सम्बन्धित सबालां दा जबाब दिंदा ऐ जेहड़े तिसा कलेसिया च उठी खडौतेयो थे । सबाल एह थे : क्या इक्क वसुआसी, जेहड़ा मसीह दे दुआरा जिंदा होणे ते पैहलें ई मरी जांदा ऐ, तिसा जिन्दगिया दा भागी हुंगा जेहड़ा तिसदे ओणे ते मिलणे आळा ऐ? मसीह दा दुआरा जिंदा होणां कधेड़ी हुंगा? पौलुस इस मौके पर तिन्हां जो एह दस्सदा ऐ कि तिसा हालता च जाहू कि तुहां मसीह दे दुआरा जिंदा होणे दी उम्मीदा ते इन्तजार करा दे हन, चुपचाप अपणे कम्मे च लगी रैहआ ।

रूप रेखा

भूमिका 1: 1

धन्यावाद कने स्तुति 1: 2 --- 3: 13

मसीही आचार - व्यवहार सम्बन्धी उपदेश 4: 1- 12

मसीह दे दुआरा ओणे दे बारे च शिक्षा 4: 13 --- 5: 11

आखरी उपदेश 5: 12- 22

उपसंहार 5: 23 -28

नमस्कार

1 पौलुस कने सिलवानुस कने तीमुथियुसे दे पास्से ते थिस्सलुनीकियों दी कलेसिया दे नां जेहड़े पिता परमात्मं कने प्रभु यीशु मसीह च हन : अनुग्रह कने शांति मिलदी रैह ।

थिस्सलुनीकियों दा वसुआस

2 अहां अपणी प्रार्थनां च तुहां जो याद करदे कने सदा तुहां सबना दे बारे च परमात्मं दा धन्यावाद करदे हन, 3 कने अपणे पिता परमात्मं दे सामणे तुहां दे वसुआसे दे कम्म कने प्यार दी मेहनत, कने अहां दे प्रभु यीशु मसीह च आशा दी धीरता जो हमेशा याद करदे हन । 4 हे भाऊओ, परमात्मं दे प्यारेयो लोकों, अहां जाणदे हन कि तुहां चुणेयो हन । 5 कजोकि अहां दा सुसमाचार तुहां अल्ल ना सिर्फ शब्द मात्र ई सामर्थ कने पवित्र आत्मां च, कने बडे भरोसे सौगी पुज्या ऐ; जिआं तुहां जाणदे हन कि अहां तुहां तांई तुहां बीच किआं बणी गै । 6 तुहां तिस बडे क्लेशे च, पवित्र आत्मां दी खुशियां सौगी वचना जो मनी करी म्हारी कने प्रभुये साइआं चाल चलणां लग् । 7 ऐत्थू तिकर कि मकिदुनिया कने अख्या दे सारे वसुआसियां तांई तुहां नमूना बणें । 8 कजोकि तुहां ऐत्थू ते ना सिर्फ मकिदुनिया कने अख्या च प्रभु दा वचन सुणांया गैआ, अपर तुहां दे वसुआसे दी जेहड़ा परमात्मं पर ऐ, हर जगाह च एह चर्चा फैली गैई कि अहां जो दस्सणे दी जरूरत नी ऐ । 9 कजोकि सैह अप्पु ई अहां दे बारे च दस्सदे हन कि तुहां अल्ल अहां दा ओणा किआं होया; कने तुहां कदेइआं मूरतां ते परमात्मं कनारे फिरे तांकि जिंदा कने सच्चे परमात्मं दी सेवा करा, 10 कने तिसदे पुत्रे दे सुअर्गे ते ओणे दा इंतजार करदे रैहआ जिसियो तिन्हीं मरेयां ते जिंदा कित्या, मतलब यीशु दी, जेहड़ा अहां जो ओणेआळे प्रकोपे ते बचांदा ऐ ।

पौलुसे दा प्रचारे दा कम्म

2 हे भाऊओ, तुहां अप्पु ई जाणदे हन कि अहां दा तुहां अल्ल ओणां बेकार नी होया, 2 अपर तुहां अप्पु ई जाणदे हन कि पैहले फिलिप्पी च दुख झेलणे कने बुरा सताव सेहणे दे बाद भी अहां दे परमात्मं अहां जो इतणी हिम्मत दित्तियो, कि अहां परमात्मं दा सुसमाचार भारी विरोधां दे होणे दे बाबजूद भी तुहां जो सणाई सकन । 3 कजोकि म्हारी शिक्षा ना भ्रम ते ऐ कने ना अशुद्धता ते, कने ना छले सौगी ऐ; 4 अपर जिआं परमात्मं अहां जो काबल समझी करी सुसमाचार दित्या, तां अहां तिआं ई वखान करदे हन, कने इस च माणुआं जो नी, अपर परमात्मं जो जेहड़ा अहां दे मनां जो जांचदा ऐ, खुश करदा ऐ । 5 कजोकि तुहां जाणदे हन कि अहां ना तां कदी नुकताचीनियां दी गल्लां करदे थे, कने ना लालचे तांई भाना करदे थे, परमात्मं दे गवाह हन; 6 कने हलांकि अहां मसीह दे चले होणे दिया बजाह ते तुहां पर भार पाई सकदे थे, भिरी भी अहां लोकां ते आदर नी चाहंदे थे, कने ना तुहां ते, ना होर कुसी ते । 7 अपर जिआं मां अपणे बच्चेयां जो पाळदी पोसदी ऐ, तिआं ई अहां भी तुहां बीच रैई करी कोमलता दस्सी ऐ; 8 कने तिआं ई अहां तुहां दी लालसा करदे होये, ना सिर्फ परमात्मं दा सुसमाचार पर अपणी अपणी जात्र भी तुहां जो दैणे जो त्यार थे, इसतांई कि तुहां अहां दे प्यारे होई गैयो थे ।

9 कजोकि, हे भाऊओ, तुहां म्हारी मेहनत कने दुखां जो याद रखदे हन; कि अहां इसतांई रात दिन कम्म धंधा करदे होये तुहां च परमात्मं दा सुसमाचार प्रचार किता कि तुहां च कुस पर भी भार ना होन । 10 तुहां अप्पु ई गवाह हन, कने परमात्मां भी गवाह ऐ कि तुहां वसुआसियां दे बीच अहां दा वर्ताव कदेया पवित्र कने धार्मिक कने वेकसूर रैहआ । 11 तुहां जाणदे हन कि जिआं पिता अपणे जागतां नै वर्ताव करदा ऐ तिआं ई अहां भी तुहां च हर इक्की जो शिक्षा दिंदे, कने शांति दिंदे, कने समझादे थे । 12 कि तुहां दा चाल चलण परमात्मं लायक होया, जेहड़ा तुहां जो अपणे राजे च कने महिमा च सदादा ऐ ।

13 इसताई अहां भी परमात्मं दे धन्यावाद हमेशा करदे हन कि जाहू म्हारिया बजाह ते परमात्मं दे सुसमाचारे दा वचन तुहां अल्ल पुज्या, तां तुहां तिसियो माणुआं दा नी अपर परमात्मं दा वचन समझी नैं (कने सचमुच एह ऐदेया ई ऐ) स्वकार किता; कने सैह तुहां वसुआसियां च जेहडे वसुआस रखदे हन, प्रभावशाली ऐ । 14 इसताई कि तुहां हे भाऊओ, परमात्मं दी तिन्हां कलेसियां साइआं चाल चलणां लम्गे जेहडियां यहूदिया च मसीह यीशु च हन, कजोकि तुहां भी अपने लोकां ते तिआं ई दुख झेलया जिआं तिन्हां यहूदियां च पाया था । 15 जिन्हां प्रभु यीशु जो कने भविष्यवक्तां जो भी मारी दिता कने अहां जो सताया, कने परमात्मां तिन्हां ते खुश नी; कने सैह सारे माणुआं दा विरोध करदे हन, 16 कने सैह गैर - यहूदियां नैं तिन्हां दे उद्दारे ताई गल्लां करणे ते अहां जो रोकदे हन कि सदा अपने पापां दा घडा भरदे हन, अपर तिन्हां पर परमात्मं दा प्रकोप आई पैआ ऐ ।

कलेसिया नैं मिलणे दी इच्छा

17 हे भाऊओ, जाहू अहां थोड़ी देर ताई मने च नी अपर प्रकट च तुहां ते लग्न होई गैयो थे, तां अहां बड़ी लालसा सौगी तुहां दा मुँ दिखणे ताई बड़ी कोशश किती । 18 इसताई अहां (मतलब मिन्जो पौलुसे) इक्क बरी नी अपर दो बरी तुहां अल्ल ओणां चाया, अपर सैताने अहां जो रोकी रखया । 19 भला म्हारी आशा या खुशिया या बढ़ाई दा मुक्त क्या ऐ? क्या अहां दे प्रभु यीशु दे सामणे तिसदे ओणे दे बग्त तुहां नी होंगे? 20 म्हारी बड़ाई कने खुशी तुहां ई हन ।

तीमुथियुस जो घल्लणां

3 इसताई जाहू अहां ते होर नी रैई होया, तां अहां एह सोचेया कि एर्थेस च किल्ले रैई जान; 2 कने अहां तीमुथियुसे जो, जेहडा मसीह दे सुसमाचारे च अहां दा भाऊ कने परमात्मं दा सेवक ऐ, इसताई घल्लया कि सैह तुहां जो पक्का करें कने तुहां दे वसुआसे दे बारे च तुहां जो समझा, 3 कि कोई इन्हां क्लेशां दिया बजाह ते उगमगाई नी जां । कजोकि तुहां अप्पु जाणदे हन कि अहां इन्हां ताई ठेहराये हन । 4 कजोकि पैहले ई, जाहू अहां तुहां अल्ल थे तां तुहां ग्लां दे थे कि अहां जो क्लेश झेलणे पोणे कने इआं ई होया ऐ, जिआं कि तुहां जाणदे भी हन । 5 इसा बजाह ते जाहू मिन्जो ते होर नी रैई होया तां तुहां दे वसुआसे दा हाल जाणने ताई घल्लया, कि कुत्की इआं ना होयें कि परीक्षा करणेआळे तुहां दी परीक्षा किती होयें, कने म्हारी मेहणत बेकार होई गैई होयें ।

तीमुथियुसे दिया बजाह ते समाचार मिलणां

6 अपर हुण तीमुथियुसे, जेहडा तुहां अल्ले ते अहां अल्ल आई करी, तुहां दा वसुआस कने प्यार दा सुसमाचार सणाया कने इसा गल्ला जो भी सणाया कि तुहां सदा प्यार नैं अहां जो याद करदे हन, कने अहां दे दिखणे दी लालसा रखदे हन, जिआं अहां भी तुहां जो दिखणे दी । 7 इसताई हे भाऊओ, अहां अपने सारे दुख कने क्लेश च तुहां दे वसुआसे ते तुहां दे बारे च शांति पाई । 8 कजोकि हुण जे तुहां प्रभु च पक्के रैह तां अहां जिं दे हन । 9 कने जितणी खुशी अहां जो तुहां दिया बजाह ते अपने परमात्मं सामणे ऐ, तिसदे बदले तुहां दे बारे च अहां कुस तरीके नैं परमात्मं दा धन्यावाद करन? 10 अहां रात दिन बड़ी प्रार्थना करदे रैहदे हन कि तुहां दा मुँ दिखन कने तुहां दे वसुआसे दी कमी पूरी करन ।

11 हुण अहां दा परमात्मां कने पिता अप्पु ई कने अहां दा प्रभु यीशु, तुहां अल्ल ओणे च म्हारी अगुवाई करें; 12 कने प्रभु इआं करें कि जिआं अहां तुहां नैं प्यार रखदे हन, तिआं ई तुहां दा प्यार भी अप्पु च कने सारे माणुआं सौगी बधधा जां, कने उन्नति करदा जां, 13 तांकि सैह तुहां दे मनां जो इन्हां पक्का करें कि जाहू अहां दा प्रभु यीशु अपने सब पवित्र लोकां सौगी ओयें, तां सैह अहां दे परमात्मं कने पिता दे सामणे पवित्रता च बेकसूर ठेहरें ।

जिन्दगिया ते परमात्मं जो खुश करा

4 इसताई हे भाऊओ, अहां तुहां नैं विणती करदे हन कने तुहां जो प्रभु यीशु च समझां दे हन कि जिआं तुहां अहां ते काबल चाल चलणां कने परमात्मं जो खुश करणां सिखया ऐ, कने जिआं तुहां चलदे भी हन, तिआं ई

होर भी बधदे जा । 2 कजोकि तुहां जाणदे हन कि अहां प्रभु यीशु दे पाससे ते तुहां जो कुण कुण देहया हुकम दिता । 3 कजोकि परमात्मं दी इच्छा एह ऐ कि तुहां पवित्र बणां व्यभिचार ते बची रैहआ, 4 कने तुहां च हर इक्क माणु पवित्रता कने आदरे नैं अपणियां लाडियां जो हासल करणां जाणन, 5 कने एह कम्म इच्छा ते नी, कने ना तिन्हां जातिआं साइआं जेहडियां परमात्मं जो नी जाणदियां, 6 कि इसा गल्ला च कोई अपने भाऊये जो ना ठगें, कने ना तिस पर दांव चलां, कजोकि प्रभु इन्हां सारियां गल्लां दा बदला लैणे आळा ऐ; जिआं कि अहां पैहले ई तुहां नैं ग्लया दस्सया भी था । 7 कजोकि परमात्मं अहां जो अशुद्ध होणे ताई नी, अपर पवित्र होणे ताई सदेया ऐ । 8 इसा बजाह ते जेहडा इसियो घटिया समझदा ऐ, सैह माणुये जो नी अपर परमात्मं जो घटिया समझदा ऐ, जेहडा अपनां पवित्र आत्मां तुहां जो दिंदा ऐ ।

9 अपर भाई चारे दे प्यारे दे बारे च एह जरूरत नी ऐ कि मैं कुच्छ लिखें, कजोकि अप्पु च प्यार रखणां तुहां अप्पु ई परमात्मं ते सिखया ऐ, 10 कने सारे मकिदुनिया दे सारे भाऊआं सौगी इआं भी करदे हन । अपर हे भाऊओ, अहां तुहां जो समझां दे हन कि होर भी बधदे जा, 11 कने जिआं अहां तुहां जो हुकम दित्या ऐ, तिआं ई चुप चाप रैहणे कने अपनां अपनां कम्म कार करणे कने अपने अपने हत्थां नैं कमाणे दी कोशश करा; 12 कि बाहरआळ्यां नैं माणुआं साइआं वर्ताव करा, कने तुहां जो कुसा भी चीजा दी कमी ना होयें ।

यीशु मसीह दा दुवारा जिंदा होणां

13 हे भाऊओ, अहां नी चाहदे कि तुहां तिन्हां दे बारे च जेहडे सोंदे हन, अनजान रैहआ; इआं ना होयें कि तुहां दूयेयां साइआं शोक करन जिन्हां जो कि आशा नी ऐ । 14 कजोकि अहां जे वसुआस करदे हन कि यीशु मरेया कने जिंदा भी होया, तां तिआं ई परमात्मं तिन्हां जो भी जेहडे यीशु च सोई गैयो हन, तिस सौगी लैई ओंगा । 15 कजोकि अहां प्रभु दे वचने मताबक तुहां नैं एह ग्लां दे हन कि अहां जेहडे जिं दे हन कने प्रभु दे ओणे तिकर बची रैहणे, सुतेयां ते कदी गांह नी बधगे । 16 कजोकि प्रभु अप्पु ई सुअर्गे ते लौंगा; कने तिस बत ललकार, कने प्रधान दूते दा शब्द सणाई दिगा, कने परमात्मं दी तुरही बजगी; कने जेहडे मसीह च मरेयो हन, सैह पैहले जिं दे होंगे । 17 ताहू अहां जेहडे जिं दे कने बची रैहणे, तिन्हां सौगी बदळां पर चुकी लैणे हन कि हौआ च प्रभुये नैं मिलन; कने इन्हीं साहमें अहां सदा प्रभुये सौगी रैहणे । 18 इस तरांह इन्हां गल्लां ते इक्की दूये जो शान्ति दैआ करा ।

दुवारा जिंदा होणे ताई त्यार रैहणां

5 अपर हे भाऊओ, इसदी कोई जरूरत नी कि बगतां कने कालां दे बारे तुहां अल्ल कुच्छ लिख्या जां । 2 कजोकि तुहां अप्पु च ठीक ठाक जाणदे हन कि जिआं राती चोर ओंदा ऐ, तिआं ई प्रभु दा दिन ओणेआळा ऐ । 3 जाहू लोक ग्लां, कि सब कुच्छ ठीक ठाक ऐ" कने कुच्छ डर नी," तां तिन्हां पर अचानक विनाश आई पोंगा, जिआं इक्क लैरथिया जणांसा जो इक्क बच्चे जम्णे पीड होंदी; कने तिन्हां कुसी भी तरीके नैं नी बचणां । 4 अपर हे भाऊओ, तुहां तां नैहरे च नी हन कि सैह दिन तुहां पर चोरे साइआं आई पोंयें । 5 कजोकि तुहां सारे जोतिया दी औलाद कने दिन दी औलाद हन, अहां ना राती दे ना नैहरे दे हन । 6 इसताई अहां जो दूयेयां साइआं सोई नी रैह, जागदे कने चुकनै रैह । 7 कजोकि जेहडे सोंदे हन, सैह रातियो सोंदे हन, कने जेहडे नशे च मतवाले होंदे हन, सैह रातियो मतवाले होंदे हन । 8 अपर अहां जेहडे दिन दे हन, वसुआसे दी कने प्यारे दी झिलम पैहनी नैं कने उद्दारे दी आशा दा टोप पैहनी करी चुकनै रैहआ । 9 कजोकि परमात्मं अहां जो गुस्से ताई नी, अपर इसताई चुणेया ऐ कि अहां अपने प्रभु यीशु मसीह दिया बजाह ते उद्दार हासल करन । 10 यीशु मसीह अहां ताई इसा बजाह ते मरेया कि अहां चाहे जागदे हन चाहे सोंदे हन, सब मिली नैं तिस सौगी जीन । 11 इसा बजाह ते इक्की दूये जो शांति दैआ कने इक्की दूये दी तरक्की दी बजाह बणां, जिआं कि तुहां भी करदे हन ।

कलेसिया जो शिक्षा

12 हे भाऊओ, अहां तुहां नैं विणती करदे हन कि जेहडे तुहां च मेहणत करदे हन, कने प्रभु च जेहडे तुहां दे अगुवे हन, कने शिक्षा दिंदे हन, तिन्हां दा आदर करा । 13 कने तिन्हां दे कम्मां दिया बजाह ते प्यारे नैं तिन्हां जो बड़ा ई

आदर मान दैणे जोग्गा समझा । कने अप्पु च मेल मिलाप करी नैं रहैआ ।
 14 हे भाऊओ, अहां तुहां जो समझां दे हन कि जेहड़े ठीक चाल नी चलदे
 तिन्हां जो समझा, डरफोकां जो हिम्मत दैआ, कमजोरां जो सम्भाला, सबना
 जो सेहणशीलता दस्सा । 15 चुकनैं रहैआ कोई कुसी नैं बुराईया दे बदले
 बुराई ना करें, अपर सदा भलाई करणे जो तयार रहैआ, अप्पु च कने सबना
 नैं भलाईया दी कोशश करा । 16 सदा खुश रहैआ । 17 प्रार्थना करणां कदी
 मत छड्डा । 18 हर गल्ला च परमात्मैं दा धन्यावाद करा; कजोकि तुहां तांई
 मसीह यीशु च परमात्मैं दी ऐही इच्छा ऐ । 19 पवित्र आत्मां जो ठंडा मत होणां
 दिंदे । 20 भविष्यवाणियां जो घटिया मत समझा । 21 सारियां गल्लां जो परखा;
 जेहिडयां छैल हन तिन्हां गल्लां जो पकड़ी रखा । 22 कने हर तरांह दी बुराईया
 ते बचा ।

आशीर्वाद

23 शांति दा परमात्मां अप्पु ई तुहां जो पूरे तरीके नैं पवित्र करें; कने तुहां दी
 आत्मां कने जान्न कने शरीर अहां दे प्रभु यीशु मसीह दे ओणे तिकर पूरे पूरे
 कने वेकसूर ठीक ठाक रहैं । 24 तुहां जो सदणेआळा सच्चा ऐ, कने सैह इआं
 ई करगा ।

25 हे भाऊओ, अहां तांई प्रार्थना करा ।

26 सब भाऊआं जो पवित्र पुक्के नैं नमस्कार करा ।

27 में तुहां जो प्रभु दी कसम दिंदा ऐ, कि एह चीड़ी सारे भाऊआं जो पढ़ी नैं
 सणाई जां ।

28 अहां दे प्रभु यीशु मसीह दा अनुग्रह हुंदा रहैं ।

2 थिस्सलुनीकियों

भूमिका

मसीह दे दुआरा ओणे दे सम्बन्धित उलझना दिया बजाह ते थिस्सलुनीकियों दी कलेसिया च गड़बड़ी दी हालत बणी होई ऐ। थिस्सलुनीकियों दे नांये पर पौलुस चले दी दूई पत्री इसा धारणां पर कि प्रभु दे ओणे दे दिन पैहले ई आई चुकेया ऐ, विचार करणे तांई लिखियो ऐ। पौलुस एह दरसदे होये इसा धारणां जो सुधारदा ऐ कि मसीह दे ओणे ते पैहले दुष्टता कने बुराई अपणी चरम सीमा पर होणी। एह इक्क रहस्यमाय शासक दी अधीनता च होणां जिसियो "पापे दा मर्द मतलब विनाशे दा पुत्तर: ग्लाया ऐ, जेहड़ा मसीह दा विरोध करगा।

चले ऐत्थू इस जरूरत पर जोर दिंदा ऐ कि सारे दुखां कने कष्टां दे होंदे होये भी तिसदे पाठकां जो अपणे वसुआसे च पक्के बणी रहैणां चाइदा, अपणी रोजी रोटी तांई कम्म करदे रहैणां चाइदा जिआं कि पौलुस कने तिसदे साथी करदे थे, तथा भलाई करणे च लगीं रहैणां चाइदा।

रूप रेखा

भूमिका 1: 1, 2

स्तुति कने तारीफ 1: 3- 12

मसीह दे ओणे दे सम्बन्धित शिक्षा 2: 3-12

मसीही आचार - व्यवहार सम्बन्धी उपदेश 3: 1- 15

उपसंहार 3: 16 -18

नमस्कार

1 पौलुस कने सिलवानुस कने तीमुथियुस दे पास्से ते थिस्सलुनीकियों दी कलेसिया दे नां, जेहड़े अहां दे पिता परमात्मं कने प्रभु यीशु मसीह च हन :

2 अहां दे पिता परमात्मं ते कने प्रभु यीशु मसीह ते तुहां जो अनुग्रह कने शांति मिलदी रहै।

न्याय दा दिन

3 हे मेरे भाऊओ तुहां दे बारे च अहां जो हर बग्त परमात्मं दा धन्यावाद करणां चाइदा, कने एह ठीक भी ऐ, इसतांई कि तुहां दा वसुआस बड़ा जादा बधी गैया ऐ, कने तुहां सारेयां दा प्यार अप्पु च बड़ा ई बधदा जा करदा ऐ।

4 ऐत्थू तिकर कि अहां अप्पु परमात्मं दी कलेसिया च तुहां दे बारे च कर्मंड करदे हन कि जितणे सताव कने क्लेश तुहां सेहंदे हन, तिन्हां सारेयां च तुहां दा धीरज कने वसुआस प्रकट हुंदा ऐ।

5 एह परमात्मं दे सबे न्याय दा साफ प्रमाण ऐ कि तुहां परमात्मं दे राजे जोगा ठेहरा, जिस दे तांई तुहां दुख भी झेलदे हन। 6 कजोकि परमात्मं दे नैडें एह न्याय ऐ कि जेहड़े तुहां जो क्लेश दिंदे हन, तिन्हां जो बदले च क्लेश दें। 7 कने तुहां जो, जेहड़े क्लेश झेलदे हन, अहां सौगी चैन दें; तिस बग्त जाहू कि प्रभु यीशु अपणे सामर्थी दूतां सौगी, भखियो अग्गी च सुअर्गे ते प्रकट हुंगा, 8 कने जेहड़े परमात्मं जो नी पणछैणदे कने अहां दे प्रभु यीशु दे सुसमाचार जो नी मनदे तिन्हां नैं बदला लैगा। 9 सैह प्रभु दे सामणे ते कने तिसदिया शक्तिया दे तेजे ते दूर होई नैं सदा दे विनाश दी सज्जा पांगे। 10 एह तिस दिन हुंगा, जाहू सैह अपणे पवित्र लोकां च महिमा पाणे कने सारे वसुआस करणेआळियां च आश्चर्य दी बजाह होणे जो ओंगा; कजोकि तुहां म्हारिया गवाहिया पर वसुआस किता। 11 इसतांई अहां सदा तुहां तांई प्रार्थना भी करदे हन कि अहां दा परमात्मां तुहां जो इसा बुलाहटा जोगा समझे, कने भलाई दी हर इक्क इच्छा कने वसुआसे दे हर इक्की कम्मं जो सामर्थी सौगी पूरा करें, 12 तांकि अहां दे परमात्मं कने प्रभु यीशु मसीह दे अनुग्रह दे मताबक अहां दे प्रभु यीशु दा नां तुहां च माहिमा पां, कने तुहां तिस च।

पाप दा मरद मतलब विनाश दा पुत्तर

2 हे भाऊओ, हुण अहां अपणे प्रभु यीशु मसीह दे ओणे, कने तिसदे बक्खे अपणे किट्टे होणे दे बारे च तुहां नैं विणती करदे हन 2 कि कुसी

आत्मां, या वचन, या चिट्ठी दिया बजाह ते, जेहड़ी कि मना अहां दे पास्से ते होयें, एह समझी नैं कि प्रभु दा दिन आई पुज्या ऐ; तुहां दा मन अचानक उग मगाई नी जां कने तुहां घबराई मत जा। 3 कुसी भी तरीके नैं कुसी दे धोखे च नी ओणां, कजोकि सैह दिन ताहू तिकर नी ओणा जाहू तिकर पवित्रता दा त्याग नी होई जां, कने सैह पापे दा मरद मतलब विनाशे दा पुत्तर पैदा होई नी जां। 4 जेहड़ा विरोध करदा ऐ, कने हर इक्की ते जेहड़ा परमात्मां या पूज्य केहलांदा ऐ, अपणे आप्पे जो बड़ा ठेहरांदा ऐ, ऐत्थू तिकर कि सैह परमात्मं दे मंदरे च बैई नैं अपणे आप्पे जो परमात्मां ठेहरांदा ऐ। 5 क्या तुहां जो याद नी कि जाहू मैं तुहां दे ऐत्थू था, तां तुहां नैं एह गलां ग्लादा था? 6 तुहां तिसा चीज्जा जो जाणदे हन, जेहड़ी तिसियो रोका करदी ऐ कि सैह अपणे बगते च प्रकट होयें। 7 कजोकि म्हारी शिक्षा ना तां भ्रम ते ऐ कने ना तां अशुद्धता ते, कने ना तां छले सौगी ऐ; 8 ताहू सैह अधर्मी प्रकट हुंगा, जिसियो प्रभु यीशु अपणे मुँ दी फुका नैं मारी दिंगा, कने अपणे ओणे दे तेजे नैं भस्म करगा। 9 तिस अधर्मिये दा ओणा सैताने दे कम्मे मताबक सारी तरांह झूठी सामर्थ, कने नशाण, कने अद्भुत कम्मा सौगी, 10 कने नाश होणेआळे तांई अधर्म दे सब तरांह दे धोखे सौगी हुंगा; कजोकि तिन्हां सचाईया नैं प्यार नी किता जिसते तिन्हां दा उद्धार हुदा। 11 इसा बजाह ते परमात्मं तिन्हां च इक्क भटकाई देणेआळी सामर्थी जो घल्ला कि सैह झूठ दी प्रतीति करन, 12 तांकि जितणे लोक सचाईया दी प्रतीत नी करदे, अपर अधर्म नैं खुश होंदे हन, सैह सारे सज्जा पान।

मजबूत बणी रहैआ

13 हे भाऊओ, कने प्रभु दे प्यारे लोको, चाइदा कि अहां तुहां दे बारे च सदा परमात्मं दा धन्यावाद करदे रहै, कजोकि परमात्मं शुरु ते तुहां जो चुणी लैआ कि आत्मां दिया बजाह ते पवित्र बणी करी, कने सचाईया दी प्रतीति करी नैं उद्धार पा, 14 जिस तांई तिन्हीं तुहां जो अहां दे सुसमाचारे दिया बजाह ते सदेया, कि तुहां अहां दे प्रभु यीशु मसीह दी महिमा जो हासल करी लैन। 15 इसतांई हे भाऊओ, पक्के रहैआ; कने जेहड़ियां जेहड़ियां गलां तुहां चा वचने दिया या चिट्ठिया दिया बजाह अहां ते सिखियां हन, तिन्हां जो पकड़ी करी रखा।

16 अहां दा प्रभु यीशु मसीह अप्पु ई, कने अहां दे पिता परमात्मं, जिन्हीं अहां नैं प्यार रख्या कने अनुग्रह ते सदा दी शांति कने उत्तम आशा दिती ऐ, 17 तुहां दे मनां जो शान्ति दें कने तुहां जो हर इक्की खरे कम्मे च कने वचने च पक्का करें।

प्रार्थना करणे दी विणती

3 आखरी च हे मेरे भाऊओ, अहां तांई प्रार्थना करा करा कि प्रभु दा वचन इआं तौळी फैली जां कने महिमा पां, जिआं तुहां च होया, 2 कने अहां टेढे कने बुरे माणुआं ते बची रैह कजोकि हर इक्की च वसुआस नी ।

3 अपर प्रभु सच्चा ऐ; सैह तुहां जो मजबूतिया नैं पक्का करगा कने तिस दुष्टे ते सम्भाली करी रखगा । 4 कने अहां जो प्रभु च तुहां पर भरोसा ऐ कि जेह्दे जेह्दे हुकम अहां तुहां जो दिंदे हन, तिन्हें जो तुहां मनदे हन, कने मनदे भी रैहो । 5 परमात्में दे प्यारे दे कने मसीह दे धीरजे दे पास्से प्रभु तुहां दे मने दी अगुवाई करें ।

कम्म करणे दी जिम्मेवारी

6 जे भाऊओ, अहां तुहां जो अपने प्रभु यीशु मसीह दे नांये ते हुकम दिंदे हन कि तुहां हर इक्क ऐदेय भाऊये ते लग्न रैह्आ, जेह्दा बुरी चाल चलदा कने जेह्दी शिक्षा तिन्हीं अहां ते पाई तिसा दे मताबक कम्म नी करदा ऐ । 7 कजोकि तुहां अप्पु जाणदे हन कि कुस तरीके नैं अहां साइआं चाल चलणी चाइदी, कजोकि अहां तुहां च बुरी चाल नी चले, 8 कने कुस दी रोटी मुफ्त नी

खादी, अपर मेहनत कने कष्टे नैं रात दिन कम्म धंधा करदे थे कि तुहां च कुस पर भार ना बणन । 9 एह नी कि अहां जो हक्क नी, अपर इसतांई कि अपने आप्पे जो तुहां तांई आदर्श बणांन कि तुहां अहां साइआं चाल चला । 10 कजोकि जाहू तुहां अहां अल्ल थे, ताहू भी एह हुकम तुहां जो दिंदे थे कि जे कोई कम्म करणा नी चां तां खाई भी नी पां । 11 अहां सुणदे हन कि कुच्छ लोक तुहां बीच बुरी चाल चलदे हन, कने कुच्छ कम्म नी करदे अपर दूयेयां दे कम्मा च हत्थ पांदे हन । 12 ऐदेयां जो अहां प्रभु यीशु मसीह च हुकम दिंदे कने समझांदे हन कि चुपचाप कम्म करी नैं अपनी ई रोटी खा करा । 13 तुहां, हे भाऊओ, भलाई करणे च हिम्मत मत छड्डा ।

14 जे कोई म्हारी इसा चिड्डिया दी गल्ला जो नी मन्ने तां तिस पर नजर रखा, कने तिसदी संगति मत करा, जिसते सैह शर्मिदा होन । 15 भिरी भी तिसियो बेरी मत समझा, कि भाऊ जाणी नैं चतौनी देआ ।

16 हुण प्रभु जेह्दा शांति दा सोता ऐ अप्पु ई तुहां जो सदा दी कने हर तरांही दी शांति दें । प्रभु तुहां सबना सौगी रैह ।

17 में, पौलुस, अपने हत्थां नैं नमस्कार लिखदा ऐ । हर चिड्डिया च मेरा ऐही नशाण ऐ; में इस तरांही नैं लिखदा ऐ । 18 अहां दे प्रभु यीशु मसीह दा अनुग्रह तुहां सबना पर हुंदा रैह ।

1 तीमुथियुस

भूमिका

तीमुथियुस इक्क नौ जुआन मसीही था, जेहड़ा एशिया माइनर दा रहणे आळा, कने यहूदिन माँ कने यूनानी बुडे दा जागत था। सैह पौलुस दे प्रचार कम्मे च तिसदा साथी कने सहायक बणी गैआ था। तीमुथियुस दे नांये पर पौलुस चले दी पैहली पत्री त्रे खास गल्लां पर विचार करणे ताई लिखियो थी। सबते पैहलें, एह पत्री कलेसिया च झूठी शिक्षा दे वरखलाफ इक्क चतौनी ऐ। सैह शिक्षा, जेहड़ी कि यहूदी कने गैर - यहूदी विचारां डा मिश्रण थी, इसा धारणां पर आधारित थी कि भौतिक संसार ई बुरा ऐ कने इक्क माणु विशेष गुप्त ज्ञान तथा कुच्छ रीति - रिवाजां, जिआं कि कुच्छ खाणे आळी चीजां नी खाणां कने व्याह नी करणां बगैरा बगैरा, दा पालण दिया बजाह ते उद्धार हासल होई सकदा ऐ। इसा पत्रिया च कलेसिया दे प्रबन्ध कने आराधना सम्बन्धी निर्देश भी हन, कने ई तिस चरित्र दा वखान भी ऐ जेहड़ी कलेसिया दे अगुआं कने सहायकां ताई जरूरी ऐ। अन्त च, तीमुथियुस जो एह सलाह दित्ती कि सैह किआं यीशु मसीह दा अच्छा दास बणी सकदा ऐ, तथा हर तरांह दे वसुआसी समूहां दे प्रति तिसदी क्या - क्या जिम्मेवारियां हन।

रूप रेखा

भूमिका 1: 1, 2

कलेसिया कने तिसदे अगुआं ते सम्बन्धित निर्देश 1: 3 --- 3: 16

तीमुथियुस जो तिसदे कम्मां सम्बन्धी निर्देश 4: 1 --- 6: 21

नमस्कार

1 पौलुस दे पास्से ते, जेहड़ा अहां दे उद्धार करणे आळे परमात्में कने म्हारी आशा मसीह यीशु दे हुक्मे ते यीशु दा चेला ऐ, 2 तीमुथियुस दे नांये ते जेहड़ा वसुआसे च मेरा सच्चा पुत्र ऐ, पिता परमात्में कने अहां दे प्रभु यीशु मसीह ते तिजो अनुग्रह, दया कने शांति मिलदी रँह।

झूठे शिक्षकां दे वरखलाफ चतौनी

3 जिआं मैं तिजो मकिदुनिया जो जांदे बग्त समझाया था, कि इफिसुस च रँहैं नैं कुच्छ लोकां जो हुक्म दे कि होर तरांह दी शिक्षा मत दैआ। 4 कने तिन्हां काहणियां कने अनन्त वंशावलियां पर मन मत लग्गा, जिन्हां ते विवाद होंदे हन, कने परमात्में दे तिस इंतजामें मताबक नी, जेहड़ा वसुआसे पर टिकेया ऐ, तिआं भिरी ग्लांदा। 5 कुल मलाई करी हुक्मे दा नचोड एह ऐ कि खरे मने कने खरिया अक्का, कने बिना कपटे दे वसुआसे नैं प्यार पैदा हो। 6 इन्हां जो छड्डी नैं कितणे लोक बकवाद दे पास्से फिरी गैयो हन। 7 सैह व्यवस्था दे विधान दे गुरु तां बणना चाहंदे हन, अपर जेहड़ा कुच्छ सैह ग्ला दे हन या जिन्हां गल्लां पर सैह बड़ा जोर दै दे हन तिन्हां जो सैह समझदे भी नी हन। 8 अपर अहां जाणदे हन कि जे कोई व्यवस्था जो ठीक तरीके नैं कम्मे च लेयोयें तां सैह खरी ऐ। 9 एह जाणी नैं कि व्यवस्था पवित्र माणु ताई नी अपर वेवसुआसियां, निरंकुशां, भक्तिहीनां, पापियां, अपवित्र 10 व्यभिचारियां, समलिंग कामुकां, माणुआं जो बेचणे आळे, झूठ ग्लाणेआळ्यां, कने झूठी कसम खाणेआळे, ऐदेय ई होरनी कम्मां ताई हन, जेहड़े उतम शिक्षा दे वरखलाफ च हन। 11 ऐही परमप्रधान परमात्में दी महिमा दे तिस सुसमाचारे दे मताबक ऐ जेहड़ा मिन्जो सौंपया गैआ ऐ।

अनुग्रह ताई धन्यावाद

12 मैं अपणे प्रभु मसीह यीशु दा जिन्हीं मिन्जो सामर्थ दित्तियो ऐ, धन्यावाद करदा कि तिन्हीं मिन्जो वसुआसे जोगा समझी नैं अपणी सेवा ताई चुणेया। 13 मैं तां पैहले निंदा करणे आळा था; भिरी भी मिन्जो पर दया होई, कजोकि मैं वेवसुआसिये दी हालता च बिना सोची समझी नैं कम्म कित्तियो थे। 14 कने अहां दे प्रभु दा अनुग्रह, तिस वसुआसे कने प्यारे सौंगी जेहड़ा यीशु मसीह च ऐ मता सारा मिलेया ऐ। 15 एह गल्ल सच ऐ कने हर तरांह ते मनणे जोगा ऐ कि यीशु मसीह पापियां दा उद्धार करणे ताई संसारे च आया, जिन्हां च सारेयां ते बडा पापी मैं ऐ। 16 अपर मिन्जो पर इसताई दया होई

कि मिन्जो सारे ते बडे पापिये च यीशु मसीह अपणी सेहणशीलता दस्सें, कि जेहड़े लोक तिस पर सदा दी जिन्दगिया ताई वसुआस करणे तिन्हां ताई मैं इक्क आदर्श बणें। 17 हुण सदा काल दा राजा मतलब कि अविनाशी, अणदेरखी, इक्क मात्र परमात्में दा आदर कने महिमा जुगा जुग होंदी रँह। आमीन।

18 हे पुत्र तीमुथियुस, तिन्हां भविष्यवाणियां दे मताबक जेहड़ी पैहलें तेरे बारे च कित्तियो थी, मैं एह हुक्म दिंदा कि तू तिन्हां मताबक अच्छी लड़ाईयां जो लड़दा रँह, 19 कने वसुआस कने तिसा खरिया अक्का जो सम्भाली रख, जिसियो दूर करणे दिया बजाह ते कितणियां दा वसुआसे आळा चाहज डूबी गैआ। 20 तिन्हां च हुमिनयुस कने सिकन्दर हन, जिन्हां जो सैताने जो दैइ दित्या ऐ कि सैह परमात्में दी निंदा करणां नी सीखन।

आराधना बराबर निर्देश

2 हुण मैं सारेयां ते पैहलें एह शिक्षा दिंदा कि विणती, कने प्रार्थना, कने निवेदन, कने धन्यावाद सारे माणुआं ताई कित्ता जां। 2 राजेयां कने सब औंधे आळ्यां ताई कि अहां अरामे नैं कने चैना नैं कने सारी भक्ति कने गम्भीरता नैं जिन्दगी बितान। 3 सैह एह चाहंदा ऐ कि सारे माणुआं दा उद्धार होयें, कने सैह सचाईया जो पणछैणी लैन, 4 सैह एह चांदा ऐ कि सारे माणुआं दा उद्धार होयें, कने चांदा ऐ कि सैह सचाईया जो पणछैणी लैन, 5 कजोकि कि परमात्मां इक्को ई ऐ, कने परमात्में कने माणु दे बीच इक्को ई बचोला ऐ। मतलब कि यीशु मसीह जेहड़ा माणु ऐ। 6 जिन्हीं अपणे आप्पे जो सबना दे छुटकारे दे दामे च दैई दित्ता, कने तिसदी गवाही ठीक बगते पर दित्ती गैई ऐ। 7 मैं सच ग्लांदा, अपर झूठ नी ग्लांदा, कि मैं इसी मकसदे नैं मिन्जो इक्क प्रचारक कने गैर - यहूदियां ताई वसुआस कने सचाईया दा गुरु ठेहराया ऐ।

8 इसताई मैं सच ग्लांदा कि हर जगाह मरद बगैर गुस्सा कने विवाद कित्तियो पवित्र हत्थां जो उठाई नैं प्रार्थना करा करें। 9 इआं ई जणांस भी संकोच कने संयम सौंगी सुहावणे कपड़ेयां नैं अपणे आप्पे जो संवारे; ना बाळां दी गुतां, कने ना सोने कने मोतियां कने ना कीमती कपड़ेयां नैं, अपर खरे कम्मां नैं। 10 कजोकि परमात्में दी भक्ति करणे आळी जणांसा ताई एह जरूरी ऐ। 11 कने जणांसां जो चुप रँह करी पूरे शांत सभावे नैं सब कुच्छ सीखणां चाइदा। 12 कने मैं ग्लांदा कि जणांस ना शिक्षा दै कने ना मर्दे पर हुक्म चलां, अपर चुपचाप रँह। 13 कजोकि पैहलें आदम बणांया, भिरी हत्वा बणांईयो; 14 कने आदम भकाया नी गैआ, अपर जणांस बैहकावे च आई नैं अपराधिणी होई। 15 भिरी भी जणांस बच्चे जम्णे दिया बजाह उद्धार पांगी, जे सैह संयम सौंगी वसुआसे च, कने प्यारे च, कने पवित्रता च बणी रँह।

कलेसिया च अधिकारी (बिशप)

3 एह गल्ल सच ऐ कि जेहड़ा अधिकारी होणां चाहंदा ऐ, सैह खरे कम्मां दी इच्छा करता ऐ, 2 एह जरूरी ऐ कि अध्यक्ष वेकसूर, कने इक्की लाड़िया दा लाड़ा, संयम, सुशील, सभ्य, परौणेयां दा आदर करणेआळा, कने सखाणे च लाइक होयें । 3 पियकड़ या मारपीट करणेआळा ना होयें, अपर नर्म दिल होयें, कने ना लड़ने आळा होयें, कने ना पैसेयां दा लालची होयें । 4 अपणे परवारे दा खरा प्रबन्ध करता होयें, कने अपणे बाल बच्चेयां जो गम्भीर होई नैं कन्ट्रोलें च रखदा होयें । 5 जाहू कोई अपणे परवारे दा प्रबन्ध करणा नी जाणदा होयें, तां परमात्में दी कलेसिया दी रखवाली किआं करगा । 6 भिरी एह कि सैह नौआं नौआं चेला ना होयें, कुत्थी इआं ना होयें कि कमांड करी नैं सैताने दे फंदे च फंसी जां । 7 कने बाहर लोकां च भी तिसदा नां होयें इआं ना होयें कि बेइजत होई नैं सैताने दे फंदे च ना फंसी जां ।

कलेसिया च सेवक (डीकन)

8 तिआं ई सेवकां जो भी गम्भीर होणां चाइदा, दोरंगी, पियकड़ कने नीच कमाईया दे लालची ना होन । 9 अपर वसुआसे दे भेदे जो खरिया अक्का नैं बचाई करी रखें । 10 कने एह भी पैहलें परखे जान, ताहू जे वेकसूर निकळन तां सेवक दा कम्म करन । 11 इन्हीं साहभें जणांसा जो भी गम्भीर होणां चाइदा । दोष लगाणे आळी ना होयें, अपर होशियार कने सारियां गल्लां च वसुआसे जोग्यी होयें । 12 सेवक इक्की लाड़िया दे लाड़े होन कने बाल बच्चेयां कने अपणे परवारे दा अच्छा प्रबन्ध करणां जाणदे हन । 13 कजोकि जेहड़े सेवक दा कम्म अच्छी तरांह करी सकदे हन, सैह अपणे तांई खरी जगाह कने तिस पर वसुआसे च जेहड़ा मसीह यीशु पर ऐ, बड़ी हिम्मत हासल करदे हन ।

म्हान रहस्य

14 में तिजो अल्ल तौळी ओणे दी आशा रखणे पर भी एह गल्लां तिजो इसताई लिखदा ऐ, 15 कि जे मिन्जो ओणे च देर होई जां, तां तू समझी लैआ कि परमात्में दे घराने च जेहड़ा कि जिंदे परमात्में कलेसिया ऐ कने जेहड़ा सचाईया दा खम्भा कने नीई ऐ, किआं बर्ताव करणां चाइदा । 16 कने इस च शक नीये कि भक्ति दा भेद गम्भीर ऐ, मतलब,

सैह जेहड़ा शरीरे च प्रकट होया, आत्मां च धर्मी ठेहरया, सुअर्गदूतां जो दुस्सया, गैर - यहूदियां च तिसदा प्रचार होया, ससारे तिस पर वसुआस किता कने महिमा च ऊपर चुकी लैआ ।

झूठे शिक्षक

4 अपर आत्मां साफ ग्लांदा कि ओणेआळे बगतां च कितणे लोक भटकाणे आळियां आत्मां, कने दुष्टआत्मां दी शिक्षा पर मन लगाई नैं वसुआसे ते भटकी जांगे । 2 एह तिन्हां झूठे माणुआं दे कपटे दिया बजाह ते हुंगा, जिन्हां दा विवेक मना तपदे लोहे नैं दागी दित्या ऐ । 3 जेहड़े व्याह करणे ते रोकगे, कने खाणे दी कुच्छ चीजां ते दूर रहणे दा हुकम दिंगे, जिन्हां जो परमात्में इसताई बणाया कि वसुआसी कने सचाईया जो जाणने आळे तिन्हां जो धन्यावाद सौगी खान । 4 कजोकि परमात्में दी बणाईयो हर इक्क चीज छैल ऐ, होर कोई भी चीज छडणे जोग्यी नी ऐ; अपर एह 5 कजोकि परमात्में दे वचने नैं कने प्रार्थना दिया बजाह ते शुद्ध होई जांदी ऐ ।

यीशु मसीह दा खरा सेवक

6 जे तुहां भाऊआं जो इन्हां गल्लां दी याद दिलांदे रेंहगे, तां मसीह यीशु दा अच्छा सेवक ठेहरगा; कने वसुआस कने तिसा अच्छी शिक्षा दियां गल्लां ते, जेहड़ी तू मनदा आया ऐ, तेरा पालण पोषण हुंदा रेंहगा । 7 अपर बुरी कने स्याणेयां दी काहणियां ते दूर रह्ये; कने भक्ति दी साधना कर । 8 कजोकि शरीरे दी साधना ते घट फायदा हुंदा ऐ, अपर भक्ति सारियां गल्लां तांई फायदेमंद ऐ, कजोकि इस बगते दी कने ओणेआळी जिन्दगिया दी भी प्रतिज्ञा इसताई ऐ । 9 एह गल्ल सच ऐ कने हर तरांह ते मनणे जोग्यी ऐ । 10 कजोकि अहां मेहनत कने कोशश इसताई करदे हन कि म्हारी आशा तिस जिंदे

परमात्में पर ऐ, जेहड़ा सारे माणुआं दा कने खास करी नैं वसुआसियां दा उद्धार कर्ता ऐ ।

11 इन्हां गल्लां दा हुकम दे कने सखांदा रेंह । 12 कोई तेरी जुआनी जो घटिया ना समझी पा, अपर वचन, कने चाल चलन, कने प्यार, कने वसुआस, कने पवित्रता च वसुआसियां तांई आदर्श बणी जां । 13 जाहू तिकर में नी ओयें, ताहू तिकर पढ़णे कने शिक्षा देंगे कने सखाणे च मन लगाई नैं लगी रह्ये । 14 तिस वरदाने दे प्रति जेहड़ा तिजो च ऐ, कने भविष्यवाणी दिया बजाह ते स्याणेयां दे हत्थ रखदे बगत तिजो मिलेया था, निश्चित मत रह्ये । 15 इन्हां गल्लां जो सोचदा रेंह कने इन्हां ई च अपणां ध्यान लगाई रख, तांकि तेरी तरक्की सबना पर प्रकट होयें । 16 अपणी कने अपणी शिक्षा दी चौकसी रख । इन्हां गल्लां पर टिकी रह्ये, कजोकि जे इआं करदा रेंहगा तां तू अपणे कने अपणे सुणनेआळियां तांई भी उद्धार दे बजाह हुंगा ।

वसुआसियां दे प्रति जिम्मेवारियां

5 कुसी भी बूढे जो मत झिड़का, अपर तिसियो बुड़ा समझी नैं समझाई दैआ, कने जुआनां जो भाऊ समझी नैं; 2 बुढिया जणांसां जो मां समझी नैं; कने जुआन जणांसां जो पूरी पवित्रता नैं बैहण समझी नैं समझाई दैआ ।

3 तिन्हां विधवाआं दा, जेहड़ियां सचमुच विधवा हन, आदर करा । 4 अपर जे कुसी विधवा दे बच्चे या नाती पोते होन, तां सैह पैहलें अपणे ई परवारे सौगी भक्तिया दा बर्ताव करे, कने माऊ बुडे जो तिन्हां दा हक्क देंगां सीखन, कजोकि एह परमात्में जो भांदा ऐ । 5 जेहड़ी जणांसां सचमुच विधवा ऐ, जिसदा ध्यान रखणेआळा कोई नी ऐ, सैह परमात्में पर आशा रखदी ऐ, कने रात दिन विणती कने प्रार्थना च लगी रेंहदी ऐ । 6 अपर जेहड़ी भोग विलासे च पैई गैई, सैह जिंदे जी मरी गैई ऐ । 7 इन्हां गल्लां दा भी हुकम दैआ कर तांकि सैह बेकसूर रह्ये । 8 अपर जे कोई अपणेयां दी कने खास करी नैं अपणे परवारे दी चिंता ना करे, तां सैह वसुआसे ते मुकरी गैआ ऐ कने वेवसुआसिये ते भी बुरा बणी गैआ ऐ ।

9 तिसा विधवा दा नां लिख्यां जां जेहड़ी सठ साल ते घट ना होयें, कने इक्की लाड़े दी लाड़ी रेंई होयें, 10 कने खरे कम्मां करणे च तिसा दा नां होयें, जिन्हे बच्चेयां दा पालण पोषण किता होयें, परौणेयां दी सेवा किती होयें, पवित्र लोकां दे पैर धोते होन, दुखियां दी मदद किती होयें, कने हर इक्की खरे कम्में च मन लगाया होयें । 11 अपर जुआन विधवाओं दा नां मत लिखणा, कजोकि जाहू सैह मसीह दा विरोध करी नैं सुख विलासे च पैई जांदी ऐ तां व्याह करणां चांदी ऐ, 12 कने दोषी ठेहरांदी ऐ, कजोकि तिन्हे अपणे पैहले वसुआसे जो छड्डी दित्या ऐ । 13 अपर जुआन विधवाओं दा नां मत लिखणां, कजोकि जाहू सैह मसीह दा विरोध करी नैं सुख विलासे च पैई जांदी ऐ तां व्याह करणां चाहंदी ऐ, 14 इसताई में चाहंदा कि जुआन विधवा व्याह करे कने बच्चे जम्मं कने घरबार सम्भाले, कने कुसी भी विरोधिये जो बदनाम करणे दा मौका ना दें । 15 कजोकि कई विधवा तां बेहकी करी सैताने दे पचांह चली पैईयां हन । 16 जे कुसी वसुआसिनी दे घरे विधवायें होन, तां सैई तिसादी मदद करे कि कलेसिया पर भार ना होयें, तांकि सैह तिन्हां दी मदद करी सकन जेहड़ियां सच मुच विधवायें हन ।

17 जेहड़े स्याणे खरा प्रबन्ध करदे हन, खास करी नैं सैह जेहड़े वचन सणांणे कने सखाणे च मेहनत करदे हन, दो गुणा आदर दे जोग्ये समझे जान । 18 कजोकि पवित्रशास्त्र ग्लांदा ऐ, "हल्ला खीजणे आळे दांदे दा मुं नी बन्नगा," कजोकि "मजदूर अपणी मजदूरिया दा हक्कदार ऐ ।" 19 कोई दोष कुसकी स्याणे वसुआसी पर लगाया जां तां बिना दूँ या त्रीं गवाहां ते ना सुणना । 20 पाप करणे आळियां जो सारेयां सामणे समझाई दैआ, तांकि होर लोक भी डरन । 21 परमात्मां, कने मसीह यीशु कने चुणेयां सुअर्गदूतां जो सामणे समझी करी में तिजो चतौनी दिंदा कि तू मन खोली नैं इन्हां गल्लां जो मना कर, कोई भी कम्म पक्षपात करी नैं मत कर ।

22 बड़ी तौळी कुसी पर हत्थ मत रखणां, कने दूयेयां दे पापां च भागी ना होणां; अपणे आप्णे जो पवित्र बणाई रख ।

23 भविष्य च सिरफ पाणी ई पीणेआळा ना रह्ये, अपर अपणे पेटे दी खराबी कने अपणे बार बार बमार होणे दिया बजाह ते थोड़ा थोड़ा अंगूरा दा रस भी पिआ कर ।

24 कुच्छ माणुआं दे पाप प्रकट होई जांदे हन कने न्याय ताई पैहले ते पुज्जी जांदे हन, अपर कुच्छ तांह पचाह ते ओंदे हन । 25 तिआं ई कुच्छ खरे कम्म भी प्रकट भी होंदे हन; कने जेहडे खरे कम्म नी होंदे, सैह छुपी नी सकदे ।

6 जितणे दास जुगले थलै हन, सैह अपणे मालके जो बडे आदरे जोगा जाणन, तांकि परमात्मं दे नांये दी कने शिक्षा दी निंदा नी होयें ।
2 जिन्हां दे मालक वसुआसी हन तिन्हां जो सैह भाऊ होणे दिया बजाह ते घटिया ना समझन, अपर तिन्हां दी होर भी सेवा करन, कजोकि इसते फायदा लैणे आळे वसुआसी कने प्रेमी हन । इन्हां गल्लां दी शिक्षा दैआ करा कने समझांदा रैह ।

झूठी शिक्षा कने धन दौलता दा लालच

3 जे कोई होर तरांह दी शिक्षा दिंदा ऐ कने खरियां गल्लां जो कने तिसा शिक्षा जो नी मनदा, जेहडी भक्तिया दे मताबक ऐ, 4 तां सैह कमंडी होई गैआ, कने झगड़े, कने निंदा दी गल्लां कने बुरे बुरे ख्याल, 5 कने तिन्हां माणुआं च बेकार रगड़े झगड़े पैदा होंदे हन जिन्हां दी अक्ल खराब होई गैई ऐ, कने सैह सचाईया ते दूर होई गैयो हन, जेहडे समझदे हन कि भक्ति कमाईया दा साधन ऐ । 6 अपर संतोष सौगी भक्ति बडी कमाई ऐ । 7 कजोकि ना अहां इस संसारे च कुच्छ लैयोन कने ना कुच्छ लैई जाई सकदे हन । 8 जे अहां अल्ल खाणे कने पैहनणे जो होयें, तां इन्हीं पर संतोष करणां चाइदा । 9 अपर जेहडे मीर होणां चाहंदे हन, सैह ऐदयी परीक्षा कने फंदे कने बडियां बेकार कने नुकसान दायक इच्छां च फंसदे हन, जेहिडयां माणुआं जो बिगाडी दिंदियां हन कने विनाश के समुंदरे च डुबाई दिंदियां हन । 10 कजोकि रुपये दा लालच सारी तरांह दी बुराईयां दी जड ऐ, जिसियो हासल करणे दा कोशश करदे होये मतेआं वसुआसे ते भटकी नैं अपणे आप्पे जो कई तरांह दे दुखां ते नकसान पुज्जाया ऐ ।

तीमुथियुसे जो खुद दे निर्देश

11 अपर हे परमात्मं दे माणु, तू इन्हां गल्लां ते नठ, कने धर्म, भक्ति, वसुआस, प्यार, धीरज कने नम्रता दा पीछा कर । 12 वसुआसे दी खरी कुशती लड; कने तिसा सदा दी जिन्दगिया जो पाई लै, जिस ताई तू सदेया होर मते गवाहां दे सामणे खरा अंगीकार कित्या था । 13 मैं तिज्जो परमात्मं जो, जेहड़ा सारेयां जो जिंदा रखदा ऐ, कने मसीह यीशु जो गवाह करी नैं जिन्हीं पुन्तियुस पिलातुसे दे सामणे खरा अंगीकार कित्या, एह हुक्म दिंदा । 14 कि तू अहां दे प्रभु यीशु मसीह दे प्रकट होणे तिकर इस हुक्मे जो निष्कलक कने बेकसूर रख, 15 जिसियो सैह ठीक बगते पर दस्सगा, जेहड़ा परमधन कने इक्कमात्र अधिपति कने राजेयां दा राजा कने प्रभुआं दा प्रभु ऐ, 16 कने अरमता सिरफ तिस दी ऐ, कने सैह अगम्य जोती च रैहदा ऐ, कने ना तिसियो कुणी माणुये नी दिख्या कने ना कदी दिखी सकदा ऐ । तिसदी प्रतिष्ठा कने राज जुगा जुग रैहगा । आमीन ।

17 इस संसारे दे मीरां माणुआं जो हुक्म दे कि सैह कमंडी ना होन कने चंचल पैसेयां पर भरोसा ना रखन, अपर परमात्मं पर जेहड़ा अहां दे सुखे ताई सब कुच्छ मता सारा दिंदा ऐ । 18 सैह भलाई कर, कने खरे कम्मां च मीर बणें, कने उदार दैणे कने मदद करणे जो हमेशा त्यार होयें, 19 कने गांह ताई इक्क खरी नीई पां कि सच्ची जिन्दगिया जो वशे च करी लैं ।

20 हे तीमुथियुस, इस सचाईया दी रखवाली कर; कने जिस ज्ञाने जो ज्ञान ग्लाणां भी भूल ऐ, तिसदे बुरे वाद विवाद कने विरोधां दियां गल्लां ते दूर रैह । 21 कितणे इस ज्ञाने दा अंगीकार करी नैं वसुआसे ते भटकी गैयो हन । तुहां पर अनुग्रह हुंदा रैह ।

2 तीमुथियुस

भूमिका

तीमुथियुस दे नांये पर पौलुस चले दी दूई पत्री, पौलुसे दे इक्क जुआन साथी कने सहायक दे रूपे च कार्यरत तीमुथियुसे जो पौलुस दी अपणी तरफा ते सलाह ऐ। इसदा खास विषय ऐ धीरता। तीमुथियुसे जो सलाह कने प्रोत्साहन दिता गैआ ऐ कि सताव कने विरोध दे होदे होये भी एह वसुआसयोग्यता दे सौगी यीशु मसीह दी गवाही दिंदा रहै, सुसमाचार कने पराणां - नियम दी सच्ची शिक्षा पर मजबूत बणी रहै, कने इक्क शिक्षक कने प्रचारक दे रूपे च अपणे कम्मां दा निर्वाह करदा रहै।

तीमुथियुस जो खास रूप ते "मूर्खतापूर्ण कने बेकार दे वाद - विवादां" च उलझणे ते पैदा खतरेयां दे बारे च चतौनी दिती गई ऐ। इसते कुछ फायदा नी हुंदा अपर एह सुणने आबेयां ताई विनाशे दी बजाह होई जांदी ऐ।

इन्हां सबना च, तीमुथियुसे जो अप्पु लेखक दी अणी जिन्दगिया कने मकसद --- तिसदे वसुआस, सेहनशीलता, प्यार, शबर, कने सताव दे बत दुखे दे उदारणे जो याद दिलांदा गैआ ऐ।

रूप रेखा

भूमिका 1: 1, 2

तारीफ कने शिक्षा 1: 3 --- 2: 13

सलाह कने चतौनी 2: 14 --- 4: 5

पौलुसे दी अपणी स्थिति 4: 6- 18

उपसंहार 4: 19- 22

नमस्कार

1 पौलुस दे पास्से ते जेहड़ा कि तिसा जिन्दगी च प्रतिज्ञा दे मताबक जेहड़ा यीशु मसीह च ऐ, कने परमात्में दी इच्छा ते यीशु मसीह दा चेला ऐ; 2 प्यारे पुत्र तीमुथियुस दे नां। परम पिता परमात्में कने अहां दे प्रभु यीशु दी पास्से ते तिजो अनुग्रह कने दया कने शांति मिलदी रहै।

धन्यावाद कने बढ़ावा

3 जिस परमात्में दी सेवा मैं अपणे पितरां दी रीतिया पर खरिया अक्का नैं करदा ऐ, तिसदा धन्यावाद होयें कि मैं अपणी प्रार्थना च मैं हर रोज याद करदा ऐ, 4 कने तेरे रोणे जो याद करी नैं रात दिन तिजो नैं मिलणे दी इच्छा रखदा ऐ। 5 कने मिन्जो तेरे तिस निष्कपट वसुआसे दी याद ओंदी ऐ जेहड़ा तेरी नानी लोईस कने मां यूनीके च था। मिन्जो भरोसा ऐ कि सैई वसुआस तिजो च भी ऐ। 6 इसा बजाह ते मैं तिजो याद दिलाई दिंदा कि परमात्में दे तिस वरदाने जो जेहड़ा मेरे हत्थ रखणे दिया बजाह ते तिजो मिलया सैह तिजो चमकाई दै। 7 कजोकि परमात्में अहां जो डरे दी अपर सामर्थी कने प्यार कने संयम दी आत्मां दितियो ऐ।

8 इसताई अहां दे प्रभु दी गवाहिया नैं, कने मिन्जो ते जेहड़ा तिसदा कैदी ऐ, शर्मिदा ना होयें, अपर तिस परमात्में दी सामर्था मताबक सुसमाचारे ताई मिन्जो सौगी दुख झेलें। 9 जिन्हीं अहां दा उद्धार किता कने पवित्र हक्क पाई करी सदेया, कने एह अहां दे कम्मां मताबक नी; अपणिया मर्जिया कने अनुग्रह दे मताबक ऐ जेहड़ा कि यीशु मसीह पर सनातन ते अहां पर होया ऐ, 10 अपर हुण अहां दे उद्धारकर्ता मसीह यीशु दे प्रकट होणे दिया बजाह ते लो होई ऐ, जिन्हीं मौता दा खात्मा करी दिता कने जिन्दगी कने अमर होणे जो तिस सुसमाचारे दिया बजाह ते प्रकाशन किता ऐ। 11 जिस ताई मैं प्रचारक, कने चले, कने शिक्षा दैणे आळा भी ठेहरेया। 12 इसा बजाह ते मैं इन्हां दुखां जो भी झेलदा ऐ, अपर शर्मादा नी कजोकि मैं तिसियो जिस पर मैं वसुआस किता ऐ, जाणदा ऐ; कने मिन्जो निश्चा ऐ कि सैह मेरे इस वसुआसे दी तिस दिन तिकर रखवाली करी सकदा ऐ। 13 जेहड़ी खरियां गल्लां तैं मिन्जो ते सुणियां हन तिन्हां तिस वसुआसे कने प्यारे सौगी, जेहड़ा मसीह यीशु च ऐ, अपणां आदर्श बनाई करी रख। 14 कने पवित्र आत्मां दिया बजाह ते जेहड़ा अहां च बसेया ऐ, इस खरे वसुआसे दी रखवाली कर।

15 तू जाणदा ऐ कि आसिया जगाह दे सब मिन्जो ते फिरी गैयो हन, जिन्हां च फुगिलुस कने हिरमुगिनेस हन। 16 उनेसिफुरुस दे परिवार पर प्रभु दया करे, कजोकि तिन्हीं मती बरी मेरे दिले जो ठंडा किता कने सैह मेरिया जंजीरा ते शर्मिदा नी होया। 17 अपर जाहू सैह रोम च आया, जाहू तिकर सैह मिन्जो नैं नी मिलेया, कोशश करी नैं तोपदा रहैआ। 18 प्रभु करे कि तिस दिन तिस पर प्रभु दी दया होयें - कने जेहड़ी जेहड़ी सेवा तिन्हीं इफिसुस च किती ऐ तिन्हां जो भी तू अच्छी तरांहा जाणदा ऐ।

यीशु मसीह दा वफादार सैनिक

2 इसताई हे मेरे पुत्र, तू तिस अनुग्रह च जेहड़ा यीशु मसीह च ऐ, बलवंत होई जा, 2 कने जेहड़ियां गल्लां तैं मतेआ गवाहां दे सामणे मिन्जो ते सुणियां हन, तिन्हां जो वसुआसी माणुआं जो सौपी दे; जेहड़ियां दयेयां जो सखाणे दे जोगियां होन। 3 मसीह यीशु दे अच्छे सैनिकां साइआं मिन्जो सौगी दुख झेल। 4 जाहू कोई यौदधा लड़ाईया लडणा जांदा ऐ, तां इसताई कि अपणे भर्ती करणेआळे जो खुश करे, अपणे आप्पे जो संसारे दे कम्मां च नी फसांदा। 5 भिरी अखाड़े च लडणेआळा जे नियमां मताबक नी लडें तां तिस जो मुकट नी मिलदा। 6 जेहड़ा जमीदार मेहणत करदा ऐ, उपज दा पैहला फळ तिसियो मिलणां चाइदा। 7 जेहड़ा मैं ग्लांदा तिस पर ध्यान दैआ, कने प्रभु तिजो सारियां गल्लां दी समझ दिंगा। 8 यीशु मसीह जो याद रखा जेहड़ा दाऊद दे वंशे ते होया कने मरेयां ते जिंदा होया, कने एह मेरे सुसमाचारे मताबक ऐ। 9 जिस ताई मैं कुकर्मी साइआं दुख झेलदा, ऐत्थु तिकर कि कैदी भी ऐ, अपर परमात्में दा वचन कैद नी ऐ। 10 इसा बजाह ते मैं चुणेयां ताई सब किच्छ सेहन करदा, कि सैह भी उद्धार जो जेहड़ा कि यीशु मसीह च ऐ सदा दी महिमा सौगी पान। 11 एह गल्ल सच ऐ, कि जे अहां तिस सौगी मरी गैयो हन, तां तिस सौगी जीगे भी; 12 जे अहां धीरजे नैं सेहंदे रहै, तां तिस सौगी राज भी करगे, जे अहां प्रभु जो मना करगे, तां प्रभु भी अहां दा मना करगा, 13 जे अहां वेवसुआसी भी होन, भिरी भी सैह वसुआसे जोगा बणां रहदा ऐ, कजोकि सैह अप्पु ई अपणां मना नी करी सकदा।

म्हान कारीगर

14 लोकां जो इन्हां गलां दी याद दिलाई करी कने परमात्में सामणे चिताई दे कि तिन्हां जो चुकनै करदे रहैआ कि सैह शब्दां जो लैई करी लडाई झगडा मत करा । जिन्हां ते कुछ फायदा नी हुंदा अपर सुणने आळे बिगडी जांदे हन । 15 अपणे आप्पे जो इआं बणां कि परमात्में अल्ल ग्रहण करणे जोगे होन कने ऐदेय कम्म करणे दी कोशश करा शर्मिदा ना होन । कने जेहडे सचाईया दे वचना जो ठीक ढंगे नैं इस्तेमाल करदे हन । 16 कने बुरे वाद विवाद ते बची रहै कजोकि ऐदेय लोक होर भी । अभक्ति च बधदे जांदे हन । 17 कने तिन्हां वचना जो सडे फौडे साइआं फैलांदा जांगा । हुमिनयुस कने फिलेतुस तिन्हां ते ई हन । 18 जेहडे एह ग्लाई करी कि पुनरुत्थान होई चुका ऐ सच ते भटकी गै हन, कने कितणेयां दे वसुआस जो उलट पुलट करी दिंदे हन, 19 भिरी भी परमात्में दी पक्की नीई बणी रहैदी ऐ, कने तिस पर एह मोहर लगियो ऐ, “प्रभु अपणेयां जो पणछैणदा ऐ, कने जेहडा कोई प्रभु दा नां लैंदा ऐ, सैह पाप ते बची रहै ।” 20 बडे बडे घरां च ना सिर्फ सोने चादी दे, अपर लकडी कने चिक्का दे भांडे भी होंदे हन; कोई कोई आदर, मान ताई कने कोई कोई अनादरे ताई हन । 21 जे कोई अपणे आप्पे जो इन्हां ते शुद्ध करगा, तां सैह आदरे दा भांडा कने पवित्र ठेहरगा; कने सुआमिये दे कम्मे आंगा, कने हर खरे कम्म ताई त्यार हुंगा । 22 जुआनी दी बुरी इच्छाओं ते दूर रहैआ, कने जेहडे शुद्ध मने ते प्रभु दा नां लैंदे हन तिस सौगी धर्म, कने वसुआस, कने प्यार, कने मेल मिलाप दा पीछा करा । 23 अपर मूर्खता कने अनपढ़े विवादां ते दूर रहै, कजोकि तू जाणदा ऐ कि इन्हां ते झगडे पैदा होंदे हन । 24 प्रभु दे दास जो झगडालू नी होणां चाइदा । अपर सैह सबना सौगी नर्म कने शिक्षा च निपुण कने सेहणशील होयें । 25 सैह अपणे दुशमणा जो नर्म होई नैं समझां, क्या भला परमात्में तिन्हां जो मन फिराव दा मन दें कि सैह भी सचाईया जो पणछैणन, 26 कने इसदिया बजाह ते परमात्में इच्छा पूरी करणे ताई सचेत होई नैं सैताने दे फंदे ते छूटी जान ।

आखरी दे दिनां च अधर्म

3 याद रखा अंत दे दिनां च अहां पर बड़ा बुरा बग्त ओणा । 2 कजोकि माणु सवार्थी, लालची, डींगमार, कमंडी, निंदा करणेआळे माऊ बुडे दा हुक्म टालणेआळे, कृतघ्न, अपवित्र, 3 नां दया, ना माफ करणे आळा, दोष लगाणेआळे, असंयमी कठोर, खरे दे बैरी, 4 वसुआसघाती, टीठ, कमंडी, परमात्में जो चाणे आळे नी अपर सुखविलासे जो चाणेआळे होंगे । 5 सैह भक्ति दा भेष धारण तां करणे अपर तिसदी शक्तियां जो नी मनगे । ऐदयां ते हमेशा दूर रहैआ । 6 कजोकि इन्हां च कुछ लोक ऐदेय भी हन जेहडे घरां च गुप चुप ओंदे हन, कने तिन्हां कमजोर जणांसां जो वशे च करी लैंदे हन जेहिडियां पापां च दबूईयां कने हर तरांह दी इच्छां दे वशे च हन, 7 एह जणांसां सीखणे दी कोशश तां करदियां रहैदियां हन अपर सचाईया दी पणछैणां तिकर कदी नी पुज्जदियां । 8 कने जिआं यत्रेस कने यत्रेसे मूसा दा विरोध कित्या था, तिआं ई एह लोक भी सचाईया दा विरोध करदे हन । इन्हां लोकां दी अक्ल भ्रष्ट होई गियो, कने सैह वसुआसे दे मामले च निकम्मे हन । 9 अपर सैह इसते गांह नी बदी सकदे, कजोकि जिआं तिन्हां दी अज्ञानता सारे माणुआं पर प्रकट होई गियो थी, तिआं ई इन्हां दी भी होई जांगी ।

तीमुथियुस जो खास निर्देश

10 अपर तैं शिक्षा, चालचलन, मनसा, वसुआस, सेहणशीलता, प्यार, धीरज, कने सताये जाणे, कने दुख झेलणे च मेरा साथ दित्ता; 11 कने ऐदेय दुखां च भी जेहडे अन्ताकिया कने इकुनियुम कने लुस्त्रा च मिन्जो पर पै थे, कने होरनी दुखां च भी जेहडे मैं झेलियो हन; अपर प्रभुयें मिन्जो तिन्हां सारेयां ते छडाई लैआ । 12 अपर जितणे यीशु मसीह यीशु च भक्तिया सौगी

जिन्दगिया बिताणा चाहंदे हन सैह सारे सताये जांगे ; 13 अपर दुष्ट कने भकाणेआळे धोखा दिंदे होये कने धोखा खांदे खांदे बिगडी जांगे; 14 कने बचपने ते ई पवित्र शास्त्र तेरा जाणां पछैणा ऐ, जेहडा कि मसीह यीशु पर वसुआस करणे पर 15 कने तिजो पता ऐ कि बचपने ते ई पवित्र शास्त्रां जो भी जाणदा ऐ । जेहडा तिजो मसीह पर वसुआस करणे ते उद्धार हासल करणे ताई अक्लमंद बणाई सकदा ऐ । 16 हर इक्क पवित्र शास्त्र परमात्में दी प्रेरणा ते रचा गैआ ऐ कने शिक्षा, कने समझणे, कने सधारणे, कने धर्मिकता दी शिक्षा ताई फायदे मंद ऐ, 17 तांकि परमात्में दा माणु सिद्ध बणें, कने हर इक्क खरे कम्मे ताई त्यार होई जां ।

4 परमात्में कने मसीह यीशु जो गवाह मनी करी, जेहडा जिंदेयां कने मरेयां दा न्याय करगा, कने तिसदे प्रकट होणे कने राजे दी याद दिलाई नैं मैं तिजो हुक्म दित्ता । 2 कि तू वचने दा प्रचार कर । बग्तें बे बग्तें त्यार रहै । सब तराह दी सेहनशीलता, कने शिक्षा सौगी सौगी धिक्कार कने झिड़क कने समझा । 3 कजोकि ऐदेया बग्त भी ओणा, जाहू खरी शिक्षा सुणना नी चाहंगे । अपर कनां दी खुरका दिया बजाह ते अपणी इच्छां दे मताबक अपणे ताई मते सारे गुरु कठेरी लेंगे । 4 कने सैह अपणे कनां जो सचाईया ते फेरी लेंगे कने कथा - काहणियां पर लगांगे । 5 अपर तू सारियां गलां ते चुकना रहै, अपर दुख झेल, सुसमाचार प्रचार दा कम्म कर, कने अपणियां सेवा जो पूरा कर ।

6 कजोकि जिआं पाणिये जो अर्घे साइआं डोळेया जांदा, तिआं ई मैं भी डोळणे पर ऐ कने मेरे जाणे दा बग्त आई चुकेया । 7 मैं अपणी अच्छी लडाई लडी चुकेया, मैं अपणी दौड पूरी करी लियो, मैं वसुआसे दी रखवाली कितियो ऐ । 8 भविष्य च मिन्जो ताई पवित्रता दा सैह मुकट रखेया ऐ, जिसियो प्रभु, जेहडा कि पवित्र कने न्यायी ऐ, मिन्जो तिस दिन दिंगा, कने मिन्जो ई नी अपर तिन्हां सारेयां जो भी जेहडे तिसदे प्रकट होणे जो प्यारे समझदे हन ।

खुद का संदेश

9 मिन्जो अल्ल तौळी ओणे दी कोशश कर । 10 कजोकि देमासैं इस संसारे जो प्यारा समझी करी मिन्जो छड्डी दित्ता ऐ, कने थिस्सलुनीके जो चली गैआ । क्रैसकेंस गलातिया जो कने तीतुस दलमतिया जो चली गैआ ऐ । 11 सिर्फ लूका मिन्जो सौगी ऐ । मरकुसे जो लैई करी चली आ; कजोकि सेवा ताई सैह मेरे बडे कम्मे दा ऐ । 12 तुखिकुस जो मैं ईफिसुस जो घल्लया ऐ । 13 जेहडा चोळा मैं त्रोआसे च करपुसे अल्ल छड्डी आया था, जाहू तू ओयें तां तिसियो कने कताबा खास करी नैं चर्मपत्रां जो लैंदे ओनेयां । 14 सिक्दरे ठठेरें मिन्जो नैं बड़ा बुरा कित्ता; प्रभु तिसदे कम्मां दे मताबक बदला लेंगा । 15 तूमी तिसते चुकना रहै, कजोकि तिन्हीं अहां दियां गलां दा बड़ा विरोध कित्या ऐ । 16 मेरे पैहले जबाब दिंदे बग्त कुणी भी मेरा साथ नी दित्ता, अपर सारेयां मिन्जो छड्डी दित्या था । खरा होयें कि इसदा तिन्हां जो लेखा दैणां नी पौयें । 17 अपर प्रभु मेरा साथी रहैआ कने मिन्जो सामर्थ दित्तियो, तांजे मिन्जो ते पूरा पूरा प्रचार होयें कने सारी होर जातिआं भी सुणी लेंन मैं शेरे दे मुंमैं ते छडाया गैआ । 18 कने प्रभु मिन्जो हर इक्क बुरे कम्मां ते छडांगा, कने अपणे सुअर्गीय राजे च सम्भाली नैं पजांगा । तिसदी महिमा जुगा जुग होंदी रहै । आमीन ।

आखरी नमस्कार

19 प्रिस्का कने अक्विला जो कने उनेसिफुरुस दे परवारे जो नमस्कार । 20 इरास्तुस कुरिन्थुस च रहै गैआ, कने त्रुफिमस जो मैं मीलेतुस च बमार छडया ऐ । 21 स्याले ते पैहलें चली ओणे दा कोशश कर । यूबूलुस, कने पूदेंस, कने लीनुस कने क्लौदिया, कने सारे भाऊआं दा तिजो नमस्कार । 22 प्रभु तेरिया आत्मां सौगी रहै । तुहां पर अनुग्रह हुंदा रहै ।

तीतुस

भूमिका

तीतुस इक गैर यहूदी मसीही था, जेहड़ा पौलुस दे प्रचारे दे कम्मे च तिसदा साथी कने सहायक बणी गेआ था । तीतुस दे नां पौलुस चले दी पत्री क्रेते च रैह दे पौलुसं इसी जुआन सहायक जो सम्बोधित किन्ती ऐ, जिसियो तित्थु कलेसिया दे कम्मां दा निरिक्षण करणे ताई छडेया था । एह पत्री त्रे खास विषयां जो अभिव्यक्त करदी ऐ ।

पैहली, तीतुसे जो एह याद दिलाई ऐ कि कलेसिया दे अगुआं दा चरित्र कुस तरांह दा होणां चाइदा, खास कर मते क्रेतेवासियां दे बुरे चरित्र जो दिखदे होये एह ग्लायो गेआ । दूई, तीतुस जो एह सलाह दिक्ती कि कलेसिया च उपास्थित हर तरांह दे समूहां जो कुस तरांह शिक्षा दिक्ती जां, मतलब बुडे मर्द, बुडियां जणासां, (कने नौ जुआन जणासां जो शिक्षा दें), जुआन मर्द, कने दास । त्री, लेखक तीतुस जो मसीही आचरण सम्बन्धी सलाह दिंदा ऐ, खास कर शान्तिपूर्ण कने मित्रवत् बणने ताई; कने कमंड, वाद - विवाद कने कलेसिया च गुटबन्दी ते बचणे ताई ।

रूप रेखा

भूमिका 1: 1- 4

कलेसिया दे अगुवे 1: 5- 16

कलेसिया दे विभिन्न समूहां दे कम्म 2: 1- 15

शिक्षा कने चतौनी 3: 1- 11

उपसंहार 3: 12- 15

नमस्कार

1 पौलुस दे पास्से ते जेहड़ा परमात्मं दा दास कने यीशु मसीह दा चेला ऐ, परमात्मं दे चुणेयो लोकां दे वसुआस कने तिसा सचाईया दी पणछेणां दिया बजाह ते जेहड़ी भक्तिया मताबक ऐ, 2 तिसा सदा दी जिन्दगी दी आशा पर जिसदी प्रतिज्ञा परमात्मं जेहड़ा कि झूठ ग्लायी नी सकदा आदि काल ते किन्ती ऐ, 3 अपर ठीक बगते पर अपणे वचने जो तिस प्रचारे दिया बजाह ते प्रकट किता, जेहड़ा अहां दे उद्धारकर्ता परमात्मं दा हुक्मे मताबक मिन्जो दित्या । 4 तीतुसे दा नां जेहड़ा वसुआसे दी साझें दिया बजाह ते मेरा सच्चा पुत्र ऐ; परमात्मं पिता कने अहां दे उद्धारकर्ता मसीह यीशु दे पास्से ते तिजो अनुग्रह कने शांति मिलदी रैह ।

क्रेते च तितुसे दा कम्म

5 मैं इसताई तिजो क्रेते च छड्डी आया था कि तू बचियां गलां जो सधारें, कने मेरे हुक्मे मताबक जगाह जगाह पर प्राचीनां जो नियुक्त करें । 6 जेहड़े बेकसूर कने इक्की लाडिया दे लाडे होन, जिन्हां दे बच्चे वसुआसी होन, कने तिन्हां च लुचपन कने निरंकुशता दा दोष ना होयें । 7 कजोकि अधिकारिये जो परमात्मं दा भंडारी होणे ताई बेकसूर होणां चाइदा; ना हठी, ना गुस्से आळा, ना पियक्कड़, ना मारपीट करणे आळा, कने ना नीच कमाईया दा लालची होयें, 8 अपर घरें आया परोणा सेवा करणेआळा, भलाईया जो चाहणेआळा, संयमी, न्यायी पवित्र कने जीतणे आळा होयें; 9 कने सैह वसुआसे जोगे वचने पर जेहड़ा परमात्मं दी शिक्षा मताबक ऐ, पक्के रैह कि खरिया शिक्षा ते शिक्षा देई सकन कने विरोधियां दा मुँ भी बंद करी सकन ।

10 कजोकि मत्ते लोक निरंकुश, बक्क बक्क कने धोखा दैणे आळे हन; खास करी नैं खतणां करणे आळेया ते । 11 इन्हां दा मुँ बंद करणां चाइदा । एह लोक नीच कमाईया ताई अनुचित गलां सखाई नैं घरां दे घर बिगाडी दिंदे हन । 12 तिन्हां च इक्क माणु, जेहड़ा तिन्हां ई दा भविष्यवक्ता ऐ, ग्लायो ऐ, "क्रेती लोक सदा झूठे, बुरे डंगर, कने आलसी पेट भरी करी खाणे आळे होंदे हन ।" 13 एह गवाही सच्च ऐ, इसताई तिन्हां जो कड़ी चतौनी दैआ करा कि सैह वसुआसे च पक्के होई जान, 14 कने यहूदियां दी कथा काहणियां कने तिन्हां माणुआं दे हुक्मां पर मन नी लगान, जेहड़े सचाईया ते भटकी जांदे हन । 15 खरे लोकां ताई सारियां चीजां खरियां हन, अपर बुरे कने वेवसुआसियां ताई कुच्छ भी खरा नी, अपर तिन्हां दी अक्क कने विवेक दोयो बुरे हन ।

16 सैह ग्लान्दे हन कि अहां परमात्मं जो जाणदे हन, अपर अपणे कम्मा ते तिसदा मना करदे हन; कजोकि सैह घृणित कने हुक्मा नी मनणेआळे हन, कने कुसी खरे कम्मे जोगे नी ।

बर्ताव ताई खरी शिक्षा

2 अपर तू एदेइआं गलां गला कर जेहड़ियां खरिया शिक्षा जोगियां होन । 2 मतलब जबरे मरद सचेत कने गंभीर कने अपणे आप्पे जो काबू रखणे आळे होन, कने तिन्हां दा वसुआस कने प्यार कने धीरज पक्का होयें । 3 इन्हीं साहभं जबरिया जणांसा दा चाल चलन पवित्र लोकां साइआं होयें; सैह दोष लगाणेआळी कने पियक्कड़ नी, अपर छैल गलां सखाणेआळी होयें, 4 तांकि सैह जुआन जणांसा जो चतौनी दिंदी रैह कि अपणे लाडे नैं कने बच्चेयां नैं प्यार रखन; 5 कने अपणे आप्पे जो काबू रखणे आळी, पवित्र बणी रैह, घरे दा कारोबार करणेआळी, खरी, कने अपणे अपणे लाडे दे अधीन रैहणे आळी होयें तांकि परमात्मं दे वचने दी निंदा नी होयें ।

6 इन्हीं साहभं जुआन मरदां जो भी समझा कर कि अपणे आप्पे जो काबू रखन । 7 सारियां गलां च अपणे आप्पे जो खरेयां कम्मां दा नमूना बणां । 8 कने इन्हीं खराई पाई जां कि कोई तिसियो बुरा ना ग्लायी सके, जिसते विरोधी अहां पर कोई दोष लगाणे दा मौका नी पाई नैं शिर्मिदा होन,

9 दासां जो समझा कि अपणे अपणे मालके दे अधीन रैह, कने सारियां गलां च तिन्हां जो खुश रखन कने टाई नैं जबाब नी दैन; 10 चोरी चलाकी नी करन, अपर सब तरांह ते पूरे वसुआसी निकळन कि सैह सारियां गलां च अहां दे उद्धारकर्ता परमात्मं दी शिक्षा दी शोभा बधान ।

11 कजोकि परमात्मं दा सैह अनुग्रह प्रकट ऐ, जेहड़ा सारे माणुआं दे उद्धार दे बजाह ऐ, 12 कने अहां जो चतौनी दिंदा ऐ कि अहां वेवसुआसे ते कने संसारिक इच्छां ते मने जो फेरी नैं इस जुगे च अप्पु च काबू रखी नैं कने धर्म कने वसुआसे नैं जिन्दगी बितान; 13 कने तिसा धन आशा दी मतलब अपणे म्हान परमात्मं कने उद्धारकर्ता यीशु मसीह दी महिमा दे प्रकट होणे दा इंतजार करदे रैह । 14 जिन्हीं अपणे आप्पे जो अहां ताई देई दिक्ता कि अहां हर तरांह दे अधर्म ते छड़ाई लैन, कने खरा करी नैं अप्पु ताई इक्क देहई जाति बणाई लैआ जेहड़ी खरे बुरे कम्मां च हमेशा तयार होन ।

15 पूरे हक्क सौगी एह गलां गला, कने समझा कने सखांदा रैह । कोई तिजो घटिया नी जाणी पां ।

मसीही चाल - चलन

3 लोकां जो याद दिला कि हाकमां कने अधिकारियां दे अधीन रहैह, कने तिन्हां दे हुक्म मनण, कने हर इक्क खरे कम्मे ताई त्यार रहैह । 2 कुसी जो बदनाम नी करन, झगडालू नी होन; अपर शांत सभावे दे होन, कने सारे माणुआं सौगी बडी नम्रता दे सौगी रहैह । 3 कजोकि अहां भी पैहले बेअक्के, कने हुक्म नी मनणे आळे, कने भ्रमे च पैयो हन कने रंग बिरंगी अभिलाषां कने सुखविलास दे दास थे, कने बैरभाव, कने डाह करणे च जिन्दगी बितांदे थे, कने घृणा करदे थे, कने इक्की दूये नैं बैर रखदे थे । 4 अपर जाहू अहां दे उद्धारकर्ता परमात्मं दी कृपा कने माणुआं पर तिसदा प्यार प्रकट होया, 5 तां तिन्हीं अहां दा उद्धार कित्ता, कने एह धर्मा दे कम्मां दिया बजाह ते नी जेहडे अहां अप्पु कित्ते, अपर अपणियां दया मताबक नौये जन्मे दे न्हौणा कने पवित्र आत्मां दे अहां जो नौआं बणाई दैणे दिया बजाह ते होया । 6 जिसियो तिन्हीं अहां दे उद्धारकर्ता यीशु मसीह दिया बजाह ते अहां जो जादा ते जादा दित्या । 7 जिसते अहां तिसदे अनुग्रह नैं धर्मी ठेहरी नैं, सदा दी जिन्दगिया दी आशा मताबक वारस बणन ।

8 एह गल्लां सच हन, कने मैं चाहंदा ऐ कि तू इन्हां गल्लां दे बारे च जोर दैई नैं ग्लान इसताई कि जिन्हां परमात्मं पर वसुआस कित्या ऐ, सैह खरे खरे

कम्मां च लग्गी रहणे दा ध्यान रखन । एह गल्लां खरियां कने माणुआं दे फायदे दियां हन । 9 अपर मूर्खता दे वाद-विवाद ते, कने वंशावलियां, कने विरोध कने तिन्हां लडाईयां झगडेयां नैं जेहडा व्यवस्था दे बारे च हन, बची रहैह कजोकि सैह निष्फल कने बेकार हन । 10 कुसी पंखडिये जो इक्क दो बरी समझाई बुझाई नैं तिसते लग्ग रहैह, 11 एह जाणी नैं कि एह माणु भटकी गैआ ऐ, कने अपणे आप्पे जो दोषी ठेहराई नैं पाप करदा रहैहदा ऐ ।

मेरी तरफ ते निर्देश कने नमस्कार

12 जाहू मैं तिज्जो अल्ल अरतिमास या तुखिकुंस जो घल्लें तां मिन्जो अल्ल निकुपुलिसे जो ओणे दी कोशश करणां, कजोकि मैं स्याला दे दिन तित्थु कटणे दा सोचा दा ऐ । 13 जेनास व्यवस्थापक कने अपुल्लोसे जो कोशश करी नैं गांह पुज्जा, कने दिख कि तिन्हां जो कुसा भी चीज्जा दी कमी ना होई पां । 14 अहां दे लोक भी जरूरतां जो पूरियां करणे ताई खरेयां कम्मां च लग्गी रहणां सीखन तांकि निष्फल ना रहैह ।

15 मेरे सब साथियां दा तिज्जो नमस्कार । जेहडे वसुआसे दिया बजाह ते अहां नैं प्यार रखदे हन, तिन्हां जो नमस्कार । तुहां सबना पर अनुग्रह हुंदा रहैह ।

फिलेमोन

भूमिका

फिलेमोन इक्क खास मसीह था, जेहड़ा सम्भवतः कुलुस्से दी कलेसिया दा सदस्य कने उनेसिमुस नांये इक्क दासे दा मालक था । एह दास अपणे मालक दे ऐत्थू ते नठी गैआ था, भिरी कुस तराह पौलुसे दे सम्पर्क च आया, जेहड़ा उस बग्त जेला च था । पौलुसे दे दुआरा, उनेसिमुस इक्क मसीही बणी गैआ फिलेमोन दे नां पौलुस चेले दी पत्नी फिलेमोने ते एह आग्रह करदी ऐ कि सैह अपणे दासे नैं पैहलें मेल मिलाप करी लें, जिसियो पौलुस भिरी ते तिस अल्ल घल्ला दा ऐ, अपर ना सिर्फ इक्क बरी माफ़ किच्ते दासे दे रूपे च ई अपर इक्क मसीही भाऊ दे रूपे च तिसदा सुआगत करें ।

रूप रेखा

भूमिका 1- 1

फिलेमोने दी तारीफ़ 4- 7

उनेसिमुस ताई निवेदन 8- 22

उपसंहार 23- 25

नमस्कार

1 पौलुसे दे पास्से ते जेहड़ा मसीह यीशु दा कैदी ऐ, कने भाऊये तीमुथियुस दे पास्से ते अहां दे प्यारे सेहकर्मी फिलेमोन, 2 कने बैहण अफकिया, कने अहां दे साथी योद्धा अरखिप्पुस कने फिलेमोन दे घरे दी कलीसिया दे नां: 3 अहां दे पिता परमात्में कने प्रभु यीशु मसीह दे पास्से ते अनुग्रह कने शांति तुहां जो मिलदी रैंह ।

फिलेमोने दा प्यार कने वसुआस

4 मैं सदा परमात्में दा धन्यवाद करदा ऐ, कने अपणी प्रार्थनां च भी तिजो याद करदा ऐ, 5 कजोकि मैं तेरे तिस प्यारे कने वसुआसे दी चर्चा सुणदा ऐ, जेहड़ा सारे पवित्र लोकां सौगी कने प्रभु यीशु पर ऐ । 6 मैं प्रार्थना करदा ऐ कि वसुआस च तेरा सेहभागी होणां, तुहां दी सारी भलाई दी पणछैणां च, मसीह ताई असरदार होयें । 7 कजोकि हे भाऊ, तिजो तेरे प्यारे ते मती सारी खुशी कने शांति मिलियो ऐ, इसताई कि तेरिया बजाह ते पवित्र लोकां दे मन हरे भरे होई गैयो हन ।

उनेसिमुस ताई प्रार्थना

8 इसताई जे मिन्जो मसीह च बड़ी हिम्मत ऐ कि जेहड़ी गल्ल ठीक ऐ, तिसादा हुक्म तिजो दें, 9 भिरी भी मिन्जो बूढे पौलुसे जो जेहड़ा हुण मसीह यीशु ताई कैदी ऐ, एह होर भी खरा लगा कि प्यारे नैं विणती करे । 10 मैं अपणे बच्चे उनेसिमुस ताई, जेहड़ा मिन्जो ते मेरिया कैदा च जम्मेया ऐ, तिजो नैं विणती करदा ऐ । 11 सैह तां पैहले तेरे कुच्छ कम्म दा नी था, अपर हुण तेरे कने मेरे दूनी दा बड़े कम्मे दा ऐ । 12 तिस जो जे जेहड़ा मेरे मने दा

तुकड़ा ऐ, मैं तिजो अल्ल वापस करी दिता ऐ । 13 तिसियो मैं अपणे अल्ल ई रखणां चाहंदा था कि सैह तेरे पास्से ते इसा कैदा च जेहड़ा सुसमाचार दिया बजाह ते ऐ, मेरी सेवा करें । 14 अपर मैं तेरी इच्छा बगैर कुच्छ भी करणां नी चाहंदा, कि तेरी एह कृपा दबाबे नैं नी अपर खुशिया नैं होयें ।

15 कजोकि क्या पता सैह तिजो ते कुच्छ दिन तिकर इसा बजाह ते दूर होया कि हमेशा तिजो अल्ल रैंह । 16 अपर हुण दासे साइआं नी अपर दासे ते भी उत्तम, मतलब भाऊये साइआं रैंह, जेहड़ा मेरा तां खास प्यारा ऐ ई अपर हुण शरीरे च कने प्रभु च भी, तेरा भी खास प्यारा होयें । 17 जे तू मिन्जो अपणां सेहभागी समझदा ऐ, तां तिसियो इस तराह ग्रहण कर जिआं मिन्जो । 18 जे तिन्हीं तेरा कुच्छ नकसान किता ऐ, या तिन्हीं तेरा कुच्छ देणा तां मेरे खाते च लिख लें । 19 मैं पौलुस अपणे हत्थे नैं लिखदा कि मैं अप्पु भरी दिंगा; कने इस दे ग्लाणे दी कुच्छ जरूरत नी कि मेरा कर्ज जेहड़ा तिजो पर ऐ सैह तू ई ऐ । 20 हे भाऊ, एह खुशी मिन्जो प्रभु च तेरिया तरफा ते मिलें । मसीह च मेरे दिले जो हरा भरा करी दे ।

21 मैं तेरे आज्ञाकारी होणे दा भरोसा रखी नैं तिजो लिखदा ऐ, कने एह जाणदा ऐ कि जेहड़ा कुच्छ मैं ग्लांदा, तू तिसते केंह बधी नैं करगा । 22 कने एह भी कि मिन्जो ताई ठेहरणे दी जगाह त्यार रख । मिन्जो आशा ऐ कि तुहां प्रार्थना दिया बजाह ते मैं तुहां जो दैई दिता जांगा ।

आखरी नमस्कार

23 इफ्रास जेहड़ा मसीह यीशु च मिन्जो सौगी कैदी ऐ, 24 कने मरकुस कने अरिस्तर्खुस कने देमास कने लूका जेहड़ा मेरे सेहकर्मी हन, इन्हा दा तिजो नमस्कार । 25 अहां दे प्रभु यीशु मसीह दा अनुग्रह तुहां दी आत्मां पर हुंदा रैंह । आमीन ।

इब्रानियों

भूमिका

इब्रानियों दे नांये पर पत्री मसीहियां दे इक्की झुण्डे जो लिखियो थी, जेहडे बधदे होये विरोध दिया बजाह ते अपने मसीही वसुआसे जो त्यागणे दे खतरे च थे । लेखक तिन्हां जो अपने वसुआसे बणी रहणे ताई उत्साहित करदा ऐ, एह दरुसदे होये कि मसीह ई परमात्मं दा वास्तविक कने आखरी प्रकाशन ऐ । इआं करदे बत सैह त्रै सच्चियां गलां पर जोर दिंदा ऐ : (1) यीशु ई परमात्मं दा पुत्र ऐ, जिन्हीं दुख भोगी भोगी करी पिता दे सचे हुक्मां दा पालन करणां सिखेया । परमात्मं दे पुत्र दे रूपे ची यीशु मसीह पराणां - नियम दे भविष्यवक्तां, सुअर्गदूतां, कने अप्पु भी मूसा ते भी म्हान ऐ । (2) यीशु मसीह परमात्मं दिया बजाह ते सदा काल दा महायाजक घोषित कित्ता गैआ ऐ पराणां - नियम दे महायाजकां ते म्हान । (3) यीशु दिया बजाह ते वसुआसी पाप, डर, कने मौत ते बचाई लैआ ऐ; कने यीशु मसीह, महायाजके दे रूपे च, सच्चा उद्धार प्रदान करदा ऐ, यहूदी धर्म - विधियां कने डंगरा दियां बलियां दिया बजाह ते जिसदा सिर्फ पैहले ते ई प्रगत होणां तय था ।

इस्त्राएली इतिहास दे कुछ प्रसिद्ध माणुआं दे वसुआस दे उदारणां जो उद्धृत करदे होये (पाठ 11), लेखक अपने पाठकां ते वसुआसे च बणी रहणे दा आग्रह करदा ऐ, कने 12 वें पाठे च सैह अपने पाठकां नें निवेदन करदा ऐ कि सैह अन्त तिकर वसुआसे च बणी रहै कने अपनी अंखी यीशु मसीह पर लगाई रहै, कने जेहड़ा दुख कने सताव तिन्हां पर ओंदा ऐ तिसियो सैह शबर रखी नें झेली लैन । एह पत्री कुछ सलाहां कने चतौनियां सौगी खत्म होंदी ऐ ।

रूप रेखा

भूमिका : मसीह, परमात्मं दा पूरी रीती नें प्रकाशन 1: 1- 3
 मसीह, सुअर्गदूतां ते भी म्हान 1: 4 --- 2: 18
 मसीह, मूसा कने यहोशू ते भी म्हान 3: 1 --- 4: 13
 मसीह दे याजकपद दी श्रेष्ठता 4: 14 --- 7: 28
 मसीह दे वादे दी श्रेष्ठता 8: 1 --- 9: 28
 मसीह दे बलिदान दी श्रेष्ठता 10: 1- 39
 वसुआसे दी श्रेष्ठता 11: 1 --- 12: 29
 आखरी उपदेश कने उपसंहार 13: 1- 25

परमात्मं दा वचन, पुत्रे दुआरा

1 पैहले जुगे च परमात्मं पितरां ते थोड़ी थोड़ी करी कने कई किस्मा दे भविष्यवक्तां घली करी गलां करियां, 2 इन्हां आखरी दिनां च अहां पुत्रे नें गलां कित्तियां, जिसियो तिन्हीं सारियां चीजां दा वारस ठेहराया कने तिसदिया बजाह ते तिन्हीं सारी सृष्टिया दी रचना कित्ती ऐ । 3 सैह तिसदिया महिमा दा तेज कने तिसदे तत्वे दी छाप ऐ, कने सारियां चीजां जो अपनी सामर्थी दे वचना नें संभालदा ऐ । सैह पापां जो धोई करी उच्चे सिंहासणे पर महामहिमन दे सजे हत्थे अल्ल बैठया; 4 कने सुअर्गदूतां ते उतणां ई उतम ठेहराया, जितणांतिन्हीं तिन्हां ते बड़िया जगाह दा वारस होई नें उतम नां पाया ।

परमात्मं दी कने पुत्रे दी महानता

5 कजोकि सुअर्गदूतां च तिन्हीं काहू कुसणे गलाया, "तू मेरा पुत्र ऐ, अज तू मिन्जो ते पैदा होया?" कने भिरी में तिसदा पिता कने सैह मेरा पुत्र हुंगा?"
 6 कने जाहू पैहिलोठे जो संसारे च भिरी लैई अंदा तां गलांदा कि परमात्मं दे सारे सुअर्गदूत तिसियो दंडवत करन ।"
 7 कने सुअर्गदूतां दे बारे च एह गलांदा ऐ, "सैह अपने दूतां जो हौआ कने अपने सेवकां जो बळदी अग बणाई दिंदा ऐ ।"
 8 अपर पुत्रे दे बारे च गलांदा ऐ कि हे परमात्मां तेरा सिंहासण जुगा जुग तिकर रहणां : तेरे राजे दी राजदंड न्याय दी राजदंड ऐ ।
 9 तें धर्म नें प्यार अधर्म नें बैर रखया; इसा बजाह ते परमात्मं तेरे परमात्मं, तेरे साथियां ते बधीकरी खुशिया दे तेले नें तेरा अभिषेक कित्ता ।"
 10 कने एह कि, "हे प्रभु शुरू च तें धरतिया दी नीई पाई, कने सुअर्ग तेरे हत्थां दी कारीगरी ऐ ।

11 सैह तां नाश होई जांगे, अपर तू बणी रहैगा; कने सैह सब कपड़ेयां साइआं पुराणे होई जांगे,

12 कने तू तिन्हां जो चादरा साइआं लपेटगा, कने सैह कपड़े साइआं बदली जांगे : अपर तू सैई ऐ कने तेरे सालां दा अंत नी होणां ।"

13 कने सुअर्गदूतां च तिन्हीं कुस नें काहू गलाया, "तू मेरे सजे बखें बैठ, जाहू तिकर कि में तेरे बैरियां जो तेरे पैरां थलें नी करी दें?"

14 क्या सैह सारी सेवा टहल करणेआळियां आत्मां नी, जेहड़ी उद्धार पाणे आळियां ताई सेवा करणे जो घली जांदी ऐ ।

म्हान उद्धार

2 इसा बजाह ते अहां जो चाइदा कि अहां तिन्हां गलां पर जेहिडियां अहां नें सुणियां हन, होर भी मन लगान, इआं ना होयें कि बैहकी करी तिन्हां ते दूर चली जान । 2 कजोकि जेहड़ा वचन सुअर्ग दूतां दिया बजाह ते गलाया था । जाहू सैह पक्का रहैआ कने हर इक्क अपराध कने हुक्म मानणे दा ठीक ठीक बदला मिला, 3 तां अहां लोक ऐदेय बड़े उद्धार ते निश्चत रहै करी किआं बची सकदे हन, जिसदी चर्चा पैहले पैहल प्रभु दिया बजाह ते होई, कने सुणने आळियां दिया बजाह ते अहां जो निश्च होया । 4 कने इस सौगी ई परमात्मं भी अपणियां इच्छा मताबक नशाणां कने अनोखे कम्मां कने कई किस्मां दे सामर्थी कने पवित्र आत्मां दे वरदाना दे कम्मां दे बंटवारे दिया बजाह ते तिसदी गवाही दिंदे हन ।

अहां दा उद्धारकर्ता

5 तिन्हीं तिस ओणेआळे संसारे जो जिसदी चर्चा अहां करा दे हन, सुअर्गदूतां दे हवाले नी कित्ता । 6 अपर कुणी गलाईये एह गवाही दित्तियो ऐ, "माणु क्या ऐ कि तिसदी सुधि लैदा ऐ? या माणुये दा पुत्र क्या ऐ कि तू तिसदी चिंता करदा ऐ?

7 तैं तिस जो सुअर्गदूतां ते कुच्छ थोड़ा ई हल्का कित्ता; तैं तिस पर महिमा कने आदर दा मुकट रखेया, कने तिसियो अपणे हत्थां दे कम्मां पर हक्क दिता ।

8 तैं सब कुच्छ तिसदे पैरां थलैं करी दिता ।”

इसताई जाहू कि तिन्हीं सब कुच्छ तिसदे अधीन करी दिता, तां तिन्हीं कुच्छ भी रखी नी छडेया जेहड़ा तिसदे अधीन ना होयें । अपर अहां अल्ली तिकर सब कुच्छ तिसदे अधीन नी दिखदे । 9 अपर अहां यीशु जो जेहड़ा सुअर्गदूतां ते कुच्छ थोड़ा ई घट कित्ता था, मौत दा दुख उठाणे दी बजाह महिमा कने आदरे दा मुकट पैहनेयो दिखदे हन, तांकि परमात्मं दे अनुग्रह ते सैह हर इक्क माणु ताई मौता दा सुआद चखें । 10 कजोकि जिस ताई सब कुच्छ ऐ कने जिसदिया बजाह ते सब कुच्छ ऐ, तिसियो ऐही खरा लग्गा कि जाहू सैह मते सारे पुत्रां जो महिमा च पुज्जा, तां तिन्हां दे उद्धार दे कर्ता जो दुख उठाणे दी बजाह ते सिद्ध करे । 11 कजोकि पवित्र करणेआळा कने जेहड़े पवित्र कित्ते जादे हन, सबना दा इक्क ई मूल ऐ; इसा बजाह ते सैह तिन्हां जो भाऊ ग्लाणे ते नी लजांदा । 12 सैह ग्लांदा ऐ,

“मैं तेरा नां अपणे भाऊआं जो सणांगा; सभा दे बीच मैं तेरा भजन गांगा ।”

13 कने भिरी मैं तिस पर भरोसा रखगा ।” कने भिरी एह, “दिक्ख, मैं तिन्हां जागतां सौगी जेहड़े परमात्मं मिन्जो दिक्ते ।”

14 इसताई जाहू कि जागत मांस कने खून दे भागी हन, तां अप्पु भी तिन्हां साइआं तिन्हां दा सेहभागी होई गैआ, तांकि मौता दिया बजाह ते तिसियो जिसियो मौता पर ताकत मिलियो थी, मतलब सताने जो निकम्मा करी दें; 15 कने जितणे मौता दे उरे दे मारे जिन्दगी भर दास बणी करी फंसेयो थे, तिन्हां जो छडाई लें । 16 कजोकि सैह तां सुअर्गदूतां जो नी अपर अब्राहमं दे वंशे जो संभालदा ऐ । 17 इसा बजाह ते तिस जो चाइदा था, कि सारियां गल्लां च अपणे भाऊआं साइआं बणें; जिसते सैह तिन्हां गल्लां च जेहिडयां परमात्मं नैं रिश्ता रखदियां हन, इक्क दयालु कने वसुआसे जोग्गा महायाजक बणें तांकि लोकां दे पापां ताई प्रायश्चित्त करे । 18 कजोकि जाहू तिन्हीं परीक्षा दे बग्त दुख झेलया, तां सैह तिन्हां दी भी मदद करी सकदा ऐ जिन्हां दी परीक्षा होंदी ऐ ।

यीशु मूसा ते म्हान

3 इसताई हे पवित्र भाऊओ, तुहां जेहड़े सुअर्गीय बुलाहटा च भागी हन, तिस चले कने महायाजक यीशु पर जिसियो अहां अंगीकार करदे हन, ध्यान करा । 2 जेहड़ा कि अपणे दासी लगाणे आळे ताई वसुआसे जोग्गा था, जिआं मूसा भी परमात्मं दे सारे घराने च था । 3 कजोकि यीशु मूसा ते इतणां बधी करी महिमा जोग्गा समझेया था, जितणां कि घरे दा बनाणे आळा घरे ते बधी करी आदर रखदा ऐ । 4 कजोकि हर इक्की घरे दा कोई ना कोई बनाणेआळा हुंदा ऐ, अपर जिन्हीं सब कुच्छ बणांया सैह परमात्मां ऐ । 5 मूसा तां परमात्मं दे घरे च सेवके साइआं वसुआसे जोग्गा रहूआ कि जिन्हां गल्लां दी चर्चा होणेआळी थी, तिन्हां गल्लां दी गवाही दें । 6 अपर मसीह पुत्रे साइआं परमात्मे दे घरे दा अधिकारी ऐ; कने तिसदा घर अहां हन ; जे अहां अपणियां हिम्मत पर कने अपणियां आशा दे कर्मडे पर आखरी बगते तिकर मजबूतिया नैं पक्के रहू ।

वेवसुआसे दे खलाफ चतौनी

7 जिआं पवित्र आत्मां ग्लांदा ऐ, “जे अज्र तुहां तिसदी उआज सुणी लेंन, 8 तां अपणे मने जो कठोर मत करा, जिआं कि गुस्सा दिलाणे दे बग्त कने परीक्षा दे बग्त बणे च कित्ता था ।

9 औत्थु तुहां देयां पितरां मिन्जो जांची करी परखेया कने चाली साल तिकर मेरे कम्म दिक्खे ।

10 इसा बजह ते मैं तिस बगते दे लोकां ते गुस्सा रहूआ, कने ग्लाय, इन्हां दे मन सदा भटकदे रहँदे हन, कने इन्हां नैं मेरे रस्ते जो नी पणछेणयां ।”

11 तां मैं गुस्से च आई करी कसम खाई कि सैह मेरे अरामे च दाखल नी होई पांगे ।

12 हे भाऊओ, चुकनै रहूआ कि तुहां च ऐदेया बुरा कने वेवसुआसी मन ना होयें, जेहड़ा तुहां जो जिदे परमात्मं ते दूर हटाई लैई जां । 13 अपर जिस दिन तिकर अज्र दा दिन ग्लांदा हन, हर दिन इक्की दूये जो समझादें रहूआ, इआं ना

होयें कि तुहां च कोई माणु पाप दे छले च आई करी कठोर होई जां ।

14 कजोकि अहां मसीह दे भागी होयो हन, जे अहां अपणे भरोसे पर अंत तिकर मजबूतिया नैं पक्के रहू । 15 जिआं ग्लाय जांदा ऐ, “जे अज्र तुहां तिसदी उआज सुणी, तां अपणे मनां जो कठोर मत करा । जिआं कि गुस्सा दिलाणे दे बग्त कित्ता था ।” 16 खरा कुणी माणुयें सुणी करी भी गुस्सा दिलाया? क्या तिन्हां सबना नी, जेहड़ा मूसा दिया बजाह ते मिस्त्र ते निकाली करी लैई गैआ था? 17 कने सैह चाली साल तिकर कुणां लोकां ते गुस्सा रहूआ? क्या तिन्हां ते नी जिन्हां पाप कित्ता, कने तिन्हां दी लाश बणे च पैई रहूई? 18 कने तिन्हीं कुणाते कसम खाई कि तुहां मेरे अरामे च दाखल नी होई सकदे? क्या सिर्फ तिन्हां नी जिन्हां हुक्म नी मनेया? 19 कने अहां दिखदे हन कि सैह वेवसुआसे दिया बजाह ते दाखल नी होई सके ।

परमात्मं दे लोकां दा अराम

4 इसताई जाहू कि तिसदे अरामे च दाखल होणे दा वचन अज्रे तिकर ऐ, तां अहां जो डरणां चाइदा इआं ना होयें कि तुहां च कोई माणु तिस ते बगैर जाणेयां रहूई जां । 2 कजोकि अहां जो तिन्हां दे साइआं सुसमाचार सणांया ऐ, अपर सुणेयो वचने ते तिन्हां जो कुच्छ फायदा नी होया; कजोकि सुणेने आळ्यां दे मने च वसुआसे नैं नी बैठया । 3 अपर अहां जिन्हां वसुआस कित्ता ऐ, तिस अरामे च दाखल होंदे हन; जिआं तिन्हीं ग्लाय, मैं अपणे गुस्से च कसम खाई कि सैह मेरे अरामे च दाखल नी होई पांगे ।” जे सृष्टिया दी रचना दे बग्त ते पैहलें तिसदे कम्म पूरे होई चुकेयो थे । 4 कजोकि सतमे दिन दे बारे च तिन्हीं इआं ग्लाय ऐ, परमात्मं सतमे दिन अपणे सारे कम्मां जो निपटाई करी अराम कित्ता ।” 5 कने ऐत्थु भिरी एह ग्लांदा ऐ, सैह मेरे अरामे च दाखल नी होई पांगे ।” 6 तां जाहू एह गल्ल बाकि ऐ कि कितणे होर हन जेहड़ा तिस अरामे च दाखल होन, कने जिन्हां जो तिसदा सुसमाचार पैहलें सणाया तिन्हां हुक्म नी मनेणे दिया बजाह ते तिस च दाखल नी होये, 7 इसताई सैह कुस खास दिने जो ठेहराई नैं इतणे दिना बाद दाऊदे दिया कताबा च तिसियो ‘अज्र दा दिन ग्लांदा ऐ । जिआं पैहले ग्लाय गैआ,

“जे अज्र तुहां तिसदी उआज सुणी, तां अपणे मनां जो कठोर मत करा ।”

8 कजोकि जे यहोशू तिन्हां जो अरामे च दाखल कराई लैंदा, तां तिसदे बाद दूये दिने दी चर्चा नी होंदी । 9 जाणी लैआ कि परमात्मं दे लोकां ताई सब्त दा अराम बाकि ऐ; 10 कजोकि जिन्हीं तिसदे अरामे च दाखल होया ऐ, तिन्हीं भी परमात्मं साइआं अपणे कम्मां जो पूरा करी नैं अराम कित्ता ऐ । 11 अहां भी तिस अरामे च दाखल होणे दा कोशश करन, इआं ना होयें कि कोई माणु तिन्हां साइआं हुक्म नी मनी करी थलैं पौन । 12 कजोकि परमात्मं दा वचन जिंदा, कने असरे आळा, कने हर इक्क दू धारां आळिया तलवारा ते भी बड़ा पैना ऐ; कने जान्नां कने आत्मां जो, कने गठी गठी कने गूदे गूदे जो लग्गा करी नैं आर पार विनहदा ऐ कने मने दी भावनां जो कने वचारां जो जांचदा ऐ । 13 सृष्टिया दी कोई भी चीज तिसते छिपियो नी ऐ, अपर जिस नैं अहां जो कम्म ऐ, तिसदियां अंखी सामणे सारियां चीज्जां खुलियां कनेबे पडदा हन ।

बडा महायाजक

14 इसताई जाहू अहां दा ऐदेया मोड्डा महायाजक ऐ, जेहड़ा सुअर्गाह ते होई करी गैआ ऐ, मतलब परमात्मं दा पुत्र यीशु, तां ओआ, अहां अपणे अंगीकारा जो मजबूतिया नैं मनां च सम्भाली रखन । 15 कजोकि अहां दा ऐदेया महायाजक नी जेहड़ा म्हारी कमजोरियां च अहां सौगी दुखी ना होई सकें; अपर सैह सारियां गल्लां च अहां साइआं परखेया तां गैआ, तमी निष्पाप निकळेया । 16 इसताई ओआ, अहां अनुग्रह दे सिंहासणे दे नेडें हिम्मत करी नैं चलन कि अहां पर दया होयें, कने सैह अनुग्रह पान जेहड़ा जरूरतां दे बक्त म्हारी मदद करे ।

5 कजोकि हर इक्क महायाजक माणुआं ते ई लेंदे हन कने माणुआं ई ताई, तिन्हां गल्लां दे बारे च जेहिडयां परमात्मं नैं रिश्ता रखदियां हन, ठेहराया जांदा ऐ कि भेंट कने पाप बळि चढ़ाया करे । 2 सैह अज्ञानियां कने भूले भटकेयां सौगी नर्मियां नैं वर्ताव करी सकदा ऐ, इसताई कि सैह अप्पु भी कमजोरियां नैं घिरेया ऐ । 3 इसताई तिसियो चाइदा कि जिआं लोकां ताई तियां ई अपणे ताई भी पाप बळि चढ़ां करे । 4 एह आदर दा मान कोई अपणे

आपने ते नी लेंदा, जाहू तिकर कि हारुने साइआं परमात्मं दे पास्से ते ठेहराया नी जां ।

5 तिआं मसीह नैं भी महायाजक बणने दी बढाई अप्पु नी लैई, अपर तिस जो तिन्हीं दिक्ती, जिन्हीं तिस नैं ग्लाय़ा था,

“तू मेरा पुत्तर ऐ, अज़्र मैं ई तिज़ो पैदा कित्ता ऐ ।”

6 इसी तरांह सैह दूईया जगाह च भी ग्लांदा ऐ, “तू मलिकिसिदके साइआं सदा ताई याजक ऐ ।”

7 यीशुयें अपणी शरीरे च रैहणे दे दिनां च उंची उआजां नैं पुकारी पुकारी करी कने अंखी भरी भरी नैं तिसते जेहड़ा तिसजो मौता ते बचाई सकदा था, प्रार्थनायें कने विणती किक्ती, कने भक्तिया दिया बजाह ते तिसदी सुणी गैई । 8 पुत्तर होणे पर भी तिन्हीं दुख झेली झेली नैं हुक्म मनणा सिखेया, 9 कने सिद्ध बणीकरी, अपणे सारे हुक्म मनणे आळेया ताई सदा काल दे उद्धारे दी बजाह होई गैआ, 10 कने तिसियो परमात्मं दे पास्से ते मलिकिसिदके साइआं महायाजक के दा औधा मिलेया ।

वसुआसे ते भटकी जाणे दा परमाण

11 इसदे बारे च अहां जो मत्तियां सारियां गलां ग्लाणियां हन, जिन्हां जो समझणां भी ओखा ऐ, इसताई कि तुहां उंचा सुणणा लगी पैयो । 12 बगते दे साहभे नैं तां तुहां जो गुरु होई जाणा चाइदा था, तमी एह जरूरी होई गैआ ऐ कि कोई तुहां जो परमात्मं दे वचनां दी शुरु ते शिक्षा भिरी ते सखां । तुहां तां ऐदेय होई गै हन कि तुहां जो अनाजे दे बदलें अली तिकर दू ई चाइदा ।

13 कजोकि दू पीणेआळे बच्चे जो तां परमात्मं दे वचना दी पणछेण नी होंदी, कजोकि सैह मुन्नू ऐ । 14 अपर अनाज सयाणेयां ताई ऐ, जिन्हां दी समझ तजरबा करदे करदे, खरे बुरे दे बारे दा भेद करणे ताई पक्के होई गैयो हन,

6 इसताई ओआ मसीह दी शिक्षा दी शुरु दी गलां जो छड्डी करी अहां सिद्धता दी कनारी गांह बधदे जान, कने मरेयो कम्मां ते मन फिराणे, कने परमात्मं पर वसुआस करणे, 2 कने बपतिस्मं कने हत्थ रखणे, कने मरेयां दे जिदे होणे, कने आखरी न्याय दी शिक्षा रूपी नीई भिरी ते नी पान । 3 जे परमात्मां चां तां अहां ऐही करणे । 4 कजोकि जिन्हां इक्क बरी जोती पाई ऐ, कने जेहड़े सुअर्गीय वरदान दा सुआद चखी चुकेयो हन कने पवित्र आत्मां दे भागी होई गै हन, 5 कने परमात्मं दे उतम वचने दा कने ओणेआळे जुगे दी सामर्थी दा सुआद चखी चुकेयो हन, 6 जे सैह भटकी जान तां तिन्हां जो मन फिराव ताई नौआं बणांना अनहोणी गल्ल ऐ; कजोकि सैह परमात्मं दे पुत्तरे जो अपणे ताई भिरी सुलिया पर चढांदे हन कने प्रकट च तिस पर कलंक लगांदे हन । 7 कजोकि जेहड़ी जमीन बरखा दे पाणिये जो, जेहड़ा तिसा पर बार बार पोंदा ऐ, पी पी करी जिन्हां लोकां ताई सैह बाई कने बीजी जांदी ऐ तिन्हां दे कम्म दा साग सब्जी पैदा करदी ऐ, सैह परमात्मं ते आशीष पांदी ऐ । 8 अपर जे सैह झाड़ियां कने कंडे पैदा करदी ऐ, तां निकम्मी कने श्राफे आळी ऐ, कने तिसादा अंत फुकी दैणे साइआं ऐ ।

9 अपर हे प्यारेयो, जे अहां एह गलां ग्लांदे हन तमी तुहां दे बारे च अहां इसते छैल कने उद्धारआळियां गलां दा भरोसा करदे हन । 10 कजोकि परमात्मां अन्यायी नीयें कि तुहां दे कम्म, कने तिस प्यारे जो भूली जां, तां तुहां तिसदे नांये ताई इस तरीके नैं दस्सया, कि पवित्र लोकां दी सेवा किक्ती कने करा दे भी हन । 11 अपर अहां सब चाहंदे हन कि तुहां च हर इक्क माणु अंत तिकर पूरी आशा ताई इन्हीं साहभें ई कोशश करदा रैह । 12 तांकि तुहां आलसी नी होई जान, अपर तिन्हां दे पचांह चलन जेहड़ा वसुआस कने धीरजे दिया बजाह ते प्रतिज्ञा दे वारस होंदे हन ।

परमात्मं दी अटल प्रतिज्ञा

13 परमात्मं अब्राहमे ते प्रतिज्ञा दिंदे बग्त जाहू एह परखेया कि कसम खाणे ताई तां तिस ते बडा होर कोई ऐ ई नी, तां अपणी ई कसम खाई करी गलाणां लंगा, 14 “मैं सचमुच तिज़ो बड़ी आशीष दिंगा, कने तेरी औलाद जो बधांदा जांगा ।” 15 कने इसा बजाह ते तिन्हीं शबर रखी करी प्रतिज्ञा दी सारियां गलां हासल किक्तियां । 16 माणु तां अपणे ते बडे दी कसम खांदा ऐ कने तिन्हां दे हर इक्की झगड़े दा फैसला कसमा ते पक्का हुंदा ऐ । 17 इसताई जाहू परमात्मं प्रतिज्ञा दे वारसां पर होर भी साफ तरीके नैं प्रकट करणां चाया कि तिसदी मनसा बदली नी सकदा, तां कसमा जो बीच लैई आया । 18 तांकि दू

ना बदलणे आळी गलां दिया बजाह ते, जिन्हां दे बारे च परमात्मं दा झूठा ठेहराणा अनहोणां ऐ, अहां जो पक्का होई नैं हौंसला रखणां चाइदा, जेहड़े पनाह लैणे जो इसताई दौड़े हन कि तिसा आशा जो जेहड़ी सामणे रखियो ऐ हासल करन । 19 सैह आशा म्हारिया जात्री ताई समंदरी चाहजां दे लंगरा साइआं ऐ जेहड़ा पक्का कने मजबूत ऐ, कने पडदे दे अंदरे तिकर पुज्जदा ऐ, 20 जित्थु यीशुयें मलिकिसिदके दिया रीतिया पर सदा काल दा महायाजक बणी करी अहां ताई अगुवे दे रूपे च दाखल कित्ता ऐ ।

मलिकिसिदक याजक

7 एह मलिकिसिदक शालेम दा राजा कनेपरमप्रधान परमात्मं दा याजक, सदा याजक बणी रैहदा ऐ । जाहू अब्राहम राजेयां जो मारी करी वापस ओआ दा था, तां इन्हीं तिस नैं मिली करी तिसियो आशीष दिक्ती । 2 इसी जो अब्राहमे सारी चीज्जां दा दसवां हिस्सा भी दिक्ता । एह पैहले अपणे नां दे मतलब दे मताबक, धर्म दा राजा ऐ । 3 जिसदा ना बुड़ा, ना मां, ना वंशावली ऐ, जिसदे दिना दा ना शुरुआत ऐ, कने ना जिन्दगिया दा अंत ऐ; अपर परमात्मं दे पुत्तरे साइआं ठेहरी करी सदा ताई याजक बणी रैहदा ऐ ।

4 हुण इस पर ध्यान करा कि सैह किना म्हांन था जिसजो कुलपति अब्राहमे लूटा ते अच्छे ते अच्छे माल दा दसवां हिस्सा दिक्ता । 5 लेवी दी औलादा च जेहड़े याजके दा औधा पांदे हन, तिन्हां जो हुक्म मिलेया ऐ कि लोकां, मतलब अपणे भाऊआं ते, चाहे सैह अब्राहमे ते ई कजो नी जम्मेयो हान, व्यवस्था दे मताबक दसवां हिस्सा लैन । 6 अपर इन्हीं, जेहड़ी तिन्हां दिया वंशावली दा भी नी था, अब्राहमे ते दसवां हिस्सा लैआ, कने जिसियो प्रतिज्ञा मिलियो थी तिसियो आशीष दिक्ती । 7 इस च शक नी कि छोटा बडे ते आशीष पांदा ऐ । 8 कने ऐत्थु तां मरनहार माणु दसवां हिस्सा लैंदे हन, अपर औत्थु सैई लेंदा ऐ जिसदी गवाही दिक्ती जादी ऐ कि सैह जिंदा ऐ । 9 तां अहां एह भी ग्लाई सकदे हन कि लेवीये भी, जेहड़ा दसवां हिस्सा लैंदे हन, अब्राहमे दिया बजाह ते दसवां हिस्सा दिक्ता । 10 कजोकि जिस बग्त मलिकिसिदक तिसदे बुडे नैं मिलेया तां तिस बग्त सैह अपणे बुडे दे शरीरे च था ।

मलिकिसिदके साइआं दूआ याजक

11 जे लेवीय याजक औधे दिया बजाह ते सिधी हासल होई सकदी ऐ तां (जिसदे सहारे लोकां जो व्यवस्था मिलियो थी) तां भिरी क्या जरूरत थी कि दूआ याजक मलिकिसिदक दी रीतिया पर खडुन्दा, कने हारुन दी रीतिया दा नी समझेया गैआ? 12 कजोकि जाहू याजके दा औधा बदली जांदा ऐ, तां व्यवस्था दा भी बदलूणा जरूरी ऐ । 13 कजोकि जिसदे बारे च एह गलां ग्लाईयां जांदियां हन कि सैह दूये गोत्रे दा ऐ, जिस च कुणी भी वेदी दी सेवा नी किक्ती, 14 तां प्रकट ऐ कि अहां दा प्रभु यहूदा दे गोत्रे ते पैदा होया ऐ, कने इस गोत्रे दे बारे च मूसें याजकें औधे दी कुच्छ चर्चा नी किक्ती ।

15 अहां दा दावा होर भी सफाईया नैं प्रकट होई जांदा ऐ, जाहू मलिकिसिदक साइआं इक्क होर याजक पैदा होई जांदा ऐ, 16 जेहड़ा शरीरी हुक्मे दी व्यवस्था दे मताबक नी, अपर नाश ना होणे आळी जिन्दगिया दी सामर्थी मताबक नियुक्त होया होयें । 17 कजोकि तिसदे बारे च एह गवाही दिक्ती गैई ऐ,

“तू मलिकिसिदक दी रीतिया पर जुगा जुग तिकर याजक ऐ ।”

18 इन्हीं साहभें पैहला हुक्म कमजोर कने निष्फल होणे दिया बजाह ते लोप होई गैआ । 19 (इसताई कि व्यवस्था नैं कुसा गला दी सिधी नी किक्ती), कने तिसदिया जगाह पर इक्क ऐदेई उतम आशा रखी गैई ऐ जिसदिया बजाह ते अहां परमात्मं दे नैडै जाई सकदे हन । 20 इसताई कि मसीह दी नियुक्ति बगैर कसमा ते नी होई, 21 कजोकि सैह तां बगैर कसमा याजक ठेहरायें गै अपर एह कसमा सौगी तिसदिया तरफा ते नियुक्त कित्ता गैआ जिन्हीं तिसदे बारे च ग्लाय़ा,

“प्रभुयें कसम खाई, कने सैह तिसते भिरी नी पछतां कि तू जुगा जुग तिकर याजक ऐ ।”

22 इन्हीं साहभें यीशु इक्क उतम वादे दा जांमिन ठेहरया । 23 सैह तां मते सारे याजक बणदे आयें, इसदी बजाह एह ऐही कि मौत तिन्हां जो रैहणां नी

दिंदी थी; 24 अपर एह जुगा जुग रँहदा ऐ, इसा बजाह ते तिसदा याजके दा पद अटल ऐ । 25 इसताई जेहडे तिसदिया बजाह ते परमात्मं अल्ल ओंदे हन, सैह तिन्हां पूरा पूरा उद्धार करी सकदा ऐ, कजोकि सैह तिन्हां ताई विणती करणे जो सदा जिदा ऐ ।

26 कने देहया ई महायाजक अहां दे जोग्गा था जेहड़ा पवित्र, कने निष्कपट, कने साफ, कने पापियां ते लग्ग, कने सुअर्गे ते भी ऊचा कित्या होयें । 27 तिन्हां महायाजकां साइआं तिसियो जरूरी नी कि हर रोज पैहलें अपणे पापां कने भिरी लोकां दे पापां ताई बलिदान चढ़ां; कजोकि तिन्हीं अपणे आप्पे जो बलिदान चढ़ाई करी तिसियो इक्क ई बरी च पूरा करी दित्या । 28 कजोकि व्यवस्था तां कमजोर माणुआं जो नियुक्त करदी ऐ, अपर तिसा कसमा दा वचन, जेहड़ी व्यवस्था दे खाई गई, तिस पुत्तरे जो नियुक्त करदा ऐ जेहड़ा जुगा जुग ताई सिद्ध कित्ता गैआ ऐ ।

यीशु अहां दा महायाजक

8 हुण जेहड़ियां गलां अहां ग्ला दे हन तिन्हां च सारेयां ते बडी गल्ल एह ऐ कि अहां दा देहया महायाजक ऐ, जेहड़ा सुअर्गे पर महामहिन दे सिंहासन दे सज्जे बक्खें जाई बैठेया ऐ, 2 कने पवित्र जगाह कने तिस सच्चे तम्बू दा सेवक होया जिसियो कुणी माणुयें नी, अपर प्रभुयें खड़ा कित्या ऐ । 3 कजोकि हर इक्क महायाजक भेंट कने बलिदान चढ़ाणे ताई ठेहराया जांदा ऐ, इसा बजाह ते जरूरी ऐ की इस याजक अल्ल भी चढ़ाणे ताई होयें । 4 जे सैह धरतिया पर हुंदा तां कदी याजक नी होंदा, इसताई कि व्यवस्था मताबक भेंट चढ़ाणे आळे तां हन । 5 जेहडे सुअर्गे दी चीजां दे प्रतिरूप कने प्रतिबिम्ब दी सेवा करदे हन; जिआं जाहू मूसा तम्बू बनाणे पर था, तां तिसियो एह चतौनी मिली, “दिख जेहड़ा नमूना तिजो प्हाड़े पर दस्सेया था, तिसदे मताबक सब कुच्छ बनाणां ।” 6 अपर तिन्हां याजकां ते बधीकरी सेवा यीशु जो मिली कजोकि सैह होर भी उत्तम वादे दा मध्यस्थ ठेहरया, जेहड़ा होर उत्तम प्रतिज्ञा दे सहारे बन्नेया ऐ ।

7 कजोकि जे सैह पैहला वादा बेकसूर होंदा, तां दूये ताई मौका तोपया जांदा । 8 अपर सैह तिन्हां पर दोष लगाई नैं ग्लांदा ऐ,

“प्रभु ग्लांदा ऐ, दिखा, सैह दिन ओणे आळे हन कि मैं इस्राएले दे घराणे सौगी कने यहूदा दे घराणे सौगी नौआं वादा बन्गा ।

9 एह तिस वादे साइआं नी हुंगा, जेहड़ा मैं तिन्हां पितरां सौगी तिस बत बन्नेया था, जाहू मैं तिन्हां दा हत्थ पकड़ी नैं तिन्हां जो मिस्र देश कड्डी लैई आया; कजोकि सैह मेरे वादे पर टिके नी रँह, इसताई मैं तिन्हां सुधि नी लैई, प्रभु ऐही ग्लांदा ऐ ।

10 भिरी प्रभु ग्लांदा ऐ, कि जेहड़ा वादा मैं तिन्हां दिना दे बाद इस्राएले दे घराणे सौगी बन्गा, सैह एह ऐ कि मैं अपणिया व्यवस्था जो तिन्हां दे मनां च पांगा, कने तिसियो तिन्हां दे मनां पर लिखगा कने मैं तिन्हां दा परमात्मां ठेहरांगा कने सैह मेरे लोक ठेहरगे ।

11 कने हर इक्क अपणे देश आळे जो कने अपणे भाऊ जो एह शिक्षा नी दिंगा कि तू प्रभु जो पणछेण कजोकि छोटियां ते कने बडेयां ते लैई सारे मिन्जो जाणी लगे ।

12 कजोकि मैं तिन्हां दे बुरे कम्मां दे बारे च दयावन्त हुंगा, कने तिन्हां दे पापां जो भिरी याद नी करगा ।”

13 नौये वादे दी स्थापना ते तिन्हीं पैहले वादे जो पराणां ठेहराई दित्ता; कने जेहड़ा चीज पराणी कने खराब होई जांदी ऐ तिसादा मुकी जाणा जरूरी ऐ ।

पार्थिव तम्बू च सेवा

9 तिस पैहले वादे च भी सेवा दे नियम थे, कने ऐदेई पवित्र जगाह थी जेहड़ी इस संसारे दी थी । 2 कजोकि इक्क तम्बू बणाया, पैहले तम्बू च दिय्या, कने मेज कने भेंट दी रोटियां थी; कने तिसा जगाह जो पवित्र जगाह ग्लांदा हन । 3 कने दूआ पड़दे दे पचांह सैह तम्बू था, जेहड़ा परमपवित्र जगाह थी । 4 तिस सोने दी धूपदानी कने चौनी पासस वादे दा सणूक कने इस च मन्ने नैं भरौया मर्तबान कने हारुने दी सोठी जिस च फूल फळ आई रँहौ थे कने वादे दी पट्टी थी । 5 तिस ऊपर दोयो तेजस्वी करुब थे; जेहडे प्रायश्चित दे ढकणे पर छों करा करदे थे; इन्हां दा इक्क इक्क करी नैं वखान करणे दा हुण बत नी ऐ ।

6 जाहू एह सब चीजां त्यार होई गई । तां पैहले तम्बू च याजक हर बग्त अंदर सेवा दे कम्म पूरे नभांदे थे, 7 अपर दूये च सिर्फ महायाजक साले च इक्क बरी जांदा ऐ, कने बगैर खून लैई नैं नी जांदा; जिसियो सैह अपणे ताई कने लोकां दी भूल चूक ताई चढ़ांदा ऐ । 8 इसते पवित्र आत्मां एही दस्सदा ऐ कि जाहू तिकर पैहला तम्बू खड़ा ऐ, ताहू तिकर पवित्र जगाह दा रस्ता प्रकट नी होया । 9 एह तम्बू अज्ज दे बग्त ताई इक्क उदारण ऐ; जिस च इतणी भेंट कने बलिदान चढ़ाये जांदे हन, जिन्हां ते अराधना करणेआळ्यां दे विवेक सिध नी होई सकदे । 10 कजोकि सैह सिर्फ खाणे पीणे दी चीजां कने भांति भांति दी न्हौणे दे विधाना दे मताबक शरीरी नियम हन, जेहडे सुधारे दे बग्त तिकर नियुक्त कित्तेयो हन ।

मसीह दे खून दी सामर्थ

11 अपर जाहू मसीह ओणेआळी खरियां खरियां चीजां दा महायाजक होई नैं आया, तां तिन्हीं होर भी बडे सिद्ध तम्बू ते होई नैं जेहड़ा हत्थे दा बणाया नी ग्लाणे दा मतलब इसा सृष्टिया दा नी, 12 कने छेलूयां कने भेडूयां दे खूने दिया बजाह ते नी अपर अपणे ई खूने दिया बजाह ते इक्क ई बरी पवित्र जगाह च दाखल होया कने सदा दा छुटकारा पाया । 13 कजोकि जाहू छेलूयां कने दांदां दा खून कने कलोरे दी धूड़ दा अपवित्र माणु पर छिड़णे ते शरीरे दी बुराईयां ताई तिन्हां जो पवित्र करदा ऐ, 14 तां मसीह दा खून जिन्हीं अपणे आप्पे जो सनातन आत्मां दिया बजाह ते परमात्मं सामणे निर्दोष चढ़ाया, तुहां दे विवेके जो मरेयो कम्मां ते कजो नी शुद्ध करगा तांकि तुहां जिंदे परमात्मं दी सेवा करा । 15 इसा बजाह ते सैह नौये वादे दा मध्यस्थ ऐ, तांकि तिसदिया मौता दिया बजाह ते जेहड़ा पैहले वादे दे बगते दे अपराधां ते छुटकारा पाणे ताई होया ऐ, सदेयो लोक प्रतिज्ञा मताबक सदा दी मीरास जो पान ।

16 कजोकि जित्थू वादा कित्ता ऐ औत्थू वादा करणे आळे दी मौता जो भी दी समझी लैणां जरूरी ऐ । 17 कजोकि ऐदेया वादा मरणे पर पक्का हुंदा ऐ, कने जाहू तिकर वादा करणे आळा जिदा रँहदा ऐ ताहू तिकर वादा कम्मे दा नी हुंदा । 18 इस ताई पैहला वादा भी बगैर खूने ते नी कित्ता गैआ । 19 कजोकि जाहू मूसा सारेयां लोकां जो व्यवस्था दा हर इक्क हुक्म सणाई बैठा तां तिन्हीं भेडूयां कने छेलूयां दा खून लैई नैं, पाणी कने लाल ऊन कनेजूफे सौगी तिसा कताबा पर कने सारेयां लोकां पर छिड़की दित्ता । 20 कने ग्लायो, “एह तिस वादे दा खून ऐ, जिसदा हुक्म परमात्मं तुहां ताई दित्ता ऐ ।” 21 कने इसा बजाह ते तिन्हीं तम्बू कने सेवा दे सारियां चीजां पर खून छिड़केया । 22 सच तां एह ऐ कि व्यवस्था मताबक अपर सारियां चीजां खून दिया बजाह ते शुद्ध कित्ती जांदियां हन, कने बगैर खून चढ़ाये पापां दी माफी नी ।

मसीह दे बलिदाने दिया बजाह ते पाप - माफ

23 इसताई जरूरी ऐ कि सुअर्गे दी चीजां दे प्रतिरूप इन्हां बलिदानां दिया बजाह ते शुद्ध कित्ते जान अपर सुअर्गे दी चीजां अप्पु इन्हां ते उत्तम बलिदानां दिया बजाह ते शुद्ध कित्ती जांदियां । 24 कजोकि मसीह नैं तिस हत्थे दी बणाई होई पवित्र जगाह च, जेहडे सच्ची पवित्र जगाह दा नमूना ऐ, अंदर नी गैआ अपर सुअर्गे च प्रवेश कित्ता, तांकि अहां ताई हुण परमात्मं सामणे दिखाई दें । 25 एह नी कि सैह अपणे आप्पे जो बार बार चढ़ा, जिआं कि महायाजक हर साल दूये दा खून लैई करी पवित्र जगाह च प्रवेश करा करदा ऐ, 26 नी तां संसारे दी उत्पति ते लैई नैं तिसजो बार बार दुख उठाणां पोंदा; अपर हुण जुगे दे अंत च सैह इक्क ई बरी प्रकट होया ऐ, तांकि अपणे ई बलिदाने दिया बजाह ते पापे जो दूर करी दें । 27 कने जिआं माणु ताई इक्क बरी मरणा कने तिसदे बाद न्याय दा होणां नियुक्त ऐ, 28 तिआं ई मसीह भी सारी मानव जाति दे पापां जो चुकणे ताई इक्क बरी बलिदान होया; कने जेहडे लोक तिसदा इंतजार करदे हन तिन्हां दे उद्धारे ताई दूई बरी बगैर पाप चुके दस्सी दिंगा ।

म्हान बलिदान

10 कजोकि व्यवस्था जिस च ओणे आळी खरी खरी चीजां दा प्रतिबिम्ब ऐ अपर तिन्हां दा असली स्वरूप नी इसताई तिन्हां इक्को ई तरांह दे बलिदानां दिया बजाह ते जेहड़ा हर साल अचूक चढ़ाये जांदे हन,

बकखे ओणेआळ्यां जो कदी भी सिद्ध नी करी सकदी । 2 ना तां तिन्हां दा चढाणा बंद कजो नी होई जांदा? इसताई जाहू सेवा करणे आळे इक्को ई बरी शुद्ध होई जांदे, तां भिरी तिन्हां दा विवेक तिन्हां जो पापी नी ठेहरांदा ।

3 अपर तिन्हां दिया बजाह ते हर साल पापां दी याद करदे हन । 4 कजोकि एह ना होणे आळी गल्ल ए कि दांदां कने छेलूयां दा खून पापां जो दूर करे ।

5 इसा बजाह ते सैह संसारे च ओंदे बत ग्लांदा ऐ, "बलिदान कने भेंट तें नी चाई अपर मिन्जो ताई इक्क शरीर त्यार किती ।

6 होम बलियां करणे कने पाप बलियां चढाणे ते तू खुश नी होया ।

7 ताहू मैई ग्लाय, दिख, मैं आईया ऐ, पवित्र शास्त्र च मेरे बारे च लिख्या होया ऐ, तांकि ऐ परमात्म, तेरी इच्छा पूरी करे ।"

8 ऊपर तां सैह ग्लांदा ऐ, ना तें बलिदान कने भेंट कने होम बलियां कने पाप बलियां जो चाया, कने ना तिन्हां ते खुश होया," जे एह बलिदान तां व्यवस्था मताबक चढाये जांदे हन । 9 भिरी एह भी ग्लांदा ऐ, दिख मैं आईया ऐ, तांकि तेरी इच्छा पूरी करे, पैहले जो तां सैह चुकी दिंदा ऐ, तांकि दूये जो नियुक्त करे । 10 तिसा इच्छा ते अहां यीशु मसीह दे अपणे शरीरे दे इक्को ई बरी बलिदान चढाणे दिया बजाह ते पवित्र किस्ते गै हन ।

11 हर इक्क याजक तां खडे होई नैं हर दिन सेवा करदा ऐ, कने इक्क ई तराह दे बलिदान जो जेहडे पापां जो कदी दूर नी करी सकदे, बार बार चढांदे हन ।

12 अपर एह माणु तां पापां दे बदले इक्क ई बलिदान सदा ताई चढाई करी परमात्म दे सजे बकखे जाई बैठा, 13 कने तिस बग्त ते इसदा इंतजार करदा ऐ, कि तिसदे बैरी तिसदे पैरां दे थलै दी पीढी बणे । 14 कजोकि तिन्हीं इक्को ई चढावे दिया बजाह ते तिन्हां जो जेहडे पवित्र किस्ते जांदे हन, सदा ताई सिद्ध करी दिता ऐ । 15 कने पवित्र आत्मां भी अहां जो ऐही गवाही दिंदा ऐ; कजोकि तिन्हीं पैहलें ग्लाय था,

16 प्रभु ग्लांदा ऐ कि जेहडा वादा मैं तिन्हां दिनां बाद तिन्हां नैं करणे हन सैह एह हन कि मैं अपणी व्यवस्था जो तिन्हां दे मनां पर लिखगा कने मैं तिन्हां दिया अक्का च पांगा ।"

17 भिरी सैह एह ग्लांदा ऐ, मैं तिन्हां दे पापां जो कने तिन्हां दे अधर्म दे कम्मां जो भिरी कदी याद नी करगा ।" 18 कने जाहू इन्हां दी माफी होई गैई ऐ, तां भिरी पापे दा बलिदान नी रैहूआ ।

परमात्म दे नैडे जा

19 इसताई हे भाऊओ, जाहू अहां जो यीशु दे खूने दिया बजाह ते तिस नौये कने जिंदे रस्ते ते पवित्र जगाह च दाखल होणे हिम्मत होई गैई ऐ, 20 जेहडा तिन्हीं पडदे मतलब अपणे शरीर च होई नैं अहां ताई अभिषेक किता ऐ, 21 कने इसताई कि अहां दा इतणा म्हान याजक ऐ, जेहडा परमात्म दे घरे दा अधिकारी ऐ, 22 तां ओआ, अहां सच्चे मने कने पूरे वसुआसे सौगी कने अपणियां अक्का दा दोष दूर करणे ताई मने पर छिडकाव लैई करी, कने शरीरे जो शुद्ध पाणी नैं धोई करी परमात्म बकखें जान । 23 ओआ अहां अपणी आशा दे अंगीकारे जो दिले नैं सम्भाली रखन, कजोकि जिन्हीं प्रतिज्ञा किती ऐ, सैह सच्चा ऐ; 24 कने प्यार कने खरे कम्मां च करणे ताई अहां इक्की दूये दी चिंता करा करे । 25 कने इक्की दूये सौगी किट्टे होणां ना छड्डा, जिआं कि कितणयां दी रीति ऐ, अपर इक्की दूये जो समझांदे रैहू: कने जिआं जिआं तिस दिने जो नैडे ओंदे दिख्या तिआं तिआं होर भी जादा एह करा करा ।

26 कजोकि सचाईया जो जाणने दे बाद जे अहां जाणी बुझी करी पाप करदे रैहू, तां पापां ताई भिरी कोई बलिदान नी । 27 हां, सजा दा इक्क डरौणे रस्ते दा इंतजार करणां कने अग्नी दा बळणा बाकी ऐ जेहडी विरोधियां जो फुकी करी धूड करी दिंदा । 28 जाहू मूसा दी व्यवस्था नी मनणेआळा, दूँ या त्रीं माणुआं दी गवाहिया पर बगैर दया मारी दिता जांदा ऐ, 29 तां सोची लैआ कि सैह कितणी भारी सजा दे जोगे होणे हन, जिन्हीं परमात्म दे पुत्रे जो पैरां नैं रौळ्या कने वादे दे खूने दा जिस दिया बजाह ते सैह पवित्र ठेहराया गैआ था, अपवित्र मन्त्रेया ऐ, कने अनुग्रह दी आत्मां दा अपमान किता । 30 कजोकि अहां तिसियो जाणदे हन, जिन्हीं ग्लाय, बदला लेणां मेरा कम्म ऐ, मैई बदला दिंगा ।" कने भिरी एह कि "प्रभु अपणे लोकां दा न्याय करगा ।" 31 जिंदे परमात्म दे हत्थां च पोणा डरौणी गल्ल ऐ ।

32 अपर तिन्हां पचाह आळ्यां दिनां जो याद करा, जिन्हां च तुहां जोती पाई करी दुखां दे झमले च टिकी रैहू 33 कदी कदी तां इआं कि तुहां निंदा कने क्लेश संहदे होये तमाशा बणे, कने कदी इआं तुहां तिन्हां दे साझी होये

जिन्हां दी बुरी हालत किती जांदी थी । 34 कजोकि कि तुहां कैदियां दे दुखे च भी दुखी होये कने अपणी धन दौलत भी खुशिया नैं लुटणा दिती; एह जाणी करी कि तुहां अल्ल इक्क होर भी उतम कने सदा काल तिकर ठेरणे आळी दौलत ऐ । 35 इसताई अपणी हिम्मत मत छड्डा कजोकि तिसदा प्रतिफल बडा ऐ । 36 कजोकि तुहां जो शबर रखणां जरूरी ऐ, तांकि परमात्म दी इच्छा जो पूरी करी नैं तुहां प्रतिज्ञा दा फळ पा ।

37 कजोकि हुण बडा ई थोडा बग्त रैई गैआ ऐ, जाहू कि ओणे आळें ओंगा कने देर नी करगा ।

38 अपर मेरा धर्मी जण वसुआसे नैं जिंदा रेंह्या, कने जे सैह पचाह हटी जां तां मेरा मन तिसते खुश नी हुगा ।" 39 अपर अहां वापस जाणे आळें नी कि नाश होई जान अपर वसुआस करणेआळें हन कि जानी जो बचान ।

11 हुण वसुआस आशा किस्तियां चीजां दा निश्चा, कने नी दिखियां चीजां दा सबूत ऐ । 2 कजोकि इसदे बारे च पुराणे जमाने दे माणु दी खरी गवाही दिती गैई । 3 वसुआस ते ई अहां जाणे जांदे हन कि सारी सृष्टि दी रचना परमात्म दे वचने दिया बजाह ते होई ऐ । अपर एह नी कि जेहडा कुच्छ दिखणे च ओंदा ऐ, एह दिखियां चीजां ते बणयां होये । 4 वसुआस ते ई हाबिलें कैने ते उतम बलिदान परमात्म ताई चढाया, कने तिसदिया बजाह ते तिसदे धर्म होणे दी गवाही भी दिती गैई, कजोकि परमात्म तिसदी भंटा दे बारे च गवाही दिती; कने तिसदिया बजाह ते सैह मरने ते बाद भी अल्ली तिकर गल्लां करदा ऐ । 5 वसुआस ते ई हनोक चुकी लैआ गैआ कि मौती जो नी दिक्खें, कने तिसदा पता भी नी लग्गा कजोकि परमात्म तिसियो उचुकी लैआ था, कने तिसदे चुकणे ते पैहलें तिसदी एह गवाही दिती गैई थी कि तिन्हीं परमात्म जो खुश किता ऐ । 6 कने वसुआसे बगैर तिसियो खुश करणां अनहोणां ऐ; कजोकि परमात्म दे बकखें ओणेआळ जो वसुआस करणां चाइदा कि सैह ऐ, कने अपणे तोपणेआळ्यां जो प्रतिफल दिंदा ऐ । 7 वसुआस ते ई नूहें तिन्हां गल्लां दे बारे च जेहड्यां तिस बग्त दुस्सदियां नी थियां चतौनी पाई करी भक्ति सौगी अपणे टबरे जो बचाणे ताई चाहज बणाया, कने तिसदिया बजाह ते तिन्हीं संसारे जो दोषी ठेहराया; कने तिस धर्म दे वारस होया जेहडा वसुआसे ते हुंदा ऐ । 8 वसुआस ते ई अब्राहम जाहू सदेया तां हुक्म मनी करी ऐसिया जगाह चली गैआ जिथू सैह मीरास लैणेआळा था; कने एह नी जाणदा था कि मैं कुत्थू चलेया ऐ भिरी भी सैह चली गैआ ।

9 वसुआस ते ई तिन्हीं प्रतिज्ञा किस्तेयो देस च, पराये देशे च परदेसिये साइआं रैई करी इसहाके कने याकूबे सौगी जेहडा तिस सौगी तिसा प्रतिज्ञा दे वारस थे, तम्बुआं च वास किता । 10 कजोकि सैह तिस पक्के सैहरे दा रस्ता तोपदा था, जिसियो रचणे आळा कने बणाने आळा परमात्मां ऐ । 11 वसुआसे ते ई अब्राहमं दी लाडी जिसदा नां सारा था, बूढी होणे पर भी गर्भ धारण करणे दी सामर्थ पाई, कजोकि तिन्हीं प्रतिज्ञा करणे आळें जो सच्चा जाणेयां था ।

12 इसा बजाह ते इक्को ई माणु ते, जेहडा मरेया था, अम्बरे ते तारेयां साइआं कने समुंदरे दे (कनडै) तीर दी रता साइआं अणगिणत वंश पैदा होये ।

13 एह सारे ई वसुआसे दी हालता च मरे कने तिन्हां प्रतिज्ञा किस्तियां चीजां नी पाईयां, अपर तिन्हां जो दूरे ते दिक्खी करी खुश होये कने मनी लैआ कि अहां धरती पर परदेशी कने बाहरे दे माणु हन । 14 जेहडा ऐदेइआं गल्लां ग्लांदा हन, सैह दुस्सदे हन कि अपणे सुअर्ग देशे दी तोपा च हन । 15 कने जिस देस च सैह निकळी आयेयो थे, जे सैह तिसदी सुधि करदे तां तिन्हां जो वापस जाणे दा मौका था । 16 अपर सैह इक्क उतम मतलब सुअर्गीय देशे दे अभिलाषी हन; इसताई परमात्मां तिन्हां दा परमात्मां केहलाणे च तिन्हां ते नी लजांदा कजोकि तिन्हीं तिन्हां ताई इक्क सैहर त्यार किता ऐ । 17 वसुआस ते ई अब्राहमं परखणे दे बग्त च, इसहाके जो बलिदान चढाया; कने जिन्हीं प्रतिज्ञां जो सच मन्त्रेयां था । 18 कने जिस नैं एह ग्लाय था, "इसहाके ते तेरा वंश केहललांगा सैह अपणे इक्क पुत्रे जो चढाणा चली गैआ । 19 कजोकि तिन्हीं मनी लैआ, कि परमात्मां सामर्थी ऐ कि तिसियो मरेयां ते भिरी जिंदा कित्या; तिन्हां ई च दृष्टांतां दी रीति पर सैह तिसियो भिरी मिलेया ।

20 वसुआस ते ई इसहाके याकूबे कने एसावे जो ओणे आळियां गल्लां दे बारे च आशीष दिती । 21 वसुआस ते ई याकूबे मर दे बगते युसुफे दे दूनी पुत्रां जो इक्क इक्क करी आशीष दिती कने अपणियां सोठिया दा साहरा लैई नैं दंडवत किता । 22 वसुआस ते ई युसुफे, जाहू सैह मरणे पर था, तां इस्राएले दी औलाद दे निकळणे दे बारे च चर्चा किती, कने अपणी हड्डी दे बारे च हुक्म दिता । 23 वसुआस ते ई मूसा दे माऊ बुडें तिसजो पैदा होणे दे बाद तीन

मीहें तिकर छुपाई रखेया, कजोकि तिन्हां दिख्या कि जागत छैल ऐ, कने सैह राजे दे हुक्मे ते ना डरें । 24 वसुआस ते ई मूसें सयाणा होई करी फिरौन दी कुडी दा पुत्तर बणी करी रहैणे ते मना कित्ता । 25 इसताई होया कि तिसियो पापां च थोड़े दिन तिकर सुख भोगणे ते परमात्में दे लोकां सौगी दुख भोगणा जादा उतम लगा । 26 तिन्हीं मसीह दिया बजाह ते बेइजत होणे जो मिस्र दे खजाने ते मता धन समझेया, कजोकि तिसदियां अंखी फळ पाणे दे पास्रें लगियां थी । 27 वसुआस ते ई राजे दे गुस्से ते नी डरी करी तिन्हीं मिस्र जो छड्डी दिता, कजोकि अणदिखे जो जिआं कि दिखी करी पक्का रहैआ । 28 वसुआस ते ई तिन्हीं फसह कने खून छिड़कणे दी विधि मनी कि पैहिलौटे दा नाश करणेआळा इस्त्रालियां पर हत्थ ना चुकें । 29 वसुआस ते ई सैह लाल समुंदरे जो इआं टप्पी गै जिआं कि सूकिया जमीना च चलदे हन; कने जाहू मिस्री माणु भी इआं ई टप्पणा लगे तां सारे डूबी मरे । 30 वसुआस ते ई यरीहो दी शहरपनाह दे चौनी पास्रें जाहू सैह सत दिन तिकर तिसदा चकर लगाई बेटे तां सैह ढैई गैई । 31 वसुआस ते ई भेदिये जो ठीक ठाक रखणे पर राहाब नां दी वेश्या हुक्म ना मनणेआळेयां सौगी नाश नी होई । 32 हुण होर क्या ग्लां? कजोकि बग्त नी रहैआ कि गिदोने दा कने बाराके कने शिमशोने दा, कने यिफतह दा, कने दाऊदे कने शमूएले दा कने भविष्यवक्तां दा वखान करे । 33 इन्हां वसुआसे दिया बजाह ते राज्ञ जीते; धर्म दे कम्म कित्ते; प्रतिज्ञा किती होईयां चीजां पाईयां; शेरां दे मुँ बंद कित्ते; 34 अग्गी दी लपटां जो ठंडा कित्ता; तलवार दी मारा ते बची निकळे; कमजोरियां च ताकतवर होये; लड़ाईया च वीर बणें; कने विदेशियां दी फौजां जो मारी करी खदेडी दिता । 35 जणांस अपने मरेयांयो माणु जो भिरी जिंदा पाया; कितणे तां मार खांदे खांदे मरी गै कने छुटकारा नी चाया, इसताई कि उतम मरेयो ते जिंदा होणे दे भागी होन । 36 कईआं तां मजाक बणने ते कने कोड़े खाणे मतलब कैदी बणने ते कने कैदा च पोणे दिया बजाह ते परखे गै । 37 पत्थर मारे गै आरे नैं चीरे गै; तिन्हां दी परीक्षा लैई गैई, तलवारां नैं मारे गै; गरीबिया च कने दुख क्लेश भुकतदे भेडां बकरियां दी खत्तां उठी करी तां तुंह मारे मारे फिरदे रहै; 38 कने बणां, कने पहाडां, कने सरगां च, कने धरती दी दरारां च भटकदे रहै । संसार तिन्हां दे जोग्गा नी था । 39 वसुआसे दिया बजाह ते इन्हां सबना दे बारे च खरी गवाही दिती गैई, तमी तिन्हां जो प्रतिज्ञा कित्तियो चीज नी मिली । 40 कजोकि परमात्में अहां ताई पैहले ते ई इक्क उत्तम गल्ल ठेहराई, कि अहां दे बगैर सिद्धता जो नी पुज्जन ।

12 इसा बजाह ते जाहू कि गवाहां दा इतणा भारी बदळ अहां जो चौनी पास्रें ते ढकेया ऐ, तां ओआ, हर इक्क रोकणेआळी चीज कने उलझाणे आळे पापे जो दूर करी नैं, सैह दौड जिस च अहां जो जो दौडणा ऐ अहां जो धीरज नैं दौडन, 2 कने वसुआस दे कर्ता कने सिद्ध करणेआळे यीशु दे पास्रें दिखदे रहै, जिन्हीं तिसा खुशिया ताई जेहड़ा तिस दे गांह रख्या था, लज्जा दी कुच्छ चिंता नि करदे, सूलिया दा दुख सैह्या, कने परमात्में दे सिंहासण दी सज्जे पास्रें जाई बैठया । 3 इसताई तिस पर ध्यान करा, जिस च अपने विरोधे च पापियां दा इतणां विरोध सेह लैआ कि तुहां नराज होई नैं हिम्मत मत छड्डी दैआ । 4 तुहां पापे नैं लडदे होये तिस नैं इन्हीं झडप ना करी कि तुहां दा खून निकळेया होयें; 5 कने तुहां तिसा शिक्षा जो, जेहड़ा तुहां जो पुत्रां साइआं दिता जांदा ऐ, भूली गैयो हन : "हे मेरे पुत्तर, प्रभु दी फटकारा जो हल्की गल्ल मत समझ, कने जाहू सैह तिजो घुडके तां हिम्मत मत छड्डी । 6 कजोकि प्रभु जिस नैं प्यार करदा ऐ, तिस जो फटकारदा भी ऐ, कने तिसियो पुत्तर बणाई लेंदा ऐ, तिस जो कोड़े भी लगांदा ऐ ।" 7 तुहां दुख जो फटकार समझी करी सेही लैआ; परमात्में तुहां जो पुत्तर जाणी करी तुहां सौगी बर्ताब करदा ऐ । सैह कुण देहया पुत्तर ऐ जिसदी फटकार पिता नी करदा? 8 जे सैह फटकार जिसा दे हक्कदार होंदे हन, तुहां दी नी होई तां तुहां पुत्तर नी, अपर व्यभिचार दी सन्तान ठेहरे । 9 भिरी जाहू कि अहां दा शरीरी बुडा भी अहां जो फटकारदे थे कने अहां तिन्हां दा आदर कित्ता, तां क्या आत्मां दे पिता दे होर भी अधीन ना रहै जिसते अहां जिंदा रहै । 10 सैह तां अपनी अपनी समझा दे मताबक थोड़े दिनां ताई फटकारदे थे, अपर सैह तां अहां दे फायदे ताई करदा ऐ, कि अहां भी तिसदी पवित्रता दे भागी होई जान । 11 कने इस बगते च हर तरांह दी फटकार खुशिया दी नी, अपर दुखे दी गल्ल दुस्सदी ऐ; तमी जेहड़ा तिस जो सेहंदे सेहंदे पक्के होई गैयो हन, बांदे च तिन्हां जो चैना सौगी धर्मिकता दा प्रतिफल मिलदा ऐ । 12 इसताई दिखे हत्थां कने कमजोर गोडेयां जो सीधे करा, 13 कने अपने पैरां ताई सीधे रस्ते बणां कि

लड्डा भूली नी जां अपर भला चंगा होई जां, 14 सबना नैं मेल मिलाप रखा, कने तिसा पवित्रता दे खोजी हन जिसा बगैर कोई प्रभु जो कदी नी दिखी सकदा । 15 ध्याने नैं दिखदे रहैआ, इआं ना होयें कि कोई परमात्में दे अनुग्रह ते छुटी जां, या भिरी कोई कोडी जड फूटीकरी तकलीफ दें, कने तिसदिया बजाह ते मते लोक अशुद्ध होई जान । 16 इआं ना होयें कि कोई माणु व्यभिचारी, या एसावे साइआं अधर्मी होयें जिन्हीं इक्क बरी दे खाणे दें बदले अपने पैहिलौटे होणे दी जगाह बेची दिती । 17 तुहां जाणदे हन कि बांदे च जाहू तिन्हीं आशीष पाणा चाई तां अयोग्य गिणा गैआ, कने रोई रोई करी तोपणे पर भी तिस जो मन फेरणे दा मौका नी मिलया । 18 तुहां तां तिस पहाडे बक्खें तिसियो छुई सकदे थे, कने अग्गी ते बळेया था, कने काली घटा कने नैहरा कने तूफाने दे बक्खे, 19 कने तुरही दी उआज, कने ग्लाणेआळे शब्दा बक्खे नी आये, जिस जो सुणनेयाळेयां विणती किती कि हुण अहां नैं होर गलां नी कित्तियां जान । 20 कजोकि सैह तिस हुक्मे जो नी सैह सके : "जे कोई डंगर भी पहाडे जो छुन तां तिस पर पत्थर मारे जान ।" 21 कने सैह दर्शन इतणा डरौणा था कि मूसेन ग्लया, "मैं बड़ा डरदा कने कमदा ऐ । 22 अपर तुहां सिधोने दे पहाडे दे बक्खे कने जिंदा परमात्में दे सैहरे, सुअर्गीय यरुशलेम दे बक्खे कने लखां सुअर्गदूतां 23 कने तिन्हां पैहिलौटे दी साधारण सभा कने कलेसिया जिन्हां दे नां सुअर्ग च लिखे होये हन, कने सबना दे न्यायी परमात्में दे बक्खे, कने सिद्ध कित्तियो धर्मियां दी आत्मांयें, 24 कने नौये वादे दे बीच यीशु कने छिड़कावे दे तिस खूने बक्खे आययो हन, जेहड़ा हाबिले दे खून ते उतम गलां करदा ऐ । 25 चुकनै रहैआ, कने तिस ग्लाणे आळे ते मुँमे मत फेरा, कजोकि सैह माणु जाहू धरती पर ते चतौनी दैणेआळे ते मुँमे मोडी करी नी बची सकन तां अहां सुअर्ग पर ते चतौनी दैणेआळे ते मुँ मोडी करी किआं बची सकगे? 26 तिस बग्त तां तिसदिया उआजा नैं धरती जो हिलाई दिता, अपर हुण तिन्हीं एह प्रतिज्ञा किती ऐ, इक्क बरी भिरी ना सिर्फ धरतिया जो तां जे अम्बरे जो भी हिलाई दिंगा ।" 27 कने एह बोल 'इक्क बरी भिरी इसा गलां जो प्रकट करदा ऐ कि जेहड़ी चीजां हिलाईयां जांदियां हन, सैह रचियां होईयां चीजां होणे दिया बजाह ते टली जांगी; तांकि जेहड़ी चीजां हिलाई नी जांदियां सैह अटल बणी रहै । 28 इसा बजाह ते अहां इस राज्ञ जो पाई करी जेहड़ा कि हिलणे आळा नीये, तिस अनुग्रह जो हत्था ते नी जाणां देन, जिसा बजाह ते भक्ति कने डर रखी करी परमात्में दी ऐदेई आराधना करी सकदे हन जिसते सैह खुश हुंदा ऐ; 29 कजोकि अहां दा परमात्मां भस्म करणे आळी अग ऐ ।

13 भाईचारे च प्यार बणी रहै । 2 सेवा करणां मत भूलणा, कजोकि इन्हीं साहभें नां जाणे कितणे लोक अणजाण होई करी सुअर्गदूतां दी सेवा कित्तियो ऐ । 3 कैदियां दी ऐदेई सुध लैआ कि मना तिस सौगी तुहां भी कैद होन, कने जिन्हां सौगी बुरा बर्ताव कित्ता जांदा ऐ, तिन्हां दी भी एह समझी करी सुध लैआ करा कि अहां दा भी शरीर ऐ । 4 व्याह सबना माणुआं च आदर मान दी गल्ल समझी जाये, कने बछाण निष्कलंक रहै, कजोकि परमात्में व्यभिचारियां, कने परस्त्रीगामियां दा न्याय करगा । 5 तुहां सभाव लोभे आळा ना होयें, कने जेहड़ा तुहां अल्ल ऐ तिस पर निश्चा करा; कजोकि तिन्हीं अप्पु ई ग्लया ऐ, "मैं तिजो कदी नी छडणे हन, कने कदी नी त्यागणे हन ।" 6 इसताई अहां निडर होई करी ग्लांदे हन, प्रभु मेरा सहायक ऐ, मैं नी डरणां; माणु मेरा क्या करी सकदा ऐ ।" 7 जेहड़े तुहां दे अगुवे थे, कने जिन्हां तुआंहां जो परमात्में दा वचन सुणांया ऐ, तिन्हां जो याद रखा; कने ध्याने नैं तिन्हां दे चाल चलना दा अंत दिखी करी तिन्हां दे वसुआसे पचांह चला । 8 यीशु मसीह गुजरे बग्त कने अज्ज कने जुगा जुग इक्को देहया ऐ । 9 कईआं किस्मा दे उपरी शिक्षा ते भरमाई मत जांदे, कजोकि मने दा अनुग्रह ते पक्के रहैणां खरा ऐ । ना कि तिन्हां खाणे दी चीजां ते जिन्हां ते कम्म रखणेआळे जो कुच्छ फायदा नी हुंदा । 10 म्हारी इक्क ऐदेई वेदी ऐ जिसा पर खाणे दा हक्क तिन्हां लोकां जो नी, जेहड़े तम्बू दी सेवा करदे हन । 11 कजोकि जिन्हां डंगरा दा खून महायाजक पाप बलि ताई पवित्र जगाह च लैई जांदा ऐ, तिन्हां दी देह छावणी दे बाहर जळाई जांदी ऐ । 12 इसा बजाह ते यीशुयें भी लोकां जो अपने ई खून दिया बजाह ते पवित्र करणे ताई फाटके दें बाहर दुख झेलया । 13 इसताई ओआ, तिसदी निंदा अपने उपर लैई करी छावणी दें बाहर तिस अल्ल निकळी चलदे । 14 कजोकि इस संसारे च अहां दा कोई पक्का रहैणे आळा सैहर नी ऐ, अपर अहां इक्क ओणेआळे सैहरे दिया तोपा च हन 15 इसताई अहां तिसदिया बजाह ते स्तुति रुपी बलिदान ग्लाणे दा मतलब

तिन्हां लबड़ां दा फळ जेहड़े तिसदे नांये दा अंगीकार करदे हन, परमात्में ताई सदा चढ़दे रहै । 16 अपर भलाई करणां कने उदारता दस्सणा मत भूला, कजोकि परमात्में ऐदेय बलिदानां ते खुश हुंदा ऐ । 17 अपने अगुआं दा हुक्म मना कने तिन्हां दे अधीन रहैआ, कजोकि सैह तिन्हां साइआं तुहां दिया जान्नी ताई जागदे रहैदे हन जिन्हां जो लेखा दैणां पौणां; सैह एह कम्म खुशिया नैं करन, ना कि टंडा शाह लैई करी, कजोकि इसा हालता च तुहां जो कुच्छ फायदा नी होणां । 18 अहां ताई प्रार्थना करदे रहैआ, कजोकि अहां जो भरोसा ऐ कि अहां दा विवेक शुद्ध ऐ : कने अहां सब गल्लां च अच्छी चाल चलणां चाहदे हन । 19 प्रार्थना करणे ताई मैं तुहां जो होर भी समझांदा हूँ मैं तौळीं तुहां अल्ल भिरी आई सकें । 20 कने हुण शांतिदाता परमात्मां जेहड़ां

अहां दे प्रभु यीशु जो भेडां दा म्हान रखआळा ऐ सनातन वादे दे खुने दे गुण ते मरेयां ते जिंदा करी लैई आया, 21 तुहां जो हर इक्क खरी गल्ल च सिद्ध करे, जिसते तुहां तिसदी इच्छा पूरी करा, कने जेहड़ा कुच्छ तिस जो भांदा ऐ तिसियो यीशु मसीह दिया बजाह ते अहां च पैदा करे । तिसदी महिमा जुगा जुग होंदी रहै । आमीन । 22 हे भाऊओ, मैं तुहां नैं विणती करदा ऐ कि इसा शिक्षा दी गल्लां जो सेह लैआ, कजोकि मैईं तुहां जो बड़ा थोड़ा थोड़ा करी नैं लिख्या ऐ । 23 तुहां जो एह याद ऐ कि तीमुथियुस, अहां दा भाऊ छूटी गैआ ऐ कने जे सैह तौळीं आई गैआ तां मैं तिस सोगीं तुहां नैं मिलगा । 24 अपने सारे अगुआं कने सारे पवित्र लोकां जो नमस्कार ग्ला । इत्तालीआळे तुहां जो नमस्कार ग्लादे हन । 25 तुहां सबना पर अनुग्रह हुंदा रहै । आमीन ।

याकूब

भूमिका

याकूबे दी पत्री व्यावहारिक निर्देशां दा इक्क संग्रह ऐ जेहडे सारे संसारे च तित्तर - बितर होई करी रहणे आळे परमात्मं दे लोकां ताई लिखियो ऐ । लेखक मसीह आचार - व्यवहार कने चाल चलन ताई व्यावहारिक ज्ञान मार्गदर्शन ते सम्बधित निर्देशां जो पेश करणे ताई कई सजीव उपमाओं दा इस्तेमाल करदा ऐ । सैह हर विषयां पर मसीही दृष्टिकोण ते सोचदा ऐ, जिआं अमीरी कने गरीबी, खरा चाल - चलन पक्षपात, वसुसास सौगी कर्म, जीभा दा इस्तेमाल, अक्कमंदी, लडाई झगडा, कर्मंड कने दीनता. दूयेयां पर दोष लगाणां, डींग मारणां, शबर रखणां, कने प्रार्थना करणां । एह पत्री मसीहियत दा पालन करणे च वसुआसे सौगी ई कर्म करणे दे महत्त्व पर भी जोर दिंदी ऐ ।

रूप रेखा

भूमिका 1: 1

वसुआस कने अक्कमंदी 1: 2- 8

गरीबी कने धन - दोलत 1: 9- 11

परख कने लालच 1: 12- 18

सुणना कने करणां 1: 19- 27

पक्षपात दे वरखलाफ चतौनी 2: 1- 13

वसुआस कने कर्म 2: 16- 26

मसीही कने तिसदी जीभ 3: 1- 18

मसीही कने संसार 4: 1 --- 5: 6

विभिन्न निर्देश 5: 7- 20

नमस्कार

- 1 परमात्मं दे कने प्रभु यीशु मसीह दे दास याकूब दे पाससे ते तिन्हां बारां गोत्रां जो जेहडे लग्ग लुग्ग होई नैं रँहदे हन नमस्कार पुजें ।

वसुआस कने अक्कमंदी

2 हे मेरे भाऊओ, जाहू तुहां हर तरांह दी परीक्षां च पॉन, तां इन्हां जो पूरी खुशिया दी गल्ल समझा । 3 एह जाणी नैं कि तुहां दे वसुआस दे परखे जाणे ते धीरज पैदा हुंदा ऐ । 4 अपर धीरजे जो अपना पूरा कम्म करणां दैआ कि तुहां पूरे कने सिद्ध होई जा, कने तुहां च कुसा गल्ला दी कमी ना रँह ।

5 अपर जे तुहां च कुस्की जो अक्का दी कमी होयें तां परमात्मं ते मंगा, जेहडा बगैर झिड़कां दित्यां सबना जो दिले ते खुशिया सौगी दिंदा ऐ, कने तिस जो दित्ती जांगी । 6 अपर वसुआसे नैं मंगा, कने कुच्छ शक मत करा, कजोकि शक करणेआळा समंदर दी लेहरा साइआं ऐ जेहडी हौआ नैं चलदी कने उछलदी ऐ । 7 ऐदेया माणु एह ना समझें कि मिन्जो प्रभु ते कुच्छ मिलगा, 8 सैह माणु दोगला ऐ कने अपनी सारियां गल्लां च चंचल ऐ, ।

गरीबी कने मीरी

9 दीन भाऊ अपने उचे औधे पर कर्मंड करें, 10 कने अमीर अपनी नीची हालता पर; कजोकि सैह घाहे दे फूलां साइआं मरझाई जाणां । 11 कजोकि सूरज करुंदे ई तेज धूप पौंदी ऐ कने घाहे हे जो सकाई दिंदी ऐ, कने तिसदा फूल झडी जांदा ऐ कने तिसदी शोभा जांदी रँहदी ऐ । इन्हीं साहभें अमीर भी अपने रस्ते पर चलदे चलदे धूड़ा च मिली जांगा ।

परख कने लालच

12 धन ऐ सैह माणु जेहडी परीक्षा च टिकी रँहदा ऐ, कजोकि सैह खरा निकळी नैं जिन्दगिया दा सैह मुकट पाणा जेहडा वादा प्रभुयें अपने प्यार करणेआळ्यां नैं कित्या ऐ । 13 जाहू कुस दी परीक्षा होयें, तां सैह एह ना ग्लां कि मेरी परीक्षा परमात्मं दे पाससे ते होंदी ऐ; कजोकि ना तां बुरिआं गल्लां ते

परमात्मं दी परीक्षा होई सकदी ऐ, कने ना सैह कुसदी परीक्षा अप्पु ई करदा ऐ । 14 अपर हर माणु अपणियां इच्छा नैं खींजी करी कने तिस च फंसी करी परीक्षा च पौंदा ऐ । 15 भिरी इच्छा गर्भवती होई नैं पापे जो जाणदी ऐ कने पाप जाहू बधी जांदा ऐ तां मौत जो पैदा करदा ऐ ।

16 हे मेरे प्यारे भाऊओ, धोखा मत खा । 17 कजोकि हर इक्क खरा वरदान कने हर इक्क उतम दान उपर ते मिलदा ऐ, कने जोती दे पिता दे पाससे ते मिलदा ऐ, जिसच ना तां कोई बदलाव होई सकदा ऐ, कने ना अदली बदली दिया बजाह ते तिस पर छौंटा पौंदा ऐ । 18 तिन्हीं अपणिया इच्छा दे मताबक अहां जो सचाई दे वचनां दुआरा पैदा कित्या, तांकि अहां तिसदियां बणांइयां चीजां ते इक्की किस्म दे पैहले फळ हन ।

सुणना कने करणां

19 हे मेरे प्यारे भाऊओ, एह गल्ल तुहां जाणी लैआ; हर इक्क माणु सुणने तांई तौल करणेआळा कने ग्लाणे च शबर रखणे आळा कने गुस्से च देर करणे आळा होयें, 20 कजोकि माणु दा गुस्सा परमात्मं दे धर्म दा निर्वाह नी करी सकदा । 21 इसतांई सारे मनां दे मैल कने बैर विरोधां दी बढदिया जो दूर करी नैं, तिसदे वचना जो नम्रता नैं मनी लैआं जेहडा कि मने च बोया गैआ कने जेहडा तुहां दिया जान्नी दा उद्धार करी सकदा ऐ । 22 अपर वचना पर चलणेआळे बणां, कने सिर्फ सुणनेआळे ई नी जेहडे अपने आप्पे जो धोखा दिंदे हन । 23 कजोकि जेहडा कोई वचनां जो सुणनेआळा होयें कने तिन्हां पर चलणेआळा ना होयें, तां सैह तिस माणु साइआं ऐ जेहडा अपना असली चेहरा शीशे च दिखदा ऐ । 24 कि सैह अपने आप्पे जो दिखी नैं चली जांदा कने बडी तौळी भूली जांदा ऐ कि मैं कदेया था । 25 अपर जेहडा माणु अजादी दी सिद्ध व्यवस्था पर ध्यान करदा रँहदा ऐ, सैह अपने कम्मे च इसतांई आशीष पांगा कि सुणी करी भूलदा नी अपर तिआं ई कम्म करदा ऐ । 26 जे कोई अपने आप्पे जो भक्त समझें कने अपनी जीभा पर लगाम ना दें अपर अपने मने जो धोखा दें, तां तिसदी भक्ति बेकार ऐ । 27 अहां दे परमात्मं कने पिता दे सामणे शुद्ध कने सच्ची भक्ति ऐ कि अनाथां कने विधवां दे दुखां च तिन्हां दा ख्याल रखन, कने अपने आप्पे जो संसारे ते निष्कलंक रखा ।

भेदभाव दे वरखलाफ चतौनी

2 हे मेरे भाऊओ, अहां दे महिमायुक्त प्रभु यीशु मसीह पर तुहां दा वसुआस पक्षपात सौगी ना होयें । 2 कजोकि जे इक्क माणु सोने दिया चैना कने छैल कपड़े पैहनी नैं तुहां दिया सभा च ओयें, कने इक्क गरीब भी मैले कुचैले कपड़े पैहनी नैं ओयें, 3 कने तुहां तिस छैल कपड़े आळे दा मुँ दिखी नैं ग्लान, कि तू औत्थू खरिया जगाह बैठा, कने तिस गरीबे जो ग्लान, "तू ऐत्थू खडौई रहै, या "मेरे पैरां अल्ल बैठ ।" 4 तां क्या तुहां अप्पु च भेद भाव नी कित्ता कने बुरे वचार नैं न्याय करणे आळे नी ठेहरें? 5 हे मेरे प्यारे भाऊओ, सुणां । क्या परमात्मं इस संसारे दे गरीबां जो नी चुणेया कि वसुआस च अमीर कने तिस राजे दे अधिकारी बणन, जेहड़ा वादा परमात्मं तिन्हां नैं कित्ती ऐ जेहड़े तिस नैं प्यार रखदे हन? 6 अपर तुहां तिस गरीबे दी बेसती कित्ती । क्या अमीर लोक तुहां पर अत्याचार नी करदे कने क्या सैह ई तुहां जो कचेहरीयां च कसीटी कसीटी करी नी लैई जांदे? 7 क्या सैह उस म्हान नांये दी निंदा नी करदे जिसदे तुहां समझे जांदे हन? 8 भिरी भी जे तुहां पवित्र शास्त्र दे वचना मताबक कि तू अपने पड़ेसिये नैं अपने साइआं प्यार रखा" सचमुच तिस राज व्यवस्था जो पूरी करदे हन, तां खरा ई करदे हन । 9 अपर जे तुहां पक्षपात करदे हन तां पाप करदे हन; कने व्यवस्था तुहां जो दोषी ठेहरांदी ऐ । 10 कजोकि जेहड़ा कोई पूरिया व्यवस्था दा पालण करदा ऐ अपर इक्की ई गल्ला च चूक होई जां तां सैह सारियां गल्लां च दोषी ठेहरदा ऐ । 11 इसताई कि जिन्हीं एह ग्लायी, "तू व्यभिचार मत करणां" तिन्हीं एह भी ग्लायी, तू हत्या मत करणां, इसताई जे तैं व्यभिचार तां नी कित्ता अपर हत्या कित्ती तमी तू व्यवस्था जो उल्लघन करणे आळा ठेहरैया । 12 तुहां तिन्हां लोकां साइआं वचन ग्ला कने कम्म भी करा, जिन्हां दा न्याय अजादी दी व्यवस्था दे मताबक होणां । 13 कजोकि जिन्हीं दया नी कित्ती, तिसदा न्याय बगैर दया ते होणां : दया न्याय पर जयवंत होई ऐ ।

वसुआस कने कर्म दे कम्म

14 हे मेरे भाऊओ, जे कोई ग्लां कि मिन्जो वसुआस ऐ अपर सैह कर्म नी करदा होयें, तां इसते क्या फायदा? क्या ऐदेया वसुआस कदी तिसदा उद्धार करी सकदा ऐ? 15 जे कोई भाऊ या बैहण नंगे नाळे होन कने तिन्हां जो हर रोज खाणे दी कमी होयें, 16 कने तुहां च कोई तिन्हां नैं ग्लां, "खुश होई नैं जा, तुहां गर्म रहैआ कने तूम रहैआ, अपर जेहड़ियां चीजां शरीरे ताई जरूरी हन सैह तिन्हांन जो ना देंन तां क्या फायदा? 17 तिआं ई वसुआस भी जे कर्म सौगी ना होयें तां अपने सभावे च मरेया ऐ ।

18 अपर कोई ग्लाई सकदा ऐ, मिन्जो वसुआस ऐ कने मैं कर्म करदा ऐ ।" तू अपनां वसुआस मिन्जो बगैर कर्मा ते तां दस्स; कने अपनां वसुआस अपने कर्मा दिया बजाह ते तिजो दस्सगा । 19 तिजो वसुआस ऐ कि इक्को ई परमात्मां ऐ; तू खरा करदा ऐ । दुष्टआत्मांयें भी वसुआस रखदियां कने कमदियां हन । 20 अपर हे निकम्मे माणु, क्या तू एह भी नी जाणदा कि कर्म बगैर वसुआस बेकार ऐ? 21 जाहू अहां दे पिता अब्राहमं अपने जागते इसहाके जो वेदिया पर चढाया, तां क्या सैह कर्मा ते धर्मी नी ठेहरैया था? 22 जे तैं दिखी लैआ कि वसुआसं तिसदे कम्मां सौगी मिली नैं असर दस्सया ऐ, कने कर्मा ते वसुआस सिद्ध होया, 23 कने पवित्रशास्त्रे दा एह वचन पूरा होया, "अब्राहमं परमात्मं पर वसुआस कित्ता, कने एह तिस ताई धर्म गिणां गैआ;" कने सैह परमात्मं दा मित्र केहलाया । 24 इन्हीं साहभं तुहां दिखी लैआ कि माणु सिर्फ वसुआसे ते ई नी, अपर कर्मा ते भी धर्मी ठेहरदा ऐ । 25 तिआं ई राहाब वेश्या भी, जाहू तिन्नै दूतां जो अपने घरं च उतारया कने दूये रस्ते ते विदा करीता, तां क्या सैह कर्मा ते धर्मी नी ठेहरी? 26 तां इन्हीं साहभं शरीर आत्मां बगैर मरेया ऐ, तिआं ई वसुआस भी कर्मा बगैर मरेया ऐ ।

जीभा जो बशे करणा

3 हे मेरे भाऊओ, तुहां च बड़े सारे उपदेशक ना बणन, कजोकि जाणदे हन कि अहां उपदेशक होर भी दोषी ठेहरगे । 2 इसताई कि अहां सारे उपदेशक मती बरी चूक करी जांदे हन; जेहड़ा कोई वचना च चूक नी करदा सैई तां सिद्ध माणु ऐ कने सारे शरीरे पर लगाम भी लगाई सकदा ऐ । 3 जाहू अहां घोड़ेयां जो अपने वसे च करणे ताई मुँमें च लगाम लगांदे हन, तां अहां

तिन्हां दे सारे शरीरे जो अपने वसे च भी करी सकदा ऐ । 4 दिखा, समंदरी चाहज भी, हलाकि बड़े बड़े होंदे हन कने प्रचंड हौआ नैं चलाये जांदे हन, तमी इक छोटी देहई पतवारा दिया बजाह ते मांझी अपणिया इच्छा मताबक तिसियो घुमाई दिदा ऐ । 5 तिआं ई जीभ भी इक्क छोटा देहया अंग ऐ कने सैह बडी बडी डींगा मारदी ऐ । दिखा, थोड़ी देहई अग्गी नैं कितणे बड़े बणे च अग्न लगी जांदी ऐ । 6 जीभ भी इक्क अग्न ऐ; जीभ अहां दे अंगा च अधर्म दा इक्क लोक ऐ, कने पूरे शरीरे पर कलंक लगांदी ऐ, कने जिन्दगिया दी गतिया च अग्न लगाई दिंदी ऐ, कने नरक कुंड दी अग्गी नैं जळदी रहँदी ऐ । 7 कजोकि हर तरांह दे बणां दे जानवर, उड़णे आळे पक्षी, कने पेटे भार चलणेआळे जानवर, कने पाणी आळे जानवर माणु जाति दे वशे च होई सकदे हन कने होई भी गेयो हन, 8 अपर जीभा जो माणुआं च कोई वसे च नी करी सकदा; सैह इक्क ऐदेई बळा ऐ जेहड़ी कदी रुकदी ई नी, सैह नाश करणे आळे जैहरे नैं भरौई ऐ । 9 इसा जीभा नैं अहां प्रभु कने पिता दी स्तुति करदे हन, कने इसा ते माणुआं जो जेहड़े परमात्मं दे रूप च पैदा होये हन तिन्हां जो श्राफ दिंदे हन । 10 इक्की मुँमें ते धन्यावाद कने श्राफ दोयो निकळदे हन । हे मेरे भाऊओ, ऐदेया नी होणां चाइदा । 11 क्या छरुडू इक्की मुँमें ते मीठा कने खारा पाणी निकळी सकदा ऐ? 12 हे मेरे भाऊयो, क्या धुड़े दे रूखे ते जैतून या दाख दिया बैला च धुड़े लगी सकदे हन? तिआं खारे छरुडूये ते मीठा पाणी नी निकळी सकदा ।

सुअर्गीय ज्ञान

13 तुहां च अकूमंद कने समझदार कुण ऐ? जेहड़ा ऐदेया होयें सैह अपने कम्मां जो खरे चाल चलना ते निमा होई करी करे जेहड़ा ज्ञाने ते पैदा हुंदा ऐ । 14 अपर जे तुहां अपने अपने मने च कोड़ी डाह कने विरोध रखदे हन, तां सचाईया दे विरोध मत कमंड मत करदे, कने ना तां झूठ ग्लानां । 15 एह ज्ञान सैह नी जेहड़ा उपरे ते लौंदा ऐ, अपर सांसारिक, कने शारीरिक, कने सतानी ऐ । 16 कजोकि जित्थू डाह कने विरोध हुंदा ऐ, औत्थू बखेडा कने हर तरांह बुरे कम्म होंदे हन । 17 अपर जेहड़ा ज्ञान उपरे ते ओदा ऐ सैह पैहलें तां पवित्र हुंदा ऐ भिरी मिलणसार नर्म कने खरा लगणे आळा कने दया कने छैल छैल फळां नैं लदेया होया कने बगैर भेदभाव कने बगैर कपटा ते हुंदा ऐ । 18 मेल मिलाप करणे आळा धार्मिकता दा फळ मेल मिलापे सौगी बांदे हन ।

संसारे नैं दोस्ती

4 तुहां च लड़ाईयां कने झगड़े कुत्थू ते आई गै? क्या तिन्हां सुखा विलासां ते नी जेहड़े तुहां दे अगा च लड़दे भिड़दे रहँदे हन? 2 तुहां लालसा रखदे हन, अपर तुहा जो मिलदा नी; इसताई तुहां हत्या कने डाह करदे हन, कने तुहां जो कुच्छ मिलदा तां तुहां झगड़दे कने लड़दे हन । तुहां जो इसताई नी मिलदा कि मंगदे नी हन । 3 तुहां मंगदे हन, तांकि पांदे नी, इसताई कि बुरिया इच्छा नैं मंगदे हन, तांकि अपने भोग विलासे च डुआई दैआ । 4 हे व्यभिचारिणियां तुहां नी जाणदियां कि संसारे नैं मित्र चारा रखणे ते परमात्मं नैं बैर रखणां ऐ? जे जेहड़ा कोई संसारे दा मित्र बणना चाहंदा ऐ, तां सैह अपने आप्पे जो परमात्मं दा बैरी बणांदा ऐ । 5 क्या तुहां एह समझदे हन कि पवित्रशास्त्र बेकार ग्लांदा ऐ, जिसा आत्मां जो तिन्हीं अंदर बसाया ऐ, क्या सैह ऐदेई लालसा करदा ऐ जिसदा फळ डाह होयें? 6 सैह तां होर भी अनुग्रह दिदा ऐ, इसा बजाह ते एह लिख्या ऐ, परमात्मं कर्मडियां दा विरोध करदा ऐ, अपर दूनी पर अनुग्रह करदा ऐ । 7 इसताई परमात्मं दे अधीन होई जा, कने सतान दा सामणां करा, तां तुहां अल्ले ते नड्डी जाणां । 8 परमात्मं नैंडें ओआ तां सैह भी तुहां दे निकट नैंडें । हे पापियो, अपने हत्थ शुद्ध करा; कने हे दोगले माणु अपने मनां जो पवित्र करन । 9 दुखी हन, कने शोक करा, कने रोआ तुहां दा हंसा शोक च कने तुहां दी खुशी उदासी च बदली जां । 10 प्रभु दे सामणे दीन बणां तां सैह तुहां जो शिरोमणि बणांगा ।

भाऊआं पर दोष लगाणां

11 हे भाऊओ, इक्क दूये दी बदनामी मत करा । जेहड़ा अपने भाऊये दी बदनामी करदा ऐ या भाऊये पर दोष लगांदा ऐ, सैह व्यवस्था दी बदनामी करदा ऐ कने व्यवस्था पर दोष लगांदा ऐ; कने जे तू व्यवस्था पर दोष लगांदा ऐ, तां तू व्यवस्था पर चलणेआळा नी अपर तिस पर हकूमत करणेआळा

ठेहरदा ऐ । 12 व्यवस्था दैणेआळा कने हाकम तां इक्को ई ऐ, जेहड़ा बचाणे कने नाश करणे च सामर्थी ऐ । अपर तू कुण ऐ, जेहड़ा अपणे प्हेसिये पर दोष लगांदा ऐ?

कमंड दे वरखलाफ चतौनी

13 तुहां जेहड़ा एह ग्लां दे हन, "अज्र या कल अहां कुसी होर सैहरे च जाई नैं औत्थू इक्क साल दस्सणां, कने वपार करी नैं फायदा कमाणा ।" 14 कने एह नी जाणदे कि कल क्या हुंगा । सुणी तां लैआ, तुहां दी जिन्दगी ऐ क्या? तुहां तां भाफे साइआं हन, जेहड़ा थोड़ी देर दुस्सदा ऐ भिरी गायब होई जांदा ऐ । 15 इसदे बदले तुहां जो एह ग्लाणां चाइदा, "जे प्रभु चां तां अहां जिं दे रैहणे, कने एह या सैह कम्म भी करगे ।" 16 अपर हुण तुहां अपणियां डींगा पर कमंड करदे हन; ऐदेया सारा कमंड बुरा हुंदा ऐ । 17 इसताई जेहड़ा कोई भलाई करणां जाणदा ऐ कने नी करदा, तिस ताई एह पाप ऐ ।

मीरां जो चतौनी

5 हे अमीरो, सुणी तां लैआ, तुहां अपणे ओणे आळे क्लेशां पर डडी डडी करी रोआ । 2 तुहां दा धन बिगडी गैआ ऐ कने तुहां दे कपड़ेयां जो कीड़े खाई गै हन । 3 तुहां दे सुन्ने चांदी च जंग लगी गैआ ऐ; कने सैह जंग तुहां पर गवाही दिंगा, कने अग्गी साइआं तुहां दा मांस खाई जांगा । तुहां आखरी युगे च धन बटीणेयां ऐ । 4 दिखा जिन्हां मजदूरां तुहां दे खेतां दी फसल कटी, तिन्हां दी सैह मजदूरी जेहड़ी तुहां धोखां दैई करी रखी लैई ऐ डडा दी ऐ, कने बटोलणे आळे दी दोहाई सेणांओं दे परमात्मं दे कनां तिकर पुञ्जी गैई ऐ । 5 तुहां धरतिया पर भोग विलासे च लगे रैह कने बड़ा ई सुख भोगेया; तुहां इस हत्या दे दिने ताई अपणे मने दा पाळी पोसी करी तिस जो मोटा ताजा किता । 6 तुहां धर्मी जो दोषी ठेहराई नैं मारी दिता, सैह तुहां दा सामणां नी करदा ।

7 इसताई हे भाऊओ, प्रभु दे ओणे तिकर शबर रखा । दिखा, जमीदार धरतिया दी कीमती फसला दी आशा रखदा होया पैहली कने आखरी बरखा होणे तक शबर रखदा ऐ । 8 तुहां भी शबर रखा; कने अपणे मने जो पक्का

करा, कजोकि प्रभु दा शुभआगमन नैडें ऐ । 9 हे भाऊओ, इक्की दूये पर दोष मत लग्गा, तांकि तुहां दोषी ना ठेहरा; दिखा, हाकम दुरआजे पर खडुतेया ऐ । 10 हे भाऊओ, जिन्हां भविष्यवक्तां प्रभु दे नांये ते गल्लां किक्तियां, तिन्हां जो दुख झेलणे कने शबर रखणे दा अपणे ताई आदर्श समझा । 11 दिखा, अहां शबर रखणे आळ्यां जो धन ग्लां दे हन । तुहां अय्यूब दे शबर दे बारे च तां सुणेया ई ऐ, कने प्रभु दे पास्से ते जेहड़ा तिसदा फळ होया तिसियो भी जाणी लैआ ऐ, जिसते प्रभु दी बड़ी जादा करुणा कने दया प्रकट होदी ऐ ।

12 अपर हे मेरे भाऊओ, सारेयां ते श्रेष्ठ गल्ल एह ऐ कि कसम मत खां दे, ना सुअर्गे दी, ना धरतिया दी, ना कुसा होर चीज्जा दी; अपर तुहां दी गल्लबात हॉ दी हॉ कने ना दी ना होयें, कि तुहां सज्जा जोगे ना ठेहरन ।

प्रार्थना दी ताकत

13 जे तुहां च कोई दुखी ऐ, तां सैह प्रार्थना करा । जे खुश ऐ, तां सैह स्तुति दे भजण गा । 14 जे तुहां च कोई बमार ऐ, तां कलेसिया दे स्याणेयां जो सद्दा, कने सैह प्रभु दे नांये ते तिस पर तेल मळी करी तिस ताई प्रार्थना करा, 15 कने वसुआसे दी प्रार्थना दिया बजाह ते बमार बची जांगा कने प्रभु तिस जो चुकी करी खरेडगा; कने जे तिन्हीं पाप भी किक्ते हन, तां तिन्हां पापां दी भी माफी होई जांगी । 16 इसताई तुहां अप्पु च इक्की दूये दे सामणे अपणे अपणे पापां जो मनी लैआ, कने इक्की दूये ताई प्रार्थना करा, जिसते खरे होई जान, धर्मी जण दी प्रार्थना दे असर ते बड़ा कुच्छ होई सकदा ऐ । 17 एलिय्याह भी तां अहां साइआं दुख सुख भोगणे आळा माणु था; कने तिन्हीं गिडगिडाई नैं प्रार्थना किक्ती कि बरखा ना होयें, कने सादे तीन साल तिकर बरखा नी होई । 18 भिरी तिन्हीं प्रार्थना किक्ती, तां अम्बरे ते बरखा होई, कने धरतिया पैदावार होई ।

19 हे मेरे भाऊओ, जे तुहां च कोई सच दे रस्ते ते भटकी जां कने कोई तिस जो वापस लैई ओंये, 20 तां सैह एह जाणी लें कि जेहड़ा कोई कुसी भटकेयो पापी जो वापस लैई ओंगा, तां सैह इक्की जान्नी जो मौता ते बचांगा कने होरनी पापां पर पड़दा पाणे आळा होणां ।

1 पतरस

भूमिका

पतरसे दी पैहली पत्री मसीहियां दे नां लिखी गई थी। जिन्हां ऐत्थू 'परमात्मं दे चुणेयां लोकां' ग्लाय़ा ऐ, जेहड़ा एशिया माइनर दे सम्पूर्ण उत्तरी भाग च तित्तर - बितर होई करी रैह दे थे। इसा पत्रिया दा खास मकसद अपणे पाठकां जो उत्साहित करणां ऐ, जेहड़ा कि अपणे वसुआसे दिया बजाह ते दुख कने सताव दा सामणां करा दा ऐ। लेखक अपणे पाठकां जो यीशु मसीह दे सुसमाचार दी याद दिलाई करी इआं करदा ऐ, कजोकि यीशु दी मौत, दुआरा ते जिन्दा होणां, कने प्रतिज्ञात आगमन तिन्हां जो उम्मीद पैदा करदा ऐ। इस दृष्टिकोण ते तिन्हां अपणे दुखां जो मनणां कने सेहणां था, इस वसुआसे सौगी कि एह तिन्हां दे वसुआसे दी सच्चाई दी परख ऐ, कने एह कि "मसीह यीशु प्रगट होणे" दे दिन तिन्हां जो इसदा इनाम मिलगा।

सताव दे बग्त प्रोसाहित करणे दे सौगी सौगी, लेखक एह भी आग्रह करदा ऐ कि तिसदे पाठक ऐदय लोकां साइयां जिन्दगी कटन जेहड़े मसीह दे माणु हन रूप रेखा

भूमिका 1: 1,2

परमात्मं दे उद्दारे दी याद दिलाणां 1: 3 -21

पवित्र जिन्दगिया ताई शिक्षा 1: 3 --- 2: 10

दुखां दे बग्त मसीही जिम्मेवारियां 2: 11 --- 4: 19

मसीह दी दीनता कने सेवा 5: 1-11

उपसंहार 5: 12 -14

नमस्कार

1 शिमौन पतरसे दे पाससे ते जेहड़ा यीशु मसीह दा चेला ऐ, तिन्हां परदेशियां दे नां जेहड़े पुन्नुस, गलातिया, कप्पदुकिया, आसिया कने बिथुनिया च लग्ग लुग्ग होई नैं रैहदे हन, 2 कने पिता परमात्मं दे भविष्य ज्ञाने मताबक, आत्मां दे पवित्र करणे ते हुक्म मनणे कने यीशु मसीह दे खून छिड़कणे ताई चुणेयो हन। तुहां जो बड़ा जादा अनुग्रह कने शांति मिलदी रैह ।

इक्क जिंदी आशा

3 अहां दे प्रभु यीशु मसीह दे पिता परमात्मं दा धन्यावाद होयें, जिन्हीं यीशु मसीह दे मरेयां ते जिदे करी करी, अपणी बड़ी दया नैं अहां जो जिदिया आशा ताई नौआं जन्म दित्या, 4 ग्लाणे दा मतलब ऐ कि कदी नी नाश होणे आळा, कने साफ, कने कदी नी मिटणे आळी मीरासा ताई जेहड़ी तुहां ताई सुअर्गे च रखियो ऐ; 5 जिन्हां दी रक्षा परमात्मं दी सामर्थी ते वसुआसे दिया बजाह ते तिस उद्दारे ताई, जेहड़ी ओणे आळे बगते च सामणे ओणे आळी ऐ, किती जांदी ऐ। 6 इसा बजाह ते तुहां खुश होंदे हन, कने जरूरी ऐ कि अल्ली कुच्छ दिना तिकर कई तरांह दिया परीक्षां दिया बजाह ते दुखे च हन; 7 कने एह इसताई ऐ कि तुहां परखेया वसुआस, जेहड़ा अग्नी नैं तपेयो सोने ते भी बड़ा जादा कीमती ऐ, यीशु मसीह दे सामणे ओणे पर प्रशंसा कने महिमा कने आदर दी बजाह ठेहरें। 8 तिस नैं तुहां बगैर दिखे प्यार रखदे हन, कने हुण तां तिस पर बगैर दिखे भी वसुआस करी नैं इतणे खुश कने मगन होंदे हन जेहड़ा वखान ते बाहर कने महिमा नैं भरौया ऐ; 9 कने अपणे वसुआसे दा फळ मतलब आत्मां दा उद्धार हासल करदे हन। 10 इसी उद्धार दे बारे च तिन्हां भविष्यवक्तां बड़ी खोज-बीण कने जांच परखी करी जिन्हां तिस अनुग्रह दे बारे च जेहड़ा तुहां पर होणे जो था भविष्यवाणी किन्तियो थी।

11 तिन्हां इसा गला दी तोप किती कि मसीह दी आत्मां जेहड़ी तिन्हां च थी, कने पैहले ते ई मसीह दे दुखां दी कने तिसदे बाद होणे आळी महिमा दी गवाही दिंदा था, सैह कुण देहय कने कुस बगते पाससे इशारा करदा था।

12 तिन्हां पर एह प्रकट किता गैआ कि सैह अपणी नी अपर तुहां दी सेवा ताई एह गलां ग्ला करदे थे, जिन्हां दी खबर हुण तुहां जो तिन्हां ते मिलियो जिन्हां पवित्र आत्मां दिया बजाह ते, जेहड़ा सुअर्गे ते घल्लया, तुहां जो

सुसमाचार सणाया; कने इन्हां गलां जो सुअर्गादूत भी ध्याने नैं दिखणे दी लालसा रखदे हन।

पवित्र जिन्दगी जीणे दी बुलाहट

13 इसा बजाह ते अपणियां अपणियां अक्का दी कमर बन्नी नैं, कने चुकनै होई नैं, तिस अनुग्रह दी पूरी आशा रखा जेहड़ा यीशु मसीह दे प्रकट होणे दे बग्त तुहां जो मिलणे आळा ऐ। 14 कने आज्ञा कारी जागतां साइआं अपणी अज्ञानता दे बगते दी पराणी अभिलाषां साइआं मत बणां। 15 अपर जिआं तुहां जो सदणे आळा पवित्र ऐ, तिआं ई तुहां भी अपणे सारे चाल चलणे च पवित्र बणां। 16 कजोकि लिख्या ऐ, "पवित्र बणां, कजोकि मैं पवित्र ऐ।" 17 कने जाहू कि तुहां 'हे पिता ग्लाई नैं तिस नैं प्रार्थना करदे हन, जेहड़ा बिना पक्षपात हर इक्की कम्मे मताबक न्याय करदा ऐ, तां अपणे परदेशी होणे दा बग्त डर रखी करी गुजारा। 18 कजोकि तुहां जाणदे हन कि तुहां दा निकम्मा चाल चलन जेहड़ा पितरां ते चला ओआ दा ऐ, तिसते तुहां दा छुटकारा सोने चांदी मतलब नाशवाण चीजां ते नी होया; 19 अपर बेकसूर कने निष्कलंक बच्चे, मतलब मसीह दे कीमती खूने दिया बजाह ते होया। 20 तिसदा ज्ञान तां संसारे दे बनणे दे पैहले ते ई जाणेया गैआ था, अपर हुण इस आखरी जुग च तुहां ताई प्रकट होया। 21 यीशु मसीह दिया बजाह ते तुहां तिस परमात्मं पर वसुआस करदे हन, जिन्हीं तिसियो मरेयां ते जिंदा कित्या कने महिमा दिती कि तुहां दा वसुआस कने आशा परमात्मं पर होयें।

22 कने जाहू कि तुहां भाई चारे दी निष्कपट प्यारे ते सचाईया जो मनणे ते अपणे मनां जो पवित्र कित्या ऐ, तां तन मन लाई नैं इक्की दूये नैं जादा प्यार रखा। 23 कजोकि तुहां नाश होणे आळे नी पर कदी नी खत्म होणे आळे बीये ते, परमात्मं दे जिदे कने सदा तिकर ठेहरणे आळे वचने दिया बजाह ते नौआं जन्म पाया ऐ। 24 कजोकि

"हर इक्क माणु घाहे साइआं ऐ कने तिसदी सारी शोभा घाहे दे फूलां साइआं ऐ। घाह सूकी जांदा ऐ, कने फूल झड़ी जांदा हन,

25 अपर प्रभु दा वचन जुगा जुग पक्का रैहदा ऐ।" कने ऐही सुसमाचारे दा वचन ऐ जेहड़ा तुहां जो सणाया था।

जिंदा पत्थर कने पवित्र प्रजा

2 इसताई सब तरांह दा बैरभाव कने छल कने बेईमानी कने ड़ाह कने निंदा जो दूर करी नैं, 2 नौये जम्म लैयो बच्चेयां साइआं साफ आत्मिक

दूदे दी लालसा करा, तांकि तिसदिया बजाह ते उद्धार पाणे जो गांह बधदे जा, 3 कजोकि तुहां प्रभु दी कृपा दा सुआद चरखी लैआ ऐ ।

4 तिस अल्ल आई नैं, जिसियो माणुआं तां निक्कमा ठेहराया अपर परमात्में दा चुणेया कने कीमती जिदा पत्थर ऐ, 5 तुहां अप्पु भी जिंदे पत्थरां साइआं आत्मिक घर बणदे जांदे हन, जिसते याजकां दा पवित्र समाज बणी करी, ऐदेय आत्मिक बलिदान चढा जेहडे यीशु मसीह दिया बजाह ते परमात्में जो स्वीकार होया ऐ । 6 इसा बजाह ते पवित्रशास्त्रे च भी लिख्या ऐ:

“दिखा, मैं सिद्योने च कुणे दा सिरा चुणेया कने कीमती पत्थर रखदा ऐ: कने जेहडा कोई तिस पर वसुआस करगा, सैह कुस भी तरीके नैं शर्मिदा नी हुंगा ।”

7 कने तुहां ताई जेहडे वसुआस करदे हन सैह तां कीमती हन, अपर जेहडे वसुआस नी करदे तिन्हां ताई “जिस पत्थरे जो राजमिस्त्रियां निकम्मा ठेहराया था, सैई कुणे दा सिरा बणी गैआ,”

8 कने “चोट लगणे दा पत्थर कने ठोकर खाणे दी चट्टान होईया ऐ, कजोकि सैह तां वचने जो नी मनीकरी ठोकर खांदे हन कने इसताई सैह ठेहराये भी गैयो थे ।

9 अपर तुहां इक्क चुणेया वंश, कने राज पदधारी याजकां दा समाज, कने पवित्र लोक, कने (परमात्में दी) खास प्रजा हन, इसताई कि जिन्हीं तुहां जो नैहरे च अपनी अनोखी जोतिया नैं सदेया ऐ, तिसदे गुण प्रकट करा ।

10 तुहां पैहलें तां कुच्छ भी नी थे अपर हुण परमात्में दी प्रजा हन; तुहां पर दया नी होईयो थी अपर हुण तुहां पर दया होईयो ऐ ।

मसीही जिम्मेवारी

11 हे प्यारे भाऊओ, मैं तुहां नैं विणती करदा ऐ कि तुहां अपने आप्पे जो परदेशी कने मुसाफिर जाणी करी तिन्हां संसारे दी अभिलाषां बची रहूआ, जेहडियां आत्मां नैं लडाई करदियां हन । 12 वेवसुआसी जातिआं च तुहां दा चाल चलन खरा होयें; तांकि जिन्हां जिन्हां गल्लां च सैह तुहां जो कुकर्मों समझी नैं बदनाम करदे हन, सैह तुहां देयां खरे कम्मां जो दिक्खीं नैं तिन्हां दिया बजाह ते दयावृष्टि दे दिन परमात्में दी महिमा करें ।

परमात्में दे दास

13 प्रभु ताई माणुआं दे बणांयो हर इक्क प्रबंधा दे दायरे च रहूआ, राजा इसताई कि सैह सारेयां दा प्रधान ऐ, 14 कने हाकमां दे कजोकि सैह कुकर्मियां जो सज्जा देणे कने सुकर्मियां दी प्रशंसा ताई तिसदे घल्लयो हन । 15 कजोकि परमात्में दी इच्छा एह कि तुहां खरे कम्म करणे दिया बजाह ते बेअक्के लोकां दी ना समझियां दी गल्लां जो बंद करी दैआ । 16 अपने आप्पे जो अजाद समझा, अपर अपणियां इसा अजादिया जो बुराईया ताई आड मत बणां; अपर अपने आप्पे जो परमात्में दे दास समझी नैं चला । 17 सारेयां दा आदर करा, भाऊआं नैं प्यार रखा, परमात्में ते डरा, राजे दी इज्जत करा ।

मसीह अहां दा आदर्श

18 हे सेवको, हर तरांह दे डरे सौगी अपने मालकां दे अधीन रहूआ, ना सिर्फ तिन्हां जेहडे खरे कने नम्र हन अपर तिन्हां ते भी जेहडे सीधे दिलां आळे हन । 19 कजोकि जेहडा कोई परमात्में दा वचार करी नैं अन्याय ते दुख झेलदा कने क्लेश सेहंदा ऐ तां एह सुहावणा ऐ । 20 कजोकि जे तुहां अपराध करी नैं मुक्के खादे कने सबर रखेया, तां इस च क्या बढाईया दी गल्ल ऐ, अपर जे खरा कम्म करी नैं दुख झेलदे हन कने सबर रखदे हन, तां एह परमात्में जो भांदा ऐ । 21 कने तुहां भी इसताई सदेयो हन, कजोकि मसीह भी तुहां ताई दुख झेली करी तुहां जो इक्क नमूना दैई गैआ ऐ कि तुहां भी तिसदे नशाणां पर चला । 22 ना तां तिन्हीं पाप किता कने ना तिसदे मुंभे ते उग वाजी दी कोई गल्ल निकळी । 23 सैह गाली सुणी नैं गाली नी दिंदा था, अपर अपने आप्पे जो सच्चे न्यायी दे हत्थ च सौंपदा था । 24 सैह अप्पु ई अहां दे पापां जो अपने शरीरे पर लैई करी सूलिया पर टूंगेया, जिसते अहां पापां ताई मरी नैं धर्मिकता ताई जिन्दगी कटन तिसदे मार खाणे ते तुहां खरे होये । 25 कजोकि तुहां पैहलें भटकियां भेडां साइआं थे, अपर हुण अपणियां जान्नी दे रखवाळे कने अधिकारिये अल्ल वापस आयेयो हन ।

लाड़ा कने लाड़ी

3 हे लाड़ियो तुहां भी अपने लाड़े दे अधिकारे च रहूआ, इसताई कि जे इन्हां च कोई एदेईयां हन जेहडियां वचनां जो नी मनदियां हन । 2 तमी तुहां डरे सौगी पवित्र चाल चलन जो दिक्खी नैं बगैर वचना अपणियां अपणियां लाड़िया दे चाल चलन जो दिक्खी करी खिंची चली ओन । 3 तुहां दा श्रृंगार माणुआं जो दसणे आळा नी होयें, मतलब बाल दी गूत करणां, कने सोने दे गैहणे या बणंदे बणंदे कपड़े लगाणा, 4 अपर तुहां दे अंदरे दा छुपया माणु नम्रता कने मने दी दीनता दी नाश ना होणे आळी सजावटा नैं सोभा आळा होया, कजोकि परमात्में दिया नजरा च इस दा मूल बडा ऐ । 5 पराणे जमानें च पवित्र जणांसा भी, जेहडियां परमात्में पर आशा रखदियां थियां, अपने आप्पे जो इसी तरीके नैं सवांरदियां कने अपने अपने लाड़े दे अधिकार च रहँदियां थियां । 6 जिआं सारा अब्राहमे दे हुक्मे च रहँदी कने तिसियो मालक ग्लांवी थी इस तरांह तुहां भी जे भलाई करन कने कुसी भी तरांह दे डरे ते ना डरन, तां तिसदियां कुडियां हुंगियां । 7 तिआं ई हे लाड़ेयो, तुहां भी अक्कमदियां नैं लाड़ियां सौगी जिन्दगी बिता करा, कने जणांस जो कमजोर चीज समझी नैं तिसादा आदर करा, एह समझी नैं कि अहां दोयो जिन्दगिया दे वरदाने दे वारस हन, जिस च तुहां दियां प्रार्थनां रूकी नी जान ।

भलाई करणे दिया बजाह ते सताव

8 निदान, कने सारे दे सारे इक्क मन कने कृपा करणे आळे कने भाईचारे दा प्यार रखणेआळे, कने करुणा करणे आळे, कने नम्र बणां । 9 बुराईया दे बदले बुराई मत करा कने ना गाली दे बदले गाली दैआ; अपर इसदे बदले आशीष ई दैआ, कजोकि तुहां आशीष दे वारस होणे ताई सदेयो हन ।

10 कजोकि

“जेहडा कोई जिन्दगिया दी इच्छा रखदा ऐ, कने खरे दिन दिखणां चाहंदा ऐ, सैह अपनी जीभा जो बुराईया ते, कने अपने लबडां जो छळे दी गल्लां करणे ते रोकी रखा ।

11 सैह बुराईया दा साथ छड्डी दैआ, कने भलाई ई करा; सैह मेल मिलापे जो तोपा, कने तिस ताई कोशस भी करा ।

12 कजोकि प्रभु दी अंखी धर्मियां पर लगी रहँदियां हन, कने तिसदे कनं तिन्हां दी विणतिया दे पाससे लगी रहँदे हन; अपर प्रभु बुराई करणे आळेंयां ते मुंभे फेरदा ऐ ।”

13 जे तुहां भलाई करणे च तौल करणे आळे होन तां तुहां दी बुराई करणे आळा भिरी कुण ऐ । 14 जे तुहां धर्म दिया बजाह ते दुख भी झेलन, तां धन हन; अपर लोकां दे डराणे ते मत डरा, कने मत घबरा, 15 अपर मसीह जो प्रभु समझी नैं अपने अपने मने च पवित्र समझा । जेहडा कोई तुहां ते तुहां दी आशा दे बारे च कुच्छ पूछें, कने तिसियो जो नम्रता कने डरे सौगी जबाब देणे ताई हमेशा त्यार रहूआ, 16 कने अक्का जो भी शुद्ध रखा इसताई कि जिन्हां गल्लां दे बारे च तुहां दी वदनामी होंदी ऐ तिन्हां दे बारे च जेहडे तुहां दे खरे मसीह चाल चलने दा अपमान करदे हन, शर्मिदा होन । 17 कजोकि जे परमात्में दी ऐही इच्छा होयें कि तुहां भलाई करणे दिया बजाह ते दुख झेला, तां एह बुराई करणे दिया बजाह ते दुख झेलणे ते उतम ऐ । 18 इसताई कि यीशुयें भी मतलब अधर्मियां ताई धर्मियें, पापां दिया बजाह ते इक्क बरी दुख झेलया, तांकि अहां जो परमात्में अल्ल पुज्जां, भले ई सैह शरीरे ते तां मारया ऐ, अपर आत्मां च जिंदा ऐ । 19 आत्मां दे रूपे च तिन्हीं जाई नैं कैद कितायां आत्मां जो भी प्रचार किता, 20 जिन्हां तिस पराणे बगते च हुक्म नी मनेया, जाहू परमात्में नूह दे दिनां च शबर रखी करी रूकी रहूआ, कने नूह चाहज बणां दा था, जिस च बैई नैं थोड़े माणु मतलब अठ माणु पाणिये दिया बजाह ते बची गै । 21 तिस पाणिये दा उदारण भी, मतलब बपतिस्मा, यीशु मसीह दे जिंदे होणे दिया बजाह ते, हुण तुहां जो बचांदा ऐ; अपर इसदा मतलब शरीरे दा मैले जो दूर करणां नी ऐ; अपर साफ सुथरे मने नैं परमात्में दे वशे च होई जाणे दा मतलब ऐ । 22 सैह सुअर्गे च जाई नैं परमात्में दे सज्जे पाससं बैई गैआ; कने सुअर्गदूत कने अधिकारी कने सामर्थी तिसदे अधीन किता गै हन ।

परिवर्तित जिन्दगी

4 इसताई जाहू कि मसीहें शरीरे च रैई करी दुख झेलया तां तुहां भी तिसा इच्छा जो धारण करी नैं हत्थयार बन्नी लैआ, कजोकि जिन्हीं शरीरे च दुख झेलया सैह पापे छूटी गैआ, 2 तांकि भविष्य च अपणी बाकि शरीरी जिन्दगी माणुआं दी इच्छां मताबक नी अपर परमात्में दी इच्छा मताबक जिन्दगी जीआ । 3 कजोकि वेवसुआसी जातिआं दी इच्छा मताबक कम्म करणां, कने लुचपण दी बुरी इच्छां मतवालापण, लीलाक्रीड़ा, पियक्कड़पण, कने घृणित मूर्तिपूजा च अज्जे तिकर अहां जेहड़ा बग्त गुआया, सैई बडा होया । 4 इसते सैह हैरान होंदे हन कि तुहां इन्हें भारी लुचपणे च तिन्हां दा साथ नी दिंदे, कने इसताई सैह बुरा भला ग्लांदे हन; 5 अपर सैह तिस जो जेहड़ा जिंदेयां कने मरेयां दा न्याय करणे जो त्यार ऐ, लेखा दिंगे । 6 कजोकि मरेयां जो भी सुसमाचार इसताई सणांया कि शरीरे च तां माणुआं मताबक तिन्हां न्याय होयें । अपर आत्मां च सैह परमात्में मताबक जिंदे रैह ।

परमात्में दे खरे भण्डारी

7 सारियां गल्लां दा अंत तौळी होणे आळा ऐ; इसताई हिम्मत रखी नैं प्रार्थना ताई जागदे रैहआ । 8 सारेयां च म्हान गल्ल एह ऐ कि इक्की दूये नैं जादा प्यार रखा, कजोकि प्यार मतेआं पापां जो ढकी दिंदा ऐ । 9 बगैर कुड़कुड़ करदे इक्की दूये दा परोणेयां साइआं आदर मान करा । 10 जिसियो जेहड़ा वरदान मिलेया ऐ, सैह तिसियो परमात्में दे कई तरांह दे अनुग्रह दे खरे भंडारियां साइआं इक्की दूये दी सेवा च लगान । 11 जे कोई ग्लां, तां इआं ग्लां जिआं कि परमात्में दा वचन ऐ; जे कोई सेवा करे तां तिसा ताकता नैं करे जेहड़ा परमात्मां दिंदा ऐ; जिसा नैं सारियां गल्लां च यीशु मसीह दिया बजाह ते, परमात्में दी महिमा प्रकट होयें । महिमा कने सम्राज्य जुगा जुग तिकर तिसदा ऐ । अमीन ।

मसीह दे दुखां च सेहभागी होणां

12 हे प्यारे भाऊओ, जेहड़ी दुखे दी अग्न तुहां जो परखणे ताई तुहां च भड़कियो ऐ, इसते एह समझी नैं हैराण मत होया कि कोई अनोखी गल्ल तुहां पर भीता दी ऐ । 13 अपर जिआं जिआं मसीह यीशु दे दुखां च साझी होंदे हन, खुश रैहआ, जिसते तिसदी महिमा दे प्रकट होंदे बग्त भी तुहां खुश कने मगन होन । 14 भिरी जे मसीह यीशु दे नांये ताई तुहां दी निंदा किस्ती जांदी ऐ तां तुहां धन हन, कजोकि महिमा दा आत्मां, जेहड़ी परमात्में दी आत्मां ऐ, तुहां पर छौं करदी ऐ । 15 तुहां च कोई भी माणु हत्या या चोर या कुलछणे कम्म करी करी दूये देहयां कम्मां च हत्थ पाणे दिया बजाह ते दुख ना पा । 16 अपर जे मसीही होणे दिया बजाह ते दुख पान, तां शर्मिंदा मत होया, अपर इसा गल्ला ताई परमात्में दी महिमा करा । 17 कजोकि सैह बग्त आई रैहआ ऐ कि पैहलें परमात्में दे लोकां दा न्याय किन्ता जां, कने जाहू कि न्याय दी

शुरुआत अहां ते ई होंगी तां तिन्हां दा क्या अंत हुंगा जेहड़े परमात्में दे सुसमाचारे जो नी मनदे? 18 कने

“जे वसुआसी माणु बड़ी मुसीबतां ते उद्धार पांगा, तां वेवसुआसिये दा कने पापिये दा क्या हुंगा ।”

19 इसताई जेहड़े परमात्में दी इच्छा दे मताबक दुख झेलदे हन, एह भलाई करदे करदे अपणियां अपणियां जात्री जो वसुआसे जोग्गे सृजनहारे दे हत्थे च सौंपी दें ।

चेलयां कने नौ जुआना जो संदेश

5 तुहां च जेहड़े स्याणे हन, मैं तिन्हां साइआं स्याणा कने मसीह दे दुखां दा गवाह कने प्रकट होणे आळी महिमा च साझी होई नैं तिन्हां जो एह समझदा ऐ । 2 कि परमात्में दे तिस झुंडे दी, जेहड़े तुहां बिच हन रखवाली करा; कने एह दबाबे नी अपर परमात्में दी इच्छा मताबक खुशियां नैं, कने नीच कमाई ताई नी अपर मन लगाई नैं । 3 जेहड़े लोक तुहां जो सौंपियो हन, तिन्हां पर हक्क मत जता, अपर झुंडे ताई नमूना बणां । 4 कने जाहू प्रधान रखवाला प्रकट हुंगा, तां तुहां जो महिमा दा मुकट दिता जांगा जेहड़ा मुरझाणे आळा नी । 5 इसी तरांह हे नौजुआनों तुहां भी स्याणेयां दे अधीन रैहआ, अपर तुहां सारे दे सारे इक्की दूये दी सेवा करणे जो दीनता नैं अपणे अपणे लक्के कसी लैआ, कजोकि परमात्में कमांडियां दा विरोध करदा ऐ, अपर दीन माणुआं पर अनुग्रह करदा ऐ ।”

6 इसताई परमात्में दे ताकतवर हत्थे थलै दीनता नैं रैहआ, जिसते सैह तुहां जो ठीक बगते पर बधां । 7 अपणी सारी चिंता तिस पर पाई दैआ, कजोकि तिस जो तुहां दा ध्यान ऐ । 8 चुकनै होया, कने जागदे रैहआ; कजोकि तुहां दा विरोधी सैतान गरजणे आळे शेर साइआं इसा तोपा च रैहदा ऐ कि कुस जो फाड़ी खां । 9 वसुआसे च पक्के होई नैं, कने एह समझी नैं तिसदां सामणां करा कि तुहां दे भाऊ जेहड़े संसारे च हन एदेया ई दुख झेला दे हन । 10 अपर हुण परमात्मां जेहड़ा सारे अनुग्रह दा दाता जिन्हीं तुहां जो यीशु मसीह दे नांये ते अपणी सदा दी महिमा ताई सदेया, तुहां दे थोड़ी देरा तिकर दुख झेलणे दे बाद अप्पु ई तुहां जो सिद्ध कने स्थिर कने ताकतवर करगा । 11 तिस दा सम्राज्य जुगा जुग रैह । अमीन ।

आखरी नमस्कार

12 मैई सिलवानुसे दे हत्थ, जिसियो मैं वसुआसे जोग्गा भाऊ समझदा ऐ, विस्तार च लिखी नैं तुहां जो समझाया ऐ, कने एह गवाही दिती ऐ कि परमात्में दा सच्चा अनुग्रह ऐही ऐ, इसी च बणी रैहआ । 13 जेहड़ा बेबीलोन च तुहां साइआं चुणेयो लोक हन, सैह कने मेरा जागत मरकुस तुहां जो नमस्कार ग्लांदा ऐ । 14 प्यारे च पुक्के लैई करी इक्की दूये जो नमस्कार करा । तुहां सबना जो, जेहड़े मसीह च हन, शांति मिलदी रैह ।

2 पतरस

भूमिका

पतरसे दी दूई पत्री शुरु दे मसीहियां दे इक्क विशाल समुदाय दे नां लिखी गई थी । इसा पत्रिया दी प्रमुख चिन्ता दा विषय झूठे शिक्षकां दे कम्म कने तिन्हां दी शिक्षां ते पैदा अनैतिकता दे विरुद्ध संघर्ष करणां ऐ । इन्हां समस्यां दा जबाब परमात्मं कने प्रभु यीशु मसीह दे सच्चे ज्ञान च बणी रहणे च मिलदा ऐ, सैह ज्ञान जेहड़ा तिन्हां लोकां दिया व बजाह ते पुजाया ऐ जिन्हां अप्पू यीशु मसीह जो दिख्या कने तिसदी शिक्षा जो सुणेयां ऐ । लेखक खास करी नै तिन्हां लोकां ते चिन्तित ऐ, जेहड़े दावा करदे हन कि मसीह भिरी ते वापस ओणा । लेखक ग्लांदा ऐ कि इआं प्रतीत हुंदा ऐ कि मसीह दे ओणे च देर होआ दी ऐ, अपर वास्तव च इआं इसताई ऐ कि परमात्मां "नी चाहंदा कि कोई खत्म होयें, अपर एह कि सबना जो मन बदलणे दा मौका मिलें ।"

रूप रेखा

भूमिका 1: 1,2

मसीही बुलाहट 1: 3 -21

झूठे शिक्षक 2: 1 -22

मसीह दा निर्णायक आगमन 3: 1-18

नमस्कार

1 शिमौन पतरसे दे पाससे ते, जेहड़ा यीशु मसीह दा दास कने चेला ऐ, तिन्हां लोकां दे नां जिन्हां नै अहां दे परमात्मं कने उद्धारकर्ता यीशु मसीह दी धार्मिकता दिया बजाह ते अहां साइआं कीमती वसुआस हासल कित्ता ऐ । 2 परमात्मं दे पाससे अहां दे प्रभु यीशु दी पणछैणां दिया बजाह ते अनुग्रह कने शांति तुहां च जादा ते जादा बधदी जां ।

ईश्वरीय बुलाहट कने चुनाव

3 कजोकि तिसदी सुअर्गीय सामर्थी नै सब कुच्छ जेहड़ा जिन्दगिया नै कने भक्तिया नै सम्बध रखदा ऐ, अहां जो तिस दी पणछैणां दिया बजाह ते दित्ता ऐ, जिन्हीं अहां जो अपणियां ई महिमा कने सद्गुण दे मताबक सदेया ऐ । 4 जिसदिया बजाह ते परमात्मं अहां जो कीमती कने मतिआं प्रतिज्ञायें दित्तियां हन: तांकि इन्हां दिया बजाह ते तुहां तिस भ्रष्टाचारे ते छूटी नै, जेहड़ी संसारे च बुरिआं इच्छां ते हुंदा ऐ, भिरी ईश्वरीय सभाव दे सेहभागी होई जान । 5 इसा बजाह ते तुहां सब तरांह दी कोशश करी नै अपणे वसुआसे पर सद्गुण कने सद्गुण पर समझ, 6 कने समझ पर संयम कने संयम पर शबर, कने शबर पर भक्ति, 7 कने भक्ति पर भाईचारे दा प्यार कने भाईचारे दे प्यारे पर प्यार बधां दे जा । 8 कजोकि जे एह गलां तुहां च अज्र भी रेंह कने बधदी जान, तां तुहां जो प्रभु यीशु मसीह दी पणछैणां च निकम्मे कने निष्फल नी होणे दिंगी । 9 कजोकि जिस च एह गलां नी, सैह धुंधला दिखदा कने अन्ना ऐ कने सैह भूली बैठया कि सैह अपणे पराणे पापां धोई करी खरा होई गैआ । 10 इसा बजाह हे भाऊयो, अपणे सद्गुण जो कने चुणी लैणे जो सिद्ध करणे दी भली भांति कोशश करदे जा, कजोकि जे इआं करणे तां कदी भी ठोकर नी खांगे; 11 अपर इसा रीतिया नै तुहां अहां दे प्रभु कने उद्धारकर्ता यीशु मसीह दे सदा दे राजे च बड़े आदरे सौगी दाखल होंगे ।

पतरसे दा आखरी बग्त

12 इसताई कने तुहां एह गलां जाणदे हन, कने जेहड़ा सचाईया दा वचन तुहां जो मिलेया ऐ तिस च बणी रेंहदे हन, भिरी भी मैं तुहां जो इन्हां गलां दी याद दलाणे जो सदा त्यार रेंहंगा । 13 मैं एह अपणे तांई ठीक समझदा कि जाहू तिकर मैं इस डेरे च ऐ, ताहू तिकर तुहां जो याद दिलाई दिलाई नै चितांदा रेंहदा । 14 कजोकि एह जाणदा ऐ कि यीशु मसीह दे मताबक मेरे डेरे दा ढेणे दा बन्त तौळी ओणे आळा ऐ, । 15 इसताई मैं इतणी कोशश करणा कि मेरे मरणे दे बाद भी तुहां इन्हां सारियां गलां जो हमेशा याद रखी सका ।

मसीह दी महिमा दे अंखी दिखे गवाह

16 कजोकि जाहू अहां तुहां जो अपणे प्रभु यीशु मसीह दी सामर्थी दा कने ओणे दी खबर दित्ती थी, तां सैह चलाकियां नै बणाईयो काहणियां दा पीछा करणां नी था, अपर अहां अप्पू ई यीशु दे तेजे जो दिख्या था । 17 कजोकि जाहू तिन्हीं पिता परमात्मं ते आदर कने महिमा पाई कने तिस प्रतापमय महिमा च एह वाणी आई, "एह मेरा प्यारा पुत्र ऐ, जिसते मैं खुश ऐ ।" 18 ताहू अहां तिस सौगी पवित्र पहाड़े पर थे, कने सुअर्गे ते ऐही वाणी ओंटी सुणी । 19 अहां अल्ल जेहड़ा भविष्यवक्तां दा वचन ऐ सैह इसा घटना जो होर मजबूत करदा कने तुहां एह खरा करदे हन जेहड़ा एह समझी नै तिस पर ध्यान करदे हन कि सैह इक दिख्या ऐ, जेहड़ा नैहरिया जगाह च तिस बगते तिकर लौ दिंदा रेंहदा ऐ जाहू तिकर कि भ्याग नी होई जां कने भ्यागा दा तारा तुहां दे दिलां च चमकी नी पौयें । 20 अपर पैहले एह जाणी लैआ कि पवित्रशास्त्रे दी कोई भी भविष्यवाणी कुसी दी अपणी सोचा दे अधारे पर पूरी नी होंदी, 21 कजोकि कोई भी भविष्यवाणी माणुये दी इच्छा ते कदी नी होई, अपर भक्त जण पवित्र आत्मां दिया बजाह ते कने प्रेरणा ते परमात्मं दे पाससे ते ग्लां दे थे ।

झूठे शिक्षक

2 जिआं तिन्हां लोकां च झूठे भविष्यवक्ता थे, तिआं ई तुहां च भी झूठी शिक्षा देंगे आळे होंगे, जेहड़े नाश करणे आळे पाखंडिये दा उदघाटन लुक्की लुक्की नै करणे, कने तिस मालके दा जिन्हीं तिन्हां जो खरीदी लैआ ऐ, इन्कार करणे, कने अपणे आप्पे जो तौळी विनाशे च पाई दिंगे । 2 मते तिन्हां साइआं लुचपण करणे, जिन्हां दिया बजाह ते सचाईया दे रस्ते दी निंदा कित्ती जागी । 3 कने सैह लोभे तांई गलां गद्दी नै तुहां जो अपणे फायदे दी बजाह बणांगें, कने जेहड़ा सज्जा दा हुक्म तिन्हां पर पैहले ते होई चुकेया ऐ तिसदे ओणे च कुच्छ भी देर नी कि तिन्हां दा विनाश धीमा नी ।

4 कजोकि जाहू परमात्मं तिन्हां सुअर्गदूतां जो जिन्हां पाप करणां नी छडेया, अपर नरके च घल्ली करी नैहरे दे कुडा च पाई दित्ता तांकि न्याय दे दिन तिकर बंदी रेंह; 5 कने पैहले जुगे दे संसारे जो भी नी छडेया अपर वेवसुआसी संसारे पर महा जल प्रलय घल्ली करी धार्मिकता दे गुणगान करणे आळ नूह समेत अठां माणुआं जो बचाई लैआ; 6 कने सदोम कने अमोरा दे सैहरां जो नाश करणे दी इतणी सज्जा दित्ती कि तिन्हां जो फुकी करी धुड़ा च मिलेया दित्ता तांकि सैह ओणे आळे वेवसुआसी लोकां दी शिक्षा तांई इक्क उदारण बणें, 7 कने धर्मी लूते जो जेहड़ा अधर्मियां दे बुरे चाल चलण ते बड़ा दुखी था छुटकारा दित्ता । 8 (कजोकि सैह धर्मी तिन्हां बिच रेंहदे होये कने

तिन्हां दे पापां दे कम्मां जो दिखी दिखी नैं कने सुणी सुणी नैं, हर दिन अपणे सच्चे मने जो दुखी करदा था ।) 9 तां प्रभु भक्तां जो परीक्षा ते कड्डी लैणां कने अधर्मियां जो न्याय दे दिने तिकर सज्जा दी हालता च रखणां भी जाणदा ऐ, 10 खास करी नैं तिन्हां जो जेहड़ा बुरिआं इच्छां दे पचांह शरीरे मताबक चलदे कने प्रभु जो निकम्मा समझदे हन । सैह टीठ, कने हठी हन, उंचे औधेआळ्यां जो बुरा भला ग्लाणे ते नी उरदे, 11 भिरी भी सुअर्गदूत जेहड़े शक्ति कने सामर्थी च तिन्हां ते बडे हन, प्रभुये सामणे तिन्हां जो बुरा भला ग्लाई नैं दोष नी लगादे । 12 अपर एह लोक बेअक्के उंगरां साइआं हन, जेहड़े पकड़ेणे तांई कने नाश होणे तांई पैदा होये हन: कने जिन्हां गलां जो जाणदे ई नी हन तिन्हां दे बारे च दूयेयां जो बुरा भला ग्लांदे हन, सैह अपनी सड़ाहटा च अप्पु ई सडी जागे । 13 दूयेयां दा बुरा करणे दे बदळे तिन्हां ई दा बुरा हुंगा । तिन्हां जो दिन दुपेर भोग विलास करणां खरा लगदा ऐ । एह कलक कने दोष ऐ; जाहू सैह तुहां सौगी खादे पीदे हन, तां अपणे पास्से ते प्यार करी नैं भोग विलास करदे हन । 14 तिन्हां दियां अखी च व्यभिचार बसेया ऐ, कने सैह पाप कित्ते बगैर रैई नी सकदे । सैह चंचल मने आळ्यां जो फुसलाई लेंदे हन । तिन्हां दे मनां जो लोभ लालच कमंड करणे दा तजर्बा होई गैआ ऐ; सैह सन्ताप दी औलाद हन । 15 सैह सीधे रस्ते जो छड्डी नैं भटकी गैयो हन, कने बओरा दे जागत बिलामे दे रस्ते पर चली पैयो हन, जिसियो अधर्म दी मजदूरी खरी लगदी ऐ; 16 अपर तिसदे अपराध दे बारे च डांटेया गैआ, ऐत्थू तिकर कि अबोल गधिया माणु दी बोली च ग्लाई करी तिस भविष्यवक्ता जो तिसदे बावलेपणे जो रोकेया ।

17 एह लोक अन्ने खुऐ, कने हौआ दे उडाये होये बदळ हन: तिन्हां तांई सदा दा नैहरा ठेहराई दित्या ऐ । 18 सैह बेकार च कमंडे दियां गलां करी करी नैं लुचपण दे कम्मां दिया बजाह ते, तिन्हां लोकां जो शरीरी इच्छां च फंसाई लेंदे हन जेहड़े भटकेयां च अल्ली तिकर निकळादे हन । 19 सैह तिन्हां जो अजाद होणे दा वचन तां दिंदे हन, अपर अप्पु ई सड़ाहटा दे दास हन; कजोकि जेहड़ा माणु जिस ते हारी जांदा, सैह तिसदा दास बणी जांदा ऐ । 20 जाहू सैह प्रभु कने उद्धारकर्ता यीशु मसीह दी पणछैणां दिया बजाह ते संसारे दी कई तरांह दी अशुद्धता ते बची निकळे कने भिरी तिसा च फंसी करी हारी गै, तां तिन्हां दी हालत पैहले ते भी बुरी होई गैइयो ऐ । 21 कजोकि धार्मिकता दे रस्ते जो नी जाणना ई तिन्हां तांई इसते खरा हुंदा कि तिसियो जाणी करी, तिस पवित्र हुक्म ते फिरी जांदे जेहड़ा तिन्हां जो सौंपेया था । तिन्हां पर एह कहावत ठीक बैंदी ऐ, 22 कि कृत्ता अपणियां उल्टिया दे पास्से कने नौतियो सूअरनी चिकड़े लमडूणे तांई भिरी वापस जांदी ऐ ।

प्रभु दे ओणे दा दिन

3 हे मेरे भाऊओ, हुण मैं तुहां जो एह दूई पत्री लिखा करदा, कने दूनी च याद दिलाई नैं तुहा दे साफ मने जो हौसला दिंदा ऐ, 2 कि तुहां तिन्हां गलां जो जेहिड्यां कि भविष्यवक्ते पैहले ते ग्लाईयां हन, कने प्रभु कने

उद्धारकर्ता दे हुक्मे जो याद करा जेहड़ा तुहां चेलयां दिया बजाह ते दित्या था । 3 पैहले एह जाणी लैआ कि आखरी दिनां च हंसी मजाक करणे आळे ओंगे जेहड़े अपणियां इच्छां मताबक चलगे, 4 कने ग्लांगे, तिसदे ओणे दी प्रतिज्ञा कुत्थू गैई, कजोकि जाहू ते बजुर्ग मरी गैयो हन, सब कुच्छ तिआं ई चलेया जिआ सृष्टिया दे शुरु ते था ।" 5 सैह तां जाणी बुझी नैं एह भूली गै कि परमात्म दे वचने दिया बजाह ते भ्रमांड पराणे बन्ते ते अज्जे तिकर ऐ कने धरती भी पाणिये नैं बणियां कने पाणी पर ई टिक्रियो ऐ, 6 इसा बजाह ते तिस जुगे दा संसार पाणी च डूबी नैं नाश होई गैआ । 7 अपर अज्जे दे जुग दे अम्बर कने धरती तिस वचना दिया बजाह ते इसतांई रखे गै हन कि जिंदे कित्ते जान; कने एह वेवसुआसी माणुआं दे न्याय कने नाश होणे दे दिन तिकर इआं ई रखेया जां ।

8 हे मेरे प्यारेयो, एह गल तुहां ते छूपी नी रेंह कि प्रभु अल्ल इक्क दिन हजार साल दे बराबर ऐ कने हजार साल इक्क दिन दे बराबर हन । 9 प्रभु अपणे वादे दे बारे च देर नी करदा, जितणी देर कुच्छ लोक समझदे हन; अपर तुहां दे बारे च देर ररखदा ऐ, कने नी चाहंदा कि कोई भी नाश होये, अपर एह कि सारेयां जो मन जो फेरणे दा मौका मिलें । 10 अपर प्रभु दा दिन चोरे साइआं आई जांगा, तिस दिन अम्बर जोरे दी गड़ाकेयां दी उआज नैं जांदा रेंहगा कने तत्व बडे जादा गर्म होई नैं पिघली जागे कने धरती कने तिसा दे कम्म फकूई जागे । 11 जाहू कि एह सारियां चीजां इसा तरीके नैं पिघलणे आळी ऐ, तां तुहां जो पवित्र चाल चलन कने वसुआसे च कदेयो माणु होणे चाइदे, 12 कने परमात्म दे तिस दिन दा इंतजार कुसा रीतिया नैं करणां चाइदा कने तिस दे तौळी ओणे तांई कितणी कोशश करणां चाइदी, जिसदिया बजाह ते अम्बर अग्गी च पिघली जांगा, कने अम्बरे दे तारे गण बडे ई तपी करी गळी जागे । 13 अपर तिसदे वाडे मताबक अहां इक्क नौये सुअर्ग कने नौईआ धरतिया दी आस रखदे हन जिन्हां च धार्मिकता वास करगी ।

जागते कने त्यार रैहआ

14 इसतांई, हे मेरे प्यारे भाऊओ, जाहू कि तुहां इन्हां गलां दी आस रखदे हन, तां कोशश करा कि तुहां शांतिया नैं तिस सामणे निष्कलंक कने बेकसूर ठेहरन, 15 कने अहां दे प्रभु दे शबरे जो उद्धार समझा, जिआं अहां दे प्यारे भाऊ पौलुसें भी तिस ज्ञाने मताबक जेहड़ा तिसियो मिलेया, तुहां जो लिख्या ऐ । 16 तिआं ई तिन्हीं अपणियां सारियां पत्रियां च भी इन्हां गलां दी चर्चा कित्ती ऐ, जिन्हां च कुच्छ गलां एदेइआं हन जिन्हां जो समझणां ओखा ऐ, कने अनपढ़ कने चलाक लोक तिन्हां दे मतलबां जो भी पवित्रशास्त्रे दी होरनी गलां साइआं खीजीं ताणी नैं अपणे ई नाश दी बजाह बणांदे हन । 17 इसतांई हे प्यारे भाऊओ, तुहां लोक पैहले ते ई इन्हां गलां जो जाणी नैं चुकनै रैहआ, तांकि कुत्थी हत्थे ते गुआई ना देंन । 18 अपर अहां दे प्रभु कने उद्धारकर्ता यीशु मसीह दे अनुग्रह कने पणछैणां च बधदे जा । तिस दी महिमा हुण भी होये कने जुगा जुग हौदी रेंह । आमीन ।

1 यूहन्ना

भूमिका

यूहन्ना दी पैहली पत्रिया दे दो खास मकसद हन: (1) अपने पाठकां जो परमात्मं कने तिसदे पुत्तर, यीशु मसीह, दी प्रतिज्ञा च जिन्दगी कटणे जो उत्साहित करणां, कने (2) तिन्हां झूठी शिक्षां दा पालन करणां, जिसते एह प्रतिज्ञा खत्म होई जाणी, दे वरखलाफ चतौनी देणां । एह झूठी शिक्षा इसा धारणां पर आधारित थी कि बुराई भौतिक संसारे दे सम्पर्क च ओणे दा परणांम होदी ऐ, कने इसताई यीशु, परमात्मं दा पुत्तर, वास्तव च इक्क माणु होई ई नी सकदा । इन्हां शिक्षकां दा दावा था कि उद्धार हासल करणे ताई इक्की माणुये जो इस संसारे दी जिन्दगिया दे बारे च दस्सियां गल्लां ते मुक्त होणां हुगा; कने सैह एह भी सखां दे थे कि नैतिकता या अपण भाऊये नैं प्यार रखण दियां गल्लां दे उद्धार ते कोई सम्बन्ध नी ऐ ।

इसा शिक्षा दे वरखलाफ लेखक साफ तरीके नैं एह दस्सदा ऐ कि यीशु इक्क सच्चा माणु था, कने सैह इसा गल्ला पर जोर दिंदा ऐ कि सैह जेहड़े यीशु मसीह पर वसुआस करदे कने परमात्मं नैं प्यार रखदे हन जरूरी ऐ कि अप्पु च इक्की दूये नैं प्यार रखा ।

रूप रेखा

भूमिका 1:1-4

जोती कने नैहरा 1:5 ----- 2:29

परमात्मं दी औलाद कने सैताने दी औलाद 3:1-24

सच कने झूठ 4:1-6

प्यार दे कम्म 4:7-21

जीतआळा वसुआस 5:1-21

जिन्दगिया दा वचन

1 तिसा जिन्दगिया दे वचने दे बारे च जेहड़ा शुरु ते था, जिसियो अहां सुणेया, कने जिसियो अपनी अंखी नैं दिख्या, अपर जिसियो अहां ध्याने लाई नैं दिख्या कने हत्थां लाई दिख्या - 2 एह जिन्दगी प्रकट होई, कने अहां तिसा जो दिख्या, कने तिसादी गवाही दिंदे हन कने तुहां जो तिसा सदा दी जिन्दगिया दी सुसमाचार दिंदे हन जेहड़ा पिता सौगी था कने अहां पर प्रकट होया - 3 जेहड़ा कुच्छ अहां दिख्या कने सुणेया ऐ तिसदी खबर तुहां जो भी दिंदे हन, इसताई कि तुहां भी अहां सौगी साझी हन; कने म्हारी एह साझेदारी पिता सौगी कने तिसदे पुत्तर यीशु मसीह सौगी ऐ । 4 कने एह गल्लां अहां इसताई लिखदे हन कि म्हारी खुशी पूरी होई जां ।

जोतिया च चलणां

5 जेहड़ी खबर अहां तिसते सुणियो कने तुहां जो सुणां दे हन, सैह एह ऐ कि परमात्मां जोती ऐ कने तिस च जरा भी नैहरा नी । 6 अपर अहां ग्लां कि तिस सौगी म्हारी सहभागिता हन कने भिरी नैहरे च चलदे, तां अहां झूठे हन कने सचाईया पर नी चलदे; 7 अपर जिआं सैह जोतिया च हन, तिआं ई अहां भी जोतिया च चलदे, तां इक्की दूये नैं साझेदारी रखदे हन, कने तिसदे पुत्तर यीशु दा खून अहां जो सारे पापां ते शुद्ध करदा ऐ । 8 जे अहां ग्लान कि अहां च कुच्छ भी पाप नी, तां अपने आप्पे जो धोखा दिंदे हन, कने अहां च सचाई नी । 9 जे अहां अपने पापां जो मनी लैन, तां सैह अहां दे पापां जो माफ करणे कने अहां जो सारे अधर्म ते शुद्ध करणे जो वसुआसे जोगी कने धर्मी हन । 10 जे अहां ग्लान कि अहां पाप नी कित्या, तां तिसियो झूठा ठेहरां दे हन, कने तिसदा वचन अहां च नी हन ।

मसीह अहां दा सहायक

2 हे मेरे जागतो, मैं एह गल्लां तुहां जो इसताई लिखदा ऐ कि तुहां पाप ना करन; कने जे कोई पाप करे, तां पिता परमात्मं अल्ल अहां ताई इक्क मददगार ऐ, मतलब धर्मी यीशु मसीह; 2 कने सैई अहां दे पापां दा प्रायश्चित ऐ, कने सिर्फ अहां ई नी अपर सारे संसारे दे पापां दा भी । 3 जे अहां तिसदेयां हुक्मां जो मनदे, तां इसते अहां समझी लेंगे कि अहां तिसियो जाणदे हन । 4 जेहड़ा कोई एह ग्लांदा ऐ, "मैं तिसियो जाणी गैआ ऐ," कने

तिसदेयां हुक्मां जो नी मनदा, सैह झूठा कने तिस च कोई सचाई नी; 5 अपर जेहड़ा कोई तिसदे वचना पर चलें, तिस च सचमुच परमात्मं दा प्यार सिद्ध होया ऐ, इसते अहां जाणदे हन कि अहां तिस च हन । 6 जेहड़ा कोई एह ग्लांदा ऐ कि मैं तिस च बणी रँहदा ऐ तां तिसियो चाइदा कि अप्पु भी तिआं ई चलें जिआं सैह चलदा था ।

नौआं हुक्म

7 हे मेरे प्यारे भाऊओ, मैं तुहां जो कोई नौआं हुक्म नी लिखदा, अपर सैई पराणां हुक्म जेहड़ा शुरु ते तुहां जो मिलेया ऐ; एह पराणां हुक्म सैह ई वचन ऐ जिसियो तुहां सुणेया ऐ । 8 भिरी भी मैं तुहां जो नौआं हुक्म लिखदा ऐ, कने एह तिस च कने तुहां च सच्चा ठेहरांदा ऐ, कजोकि नैहरा हटदा जांदा ऐ कने सचाईया दी जोति हुण चमकणा लग्गी ऐ । 9 जेहड़ा कोई एह ग्लांदा ऐ कि मैं जोती च ऐ कने अपने भाऊये नैं बैर रखदा ऐ, सैह अल्ली तिकर नैहरे च ई ऐ । 10 जेहड़ा कोई अपने भाऊये नैं प्यार रखदा ऐ सैह जोतिया च रँहदा ऐ, कने ठोकर नी खाई सकदा ऐ । 11 अपर जेहड़ा कोई अपने भाऊये नैं बैर रखदा ऐ सैह नैहरे च ऐ कने नैहरे च चलदा ऐ, कने एह नी जाणदा कि कतां ह चलेया ऐ, कजोकि नैहरे तिसदियां अखियां अत्रियां करी दितियां हन । 12 हे प्यारे जागतो, मैं तुहां जो इसताई लिखदा ऐ कि तिसदे नांये ते तुहां पाप माफ होयो हन । 13 हे पितरो, मैं तुहां जो इसताई लिखदा ऐ कि जेहड़ा शुरु ते ऐ तुहां तिसियो जाणदे हन । हे जुआनों, मैं तुहां जो इसताई लिखदा ऐ कि तुहां तिसा दुष्ट पर जय पाई ऐ । हे जागतो, मैं तुहां जो इसताई लिख्या ऐ कि तुहां पिता जो जाणी गैयो हन । 14 हे पितरो, मैं तुहां जो इसताई लिख्या ऐ कि जेहड़ा शुरु ते ऐ तुहां तिसियो जाणी गै हन । हे जुआनों, मैं तुहां जो इसताई लिख्या ऐ कि तुहां ताकतवर हन, कने परमात्मं दा वचन तुहां च रँहदा ऐ; कने तुहां तिसा दुष्ट पर जय पाई ऐ ।

संसारे नैं प्यार मत करा

15 तुहां ना तां संसारे नैं कने ना संसारे दी चिजां नैं प्यार रखा । जे कोई संसारे नैं प्यार रखदा ऐ, तां तिस च पिता दा प्यार नी ऐ । 16 कजोकि जेहड़ा कुच्छ संसारे च ऐ, मतलब शरीरे दियां इच्छां कने अंखी दी इच्छा कने तणखाई दा कमंड, सैह पिता दी तरफ ते नी अपर संसारे दी तरफ ते ऐ ।

17 संसार कने तिसदियां इच्छां दोयो मिटटी जांदियां हन, अपर जेहड़ा परमात्मं दी इच्छा पर चलदा ऐ सैह हमेशा बणी रहेंगा ।

18 हे जागतो, एह आखरी बत ऐ; कने जिआं तुहां सुणेया ऐ कि मसीह दा विरोधी ओणे आळा ऐ, तिस दे मताबक हुण भी मत्ते मसीह विरोधी उठी खडूतेयो हन; इसते अहां जाणदे हन कि एह आखरी बत ऐ । 19 सैह निकळे तां अहां ते ई, अपर अहां च नी थे; कजोकि जे सैह अहां दे होंदे, तां अहां सौगी रहेंदे; अपर निकळी इसताई गै कि एह प्रकट होन कि सैह सारे अहां च नी हन । 20 कने तुहां दा तां तिस पवित्र यीशु नैं अभिषेक होया ऐ, कने तुहां सब कुछ जाणदे हन । 21 मैं तुहां जो इसताई नी लिख्या कि तुहां सच जो नी जाणदे, अपर इसताई कि तिसियो जाणदे हन, कने इसताई कि कोई भी झूठ सचाईया दी तरफा ते नी । 22 झूठा कुण ऐ, सिर्फ सैह जेहड़ा यीशु दे मसीह होणे ते मना करदा ऐ; कने मसीह दा विरोधी सैई ऐ, जेहड़ा पिता दा कने पुत्रे दा मना करदा ऐ । 23 जेहड़ा कोई पुत्र दा मना करदा ऐ तिस अल्ल पिता भी नी; जेहड़ा पुत्र जो मनी लेंदा ऐ, तिस अल्ल पिता भी ऐ । 24 जेहड़ा कुछ तुहां शुरु ते सुणेया ऐ, सैई तुहां च बणी रहें; जेहड़ा तुहां शुरु ते सुणेया ऐ, अपर सैह तुहां च बणी रहें तां तुहां भी पुत्रे च कने पिता च बणी रहेंगे । 25 कने जिसदी तिन्हीं अहां नैं प्रतिज्ञा किती सैह सदा दी जिन्दगी ऐ । 26 मैं एह गलां तुहां जो तिन्हां दे बारे च लिख्यां हन, जेहड़े तुहां जो भकां दे हन; 27 अपर तुहां दा सैह अभिषेक जेहड़ा तिसदे पास्से ते कित्या, तुहां च बणेयां रहेंदा ऐ; कने तुहां जो इस दी जरूरत नी कि कोई तुहां जो सखां, अपर जिआं सैह अभिषेक जेहड़ा तिसदे पास्से ते कित्या तुहां जो सारियां गलां सखांदा ऐ, कने एह सचा ऐ कने झूठा नी; कने जिआं तिन्हीं तुहां जो सखाया ऐ तिआं ई तुहां तिस च बणी रहेंदे हन ।

मसीह कने विरोधी

28 हे जागतो, तिस च बणी रहेंआ कि जाहू सैह प्रकट होयें तां अहां जो हिम्मत होयें, ओणे पर तिस सामणे शर्मिदा ना होन । 29 जे तुहां जाणदे हन, कि सैह धर्मी ऐ, तां एह भी जाणदे हन कि जेहड़ा कोई धर्म दा कम्म करदा ऐ सैह तिसते जम्मेया ऐ ।

3 दिखा, पिता अहां नैं कितणां प्यार कित्या ऐ कि अहां परमात्मं दी औलाद बणन; कने अहां हन भी । इसा बजाह ते संसार अहां जो जाणदा, कजोकि तिन्हीं तिसियो भी नी जाणेया । 2 हे प्यारे भाऊओ, हुण अहां परमात्मं दी औलाद हन, कने अल्ली तिकर एह प्रकट नी होया कि अहां क्या कुछ होंगे! इतणां जाणदे हन कि जाहू सैह प्रकट हुंगा तां तिस साइआं होंगे, कजोकि तिसियो तिआं ई दिखगे जिआं सैह ऐ । 3 कने जेहड़ा कोई तिस पर एह आशा रखदा ऐ, सैह अपणे आप्पे जो तिआं ई पवित्र करदा ऐ जिआं सैह पवित्र ऐ ।

4 जेहड़ा कोई पाप करदा ऐ, सैह व्यवस्था दा विरोध करदा ऐ; कने पाप तां व्यवस्था दा विरोध ऐ । 5 तुहां जाणदे हन कि सैह इसताई प्रकट होया कि पापां जो चुकी लैई जां; कने तिसदे सभावे च पाप नी ऐ । 6 जेहड़ा कोई तिस च बणी रहेंदा ऐ, सैह पाप नी करदा; जेहड़ा कोई पाप करदा ऐ, तिन्हीं नी तां तिसियो दिख्या ऐ कने ना तिसियो जाणेया ऐ । 7 हे जागतो, कुसी दे भकाणे च मत ओआ । जेहड़ा धर्म दे कम्म करदा ऐ, सैई तिस साइआं धर्मी ऐ । 8 जेहड़ा कोई पाप करदा ऐ सैह सैताने दे पास्से ते ऐ, कजोकि सैतान शुरु ते ई पाप करदा आया ऐ । परमात्मं दा पुत्र इसताई प्रकट होया कि सैताने दे कम्मां दा नाश करे । 9 जेहड़ा कोई परमात्मं ते जम्मेया ऐ सैह पाप नी करदा; कजोकि तिसदा बीई तिस च बणेयां रहेंदा ऐ, कने सैह पाप करी ई नी सकदा कजोकि परमात्मं ते जम्मेया ऐ । 10 इसी ते परमात्मं दी औलादा कने सैताने दी औलादा दा पता चलदा ऐ; जेहड़ा कोई धर्म दे कम्म नी करदा सैह परमात्मं नैं नी, कने ना सैह जेहड़ा अपणे भाऊये नैं प्यार नी रखदा ।

इक्की दूये नैं प्यार रखा

11 कजोकि जेहड़ी खबर तुहां शुरु ते सुणियो, सैह एह ऐ कि अहां इक्की दूये नैं प्यार रखन; 12 कने कने साइआं मत बणां जेहड़ा तिस दुष्ट ते था, कने जिन्हीं अपणे भाऊ जो मारेया था । कने तिसियो कुसा बजाह ते मारेया था, इसा बजाह ते कि तिसदे कम्म बुरे थे, कने तिसदे भाऊये दे कम्म धर्म दे थे ।

13 हे भाऊयो, जे संसार तुहां नैं बैर करदा ऐ तां हैराण मत होंदे । 14 अहां जाणदे हन कि अहां मौता ते पार होई नैं जिन्दगिया च पुज्जदे हन; कजोकि अहां भाऊआं नैं प्यार रखदे हन । जेहड़ा प्यार नी रखदा सैह मौता दी हालता च रहेंदा ऐ । 15 जेहड़ा कोई अपणे भाऊये नैं बैर रखदा ऐ, सैह खूनी ऐ; कने तुहां जाणदे हन कि कुसी भी खुनिये च सदा दी जिन्दगी नी रहेंदी । 16 अहां नैं प्यार इस ते जाणेया कि तिन्हीं अहां ताई अपणी जात्र दैई दित्ती; कने अहां जो भी भाऊआं ताई जात्र दैगां चाइदी । 17 अपर जिस कुसी अल्ल संसारे दी धन दौलत होयें कने सैह अपणे भाऊये जो कंगाल दिखीं नैं तिस पर तरस खाणां नी चां, तां तिस च परमात्मं दा प्यार कियां बणेया रहें सकदा ऐ । 18 हे जागतो, अहां वचने ते कने जीभा ते ई नी, अपर कम्म कने सचाईया दिया बजाह ते भी प्यार करन ।

परमात्मं सामणे हिम्मत

19 इसी ते अहां जाणगे कि अहां सचाईया दे हन; कने जिसा गलां च अहां दा मन अहां जो दोष दिंगा तिस दे बारे च अहां तिसदे सामने अपणे अपणे मने जो हौंसला दैई सकगे; 20 कजोकि परमात्मां अहां दे मने ते बडा ऐ, कने सब किच्छ जाणदा ऐ । 21 हे प्यारे भाऊओ, जे अहां दा मन अहां जो दोष ना दें, तां अहां जो परमात्मं सामणे हिम्मत होंदी ऐ; 22 कने जेहड़ा किच्छ अहां मंगदे हन, सैह अहां जो तिसते मिलदा ऐ, कजोकि अहां तिसदेयां हुक्मां जो मनदे हन कने जेहड़ा तिसियो भांदा ऐ सैई करदे हन । 23 तिसदा हुक्म एह ऐ कि अहां तिसदे पुत्र यीशु मसीह दे नांये पर वसुआस करन, कने जिआं तिन्हीं अहां जो हुक्म दित्या ऐ तिस दे मताबक अप्पु च प्यार रखन । 24 कने जेहड़ा तिसदे हुक्मां जो मनदा ऐ, सैह तिस च कने सैह तिन्हां च बणी रहेंदा ऐ, कने इसी ते मतलब तिसा आत्मां ते जेहड़ी तिन्हीं अहां जो दित्तियो ऐ, अहां जाणदे हन कि सैह अहां च बणी रहेंदा ऐ ।

आत्मां जो परखा

4 हे प्यारे भाऊओ, हर इक्क आत्मां दा वसुआस मत करा, अपर आत्मां जो परखा कि सैह परमात्मं दे पास्से ते ऐ कि नी; कजोकि मते झूठे भविष्यवक्ता संसारे च निकळी खडूतेयो हन । 2 परमात्मं दी आत्मां जो तुहां इस तरीके नैं पणछेणी सकदे हन; जेहड़ी आत्मां मनी लेंदी ऐ कि यीशु मसीह शरीरे च होई नैं आया ऐ सैह परमात्मं दे पास्से ते ऐ, 3 कने जेहड़ी आत्मां यीशु जो नी मनदी, सैह परमात्मं दे पास्से ते नी; कने सैई तां मसीह दे विरोधिये दी आत्मां ऐ, जिसदी चर्चा तुहां सुणी चुकेयो कि सैह ओणे आळा ऐ; कने हुण भी संसारे च ऐ । 4 हे जागतो, तुहां परमात्मं दे हन, कने तुहां तिन्हां पर जय पाई ऐ; कजोकि जेहड़ा तुहां च ऐ सैह तिसते जेहड़ा संसारे च ऐ, बडा ऐ । 5 सैह संसारे दे हन, इसा बजाह ते सैह संसार दी गलां ग्लां दे हन, कने संसार तिन्हां दी सुणदा ऐ । 6 अहां परमात्मं दे हन । जेहड़ा परमात्मं जो जाणदा ऐ, सैह म्हारी सुणदा ऐ; जेहड़ा परमात्मं जो नी जाणदा सैह म्हारी नी सुणदा । इस तरां ह अहा सच दी आत्मां कने भ्रम दी आत्मां जो पणछेणी लेंदे हन ।

परमात्मां प्यार ऐ

7 हे मेरे प्यारे भाऊओ, अहां अप्पु च प्यार रखन; कजोकि प्यार परमात्मं ते ऐ । जेहड़ा कोई प्यार करदा ऐ, सैह परमात्मं ते जम्मेया ऐ कने परमात्मं जो जाणदा ऐ । 8 जेहड़ा प्यार नी रखदा सैह परमात्मं जो नी जाणदा, कजोकि परमात्मां प्यार ऐ । 9 जेहड़ा प्यार परमात्मं अहां नैं रखदा ऐ, सैह इस ते प्रकट होया कि परमात्मं अपणे इकलौते पुत्रे जो संसार च घल्लया ऐ कि अहां तिसदिया बजाह ते जिन्दगी पान । 10 प्यार इस च नी कि अहां परमात्मं नैं प्यार कित्ता, अपर इसच ऐ कि तिन्हीं अहां नैं प्यार कित्ता कने अहां दे पापां दे मटाणे ताई अपणे पुत्रे जो घल्लया । 11 हे मेरे प्यारे भाऊओ, जाहू परमात्मं अहां नैं देहया प्यार कित्ता, तां अहां जो भी अप्पु च प्यार रखणां चाइदा । 12 परमात्मं जो कदी कुणी नी दिख्या; जे अहां अप्पु च प्यार रखन, तां परमात्मां अहां च बणी रहेंदा ऐ कने तिसदा प्यार अहां च सिद्ध होई गैआ ऐ ।

13 इसी ते अहां जाणदे हन कि अहां तिस च बणी रहेंदे हन, कने सैह अहां च; कजोकि तिन्हीं अपणी आत्मां च अहां जो दित्या ऐ । 14 अहां दिखी भी

लैआ कने गवाही दिंदे हन कि पितें पुत्रे जो संसारे दा उद्धारकर्ता करी नैं घल्लया ऐ । 15 जेहड़ा कोई एह मनी लैदा ऐ कि यीशु परमात्में दा पुत्र ऐ, परमात्मां तिस बणी रँहदा ऐ, कने सैह परमात्में च । 16 जेहड़ा प्यार परमात्मां अहां नैं रखदा ऐ, तिस जो अहां जाणी गै कने अहां जो तिसदा वसुआस ऐ । परमात्मां प्यार ऐ, कने जेहड़ा प्यार च बणी रँहदा ऐ, कने परमात्मां तिस च बणेयां रँहदा ऐ । 17 इसी ते प्यार अहां च सिद्ध होया कि अहां जो न्याय दे दिन हिम्मत होयें; कजोकि जिआं सैह ऐ तिआं ई संसारे च अहां भी हन । 18 प्यारे च डर नी होंदा, अपर सिद्ध प्यार डरे जो दूर करी दिंदा ऐ; कजोकि डर दा रिश्ता सज्जा नैं हुंदा ऐ, कने जेहड़ा डरदा ऐ सैह प्यारे च सिद्ध नी होया । 19 अहां इसताई प्यार करदे हन, कि पैहले तिन्हीं अहां नैं प्यार कित्ता । 20 जे कोई ग्लां, मैं परमात्में नैं प्यार रखदा ऐ," कने अपणे भाऊये ते जिसियो तिन्हीं दिख्या ऐ प्यार नी रखदा, तां सैह परमात्में नैं भी जिसियो तिन्हीं नी दिख्या प्यार नी रखी सकदा । 21 कने परमात्में ते अहां जो एह हुक्म मिलेया ऐ, कि जेहड़ा कोई परमात्में नैं प्यार रखदा ऐ सैह अपणे भाऊये नैं भी प्यार रखें ।

संसारे पर जय पाणां

5 जिसदा एह वसुआस ऐ कि यीशु ई मसीह ऐ, सैह परमात्में ते पैदा होया ऐ; कने जेहड़ा कोई पैदा करणे आळे नैं प्यार रखदा ऐ, सैह तिस नैं भी प्यार रखदा ऐ जेहड़ा तिसते पैदा होया । 2 जाहू अहां परमात्में नैं प्यार रखदे हन कने तिसदे हुक्मां जो मनदे हन, तां इसी ते अहां जाणदे हन कि अहां परमात्में दियां आलादां नैं प्यार रखदे हन । 3 कजोकि परमात्में नैं प्यार रखणां एह ऐ कि अहां तिसदे हुक्मां जो मनन; कने तिसदे हुक्म ओखे नी । 4 कजोकि जेहड़ा कुच्छ परमात्में ते पैदा होया ऐ, सैह संसार पर जय हासल करदा ऐ; कने सैह जीत जिसा नैं संसारे पर जय हासल होंदी ऐ अहां दा वसुआस ऐ । 5 संसारे पर जय पाणे आळा कुण ऐ, सिर्फ सैह जिसदा एह वसुआस ऐ कि यीशु परमात्में दा पुत्र ऐ ।

यीशु मसीह दे बारे च गवाही

6 ऐही ऐ सैह जेहड़ा पाणिये कने खूने दिया बजाह ते आया था, अपर यीशु मसीह: सैह ना सिर्फ पाणिये दिया बजाह ते अपर पाणी कने खून दूनी दिया बजाह ते आया था । 7 कने जेहड़ी गवाही दिंदा ऐ, सैह आत्मां ऐ; कजोकि

आत्मां सच ऐ । 8 गवाही दैणे आळे त्रे हन, आत्मां, कने पाणी, कने खून; कने त्रेयो इक्की गलां पर राज्जी हन । 9 जाहू अहां माणुओं दी गवाही मनी लैदे हन, तां परमात्में दी गवाही तां तिसते बधीं नैं ऐ; कने परमात्में दी गवाही एह ऐ कि तिन्हीं अपणे पुत्र दे बारे च गवाही दिंती ऐ । 10 जेहड़ा परमात्में दे पुत्रे पर वसुआस करदा ऐ सैह अपणे ई च गवाही रखदा ऐ । जिन्हीं परमात्में पर वसुआस नी कित्ता तिन्हीं तिसियो झूठा ठेहराया, कजोकि तिन्हीं तिसा गवाही पर वसुआस नी कित्ता जेहड़ा परमात्में अपणे पुत्रे दे बारे च गवाही दिंती ऐ । 11 कने सैह गवाही एह ऐ कि परमात्में अहां जो सदा दी जिन्दगी दिंती ऐ, कने एह जिन्दगी तिसदे पुत्रे च ऐ । 12 जिस अल्ल पुत्र ऐ, तिस अल्ल जिन्दगी ऐ; कने जिस अल्ल परमात्में दा पुत्र नी, तिस अल्ल जिन्दगी भी नी ऐ ।

सदा दी जिन्दगी

13 मैं तुहां जो जेहड़ा परमात्में दे पुत्रे दे नांये पर वसुआस करदे हन, इसताई लिख्या ऐ कि तुहां जाणन कि सदा दी जिन्दगी तुहां दी ऐ । 14 कने अहां जो परमात्में सामणे जेहड़ा हिम्मत होंदी ऐ, सैह एह ऐ; कि अपर अहां तिसदिया इच्छा मताबक कुच्छ मंगदे हन, तां सैह म्हारी सुणदा ऐ । 15 जाहू अहां जाणदे हन कि जेहड़ा कुच्छ अहां मंगदे हन सैह म्हारी सुणदा ऐ, तां एह भी जाणदे हन कि जेहड़ा कुच्छ अहां तिसते मंगया, सैह पाया ऐ ।

16 जे कोई अपणे भाऊये जो इआं पाप करदे दिखे जिसदा फळ मौत ना होयें, तां विणती करें, कने परमात्में तिसियो तिन्हां तांई, जिन्हां इआं पाप कित्ता ऐ जिसदा फळ मौत ना होयें, जिन्दगी दिंगा । पाप देहया भी हुंदा ऐ जिसदा फळ मौत ऐ; इसदे बारे च मैं विणती करणे तांई नी ग्लांदा । 17 सब तरांह दा अधर्म तां पाप ऐ, अपर एदेया पाप्य भी ऐ जिसदा फळ मौत नी ।

18 अहां जाणदे हन, कि जेहड़ा कोई परमात्में ते पैदा होया ऐ, सैह पाप नी करदा; अपर जेहड़ा परमात्में ते पैदा होया, तिसियो सैह बचाई रखदा ऐ, कने सैह दुष्ट तिसियो छूई नी पांदा । 19 अहां जाणदे हन कि अहां परमात्में ते हन, कने सारा संसार तिस दुष्टे दे वशे च पैआ ऐ । 20 अहां एह भी जाणदे हन कि परमात्में दा पुत्र आई गैआ ऐ कने तिन्हीं अहां जो समझ दिंतियो ऐ कि अहां तिस सच्चे जो पणछैणन; कने अहां तिस च जेहड़ा सच ऐ, मतलब तिसदे पुत्र यीशु मसीह च रँहदे हन । सच्चा परमात्मां कने सदा दी जिन्दगी ऐही ऐ । 21 हे मेरे जागतो, अपणे आप्पे जो मूरतां ते बचाई रखा ।

2 यूहन्ना

भूमिका

यूहन्ना दी दूई पत्री "प्राचीन" दे पस्से ते चुणियों जणांस कने तिसा दे बच्चेयां" दे नां लिखी गियो थी, सम्भवतः जिसदा मतलब ऐ इक्क लोकल कलेसिया कने तिसा दे सदस्य | विस्तार च इसदा संदेश ऐ. इक्की दूये नैं प्यार रखणे दा आग्रह कने झूठे शिक्षकां कने तिन्हां दी शिक्षां दे वरखलाफ चतौनी |

रूप रेखा

भूमिका 1-3

प्यारे दी प्रमुखता 4-6

झूठे धर्मसिद्धान्तां दे वरखलाफ चतौनी 7-11

उपसंहार 12,13

नमस्कार

1 मेरिया तरफा ते जेहड़ा वसुआसे च प्राचीने परमात्मैं दिया बजाह ते चुणियो श्रीमती कने तिसा दे बच्चेयां दे नां जिन्हां नैं मैं सच्चा प्यार रखदा ऐ, कने सिर्फ मैं ई नी सैह सारे भी प्यार रखदे हन जेहड़े सचाईया जो जाणदे हन : 2 सैह सच जेहड़ा अहां च पक्का रँहदा ऐ, कने सदा तांई अहां सौगी अटल रँहगा; 3 परमात्मां पिता, कने पिता दे पुत्र यीशु मसीह दे पास्से ते अनुग्रह कने दया कने शांति, सच कने प्यार सहित अहां सौगी रँहगे ।

सच कने प्यार

4 मैं बड़ा खुश होया कि मैं तेरे कुच्छना बच्चेयां जो तिस हुक्मे मताबक, जेहड़ा हां जो पिता दी पास्से ते मिलेया था, सचाईया पर चलदे होये पां । 5 हुण हे श्रीमती, मैं तिजो कोई नौआं हुक्म नी, अपर सैई जेहड़ा शुरु ते अहां अल्ल ऐ, लिखदा ऐ; कने तिजो नैं विणती करदा ऐ कि अहां इक्की दूये नैं प्यार रखन । 6 कने प्यार एह ऐ कि अहां तिसदे हुक्मां मताबक चलन; एह सैई हुक्म ऐ जेहड़ा तुहां शुरु ते सुणेया ऐ, कने तुहां जो इस पर चलणां चाइदा ।

7 कजोकि मतेआं इआं भरमाणे आळे संसारे च निकळी आये, जेहड़े एह नी मनदे कि यीशु मसीह शरीरे च होई नैं आया; भरमाणे आळा कने मसीह विरोधी ऐही हन । 8 अपणे बारे च चुकनै रँहआ, कि जेहड़ी मेहनत अहां किती ऐ तिसा जो तुहां गुआई मत दैआ, अपर तिसदा पूरा फळ पा । 9 जेहड़ा कोई मसीह दी शिक्षा नैं गांह बधी जांदा ऐ कने तिसा च बणी नी रँहदा, तिस अल्ल परमात्मां नी; जेहड़ा कोई तिसदिया शिक्षा च स्थिर रँहदा ऐ, तिस अल्ल पिता भी ऐ कने पुत्र भी ऐ । 10 जे कोई तुहां अल्ल ओयें कने ऐही शिक्षा ना दैं, ना तां तिसियो घरे च ओणा दैआ कने ना नमस्कार करा । 11 कजोकि जेहड़ा कोई एदेय माणु जो नमस्कार करदा ऐ, सैह तिसदे बुरे कम्मां च साझी हुंदा ऐ ।

आखरी नमस्कार

12 मिन्जो मतिआं गल्लां तुहां जो लिखणियां हन, अपर कागज कने स्याईया नैं लिखणांनी चाहंदा, अपर आशा ऐ कि मैं तुहां अल्ल ओंगा कने आमणे सामणे गल्लबात करगा, जिसते तुहां दी खुशी पूरी होयें । 13 परमात्मैं दी चुणेयो तेरी बेहणी दे बच्चे तिजो नमस्कार ग्लांदे हन ।

3 यूहन्ना

भूमिका

यूहन्ना दी त्री पत्री "प्राचीन" दे पाससे ते कलेसिया दे इक्क अगुवे, गयुस, जो लिखियो थी | लेखक गयुसे दी इसताई तारीफ करदा ऐ कजोकि तिन्ही होरनी मसीहियां दी बड़ी मदद करदा ऐ, कने सौगी ई दियुत्रिफेस नाये दा इक्की माणुये ते चुकने रहणे दी चतोनी भी दिंदा ऐ |

रूप रेखा

भूमिका 1-4

गयुसे दी तारीफ 5-8

दियुत्रिफेस दी भर्त्सना 9,10

दियुत्रिफेस दी सराहना 11,12

उपसंहार 13,15

नमस्कार

1 मिन्जो प्राचीने दे पाससे ते प्यारे गयुस दे नां, जिस नैं मैं सच्चा प्यार रखदा ऐ । 2 हे भाऊओ, मेरी एह प्रार्थना ऐ कि जिआं तू आत्मिक उन्नति करदा ऐ, तिआं ई तू सारियां गल्लां च उन्नति करे कने भला चंगा रहूँ । 3 कजोकि जाहलू भाऊआं आई नैं तेरे तिस सच दी गवाही दित्ती, जिसा पर तू सचमुच चलदा ऐ, तां मैं बड़ा ई खुश होया । 4 मिन्जो इसते बधी नैं होर कोई खुशी नी कि मैं सुणें, कि मेरे बच्चे सच्चाई पर चलदे हन ।

गयुसे दी तारीफ

5 हे प्यारे, जेहड़ा कुच्छ तू तिन्हां भाऊआं सौगी करदा ऐ, जेहड़े परदेशी हन, तिसियो वसुआसिये दे रूपे च करदा ऐ । 6 तिन्हां कलेसिया दे सामणे तेरे प्यार दी गवाही दित्ती ऐ । जे तू तिन्हां जो इस तरांह विदा करगा जिस तरांह परमात्में दे लोकां ताई ठीक ऐ तां खरा करगा । 7 कजोकि सैह तिस नांये ताई निकळ्यो हन, कने गैर - यहूदियां ते कुच्छ नी लेंदे । 8 इसताई देहयां दा सुआगत करणां चाइदा, जिसते अहां भी सच दे पक्ष च तिन्हां दे सेहकर्मी हन ।

दियुत्रिफेस कने दिमेत्रियुस

9 मैं कलेसिया जो कुच्छ लिख्या था, अपर दियुत्रिफेस जेहड़ा तिन्हां च बड़ा बणना चाहंदा ऐ, अहां जो ग्रहण नी करदा । 10 इसताई जाहलू मैं ओंगा तां तिस दे कम्मा दी जेहड़ा सैह करा दा ऐ, याद दिलांगा, कि सैह अहां दे बारे च बुरी बुरी गल्लां बकदा ऐ; कने इस पर भी संतोष नी करी नैं अप्पु ई भाऊआं जो ग्रहण नी करदा, कने तिन्हां जो जेहड़ा ग्रहण करणां चाहदे हन मना करदा ऐ कने कलेसिया ते कड्डी दिंदा ऐ । 11 हे प्यारे, बुराईया दे नी अपर भलाईया दे अनुयायी हन । जेहड़े भलाई करदे हन, सैह परमात्में दे पाससे ते हन; अपर जेहड़ा बुराई करदा ऐ, तिन्हीं परमात्में जो नी दिख्या । 12 दिमेत्रियुस दे बारे च सबना नैं, अपर सत्य नैं भी अप्पु ई गवाही दित्ती; कने अहां भी गवाही दिंदे हन, कने तू जाणदा ऐ कि म्हारी गवाही सच्ची ऐ ।

आखरी नमस्कार

13 मिन्जो तिजो बड़ा कुच्छ लिखणा तां था, अपर स्याई कने कलमा नैं लिखणा नी चाहंदा । 14 अपर मिन्जो आशा ऐ कि तिजो नैं तौळी मिलगा, ताहू अहां आमण सामणे गल्लबात करगे । 15 तिजो शांति मिलदी रहूँ । ऐत्थू दे साथी तिजो नमस्कार ग्लांदे हन । औत्थू दे साथियां दे नां लैई लैई नैं नमस्कार ग्लाई दैणां ।

यहूदा

भूमिका

यहूदा की पत्नी झूठे शिक्षकों के वरखलाफ चतौनी दैणे ताई लिखियो थी, कजोकि सैह वसुआसी होणे दा दावा करदे थे | इसा छोटिया चिट्ठिया दे विषय वस्तु पतरस की दूई चिट्ठिया साइयां ऐ, इसा च लेखक अपने पाठकों जो उत्साहित करदा ऐ कि "तिस वसुआसे ताई पूरा यत्न करा जेहड़ा पवित्र लोकां जो इक्को ई बरी दित्या था |

रूप रेखा

भूमिका 1,2

झूठे शिक्षकों का चरित्र, शिक्षा, कने अन्त 3-16

वसुआसे च बणी रहणे की चतौनी 17-23

आशीर्वचन 24,25

नमस्कार

1 मैं यहूदा जेहड़ा यीशु मसीह का दास कने याकूबे का भाऊ ऐ, तिन्हां सदेयां माणु दे नां जेहड़े परमात्मां पिता च प्यारे कने यीशु मसीह ताई बचेयो हन । 2 दया कने शांति कने प्यार तुहां च सदा सदा तिकर हासल हुंदा रहूं ।

झूठे शिक्षक

3 हे मेरे भाऊओ, जाहू मैं तुहां यीशु मसीह के उद्धार के बारे च मैं दिन रात इक्क करी नैं बड़ी मेहनता नैं लिखा करदा था जिस च अहां सारे बराबर हन, तां मैं तुहां जो एह समझाणां जरूरी समझेया कि तिस वसुआसे जो पाणे ताई पूरा जोर लगा जेहड़ा पवित्र लोकां ताई इक्क बरी सौपी दित्या था । 4 कजोकि कुच्छ इतणे माणु अहां च डोल करी नैं घुसड़ेयो हन, जिन्हां की सजा के बारे च पराणे जमाने ते ई पवित्र शास्त्रे च लिख्या था; इन्हां च कोई भक्तिभाव नी, कने अहां के परमात्म के अनुग्रह जो लुचपण च बदली दिंदे हन, कने अहां के प्रभु यीशु मसीह का जिसका कुसी नैं मेल नी होई सकदा, इन्कार करदे हन । 5 अपर तुहां सारियां गलां इक्क बरी जाणी चुकेयो हन, भिरी भी मैं तुहां जो इसा गलां की याद दिलाणा चाहंदा ऐ कि प्रभुयें इक्क कुल्ले जो मिस्र देस ते छडाणे के बाव वसुआस नी करणे आळ्यां दा नाश करी दित्ता । 6 भिरी जिन्हां सुअर्गदूतां अपने औधे जो पक्का नी बणाई रखेया अपर अपने खास जगाह जो छड्डी दित्ता, यीशुयें तिन्हां जो भी तिस भीषण दिने के न्याय ताई नैहरे च जेहड़ा सदा काल तिकर रहणे आळा ऐ, बन्धनां च रखेया ऐ । 7 जिआं कि सदोमे कने अमोरा कने तिन्हां के अकखे बकखे के सैहर, जेहड़े इन्हां साइआं व्यभिचारी होई गैयो थे सैह अपने जीवण साथिये जो छड्डी होरनी पचां चली पैयो थे, अग्नी की सदा की सजा च पैई करी उदारण ठेहरे हन ।

8 इन्हीं साहभें ई बुरे सुपने दिखणे आळे अपने अपने शरीरे जो अशुद्ध करदे हन, कने प्रभुता जो तुच्छ जाणदे हन, कने उच्च औधे आळ्यां जो भी बुरा भला ग्लां दे हन । 9 अपर प्रधान सुअर्गदूत मीकाईलें जाहू सैताने नैं मूसा की लाशा के बारे च बैहस बाजी किन्ती, तां तिसियो बुरा भला ग्लाई करी दोष लगाणे की हिम्मत नी किन्ती अपर एह ग्लाय्या, प्रभु तिजो झिडकें । 10 अपर एह लोक जिन्हां गलां जो नी जाणदे तिन्हां जो बुरा भला ग्लां दे हन, कने जिन्हां गलां जो बे जुवान डंगरा साइआं सभावे ते ई जाणदे हन, तिन्हां च अपने आप्पे जो नाश करदे हन । 11 तिन्हां पर हाय! कजोकि सैह आदमे के पुत्तर कैने साइआं चाल चले, कने मजदूरिया ताई बिलाम राजे साइआं भ्रष्ट होई गै हन कने कोरहे साइआं विरोध करी नैं नाश होये हन । 12 एह माणु तुहां

सौगी तुहां के तौआरे च तुहां सौगी खांदे पींदें हन जिआं कि समुंदरे च कोई अणजाण सपड़ ऐ, कने बगैर कुसी रोका टोका ते निडर होई करी अपनां ई पेट भरणेआळे रखवाळे हन; सैह बगैर पाणी के बदळ हन, जिन्हां हौआ उड़ाई लैई जांदी ऐ; बगैर फळांदे रुख हन, जेहड़े दो बरी मरी चुकेयो हन, कने जड़ा ते पटौई हन; 13 एह समुंदरे के डरौणे उफान हन, जेहड़ा अपनी सर्मा दा झाग बाहरेयो उटकांदे हन, एह डग मग करदे तारे हन, जिन्हां ताई सदा काल तिकर डरौणे आळा नैहरा रखी दित्या ऐ ।

14 हनोके भी जेहड़ा आदमे की सतमी पीढ़ी का था इन्हां के बारे च एह भविष्यवाणी किन्ती, "दिखा, प्रभु अपने लखां पवित्र माणुआं सौगी आया । 15 कि सबदा न्याय करा, कने सब वेवसुआसियां जो तिन्हां के वेवसुआसे के सारे कम्मा के बारे च जेहड़ा तिन्हां वेवसुआसी होई नैं किन्ते हन, कने तिन्हां सारे कठोर गलां के बारे च जेहड़ियां वेवसुआसी पापियां तिसदे विरोध च ग्लाईयां हन, दोषी ठेहरान ।" 16 एह तां भूखे, कुड़कुड़ाणे आळे कने अपणियां इच्छा मताबक चलणे आळे हन, कने अपने मुंमे के कमंडे दियां गलां ग्लांदे हन कने सैह फायदे ताई मुंमे दिखी करी बड़ाई करदे हन ।

चतौनी कने शिक्षा

17 अपर हे भाऊओ, तुहां तिन्हां गलां जो याद रखा जिन्हां जो अहां के प्रभु यीशु मसीह के चले पैहले ई ग्लाई चुकेयो हन । 18 सैह तुहां ग्ला करदे थे, "आखरी दिना च देहया मजाक करणे आळे होंगे जेहड़ा अपनी वेवसुआसी भक्ति दी इच्छा मताबक चलगे । 19 एह सैह हन जेहड़े इक्की दूये च बैर पांदे हन; एह शरीरी लोक हन, जिन्हां च आत्मां नी । 20 अपर हे भाऊओ, तुहां अपने अति पवित्र वसुआस च उन्नति करदे होये कने पवित्र आत्मां च प्रार्थना करदे होये । 21 अपने आप्पे जो परमात्म के प्यारे च बणाई रखा; कने सदा की जिन्दगिया ताई अहां के प्रभु यीशु मसीह की दया का इंतजार करदे रहूआ । 22 तिन्हां पर जेहड़े शंका च हन दया करा; 23 कने मतेआं जो नरके दिया अग्नी के झपटी नैं कड्डी लैआ; कने मतेआं पर डरदे डरदे दया करा, अपर तिस कपड़े ते भी नफरत करा जेहड़ा शरीरे दिया बजाह ते कलकित होईया ऐ ।

आशीष भरे वचन

24 कने हुण जेहड़ा तुहां जो ठोकर खाणे के बचाई सकदा ऐ, कने अपनी महिमा की भरपूरिया के सामने तू कने बेकसूर करी नैं खरेडी सकदा ऐ, 25 तिस अक्कमद परमात्म अहां के उद्धारकर्ता की महिमा कने गौरव कने पराक्रम कने हक्क अहां के प्रभु यीशु मसीह दिया बजाह ते जेहड़ा कि सनातन काल के ऐ, हुण भी होयें कने जुगा जुग रहूं । आमीन ।

प्रकाशित वाक्य

भूमिका

यूहन्ना दा प्रकाशितवाक्य ऐसे बग्त च लिख्या था जाहू मसीहियां जो तिन्हां दे वसुआसे दिया बजाह ते सताया जा दा था, यीशु मसीह पर प्रभु कने मालक दे रूपे च वसुआस करणे दिया बजाह ते । इसदे लेखक दी चिन्ता दा खास बिषय अपणे पाठकां च आशा कने उत्साह दा संचार करणां कने तिन्हां नै एह आग्रह करणां था कि सैह इस दुखे कने सतावे दे बग्त वसुआसे जोगे बणी रहै ।

इसा कताबा दा अधिकांश हिस्सा प्रकाशना कने दर्शना दी श्रृंखलाओं दे रूपे च ऐ, जिसियो सांकेतिक भाषा च पेश किता गैआ ऐ जेहड़ा सम्भवतः तिस बग्त दे मसीहियां जो समझा च आई गियो थी, अपर होरनी सारे माणुआं ताई एह रहस्य रहैआ । जिआं गाणे च इक्क धुन होंदी ऐ, तिआं ई इसा कताबा दे विषय - वस्तु बार - बार हर तरांह दे तरिकेयां ते अलग - अलग दर्शनां श्रृंखलाओं दिया बजाह ते दोहराई जादी ऐ । जे इसा कताबा दी विस्तृत व्याख्या दे रिश्ते च मतभेद ऐ, भिरी भी खास विषय साफ हन : परमात्मै प्रभु यीशु मसीह दे दुआरा अपणे सारे दुश्मणां जो, जिन्हां च सैतान भी ओंदा ऐ, सदा ताई पूर्ण रूप ते पराजित करगा : कने जाहू एह जीत पूर्ण होई जांगी तां सैह अपणे वसुआसे जोगे माणुआं जो नौआं अम्बर कने नौई धरती दी आशीषां ते परिपूर्ण करगा ।

रूप रेखा

भूमिका 1:1-8

शुरूआती दर्शन कने सतां कलेसियां जो चिह्नी 1:9 - 3:22

सतां मोहरां दे दुआरा बंद चर्मपत्र 4:1 - 8:1

सत तुरहियां 8:2 - 11:19

अजगर कने दो डंगर 12:1 - 13:18

होर दर्शन 14:1 - 15: 8

परमात्मै दे प्रकोप दे सत कटोरे 16:1-21

बेबीलोन दा सर्वनाश, कने डंगर, झूठे भविष्यवक्ता, कने सैतान दी हार 17:1 -20: 10

आखरी न्याय 20:11-15

नौआं अम्बर, नौई धरती, कने नौआं यरुशलैम 21:1 --- 22:5

उपसंहार 22:6-21

1 यीशु मसीह दा प्रकाशितवाक्य, जेहड़ा परमात्मै तिसियो इसताई दिता कि अपणे दासां जो दस्सै, जिन्हां गलां दा तौळी होणां जरूरी ऐ, तिसियो दस्सै; कने तिन्हीं अपणे सुअर्गादूते जो घल्ली करी तिसदिया बजाह ते अपणे दासे यूहन्ने जो दस्सया, 2 जिन्हीं परमात्मै दे वचन कने यीशु मसीह दी गवाही, मतलब जेहड़ा कुच्छ तिन्हीं दिख्या था तिसदी गवाही दिती । 3 धन हन सैह जेहड़े इस भविष्यवाणिया दे वचने जो पढ़वे हन, कने सैह सुणदे हन कने इस च लिखियां गलां जो मनदे हन; कजोकि बग्त नैडे ऐ ।

सतां कलेसियां दा नमस्कार

4 यूहन्ना दे पाससे ते आसिया दी सत कलेसियां दे नां : तिसदी ओर ते जेहड़ा ऐ कने जेहड़ा था कने जेहड़ा ओणे आळा ऐ; कने तिन्हां सत आत्मांआं दे पाससे ते तिसदे सिंहासणे दे सामणे हन, 5 कने यीशु मसीह दे पाससे ते जेहड़ा वसुआसे जोगा गवाह कने मरेयां ते जिंदा होणेआळ्यां च पैहिलौठा कने धरती दे राजेयां दा हाकम ऐ, तुहां जो अनुग्रह कने शांति मिलदी रहै । सैह अहां नै प्यार रखदा ऐ, कने तिन्हीं अपणे खूने दिया बजाह ते अहां जो पापां ते छडाया ऐ, 6 कने अहां जो इक्क राज कने अपणे पिता परमात्मै ताई याजक भी बणाई दिता; तिस दी महिमा कने पराक्रम जुगा जुग रहै । आमीन । 7 दिखा, सैह बदळां सौगी ओणेआळा ऐ, कने हर इक्क अंख तिसियो दिखगी, अपर जिन्हां नै तिसियो मारेया था सैह भी तिसियो दिखगे, कने धरती दे सारे कुल तिसदिया बजाह ते हिक्का जिकगे । हाँ । आमीन । 8 प्रभु परमात्मां, जेहड़ा ऐ, कने जेहड़ा था कने जेहड़ा ओणेआळा ऐ, जेहड़ा सर्वशक्तिमान ऐ, एह ग्लांदा ऐ, "मैई अल्लूफा कने ओमेगा ऐ ।

यूहन्ने जो मसीह दे दर्शन

9 मै यूहन्ना, जेहड़ा तुहां दा भाऊ कने यीशु दे क्लेशे कने राज कने धीरजे च तुहां दा सैहभागी ऐ, परमात्मै दे वचन कने यीशु दी गवाही दिया बजाह ते

पतमुस नांये दे टापू च था । 10 मै प्रभु दे दिन आत्मां च था, कने अपणे पचांह तुरही दी एडी बडी उआजा सुणी, 11 "जेहड़ा कुच्छ तू दिखदा ऐ तिसियो कताबा च लिखी करी भविष्यवक्तां कलेसियां अल्ल घल्ली दे, अपर इफिसुस कने स्मुरना, कने पिरगमुन, कने थूआतीरा, कने सरदीस, कने फिलदिलफिया, कने लौदोकिया जो !" 12 ताहू मैई तिसियो, जेहड़ा मिन्जो नै ग्ला दा था, दिखणे ताई अपणां मुँ फेरया; कने पचांह मुडी नै मैई सोने दी सत दीप दान दिखे, 13 कने तिन्हां दीप दानां दे बीच माणु दे पुत्तरे साइआं इक्की मरद जो दिख्या, जेहड़ा पैरां तिकर कपडे पैहने कने छतिया पर सोने दा पटका बन्नी करी खडूतेया था । 14 तिसदा मुँड कने बाल चीट्टी ऊना कने पाळे साइआं छैल थे, कने तिसदी अंखी अग्गी दी लपटा साइआं थियां । 15 तिसदे पैर खरे पीतळे साइआं थे जेहड़ा माणु भट्टीया च सेकया गैआ होयें, कने तिसदे बोल बडे पाणियें साइआं थे । 16 तिन्हीं अपणे सीधे हत्थे च सत तारे लैयो थे, कने तिसदे मुँमें ते पेनी दू धारां आळी तलवार निकळदी थी । तिसदा मुँ इतणा चमकेया था, जिआं सूरज कडी धूपा दे बग्त चमकदा ऐ । 17 जाहू मैई तिसियो दिख्या तां तिसदे पैरां पर मुडदा बणी करी पैई गैया । तिन्हीं मिन्जो पर अपणां सज्जा हत्थ रखी करी ग्लया, "मत डर; मैई पैहला कने आखरी कने जिंदा ऐ; 18 मै मरी गैआ था, कने हुण दिख मै जुगा जुग जिंदा ऐ; कने मौत कने सुअर्गे दी चाबियां मिन्जो अल्ल हन । 19 इसताई जेहिड्यां गलां तै दिखियां हन कने जेहिड्यां गलां होआ दियां हन कने जेहिड्यां गलां इसदे बाच होणेआळियां हन, तिन्हां सारियां जो लिखी लै । 20 मतलब तिन्हां सतां तारेयां दा भेद जेहड़े तै मेरे सीधे हत्थे च दिख्या था, कने तिन्हां सतां सोने दे दीप दानां दा भेद : सैह सत तारे सतां कलेसियां दे दूत हन, कने सैह सत दीप दान कलेसियां हन ।

इफिसुस जो समाचार

2 इफिसुस दी कलेसिया दे दूत जो एह लिख : जेहड़ा सत तारे अपणे सीधे हत्थे च लैयो हन, कने सोने दी सतां दीप दानां दे बीच फिरदा ऐ, सैह एह ग्लांदा ऐ कि 2 मैं तेरे कम्म कने तेरी मेहणत, कने तेरे धीरजे जो जाणदा ऐ; कने एह भी कि तू बुरे लोकां जो दिखी नी सकदा, कने जेहड़े अपणे आप्पे जो चले ग्लांदा हन, कने ऐ नी, तिन्हां जो तैं परखी करी झूठा पाया 3 तू शबर रखदा ऐ, कने तेरे नांये ताई दुख उठांदे उठांदे थकेया नी । 4 अपर मिन्जो तेरे वरखलाफ एह ग्लाणां ऐ कि तैं अपणां पैहले साइआं प्यार छड़ी दिता ऐ । 5 इसताई याद कर कि तू कुत्थू पैआ ऐ, कने मन फिरा कने पैहले साइआं कम्म कर । जे तू मन नी फिरांगा तां मैं तिज्जो अल्ल आई करी तेरी दीवटा जो तिसदी जगाह ते हटाई दिंगा । 6 अपर हाँ, तिज्जो च एह गल्ल तां ऐ कि तू नीकुलइआं दे कम्मां ते नफरत करदा ऐ, जिन्हां ते मैं भी नफरत करदा ऐ । 7 जिन्हां दे कनं होन सैह कनां खोली सुणी लैन कि आत्मां कलेसियां नैं क्या ग्लांदा ऐ । जेहड़े जय पांदे हन, मैं तिस जिन्दगिया दे रूखे च जेहड़ा परमात्मं दे सुअर्गलोके च ऐ, फळ खाणे जो दिंगा ।

स्मुरना जो समाचार

8 "स्मुरना दी कलेसिया दे दूत जो एह लिख: "जेहड़ा पैहला कने आखरी ऐ, सैह एह ग्लांदा ऐ कि 9 मैं तेरे क्लेश कने दरिद्रता जो जाणदा ऐ (अपर तू अमीर ऐ), कने जेहड़े लोक अपणे आप्पे जो यहूदी ग्लांदा हन कने ऐ नी, अपर सैताने दी सभा ऐ, तिन्हां दी निंदा जो भी जाणदा ऐ । 10 जेहड़े दुख तिज्जो झेलणे होंगे, तिन्हां ते मत डर । कजोकि दिखा सैतान तुहां च कुच्छ जो जेलखाणे च पाणे आळा ऐ तांकि तुहां परखे जान; कने तुहां जो दस दिना तिकर क्लेश चुकणा पोणा । प्राण दैणे तिकर वसुआसी रैह, तां मैं तिज्जो जिन्दगिया दा मुकट दिंगा । 11 जिन्हां दे कनं होन सैह कनां खोली सुणी लैन कि आत्मां कलेसियां नैं क्या ग्लांदा ऐ । जेहड़े जय पांदे हन, तिस जो दूई मौता ते नकसान नी पुजगा ।

पिरगमुन जो समाचार

12 "पिरगमुन दी कलेसिया दे दूत जो एह लिख: "जिस अल्ल दोधारी तलवार ऐ, सैह एह ग्लांदा ऐ कि 13 मैं एह जाणदा ऐ कि तू औत्थू रैहदा ऐ जित्थू सैताने दा सिंहासण ऐ; तू मेरे नांये पर पक्का रैहदा ऐ, कने मिन्जो पर वसुआस करणे ते तिन्हां दिनां च भी पचाह नी हटेया जिन्हां च मेरा वसुआसे जोग्गा गवाह अन्तिपास, तुहां दे बीच तिसा जगाह पर मारेया था जित्थू सैतान रैहदा ऐ । 14 अपर मिन्जो तेरे वरखलाफ कुच्छ गल्लां ग्लाणियां हन, कजोकि तिज्जो अल्ल कुच्छ ऐदेय हन, जेहड़े बिलाम दी शिक्षा जो मनदे हन, जिन्हीं बालाक जो इस्राएलियां दे अग्गे ठोकरा दी बजाह रखणां सखाया कि सैह मूर्तियां पर चढाई गैई चीज खान कने व्यभिचार करन । 15 तिआं ई तिज्जो अल्ल कुच्छ ऐदेय हन, जेहड़े नीकुलइआं दी शिक्षा जो मनदे हन । 16 मन फिरा, नी तां मैं तिज्जो अल्ल तौळी ई आई करी अपणे मुंमं दी तलवारा नैं तिन्हां सौगी लडगा । 17 जिन्हां दे कनं होन सैह कनां खोली सुणी लैन कि आत्मां कलेसियां नैं क्या ग्लांदा ऐ । जेहड़े जय पांदे हन, तिन्हां जो मैं गुप्त मने ते दिंगा, कने तिसियो इक्क चिट्टा पत्थर भी दिंगा; कने तिस पत्थरे पर इक्क नां लिख्या हुंगा, जिसियो तिसदे लैणेआळे दे बगैर होर कोई नी जाणगा ।

थुआतीरा जो समाचार

18 थुआतीरा दी कलेसिया दे दूत जो एह लिख : "परमात्मं दा पुतर जिसदी अंखी अग्गी दी लपटा साइआं, कने जिसदे पैर खरे पीतले साइआं हन, सैह एह ग्लांदा ऐ कि 19 मैं तेरे कम्मां, तेरे प्यार कने वसुआस कने सेवा कने शबरे जो जाणदा ऐ कने एह भी कि तेरे पिछले कम्म पैहलां ते बधी करी हन । 20 अपर मिन्जो तेरे वरखलाफ एह ग्लाणां ऐ कि तू तिसा जणांसा इजेबेले जो रैहणा दिंदा ऐ जेहड़ी अपणे आप्पे जो भविष्यवक्ता ग्लांदा ऐ, कने मेरे दासां जो व्यभिचार करणे ते मूर्तियां दे अग्गे चढाई गैई चीज खाणां सखादी ऐ । 21 मैंई तिस जो मन फिराणे ताई मौका दिता, अपर सैह अपणे व्यभिचारे ते अपणां मन फिराणा नी चाहंदी । 22 दिख, मैं तिसायो रोगे नैं पीडित करणां; कने जेहड़े तिस सौगी व्यभिचार करदे हन जे सैह भी तिसा दे

कम्मां ते मन नी फिराणे तां तिन्हां जो बडे क्लेश च पांगा । 23 मैं तिसदे बचेयां जो मारी दिंगा; ताहू सारी कलेसियां जाणी लैगियां कि दिले जो कने मने जो परखणेआळा मैंई ऐ, कने मैं तुहां च हर इक्की जो तिसदे कम्मां मताबक बदला दिंगा ।" 24 अपर तुहां थुआतीरा दे बाकी लोकां ते, जितणे इसा शिक्षा जो नी मनदे कने तिन्हां गल्लां ग्लांदा हन, नी जाणदे, मैं एह ग्लांदा ऐ कि मैं तुहां पर होर भार नी पांगा । 25 अपर हाँ, जेहड़ा तुहां अल्ल ऐ तिसजो मेरे ओणे तिकर पकड़ी रखा । 26 जेहड़ा जय पांदा ऐ कने मेरे कम्मां दे तरीके आखरी तिकर करदा रैह, मैं तिसियो जाति जाति दे लोकां पर हक्क दिंगा, 27 कने सैह लोहे दा राजदंड लैई करी तिन्हां पर राज करगा, जिस तरांह कुमाहर दे चिक्का दे भांडे चकनाचूर होई जांदे हन : जिआं कि मैं भी ऐदेया ई हक्क अपणे पिता ते पाया ऐ; 28 कने मैं तिसियो भ्यागा दा तारा दिंगा । 29 जिसदे कनं होन, सैह सुणी लैन कि आत्मां कलेसियां नैं क्या ग्लांदा ऐ ।

सरदीस जो समाचार

3 सरदीसे दी कलेसिया दे दूत जो एह लिख : "जिस अल्ल परमात्मं दी सत आत्मांयें कने सत तारे हन, सैह एह ग्लांदा ऐ कि मैं तेरे कम्मां जो जाणदा ऐ : तू जिंदा तां ऐ, अपर ऐ मरेया होया । 2 जागदे रैहआ, कने तिन्हां चीज्जां जो जेहिडियां बाकी रैह्ी गैईयां हन कने जेहड़े मिटणे जो हन, तिन्हां जो मजबूत कर; कजोकि मैं तेरे कुसी भी कम्मे जो अपणे परमात्मं दे नैई पूरा नी पाया । 3 इसताई याद कर कि तैं कदेयी शिक्षा हासल किती कने सुणियो थी, कने तिस च बणी रैह कने मन फिरा । जे तू जागदा नी रैहगा तां मैं चोरे साइआं आई जांगा कने तू कदी भी नी जाणी पांगा कि मैं कुस बत तिज्जो पर आई पांगा । 4 अपर हाँ, सरदीस च तेरे ऐत्थू कुच्छ ऐदेय लोक हन जिन्हां नैं अपणे अपणे कपड़े बुरे नी किन्ते, सैह चीट्टे कपड़े पैहनी करी मिन्जो सौगी घूमगे, कजोकि सैह इस जोगे हन । 5 जेहड़ा जय पांदा ऐ तिसियो इस तरांह चीट्टा कपड़ा पैहनाया जांगा, कने मैं तिसदा नां जिन्दगिया दी कताबा च कुसी भी रीति नैं नी कटगा; अपर तिसदा नां अपणे पिता कने तिसदे सुअर्गदूता दे सामणे मनी लैंगा । 6 जिन्हां दे कनं होन सैह सुणी लैन कि आत्मां कलेसियां नैं क्या ग्लांदा ऐ ।

फिलदिलफिया जो समाचार

7 "फिलदिलफिया दी कलेसिया दे दूत जो एह लिख: "जेहड़ा पवित्र कने सच ऐ, कने जेहड़ा दाउदे दी चाबी रखदा ऐ, जिसदे खोलेयो जो कोई बंद नी करी सकदा कने बंद किन्तेयो जो कोई खोली नी सकदा, सैह एह ग्लांदा ऐ कि 8 मैं तेरे कम्मां जो जाणदा ऐ; दिक्ख, मैं तेरे सामणे इक्क दुरआजा खोली रखेया ऐ, जिसियो कोई बंद नी करी सकदा; तेरी सामर्थ थोड़ी देहई तां ऐ, भिरी बी तैं मेरे वचना दा पालण किता ऐ कने मेरे नांये दा मना नी किता । 9 दिख, मैं सैतान दे तिन्हां सभा आळेयां जो तेरे वशे च करी दिंगा जेहड़े यहूदी बणी बेटेयो हन, अपर ऐ नी अपर झूठ ग्लांदा हन, दिख मैं इआं करगा कि सैह आई करी तेरे पैरां पर पांगे कने एह जाणी लेंगे कि मैं तिज्जो नैं प्यार रखेया ऐ । 10 तैं मेरे धीरजे दे वचने जो थामेया ऐ, इसताई मैं भी तिज्जो परीक्षा दे तिस बत बचाई रखगा जेहड़ा धरती पर रैणे आळेयां जो परखणे ताई सारे संसारे पर ओणेआळा ऐ । 11 मैं तौळी ई ओणेआळा ऐ; जेहड़ा कुच्छ तिज्जो अल्ल ऐ तिसियो पकड़ी रख कि कोई मुकटे जो खोई नी लैं । 12 जेहड़े जय पांदे हन तिसियो मैं अपणे परमात्मं दे मदरे च इक्क खभा बणांगा, कने सैह भिरी कदी बाहर नी निकळगा; कने मैं अपणे परमात्मं दा नांअ कने अपणे परमात्मं दे सैहरे मतलब नौये यरुशलेम दा नां, जेहड़ा मेरे परमात्मं सौगी सुअर्गे ते लौणेआळा ऐ, कने अपणां नौआं नां तिस पर लिखगा । 13 जिन्हां दे कनं होन सैह सुणी लैन कि आत्मां कलेसियां नैं क्या ग्लांदा ऐ ।

लौदिकिया जो समाचार

14 लौदिकिया दी कलेसिया दे दूत जो एह लिख : "जेहड़ा आमीन कने वसुआसे जोग्गा कने सच्चा गवाह ऐ, कने परमात्मं दी सृष्टि दा मूल बजाह ऐ सैह एह ग्लांदा ऐ कि 15 मैं तेरे कम्मां जो जाणदा ऐ कि तू ना तां ठंडा ऐ कने ना तता : खरा हुंदा कि तू ठंडा या तता हुंदा । 16 इसताई कि तू गुणगुणा ऐ, कने ना ठंडा ऐ कने ना तता, मैं तिज्जो अपणे मुंमं ते कडणे आळा ऐ । 17 तू ग्लांदा ऐ कि मैं अमीर ऐ कने अमीर होई गैआ ऐ कने मिन्जो कुसा चिज्जा दी

कमी नी; कने एह नी जाणदा कि तू अभागा कने गंदा कने कंगाल कने अन्ना कने नंगा ऐ । 18 इसताई मैं तिज्जो सम्पति दिंदा ऐ कि अग्गी च तपेया सोना मिन्जो खरीदी करी कि तू अमीर होई जां, कने चीट्टे कपड़े लैई लै कि पैहनी करी तिज्जो अपने नंगेपन दी शर्म नी होयें, कने अपनी अंखी च लगाणे ताई सुर्मा लै कि तू दिखणां लगें । 19 मैं जिन्हां जिन्हां मैं प्यार करदा ऐ, तिन्हां सारे जो घबराहट कने फटकार दिंदा ऐ; इसताई तू तौल कर कने मन फिरा । 20 दिख, मैं दुरआजे पर खडूतेया ठोरदा ऐ; जे कोई मेरी उआज सुणी करी दुरआजे खोलगा, तां मैं तिस अल्ल अंदर आई करी तिस सौगी खाणां करगा खांगा, कने सैह मिन्जो सौगी खांगा । 21 जेहड़ा जय पांदा ऐ मैं तिसियो अपने सौगी अपने सिंहासणे पर बैठांगा, जिआं मैं भी जय पाई करी अपने पिता सौगी तिसदे सिंहासणे पर बेई गैआ । 22 जिन्हां दे कनं होन सैह सुणी लैन कि आत्मां कलेसियां नैं क्या ग्लादा ऐ ।

सुअर्गे च अराधना

4 इन्हां गलां दे बाद जेहड़ी मैं नजर किती तां क्या दिखदा ऐ कि सुअर्गे च इक्क दुरआजा खुलेया ऐ, कने जिसजो मैं ने पैहले तुरही दे शब्द मैं अपने सौगी गलां करदे सुणेया था, सैही ग्लांदा ऐ, "ऐत्यू ऊपरेयो आई जा; कने मैं सैह गलां तिज्जो दुस्सगा, जिन्हां दा इन्हां गलां दे बाद पूरा होणां जरूरी ऐ ।" 2 झट आत्मां च आई गैआ; कने क्या दिखदा ऐ कि इक्की सिंहासण सुअर्गे च रखया ऐ, कने तिस सिंहासण पर कोई बैठया ऐ । 3 जेहड़ा तिस पर बैठया ऐ सैह यशब कने माणिक्य साइआं दुस्सदा ऐ, कने तिस सिंहासणे दे चौनी पास्सें मरकते साइआं इक्क मेघधनुष दुस्सदा ऐ । 4 तिस सिंहासणे दे चौनी पास्सें चौबी सिंहासण हन; कने इन्हां सिंहासणा पर चौबी पराणे चीट्टे कपड़े पैहनी नैं बैठेयो हन, कने तिन्हां दे मुंडा पर सोने दे मुकट हन । 5 तिस सिंहासणे च बिजलियां कने गर्जन निकलदी ऐ कने सिंहासणे सामणे अग्गी दे सत दिव्ये बळदे हन, सैह परमात्में दी सत आत्मां हन, 6 कने तिस सिंहासणे सामणे मना बिलौर साइआं शीशे दा समंदर ऐ । सिंहासणे दे बीच कने सिंहासण दे चौनी पास्सें चार प्राणी हन, जिन्हां दे अगां भी पचांह अंखी ई अंखी हन । 7 पैहला माणु शरे साइआं ऐ, कने दूआ प्राणी गाई दे बच्चे साइआं ऐ, त्रीआ प्राणीये दा मुँ माणुये साइआं ऐ, कने चौथा प्राणी उडदे उकाबे साइआं ऐ । 8 चौनी प्राणियां दे छैं छैं पंख हन, कने चौनी पास्सें कने अंदर अंखी ई अंखी हन; कने सैह रात दिन बगैर आराम किन्तेयो एह ग्लांदे रँहदे हन, "पवित्र, पवित्र, पवित्र प्रभु परमात्में, सर्वशक्तिमान, जेहड़ा था कने जेहड़ा ऐ कने जेहड़ा ओणेआळा ऐ ।" 9 जाहू सैह प्राणी तिसदी जेहड़ा सिंहासणे पर बैठया ऐ, कने जेहड़ा जुगा जुग जिंदा ऐ, महिमा कने आदर कने धन्यवाद करगे; 10 ताहू चौबीसां पराणे सिंहासणे पर बैठणेआळे सामणे टिरी पोणां, कने तिसि जो जेहड़े जुगा जुग तिकर जिंदा ऐ प्रणांम करगे; कने सैह अपने अपने मुकट सिंहासणे सामणे एह ग्लांदे होये रखी दिगे, 11 कि अहां दे प्रभु कने परमात्मां, तू ई महिमा कने आदर कने सामर्थी जोग्या ऐ, कजोकि तैं ई सब चीजां बणाईयां कने सैह तेरिया इच्छा ते थी कने बणाईयां हन ।

मोहरबन्द कताब कने मेम्ना

5 जेहड़ा सिंहासणे पर बैठया था, मैं तिसदे खब्बे हत्थे च इक्क कताब दिखी जेहड़ी अंदरे ते कने बाहरे ते लिखियो थी, कने सैह सत मोहरां लगाई करी बंद कितियो थी । 2 भिरी मैं इक्क ताकतवर सुअर्गदूते जो दिख्या जेहड़ा ऊचिया उआजा च एह प्रचार करदा था, "इसा कताबा जो खोलणे कने तिसदियां मोहरां तोड़णे जोग्या कुण ऐ?" 3 अपर ना सुअर्गे च, ना धरतिया पर, ना धरतिया दे थलें कोई तिसा कताबा जो खोलणे या तिसा पर नजर पाणे जोग्या निकळेया । 4 ताहू मैं जोरे जोरे नैं रोणा लग्गा, कजोकि तिसा कताबा जो खोलणे या तिसा पर नजर पाणे जोग्या कोई नी मिलेया । 5 इसा गलां पर तिन्हां स्याणेयां च इक्की मिन्जो नैं ग्लायया, "मत रो; दिख, यहूदा दे गोत्रे दा सैह शेर जेहड़ा दाऊदे दा मूल ऐ, तिसा कताबा जो खोलणे कने तिसदियां सतां मोहरां जो तोड़णे ताई जयवंत होया ऐ ।" 6 ताहू मैं तिस सिंहासणे कने चौनी माणुआं कने तिन्हां स्याणेयां दे बीच, मना इक्क

मारेया इक्क मेम्ना खडूतेया दिख्या । तिसदे सत सींग कने सत अंखी थी; एह परमात्में दी सत आत्मां हन जेहड़ियां सारिया धरतिया पर घल्ली दित्तियां हन । 7 तिन्हीं आई करी तिसदे खब्बे हत्थे जेहड़ा सिंहासणे पर बैठया था, सैह कताब लैई लेई । 8 जाहू तिन्हीं कताब लैई लेई, तां सैह चारो माणु कने चौबी स्याणे तिस मेम्ने सामणे पैई गै । तिन्हां च हर इक्की दे हत्थे च बाजे कने धूप, जेहड़े पवित्र लोकां दी प्रार्थना हन कने भरीयो सोने दे कटोरे थे । 9 सैह एह नौआं गीत गाणां लग्गे, "तू इसा कताब जो लैणे, कने इसदी मोहरां खोलणे जोग्या ऐ, कजोकि तैंई बध होई करी अपने खूने नैं हर इक्क कुल कने भासा कने लोक कने जाति च परमात्में ताई लोकां जो खरीदी लैआ ऐ; 10 कने तिन्हां जो अहां दे परमात्में ताई इक्क राज कने याजक बणाया कने सैह धरतिया पर राज करदे हन ।"

11 जाहू मैं दिख्या, तां तिस सिंहासणे कने तिन्हां प्राणियां कने तिन्हां स्याणेयां दे चौनी पास्सें मते सारे सुअर्गदूतां दी उआज सुणी, जिन्हां दी गिणती लखां कने करोड़ां दी थी, 12 कने सैह जोरे जोरे नैं ग्लांदे थे, "बलिदान कित्या मेम्ना ई सामर्थ कने धन कने ज्ञान कने ताकत कने आदर कने महिमा कने धन्यावाद दे जोग्या ऐ ।" 13 भिरी मैं सुअर्गे च कने धरतिया पर कने धरतिया थलें कने समुंदरे दी सारी बणाईयां चीजां जो, कने सब कूच्छ जेहड़ा तिन्हां च ऐ, एह ग्लांदे सुणेयां, "जेहड़ा सिंहासणे पर बैठया ऐ तिसदा कने मेम्ने दा धन्यावाद कने आदर कने महिमा कने राज जुगा जुग रँह ऐ ।" 14 कने चौनी प्राणियां नैं आमीन ग्लायया, कने स्याणेयां पैई करी दंडवत किता ।

सत मोहरां दा खोलया जाणां

6 भिरी मैं दिख्या कि मेम्ने तिन्हां सतां मोहरां ते इक्की मोहरा जो खोलया; कने तिन्हां चौनी प्राणियां च इक्क गर्जने दी उआज सुणी, "आ" 2 मैं नजर चुकी, कने दिख्या कि इक्क चिट्टा घोड़ा ऐ, कने तिसदा सवारे दे हत्थे च धनुष ऐ; कने तिसियो इक्क मुकट दित्या, कने सैह जय करदा करदा निकळेया कि होर भी जय हासल करन । 3 जाहू तिन्हीं दूई मोहर खोली, तां मैं दूये प्राणी जो एह ग्लांदे सुणेया, "आ ।" 4 भिरी इक्क घोड़ा निकळेया जेहड़ा लाले रंगे दा था; तिसदे सवारे जो एह हक्क दित्या कि धरतिया पर ते मेल मिलाप जो चुकी लै, तांकि लोक इक्की दूये दा कत्ल करन; कने तिसियो इक्क बडी तलवार दिती गैई । 5 जाहू तिन्हीं त्री मोहर खोली, तां मैं त्रीये प्राणी जो एह ग्लांदे सुणेया, "आ ।" मैं नजर चुकी, कने दिख्या इक्क काला घोड़ा ऐ, कने तिसदे सवारे दे हत्थे च इक्क त्रकड़ी ऐ; 6 कने मैं तिन्हां चौनी प्राणियां दे बीच इक्क शब्द एह ग्लांदे सुणेया, दीनार दा सेर भर कणक कने दीनारे दा त्रे सेर जाँ, अपर तेल कने अगूरा दे रसे दा नकसान मत करणां । 7 जाहू तिन्हीं चौथी मोहर खोली, तां मैं चौथे प्राणी जो एह ग्लांदे सुणेया, "आ ।" 8 मैं नजर चुकी, कने दिख्या कि इक्क पीला रंगे दा घोड़ा ऐ; कने तिसदे सवारे दा नां मौत ऐ, कने अधोलोक तिसदे पचांह पचांह ऐ; कने तिन्हां जो धरतिया दे इक्क चौथे हिस्से पर एह हक्क दित्या कि तलवार, कने अकाल, कने मरी, कने धरतिया दे बणपशुआं दिया बजाह ते लोकां जो मारी दै । 9 जाहू तिन्हीं पंजमी मोहर खोली, तां मैं वेदी दे थलें तिन्हां दे प्राणां जो दिख्या जेहड़ा परमात्में दे वचना दिया बजाह ते कने तिसा गवाहिया दिया बजाह ते जेहड़ी तिन्हां नैं दित्तियो थी कत्ल किन्तेयो थे । 10 तिन्हां जोरे जोरे नैं ग्लायया, "हे मालक, हे पवित्र कने सच; तू काहू तिकर न्याय नी करगा? कने धरतिया दे रँणेआळेयां ते अहां दे खूने दा बदला काहू तिकर नी लेगा?" 11 तिन्हां च हर इक्की जो चिट्टा कपड़ा दित्या गैआ, कने तिन्हां नैं ग्लायया गैआ कि होर थोड़ी देरा तिकर अराम करा, जाहू तिकर कि तुहां दे संगी दास कने भाऊ जेहड़े तुहां साइआं कत्ल होणे आळे हन तिन्हां दी गिणती भी पूरी नी होई जां । 12 जाहू तिन्हीं छेमी मोहर खोली, तां मैं दिख्या कि इक्क बडा हिल्लण होया, कने सूरज कम्बले साइआं काला कने पूरा चंद्रमा खूने साइआं होई गैआ । 13 अम्बरे दे तारे धरतिया पर इआं पै जिआं बडे तूफाने नैं हिल्ली करी धूडे दे रूखे ते कच्चे फळ झड़दे हन । 14 अम्बर इआं खिसकी गैआ जिआं कागज लपेटणे ते खिसकी जांदा ऐ; कने हर इक्क पहाड़ कने टापू अपनी अपनी जह्गा ते खिसकी गैआ । 15 ताहू धरतिया दे राजे, कने परधान, कने सरदार, कने अमीर कने सामर्थी लोक, कने हर इक्क दास कने हर इक्क

अजाद पहाड़ां दी गुफां च कने चट्टाना च जाई लुके, 16 कने पहाड़ां कने चट्टाना नै ग्लाणां लग्गा, "अहां पर पैई जा; कने अहां जो तिसदे मुंमै ते जेहड़ा सिंहासणे पर बैठया ऐ, कने मेम्ने दे प्रकोपे ते लक्काई लैआ । 17 कजोकि तिसदे प्रकोपे दा भयानक दिन आई रैहूआ ऐ, हुण कुण ठेहरी सकदा ऐ ।

इस्त्रालियां दे इक्क लख चौताली हजार लोक

7 इसदे बाद में धरतिया दे चौनी कोणेयां पर चार सुअर्गदूत खडूतेयो दिखे । सैह धरतिया दी सारिया हौआं जो पकड़ी करी खडूतेयो थी । तांकि धरतिया या समुंदरे या कुसी रुखे च हौआ नी चलें । 2 भिरी में इक्क होर सुअर्गदूत जो जिंदे परमात्मै दी मोहर लैई करी पूरब दे पास्से ते ओंदे दिख्या; तिन्हीं तिन्हां चौनी सुअर्गदूतां नै जिन्हां जो धरती कने समुंदरे दा नकसान करणे दा हक्क दित्या था, जोरे नै ग्लाय, 3 "जाहू तिकर अहां अपणे परमात्मै दे दासां दे मत्थे पर मोहर नी लगाई दैन, ताहू तिकर धरती कने समंदर कने रूखां दा नकसान मत करदे ।" 4 जिन्हां पर मोहर दितियो थी में तिन्हां दी गिणती सुणी, इस्त्राले दियां औलांदा दे सारे गोत्रां च इक्क लख चौताली हजारों पर मोहर दित्ती गैई: 5 यहूदे दे गोत्रे च बाराह हजार पर मोहर दित्ती गैई; रुबेन दे गोत्रे च बाराह हजार पर, गाद दे गोत्रे च बाराह हजारों पर । 6 आशेर दे गोत्रे च बाराह हजार पर, नपूताली दे गोत्रे च बाराह हजारों पर, मनशिशह दे गोत्रे च बाराह हजारों पर, 7 शमौने दे गोत्रे च बाराह हजारों पर, लेविये दे गोत्रे च बाराह हजारों पर, इस्साकार दे गोत्रे च बाराह हजारों पर, 8 जबूलून दे गोत्रे च बाराह हजारों पर, यूसुफे दे गोत्रे च बाराह हजारों पर, कने बिन्यामीन दे गोत्रे च बाराह हजारों पर मोहर दित्ती गैई ।

इक्क बडी भीड़

9 इसदे बाद में नजर चुकी, कने दिख्या, हर इक्क जाति कने कुल कने लोक कने भासा च इक्क ऐदेई बडी भीड़, जिसियो कोई गिणी नी सकदा था, चिह्ना कपड़ा पहनेयो कने अपणे हत्थां च खजूरे दियां डालियां लैई करी सिंहासणे सामणे कने मेम्ने सामणे खडूतेयो ऐ 10 कने जोरे जोरे नै डडी करी ग्लां दियां हन, "उद्दारे तांई अहां दे परमात्मै दा, जेहड़ा सिंहासणे पर बैठया ऐ, कने मेम्ने दी जय जय कार होयें ।" 11 कने सारे सुअर्गदूत तिस सिंहासणे कने स्याणेयां कने चौनी प्राणियां दे चौनी पास्से खडूतेयो हन; भिरी सैह सिंहासणे सामणे मुंमै भार पैई गै कने परमात्मै जो प्रणाम करी नै ग्लाय, 12 "आमीन! अहां दे परमात्मै दी स्तुति कने महिमा कने ज्ञान कने धन्यावाद कने आदर कने सामर्थ कने ताकत जुगा जुगा बणी रैहू । आमीन ।"

13 इसा गल्ला पर स्याणेयां च इक्की मिन्जो नै ग्लाय, एह चीट्टे कपड़े लगाई करी कुण हन? कने कांह ते आये हन?" 14 में तिस नै ग्लाय, "हे मालक, तू ई जाणदा ऐ ।" तिन्हीं मिन्जो नै ग्लाय, "एह सैह हन, जेहड़े तिस महाकृशे च निकळी करी आयेयो हन इन्हां अपणे अपणे कपड़े मेम्ने दे खूने च धोई करी चीट्टे कितेयो हन । 15 इसा बजाह ते सैह परमात्मै दे सिंहासणे सामणे हन, कने तिसदे मंदरे च दिन रात तिसदी सेवा करदे हन, कने जेहड़ा सिंहासणे पर बैठया ऐ, सैह तिन्हां दे ऊपर अपणां अपणां तम्बू ताणगा । 16 सैह भिरी भूखे कने प्यासे नी होंगे; कने ना तिन्हां पर धूप, ना कोई तपण पोंगी । 17 कजोकि मेम्ना जेहड़ा सिंहासणे दे बीच खडूतेया ऐ तिन्हां दी रखवाळी करगा; कने तिन्हां जो जिन्दगी रूपी पाणी दे छरुडू अल्ल लैई जा करगा, कने परमात्मै तिन्हां दी अंखी दा सारा पाणी पुंन्जी दिंगा ।

सतमी मोहर कने सोने दा धूपदान

8 जाहू तिन्हीं सतमी मोहर खोली, तां सुअर्गें च आधे घंटे तिकर सत्राटा छाई गैआ । 2 ताहू में तिन्हां सतो सुअर्गदूतां जो दिख्या जेहड़े परमात्मै सामणे खडूतेयो रैहदे हन, कने तिन्हां जो सत तुरहियां दित्तियां हन ।

3 भिरी इक्क होर सुअर्गदूत सोने दा धूपदान लैई करी आया, कने वेदी दे नैडे खडूई गैआ; कने तिस जो बडा धूप दित्ता गैआ कि सब पवित्र लोकां दी प्रार्थना सौगी सोने दी तिस वेदी पर, जेहड़े सिंहासणे सामणे हन चट्टान । 4 तिस धूपे दा धूप पवित्र लोकां दी प्रार्थना सौगी सुअर्गदूत दे हत्थे सौगी परमात्मै सामणे पुज्जी गैआ । 5 ताहू सुअर्गदूतें धूपदान लैई करी तिस च वेदी

दी अग्न भरी कने धरती पर पाई दित्ती; कने गर्जन सौगी कने बिजलियां कने हिल्लण होणां लग्गे ।

सत तुरहियां

6 ताहू सैह सतो सुअर्गदूतां जिन्हां अल्ल सत तुरहियां थी तिन्हां जो बजाणे जो त्यार होये । 7 पैहले सुअर्गदूतें तुरही बजाई, कने खूने नै मिलेयो ओले कने अग्न पैदा होई, कने धरतिया पर पाई दित्ती; कने धरती दा इक्क त्रीआ हिस्सा फकौई गैआ, कने रुखां दा इक्क त्रीआ हिस्सा फकौई गैआ, कने सारी हरी घास भी जळी गैई । 8 दूये सुअर्गदूतें तुरही बजाई, तां मना अग्नी नै जळदा इक्क बडा पहाड़ समुंदरे च पाई दित्ता; कने समंदर दा इक्क त्रीआ हिस्सा खून होई गैआ, 9 कने समुंदरे दे इक्के हिस्से दे प्राणी मरी गै कने इक्क त्रीये हिस्से दे चाहज नष्ट होई गै ।

10 त्रीये सुअर्गदूतें तुरही बजाई, कने इक्क बडा तारा जेहड़ा मशाला साइआं जळदा था सुअर्गें ते टूटेया, कने नदी दा इक्क त्रीये हिस्से पर कने पाणी दे झरने पर आई पैआ । 11 तिस तारे दा नां नागदौना ऐ; कने इक्क त्रीआ हिस्सा पाणी नागदौने साइआं कौड़ा होई गैआ, कने बडे माणु तिस पाणी दे कौड़े होई जाणे ते मरी गै । 12 चौथे सुअर्गदूतें तुरही बजाई, कने सूरजे दा इक्क त्रीआ हिस्सा, कने चन्द्रमे दा इक्क त्रीआ हिस्सा कने तारेयां दे इक्क त्रीये हिस्से आपति आई, ऐत्थू तिकर तिन्हां दा इक्क त्रीआ हिस्सा अंग नैहरा होई गैआ कने दिन दा इक्क त्रीआ हिस्सा परगड़ा नी रैहूआ, कने तिआं ई राती च भी ।

13 जाहू कि मैई भिरी दिख्या, तां अम्बरे दी बीच इक्क उकाबे जो उड़दे कने जोरे जोरे नै एह ग्लां दे सुणेयां, 'तिन्हां सुअर्गदूतां दी तुरही दिया बजाह ते जिसा दा बजाणां अल्ली बाकि ऐ धरतिया दे रैहणेआळ्यां पर हाय, हाय, हाय, !"

9 ताहू पंजमे सुअर्गदूतें तुरही बजाई, तां में सुअर्गें ते धरतिया पर इक्क तारा पौंदा दिख्या, कने तिसियो अथाह कुंड दी चाबी दित्ती । 2 तिन्हीं अथाह कुंड खोलया, कने कुंडे च बडिया भट्टिया साइआं धुआं उठेया, कने कुंडे दे धुये नै सूरज कने हौआ अन्धकारमय होई गै । 3 तिस धुये नै धरतिया पर टिड्डीयां निकळियां, कने तिन्हां जो धरतिया दे डुंगुआं साइआं ताकत दित्ती गैई । 4 तिन्हीं ग्लाय कि ना तां धरतिया दे घाहे जो, ना कुसी हरियालिया जो, ना कुसी रुखे जो नकसान पुज्जा, सिर्फ तिन्हां माणुआं जो नकसान पुज्जा जिन्हां दे मत्थे पर परमात्मै दी मोहर नी ऐ । 5 तिन्हां लोकां जो जान्नी ते मारणे दा नी अपर पंज मीह्ने तिकर दर्द दैणे दा हक्क दित्या । कने तिन्हां दी दर्द ऐदेई थी जिआं डंगु दे डंग मारणे ते माणुये जो होंदी ऐ । 6 तिन्हां दिनां च माणु मौता जो तोपणां पर नी मिलणी ऐ; कने मरणे दी इच्छा करणे, कने मौत तिन्हां ते नठगी ।"

7 तिन्हां टिड्डीयां दे अकार लड़ाईया तांई त्यार कित्तेयो घोडेयां साइआं थे, कने तिन्हां दे सरां पर मन्ना सोने दे मुकट थे; कने तिन्हां दे मुं माणुआं साइआं थे । 8 तिन्हां दे बाळ जणांसा दे बाळां साइआं कने दद शेरां दे दंदा साइआं थे । 9 तिन्हां लोहे दी झिलम पैहनियो थी; कने तिन्हां दे पंखा दी उआज ऐदेई थी जिआं रत्थां कने मते घोडेयां दे दौड़णे दी उआज ओंदी थी । 10 तिन्हां दी दी पूछ डंगुआं साइआं थी कने तिन्हां च डंग था, कने तिन्हां जो पंज मीह्ने तिकर माणुआं जो दुख दैणे दी सामर्थ मिलियो थी, सैह तिन्हां दिया पूछा च थी । 11 अथाह कुंड दा दूत तिन्हां दा राजा था; तिसदा नां इब्रानी च अबदोन, कने यूनानी च अपुल्लयोन ऐ ।

12 पैहला संकट बितिया, दिखा, हुण इसदे बाद दो संकट होर ओणे आळे हन । 13 जाहू छेमे सुअर्गदूतें तुरही बजाई तां सोने दी वेदी जेहड़ी परमात्मै सामणे ऐ तिसदे सीगा च मै इक्क ऐदेई उआज सुणी 14 मना कुणकी छेमे सुअर्गदूते नै जिसी अल्ल तुरही थी, ग्ला दा, "तिन्हां चार सुअर्गदूतां जो जेहड़ी बडे नदी फुरात अल्ल बनेयो हन, खोली दे ।" 15 सैह चारो दूत खोली दित्ते जेहड़े तिस बत कने दिन, कने मीह्ने, कने साले तांई माणुआं दा इक्क त्रीआ हिस्सा मारी दैणे जो त्यार कित्तेयो थे । 16 तिन्हां दी फौजा दे सवारां दी गिणती भी करोड़ां थी; में तिन्हां दी गिणती सुणी । 17 मिन्जो इस दर्शने च घोड़े कने तिन्हां दे ऐदेय सवार दुस्से जिन्हां दी झिलमे अग्न, कने धूम्रकान्त, कने गंधक साइआं थी, कने तिन्हां घोडेयां दे मुंड शेरां दे मुंडा साइआं थे; कने तिन्हां दे मुं ते अग्न कने धुआं कने गंधक निकळदे थे । 18 इन्हां तीनां महामारियां कने अग्न कने धुये कने गंधक ते, जेहड़े तिन्हां दे मुं ते निकलळदे

थे माणुआं दा इक्क त्रिया हिस्सा मारी दित्ता । 19 कजोकि तिन्हां घोडेयां दी सामर्थ तिन्हां दे मुं कने तिन्हां दी पूछा च थी; इसताई कि तिन्हां दी पूछा सरपां साइआं थी, कने तिन्हां पूछा दे मुंड भी थे कने इन्हां ते ई दर्द पुजां दे थे । 20 बाकी माणु जेहडे तिन्हां मारियां च मरयो थे, अपणे हत्थां दे कम्मां ते मन फिराया, कि दुष्टआत्मां दी, कने सोने कने चांदी कने पीतल कने पत्थर कने काठ दी मूर्तियां दी पूजा मत करा, जेहिड्यां ना दिखदियां, ना सुणदियां, ना चली सकदियां हन; 21 कने जेहडा खून, कने टोना, कने व्यभिचार, कने चोरी तिन्हां दी थी, तिन्हां ते मन मत फिरा ।

सुअर्गदूत कने छोटी कताब

10 भिरी मैं इक्क होर ताकतवर सुअर्गदूते जो बदले उडदे सुअर्गे ते लौं दे दिख्या । तिसदे मुंडे पर मेघधनुष था । तिसदा मुं सूरजे साइआं कने तिसदे पैर अग्गी दे खंभे साइआं थे । 2 तिसदे हत्थे च इक्क छोटी खोलियो कताब थी । तिन्हीं अपणां खब्बा पैर समुंदरे पर कने सज्जा धरतिया पर रख्या, 3 कने ऐदेया जोरे मैं उडेया, जिआं शेर उडदा ऐ; जाहू सैह उडेया तां गरजणे दे सतो शब्द सुम्मे । 4 जाहू सतो गरजणे दे शब्द सुम्मे, तां मैं लिखणे आळा था, अपर मैं सुअर्गदूतां ते एह सुणेया, “जेहिड्यां गलां गरजणे दी तिन्हां सतो शब्दां च सुणेया तिन्हां जो गुप्त रख, कने मत लिख ।” 5 जिस सुअर्गदूते जो मैं समुंदरे कने धरतिया पर खडूतेया दिख्या था, तिन्हीं अपणां खब्बा हत्थ सुअर्गे पासं उठाया, 6 कने जेहडा जुगाजुग जिंदा ऐ, कने जिन्हीं सुअर्गे जो कने जेहडा कुच्छ तिस च ऐ, कने धरतिया जो कने जेहडा कुच्छ तिसा पर ऐ, कने समुंदरे जो कने जेहडा कुच्छ तिस च ऐ बणांया, तिसदी कसम खाई करी ग्लाय, “हुण तां जादा देर नी होंगी 7 अपर सतमें सुअर्गदूतें तुरही बजाणे पर होणेआळे शब्दां दे दिनां च परमात्मं दा गुप्त मनोरथ तिस सुसमाचार दे मताबक जेहडा तिन्हीं अपणे दास भविष्यवक्ता जो दित्या, पूरा हुगा ।” 8 जिस शब्दे जो मैं सुअर्गे च ग्लां दे सुणेया था, सैह भिरी मिन्जो सोंगी गलां करणां लगेया, “जा, जेहडा सुअर्गदूत समुंदरे कने धरतिया पर खडूतेया ऐ, तिसदे हत्थे च खोलियो कताबा जो लैई लै ।” 9 मैं सुअर्गदूते अल्ल जाई करी ग्लाय, “एह छोटी कताब मिन्जो दैई दै ।” तिन्हीं मिन्जो ग्लाय, “लैई ले, कने इसायो खाई लै; एह तेरे पेटे जो कोडा तां करगी, अपर तेरे मुंमें च मखीरे साइआं मीठी लगगी ।” 10 मैं तिसा छोटिया कताबा जो सुअर्गदूते दे हत्थे ते लैई करी खाईया । सैह मेरे मुंमें च मखीरे साइआं मीठी तां लगगी, अपर जाहू मैं तिसायो खाईया, तां मेरा पेट कोडा होईया । 11 ताहू मिन्जो मैं एह ग्लाय गैआ, “तिजो मते लोकां कने जातिआं, कने भासां कने राजेयां दे बारे च भिरी भविष्यवाणी करणी होंगी ।

दो गवाह

11 भिरी मिन्जो नापणे तांई इक्क सरकंडा दित्ता, कने कुणकी ग्लाय, “उठ, परमात्मे दे मंदरे कने वेदी, कने तिस च उपासना करणेआळ्यां जो नापी लै । 2 अपर मंदरे दे बाहरे दा अंगन छड्डी दै; तिसियो मत नाप कजोकि सैह गैर - यहूदियां जो दित्या ऐ, कने सैह पवित्र सैहरे जो बताली मीहे तिकर रौंदगा । 3 मैं अपणे दू गवाहां जो एह हक्क दिंगा कि टाटा उट्टी करी इक्क हजार दो सौ सठ दिन तिकर भविष्यवाणी करगे । 4 एह सैह ई जैतून दे दो रूख कने दो दिव्ये हन, जेहडे धरतिया पर प्रभु दे सामणे खडूतेयो रेंहदे हन । 5 जे कोई तिन्हां जो नकसान पजाणां चाहंदा ऐ, तां तिन्हां दे मुंमें ते अग निकळी करी तिन्हां दे बैरियां जो भस्म करदी ऐ; कने जे कोई तिन्हां जो नकसान पजाणां चाहंगा, तां जरूर इसा रीतिया मैं मारी दित्ता जांगा । 6 तिन्हां जो हक्क ऐ कि अम्बरे जो बंद करें, कि तिन्हां दी भविष्यवाणी दे दिनां च बरखा ना होयें; कने तिन्हां जो सारे पाणिये पर हक्क ऐ कि तिसियो खून बणांन, कने जाहू चाहन ताहू ताहू धरतिया पर हर तरां ह दे संकट लैयोन । 7 जाहू सैह अपणी गवाही दैई दिंगे, तां सैह उंगरां जो अथाह कुंड च कडगा, तिन्हां मैं लडी करी तिन्हां जो जीतगा कने तिन्हां जो मारी दिंगा । 8 तिन्हां दी लाशां तिस बडे सैहरे दे चौकां च पैई रैगियां, जेहडे आत्मिक रूप ते सदोम कने मिस्र सैहरे केह्वांदा ऐ, जित्थू तिन्हां दा प्रभु भी सुलिया पर चढ़ाया था । 9 सारे लोकां कने कुलां कने भाषा कने जातिआं दे लोक तिन्हां दियां लाशां जो साढे तीन दिन तिकर दिखदे रेंहगे, कने तिन्हां दी लाशां जो कब्रा च रखणां नी दिंगे । 10 धरतिया पर रेंहणेआळे तिन्हां दे

मरणे ते खुश कने मगन होंगे, कने इक्की दूयो अल्ल भेंट घल्लगे, कजोकि इन्हां दूनी भविष्यवक्ता धरतिया पर रेंणेआळ्यां जो सताया था । 11 अपर साढे तीन दिन दे बाच परमात्मे दे पाससे ते जिन्दगी दी आत्मां तिन्हां च आई गैई, कने सैह अपणे पैरां दे भार खड्डी गै कने तिन्हां जो दिखणेआळे पर बडा भरी डर छाईया । 12 ताहू तिन्हां जो सुअर्गे ते इक्क बडा शब्द सुणेया, “ऐत्थू उपर ओआ !” एह सुणी करी सैह बदळां पर सवार होई मैं अपणे बैरियां दे दिखदे दिखदे सुअर्गे जो चढिये । 13 भिरी तिस बगत इक्क बडा हिल्लन होया, कने सैहरे दा दसवां हिस्सा पैई गैआ; कने तिस हिल्लने मैं सत हजार माणु मरिये, कने बाकि डरी गै कने सुअर्गे दे परमात्मं दी महिमा किती । 14 दूई मुसीबत बीती चुकी थी, दिखा त्री मुसीबत तौळी ओणेआळी ऐ ।

सतमी तुरही

15 जाहू सतमे दूतें तुरही बजाई तां सुअर्गे च इस बारे च बडे बडे शब्द होणां लगे : “ससारे दा राज्ञ अहां दे प्रभु कने तिसदे मसीह दा होईया, कने सैह जुगा जुग राज्ञ करगा ।” 16 ताहू चौबी सौ स्याणे जेहडे परमात्मं सामणे अपणे अपणे सिंहासणे पर बैठेयो थे, मुंमें दे भार पैई करी परमात्मं जो प्रणांम करी मैं 17 एह ग्लाणां लगे, “हे सर्वशक्तिमान प्रभु परमात्मां, जेहडा ऐ कने जेहडा था, अहां तेरा धन्यावाद करदे हन कि तू अपणी बडी समर्था जो कम्मे च लैयोई करी राज्ञ किता ऐ । 18 जातिआं गुस्सा किता, अपर तेरा प्रकोप आई पैआ, कने सैह बगत आई रैहूआ ऐ कि मरयां दा न्याय किता जां, कने तेरे दास भविष्यवक्ता कने पवित्र लोकां जो कने तिन्हां छोटे बडेयां जो जेहडे तेरे नांये ते उरदे हन बदला लैआ जां, कने धरतिया दे बिगाडणेआळे नष्ट किता जान । 19 ताहू परमात्मं दा जेहडा मंदर सुअर्गे च ऐ सैह खोलया, गैआ कने तिसदे मंदरे च तिसदे वादे दा सणूक दुस्सया; कने बिजलियां कने शब्द कने गर्जन कने हिल्लन होये कने बडे ओले पै ।

जणांस कने अजगर

12 भिरी सुअर्गे च इक्क बडा नशाण दुस्सया, मतलब इक्की जणांसा तिन्नै सूरज उढेया था, कने चन्द्रमा तिसा दे पैरां हेठ था, कने तिसा दे मुंडे पर बारां ह तारेयां दा मुकट था 2 सैह गर्भवती होई, कने उडदी थी, कजोकि उलीवरी होणे दी पीड लगियो थी, 3 इक्क होर सुअर्गे च नशाण दुस्सया; कने दिखा, इक्क बडा लाल अजगर था, जिसदे सत मुंड कने दस सींग थे, कने तिसदे मुंडा पर राजेयां दे मुकट थे । 4 तिसदिया लयुगणियां अम्बरे ते तारेयां दा इक्क त्रिया हेस्से जो खीज्जी करी धरतिया पर पाई दित्ता । सैह अजगर तिसा जणांसा सामणे जेहडी गर्भवती थी, खड्डी गैआ कि जाहू सैह बच्चा जम्मी तां मैं तिस बच्चे जो निगली जां । 5 सैह जागत जम्मी जेहडा लोहे दा दंड लैई करी सारियां जातिआं पर राज्ञ करणे पर था, कने सैह जागत ताहू ई परमात्मं अल्ल कने तिसदे सिंहासणे अल्ल पजाई दित्ता; 6 कने सैह जणांस बणे जो नदी गैई जित्थू परमात्मं दे पाससे ते तिसा तांई इक्क जगाह तयार किचित्तियो थी कि औत्थू सैह इक्क हजार दो सौ सठ दिना तिकर पाळी जांगी ।

7 भिरी सुअर्गे च लडाई होई, मीकाईल कने तिसदे सुअर्गदूत अजगरे मैं लडणा गै; कने अजगर कने तिसदे दूत लडी पै, 8 अपर जीती नी सके, कने सुअर्गे च तिन्हां तांई भिरी जगाह नी रैई । 9 ताहू सैह बडा अजगर, कने सैई पराणा सर्प जेहडा इबलीस कने सैतान केह्वांदा ऐ कने सारे संसारे जो भरमाणेआळा ऐ, धरतिया पर सुट्टी दित्ता, कने तिसदे दूत तिस सौगी सट्टी दित्ते, 10 भिरी मैं सुअर्गे च एह बडा शब्द आंदे सुणया, “हुण अहां दे परमात्मं दा उद्धार कने सामर्थ कने राज्ञ कने तिसदे मसीह दा हक्क प्रकट होया ऐ, कजोकि अहां दे भाऊआं पर दोष लगाणेआळा, जेहडा रात दिन अहां दे परमात्मं सामणे तिन्हां पर दोष लगा करदा था, सट्टी दित्ता । 11 सैह मेम्ने दे खून दिया बजाह कने अपणिया गवाहिया दे वचना दिया बजाह ते तिस पर जयवंत होये, कने तिन्हां अपणियां जान्नी जो प्यारा नी जाणेया, ऐत्थू तिकर कि मौत भी सेही लैई । 12 इसा बजाह ते हे सुअर्गे कने तिन्हां च रेंणेआळ्यो मगन होया; हे धरती, कने समंदर, तुहां पर हाय! कजोकि सैतान बडे गुस्से सौगी तुहां लौई आया ऐ, कजोकि जाणदा ऐ कि तिसदा थोडा ई बत होर बाकि बचेया ऐ ।

13 जाहू अजगरें दिख्या कि मैं धरतिया पर सुट्टी दित्या, तां तिसा जणांसा जो जिन्नै जागत जम्मेयां था, तिसायो सताया । 14 अपर तिसा जणांसा जो

बड़े उकाबे दे दो पंख दित्तोयो कि सर्पे साइआं ते उडी करी बणे च तिसा जगाह पुञ्जी जां, जित्थू सैह इक्क बगत कने होर बगतां तिकर पाळी जां । 15 कने सर्पे तिसा जणांसा दे पचांह अपणे मुंमें ते नदिया साइआं पाणी बहाया कि तिसायो एह नदी रदाई लैई गैई । 16 धरतिया तिसा जणांसा मदद किन्ती, कने अपणां मुं खोली करी तिस नदिया जो जेहडी अजगरें अपणे मुंमें ते बहाईयो थी पी लैआ । 17 ताहू अजगर जणांसा पर गुस्सा होया, कने तिसदी बाकि औलादा ते, जेहडी परमात्मं दे हुक्मां जो मनदे कने यीशु दी गवाही दैणे पर मजबूत हन, लडणा गैआ, 18 कने सैह समुंदरे दी रेता पर जाई खडूता ।

दो डंगर

13 ताहू में इक्की पशु जो समुंदरे ते निकळदे दिख्या, जिसदे दस सींग कने सत मुंड थे । तिस दे सींगा पर दस राजेयां दे मुकट, कने तिसदे मुंडा पर परमात्मं दी निंदा दे नां लिख्यो थे । 2 जेहडा पशु में दिख्या सैह चीते साइआं था; कने तिसदे पैर भालूये साइआं, कने मुं शेरें साइआं था । तिन्हीं अजगरें अपणी सामर्थ कने अपणां सिहांसण कने बडा हक्क तिसियो दैई दित्ता । 3 में तिसदे मुंडे पर इक्क इन्हां बडा जखम पैआ दिख्या मना कि सैह मरणा लगया, भिरी तिसदा प्राणघातक जखम खरा होईया, कने सारी धरतिया दे लोक तिस पशुये पचांह पचांह हैरण होई करी चले । 4 लोकां अजगरे दी पूजा किन्ती, कजोकि तिन्हीं तिस पशुये जो अपणां हक्क देई दित्ता था, कने एह ग्लाई करी पशुये दी पूजा किन्ती, “इस पशुये साइआं कुण ऐ? कुण इसणे लडी सकदा ऐ?”

5 बडे बोल ग्लाण कने निंदा करणे तांई तिसियो इक्क मुं दित्ता, कने तिसियो बताली मीह्ने तिकर कम्म करणे दा हक्क दित्ता । 6 तिन्हीं परमात्मं दी निंदा करणे तांई मुं खोलया कि तिसदे नां कने तिसदे तम्बू कने सुअर्गे दे रेंगेआळ्यां दी निंदा करें । 7 तिसियो एह भी हक्क दित्ता कि पवित्र लोकां सौगी लडें कने तिन्हां पर जय पांंदे हन, कने तिसियो हर इक कुल कने लोक कने भासा कने जाति पर हक्क दित्ता । 8 धरतिया दे सैह सारे रेंगेआळे, जिन्हां दे नां तिस मेम्ने दी जिन्दगिया दी कताबा च लिख्यो नी गैयो जेहडा संसारे दी उत्पति दे बगत ते घात कित्ता ऐ, तिस पशु दी पूजा करणे । 9 जिन्हां दे कनं होन सैह सुणी लैन । 10 जिसजो कैदा च पौणां ऐ, सैह कैदा च पौणां; जेहडा तलवारा सौगी मरणा, जरूरी ऐ कि सैह तलवारा सौगी मारया जांगा । पवित्र लोकां दा धीरज कने वसुआस इसी च ऐ ।”

11 भिरी में इक्क होर पशुये जो धरतिया ते निकळदे दिख्या, तिसदे मेम्ने दे दो सींग थे, कने सैह अजगरे साइआं ग्लांदा था । 12 सैह तिस पैहले पशु दा सारा हक्क तिस दे सामणे लैई अंदा था; कने धरती कने तिसदे रेंगेआळ्यां ते तिस पैहले पशु दी, जिसदा मरणे आळा जखम ठीक होईया था, पूजा करांदा था । 13 सैह बडे बडे नशाण दरस्सदा था, ऐत्थू तिकर कि माणुआं सामणे सुअर्गे ते धरतिया पर अग्न बरसाई दिंदा था । 14 तिन्हां नशाणां दिया बजाह ते, जिन्हां जो तिस पशुये सामणे दसणे दा हक्क तिसियो दित्ता था, सैह धरतिया दे रेंगेआळ्यां जो भरमांदा था कने धरतिया दे रेंगेआळ्यां जो ग्लांदा था कि जिस पशुये जो तलवार लगियो थी सैह जिंदा होईया, तिसदी मूर्ति बणां । 15 तिसियो तिस पशु दी मूर्तिया च जात्र दैणे दा हक्क दित्ता कि पशुये दी मूर्ति ग्लाणां लम्गे, कने जितणे लोक तिस पशुये दी मूर्ति दी पूजा नी करन, तिन्हां जो मारी दे । 16 तिन्हीं छोटे बडे अमीर कंगाल, अजाद दास सबना दे खब्बे हत्थे या तिन्हां दे मत्थे पर इक्क इक्क मोहर लगाई दित्ती, 17 कि तिसजो छड्डी जिस पर मोहर तिस पशुये दा नां या तिसदे नांये दा अंक होयें, होर कोई लैण दैण ना करी सकन । 18 ज्ञान इसी च ऐ जिसियो अक्क होयें सैह इस पशु दा अंक जोडी लै, कजोकि सैह माणुये दा अंक ऐ, कने तिसदा अंक छै सौ छियासठ ऐ ।

मेम्ना कने तिसदे लोक

14 भिरी में नजर चुकी, कने दिख्या, सैह मेम्ना सिय्योन प्हाडे पर खडूतेया ऐ, कने तिस सौगी इक्क लख चौताली हजार जण हन, जिन्हां दे मत्थे पर तिसदा कने तिसदे बुडे दा नां लिख्या ऐ । 2 कने सुअर्गे ते मिन्जो इक्क शब्द सुम्मेया जेहडा पाणी दी मतिआं धारायें कने बडी गर्जन था, जेहडा शब्द में सुणया सैह ऐदया था मना वीण बजाणे आळे वीण बजा करदे हन । 3 सैह सिहांसणे दे कने चारो प्राणियां कने स्याणेयां सामणे इक्क नौआं

गीत गा दे थे । तिन्हां इक्क लख चौताली हजार जणेयां जो छड्डी, जेहडे धरतिया पर खरीदेयो थे, सैह कोई गीत नी सीखी सकदा था । 4 एह सैह हन जेहडे जणांसा सौगी बुरे नी होये, अपर कुआरे हन; एह सैह हन कि जित्थू कुत्की मेम्ना जांदा ऐ, सैह तिसदे पचांह चली पांंदे हन; एह तां परमात्मं दे सामणे पैहले फळ होणे तांई माणुआं ते खरीदेयो हन । 5 तिन्हां दे मुंमें ते कदी झूठ नी निकळया था, सैह बेकसूर हन ।

त्रे सुअर्गदूत

6 भिरी में इक्क होर सुअर्गदूते जो अम्बरे दे बीच उडदे दिख्या, जिस अल्ल धरतिया पर रेंगेआळ्यां दी हर इक्क जाति, कने कुल, कने भासा, कने लोकां जो सुनाणे तांई सनातन सुसमाचार था । 7 तिन्हीं बडे शब्दे च ग्लाय्या, “परमात्मं ते उरा, कने तिसदी महिमा करा, कजोकि तिसदे न्याय करणे दा बगत आई गैआ ऐ; कने तिसदा भजन करा, जिन्हीं सुअर्ग कने धरतिया कने समंदर कने पाणी दे झरुड बणाये ।” 8 भिरी इसदे बाद इक्क होर दूआ सुअर्गदूत एह ग्लांदा होया आया, “पैई गैआ, सैह बडा बेबीलोन पैई गैआ, जिन्हीं अपणे व्यभिचार दी कोपा सौगी भरियो मदिरा सब जातिआं जो पिलाई ऐ ।” 9 भिरी इन्हां दे बाद इक्क होर त्रीआ सुअर्गदूत बडे जोरे जोरे नैं एह ग्लांदा होया आया, “जेहडा कोई तिस पशुये कने मूर्तिया दी पूजा करे, कने अपणे मत्थे या अपणे हत्थे पर तिसदी मोहर ले । 10 सैह परमात्मं दे प्रकोपे दी निरी मदिरा, जेहडा तिसदे गुस्से दे कटोरे च पाई दित्ती ऐ, पीगा कने पवित्र सुअर्गदूतां सामणे कने मेम्ने सामणे अग्न कने गंधक दी पीडा च पौगा । 11 तिन्हां दी पीडा दा धुआं जुगा जुग उठदा रेंहगा, कने जेहडा तिस पशु कने तिसदी मूर्तिया दी पूजा करदे हन, कने जेहडा तिसदे नां दी मोहर लैंदे हन, तिन्हां जो रात दिन चैन नी मिलगा ।” 12 पवित्र लोकां दा शबर इस च ऐ, जेहडा परमात्मं दे हुक्मां जो मनदे कने यीशु पर वसुआस रखदे हन ।

13 भिरी में सुअर्गे ते एह शब्द सुणेया, “लिख : जेहडा मरयो प्रभु च मरदे हन, सैह हुण ते धन हन ।” आत्मा ग्लांदा ऐ, “हाँ, कजोकि सैह अपणी सारी मेहणता नैं अराम पांणे, कने तिन्हां दे कम्म तिन्हां दे सौगी होई लैंदे हन ।”

बडाई

14 में नजर चुकी, कने दिख्या, इक्क चिड्डा बदळ ऐ, कने तिस बदळे पर माणु दे पुत्तर साइआं कोई बैठया ऐ, जिसदे मुंडे पर सोने दा मुकट कने हत्थे च तेज दराटी ऐ । 15 भिरी इक्क होर सुअर्गदूतें मंदरे ते निकळी करी तिस नैं, जेहडा बदळे पर बैठया था, बडे जोरे नैं उडी करी ग्लाय्या, “अपणी दराटी लगाई करी बड्डी करी, कजोकि बडणे दा बगत आईया, इसतांई कि धरती दी खेती पकी गैईयो ऐ ।” 16 अपर जेहडा बदळे पर बैठया था तिन्हीं धरतिया पर अपणी दराटी लगाई, कने धरती बड्डी दित्ती । 17 भिरी इक्क होर सुअर्गदूत तिस मंदरे ते निकळया जेहडा सुअर्ग च ऐ, कने तिसिया अल्ल भी तेज दराटी थी । 18 भिरी इक्क होर सुअर्गदूत, जिसियो अग्नी पर हक्क था, वेदी ते निकळया, कने जिसिया अल्ल तेज दराटी थी तिन्हीं जोरे नैं ग्लाय्या, “अपणी तेज दराटी लगाई करी धरतिया दे अंगूरा दे गुच्छे जो बड्डी ले, तिसदे अंगूर पकी गैयो हन ।” 19 ताहू तिन्हीं सुअर्गदूतें धरतिया पर अपणी दराटी लगाई कने धरतिया दे अंगूरां दा रुख बड्डी करी अपणे परमात्मं दे प्रकोपे दे बडे रस कडणे आळे कुंडे च पाई दित्ता, 20 कने सैहरे दे बाहर तिस रसकुंडे च दाख दरडी गैई, कने रसकुंडे च इतणा खून निकळया कि घोड़ेयां दी लगामा तिकर पुजा, कने सौ कोस तिकर चली गैआ ।

अंत दे संकटा सौगी सुअर्गदूत

15 भिरी में सुअर्गे च इक्क ओर बडा कने अद्भुत नशाण दिख्या, मतलब सत सुअर्गदूत जिन्हां अल्ल सतां लास्ट मुसीबतां थियां कजोकि तिन्हां दे खत्म होई करी परमात्मं दे प्रकोप दा अंत ऐ । 2 ताहू में अग्नी नैं मिलेयो होये इक्क शीशे दा इक्क समंदर दिख्या; कने जेहडे लोक तिस पशु पर कने मूर्तिया पर कने तिसदे नां दे अंक पर जयवंत थे, तिन्हां जो तिस शीशे दे समुंदरे बक्खें परमात्मं दी वीणा जो लैई नैं खडूतेयो दिख्या । 3 सैह परमात्मं दे दास मूसा दा गीत, कने मेम्ने दा गीत गाई गाई करी ग्लांदा थे, “हे सर्वशक्तिमान प्रभु परमात्मां तेरे कम्म म्हान कने अद्भुत हन; हे जुग जुग दे राजा, तेरी चाल खरी कने सच्ची ऐ” । 4 “हे प्रभु, कुण तिजो ते नी डरगा कने

तेरे नांये दी महिमा नी करगा, कजोकि सिर्फ तू ई पवित्र ऐ । सारियां जातिआं आई नैं तिजो सामणे दंडवत करगी, कजोकि तेरे न्याय दे कम्म प्रकट होई गै हन ।

5 इसदे बाद मैं दिख्या कि सुअर्गे च साक्षी दे तम्बूये दा मंदर खोलया; 6 कने सैह सतों सुअर्गदूत जिन्हां अल्ल सतों मुसीबतां थियां, मलमल दे शुद्ध कने चमकदार कपड़े पहनेयो कने छातिया पर सोने दी पट्टियां बन्नियां होइआं मंदरे ते निकळे । 7 ताहू तिन्हां चारों प्राणियां च इक्की तिन्हां सत सुअर्गदूतां जो जेहड़ा परमात्मां जुगो जुग जिदा ऐ तिसदे प्रकोप दे भरेयो सोने दे सत कटोरे दित्ते; 8 कने परमात्म दी महिमा कने तिसदी सामर्थी दिया बजाह ते मंदर धुयें नैं भरौई गैआ, कने जाहू तिकर तिन्हां सतां सुअर्गदूतां दी सतों मुसीबतां खत्म नी होई ताहू तिकर कोई मंदरे च नी जाई सकेया ।

परमात्मं दे गुस्से दे सत कटोरे

16 भिरी मैं मंदरे च कुसकी जो जोरे नैं तिआं सतो सुअर्गदूतां जो एह ग्लांदे सुणेया, “जा, परमात्मं दे प्रकोपे दे सतां कटोरेयां जो धरती पर डोली दैआ । 2 पैहले सुअर्गदूतें जाई करी अपणां कटोरा धरती पर डोली दित्ता । ताहू तिन्हां माणुआं दे, जिन्हां पर पशुआं दी मोहर थी कने जेहड़े तिसदिया मूर्तिया दी पूजा करदे थे, इक्क तरांह दा बुरा कने दुखभरा फोडा निकळेया । 3 दूयें सुअर्गदूतें अपणां कटोरा समुंदरे पर डोली दित्ता, कने सैह मरेयो माणुआं दे खून साइआं बणी गैआ, कने समुंदरे च हर इक्क जीव धारी मरी गैआ । 4 त्रीये सुअर्गदूतें अपणां कटोरा नदियां च कने पाणी दे छरुडेयां च डोली दित्ता, कने सैह खून बणी गै । 5 ताहू मैं पाणी दे सुअर्गदूते जो एह ग्लांदे सुणेया, “हे पवित्र, जेहड़ा ऐ कने जेहड़ा था, तू न्यायी ऐ कने तैई एह न्याय कित्ता । 6 कजोकि तिन्हां पवित्र लोकां कने भविष्यवक्तां दा खून बहाया था, कने तैई तिन्हां जो खून पिलाया; कजोकि सैह इस जोग्गा ऐ ।” 7 भिरी मैं वेदी ते एह उआज सुणी, “हाँ, हे सर्वशक्तिमान प्रभु परमात्मां, तेरे निर्णय ठीक कने सच्चे हन ।”

8 चौथे सुअर्गदूतें अपणां कटोरा सूरजे पर डोली दित्ता, कने तिसियो माणुआं जो अग्गी च पाई दैणे दा हक्क दित्ता गैआ । 9 माणु बड़े सेके ने फकूई गै, कने परमात्मं दे नां दी जिसियो इन्हां मुसीबतां पर हक्क ऐ, निंदा किन्ती पर तिसदी महिमा करणे ताई मन नी फिराया । 10 पजमें सुअर्गदूतें अपणां कटोरा तिस पशुये दे सिहांसणे पर डोली दित्ता, कने तिसदे राजे पर नैहरा होईया । लोक पीड़ा दिया बजाह ते अपणियां अपणियां जीभा चबाणा लगे, 11 कने अपणिया पीड़ां कने फोड़ेयां दी बजाह सुअर्गे दे परमात्मं दी निंदा किन्ती; अपर अपणे अपणे कम्मां ते मन नी फिराया । 12 छैमें सुअर्गदूतें अपणां कटोरा बडी नदी फरात पर डोली दित्ता, कने तिसदा पाणी सूकी गैआ कि पूर्व दिशा दे राजेयां ताई रस्ता त्यार होई जां । 13 भिरी मैं तिस अजगरे दे मुंमें ते, कने तिस पशु दे मुंमें ते, कने तिस झूठे भविष्यवक्ता दे मुंमें ते तीन दुष्टआत्मां जो मेढकां दे रुपे च निकळदे दिख्या । 14 एह नशाण दिखाणेआळी दुष्टआत्मां हन, जेहिडयां सारे संसारे दे राजेयां दे बक्खे ते निकळी करी इसताई जांदियां हन कि तिन्हां जो सर्वशक्तिमान परमात्मं दे तिस बड़े दिन दी लड़ाईया ताई किड्वा करा – 15 “दिख, मैं चोरे साइआं ओंदा ऐ; धन सैह ऐ जेहड़ा जागदा रैहदा ऐ, कने अपणे कपड़ेयां दी रखआळी करदा ऐ कि नंगा नी घूमे, कने लोक तिसदा नंगापन नी दिखन ।” — 16 कने तिन्हां तिन्हां जो तिसा जगाह किड्वा कित्ता जेहड़ा इब्रानी च हर – मगिदोन केह्लांदा ऐ ।

17 सतमें सुअर्गदूतें अपणां कटोरा हौआ पर डोली दित्ता, कने मंदरे दे सिंहासणे ते एह बडी उआज निकळी, “होई चुकया!” 18 भिरी बिजली चमकी, कने उआज कने गर्जन होई, कने इक्क इतणा बडा हिल्लण आया कि ताहू इतणा बडा हिल्लन कदी नी आया था । 19 इसते तिस बड़े सैहरे दे तीन टुकड़े होईये, कने जाति जाति दे सैहर पैई गै; कने बड़े बेबीलोन दी याद परमात्मं दे ऐथू होया कि सैह अपणे गुस्से जलजलाहट दी मदिरा तिसियो पिलां । 20 कने हर इक टापू अपणी जगाह ते टलिया, कने फहाड़ां दा पता नी चलेया । 21 अम्बरे ते माणुआं पर मण मण भरे दे ओले पै, कने इसताई कि मुसीबत बडी ई भारी थी, लोकां ओलेयां दी मुसीबता दिया बजाह ते परमात्मं दी निंदा किन्ती ।

बडी वेश्या

17 जिन्हां सत सुअर्गदूतां अल्ल सैह सत कटोरे थे, तिन्हां च इक्की आई करी मिन्जो नैं एह ग्लाया, “ऐथू आ, मैं तिजो तिस बडी वेश्या दी सज्जा दस्सें, जेहडी मते पाणिये च बैठियो ऐ, 2 जिसा दे सौगी धरतिया दे राजेयां व्यभिचार कित्या; कने धरती दे रेंणेआळे तिसादे व्यभिचारे दे नशे ते मतवाले होईयो थे ।” 3 ताहू सैह मिन्जो आत्मां बणे जो लैई गैआ, कने मैं लाले रंगे दे पशुये पर, जेहड़ा निंदा दे नांये नैं भरेया था कने जिसदे सत मुँड कने दस सींग थे, इक्की जणांसा जो बैठया दिख्या । 4 एह जणांस बैंगणी कने लाले रंगे दे कपड़े लगाई करी बैठीयो थी, कने सोने कने कीमती मणियां कने मोतियां नैं सजियो थी, कने तिसा दे हत्थां च इक्क सोने दा कटोरा था जेहड़ा घृणित चीज्जां नैं कने तिसदे व्यभिचार दी बुरी चीज्जां नैं भरौया था । 5 तिसदे मत्थे पर एह नां लिख्या था, “भेद - बडा बेबीलोन धरतिया दी वेश्या कने घृणित चीज्जां दी मां ।” 6 मैं तिसा जणांसा जो पवित्र लोकां दा खून कने यीशु दे गवाहां दा खून पीणे ते मतवाली दिख्या; तिसायो दिक्खी करी मैं हैरान होईया । 7 ताहू तिन्हीं सुअर्गदूतें मिन्जो नैं ग्लाया, “तू कजो हैरान होया? मैं इसा जणांसा कने तिस पशुये दा, जिस पर सैह सवार ऐ कने जिसदे सत मुँड कने दस सींग हन, तिजो भेद दस्सदा । 8 जेहड़ा पशु तैं दिख्या ऐ, सैह पैहलें तां था पर हुण नी ऐ, कने अथाह कुंडे ते निकळी करी विनाशे च पौगा; कने धरतिया दे रेंणेआळे जिन्हां दे नां संसारे दी उत्पति दे बत ते जिन्दिगिया दी कताबा च लिखेयो नी गैयो, इस पशु दी एह हालत दिखी करी कि पैहले था कने हुण नी ऐ कने भिरी आई जांगा, हैरान होंगे । 9 तिसा अक्का ताई जिस च ज्ञान ऐ, ऐही मौका ऐ : सैह सत मुँड सत फहाड़ हन जिन्हां पर सैह जणांस बैठियो ऐ । 10 सैह सत राजे भी हन, पंज तां होई चुके हन, कने इक्क अल्ली ऐ, कने इक्क अल्ली तिकर आया नी, कने जाहू ओंगा तां कुच्छ बगत तक तिसदा रेंहणा भी जरूरी ऐ । 11 जेहड़ा पशुथा, कने हुण नी ऐ, सैह अप्पु अठमा ऐ कने तिन्हां सतों च पैदा होया, कने विनाशे च पौगा । 12 जेहड़े दस सींग तैं दिखे सैह दस राजे हन जिन्हां अल्ली तिकर राज नी पाया, अपर तिस पशुये सौगी घडी भरी ताई राजेयां दा हक्क पांगे । 13 एह सब इक्क मन होंगे, कने सैह अपणी सामर्थ कने हक्क तिस पशुये जो दिंगे । 14 सैह मेम्ने सौगी लडगे, कने मेम्ना तिन्हां पर जय पांगा, कजोकि सैह प्रभुआं दा प्रभु कने राजेयां दा राजा ऐ, कने जेहड़े सदयो कने चुणेयो कने वसुआसी हन सैह तिस दे सौगी हन; सैह भी जय पांगे ।”

15 भिरी तिन्हीं मिन्जो नैं ग्लाया, “जेहड़ा पाणी तू दिख्या, जिस पर वेश्या बैठियो ऐ, सैह तां लोक कने भीड कने जातिआं कने भासा हन । 16 जेहड़े दस सींग तू दिखेयो, सैह कने पशु तिसा वेश्या सौगी बैर रखगे, कने तिसायो लाचार कने नंगी करी दिंगे, कने तिसादा मांस खाई जांगे, कने तिसायो अग्गी च फूकी दिंगे । 17 कजोकि परमात्मां तिन्हां दे मने च एह भरगा कि सैह तिसादी मनसा पूरी करन, कने जाहू तिकर परमात्मे दा वचन पूरा नी होई लैं ताहू तिकर इक्क मन होई करी अपणां अपणां राज तिस पशुये जो दैई दैन । 18 सैह जणांस, जिसायो तैं दिख्या ऐ, सैह बडा सैहर ऐ जेहड़ा धरतिया दे राजेयां पर राज करदा ऐ ।

बेबीलोन दे पतन

18 इसदे बाद मैं इक्की सुअर्गदूते जो सुअर्गे ते लौंदे दिख्या, जिसियो बडा हक्क हासल था; कने धरती तिसदे तेजे नैं चमकी गैई । 2 तिन्हीं जोरे नैं उडी करी ग्लाया, “देईया, बडा बेबीलोन देईया सैह दुष्टआत्मां दा घर कने हर इक्क बुरिया आत्मां दा अड्डा, कने हर इक्क बुरा कने घृणित पंछिये दा अड्डा बणी गैआ । 3 कजोकि तिसदे व्यभिचार दे खतरनाक नशे दिया बजाह ते सारियां जातिआं पैई गैईयां हन, कने धरती दे राजेयां तिस सौगी व्यभिचार कित्या ऐ, कने धरतिया दे वपारी तिस दे सुख विलास दी दिया बजाह ते बड़े अमीर होये हन ।” 4 भिरी मैं सुअर्गे ते इक्क होर शब्द सुणेया, हे मेरे लोको, तिस ते निकळी ओआ कि तुहां तिसदे पापां च भागी मत होया, कने तिसदी मुसीबता ते कोई तुहां पर आई नी पायें । 5 कजोकि तिसदे पापां दा हिसाब सुअर्गे तिकर पुज्जी गैआ ऐ कने तिसदे अधर्म दे कम्म परमात्मं जो याद आये हन । 6 जिआं तिन्हीं तुहां जो दित्या ऐ तिआं ई तिसियो दैआ, कने तिसदे कम्मां मताबक तिसियो दो गुणां जादा दैआ; जिस कटोरे च तिन्हीं भरी

दित्या था तिस च तिस दे ताई दो गुणां भरी दैआ । 7 जितणी तिन्हीं अपणी तारीफ़ किन्ती कने सुख विलास किन्ता, उतणी तिसजो पीडा कने शोक दैआ; कजोकि सैह अपणे मने च ग्लांदी ऐ, 'मैं राणी बणी बैठियो ऐ, विधवा नी, कने शोक च कदी नी पोंगी । 8 इसा बजाह ते इक्क ई दिन च तिस पर मुसीबत आई पोंगी, अपर मौत, कने शोक, कने अकाल, कने सैह अग्गी च भस्म करी दिन्ती जांगी, कजोकि तिसादा न्यायी प्रभु परमात्मां शक्तिमान ऐ । 9 "धरती दे राजेयां जिन्हां तिस सौगी व्यभिचार कने सुख विलास किन्ता, जाहू तिसा दे जळणे दा धुआं दिखगे, तां तिसा ताई रोगे कने छातिया जिकने । 10 तिसा दी पीडा दे डरे दे मारे सैह बडी दूर खडे होई करी ग्लांगे, 'हे बडे सैहर, बेबीलोन! हे मजबूत सैहर हाय! हाय! घड़ी भर च तिजो सज्जा मिली गैई ऐ ।'

11 "धरती दिया बजाह ते वपारी तिसा ताई रोगे कने विलाप करगे, कजोकि अल्ली तिकर तिन्हां दा माल नी खरीदगे; 12 मतलब सोना, चांदी, रत्न, मोती, कने मलमल, कने बैजनी, रेशमी, कने लाले रंगे दे कपडे, कने हर तरांहर दी खुशबुदार लकड़ी कने हाथिये दे दंदे दी बणियां होईयां हर तरांहर दियां चीजां कने कीमती लकड़ी कने पीतल कने लोहे कने संगमरमरे नैं बणियां होईयां हर तरांहर दियां चीजां, 13 कने दाल चीनी, मसाले, धूप, इत्तर, लोबान, मदिरा, तेल, मैदा, कणक, गाय-दांड, भेड-बकरियां, घोडे, रथ, कने दास, कने माणुआं दी जान । 14 हुण तेरे मन भावने फळ तिजो अल्ले ते चली गै, कने स्वादिष्ट कने भडकीलियां चीजां तिजो ते दूर होईयां हन, कने सैह तिजो कदी नी मिलगियां । 15 इन्हां चीजां दे वपारी जेहडे तिसा दिया बजाह ते अमीर होयो थे, तिसा दी पीडा दे डरे दे मारे दूर खडूंगे, कने रोदें कने कमदे होये ग्लांगे, 16 हाय! हाय! एह बडा सैहर जेहडा मलमल, कने बैगणी कने लाले रंगे दे कपडे पैहनेयो था, कने सोने कने रत्ना कने मोतियां नैं सज्या था; 17 घड़ी भर च तिसदा इतणा भारी पैसा उजडिया था ।' हर इक्की चाहजे दा कसान कने यात्री मल्लाह, कने जितणे समुंदरे च पैसा कमांदे हन, सारे दूर खडूतेयो, 18 कने तिसा दे फकूणे दा धुआं दिखदे होये डडी करी ग्लांगे, कुण देहया सैहर इस बडे सैहरे साईआं ऐ? 19 कने अपणे अपणे मुंडा पर धूड पांगे, कने रोदें कने कमदे कने डडी डडी करी ग्लांगे, हाय! हाय! एह बडा सैहर जिसा दी सम्पति दिया बजाह ते समुंदरे दे सारे चाहजेआळे अमीर होईयो थे, घड़ी भरी च उजडी गै । 20 हे सुअर्ग, कने हे पवित्र लोको, कने प्रेरितो, कने भविष्यवक्तो, तिस पर खुश रहूआ, कजोकि परमात्में न्याय करी नैं तिस ते तुहां दा बदला लैई लैआ ऐ ।' 21 भिरी इक्क ताकतवर सुअर्गदूतें बडिया चकिया दे सिल्ला साईआं इक्क पत्थर चुकेया, कने एह ग्लाई करी समुंदरे च सट्टी दिन्ता, "बडा सैहर बेबीलोन इतणे बडे जोर लगाई नैं टाया जागा, कने भिरी तिसदा पता नी लग्गा । 22 वीण बजाणेआळ्यां, कने गायकां, कने बंसरी बजाणेआळ्यां, कने तुरही फूंकणेआळ्यां दा शब्द भिरी कदी तिजो सणाई नी दिंगा; कने कुसी कारखाने दा कोई कारीगर भी भिरी कदी तिजो नी मिलगा; कने चक्रिया दे चलणे दी उआज भिरी कदी तिजो सणाई नी दिंगी; 23 कने दिव्ये दी लौ भिरी कदी तिजो च नी चमकगी, कने लाडे कने लाडिया दी उआज भिरी कदी तिजो सणाई नी दिंगी; कजोकि तेरे वपारी धरतिया दे प्रधान थे, कने तेरे टूणे ते सारियां जातिआं भरमाईयां थियां । 24 भविष्यवक्तां कने पवित्र लोकां, कने धरतिया पर सब कत्ल किन्तेयो दा खून तिन्हां च था ।

19 इसदे बाच मैं सुअर्ग च मना इक्क बडिया भीडा जो जोरे नैं एह ग्लांदे सुणेया, "हाल्लेलूय्याह! उद्धार कने महिमा कने सामर्थ अहां दे परमात्में दी ऐ । 2 कजोकि तिसदे फैसले सच्चे कने ठीक हन । तिन्हीं तिसा बडिया वेश्या दा, जेहडी अपणे व्यभिचारे नैं धरतिया जो बदनाम करदी थी, न्याय किन्ता कने तिसा ते अपणे दासां दे खूने दा बदला लैआ ऐ ।" 3 भिरी दुई बरी तिन्हां ग्लाय, "हाल्लेलूय्याह! तिसा दे फकूणे दा धुआं लगातार उठदा रह्गा ।" 4 ताहू चौबियां स्याणयां कने चारों प्राणियां पैई करी दंडवत किन्ता, जेहडा सिंहासणे पर बैठया था, कने ग्लाय, "आमीन! हाल्लेलूय्याह ।"

मेम्ने दा व्याह

5 ताहू सिंहासणे च इक्क जोरे ते उआजा आई, "हे अहां दे परमात्में ते डरणेआळे दासो, क्या छोटे, क्या बडे; तुहां सारे तिसदी स्तुति करा ।" 6 भिरी मैं बडी भीडा दा कने मते पाणी दी उआज, कने गर्जन दी मती उआज सुणी : "हाल्लेलूय्याह! कजोकि प्रभु अहां दा परमात्मां सर्वशक्तिमान राज करदा ऐ । 7 ओआ अहां खुश कने मगन होन, कने तिसदी स्तुति करन, कजोकि मेम्ने दा व्याह आईआ ऐ, कने तिसदिया दुल्हना अपणे आप्णे जो

त्यार करी लैआ ऐ । 8 तिसा जो शुद्ध कने चमकदार मीह मलमल पैहनणे दा हक्क दित्या"--- कजोकि तिस मीह मलमले दा मतलब पवित्र लोकां दे धर्म दे कम्म हन ।

9 ताहू सुअर्गदूतें मिन्जो ग्लाय, "एह लिख कि धन सैह हन, जेहडे मेम्ने दे व्याह दी धामा च सदेयो हन ।" भिरी तिन्हीं मिन्जो ग्लाय, "एह वचन परमात्में दे सत्य वचन हन ।" 10 ताहू मैं तिसजो प्रणाम करणे ताई तिसदे पैसां पर पैई गैआ । तिन्हीं मिन्जो ग्लाय, "दिख, इआ मत कर, मैं तेरा कने तेरे भाऊआं दा संगी दास ऐ जेहडे यीशु दी गवाही दैणेयो पक्के हन । परमात्में ई जो प्रणाम करा; कजोकि यीशु दी गवाही भविष्यवाणी दी आत्मां ऐ ।

चिट्टे घोडे दा सवार

11 भिरी मैं सुअर्गें जो खुलया दिख्या, कने इक्क चिट्टा घोडा दिख्या; कने तिस पर इक्क सवार ऐ, जेहडा वसुआसे जोग्गा कने सत्य केह्वांदा ऐ; कने सैह धर्म सौगी न्याय कने लडाई करदा ऐ । 12 तिसदियां अखी अग्गी साईआं हन, कने तिसदे मुँडे पर मते सारे राजमुकट हन । तिस पर इक्क नां लिख्या ऐ, जिसियो तिसियो छड्डी होर कोई नी जाणदा । 13 सैह खूने नैं गुआचेयो कपडे लाई करी ऐ, कने तिसदा नां परमात्में दा वचन ऐ । 14 सुअर्गें दी सेना चीट्टे घोडेयां पर सवार कने चिट्टे कने शुद्ध मलमल लाई करी तिसदे पचांह पचांह हन । 15 जाति जाति जो मारणे ताई तिसदे मुँमें ते इक्क तेज तलवार निकळदी ऐ । सैह लोहे दी राजदंड लैई करी तिन्हां पर राज्य करगा, कने सर्वशक्तिमान परमात्में दे भयानक प्रकोपे दी जलजलाहट दी मदिरा दे कुंड च दाख पीगे । 16 तिसदे कपडे कने जंघा पर एह नां लिख्या ऐ, राजेयां दा राजा कने प्रभुआं दा प्रभु ।"

17 भिरी मैं इक्की सुअर्गदूते जो सूरजे पर खडूतेयो दिख्या । तिन्हीं जोरे नैं डडी करी अम्बरे दे बीच उडणेआळे सारे पंछियां जो ग्लाय, "ओआ, परमात्में दी बडी धामा ताई किट्टे होई जा, 18 जिसते तुहां राजेयां दा कने सरदारां दा कने ताकतवर मरदां दा कने घोडेयां दा कने तिन्हां पर सवारां दा मांस, कने क्या अजाद क्या दास, क्या छोटे क्या बडे, सारेयां माणुआं दा मांस खा ।" 19 भिरी मैं तिस पशु कने धरतिया दे राजेयां कने तिन्हां दी सेना जो तिस घोडे दे सवार कने तिसदिया सेना सौगी लडणे ताई किट्टे दिख्या । 20 सैह पशु, कने तिस सौगी सैह झूठा भविष्यवक्ता पकडा गैआ जिन्हीं तिसदे सामणे ऐदये नशाण दसेयो थे जिन्हां दिया बजाह ते तिन्हीं तिन्हां जो भरमाया जिन्हां पर पिस पशुये दी मोहर थी कने जेहडे तिसदिया मूर्तिया दी पूजा करदे थे । एह दोगे जो जिंदा जी तिसा अग्गी दी झीला च पाई दिन्ते, जेहडी गंधका नैं जळदी ऐ । 21 कने बाकि माणु तिस घोडे दे सवारे दी तलवारा नैं, जेहडी तिसदे मुँमें ते निकळदी थी, मारी दिन्ते गै, कने सारे पंछी तिन्हां दे मांस नैं तृप्त होई गै ।

हजारां सालां दा राज

20 भिरी मैं इक्की सुअर्गदूते जो सुअर्गें ते लौंदे दिख्या, जिसदे हत्थे च अथाह कुडे दी चाबी कने इक्क बडी जंजीर थी । 2 तिन्हीं तिस अजगरे, मतलब पराणे सर्पें जो, जेहडा इबलीस कने सैतान ऐ, पकडी करी हजारां सालां ताई बन्नी दिन्ता, 3 कने तिसियो अथाह कुंडे च पाई करी बंद करी दिन्ता कने तिस पर मोहर लगाई दिन्ती कि सैह हजार साल पूरे होणे तिकर जाति जाति दे लोकां जो भिरी नी भरमांगा । इसदे बाद जरूरी ऐ कि सैह थोडी देर ताई भिरी खोलया जां । 4 भिरी मैं सिंहासण दिखे, कने तिन्हां पर माणु बैठेयो, कने तिन्हां जो न्याय करणे दा हक्क दित्या । मैं तिन्हां दी आत्मां जो भी दिख्या जिन्हां दे मुँड यीशु गवाही दैणे कने परमात्में दे वचने दिया बजाह ते बड्डेयो थे, कने जिन्हां ना तिस पशुये दी, ना तिसा मूर्तिया दी पूजा कितियो थी, कने ना तिसदी मोहर अपणे मत्थे कने हत्थां पर लैईयो थी । सैह जिंदा होई करी मसीह सौगी हजार साल राज करदे रह्ग । 5 जाहू तिकर एह हजार साल पूरे नी होये ताहू तिकर बाकी मरेयो जिंदा नी होन । एह तां पैहली बरी दुवारा जिंदा होणां ऐ । 6 धन कने पवित्र सैह हन, जेहडे इस पैहली बरी जिंदा होणे दे भागी हन । ऐदियां पर दुईया मौता दा कुच्छ भी हक्क नी, अपर सैह परमात्मे कने मसीह दे याजक होंगे कने तिस सौगी हजार साल तिकर राज करगे ।

सैताने दा नाश

7 जाहूँ हजार साल पूरे होई जांगे तां सैतान कैदा ते छड्डी दिता जांगा । 8 सैह तिन्हां जातिआं जो जेहड़ी धरतिया दे चौनी पाससे हांगी, मतलब गोग कने मागोग जो जिन्हां दी गिणती समुंदरे दे बालू दे बराबर हांगी, भरमाई करी लडाईया ताई किडा करणे जो 9 कने सैह सारिया धरतिया पर फैली जांगी, पवित्र माणु दी छावनी कने प्यारे सैहरे जो घेरी लेंगी; कने अग्गी सुअर्गे ते लौई तिन्हां जो भस्म करगी । 10 तिन्हां दा भरमाणेआळा सैतान अग कने गंधक दी तिसा झीला च, जिस च सैह पशु कने झूठा भविष्यवक्ता भी हुंगा पाई दिता जांगा; कने सैह रात दिन जुगाजुग पीडा च तड़पदे रँहणे ।

बडा चिड्डा सिंहासण कने आखरी न्याय

11 भिरी मैं इक्क चिट्टे सिंहासणे कने तिस जो जेहड़ा तिस पर बैठया ऐ, दिखा तिस सामणे ते धरती कने अम्बर नठी गै, कने तिन्हां ताई जगाह नी मिली । 12 भिरी मैं छोटे बडे सारे मरेयां जो सिंहासणे सामणे खडूतेयो दिख्या, कने कताबां खोलियां; कने इक्क होर कताब खोली, मतलब जिन्दगिया दी कताब कने जिआं तिन्हां कताबां च लिख्या था, तिआं ई तिन्हां दे कम्मा मताबक मरेयां दा न्याय किता । 13 समुंदरे तिन्हां मरेयां जो दैई दिता, कने मौत कने नरकें तिन्हां मरेयां जो जेहड़े तिन्हां च थै दैई दिता; कने तिन्हां च हर इक्की दे कम्मां मताबक न्याय किता । 14 मौत कने नरक अग्गी दी झीला च पाई दिते । एह अग्गी दी झील दूई मौत ऐ; 15 कने जिस कुसी दा नां जिन्दगिया दी कताबा च लिख्या नी मिला, सैह अग्गी दी झीला च पाई दिता ।

नौआं अम्बर कने नौई धरती

21 भिरी मैं नौये अम्बरे कने नौईया धरतिया जो दिख्या, कजोकि पैहला अम्बर कने पैहली धरती जांदी रैई थी, कने समंदर भी नी रैहआ । 2 भिरी मैं पवित्र नौये सैहर यरुशलेमे जो सुअर्गे ते परमात्मं सौगी लौंदे दिख्या । सैह तिसा लाडिया 3 भिरी मैं सिंहासणे च कुसी जो जोरे नैं एह ग्लां दे सुणेया, “दिख, परमात्मं दा डेरा माणुआं दे बिच ऐ । सैह तिन्हां सौगी डेरा करगा, कने सैह तिसदे लोक हांगे, कने परमात्मां अप्पु तिन्हां दे सौगी रँह्या कने तिन्हां दा परमात्मां हुंगा । 4 सैह तिन्हां दियां अखी ते सारे आंसू पुंझी दिंगा; कने इसदे बाद मौत नी हांगी, कने ना शोक, ना विलाप, ना पीडा हांगी; पैहलियां गलां होई चुकियां ।”

5 जेहड़ा सिंहासणे पर बैठया था, तिन्हीं ग्लया, “दिख, मैं सब कुच्छ नौआं करी दिंदा ।” भिरी तिन्हीं ग्लया, “लिखी लै, कजोकि एह वचन वसुआसे दे जोगे कने सत्य हन ।” 6 भिरी तिन्हीं मिन्जो ग्लया, “एह गलां पूरियां होइआं हन । मैं अलफा कने ओमेगा, शुरू कने अंत ऐ । मैं प्यासे जो जिन्दगिया दे पाणिये दे छरुडेयां च सेंटमेंत पियांगा । 7 जेहड़े जय पां दे हन सैई इन्हां चीजां दा वारस हुंगा, कने मैं तिसदा परमात्मां हुंगा कने सैह मेरा पुत्तर हुंगा । 8 अपर डरफोकां, कने वेवसुआसियां, कने धिनौनेयां, कने हत्यारेयां कने व्यभिचारियां, कने जादू टूणे करणेआळेयां, कने मूर्तिपूजकां, कने सारे झूठयां दा हेस्सा तिसा झीला च मिलगा जेहड़ा अग्गी कने गंधका नैं जळदा रँहदा ऐ : सैह दूई मौत ऐ ।”

नौआं यरुशलेम

9 भिरी जिन्हां सत सुअर्गदूतां अल्ल सत लास्ट मुसीबतां नैं भरौयो कटोरे थे, तिन्हां च इक्क मिन्जो अल्ल आया, कने मिन्जो सौगी गलां करी नैं ग्लया, “ऐत्थू आ, मैं तिजो मेम्ने दी लाडी दसदा ।” 10 ताहूँ सैह मिन्जो आत्मां च इक्क बडे कने उचे पहाड़े पर लैईया, कने पवित्र सैहर यरुशलेमे जो सुअर्गे ते परमात्मं सौगी लौंदे दिख्या । 11 परमात्मं दी महिमा तिन्हां च थी, कने तिसदी ज्योति बडे कीमती पत्थर या बिल्लौरै साइआं यशब दी तराह खरी थी । 12 तिसदी शहरपनाह बडी ऊची थी, कने तिसदे बाराह दुरआजे कने दुरआजेयां पर बाराह सुअर्गदूत थे; कने तिन्हां दुरआजेयां पर इस्रालियां दे बाराह गोत्रां दे नां लिखेयो थे । 13 पूर्व, पश्चिम, उत्तर, दक्षिण, इन्हां चौनी दिशाओं पाससें त्रे त्रे दुरआजे थे । 14 सैहर दी शहरपनाह दियां बाराह नीआं थियां, कने तिन्हां नीआं पर मेम्ने दे बाराह चेलयां दे नां लिखेयो थे ।

15 जेहड़ा मिन्जो सौगी गलां करा दा था तिसिया अल्ल सैहरे कने दुरआजेयां कने तिसदी शहरपनाह जो नापणे ताई इक्क सोने दा गज था । 16 सैह सैहर वर्गाकार बसेया था कने तिसदी लम्बाई, चौडाई, बराबर थी; तिन्हीं तिस कने नैं सैहरे जो नापया, तां साढे सत सौ कोस निकळेया : तिसदी लम्बाई कने चौडाई कने उंचाई बराबर थी । 17 तिन्हीं तिसदी शहरपनाह जो माणु दे मतलब सुअर्गदूत दे नापे सौगी नापेया, तां इक्क सौ चौताली हत्थ निकळी । 18 तिसदी शहरपनाह यशब दी बणियो थी, कने सैहर ऐदेय शुद्ध सोने दा था जेहड़ा साफ शीशे साइआं था । 19 तिस सैहरे दी नीआं हर तराह दे कीमती पत्थरां नैं सजाईयां थियां; पैहली नीअ यशब दी, दूई नीलमणि दी, त्री लालडी दी, चौथी मरकत दी, 20 पंजमी गोमेदक दी, छेमी माणिक्य दी, सतमी पितमणि दी अठमी पेरोज दी, नौमी पुखराज दी, दसमी, लहसनिने दी, ग्यारवीं धूम्रकान्त दी, कने बारवीं याकूत दी थी । 21 बाराह दुरआजे बाराह मोतियां दे थे; इक्क इक्क दुरआजा इक्क इक्क मोतिये दा बणेया था । सैहरे दी सडक साफ शीशे साइआं शुद्ध सोने दी थी ।

22 मैं तिन्हां च कोई मंदर नी दिख्या, कजोकि सर्वशक्तिमान प्रभु परमात्मां कने मेम्ना तिसदा मंदर ऐ । 23 तिस सैहरे च सूरज कने चन्द्रमे दे परगडे दी जरूरत नी, कजोकि परमात्मं दे तेजे नैं तिस च परगडा हो दा ऐ, कने मेम्ना तिसदा दिख्या ऐ । 24 जाति जाति दे लोक तिसदी जोती च चलगे - फिरगे, कने धरतिया दा राजा अपणे अपणे तेज दा समान तिस च लैयांगे । 25 तिसदे दुरआजे दिन जो कदी बंद नी हांगे, कने रात औत्थू नी हांगी । 26 लोक जाति जाति दे तेज कने वैभव दा समान तिस च लैयांगे । 27 कने तिस कोई अपवित्र चीजां या घृणित कम्म करणेआळे, या झूठ दा गढ़णआळे, कुसा भी तरीके नैं प्रवेश नी करगा; अपर सिर्फ सैह माणु जिन्हां दे नां मेम्ने दी जिन्दगिया दी कताबा च लिख्यो हन

22 भिरी तिन्हीं मिन्जो बिल्लौरै दी झलकती होई, जिन्दगिया दे पाणिये दी नदी, जेहड़ी परमात्मं कने मेम्ने दे सिंहासणे ते निकळी करी 2 तिस सैहरे दी सडकां दे बिचों बिच बेहंदी थी नदिया दे इस पार कने उस पार जिन्दगिया दा रुख था; तिस च बाराह किस्मा दे फळ लगदे थे, कने सैह हर मीहे फळदा था; कने तिस रूखे दे पतरां ते जाति जाति दे लोक चंगे हांदे थे । 3 भिरी सराफ नी हुंगा, कने परमात्मां कने मेम्ने दा सिंहासण तिस सैहरे च हुंगा कने तिसदे दास तिसदी सेवा करगे । 4 सैह तिसदा मुँ दिखगे, कने तिसदा नां तिन्हां दे मत्थेयां पर लिख्या हुंगा । 5 भिरी रात नी हांगी, कने तिन्हां जो दिख्ये कने सूरजे दे परगडे दी जरूरत नी हांगी, कजोकि प्रभु परमात्मां तिन्हां जो परगडा करगा, कने सैह जुगाजुग राज करगे ।

यीशुये दा दुवारी ओणां

6 भिरी तिन्हीं मिन्जो ग्लया, “एह गलां वसुआसे दे जोगियां कने सत्य हन । प्रभुयें, जेहड़ा भविष्यवक्तां दी आत्मां दा परमात्मां ऐ, अपणे सुअर्गदूते जो इसताई घल्लया कि अपणे दासां जो 7 “दिख, मैं तौळी ओणेआळा । धन हन सैह जेहड़ा इसा कताबा दी भविष्यवाणी दी गलां मनदा ऐ ।”

8 मैं सैई यूहन्ना ऐ, जेहड़ा इन्हां गलां सुणदा कने दिखदा था । जाहूँ मैं सुणेया कने दिख्या, तां जेहड़ा सुअर्गदूत मिन्जो एह गलां दसदा था, मैं तिसदे पैरां पर दंडवत करणे ताई पैई गैआ । 9 अपर तिन्हीं मिन्जो ग्लया, “दिख इआं मत कर; कजोकि मैं तेरा, कने तेरे भाऊ भविष्यवक्ता कने इसा कताबा दी गलां जो मनणेआळेयां दा संगी दास ऐ । परमात्मां ई जो प्रणाम कर ।” 10 भिरी तिन्हीं मिन्जो ग्लया, “इसा कताबा दियां गलां जो बंद मत कर; कजोकि बत नैडैं आईआ ऐ । 11 जेहड़ा अन्याय करदा ऐ, सैह अन्याय ई करदा रँह; कने जेहड़ा मलिन ऐ, सैह मलिन बणी रँह; कने जेहड़ा धर्मी ऐ, सैह धर्मी बणी रँह; कने जेहड़ा पवित्र ऐ; सैह पवित्र बणी रँह ।” 12 “दिख, मैं तौळी ओणेआळा । कने हर इक्की दे कम्मे मताबक बदला दैणे ताई हिसाब मिन्जो अल्ल ऐ । 13 मैं अलफा कने ओमेगा, पैहला कने आखरी, शुरू कने अंत ऐ । 14 “धन सैह हन, जेहड़े अपणे कपडे धोई लेंदे हन, कजोकि तिन्हां जो जिन्दगिया दे रूखे अल्ल ओणे दा हक्क मिलगा, कने सैह दुरआजेयां च होई करी अंदर जांगे । 15 अपर कुत्ते, कने जादू टूणे कने व्यभिचारी, कने हत्यारे कने मूर्ति दी पूजा करणेआळे, कने हर इक्क झूठ जो चाह्णेआळा कने गढ़णेआळा बाहर रँह्या । 16 “मिन्जो यीशुयें अपणे सुअर्गदूते जो इसताई घल्लया, कि तुहां दे गांह कलेसियां दे बारे च इन्हां गलां दी गवाही दें । मैं दाऊदे दा मूल कने वंश, कने भ्यागा दा चमकदा तारा ऐ ।” 17 आत्मां कने

लाड़ी दोयो ग्लादियां हन, "आ!" कने सुणनेआळा भी ग्लां, "आ!" जेहड़ा प्यासा होयें सैह ओयें, कने जेहड़ा कोई चां सैह जिन्दगिया दा पाणी सेंतमेंत लैआ ।

नचौड़

¹⁸ में हर इक्की जो, जेहड़ा इसा कताबा दी भविष्यवाणी दी गलां सुणदा ऐ, गवाही दिंदा : जे कोई माणु इन्हां गलां च कुच्छ बधां तां परमात्मां तिन्हां

मुसीबतां जो, जेहड़ियां इसा कताबा च लिखियां हन, तिस पर बधागां । ¹⁹ जे कोई इसा भविष्यवाणी दी कताबा दी गलां च कुच्छ कड्डी दें, तां परमात्मां तिसा जिन्दगिया दे रूखे कने पवित्र सैहरे च, जिसदा वर्णन इसा कताबा च ऐ, तिसदा हिस्सा कड्डी दिंगा । ²⁰ जेहड़ा इन्हां गलां दी गवाही दिंदा ऐ सैह एह गलांदा ऐ, "हाँ, मैं तौळी ओणेआळा ।" आमीन हे प्रभु यीशु आ! ²¹ प्रभु यीशु दा अनुग्रह पवित्र माणुआं सौगी रैह ।